


# Katcha



Katcha-Kadugli-Miri: Katcha (Old Testament)

## Katcha

### Katcha-Kadugli-Miri: Katcha (Old Testament)

copyright © 2020 Wycliffe Bible Translators, Inc.

Language: (Katcha-Kadugli-Miri)

Contributor: ECS Diocese of Khartoum Translation Department

All rights reserved.

2020-11-18

---

PDF generated using Haiola and XeLaTeX on 22 Feb 2024 from source files dated 29 Jan 2022

bc98a4a0-1c85-5c7a-932a-7dcefd213f80

## Contents

Matta . . . . .	1
Murkus . . . . .	69
Lüüka . . . . .	111
Yühanna . . . . .	182
Kadafiini . . . . .	234
Rööma . . . . .	299
1 Kürünsüs . . . . .	327
2 Kürünsüs . . . . .	354
Galatiya . . . . .	372
Afosus . . . . .	383
Filippi . . . . .	393
Kölösi . . . . .	400
1 Tasalanüki . . . . .	407
2 Tasalanüki . . . . .	413
1 Timosaws . . . . .	417
2 Timosaws . . . . .	425
Tito . . . . .	431
Filimon . . . . .	435
Ebraniin . . . . .	437
Yaguub . . . . .	458
1 Bütrüs . . . . .	466
2 Bütrüs . . . . .	474
1 Yühanna . . . . .	479
2 Yühanna . . . . .	487
3 Yühanna . . . . .	489
Yahüusa . . . . .	491
Tumma tanno	
Yasu . . . . .	494

## İnjiiili Matta Tafa'da tumma

Matta i'i ya aga ömö'dü ma tulu'ba ma naguugaara ma Rööma ka Yasu ka tagümmünü i'i ma turna i'i keere. A Yasu tagesse i'i a'da alingga nja kadaifiini tanno ö'dö kada'baaga kafünü eera no. Matta arigiri a Yahüdü a'da Yasu i'i ya Almasiihi tiya Masala ka takiki a'da ara oogo tagürünü. Matta afa'da tumma ma sorne a nagereene ma kadaada alla aco ka Dawud nja Abrahiim. I'i iki a'da, Yasu atüümö tumma na nagane'bi ka tagoomma 'billi no.

Matta adiri tumma ma tanneene ma tauugaara ma Masala kafaanya. I'i iki angnga a'da tauugaara ma Masala kama kadu in'dili na linggo eema ya Masala ka asaasa. Ka Yasu ka fiki'dö ndama inde ya, adirina eema a kadalaadene tanno iini a'da kunggeene kaco talaana kadu nye'd'e amang kene ta kadalaadene tanno iini (Matta 28.20).

### Kadaada ma Yasu (Lüüka 3.23-38)

<sup>1</sup> Sorne ya ma nagereene ma kadaada ma Yasu Almasiihi, 'bii'bala ya Dawud, 'bii'bala ya Abrahiim.

<sup>2</sup> Abrahiim tageene Ishak, Ishak tageene Yaguub, a Yaguub tageene Yahüüsa nja nagöre tanno iini.

- 3 A Yahüüsa tageene Fares nja Zareh ndama Tamar,
- a Fares tageene Hasrüün, a Hasrüün tageene Aram.
- 4 A Aram tageene Aminadab, Aminadab tageene Nahashön,
- a Nahashön tageene Salmöön.
- 5 A Salmöön tageene Büwas ndama Rihab,
- a Büwas tageene Obiid ndama Rawus, Obiid tageene Yessi.
- 6 A Yessi tageene Dawud ya uugaara ya.
- A Dawud tageene Siliman ndama aka tammo Üüriya.
- 7 A Siliman tageene Rahabam,
- a Rahabam tageene Abiya, Abiya tageene Asa.
- 8 Asa tageene Yüshafat, a Yüshafat tageene Yüram, a Yüram tageene Üsiya.
- 9 A Üsiya tageene Yüsam, a Yüsam tageene Ahas, Ahas tageene Hasakiya.
- 10 A Hasakiya tageene Manasi,
- a Manasi tageene Amüün, a Amüün tageene Yüsiya.
- 11 A Yüsiya tageene Yakniya nja nagöre tanno iini ka ürüünü ma tadasaga ka Babil.
- 12 A kadu kanco ka tadasaga ka Babil ya, a Yakniya tageene Shaltiil, a Shaltiil tageene Zarbabil.
- 13 A Zarbabil tageene Abiyahüt.
- Abiyahüt tageene Aliyakiim. Aliyakiim tageene Asüür.
- 14 Asüür tageene Sadük,

a Sadük tageene Akiim,  
a Akiim tageene Alyüd.

<sup>15</sup> Alyüd tageene Aliaser,  
a Aliaser tageene Mattan,  
a Mattan tageene Yaguub.

<sup>16</sup> A Yaguub tageene Yüüsif  
nyuri ya Mariyom  
tammo ageene Yasu  
mo, ya ana eere a'da  
Almasiihi ya.

<sup>17</sup> A sere ya nye'd'de  
ndama Abrahiim öö'dö ka  
Dawud, ö'dö ada'baaga  
afünü egiiösö. Kandö'dö  
ndama Dawud alla aaco ka  
tadasaga ka Babil, a sere  
ya miini ya ö'dö ada'baaga  
afünü egiiösö. A sere ya ö'dö  
ndama Babil ya alla aaco  
ka Almasiihi ö'dö ada'baaga  
afünü egiiösö.

*Teeenedene na Yasu Al-  
masiihi  
(Lüüka 2.1-7)*

<sup>18</sup> Teeenedene na Yasu Al-  
masiihi kungngo, ka Yüüsif  
ka tagümmünü Mariyom  
ku'bu ya, maduna eyi  
yoono ka küröönö ndama  
Koronggore tiya Insili ya  
a'da küfürü ta'duga ajeene.  
<sup>19</sup> A Yüüsif i'i a'diila i'i taalo  
asaasa tanangnga modolo  
oono ka oona, ikirü ka asaasa  
taadha kono kumu kume  
ün'düngngö.

<sup>20</sup> A kini ka tasünggiri  
ma tumma tanno ya, a  
tadhangga ma Masala ö'dö  
kini a kümböödö iki iini,  
"Yüüsif 'bii'bala ya Dawud,  
fa tari'ba ma ta'duga aka  
müüdü Mariyom kada aka  
tammo üüdü, kudumma  
tagüröönö tanno oono ka  
oona no, ndama Koronggore

tiya Insili ya. <sup>21</sup> Mara teene  
'bii'bala nanangnga eere iini  
a'da Yasu, kudumma iini  
kara toolona kadu niini ka  
eema tiya toroko ya."

<sup>22</sup> Tumma no ka inynyo  
ööye miini afa ma tiya  
Uugaara ka takatiraana a  
niinö tanno ne'bi Asaya no  
kungngo,

<sup>23</sup> "Badaada ma tölömü  
mara tagüröönö  
meene 'bii'bala  
kanangnga eere iini a'da  
Emanwiil"  
a'da, Masala nja angnga.

<sup>24</sup> Ka Yüüsif ka ajeene  
ka tarigide ya, adagalinggo  
afa ma tiya tadhangga ma  
Masala ka tirina iini ya,  
a'duga aka miini. <sup>25</sup> Lakiini  
i'i itaalo iiyü nja oono midhi  
ma tageene 'bii'bala yoono,  
a Yüüsif tanangnga eere iini  
a'da Yasu.

## 2

### *Kamasala*

<sup>1</sup> Ka Yasu ka tageenedene  
ka Beetlaham ma Yahüüdiya  
ka ürüünü tanno Hirüdüs  
kadagauugaara ya, a'da  
köö'dö kamasala na ussu  
tumma ma midigi no ndama  
fiinü ma ndanaaya, köö'dö  
ka Örsaliim. <sup>2</sup> Kiki a'da,  
"Uugaara ma Yahüüdü ya  
ageenedene ya iiye? Kasala  
ungngo timidigi niini ka fiinü  
ma ndanaaya, yungngo iidü  
köö'dö tafara kini."

<sup>3</sup> Ka Hirüdüs ka taföönyö  
tumma no ya, a ri'ba tümmü  
i'i nja kadu ma Örsaliim  
nye'd'de kungngo. <sup>4</sup> İkirü

ka tawagaana naguugaara ma ka'boge koona nja kata-laana ma seriye indini eege iki, "Ara Almasiihi teene-dene kiga?"

<sup>5</sup> Kiki iini, "Ka Beetlaham ma Yahüüdiya, kudumma ne'bi ka tagarigiri ada ka sorne iki,

<sup>6</sup> 'Ka Beetlahamanya ma Yahüüsa taalo o'o na dhilli ka naguugaara ma Yahüüsa, kudumma uugaara kara tö'dö ndama o'o öö'dö tafa ka kadu tanno eede Israyil.'

<sup>7</sup> İkiriİ Hirüdüs ka tagümmünaana kamasala koona kume kume indini eege ma uuru tanno timidigi ka tö'dö ko'do iini no. <sup>8</sup> İkiriİ ka tuurugu eege co Beetlaham iki eene, "Aaga agolo aaga co tawwa 'buugu ma 'bii'bala amussu kada kaduna i'i ya aaga tadirina a'a nöö'dö tafara kini tekere."

<sup>9</sup> Kene ka ndaföönyö tumma ka uugaara ya, kikirii ka tunggeene, kene ka tunggeene a timidigi neene ka tijöögö ka fiinii ma ndanaaya no, kunggeene kene kidha kidhi köödhü ka üüdü ma 'buugu tiya 'bii'bala ka tanna kide ya. <sup>10</sup> Kene ka tasala timidigi kikirii ka tadhodho 'do. <sup>11</sup> Kikirii ka co a 'bügööri kaduna 'bii'bala nja niimö tammo iini Mariyom. Kikirii ka tüürü ku'bu ana küüge kamma kini, kikirii ka tafa'da nakanjoko neene kanangga

dahaba iini nja kondho nja maaga. <sup>12</sup> A Masala tiki eene a kümböödö a'da kafa tapadaga ka Hirüdüs kanna, kikirii ka tigaala ka fiinii tököönö kacoanya tammo eene.

### *Tarünö ma co Misiri*

<sup>13</sup> Kene ka ndunggeene ya ikirii tadhingga ma Uugaara ka öö'dö ka Yüüsif a kümböödö iki iini, "Fiki'dö na'duga 'bii'bala nja niimö narünö naco a Misiri nanna kide, ara a'a saga tirina o'o aaga sa köö'dö, kudumma Hirüdüs ka asaasa tawwa 'buugu ma 'bii'bala iidi i'i." <sup>14</sup> İkiriİ Yüüsif ka fiki'dö a'duga 'bii'bala nja niimö ooso kungngo kaco Misiri, <sup>15</sup> adaganna kide idhi Hirüdüs teyi. Tumma no ka inynyo ööye miini afa ma tiya Uugaara ka takatiraana a niinö tanno ne'bi Asaya no kungngo, "Natümmünü a'a 'bii'bala yeede ndama Misiri."

<sup>16</sup> Ka Hirüdüs ka tassa ka kamasala katümmüñü ünggü iini ya, ikirii ka agoroo'bo 'do, ikirii ka kürünü nasigira kagirina laala ya nagiide ya ka Beetlaham nja na'buugu tanno kete kide no, laala ma nagürüünü keera kadara co tanno asigi kene no tamana ma uuru tanno iini ka taföönyö ka kamasala no. <sup>17</sup> A tumma na ne'bi Armiya ka tatiraana no tarooro ka co ööye miini,

<sup>18</sup> "Kaföönyö kadu takeere ka Raama,

fara nja ndhiidhe  
 ko'd'do.  
 Rahiil mafara kudumma  
 laala tiya oono  
 taalo masaasa kadu ka  
 talomo oogo  
 kudumma eene ka taalo  
 kefe ka 'di."

### *Tafada ndama Misiri*

19 Aga Hirüdüs ka ndeyi  
 ya, ikirii tadhingga ma  
 Masala ka öö'dö ka Yüüsif  
 a kümböödö ka Misiri,  
 20 iki iini, "Fiki'dö na'duga  
 'bii'bala nja niimö nafada  
 naco anya ma Israyil,  
 kudumma kadu tanno  
 asaasa tagiidi i'i no kaaya."

21 İkirii ka fiki'dö a'duga  
 'bii'bala nja niimö aco anya  
 ma Israyil. 22 İkirii ka  
 föonyö a'da Arkilaus ümmü  
 tauugaara na pupa tiya iini  
 Hirüdüs ka Yahüüdiya, ikirii  
 ka ari'ba co. A Masala tiki  
 iini a kümböödö, ikirii ka  
 tunggeene aco Jaliil. 23 Öö'dö  
 ka anya tammo ana eere  
 a'da Nasira mo adaganna  
 kide, amang ka tumma  
 tanno nagane'bi co ööye  
 miini, "Ara tana eere a'da  
 taga Nasira."

## 3

### *Yühanna ya tatambeese ya indinaana fiinii*

(Murkus 1.1-8; Lüüka  
3.1-18; Yühanna 1.19-28)

1 Ka naguuru tanno mi-  
 ni no, agöö'dö Yühanna ya  
 Tatambeese ya, ka dhüile ma  
 Yahüüdiya adünögü tumma  
 ma İnjüili co a kadu, 2 "Aaga  
 aadha ka linggo ma eema

tiya toroko ya kudumma  
 tauugaara ma 'dotombo'do  
 ka ndakete." 3 Yungno  
 a ne'bi Asaiya ka tageema  
 tumma miini iki a'da,  
 "Kafara takeere ka dhüile,  
 'Aaga indinaana fiinii ka Uu-  
 gaara ku'bu,  
 aaga indinaana nafiinii  
 kini ku'bu, ka tad-  
 hidho.'"

4 A Yühanna tagümmü  
 en'di ma musa ma naga-  
 malaga ka oona imi'di  
 eedi ana jönnö ma öttö  
 aagu müdüünii nja küde  
 ma dhüile. 5 A kadu ta  
 kicci kini ndama Örsaliim  
 nja Yahüüdiya nye'd'de  
 nja na'buugu tanno kete  
 ka Ri ma Ürdün no.  
 6 Atagambeese eege ka Ri  
 ma Ürdün eene ka tamma  
 ka Masala kaadha ka eema  
 tiya toroko ya.

7 A Yühanna tiji naFariisi  
 nja Sadügiin dhabbu ka ticci  
 kini ma tambeese, ikirii ka  
 tiki eene, "Aaga na laala ma  
 nöönii no! Mada i'i yungno  
 alaana aaga ka nafiinii aaga  
 tarünö ka tagoroo'bo tanno  
 unggunu tö'dö no? 8 Aaga  
 alinggo eema ya a'diila ya  
 ara tanangnga kadu katussu  
 a'da kaadha aaga ka eema  
 tiya toroko ya. 9 Aaga tafa  
 tiki ka nanggeyi tanno ada  
 a'da Abrahiim ya pupa tiya  
 ada, nükirii a'a ka tiki aaga,  
 Masala mana türü moono  
 kara ta'bele niigisi no kada  
 laala tiya Abrahiim. 10 Asa  
 kafa takete ka teedhe ereere  
 ma naafa, fa ya taalo ö'dö

ana iiye ka'diila ya, atendhe apügünja ka issi.

<sup>11</sup> "Nambeese a'a aaga a 'biidi ma toolona tatoroko. Lakiini ömö'di inggide ara tö'dö kede keere agii'bi a'a nitaalo natambaanya tagildhe egiide yiini ara tambeese aaga a Koronggore tiya Insili ya nja issi. <sup>12</sup> Si'diga ma ungngo iini agirnaana 'deeli ko'do iini awagaana migile miini koona uurugu co 'boode, ara kafü issi ka koforo ka finne turi."

*Yühanna ambeese Yasu*  
(Murkus 1.9–11; Lüüka 3.21–22)

<sup>13</sup> A Yasu ka ö'dö ndama Jaliil aaco Ürdün ka Yühanna a'da ambeese i'i. <sup>14</sup> Lakiini Yühanna anu iki iini a'da, "Nagala a'a ka asaasa o'o ka tambeese a'a, na o'o sa agala ka öö'dö kede adha?"

<sup>15</sup> İkiri Yasu ka tiki iini, "Fa kide ama 'bitüngnö, amang kaja tafara linggo na Masala." Yungno Yühanna ka tamma.

<sup>16</sup> Ka Yasu kanda kambeesedene ikiri ka öö'dö ko'do ndama 'biidi, a 'dotombo'do tatanfa'da asala Koronggore ya Masala ka tunggunuaku'bu ka afeene nja ndalambo idhi kini ka oona. <sup>17</sup> A tumma tö'dö ndama 'dotombo'do kiki, "'Bii'bala yeede ka asaasa i'i dhorro ya, i'i yungno, ka'diila oona eede ma iini."

4:4 4.4 Seriye ya eera ya 8.3  
4.7 Seriye ya eera ya 6.16

*Ebliisi a'b'ba Yasu*  
(Murkus 1.12–13; Lüüka 4.1–13)

<sup>1</sup> A Koronggore tüügü Yasu aaco dhüile iini, a Ebliisi co ta'b'ba i'i. <sup>2</sup> Ümmü tenege a füngnö ukumu kadu keera ooso kungngo ana uuru miini, idhi iire tümmü i'i. <sup>3</sup> İkiri Ebliisi ka öö'dö kini iki iini, "Üürü o'o na 'Bii'bala ma Masala, iki a nügisi tanno ka tem'bele kada miteene."

<sup>4</sup> İkiri Yasu ka tiki iini, "Sorne ma Masala iki, 'Taalo miteene unggodho oogo mamana ömö'di keefe ka 'dö iini, lakiini a tumma tanno Masala ka teema no nye'd'de.'

<sup>5</sup> İkiri Ebliisi ka 'duga i'i aaco anya tammo insili mo iini, anangnga i'i ka 'dingnge ka la ma Masala ka 'dasala ko'd'do. <sup>6</sup> Iki iini, "Üürü o'o na 'Bii'bala ma Masala ya, pügü eyi yüdü caa'bu kudumma sorne ma Masala ka tiki a'da, 'Ara Masala tiki a kadhangga tanno oono a'da kaada o'o ana ii sine kudumma müsi kara teedhe o'o ka awwa.'

<sup>7</sup> İkiri Yasu ka tiki iini, "Sorne ma Masala iki a'da, 'Fa ta'b'ba Masala Uugaara müüdü ka oona.'

<sup>8</sup> Ebliisi ta'duga Yasu asirö anya ma dhonggoro mo iini, aala i'i ka tauugaara ma 'büdhülü nja türü miini nye'd'de kungnö. <sup>9</sup> Iki iini,

4:6 4.6 Tüüsü ma Nakaaru 91.11–12 4:7

"Eema ya nye'd'de kungngo  
ara a'a tanangnga o'o, küdü  
kara tüürü ku'bu kede kidha  
namma kede."

<sup>10</sup> İkiri Yasu ka tiki iini,  
"Sigi co kannna kede ka oona  
o'o na Ebliisi no, sorne ma  
Masala iki,

'Üürü ku'bu ana küüge  
kidha ma Masala  
Uugaara müüdü  
nalinggo ada oono  
unggodho oogo,  
üdü ka tüürü ku'bu  
namma kono.'

<sup>11</sup> İkiri Ebliisi ka tinyi i'i  
ku'bu, a kadhangga tö'dö  
kalinggo ada iini.

*Yasu alaana kadu ka Jaliil*  
(Murkus 1.14-15; Lüüka  
4.14-15)

<sup>12</sup> Aga Yasu ka taföönyö  
a'da Yühanna ananja  
ka pabuuus ya, ikiri ka  
tunggeene aaco Jaliil. <sup>13</sup> İkiri  
ka tunggeene ka Nasira aco  
tanna ka Kafarnahööm ka  
tinggini ma to ma Jaliil,  
ka anya ma Zabaloon nja  
Naftali. <sup>14</sup> Amang ka tumma  
tanno ne'bi Asaiya ka takiki  
no, co ööye miini.

<sup>15</sup> "Ka 'büdhülü ma Za-  
balloon nja Naftali,  
ndama nafiinii ma to ma  
tadigaala ka Ürdün,  
Jaliil ma kajeene.

<sup>16</sup> Kadu na anna ka ndüüli  
no,  
kasala töyeene na  
dhabbu no  
a kadu na anna ka 'buugu  
ma ndüüli ma inde no  
ka'daranja töyeene  
kene ka oona."

<sup>17</sup> Ndama uuru tanno  
miini no ikiri Yasu ka ta-  
laana kadu iki, "Aaga aadha  
ka tatoroko kudumma  
tauugaara ma 'dotombo'do  
kanda kete."

*Kadalaadene na dhidha  
no*

(Murkus 1.16-20; Lüüka  
5.1-11)

<sup>18</sup> A Yasu tagunggeene ka  
tinggini ma to ma Jaliil asala  
nagöre keera, Samaan yeene  
ka tümmünü i'i a'da Bütrüs  
ya nja örre tiya iini An-  
draws kapapügü sa'baka co  
to kudumma eene ka tümmü  
kilöögö. <sup>19</sup> İkiri Yasu ka  
tiki eene, "Aaga ö'dö kede  
keere nalaana aaga ka kinne  
kadu." <sup>20</sup> Kikiri karooro ka  
tinyi nasa'baka neene ku'bu  
kara kaduurna i'i keere.

<sup>21</sup> Unggeene ndama kannna  
asala nagöre könö keera  
afe'de, Yaguub 'bii'bala ya  
Za'bedi nja örre tiya iini ya  
ana eere a'da Yühanna ya,  
kungngo ka mürkabü, nja  
pupa tiya eene Za'bedi kindi-  
naana nasa'baka neene, ikiri  
Yasu ka tagümmünü eege.  
<sup>22</sup> Karooro ka tinyi mürkabü  
ku'bu nja pupa tiya eene  
kara kaduurna i'i keere.

*Yasu oolona kadu ka  
maara*  
(Lüüka 6.17-19)

<sup>23</sup> A Yasu takunggunaana  
ku'bu ka naanya ma Jaliil  
nye'd'de kungngo, alaana  
kadu ka naala ma talaana  
adünögü tumma ma tau-  
ugaara ma 'dotombo'do  
eene, oolona kadu ka maara.  
<sup>24</sup> A tumma miini tanyala

ku'bu ka Süüriya nye'd'de kungngo, a kadu na maara no tö'dö kini nye'd'de nja tanno nagoronggore ka talingga eege no, nja namügüre nja tanno ana insigiri no, oolona eege.<sup>25</sup> A kadu ma Jaliil tuurna i'i keere kadhabbu, nja Naanya tanno ada'baaga no nja Örsaliim nja Yahüüdiya nja nda'da ma Ürdün.

## 5

*Talaana na Yasu ka 'dikinya*

<sup>1</sup> Aga Yasu ka tasala kadu kadhabbu ya, ikirii ka sörö 'dikinya emmi, a kadalaadene niini tö'dö kini kete,<sup>2</sup> ikirii ka talaana eege iki,

<sup>3</sup> "A'diila nja kadu tanno ii-colo ka nanggeedi a koronggore no,

kudumma eene ka taluna tauugaara ma 'dotombo'do.

<sup>4</sup> A'diila nja kadu tanno afara no,

kudumma Masala ma tayugu fara eene ka iiye.

<sup>5</sup> A'diila nja kadu tanno üpü nanggeyi neene co kudumma Masala no,

kudumma eene kara takarna ka 'büdhülü.

<sup>6</sup> A'diila nja kadu tanno ii-re kagu eege nja te-nege ma tumma tanno dhorro no,

kudumma eene kara tüüsü.

<sup>7</sup> A'diila nja kadu tanno amana eema a kadu no,

kudumma Masala mara tana 'bangnga meene.  
<sup>8</sup> A'diila nja kadu tanno insili ka nanggeedi no,

kudumma eene kara tiji Masala.

<sup>9</sup> A'diila nja kadu tanno al-inggo ta'diila no,

kudumma eene kana eere a'da, laala ya Masala.

<sup>10</sup> A'diila nja kadu tanno kürümidene no kudumma eene kadho ka fiinii,

kudumma tauugaara ma 'dotombo'do kungngo eene.

<sup>11</sup> "A'diila nja aaga a kadu ka teela aaga ka linggo aaga kafünü korokoro kada ka oona ma eema tiya toroko ya kudumma eere tiya eede.<sup>12</sup> Aaga dhodho aaga ta'deema, kudumma eema ma talingga ungngo ada ka 'dotombo'do dhabbu, tafiigi meene ka tagüüni tatoroko a nagane'bi kada kidha.

*Töyeene nja tangga'dala  
(Murkus 9.50; Lüüka 14.34-35)*

<sup>13</sup> "Aaga ka tangga'dala ma 'büdhülü, a tangga'dala kara tasügünü üürü tanye'denye'de miini kara titaalo 'dee, ara angnga tanangnga eege kada tanye'denye'de nya afe'de? Illi a kadu tadhifi co akürö a kadu tüsiraana kide.

<sup>14</sup> "Aaga ka töyeene ma 'büdhülü, taalo nöö'di no ka anya ko'do no kara tadünggüdhü.<sup>15</sup> A ömö'di taalo ara tata issi ka lamba anangnga ka dhafala ka tüm'bü, lakiini a'diniga oogo

ka ndanda amang kono töyeene ada ka kadu tanno ka 'bügöör'i no. <sup>16</sup> Aaga fa ka töyeene tanno ada ka öyeene ada ka kadu kidha, nggeege amang kene tiji linggo naada na 'diila no kafünügü Pupa yaada ya ka 'dotombo'do ya ko'do.

### *Talaana ma Seriye*

<sup>17</sup> "Aaga fa tiki kide a'da a'a nö'dö taadha ka tumma ma Seriye nja tumma ma nagane'bi, taalo a'a nö'dö taga'da, lakiini a'a nö'dö takü'di eege ku'bu. <sup>18</sup> Ara a'a tadirina tumma aaga dhorro, salla a 'büdhülü nja 'dotombo'do tamanyaga, taalo 'bandumma unggodho kungngo a titaalo 'do salla idhilli kungngo ka tumma tanno seriye ara titaalo illi a tumma ma Seriye tafaradene 'do. <sup>19</sup> Ömö'di ya aga'da tumma no, mündä ya idhilli ya, ara ka talaana kadu a'da üünü nggeege afa i'i ya, ara tidhilli ka tauugaara ma 'dotombo'do, illi ömö'di ya linggo iini dhorro ya, alaana kadu, ara tidihindhi ka tauugaara ma 'dotombo'do. <sup>20</sup> Ara a'a tiki aaga, ka ta'diila tanno ada, taalo kagii'bi naFariisi nja katalaana ma seriye ya, tumma dhorro taalo aaga kara co ka tauugaara ma 'dotombo'do.

### *Tagoroo'bo*

<sup>21</sup> "Kaföönyö aaga ka Seriye ka takiki a kadu ma 'billi

a'da, 'Kafa tagirina kadu, ömö'di ya tagirina kadu ya, ara uugaara tümmü i'i iidaana.' <sup>22</sup> Lakiini a'a niki aaga, ömö'di ya agoroo'bo nja örre tiya iini ya, ara tahükümüdene afe'de, ömö'di ya iki örre tiya iini a'da sölömü ya, ara kadu ma la ma kadüifi ma Yahüdü tindini i'i, lakiini ömö'di ya iki o'o a'da 'baga ya ara co ka issi ma Jahanam.

<sup>23</sup> "Küdü kara tasaasa türri a niimö ma eriidö ka misi ma türri ya, nassa ka tagügi tumma ma 'bandagoroo'bo ungngo ada ku'bu nja örre tiya yüdü ya. <sup>24</sup> Nyi niimö ma taraana yüdü ka misi ma türri. Unggeene naco teema tumma ma ta'diila nja örre tiya üdü ka dhidha, nassa kico türri a niimö ma eriidö tiya üdü.

<sup>25</sup> "Areere na'diila nja diidi ma o'o a'da kaleefe aaga tunggeene ka fiini ma co ka seriye nja iini, ii'di tümmünü o'o uugaara, a uugaara tümmünü o'o a tamönggö, a tamönggö ta'duga o'o ungu ka pabusu. <sup>26</sup> Ara a'a tadirina tumma o'o dhorro, taalo o'o nara tö'dö kürö ndama iini, illi küdü ka anangnga gürüüsü ku'bu nye'd'de.

### *Temelö*

<sup>27</sup> "Kaföönyö aaga ka kadu ma 'billi katiki a'da, 'Aaga fa temelö.' <sup>28</sup> Lakiini a'a niki ömö'di ya assa ka aka asaasa oogo ana

eedi ya i'i afüngngö ana oogo ana eedi. <sup>29</sup> Üürü ööye ma niisö ma kuri yungngö ya nangnga o'o ka talinggo eema ya toroko ya, agodhe i'i nüpu co küdü ka oona, a'diila a tuu'da tököönö ka 'dugadene küdü ka oona, a tuu'da tafa co ka issi ma Jahanam nye'd'de. <sup>30</sup> Üürü niisö ma kuri nüüdü ka amana o'o ka talinggo tatoroko ya, rumuna eege co üdü ka oona, a'diila nggeege a tuu'da tököönö ka 'dugadene küdü ka oona, amang ka tuu'da tanno üüdü nye'd'de tafa co ka issi ma Jahanam."

### *Tadheene*

(Mattta 19.9; Murkus 10.11-12; Lüüka 16.18)

<sup>31</sup> "Ageemadene a'da, 'Ömö'dii ya adheene nja aka tammo iini ya, anangnga waraga ma tadheene oono.' <sup>32</sup> Lakiini a'a niki aaga, ömö'dii ya apa ka aka tammo iini ya, ara tanangnga oogo ka tatemelö illi kini k'a aduna oogo ka füngngö nja ömö'dii. Ömö'dii ya arna aka ma adheene nja nyuri mo, i'i ya afüngngö ana oogo a nyooro.

### *Taküdöönö*

<sup>33</sup> "Kaföönyö aaga, iini ka takiki a kadu ma 'billi, 'Aaga fa taküdöönö a korokoro, lakiini aaga fa ka taküdöönö tanno ada ka tagüünii ada Uugaara no.' <sup>34</sup> Lakiini a'a niki aaga, aaga fa taküdöönö 'do a 'dotombo'do kudumma

eene kada 'buugu ma temmi tiya Masala. <sup>35</sup> Aaga fa taküdöönö a 'büdhülü kudumma iini kada 'buugu ma uune tanno oono i'i ya miini nja Örsaliim kada anya tammo Uugaara tiya Dhabu ya. <sup>36</sup> Fa taküdöönö ana üüdü tiya yüüdü, kudumma üüdü taalo na tanangnga ndanawu ka ungodho kungngö ka ta'bassa nja eene ka ta'dü'dü. <sup>37</sup> Lakiini aaga, fa ka tumma tanno ada a'da, 'Ii' nja 'U'u, ömö'dii ya agusu niimö öccö kide ya i'i ya ömö'dii tiya toroko ya."

### *Ta'düinö*

(Lüüka 6.29-30)

<sup>38</sup> "Kaföönyö aaga iini ka tiki a kadu ma 'billi, 'Ööye nja ööye miini, tinggini nja tinggini.' <sup>39</sup> Lakiini a'a niki aaga, aaga fa ta'düinö kömüsü ma eema tiya atoroko ya, ömö'dii kara tabbü o'o ka tangarama ma niisö ma kuri ya, napelanaga könö iini. <sup>40</sup> Üürü ömö'dii öccö asaasa tasigi o'o a'duga ten'di müüdü ma teene mo ya, fa kini a'duga ten'di müüdü ma kürö mo afe'de. <sup>41</sup> Üürü ömö'dii a'bunu o'o a'da nunggeene nja meelee ma ungodho ya unngeene nja iini nameele keera. <sup>42</sup> Ka ömö'dii ka arangnga niimö küdü nanangnga iini, aga ömö'dii ka asaasa niimö küdü a kümüsü nafa ta'duga kini.

*Asaasa nadiidi nüüdü*  
(Lüüka 6.27–28, 32–36)

<sup>43</sup> "Kaföönyö aaga iini ka takiki 'billi, 'Asaasa ömö'di ya kete küdü ya, naanu ka diidi ma o'o.' <sup>44</sup> Illi a'a niki aaga, aaga asaasa nadiidi naada, aaga tafara ka Masala kudumma kadu tanno alinggo aaga no. <sup>45</sup> Amang kada ta laala tiya Pupa tiya ada ya ka 'dotombo'do ya, kudumma iini ka anangnga ndanaaya ka öyeene ada a kadu tanno oroko no nja tanno a'diila no, amana tombo'do a kadu tanno a'diila no, nja tanno üünii ada kadu ku'bu no. <sup>46</sup> Kada ka tasaasa kadu na asaasa aaga no, niimö yaada ka taluna kide i'i iiye? Taalo kadu na ama tuluba no kalinggo eege? <sup>47</sup> A kada kara tööjülü nagöre naada unggodho eege, ara aaga taluna minna ya a'diila ya kide? Taalo kadu na taalo kussu Masala no kalinggo nggeege? <sup>48</sup> Aaga 'diila dhorro kudumma Pupa tiya ada ya ka 'dotombo'do ya, a'diila dhorro."

## 6

*Nyi eema a kadu tanno  
eema katitaalo kene no*

<sup>1</sup> "Aaga adinö ko'do aaga tafa tamana eema a kadu ka kadu kidha, amang kene tiji aaga, nggeege ya taalo Pupa yaada ya ka 'dotombo'do ya ara tanangnga eema aaga afe'de. <sup>2</sup> Küdü kara tanangnga niimö ömö'di, fa tabbü amba nja tiniidö

afa ma tiya kadu töccö ka talinggo ka naala ma talaana nja nafiini no kungno, amang ka kadu tafünügü eege ko'do, ara a'a tadirina tumma aaga dhorro kadu no ka nda'duga faana yeene nye'd'de. <sup>3</sup> Lakiini küdü kara tanangnga niimö ömö'di ya, fa tafa ka niisö ma küüle tafa kussu niimö ya niisö ma kuri ka talinggo ya. <sup>4</sup> Amang ka linggo tanno miini no tanna ka küdhü, amang ka Pupa tiya yüüdü ya iji eema ka küdhü, ya tanangnga talängnge nüüdü o'o.

*Tafara ka Masala nja  
tümüü tenege*

(Lüüka 11.2–4)

<sup>5</sup> "Kada kara tafara ka Masala ya, aaga tafa tafeene nja kadu tanno a'diniga nanggeyi neene coo'do no, kasaasa tafara ka Masala ka naala ma talaana nja natinggini ma nafiini amang ka kadu tadinö kene, ara a'a tadirina tumma aaga dhorro, kadu na miini no ka nda'duga faana yeene nye'd'de. <sup>6</sup> A küdü kara tafara ka Masala ya, kolo la tiya yüüdü neere ka inye, na o'o sa ka fara ka Pupa tiya yüüdü ya ka küdhü ya, a Pupa yüüdü ya iji o'o ka küdhü ya, i'i yungno ara tanangnga talängnge nüüdü o'o. <sup>7</sup> Aaga fa teema tumma aaga tam'birinaana kada kara tafara ka Masala afa kadu na taalo kussu nafiini ma Masala no, eege

kiki kide a'da Masala mara tamma kene ka tumma eene kadeema tumma kadhabbu.<sup>8</sup> Aaga fa tafeene nja eene, kudumma Masala Pupa yaada milli ka tessu niämö yaada ka asaasa ya a'da küfürü aaga tarangnga.

<sup>9</sup> "Aaga afara ka Masala afa ma tiya kungno,  
'Pupa yiidi ya ka  
'dotombo'do ya,  
fa ka eere tiya yüdü  
idhindhi.

<sup>10</sup> Fa ka tauugaara tanno  
üdü ka öö'dö  
fa ka tumma tanno  
üdü küünidene  
ka 'büdhülü nja  
'dotombo'do.

<sup>11</sup> Nanangnga kuri ma uuru  
tanno ungngo.

<sup>12</sup> 'Duga tam'baga niidi kidi  
ka oona  
afa müdi ka afa ka kadu  
tanno üni tatoroko  
ana ungngo no.

<sup>13</sup> Fa tafa kidi ungngo  
ta'dingga ka ta'b'badene  
lakiini oolona ungngo ka  
tatoroko.'

<sup>14</sup> Kada kara tüpü nanggeyi  
co ka eema tiya kadu ka tal-  
inggo ana aaga ya, ara Pupa  
yaada ya ka 'dotombo'do  
ya tafa ka tatoroko tanno  
ada. <sup>15</sup> A kada katitaalo kafa  
ka tam'baga tanno kadu,  
taalo Pupa yaada ata'duga  
tam'baga naada ada ka  
oona.

### Tümmü tenege

<sup>16</sup> "Kada kara tümmü  
tenege, aaga tafa tafa ka  
kadu kussu a'da kümmönö  
aaga, aaga fa tafeene nja  
kadu tanno alingga eema  
ka kadu kidha a'da kiji

egee. Kamüürü kaga'da  
iiye neene, kalaala a kadu  
amang kene tiki a'da eege  
kümmü tenege, nikirü a'a  
ka tiki aaga a'da kadu no  
kanda'duga faana yeene.<sup>17</sup> Lakiini külü kara tümmü  
tenege na'bunaana uu'ba  
küdü ka üdü nagala iiye.<sup>18</sup> Amang ka kadu tafa tessu  
a'da nümmü o'o tenege, illi  
Pupa yüdü ya anna ka  
küdhü ya i'i yungngo ussu,  
a Pupa yüdü ya ka küdhü  
ya, ara tanangnga talingne  
o'o.

*Almaala ka 'dotombo'do  
(Lüüka 12.33-34)*

<sup>19</sup> "Aaga fa tawaana eema  
ma 'büdhülü ada ku'bu,  
kudumma iini kara tala'ba  
a kü'düü'dü talimi nja kany-  
ooro kara tagü'dü kanyooro.

<sup>20</sup> Lakiini aaga waanaga  
eema co 'dotombo'do kita  
a tasügüni katitaalo kide  
nja kü'düü'dü ya, amang  
ka kanyooro tafa tagü'dü ka  
'duga. <sup>21</sup> 'Buugu ya eema  
tiya üdü ka tanna kide ya  
ara eedi yüdü tanna'daga  
co.

<sup>22</sup> "Töyeene ma tuu'da  
tanno üdü a'da ööye, ööye  
yüdü kara ta'diila, ara oona  
nüdü töyeene nye'd'de  
kungno. <sup>23</sup> Üürü ööye  
yüdü atatoroko ya ara oona  
önüdü ta ndüüli a töyeene  
na külü no kara ta ndüüli  
ara ndüüli miini tatoroko  
dhorro.

<sup>24</sup> "Taalo ömö'dü kara tam-  
baanya talinggo ada a kadu  
keera, kudumma iini kara  
tünni ada ya ku'bu asaasa  
ya, ara tamma kada öccö

aanu ka töccö, taalo aaga ka tambaanya talinggo ada Masala nja almaala.

*Fa tadinigöögö*  
(Lüüka 12.22–34)

<sup>25</sup> "I'i yungngo eede ka tiki aaga, aaga fa tadinigöögö ma nangnga eyi tanno ada ma tooye nja kuri, nja en'di ma tagirnii ka oona, taalo tefe ka 'dii kagii'bi kuri, a tuu'da tagii'bi en'di? <sup>26</sup> Aaga assa ka uyi ma 'dotombo'do taalo ka leelee kitaalo karaana taalo kodhde kuurugu co na'boode, a Pupa yaada ya ka 'dotombo'do ya sa kaamana eema eene, taalo aaga kagu'daana aaga tagii'bi eege? <sup>27</sup> Mada ana kada ara tagussu mitiri ka oona tanno iini kadhonggoro?

<sup>28</sup> "Minna agu tumma ma en'di kagu'du aaga ka oona? Aaga iiri togoogo ma lodho inggiridene nya taalo kadhwürü kayaana. <sup>29</sup> Ara a'a tiki aaga, münda Siliman ka tidihindhi tanno iini 'do, taalo akümmü ten'di ka oona ka'diila afa ma togoogo tiya miini ya kungngo. <sup>30</sup> Ooyo ma lodho ya abbü tuli 'bitengngö atinyogo taka, magirnii Masala en'di ya a'diila ya kene ka oona adha illi aaga taalo mara tagirnii en'di ada ka oona? Aaga na tumma ma Masala ka titaalo kada ka nanggeedi no. <sup>31</sup> Aaga fa tadinigöögö aaga tiki a'da, 'Ara ungngo tagu minna ara angnga tooye minna, ara angnga tümmü minna

ka oona?' <sup>32</sup> Kadu na taalo kussu Masala no eege kungngo ka asaasa eema nggeege, a Pupa yaada ya ka 'dotombo'do ya ussu a'da kasaasa aaga eema ya nye'd'de kungngo. <sup>33</sup> Lakiini aaga asaasa tauugaara ma Masala ka dhidha nja fiinii tiya oono, eema ya nye'd'de assa ka kusunja kada kide. <sup>34</sup> Nggeege aaga fa tadinigöögö ma eema ma taka, kudumma taka eema yeene inggide unggodho eege fa ka eema ma uuru tanno ama miini unggodho i'i.

## 7

*Tafünü tumma ka kadu ko'do*  
(Lüüka 6.37–38, 41–42)

<sup>1</sup> "Aaga fa tasigi kadu amang kada tafa tasigidene. <sup>2</sup> Afa maada ka tasigi kadu ara aaga tasigidene tekere, yaada ka talinggo a kadu ya, ara talinggo adene ana aaga nggeege. <sup>3</sup> Minna agu o'o nadinö 'bandiisi yungngo ka örre tiya yüdü ka ööye ya, ara o'o ka titaalo naana iifye ka ndagee'di tanno üdü ka ööye no. <sup>4</sup> Ara o'o tiki a tööjöögö a'da, 'Öödhü na'duga 'bandiisi küdü ka ööye,' a'da ndagee'di kungngo üdü ka ööye kadhabbu. <sup>5</sup> O'o adha na 'dinigi eyi yüdü coo'do no, 'duga ndagee'di küdü ka ööye tikinggi amang küdü tiji 'buugu dhorro, na o'o saga 'duga 'bandiisi ka tööjöögö ka ööye.

6 "Aaga fa tamana eema ya a'diila ya a tiini, aaga fa tamana eema yaada ya insili ya a nagüdürü, kudumma eene kara tisirü kide ana uune kudumma eene kara tapadaga kada kadhagaana aaga ku'bu.

*Aaga arangnga amang kada taluna*

(Lüüka 11.9-13)

7 "Aaga arangnga amang eema tananja aaga, aaga asaasa eema amang kini tananja aaga, aaga adhoodho inye ka tanfa'da nja aaga. 8 Kudumma ömö'dü tiya arangnga ya ara ta'duga niimö ya miini ya, ömö'dü ka asaasa niimö aluna, a ya adhoodho inye ya kara tafa'danja iini. 9 Mada ana kada a 'bii'bala tiya iini kara tarangnga miteene kini anangnga müsi iini. 10 Üürü asaasa müdigilöögö kini anangnga ni iini. 11 Aaga kada oroko kungngo kussu aaga kaamana eema ya a'diila ya a laala tiya ada, anda ara tafaanya a Pupa tiya ada ka 'dotombo'do ya kara tamana eema ya a'diila a kadu tanno arangnga i'i no. 12 Eema yaada ka asaasa ka kadu kadalingga ana aaga ya, aaga linggo nggeege ana eege tekere, kudumma talaana ma seriye nja nagane'bi eege kamiini nye'd'de kungngo.

*İnye na iciri no*

(Lüüka 13.24)

13 "Aaga tigaala ka inye tanno iciri no, kudumma

inye tanno ömbölö ka falangnga no, fiinii ma tara taama i'i ya miini, a kadu kadhabbu ka ndigaala kide. 14 Fiinii ya iciri ya nja tiya iideene ya i'i yungngo amanaga kadu co fiinii ma tefe ka 'dü, a kadu ka idhilli eege kungngo kara taluna i'i.

*Fa nja iiye miini*

(Lüüka 6.43-44)

15 "Aaga adini ko'do kudumma nagane'bi tanno korokoro no, kicci kada kafeene nja kidheefele, lakiini ka nanggeedi tanno eene kafeene nja öö tiya ümmü kadu ya. 16 Ara aaga tussu eege ndama linggo tanno eene, kira 'dee kara teene ki'bim'bi, a ndhaaru 'dee ara teene, indiyye? 17 Fa ya a'diila ya ara teene iiye na a'diila no, fa ya toroko ya a teene iiye na oroko no. 18 Taalo fa ya a'diila ya ara teene iiye na oroko no, a fa ya toroko ya taalo ara teene iiye na a'diila no. 19 Fa ya taalo eene iiye ka'diila ya, a kadu teedhe i'i küpü ka issi. 20 Ndama linggo tanno eene ara angnga tussu eege.

*Tumma nja linggo*

(Lüüka 13.25-27)

21 "Taalo kadu no kümmünü a'a a'da, 'Uugaara, Uugaara,' no nye'd'de kara co ka tauugaara ma 'dotombo'do, illi ömö'dü ya alingga a tumma ma Pupa tiya eede ya ka 'dotombo'do ya. 22 Kadu dhabbu kassa ka tiki a'a ka uuru tanno miini no a'da, 'Ka Uugaara, Ka Uugaara, taalo ungngo

kageema tumma ma Masala ana eere tiya yüdü, ungngo tagasoro nagana'bu ka kadu ka oona ana eere tiya yüdü, ungngo tagalinggo eema keefe ana eere tiya yüdü? <sup>23</sup> Nikirri a'a ka tiki eene, 'Taalo a'a nussu aaga 'do agolo kanna aaga na oroko no!'

*Katarü'böönö ma nöö'di keera*  
(Lüüka 6.47-49)

<sup>24</sup> "A ömö'di ya aföönyö tumma neede alinggo iini ya, afeene nja ömö'di tiya a'dara ya arü'bü 'dii yiini ka 'dokon'da ya. <sup>25</sup> A tombo'do ta'dingga a faaya a tanya ma talingga 'dii asa ka taalo a'dingga 'do, kudumma iini ka tarü'bü adene ka 'dokon'da. <sup>26</sup> A ömö'di ya aföönyö tumma neede asa ka taalo alinggo iini ya, afeene nja ömö'di tiya a'baga ya, arü'bü 'dii yiini ka ndamugu. <sup>27</sup> İkiri tombo'do ka öö'dö a tanya ka kürü 'dii yiini ku'bu a'dingga, ta'dingga miini ka toroko 'do."

<sup>28</sup> Ka Yasu ka ndatüümö tumma niini, a kadu tadhere ka talaana tanno iini no. <sup>29</sup> Kudumma iini ka talaana eege a türü, taalo kafeene nja tanno katalaana ma seriye no kungngo.

## 8

*Yasu oolona ömö'di ya ana kutukunya ka oona ya*  
(Murkus 1.40-45; Lüüka 5.12-16)

<sup>1</sup> Ka Yasu ka ta'bardaga caa'bu ndama 'dikinya ya, a

kadu tuurna i'i keere kadhabbu. <sup>2</sup> A ömö'di ya ana kutukunya ka oona ya tö'dö üürü kini kidha, iki iini, "Ka Uugaara, üürü nasaasa o'o nanangnga a'a ka tinsili ka oona."

<sup>3</sup> İkiri Yasu ka kilina niisö ümmü i'i ka oona iini, "Namma a'a a'da o'o tinsili." İkiri kutukunya ka arooro ka tinsili, a kutukunya tarooro ka titalo. <sup>4</sup> İkiri Yasu ka tiki iini, "Aföönyö fa tadirina ömö'di töccö 'do, lakiini unggeene naco tala oona nüüdü a ta'boge, na o'o saga nangnga türri na Müüsa ka tiki no ku'bu amang kene tessu iini."

*Yasu oolona ömö'di ma linggo*

(Lüüka 7.1-10)

<sup>5</sup> İkiri Yasu kico Kafarnahööm, uugaara ma nasi-gira na ö'dö miya no ö'dö kini adageema nja iini. <sup>6</sup> Iki iini, "Ka uugaara, ömö'di ya alinggo nja a'a ya amaara ada inni ka 'dii afüngngö, oona kagu i'i 'do itaalo ambaanya tino."

<sup>7</sup> İkiri Yasu ka tiki iini, "Ara a'a tö'dö toolona i'i."

<sup>8</sup> İkiri uugaara ma nasi-gira ka tiki iini, "Uugaara, taalo a'a na'diila ma üüdü kara co 'dii tiya eede, lakiini tiri tumma ün'düngngö, a ömö'di yeede a ta'diila.

<sup>9</sup> A'a na uugaara ma nasi-gira kinggide kalinggo ada a'a nara tiki a tiya a'da, 'Unggeene,' aföönyö aco, niki a tiya a'da, 'Aayu,' aföönyö öö'dö, nara tiki ömö'di tiya alinggo ada a'a

ya a'da, 'Alingga kungngo,' aföönyö alingga."

<sup>10</sup> A Yasu tadhere, iini ka taföönyö tumma niini no, ikirii ka tiki a kadu tanno unggeene nja iini no, "Tumma dhorro eege kungngo eede ka tadirina aaga, taalo ömö'di ma tamma ka Masala ana eedi afa ömö'di ya ka Israyil. <sup>11</sup> Nikirii a'a ka tiki aaga, kadu kinggide kadhabbu kara sa köö'dö ndama fiinii ma ndanaaya nja ta'buugu köö'dö temmi nja Abrahiim nja Ishak nja Yaguub ka tauugaara ma 'dotombo'do. <sup>12</sup> Lakiini kadu na ma tauugaara no kara turunja co kürö ka ndüüli kabbünaana iginii ka oona kide."

<sup>13</sup> Ikirii Yasu ka tiki uugaara ma nasigira, "Kolo afa ma tamma tanno üüdü ana eedi no ara ta'diila." Ikirii ömö'di ya maara ya karooro ka'diila ka ööye miini.

### *Yasu oolona kadu kadhabbu*

<sup>14</sup> Ikirii Yasu ka co kita Bütrüs aluna 'berki miini ka tamaara ma füngngö. <sup>15</sup> Ikirii ka tümmü oogo ka niisö a maara taadha kono, mafiki'dö müünii ada eema eene.

<sup>16</sup> Ka 'buugu kanda siiya ya ikirii kadu ka öö'dö a kadu tanno indima no a Yasu kadhabbu, ikirii ka tagasoro nagoronggore ka kadu ka oona nye'd'de kungngo a tumma ma nüünö oolona kadu na maara no nye'd'de.

<sup>17</sup> A tumma na ne'bi Asaiya ka tageema no, co ööye miini, iini ka tiki, "A'duga tin'd'di kaja a'duga maara kaja ka oona."

### *Yasu alla kadu ma 'büdhüü (Lüüka 9.57-62)*

<sup>18</sup> A Yasu tassa ka kadu ka tadhabbu kini ka oona ya, ikirii ka tiki a kadalaadene tanno iini a'da kada'da kaco tinggini ma to tököönö.

<sup>19</sup> Ikirii tatalaana ma seriye ka öö'dö kini iki iini, "Ka Tatalaana, ara a'a turna o'o keere kita üüdü kara co kita."

<sup>20</sup> Ikirii Yasu ka tiki iini, "Kijeene kungngo a nasura a nafü kungngo uyi ma 'dotombo'do, illi 'Bii'bala ma Tadü'dü taalo 'buugu miini ka anangnga üüdü kide."

<sup>21</sup> A könö ana ka kadalaadene tanno iini tiki iini, "Uugaara, fa kede naco tatü'bü pupa yeede tikinggi."

<sup>22</sup> Ikirii Yasu ka tiki iini, "Uurna a'a keere fa ka kadu tanno aaya no katü'bü kadu neene no aaya no."

### *Yasu arigi tanya (Murkus 4.35-41; Lüüka 8.22-25)*

<sup>23</sup> Ikirii Yasu ka takä ka mürkabü, a kadalaadene turna i'i keere. <sup>24</sup> Ikirii tanya ka tagüüsö dhindho, a 'bii'dü taküdhü mürkabü koona a'da agarigide Yasu.

<sup>25</sup> Ikirii kadalaadene niini ka co iini kete kiji i'i kiki iini, "Uugaara, oolona ungngo ara ungngo taaya."

<sup>26</sup> İkirī Yasu ka tiki eene, "Minna agu aaga, aaga tari'ba? Kitaalo tamma ma Masala ada ka nanggeedi." İkirī ka fiki'dö agirnaana ka tanya nja 'biidü ka to, a 'buugu tamusuli ku'bu amudhudhuli.

<sup>27</sup> A kadu tadhere kiki a'da, "Ömö'dü öjö yungngo? A tanya nja to kaföönyö tumma niini!"

*Yasu oolona kadu keera*  
(Murkus 5.1-20; Lüüka 8.26-39)

<sup>28</sup> Aga Yasu ka ndala nda'da ma to kete ma Jadriini a kadu tö'dö kürö ndama naala ma oofo keera ana koronggore tanno oroko no ka tuurunja kene ka oona kindima, koreene nja iini a kadu tari'ba taalo kunggeene ka fiinii tiya miini ya. <sup>29</sup> Kiidhe kiki, "Minna yüdü nja ungngo, Yasu 'Bii'bala ma Masala, nö'dö kita ma tapusu ungngo a'da aleefe 'buugu?"

<sup>30</sup> A'da nagüdürü kinggide kaguri ku'b'ba kadhabbu. <sup>31</sup> A nagana'bu tikirī ka tiki a Yasu, "Küdü kara tasoro ungngo ya, uurugu ungngo ka nagüdürü ka oona."

<sup>32</sup> İkirī ka tiki eene, "Aaga agolo." Kikirī ka öö'dö kürö kafiri ka nagüdürü ka oona a nagüdürü tarünö ndama nsorondho kafiri co to nye'd'de kungngo ka'duuru 'biidü kaaya. <sup>33</sup> A katasaana tarünö kaco anya ka teene kadirina eema a kadu ma eema tiya agalinggo adene ya a kadu tanno eera no, nanagana'bu ka taganna

eene ka oona no. <sup>34</sup> A kadu ma anya tammo iini mo, tö'dö kürö in'dili ma co to reene nja Yasu, kene kaduna i'i ya, kiki iini a'da unggeene ka anya tammo eene.

## 9

*Yasu oolona mügüre*  
(Murkus 2.1-12; Lüüka 5.17-26)

<sup>1</sup> A Yasu taka ka mürkabü ata'da to aaco anya tammo iini. <sup>2</sup> A kadu tö'dö ana ömö'dü iini ka sekede a mügüre, ikirī Yasu ka iji tamma neene, iki a mügüre, "Dhi oona ku'bu 'bii'bala eede, noolonadene o'o ka toroko tanno üdü."

<sup>3</sup> A katalaana ma seriye könö teema unggodho eege kiki a'da, "Ömö'dü ya eela Masala."

<sup>4</sup> İkirī Yasu ka tussu tumma neene, iki eene, "Minna agu aaga, aaga tümmü tumma na toroko no ka nanggeedi? <sup>5</sup> Öjö i'i yungngo taalo agu'daana, 'Koolonadene tatoroko nüdü,' alla tiki a'da, 'Fiki'dö nunggeene?' <sup>6</sup> Ara tala aaga amang kada tussu a'da 'Bii'bala ma Tadü'd'dü, türü kungngo iini ma eema ma 'büdhülü miini ka toolona tatoroko,' ikirī ka tiki a mügüre, "Fiki'dö na'duga eema ma fungngö yüdü naco 'di tiya üdü."

<sup>7</sup> Ömö'dü tafiki'dö unggeene aco öö'dü kita iini. <sup>8</sup> Ka kadu kadhabbu ka tasala tumma no nggeege ya, a ri'ba tümmü eege, kafünögü Masala ko'do manangnga

türü a kadu afa ma tanno kungngo.

*Yasu ümmünü Matta  
(Murkus 2.13-17; Lüüka 5.27-32)*

<sup>9</sup> A Yasu tunggeene asala ömö'di ka temmi ka 'buugu ma tulu'ba, ana eere a'da Matta, ikirii ka tiki iini, "Aayu kede keere." Ikirii ka fiki'dö uurna i'i keere.

<sup>10</sup> Aga Yasu ka ndagu eema ka 'di kita Matta ya, a kadu ma tera tulu'ba tö'dö kadhabbu nja tanno oroko no kemmi nja Yasu nja kadalaadene tanno iini. <sup>11</sup> A naFariisi könö tiji tumma no, kiki a kadalaadene tanno iini, "Minna agu tatalaana yaada aguri nja kadu ma tulu'ba nja kadu tanno oroko no?"

<sup>12</sup> A Yasu taföönyö tumma neene iki, "Taalo kadu na 'diila no ka asaasa Digtöörö, illi kadu na maara no. <sup>13</sup> Aaga unggeene aaga co tussu tumma no, 'Nasaasa a'a 'bangnga taalo taraana ma eriidö.' " Taalo a'a nöö'dö tümmünü kadu na 'diila no lakiini na oroko no.

*Tümmü tenege  
(Murkus 2.18-22; Lüüka 5.33-39)*

<sup>14</sup> A kadalaadene na Yühanna ya Tatambeese ya tö'dö ka Yasu kiki iini, "Minna agu ungngo nja naFariisi ungngo tümmü tenege ara kadalaadene nüüdü katitaalo kümmönö?"

<sup>15</sup> Ikirii Yasu ka tiki eene, "Ara kadu ma ömö'di tiya arna ya, tagoroo'bo ana

i'i kide kungngo? Lakiini uuru kinggide a tatarna kara ta'dugadene kene ka söödö ya, kassa ka tümmü tenege. <sup>16</sup> Taalo ömö'di ara tar'da 'banten'di ya issi ya ka ten'di tiya illi ya kudumma iini kara töörese ten'di ya illi ya anangnga ööye miini ka tadhabbu. <sup>17</sup> Taalo ömö'di ara tuuru ngeeli ka 'belde tammo illi mo kudumma oono kara töörese muuru ngeeli co, a 'belde taga'dadene, lakiini kuuru angnga ngeeli na aleefe tedhe no ka 'belde tammo issi mo amana ka 'belde nja ngeeli tüütü ka'diila."

*'Badaada ma eyi mo nja aka ma maara mo  
(Murkus 5.21-43; Lüüka 8.40-56)*

<sup>18</sup> Ka Yasu ka aleefe teema nja eene ya, ikirii uugaara ma la ma talaana ka tüürü ku'bu kini kidha iki iini, "Badaada meede manda eyi, lakiini aayu nümmünü iisine nüüdü kono ka üüdü amang kono tefe ka 'di.' <sup>19</sup> A Yasu tafiki'dö uurna i'i keere nja kadalaadene tanno iini.

<sup>20</sup> Aka minggide eriidö ka tüüsö kono mandagu'du nagürüünü kada'baaga kafünü eera, mö'dö ndama iini keere maa'ba tinggini ma ten'di ma oona tammo iini. <sup>21</sup> Kudumma oono ka tiki ana eedi ka teene a'da, "Kede kara taa'ba ten'di ma oona miini a nüüsö ün'dügüngngö, narooro ka a'diila."

<sup>22</sup> Ikirii Yasu ka tassala keere asala oogo iki, "Idhi

oona ku'bu 'badaada eede, tamma nüüdü ka oolona o'o." Aka tarooro ka a'diila ka ööye miini kungngo.

<sup>23</sup> Ka Yasu ka co la ma uugaara ma Yahüüdü, asala kadu na üwe tüüsü no, anno co kalumuli. <sup>24</sup> İkiri Yasu ka tiki eene, "Aaga agolo kürö taalo 'badaada meyi, oogo marigide," kikiri ka takiji i'i. <sup>25</sup> A kini ka nduurugu kadu co kürö ya, ikiri ka co la ümmü oogo ka niisö mafiki'dö. <sup>26</sup> A tumma no tanyala njaana ku'bu ka 'buugu koona nye'de kungngo.

### *Yasu oolona kisinsoro keera*

<sup>27</sup> Aga Yasu ka ndunggeene kita miini kita ya, a kisinsoro tako'd'do kini keere keera kiidhe kiki, "Ka 'Bii'bala ya Dawud, ana 'bangnga ma ungngo."

<sup>28</sup> A kini ka co a 'bügööri, a kisinsoro na eera no, tö'dö kini kete, ikiri Yasu ka tiki eene, "Kamma aaga a'da ara a'a talinggo dhorro?"

Kikiri ka tiki iini, "İi kamma ungngo Uugaara."

<sup>29</sup> Aa'ba eege ka iiye iki, "Ara talinggo adene afa ma tiya ada ka tamma a nanggeedi ya kungngo."

<sup>30</sup> İiye neene tatanfa'da ikiri Yasu ka tirina tumma dhorro, "Aaga fa tadirina ömö'di töccö." <sup>31</sup> Lakiini kene kico a kürö kanyalaana tumma no ka 'buugu koona nye'de kungngo.

### *Yasu oolona möri*

<sup>32</sup> Aga kisinsoro ka öö'dö kürö ya, a'da kadhe kadu a möri, a na'bu ka takakini. <sup>33</sup> Aga Yasu ka tagasoro na'bu ya, a möri teema, a kadu tadhere kiki, "Taalo ungngo kadini ka niimö afa ma tiya kungngo ka Israyil."

<sup>34</sup> Lakiini naFariisi kiki a'da, "I'i asoro naEbliisi ana uugaara ma naEbliisi."

### *Yasu ana 'bangnga ma kadu*

<sup>35</sup> A Yasu takunggunaana ku'bu ka naanya nja nadaara 'do, alaana kadu ka naala ma talaana miini, adünnü tumma ma İnjili ma tauugaara ma Masala, oloona kadu ka namaara kada tonggoonyo. <sup>36</sup> İkiri ka tasala kadu a 'bangnga meene tagu i'i kudumma eene ka tagi'di a niimö kitaalo kene kaneene afa kidheefele na tadasaana ka titaalo kene no kungngo.

<sup>37</sup> İkiri ka tiki a kadalaadene tanno iini, "Asa linggo tadhabbu, illi kadu ma linggo kadhilli. <sup>38</sup> Aaga arangnga Uugaara ma linggo a'da agürünü kadu ma talinggo linggo niini."

## 10

*Kadalaadene na ada'baaga kafünü eera no*  
(Murkus 3.13-19; Lüüka 6.12-16)

<sup>1</sup> A Yasu tagümmünü kadalaadene niini no ada'baaga kafünü eera no. Anangnga türü eene ma tasoro nagoronggore na oroko no ka kadu ka oona koolona eege ka namaara

dhabbu. <sup>2</sup> A nagereene na kadafiinii na öö'dö kada'baaga kafünü eera no eege kungngo, ya dhidha ya, Samaan, yeene ka tümmünü i'i a'da Bütrüs ya, nja örre tiya iini Andraws, nja Yaguub, 'bii'bala ya Za'bedi nja örre tiya iini Yühanna, <sup>3</sup> nja Filibüs nja Bartülmaws, nja Tööma, nja Matta ya ama tulu'ba ya, nja Yaguub 'bii'bala ya Halfa nja Tatawus, <sup>4</sup> nja Samaan ya tatagu'daana ka eedi ya nja Yahüusa Askaryüütü ya agümmünü Yasu a naguugaara ya.

*Yasu agürünü kadalaadene na ada'baaga kafünü eera no*  
(Murkus 6.7-13; Lüüka 9.1-6)

<sup>5</sup> A Yasu tagürünü eege iki eene, "Aaga fa co anya ma kajeene aaga tafa co anya ma Samira. <sup>6</sup> Lakiini agolo ka kidheefele ma Israyil na aama no. <sup>7</sup> Kada kara tunggeene aaga tadünügü eema a kadu ka nafiiñi a'da, 'Tauugaara ma 'dotombo'do ka ndakete.' <sup>8</sup> Aaga oolona kadu na maara no, aaga tinji kadu na ake no, aaga tanangnga kadu na ana kutukunya ka oona no katinsili, aaga tasoro nagoronggore na oroko no ka kadu ka oona. Ka'duga aaga ün'dügüngngö a'da taalo aaga kafaana, aaga amana a kadu ün'dügüngngö. <sup>9</sup> Aaga fa ta'duga gürüüsü dahaba nja fudda nja tanyaanya ka taganna kada ka naganjoko. <sup>10</sup> Aaga fa taagufu 'belde

ma eema ma kuri, aaga fa tagona en'di eera, aaga fa ta'duga kuufi, kudumma ömö'dü tiya alingga ya ara ta'duga talingga niini.

<sup>11</sup> "Kada kara co anya alla daara ya, aaga tawwa ömö'dü ya ara tamma kada aaga taneene nja iini ya, aaga tanna kide aaga tunggeene ndama iini. <sup>12</sup> Kada kara co a 'bügöörü aaga tööjülü kadu miini. <sup>13</sup> Kadu ma 'bügöörü tiya miini ya, ka ta'duga tööjülü kada a tööjülü naada tüütü nja eene, a kene kara tanu ka tööjülü tanno ada a tööjülü naada tüütü kada. <sup>14</sup> Ömö'dü ya ara tanu kada ya itaalo asaasa taföönyö tumma naada, aaga unggene ka 'dü tiya miini ya nja anya tammo iini mo aaga tafidhi ndhunggürü miini kada ka uune. <sup>15</sup> Ara a'a tadirina tumma aaga dhorro, ara uuru ma tahükümü ma naanya ma Sadöma nja Amuura ara tapalpala adagii'bi anya mü.

*Tö'dö ma uuru ma talingga kadu*  
(Murkus 13.9-13; Lüüka 21.12-17)

<sup>16</sup> "Ara a'a tagürünü aaga afa kidheefele ka öö ka teene kungngo, aaga unggene a ta'dara afa nöönü, aaga tiicolo afa alambo. <sup>17</sup> Aaga adini ko'do kudumma kadu, kara tümmü aaga a naguugaara kabbü aaga ka naala ma talaana, <sup>18</sup> kümmü aaga kamanaga aaga ka naguugaara kidha kudumma

eere tiya eede amang kada tussu iini kidha nja kajeene. <sup>19</sup> Kene kara tümmünü aaga a naguugaara aaga tafa tadinigöögö, a'da ara aaga tiki nya aaga teema minna ka uuru tanno miini no ara tumma tananja aaga, aaga teema iini. <sup>20</sup> Taalo aaga kungngo kara teema, lakiini Koronggore ya Pupa tiya ada yungngo ka 'dotombo'do ya i'i yungngo ara teema kada ka oona.

<sup>21</sup> "Ara ömö'dü tümmünü örre yiini kümmünü ka inde afe'de, a laala talinggo kafaafaa meene kagirina eege. <sup>22</sup> A kadu takirimi aaga nye'd'de kungngo kudumma eere tiya eede, lakiini ömö'dü ya idhi oona ku'bu ta'billi ya ara toolonadene. <sup>23</sup> Kadu kara talinggo aaga ka anya ya, aaga arünö aaga co anya tökömö, ara a'a tadirina tumma aaga dhorro, ara 'Bii'bala ma Tadü'd'dü tö'dö a'da küfürü aaga tafara naanya ma Israyil nye'd'de.

<sup>24</sup> "Taalo tatalaadene agii'bi tatalaana yiini, a tasaga taalo ara tii'bi ömö'dü ya ana i'i ya. <sup>25</sup> Ara tatalaadene tagala kafeene nja tatalaana tiya iini, a tasaga tafeene nja ömö'dü ma 'dii ka tiki iini a'da Balsabül eege ka ndatümmünü kadu ma 'dii nya?

<sup>26</sup> "Aaga fa tari'ba eene kudumma niimö tiya aküdhü ya ara tabbü 'dala, a niimö ya ka kume ya ara tussu adene. <sup>27</sup> Niimö yeede

ka tirina aaga a 'buugu ka talüllü ya aaga tiraana a 'buugu ka öyeene, a yaada ka föönyö kadadayaaya ya aaga asirö na'daala aaga teema iini ko'd'do. <sup>28</sup> Aaga fa tari'ba a kadu tanno agirina tuu'da ma ömö'dü no kassa kitaalo kara tambaanya tiidaana ma koronggore, lakiini aaga ari'ba ömö'dü tiya ara tiidi koronggore nja tuu'da ka issi ma Jahanam ya. <sup>29</sup> Taalo uyi eera anadene ana giriisi unggodho? Lakiini taalo könö unggodho kungngo ada'dingga ka 'büdhülü a'da taalo Pupa yaada ya ka 'dotombo'do ya ussu. <sup>30</sup> Lakiini awu ma nanggüdü tanno aada aginidene nye'd'de kungngo. <sup>31</sup> Aaga fa tari'ba kudumma ada ka tagii'bi uyi dhabbu.

<sup>32</sup> "Ömö'dü ya amma kede ka kadu kidha ya, ara a'a tamma kini kidha ma Pupa tiya eede ya ka 'dotombo'do ya. <sup>33</sup> Ömö'dü ya 'düsünü a'a ka kadu kidha ya, ara a'a ta'düsünü i'i kidha ma Pupa tiya eede ya ka 'dotombo'do ya.

<sup>34</sup> "Aaga fa tiki kide a'da a'a nö'dö a ta'diila ka 'büdhülü, taalo a'a nö'dö a ta'diila, nö'dö a'a a koro'bo.

<sup>35</sup> 'Nö'dö a'a tanangnga ömö'dü ka takirimi pupa yiini  
a 'badaada takirimi niimö moono  
aka ma 'bii'bala takirimi taada moono.

36 A kadu ma 'dii tiya ung-godho ya tanu aana ka oona.'

37 "Ömö'dii ya asaasa pupa yiini alla niimö miini ara kanu kede ya, taalo a'a nara tamma kini, ömö'dii ya asaasa 'bii'bala yiini alla 'badaada miini ara kanu kede ya taalo a'a nara tamma kini. 38 Ömö'dii ya taalo a'duga salii'bi yiini uurna a'a keere ya, taalo a'a nara tamma kini. 39 Ömö'dii kaafa ka oona tanno iini ya ara taama, Ömö'dii ya ara tüpü eyi yiini co ka üüdü ma a'a ya, ara taduna.

40 "Ömö'dii ya amma kada ya amma kede, ömö'dii ya amma kede ya amma ka ömö'dii tiya agürünü a'a ya. 41 Ömö'dii ya amma ka ne'bi kudumma iini kada ne'bi ya, ara taduna faana yiini ka ne'bi, ömö'dii ara tamma ka ömö'dii ya a'diila ya a'da ara taduna faana yiini ka ömö'dii tiya a'diila ya. 42 Ömö'dii ya inyi 'biidii ya iicolo a laala tiya dhiidhi ya kudumma iini ka tatalaadene tiya eede taalo faana yiini ara taama."

## 11

*Yasu nja Yühanna tiya Tatambeese ya  
(Lüüka 7.18-35)*

<sup>1</sup> Aga Yasu ka ndatiimö tumma niini nja kadalaadene tanno iini na ö'dö kada'baaga kafünü eera no, ikirii ka tunggeene ndama kanna ma co talaana kadu

keema ka tumma ma İnjiiili co kadu ka naanya ma Jaliil.

<sup>2</sup> A Yühanna taföönyö tumma linggo tanno Almasi-ihii a'da ungngo ka pabuusu, ikirii ka kürünü kadalaadene niini, <sup>3</sup> kaco tiki iini a'da, "O'o nungngo nara tö'dö alla ungngo tündhigü ömö'dii öccö afe'de?"

<sup>4</sup> A Yasu tapadaga tumma eene iki, "Aaga fada aaga co tadirina eema a Yühanna ma eema tiya ada ka taföönyö aaga tadönö kide ya, <sup>5</sup> kisinsoro kiji 'buugu a kadu na sogo'do no tunggeene, a kadu ma kutukunya tinsili a nakünggiri taföönyö eema, a kadu na ake no tafiki'dö ka inde, a kadu na eema ka titaalokene no taföönyö tumma ma İnjiiili. <sup>6</sup> A'diila nja ömö'dii tiya ya ri'ba ma a'a katitaalo kagu i'i ya."

<sup>7</sup> Aga kadalaadene tanno Yühanna ka ndafada ya, ikirii Yasu ka teema tumma Yühanna nja kadu iki eene, "Kinynyo aaga a dhüüle aaga tiji minna 'bandam'bala a tanya ka tüüsö iini? <sup>8</sup> Alla kö'dö aaga kürö aaga tiji minna? Ömö'dii ümmü en'di ya nyulinyuli ya? Kadu na ümmü en'di ya nyulinyuli ya kanna ka nöö'dii ma naguu-gaara. <sup>9</sup> Lakiini kö'dö aaga kürö aaga tiji minna ne'bi? İi ara a'a tiki aaga a'da, i'i ya miini lakiini i'i agii'bi ne'bi. <sup>10</sup> I'i yungngo a sorne ka tageema tumma miini iki,

'Ara a'a tagürünü tafiiñi  
yede küdü kidha  
aco tindinaana nafiini  
üdü ku'bu.'

11 Ara a'a tadirina tumma  
aaga dhorro, taalo ömö'di  
ana ka kadu ageenedene  
ndama iiya taalo ömö'di ma  
tagii'bi Yühanna ya Tatam-  
beese ya, lakiini ömö'di  
ya idhilli ka tauugaara ma  
'dotombo'do ya idhindhi  
adagii'bi i'i. 12 Ndama uuru  
tanno Yühanna ya Tatam-  
beese ta'bütängngö, kaleefe  
tauugaara ma 'dotombo'do  
tinggiridene a türü tanno  
oono, ömö'di ya asaasa tö'dö  
kide ya a kadu takirimi i'i.  
13 A nagane'bi nja seriye tiya  
Müüsa tageema tumma ma  
tauugaara ma 'dotombo'do  
idhi a Yühanna tö'dö. 14 A  
kada kara tasaasa tamma  
kide ya, aaga tussu a'da  
Yühanna i'i ya İliya ya kadu  
ka takindhigii i'i ya miini.  
15 Ömö'di ya ana iisine ma  
taföönyö ya fa kini aföönyö.

16 "Ara a'a tiki a'da sere ya  
afeene nja minna, afeene nja  
laala tiya emmi ka 'dadillö  
ma mansala, kiidhaana ka  
oona kiki,

17 'Kabbü ungngo kaaru  
aaga,  
aaga taalo kasiili,  
ungngo teema ngooro  
aaga taalo kafara.'

18 A Yühanna tö'dö taalo  
agu eema itaalo ooye kiki  
a'da, 'Na'bu ungngo iini.'

19 A 'Bii'bala ma Tadü'ddü  
tö'dö agu eema ooye, kiki  
a'da, 'ömö'di ya aguri ake ka  
ngeeli, a teefe ma kadu ma  
tulu'ba no nja tanno oroko

no,' a ta'dara na Masala  
kussu adene dhorro a linggo  
tanno eene."

*Naanya na taalo kamma  
ka Masala no  
(Lüüka 10.13-15)*

20 İkirii Yasu ka asanna ka  
kadu ma naanya tanno iini  
ka takalaala türü niini eene  
kadhabbu no, lakiini eege  
kitaalo kaadha ka tatoroko  
tanno eene. 21 "Kadu  
ma Korosiin am'ba kada,  
kadu ma Beet Sayida am'ba  
kada kudumma türü tanno  
agüüni adene ka Suur  
nja Saiyda no, ara kadu  
miini takilli ka takaadha  
ka tatoroko kagirni en'di  
ma nataliisi kene ka oona  
küdhü fü'dö eene ka nang-  
güüdü. 22 Lakiini ara a'a  
tiki aaga a'da ara uuru  
ma tahükümü ta'diila ada  
Suur nja Saiyda adagii'bi  
taneene naada. 23 O'o no  
Kafarnahööm no, nasaasa  
o'o ta'dinigi oona nüüdü co  
'dotombo'do? Kaw, ara o'o  
saga co ka ta'buugu ma inde,  
üürü eema ya agalinggo  
adene keefe ka Sadöma  
ara tagaleefe ta'bütängngö.  
24 Lakiini ara a'a tiki aaga,  
ka uuru ma tahükümü  
tanno Masala kara tö'dö, ara  
Masala tana 'bangnga ma  
kadu ma Sadöma mara kafa  
kada."

*Aaga ö'dö kede aaga  
talängnge  
(Lüüka 10.21-22)*

25 Ka uuru tanno mi-  
ini no ageema Yasu iki,  
"Ara a'a tanangnga ta'diila  
o'o Pupa, Uugaara ma  
'dotombo'do nja 'büdhü'lü,  
kudumma üüdü kaala eema

ya kaküdhü ya a kadu tanno dhiidhi no, ara o'o ka titalo nala a kadu tanno 'dara kussu eema no<sup>26</sup> ū, Pupa a'diila küdü nggeege.

<sup>27</sup> "Pupa yeede anangnga eema a'a nye'd'de, taalo ömö'dü ma tussu 'Bii'bala illi Pupa, ömö'dü ma tussu Pupa taalo illi 'bii'bala nja kadu tanno 'bii'bala ka asaasa tala oona eene no.

<sup>28</sup> "Aaga kö'dö kede aaga in'dili aaga no agi'di a dhügürü ma linggo ma eema tiya indhi ya nanangnga aaga ka lingenge. <sup>29</sup> Aaga körni kadholle neede kada ka nanggeyi aaga tümmü talaana neede, nana a'a 'bangnga niicolo ka eedi. Aaga taluna talingenge ma nagoronggore tanno ada. <sup>30</sup> Dholle yeede taalo indhi a niimö yeede kara tanangnga aaga ya ipalapala."

## 12

*Uugaara ma Sa'bidi  
(Murkus 2.23-28; Lüüka 6.1-5)*

<sup>1</sup> Ka naguuru tanno miini no akunggeene Yasu ka nasigeene ka uuru ma Sa'bidi, ikirii iire ka tümmü kadalaadene niini. Kikirii ka tuu'bu migile kuyu kaguri. <sup>2</sup> Ikirii naFariisi ka tasala eege kikirii ka tiki a Yasu, "Assa ka kadalaadene nüüdü ka talinggo niimö ya taalo alingga adene ka uuru ma Sa'bidi ya."

<sup>3</sup> Ikirii Yasu ka tapadaga tumma eene iki, "Taalo

aaga kakiirii tumma ma Dawud ka sorne ka iire ka tümmü i'i nja kadu tanno kunggeene nja iini no? <sup>4</sup> Innyo la ma Masala katamü miteene ma tirri a'da taalo ama eene kaguri kudumma oono kada tammo ka'boge unggodho eege.

<sup>5</sup> Taalo aaga kaduna tumma ka Sorne ma seriye ka tiki a'da ka'boge kaga'da Sa'bidi ka la ma Masala ka uuru ma Sa'bidi a'da taalo ömö'dü ma tindini eege. <sup>6</sup> Ara a'a tiki aaga a'da ömö'dü ungnego idhindhi adagii'bi la ma Masala. <sup>7</sup> Üürü kada kara tagussu tumma no ya, 'Nasaasa a'a 'bangnga taalo a'a nasaasa tirri,' taalo aaga kara tagümmü kadu na hetti ka titalo kene no. <sup>8</sup> 'Bii'bala ma Tadü'd'dü i'i yungngo Uugaara ma Sa'bidi."

<sup>9</sup> Unggeene ndama kanna aco la ma talaana tiya eene. <sup>10</sup> Ikirii ka tuna ömö'dü ingide eyi ka niisö, kikirii ka tindini i'i kawwa eema ma tümmü i'i iini, kiki, "A'diila aja kara toolona ömö'dü ka uuru ma Sa'bidi?"

<sup>11</sup> Ikirii ka tiki eene, "Mada ana kada ana dheefelege unggodho ka 'dinggo co ööye ka uuru ma Sa'bidi taalo tümmü i'i unggu i'i ko'do? <sup>12</sup> Ömö'dü idhindhi adagii'bi dheefelege yungngo a linggo tanno a'diila no kara talingga adene ka uuru ma Sa'bidi."

<sup>13</sup> Ikirii Yasu ka tiki ömö'dü tiya miini ya, "Kilina niisö." Ikirii ka kilina eege kikirii

ka'diila kafeene nja tööje.  
<sup>14</sup> ïkiri naFariisi kico aküro  
 kafünü ajeene ma tiidi Yasu.

*Ömö'di ma linggo ya  
 Masala ka tagesse i'i ya*

<sup>15</sup> Ka Yasu ka tussu tumma no ya, ïkiri ka tunggeene ndama kanna, a kadu turna i'i keere kadhabbu oolona egee ka maara nye'd'de kungngo. <sup>16</sup> Adagadünögü eema eene a'da kafa tadirina tumma miini a kadu 'do. <sup>17</sup> Amang ka tumma tanno ne'bi Asaiya ka tatiraana no kinynyo ööye miini.

<sup>18</sup> "Ömö'di ma linggo yeede  
 ka tagesse i'i ya,  
 yungngo eede ka asaasa  
 i'i ana eedi, ka'diila  
 oona eede miini,  
 ara a'a tuuru Koronggore  
 yeede kini ka oona  
 amang kini tadünögü  
 tumma ma tadhidho  
 co kajeene in'dili.

<sup>19</sup> Taalo ara tadiidi nja  
 ömö'di itaalo a tiidhe  
 ko'd'do  
 a ömö'di taalo taföonyö  
 tumma niini ka  
 nafüni.

<sup>20</sup> Tam'bala na ko'do no taalo  
 ara ta'buna,  
 itaalo ara tadhülu lamba  
 ma finne mo ku'bu,  
 idhi a tumma ma tadhidho  
 tii'baana.

<sup>21</sup> A kadu 'do tindhigü  
 eere yiini."

*Yasu nja Balsabül  
 (Murkus 3.20-30; Lüüka  
 11.14-23)*

<sup>22</sup> A kadu tö'dö ana ömö'di  
 a Yasu a soro, itaalo eema  
 kudumma na'bu ungngo iini  
 ka oona. A Yasu toolona

i'i arooro ka tafa'da iiye iji  
 'buugu eema. <sup>23</sup> A kadu  
 tadhere kindini ajeene kiki,  
 "Taalo 'Bii'bala ya Dawud i'i  
 yungngo?"

<sup>24</sup> Lakiini ka naFariisi ka  
 taföonyö tumma no, kikiri  
 ka tiki a'da, "Ömö'di ya  
 asoro nagana'bu a türü ma  
 Balsabül uugaara ma naEbli-  
 isi."

<sup>25</sup> ïkiri ka tussu tumma no, eema iki eene, "Ka tauugaara kara tasümünü njaana  
 ku'bu kara tatangga'da, a kadu ma anya tammo unggodho mo nja siliga kara tasümünü njaana ku'bu taalo ka tutü ka ta unggodho.

<sup>26</sup> Üürü Ebliisi a tasoro Ebliisi nggeege asümünaana  
 oona ku'bu unggodho i'i  
 ara tauugaara niini tidhi  
 oona ku'bu nya? <sup>27</sup> Üürü  
 a'a nasoraanaga nagana'bu  
 kürö ana Balsabül, a laala  
 yaada ara tasoro mada?  
 Egee kungngo ka tümmü  
 aaga ka tatoroko. <sup>28</sup> Lakiini  
 üürü a'a nasoro nagana'bu  
 a Koronggore ma Masala  
 ya, tauugaara ma Masala ka  
 ndöö'dö kada. <sup>29</sup> Ara ömö'di  
 tambaanya co 'büggöri  
 tiya ömö'di tiya ana türü  
 anyooro eema yiini nya? Illi  
 kini ka timi'dini i'i ku'bu ka  
 dhidha, asa ka tanyooro 'di  
 yiini.

<sup>30</sup> "Ömö'di ya taalo aneene  
 nja a'a ya, i'i ya diidi  
 ma a'a, ömö'di ya taalo  
 awaana koona nja a'a ya,  
 i'i ya aparsaana ku'bu.  
<sup>31</sup> Nikiri a'a ka tiki aaga,

a'da tatoroko nja teelaana nye'd'de ara Masala tafa ka kadu kide, lakiini teelaana ma Koronggore tiya Insili ya, taalo Masala mara tafa kide. <sup>32</sup> Ömö'di ya tadirina tumma ka 'Bii'bala ma Tadü'ddü ka oona ya, ara tafa kini kide, illi ömö'di ya tirina ka Koronggore tiya Insili ya ka oona ya, taalo ara tafa kini alla ka ürüünü tiya alla ka tiya tö'dö ya.

<sup>33</sup> "Aaga fa ka fa tiya a'diila ya eene laala ya a'diila ya, fa ya toroko ya ara teene laala ya toroko ya, kussu kadu fa ana iïye miini. <sup>34</sup> Aaga laala ma nööni, ara aaga teema tumma no dhorro nya a'da ka oroko aaga, kudumma niimö tiya ka ömö'di ka eedi ya, i'i yungngo iini ka teema iini. <sup>35</sup> Ömö'di ya a'diila ya ö'dö ndama niimö tiya iini ya a'diila ya, ömö'di ya toroko ya ö'dö ndama niimö tiya iini ya toroko ya, eema tumma na toroko no. <sup>36</sup> Lakiini ara a'a tiki aaga, tumma na eemadene ün'dügüngö no ara tahükümü iini ka uuru ma tahükümü kara tö'dö. <sup>37</sup> Tumma nüüdü kara tanangnga kadu ka tapa küdü, a tumma nüüdü afe'de kara tanangnga o'o ka tahükümüdene."

*NaFariisi kasaasa tassa ka türü*  
(Murkus 8.11-12; Lüüka 11.29-32)

<sup>38</sup> A katalaana ma seriye könö nja naFariisi tiki iini, "Ka tatalaana, kasaasa

ungngo tiji türü küdü." <sup>39</sup> İkiri ka tiki eene, "Sere ya oroko a temelö asaasa türü, taalo kara tasala kide illi türü na ne'bi Yünan. <sup>40</sup> Afa ma Yünan ka taganna ka müdigilöögö tammo dhabbu mo ka eedi a füngngö iidoona ana ooso miini, nggeege ara 'Bii'bala ma Tadü'ddü tanna ka 'büdhülü ka teene a füngngö iidoona ana ooso miini. <sup>41</sup> Ara kadu ma Ninawa saga fiki'dö ka uuru ma tahükümü nja sere tiya kümmü eege kudumma eene ka taadha ka tatoroko kadaföönyö tumma na Yünan, a 'bitingngö ömö'di ungngo kita agii'bi Yünan. <sup>42</sup> Ara Uugaara ma küülü saga fiki'dö ka uuru ma tahükümü nja sere tiya mümmü eege, kudumma oono ka öö'dö ndama 'büdhülü keere ku'b'ba ma tö'dö taföönyö tumma ma ta'dara na Siliman, ömö'di ungngo kita agii'bi Siliman.

<sup>43</sup> "Ka koronggore tiya toroko ya kara tö'dö kürö ndama ömö'di, ikiri ka talööle ka dhüile awwa 'buugu ma tagünü kide itaalo aduna. <sup>44</sup> Iki, 'Ara tapadaga co 'di tiya eede ka öö'dö ndama iini ya,' afada aduna i'i ka ta'döngngönyö insili kada akindininjaana ku'bu. <sup>45</sup> İkiri ka tunggeene aco öö'dö a nagoronggore ka iïdümümü kafünü eera ka oroko kadagii'bi i'i. Kaco kannu kide a taneene na ömö'di tiya miini ya, katoroko ka tagii'bi na dhidha no. Taneene ma sere

tiya oroko ya kara tafifi  
nggeege."

*Yasu nja nüümö nja nagöre  
tanno iini*

(*Murkus 3.31-35; Lüüka 8.19-21*)

<sup>46</sup> Aga Yasu ka taleefe teema nja kadu ya, a nüümö miini nja nagöre tanno iini ta'dingeene ko'do kürö kasaasa teema nja iini. <sup>47</sup> A ömö'di öccö tiki, "Nüümö müüdü nja nagöre tanno üüdü ka'dingeene ko'do kürö kasaasa teema nja o'o."

<sup>48</sup> İkiri Yasu ka tiki iini, "Nüümö meede oogo miiye a nagöre neede eege küiye?"

<sup>49</sup> İkiri ka laga niisö ka kadalaadene tanno iini iki, "Nüümö meede nja nagöre tanno eede eege kungngo.

<sup>50</sup> Kudumma ömö'di tiya alinggo a tumma tanno Pupa tiya eede ya ka 'dotombo'do ya i'i ya örre tiya eede nja inye tammo eede nja nüümö tammo eede."

## 13

*Tafeene ma tumma ma  
taleele*

(*Murkus 4.1-9; Lüüka 8.4-8*)

<sup>1</sup> Ka uuru tanno miini no ö'dö Yasu kürö ndama 'di aco a tinggini ma to emmi kide. <sup>2</sup> A kadu tarügü kini ka oona kadhabbu, ikiri ka sörö mürkabü emmi kide a kadu tadigi ka tinggini ma to nye'd'de kungngo.

<sup>3</sup> Adageema tumma nja eene a tafeene ma tumma dhabbu iki, "Unggeene taleele ma taco a siga tadini tööyö ka siga tanno iini. <sup>4</sup> A

kini ka tadini migile ikiri kömö ka a'dingga ka fiini, uyi tö'dö eeraga a'duuru.

<sup>5</sup> A kömö ta'dingga ka 'buugu tiya 'dokon'da ya, ya kuraaga ka taalo kadhabbu kide ya afü'döönö areere kudumma kuraaga taalo kinynyo aa'bu. <sup>6</sup> A ka ndanaaya köö'dö ko'do ma tinyogo, kudumma ereere katitaalo kene ma'bayaga ko'do. <sup>7</sup> A kömö ta'dingga ka immi ka teene, immi teesere mamir'di oogo. <sup>8</sup> Ammo ta'dingga ka tüm'bööri tanno a'diila no, ammo tö'dö a kadu kiidümmü, ammo tö'dö ana iiye a kadu kiidoona, ammo tö'dö ana iiye kukumu ömö'di aaco iisine adhabbu a tiya adinidene ya. <sup>9</sup> Ömö'di ya ana iisine ya fa kini atoodo kide."

<sup>10</sup> I'i yungngo a kadalaadene köö'dö ka Yasu kindini i'i, "Neemaga o'o kene a tafeene ma tumma amana?"

<sup>11</sup> Iki eene, "Tumma ma tauugaara ma 'dotombo'do na küdhü no ananja aaga, illi eege taalo kananja eene. <sup>12</sup> Ömö'di ya ana eema dhabbu ya ara könö tagusunja kini kide dhabbu, a ömö'di ya eema ka titaalo kini ya, münda ya idhilli ya kini ya ara ta'dugadene kini. <sup>13</sup> I'i yungngo eede ka teema nja eene a tafeene ma tumma kudumma eene kadiinö kide kassa katitaalo kijöögö, katoodo kide kasa kitaalo kaföönyö kitaalo kussu.

14 Amang ka tumma tanno ne'bi Asaiya co ööye miini, 'Salla aaga taföönyö taalo aaga kara tussu, aaga tadönö kide aaga sa kitaalo kara tijöögö.

15 Kudumma eedi tiya kadu tanno akidhö köödhii iisine neene ka'bürü iiye, kudumma eene taalo kasaasa taföönyö ana iisine kussu a nanggeedi tanno eene amang kene taadha ka tatoroko noolona eege.'

16 Lakiini a'diila nja aaga kudumma iiye tanno ada kiji 'buugu iisine naada taföönyö eema. 17 Ara a'a tadirina tumma aaga dhorro, nagane'bi kadhabbu nja kadu tanno insili ka nanggeedi no, kasaasa tadöni ka eema tiya ada ka ijöögö 'bitüngngö ya kitaalo kijöögö, ka asaasa taföönyö eema yaada ka föönyö ya taalo kaföönyö.

18 "Aaga föönyö tafeene ma tumma ma taleele. 19 Ka ömö'di kara taföönyö tumma ma tauugaara saga titaalo assumunaana kide ya, Ebliisi tö'dö ökösö tumma no adininja kini ka eedi no. Tööyö ma tadönidene ka fiinii mo. 20 Aya adinii ada ka 'dokon'da ya i'i yungngo aföönyö tumma na Masala amma ereere adhodho. 21 Lakiini kudumma ereere ka titaalo kini ya atagünü idhilli kungngo. A 'buugu

kara tiideene a kadu talinggo eege kudumma tamma ma Masala karere ka tapadaga oona keere. 22 Aya adinidene ka immi ka teene ya, i'i yungngo aföönyö tumma, adinigöögö ma eema ma 'büdhülü nja tallogo ma almaala, kamir'di tumma itaalo ana iiye. 23 Aya adinidene ka tüm'bööri ya i'i yungngo aföönyö tumma na Masala assumunaana kide, i'i yungngo ara tö'dö a tööyö, ammo tö'dö a tööyö mukumu kadu ka iidümmü (100), ammo tö'dö ana iiye a kadu kiidoona (60), ammo töö'dö ana iiye kukumu ömö'di aco iisine (30) a dhabbu a tiya adinidene ya."

### *Tafeene ma tumma ma moome*

24 A Yasu tadirina tafeene ma tumma könö eema eene afe'de iki, "Tauugaara ma 'dotombo'do kafeene nja ömö'di tiya adinii tööyö ma 'diila mo ka siga tanno iini.

25 Ka ooso töccö a kadu ka ndarigide ikiri diidi yiini ka öö'dö adadinii moome ka migile ka teene assa ka tunggeene. 26 Ka migile ka ndafü'döönö ma unggu koforo kürö ya, ikiri moome kabbü 'dala nja oono.

27 "Ikiri kadu na linggo ka siga no, kadindini i'i kiki a'da, 'Ka ömö'di eede, nadinii o'o tööyö ma 'diila mo ka siga tanno üdü a moome sa öö'dö nya?'

<sup>28</sup> "Ikirii ka tapadaga tumma eene iki, 'Diidi ma a'a i'i yungngo agalinggo nggeege.'

"Kikirii ka tiki iini, 'Nasaasa o'o ungngo kico tafanna moome ku'bu?'

<sup>29</sup> "Ikirii ka anu iki eene, 'Aaga fa kide ii'dii aaga tafanna migile ku'bu nja moome." <sup>30</sup> Aaga fa ka moome masere nja migile tikinggi ara uuru ma taraana köö'dö, na a'a sa ka tiki a kadu tanno araana no aaga awagaana moome koona ka dhidha aaga tami'daana aaga tüfü issi kide ara aaga ka tödhe migile aaga turugu co 'boode tiya eede.'

*Tafeene ma tumma ma tanuure*  
(Murkus 4.30-32; Lüüka 13.18-19)

<sup>31</sup> Adirina tafeene ma tumma eene afe'de iki, "Tauugaara ma 'dotombo'do kafeene nja ndaniïye ma tanuure na ömö'dii ka 'duga adadinii ada ka siga tanno iini" <sup>32</sup> A'da ka yoyo iiye miini, lakiini kene ka tasere ka ta fa ya dhabbu ya liganaafa ma siga nye'd'de kungngo uyi tüfü nafü ka naseldhe miini."

*Tafeene ma tumma ma tigüüdi*

(Lüüka 13.20-21)

<sup>33</sup> A Yasu tafada adirina tumma no eene a tafeene ma tumma tököönö afe'de iki, "Tauugaara ma 'dotombo'do kafeene nja tigüüdi aka ka a'duga manangnga ka

nyalemelö iidoona idhi elö tüüfü nye'd'de kungngo."

*Yasu eema a tafeene*  
(Murkus 4.33-34)

<sup>34</sup> Tumma no nye'd'de kungngo adirina Yasu a kadu a tumma kafeene itaalo eema nja eene ün'dügüngngö illi a tumma kafeene. <sup>35</sup> A tumma na ne'bi co ööye miini, "Kede kara teema eema a tumma keefe, nadiri eema ya aganna ka küdhü ma 'billi ya a'da üfürü 'büdhülü tadinadene."

*Yasu asaana tafeene ma tumma ma moome ku'bu*

<sup>36</sup> Ikirii Yasu ka tinyi kadu ku'bu ara kico 'dii, ikirii kadalaadene niini ka öö'dö kini kiki iini, "Asaana ana tafeene ma tumma ma moome ma siga kidi ku'bu amang kidi tessu."

<sup>37</sup> Apadaga tumma eene iki, "Ömö'dii ya adinii tööyö ka'diila ya, i'i ya 'Bii'bala ma Tadü'd'dü." <sup>38</sup> A siga a'da 'büdhülü, a tööyö ma'diila mo ka laala ma tauugaara ma 'dotombo'do, a moome ka laala ma Ebliisi. <sup>39</sup> A diidi ya adinii moome ya i'i ya Ebliisi uuru ma taraana a'da tödhe ma 'büdhülü a kataraana a'da kadhangga.

<sup>40</sup> Afa ma taleele ka tawaana moome koona üfü issi kide ara tafeene nggeege ka töödhü ma 'büdhülü. <sup>41</sup> A 'Bii'bala ma Tadü'd'dü tagürünü kadhangga niini kagesse kadu na oroko no nja tanno aga'da 'buugu

ka tauugaara tanno iini no. <sup>42</sup> Kadhifi eege ka issi ma tambürüü'di kita eene katafara kabbünaana igini ka oona. <sup>43</sup> A kadu na 'diila no töyeene afa ndanaaya ka tauugaara tanno Pupa tiya eene. Ömö'di ya ana iisine ya fa kini atoodo kide.

*Tafeene ma tumma ma al-maalaa tiya küdhü ya*

<sup>44</sup> "Tauugaara ma 'dotombo'do kafeene nja gürüsüi tiya aküdhüdene ka siga ya, a ömö'di taluna aküdhü a dhodho tagu i'i ka oona, adanege ana eema tiya iini nye'd'de ateefe tana siga na miini no.

<sup>45</sup> "A tauugaara ma 'dotombo'do tafeene afe'de nja ömö'di tiya anadene ana eema ya agawwa lüülü ya agu'daana ya. <sup>46</sup> Kini ka ndaluna lüülü ya agu'daana ya, ikiri ka tanege ana eema tiya iini nye'd'de kungngo eenege i'i.

*Tafeene ma tumma ma sa'baka*

<sup>47</sup> "A tauugaara ma 'dotombo'do tafeene nja sa'baka ma kilöögö a kadu tanno akinni no, kadara'baga co to kümmü kilöögö kadhoonyo. <sup>48</sup> Kini ka ndadigine, kikiri ka 'dinigi i'i ka tinggini ma to. Kikiri ka tagesse kilöögö na 'diila no kadhifi kene ka naayo kara katadhifigi na oroko no co. <sup>49</sup> Ara tafiigi nggeege ka uuru ma töödhi ma 'büdhülü. A kadhangga tö'dö kagesse kadu na oroko

no ka kadu tanno 'diila no ka teene. <sup>50</sup> Kadhifi eege ka issi ma tambürüü'di ka teene, kita eene kafara kabbünaana igini ka oona."

<sup>51</sup> İkiri Yasu ka tindini eege iki, "Kussu aaga tumma no nye'd'de kungngo?"

Kiki iini, "Kussu ungngo."

<sup>52</sup> Iki eene, "Tumma no a'da tatalaana ma seriye ya talaana kadu na anangnga tauugaara afeene nja ömö'di ma 'di tiya amanaga tööyö ma 'bitüngngö mo nja tammo illi mo kürö."

*Kadu ma Nasira kanu ka Yasu  
(Murkus 6.1-6; Lüüka 4.16-30)*

<sup>53</sup> Ka Yasu ka ndatüümö tafeene ma tumma ya ikiri ka tunggeene ndama kanna.

<sup>54</sup> Aaco anya tammo iini alaana kadu ka la ma talaana tiya eene, a kadu tadhere kindini ajeene kiki, "Aduna ta'dara nja türü tanno kiga? <sup>55</sup> Taalo i'i yungngo a 'bii'bala ma tadasaana ma kee'di? A niimö miini mana eere a'da Mariyom a nagöre niini a'da Yaguub nja Yüüsif nja Samaan nja Yahüüsa?

<sup>56</sup> Taalo nagïnye niini kungngo kita nye'd'de nja angnga, assa aduna tumma no kiga?"

<sup>57</sup> Kitaalo kamma kini, ikiri ka tiki eene, "Taalo kadu ma tanu ka ne'bi illi kadu ma anya tammo iini nja kadu ma 'di tiya iini." <sup>58</sup> Itaalo ala türü eene dhabbu kudumma eene taalo kamma ana eedi.

## 14

*Inde na Yühanna tiya  
Tatambeese ya  
(Murkus 6.14-29; Lüüka 9.7-9)*

<sup>1</sup> Ka uuru tanno miini no aföönyö uugaara Hirüdüs tumma na Yasu. <sup>2</sup> İkiri ka tiki a kadu tanno alingga nja iini no a'da, "Yühanna ya Tatambeese ya afiki'dö ka inde, i'i yungngo iini ka talingga eema keefe a türü."

<sup>3</sup> Kudumma Hirüdüs ka tagümmü Yühanna adimi'di i'i anangnga ka pabuusu, kudumma Herüdiya aka ma örre tiya iini Filibüs.

<sup>4</sup> Kudumma Yühanna ka tageema nja iini, iki iini a'da, "Taalo a'diila küdü kara ta'duga Herüdiya aka ma örre tiya yüdü." <sup>5</sup> Asaasa tiidi i'i illi i'i ari'ba a kadu kudumma eene ka tümmü Yühanna kada ne'bi.

<sup>6</sup> Ka uuru ma taanyara ma teenedene tanna Hirüdüs, a 'badaada ma Herüdiya tasiili kide a'diila ka Hirüdüs ka oona adhodho. <sup>7</sup> Adimi'di tumma nja oono iki a'da, niimö yoono ka asaasa ya ara i'i tanangnga oono.

<sup>8</sup> İkiri niimö ka tagalaana oogo, mikiiri ka tiki a Hirüdüs, "Nanangnga üdü ya Yühanna ya Tatambeese kide ka dho tammo."

<sup>9</sup> Uugaara tagoroo'bo, lakiini i'i anangnga kadu köö'dö iini, kudumma iini ka timi'di tumma ka kafala tanno iini kidha. <sup>10</sup> Agürünü kadu kateefe tarmuna üdü ya Yühanna ka pabuusu.

<sup>11</sup> Köö'dö iini ka dho a'duga anangnga a 'badaada,

mikiiri ka 'duga mateefe tunggu co niimö, <sup>12</sup> İkiri kadalaadene na Yühanna ka öö'dö ka'duga oofo yiini katatu'böönö kassa ka co kadiriniga co Yasu.

*Yasu amana kuri a kadu  
kö'dö ana alif ka üdümmü  
(Murkus 6.30-44; Lüüka 9.10-17; Yühanna 6.1-14)*

<sup>13</sup> Ka Yasu ka taföönyö tumma no ya, ikiri ka tunggeene ndama kannaka aka ka mürkabü aaco lodho unggodho i'i. Lakiini kadu kadhabbu ka tussu kuurna i'i keere ndama naanya tanno eene ana uune. <sup>14</sup> A kini ka nda'barda ndama mürkabü asala kadu kadhabbu a 'bangnga meene tümmü i'i oolona eege ka maara tammo eene.

<sup>15</sup> A 'buugu kanda siiya ya, ikiri kadalaadene niini ka köö'dö kini kiki iini a'da, "Asa 'buugu tefe co, dhüile i'i yungngo iki a kadu ka tunggeene kaco nöö'di ma tana eema ma taguri."

<sup>16</sup> İkiri Yasu ka tiki eene, "Taalo kama tunggeene adha, aaga inyi eema eene kaguri."

<sup>17</sup> Kikiri ka tiki iini, "Taalo niimö kidi illi miteene ma üdümmü a kilögö keera."

<sup>18</sup> İkiri Yasu ka tiki eene, "Akö'dö iini a'a kita." <sup>19</sup> İkiri ka anangnga kadu nye'd'de katemmi ka ooyo, ikiri ka 'duga miteene müdümmü mo nja kilögö tanno eera no, asala co 'dotombo'do anangnga baraka kide asümünaana miteene ku'bu anangnga a kadalaadene

tanno iini katamana a kadu. <sup>20</sup> Kadaguri in'dili kungngo küüsü. Kada-gawaana türeene miini koona kadigi nasinggili kada'baaga kafünü eera. <sup>21</sup> A kadu na kuri no nagiide no kö'dö na alif ka iidümmü (5,000) a'da taalo kakinni iiya nja laala tiya dhiidhi ya.

*Yasu unggeene ka 'büdü*  
(Murkus 6.45-52;  
Yühanna 6.15-21)

<sup>22</sup> İkiri Yasu ka anangnga kadalaadene niini ka taka ka mürkabü kadhe ko'do kaco ka nda'da ma to ndama 'dakeyi tiya faga co kanna ya ara kaduuru kadu ka tino. <sup>23</sup> Kini ka nduuru eege ka tino ya, ikiri ka sörö 'dikinya unggodho i'i afara ka Masala. Idhi a 'buugu ta siiya. <sup>24</sup> A tanya tagürü mürkabü kasigi oogo co ku'b'ba ndama tinggini ma to, kudumma tanya ka talinggo oogo ndama dhugudha.

<sup>25</sup> A na'bu ma taka a Yasu tunggeene ka 'büdü ana awwa unggunu ka kadalaadene tanno iini. <sup>26</sup> Ka kadalaadene tanno iini ka tasala i'i ka tunggeene ka to ya, a ri'ba tümmü eege kiki, "Koronggore i'i yungngo," kafara ari'ba kagu eege.

<sup>27</sup> İkiri Yasu karooro ka tiki eene, "Aaga idhi oona ku'bu a'a namiini, aaga fa tarib'a."

<sup>28</sup> İkiri Bütrüs ka tiki iini, "Üürü o'o namiini Uugaara, fa kede nunggeene

ka 'büdü ana awwa nöö'dö küdü kanna."

<sup>29</sup> A Yasu tiki, "Aayu." İkiri Bütrüs ka ta'barda ka 'büdü ndama mürkabü unggunu ka Yasu. <sup>30</sup> Ari'ba tümmü i'i iini ka tassa ka tanya ka tüösö dhindho, anda öö'di ka 'büdü iidhe iki, "Ka Uugaara, ma oolona a'a."

<sup>31</sup> İkiri Yasu ka tunggu tüösö iini ümmü i'i, iki iini, "Minna agu tamma nüüdü ka idhilli kungngo minna agu o'o na'doore ka eedi?"

<sup>32</sup> Kene ka ndasirigö co mürkabü ya ikiri tanya katöödhü. <sup>33</sup> A kadu na kanna ka mürkabü no, tüürü ku'bu kamma kini kiki, "O'o no 'Bii'bala ma Masala timin'da."

*Yasu oolona kadu ka maara*  
(Murkus 6.53-56)

<sup>34</sup> Kikiri ka tada'da to kaco kata'daga co Genisaret. <sup>35</sup> Aga kadu miini kandussu Yasu ya, kikiri ka tanyala tumma ka naanya ka oona 'do, köö'dö a kadu tanno amaara no iini. <sup>36</sup> Kiki iini a'da, kasaasa a'da kakara taa'ba 'dakeyi ma ten'di tammo iini ün'dügüngngö, a kadu na aa'ba i'i ka oona no toolonadene nye'd'de kungngo.

## 15

*Tinsili nja nyoro*  
(Murkus 7.1-23)

<sup>1</sup> İkiri naFariisi nja kata-laana ma seriye köö'dö ka Yasu ndama Örsaliim, kindini i'i, <sup>2</sup> "Minna agu kadalaadene nüüdü

kasilli eema ma kadaada kadagümmünü angnga ma 'billi ya, kitaalo kagunu iisine kassa kagu eema."

<sup>3</sup> Yungngo Yasu ka tapadaga tumma eene indini eege, "Minna agu aaga, aaga tasilli tumma na Masala ara aaga katümmü talaana na kadaada ma aaga. <sup>4</sup> Masala miki a'da, 'Ümmü pupa yüdü nja nüümö tammo üdü,' kudumma 'ömö'dü tiya eela pupa yiini nja nüümö tammo iini ya, ara tiididene.' <sup>5</sup> Lakiini aaga kiki a'da, ömö'dü ya ana eema ma tamana a pupa tiya iini nja nüümö tammo iini, assa kagala ka tiki eene a'da, 'I'i anangnga a Masala.' <sup>6</sup> I'i taalo asaasa tumma ma pupa tiya iini, nggeege kaga'da aaga tumma na Masala ara aaga katümmü talaana na kadaada ma aaga. <sup>7</sup> Aaga na ümmü nanggeyi naada ka tii'baana no. Tumma na ne'bi Asaiya ka tatiraana ma aaga no kinynyo ööye miini, kini ka tageema a'da Masala miki a'da,

<sup>8</sup> 'Kadu no akümmü a'a a nüönö ün'dügüngngö lakiini nanggeedi neene kagu'b'ba kede.

<sup>9</sup> Taalo kümmü a'a ana eedi dhorro kara talaana tumma ma nakömö'dü taalo talaana neede.'

<sup>10</sup> A Yasu takümünaana kadu koona iki eene, "Aaga toodo kede aaga tussu.

<sup>11</sup> Taalo eema ya ömö'dü

ka amana kini ka nüönö i'i yungngo amana ömö'dü ka tanyoro, lakiini eema ya icci a kürö ndama nüönö ya i'i yungngo amana ömö'dü ka tanyoro."

<sup>12</sup> İkürü kadalaadene niini ka öö'dö kini kiki, "Nussu o'o a'da kagoroo'bo naFariisi kene ka taföönyö tumma nüüdü no?"

<sup>13</sup> İkürü ka tapadaga tumma eene iki, "Fa ya pupa tiya ka 'dotombo'do ya, taalo adho oogo ara tafannadene ana ereere miini. <sup>14</sup> Aaga fa kene kudumma eene kada katalaana tanno kisinsoro no, üürü ka soro ara tümmünü soro ka tino ya, kara ta'düngjö co ööye ateera meene."

<sup>15</sup> İkürü Bütrüs ka tiki iini, "Asaana tumma no kiidi ku'bu."

<sup>16</sup> İkürü ka tiki eene, "Küfürü aaga tussu ta'bütüngngö? <sup>17</sup> Taalo aaga kussu a'da nüümö ya ömö'dü ka tunggu co a nüönö ya adheedhe ko'do aco eedi ndama eedi aco kürö ndama tuu'da? <sup>18</sup> A nüümö ya ara tö'dö kürö ndama nüönö ya i'i ya öö'dö kürö ndama eedi, i'i yungngo amana ömö'dü ka tanyoro.

<sup>19</sup> Kudumma tumma tanno toroko no kicci akürö ndama eedi, tagirina kadu nja taga'da 'buugu nja nyoro, temelö, tadhe kadu nja teelaana. <sup>20</sup> Eema ya, yungngo amana ömö'dü ka tanyoro, lakiini tagu kuri ana iisine kada nyoro taalo

i'i yungngo amana ömö'dü ka tanyoro."

*Tamma ka Masala na aka ma Kanaan*  
(Murkus 7.24-30)

<sup>21</sup> İkiri Yasu ka tunggeene ndama kanna aco a riifö ma Suur nja Saiyda. <sup>22</sup> İkiri aka minggide mada Kanaana möö'dö kürö ndama kita miini kita, miidhe miki iini, "Ka Uugaara, 'Bii'bala ya Dawud, ma ana 'bangnga ma a'a na'bu aka ka 'badaada tammo eede, üünü midhi ku'bu ana oogo 'do."

<sup>23</sup> A Yasu taalo adrina nüümö oono, ikiri kadalaadene niini ka öö'dö kiki iini, "Uuru oogo ka tino kudumma oono ma to'd'o kaja keere miidhe."

<sup>24</sup> İkiri Yasu ka tiki, "Masala magürünü a'a ka kidhefele ma Israyil na aama no unggodho eege."

<sup>25</sup> Lakiini mö'dö müürü ku'bu kini kidha miki, "Uugaara, oolona a'a."

<sup>26</sup> A Yasu tiki, "Taalo a'diila kaja ka 'duga kuri ya laala angnga tanangnga a tiini."

<sup>27</sup> Aka tükiri ka tiki iini, "Tumma dhorro eege kamini Uugaara, a tiini 'do ya kera eema ya öreeene asusuli ndama naadho tanna kadu tanno eene."

<sup>28</sup> I'i yungngo Yasu ka tiki oono, "Aka, kïdhïndhi tamma ka Masala nüüdü, nüümö yüüdü ka asaasa ya ara tananja o'o." A 'badaada moono tarooro ka'diila ka ööye miini kungngo.

*Yasu oolona kadu kadhabbu*

<sup>29</sup> A Yasu tunggeene ndama kanna aco a 'dakeyi ma to ma Jaliil. Asirö anya emmi kide. <sup>30</sup> A kadu tawaagaana oona kini ka oona kadhabbu, namügüre nja kisinsoro, nja kadu tanno sogo'do no nja nakïnggïri nja kadu könö kadhabbu köö'dö ana eege ka Yasu kidha oolona eege. <sup>31</sup> A kadu tadhere eene kataasala nakïnggïri kadeema a kadu na sogo'do no toolonadene, a namügüre tunggeene, akisinsoro tiji 'buugu, kïndhïgi Masala ma Israyil ko'do.

*Yasu anangnga kuri a kadu kö'dö ana alif ka egüsö*  
(Murkus 8.1-10)

<sup>32</sup> A Yasu tagümmünü kadalaadene niini iki eene, "Magu 'bangnga a'a ma kadu tanno, kudumma eene ka ndiyyü kita nja a'a afüngngö tiidoona a nüümö meene kaguri kitaalo nitaalo nasaasa tuuru eege ka tino ana iire kudumma eene kara co tagi'di ka fiinü."

<sup>33</sup> İkiri kadalaadene niini ka tiki iini, "Ara angnga taduna kuri kiga ka dhüile kita ma ta'dimo ka kadu tanno in'dili no?"

<sup>34</sup> İkiri Yasu ka tindini eege iki, "Namiteene kungngo ada kaanya?"

Kiki a'da, "Namiteene ka iidümmü kafünü eera ana ligi kilöögö idhiidhi."

<sup>35</sup> İkiri Yasu ka anangnga kadu katemmi ka 'büdhülü.

<sup>36</sup> A'duga namiteene na iidümmü kafünü eera no nja kilöögö anangnga ta'diila a

Masala asümünaana ku'bu anangnga a kadalaadene tanno iini katamana a kadu.<sup>37</sup> Kadaguri eege nye'd'de kungngo küüsü, kikirii ka tawagaana türeene miini koona kadigi nasinggili ka iidümmü kafünü eera.<sup>38</sup> A kadu na aguri no tö'dö na alif ka egiisö a'da taalo iiya nja laala tiya idhiidhi akinidene.<sup>39</sup> Ikirii Yasu ka tuuru kadu ka tino ara ka taka ka mürkabü aco anya ma Majdan.

## 16

*Tasaasa ma eema keefe no*  
(Murkus 8.11-13; Lüüka 12.54-56)

<sup>1</sup> A naFariisi nja Sadügiin tö'dö kini kasaasa ta'b'ba i'i ka eyi, kasaasa i'i a'da aala niimö eene keefe ndama 'dotombo'do.<sup>2</sup> Apadaga tumma eene iki, "Ka ndanaaya kara caa'bu, siiya kungngo a 'dotombo'do tadhöyö, aaga tiki a'da a'diila 'buugu.<sup>3</sup> A 'buugu tara ta ndüüli ka tadhöyö, litaka kungngo aaga tiki a'da, ara tombo'do tede. Kussu aaga tasaana tumma ma 'büdhülü ku'bu illi eema ma naguuru tanno ara tö'dö no taalo kara tussu ka tasaana ku'bu.<sup>4</sup> Ara oroko ma sere tiya na temelö no taalo a'diila ya, asaasa tassa ka türlü ma 'dotombo'do, lakiini eege taalo kara taduna illi türlü na Yünan no." Ikirii ka tinyi eege ku'bu ara ka tunggeene.

*Tigüidi ma naFariisi nja Sadügiin*

(Murkus 8.14-21)

<sup>5</sup> Ka kadalaadene tanno iini ka tada'da to ya, küürü ma ta'duga miteene meene.<sup>6</sup> A Yasu tiki eene, "Aaga adini ko'do kudumma tigüidi tamma naFariisi nja Sadügiin."

<sup>7</sup> Kikirii ka teema ungodho eege, "I'i iki nggeege kudumma aja ka titaalo kagufu eema ma taguri nja angnga."

<sup>8</sup> A Yasu tussu tumma neene, ikirii ka tiki, "Aaga no tamma ka Masala tanno ada ka tidhilli no, kö'dö aaga nya aaga tiki a'da miteene mitaalo kaja?"<sup>9</sup> Küfürü aaga tussu ta'bütängngö?

Taalo aaga kagügi nami-teene na iidümmü no ma kadu tanno öö'dö na alif ka iidümmü kadigi aaga nasinggili kaanya a miteene?

<sup>10</sup> A miteene ma iidümmü mafünü eera mo ma kadu tanno öö'dö na alif ka egiisö no, kadigi aaga nasinggili kaanya?<sup>11</sup> Taalo aaga kussu tumma no nya, taalo a'a neema tumma ma miteene nja aaga? Aaga adini ko'do afa ma tigüidi ma naFariisi nja Sadügiin."

<sup>12</sup> A kadalaadene tussu a'da i'i iki eene a'da kafa taföönyö talaana naFariisi nja Sadügiin, taalo tigüidi ma miteene.

*Bütrüs ussu a'da Yasu atimin'da*  
(Murkus 8.27-30; Lüüka 9.18-21)

<sup>13</sup> Ka Yasu ka ndö'dö ka riifö ma Kaiysariya

Filippi ya, ikirii ka tindini kadalaadene niini iki, "Kadu kiki nya ma 'Bii'bala ma Tadü'd'dü?"

<sup>14</sup> Kiki iini, "Kadu könö kiki a'da Yühanna ya Tatambeese ya, a könö tiki a'da İliya, anno tüütü katiki a'da Armiya alla ne'bi öccö."

<sup>15</sup> İkiri ka tiki eene, "Aaga kiki a'da a'a na minna?"

<sup>16</sup> İkiri Samaan Bütrüs ka tiki, "O'o na Almasiihi 'Bii'bala ma Masala ma efe ka 'dii mo."

<sup>17</sup> İkiri Yasu ka tiki iini, "A'diila nja o'o no Samaan 'bii'bala ya Yüna, tumma no taalo kadherenja o'o ndama ömö'dii, lakiini Pupa yeede yungngo ka 'dotombo'do ya i'i yungngo ala o'o. <sup>18</sup> Ara a'a ka tiki o'o na Bütrüs no, o'o na 'dokon'da, ka 'dokon'da tammo ara a'a tarü'bünü kaniisa meede kide, a 'buugu ma inde taalo ara tii'bi oogo. <sup>19</sup> Ara a'a tanangnga nangafata ma tauugaara ma 'dotombo'do o'o, niimö yüdü ka timi'daana ka 'büdhülü ya, ara timi'didene ka 'dotombo'do, a niimö yüdü kara tagildhe ka 'büdhülü ya, ara tatinggildhe ka 'dotombo'do."

<sup>20</sup> İkiri Yasu ka tiki a kadalaadene tanno iini a'da kafa tadirina tumma no a ömö'dii a'da i'i ya Almasiihi.

*Yasu eema tumma ma inde nja tafiki'dö*

(Murkus 8.31—9.1; Lüüka 9.22-27)

<sup>21</sup> Ndama uuru tanno miini no, ikirii ka ndadünügü eema a kadalaadene tanno

iini kene ka iïye kungngo a'da ara i'i co Örsaliim aco adhügürü ana eema dhabbu ka niisö ma kadiifi nja naguugaara ma ka'boge nja kataalaana ma seriye kiidi i'i afiki'dö ka inde a füngngö iidoona.

<sup>22</sup> İkiri Bütrüs ka tagedhe i'i asanna kini iki a'da, "Ka Uugaara, a Masala tafa tö'dö a tumma tanno."

<sup>23</sup> İkiri Yasu ka tafele assa ka Bütrüs ko'do iki iini, "Sigi co kannaa kede ka oona o'o na Ebliisi no, nakara o'o kede kidha kudumma a tumma tanno üyüdü no tumma ma nakömö'dii eege kamiini taalo tumma na Masala eege kamiini."

<sup>24</sup> İkiri Yasu ka tiki a kadalaadene tanno iini, "Ömö'dii ya asaasa tö'dö kede keere ya fa kini üpü eyi yiini co a'duga salii'bi yiini öö'dö ke de keere.

<sup>25</sup> Kudumma ömö'dii tiya asaasa toolona eyi yiini ya, fa kini aama eege kudumma ömö'dii ya üpü eyi co ka üyüdü ma a'a ya, ara taluna eege. <sup>26</sup> Ara ömö'dii taluna minna kini kara tümmü eema ma 'büdhülü nye'd'de ara ka taama eyi yiini, i'i atoolona eyi yiini a minna?

<sup>27</sup> Ara 'Bii'bala ma Tadü'd'dü sa köö'dö a tiddhindhi ma Pupa tiya iini nja kadhangga tanno iini öö'dö tümmü kadu ana tamana ma linggo tanno iini ka tagalinggo no.

<sup>28</sup> Ara a'a tadirina tumma aaga dhorro, kadu könö kungngo kita, taalo kara tassa ka inde ka oona a'da küfürü tasala 'Bii'bala ma

Tadü'd'dü tö'dö a tauugaara tanno iini."

## 17

*Yasu a'bele oona*  
(Murkus 9.2-13; Lüüka 9.28-36)

<sup>1</sup> A füngngö ka ndö'dö iidümmü afünü unggodho ya, ikiri Yasu ka 'duga Bütrüs nja Yaguub nja örre tiya iini Yühanna, agedhe euge asirö anya ma dhonggoro mo nja eene. <sup>2</sup> A'bele oona eene kide kungngo, a dhugudha yiini töyeene afa ndanaaya, en'di ma oona yiini töyeene kata'bassa. <sup>3</sup> A Müüsa tadhe kene ka oona nja İliya keema nja Yasu. <sup>4</sup> İkiri Bütrüs ka tiki Yasu, "Ka Uugaara, a'diila 'do aja kara tanna kita, üürü o'o nasaasa ara a'a talingga ligangga iidoona kita, müüdü nja tammo Müüsa nja tammo İliya."

<sup>5</sup> A kini ka teema ya, a tülüügü tö'dö ka öyeene kene kaküdhü euge ka oona, a tumma tö'dö ndama tülüügü kiki, "'Bii'bala yeede ka asaasa i'i ya yungngo yeede ka tamma kini ya, aaga föonyö tumma niini."

<sup>6</sup> Aga kadalaadene ka taföonyö tumma no ya, ari'ba tümmü euge ka'dingga a nadhugudha. <sup>7</sup> İkiri Yasu ka öö'dö ümmü euge ka oona a niisö iki eene, "Aaga fiki'dö aaga fa tari'ba." <sup>8</sup> Kikiri ka ta'dinigi iïye coo'do taalo kasala

ömö'di illi Yasu unggodho i'i.

<sup>9</sup> Kene ka nda'bardaga aku'bu ndama anya ya, ikiri Yasu ka tiki eene a'da, "Kafa tadirina eema yeene ka tadinö kide ya ömö'di, illi a 'Bii'bala ma Tadü'd'dü ka fiki'dö ndama inde."

<sup>10</sup> İkiri kadalaadene niini ka tindini i'i, "Minna agu katalaana ma seriye kiki a'da İliya ara tö'dö ka dhidha?"

<sup>11</sup> İkiri ka tiki eene, "İi ara İliya tö'dö ka dhidha öö'dö tindinaana eema ku'bu nye'd'de kungngo. <sup>12</sup> Lakiini ara a'a tadirina aaga a'da ö'dö İliya illi kadu taalo kussu i'i illi euge kagalinggo niimö yeene ka asaasa ya ana i'i, euge kara talingga tatoroko a 'Bii'bala ma Tadü'd'dü afe'de nggeege." <sup>13</sup> İkiri kadalaadene niini ka tussu a'da i'i eema ka Yühanna ya Tatambeese ya ka oona.

*Yasu oolona na'bu ka 'bii'bala ka oona*  
(Murkus 9.14-29; Lüüka 9.37-43)

<sup>14</sup> Kene ka ndapadaga ka kadu ka teene ya, ömö'di tö'dö ka Yasu üürü kini kidha ana küüge. <sup>15</sup> Iki iini, "Ka Uugaara, oolona 'bii'bala yeede, kudumma insigiri kungngo iini kalinggo i'i 'do a'dinggaögi ka issi nja 'biidü. <sup>16</sup> Nö'dö ana i'i a kadalaadene tanno üüdü kitaalo kambaanya toolona i'i."

<sup>17</sup> İkiri Yasu ka tiki, "Ara a'a taneene nja aaga taagaada? Sere yaada taalo

ümmü Masala ana eedi kaama, aaga na oroko no. Ara a'a tafa kada tagaada? Aaga ö'dö a 'bii'bala tiya kede kita." <sup>18</sup> İkiri Yasu ka kirnaana kini, a na'bu tö'dö kürö ndama 'bii'bala, arooro ka'dila ka ööye miini.

<sup>19</sup> İkiri kadalaadene ka co ka Yasu unggodho eege kindini i'i kürö kiki iini, "Minna agu ungngo titaalo kambaanya toosoraana ma koronggore tiya toroko ya?"

<sup>20</sup> İkiri Yasu ka tiki eene, "Kudumma ma tamma tanno ada taalo kakidhö, ara a'a tadirina tumma aaga dhorro a'da kara takara tana tamma ka Masala ököje nja ndaniïye ma tanuure, ara aaga tiki anya tammo, 'Mooso ndama kita maco kannara mara tooso,' a niimö ma tara tii'bi aaga kungno titaalo. <sup>21</sup> [Na'bu afa ma tiya kungno ya taalo angnga kasoro i'i ün'dügüngngö illi a tümmü tenuge nja tafara ka Masala.]

*Yasu eema tumma ma inde tanno iini nja tafiki'dö*  
(Murkus 9.30-32; Lüüka 9.44-45)

<sup>22</sup> Aga kadalaadene ka ndö'dö ka Jaliil ya, a Yasu tiki eene, "Ara 'Bii'bala ma Tadü'd'dü tümmününja a kadu ka iisine. <sup>23</sup> Kara tiidi i'i atiimö füngngö iidoona afiki'dö ka inde." İkiri kadalaadene kada müürü.

*Yasu amana tulu'ba ma la ma Masala ku'bu*

<sup>24</sup> Aga Yasu nja kadalaadene tanno iini ka ndapadaga co Kafarnahööm, a kadu ma

tulu'ba ma la ma Masala tö'dö ka Bütrüs kindini i'i, "Taalo tatalaana yaada ara tanangnga tulu'ba ma la ma Masala ku'bu?"

<sup>25</sup> İkiri ka tiki iini, "İi."

Aga Bütrüs kico a 'bügööri ya, ikiri Yasu ka tata'da i'i ko'do, iki iini, "Niki o'o nya Samaan? Ka mada eege kungno a naguugaara ma 'büdhülü kama tulu'ba kene ndama laala tiya eene alla ndama kadu ma ajeene?"

<sup>26</sup> Yungno a Bütrüs ka tiki iini, "Ka kadu ma ajeene."

A Yasu tiki, "Üürü nggeege ya taalo laala ara tamana ku'bu. <sup>27</sup> Lakiini angnga taalo kasaasa modolo ka ömö'di ka oona. Kolo a to napügü ca'bune co 'büdü, nümmü müdigidlöögö ma dhidha mo nunggu oogo kürö nafa'da oogo ka niinö, ara o'o taluna nakajine ka egiisö nanangnga yeede ku'bu nja tiya yüdü."

## 18

*Mada i'i yungno a dhabbu*  
(Murkus 9.33-37; Lüüka 9.46-48)

<sup>1</sup> Ka uuru tanno miini no a kadalaadene tö'dö ka Yasu kindini i'i, "Mada i'i yungno idhindhi ka tauugaara ma 'dotombo'do?"

<sup>2</sup> İkiri Yasu ka tagümmüñü 'bii'bala ya idhilli ya anangnga i'i ka 'dängnge kene ka söödö. <sup>3</sup> Iki, "Ara a'a tadirina tumma aaga dhorro, üürü aaga kitaalo kapadaga oona keere aaga tafeene afa laala ya dhiidhi

ya, taalo aaga kara co ka tauugaara ma 'dotombo'do.  
<sup>4</sup> Ömö'dü ya üpü eyi yiini co ya, afeene nja 'bii'bala tiya idhilli ya, i'i yungngo idhindhi ka tauugaara ma 'dotombo'do. <sup>5</sup> Ömö'dü ya amma ka 'bii'bala afa ma tiya kungngo ana eere tiya eede ya, i'i ya amma kede.

<sup>6</sup> "Ömö'dü ya üpü laala ya dhiidhi ya amma kede ya ka tatoroko ya, aheere a kadu ma tafin'da misi ma tawöönö ma dhabbu mo, kassa ta pügü i'i co tüm'bü ma to. <sup>7</sup> Am'ba ka kadu ma 'büdhülü ka eema tiya ara tanangnga 'buugu ka tatoroko, lakinä ara tatoroko nja ömö'dü tiya ara talinggo eema ya. <sup>8</sup> Üürü nüüsö nüüdü nja awwa tiya üüdü kanangnga o'o ka tüünä tatoroko ya, rumunaga eege co, a'diila küdü kara co ka tefe ka 'dü ta'billi bala üüdü kana iisine nja uune nassa kaco ka issi ta'billi. <sup>9</sup> A ööye yüüdü kara tanangnga o'o ka tüünä tatoroko ya, agodhe i'i nüüpü co, a'diila üdü kara co ka tefe ka 'dü ta'billi ana ööye unggodho, bala üüdü ka ana iïye nassa kaco ka issi ma Jahanam.

*Tafeene ma tumma ma dheeafele tiya aama ya*  
*(Lüüka 15.3-7)*

<sup>10</sup> "Aaga adini ko'do aaga fa tadaana laala ya idhiidhi kalama, niki aaga a'da kadhangga neene kungngo ka 'dotombo'do kadini

ka dhugudha ma Pupa tiya eede ka 'dotombo'do. <sup>11</sup> [Kudumma 'Bii'bala ma Tadü'd'dü ö'dö miini ka toolona kadu na aama no.]

<sup>12</sup> "Kiki aaga nya? Üürü ömö'dü inggide ana kidheefele a kadu ka iidümmü (100) assa ka taama unggodho, taalo ara tinyi na öö'dö kadu ka egüsö ada'baaga iidümmü afünü kide egüsö (99) inyi eege ka na'dikinya ara kico tawwa dheeafele ya aama ya? <sup>13</sup> A kini kara taluna i'i 'dee, taalo ara tadhodho iini adagii'bi na öreene na öö'dö a kadu ka egüsö ada'baaga iidümmü afünü kide egüsö? Ara a'a tadirina tumma aaga dhorro ara tadhodho iini a tagii'bi türeene miini na taalo kaama no. <sup>14</sup> Nggeege yungngo a Pupa tiya ada ya ka 'dotombo'do ya ka titaalo asaasa ömö'dü öccö ana ka laala tiya idhiidhi a'da kaama.

*Tafaana ka oona*  
*(Lüüka 17.3)*

<sup>15</sup> "Üürü ka örre tiya üüdü kara tüünä tatoroko ana o'o ya, kolo kini nadirina tatoroko niini iini unggodho aaga, a kadu tafa tanna kide, kini kara taföönyö tumma nüüdü ya, nggeege nafada o'o örre tiya yüüdü ka tatoroko tanno iini. <sup>16</sup> Üürü anu ka tumma ya, 'duga ömö'dü öccö unggodho üürü keera 'amang kene tessu adene a kadu tanno adinö kide no keera nja eene kara

tiidoona.' <sup>17</sup> A kini kara tanu ka tumma tanno eene ya, tirina a kadu ma kaniisa, a kini kara tanu ka tumma ma kadu ma kaniisa ya, aaga ümmü i'i kada ömö'di tiya taalo ussu Masala ya nja ömö'di ma tera tulu'ba kungngo.

<sup>18</sup> "Ara a'a tadünüğü tumma aaga dhorro, niümö yaada kara tami'daana ka 'büdhülü ya, ara timi'didene ka 'dotombo'do, a niümö yaada kara tagildhe ka 'büdhülü ya, ara tating-gildhe ka 'dotombo'do.

<sup>19</sup> "Ara a'a tadirina tumma aaga dhorro, a kadu kara timi'di tumma ka 'büdhülü eege keera ana kada ya meene ka asaasa niümö ka Masala ya, ara aaga taluna ka Pupa tiya eede ya ka 'dotombo'do ya. <sup>20</sup> A kadu kara temmi keera üürü kiidoona ana eere tiya eede ya, ara a'a tanna kene ka söödö."

### *Ömö'di ya taalo ana 'bangnga ya*

<sup>21</sup> İkiri Bütrüs ka tasigi ka Yasu kete indini i'i iki iini, "Ka Uugaara, ara örre yeede tatangga'da nja a'a taanya na a'a saga fa kini na'diila nja iini tiidümmü afünü eera?"

<sup>22</sup> İkiri Yasu ka tiki iini, "Taalo tiidümmü afünü eera, lakiini ukumu kadu kiidoona aco iisine tiidümmü afünü eera.

<sup>23</sup> "Tauugaara ma 'dotombo'do kafeene nja uugaara tiya asaasa tadhifi eema yiini ka kadu ma

linggo tanno iini ya. <sup>24</sup> Kini ka ndamaana kene ya, ikiri ka asaasa ka töccö ka oona gürüüsö ö'dö na alif kada'baaga. <sup>25</sup> A niümö titaalo miini ka anangnga ku'bu, ömö'di yiini ka talinggo nja iini ya, ka tiki a kadu a'da katenege ana i'i nja aka tammo iini nja laala tiya iini nja eema tiya iini nye'd'de kungngo. amang kini tanangnga faana miini ku'bu.

<sup>26</sup> "İkiri ka tüürü ku'bu kini kidha oolomo i'i iki iini, 'Fa kede ara a'a tanangnga eema yüdü yeede ka oona nye'd'de kungngo.' <sup>27</sup> A 'bangnga miini tagu ömö'di uuru i'i ka tino aadha kini ka eema turi.

<sup>28</sup> "Aga ömö'di tiya miini ya ka ndunggeene ikiri ka toreene nja tööje miini iini ka asaasa kömüsü kini ka oona ana nakanjine ukumu kadu kiidümmü, ikiri ka tümmü i'i ka eyi ndakete kamir'di i'i, ikiri ka tiki iini, 'Nangnga kömüsü meede ma küdü mo a'a.'

<sup>29</sup> "İkiri ka tüürü kini kidha oolomo i'i iki iini a'da, 'Anangnga füngngö iini idhilli assa ka nanangnga iini.' <sup>30</sup> İkiri ka anu eedhe ku'bu ümmü i'i anangnga i'i ka pabuusu, ara kanangnga eema yiini iini tikinggi. <sup>31</sup> A kadu na linggo no tiji eema ya agalinggo adene a tagoroo'bo tümmü eege dhorro kunggeene kaco ka uugaara tiya eene kadirina eema ya agalinggo adene ya iini.

<sup>32</sup> “Ikirii uugaara yiini ka tagümmü i'i iki iini, ‘O'o na tasaga nitaalo o'o na'diila, naadha a'a ka eema tiya eede ka asaasa küdü ka oona ya nye'd'de, kudumma üüdü ka takoolomo a'a. <sup>33</sup> Taalo o'o ama tana 'bangnga ma ömö'di tiya afa meede ka taana 'bangnga ma o'o kungngo?’ <sup>34</sup> Uugaara yiini tagoroo'bo 'do ümmünü i'i a nasigira a'da kapusu i'i, idhi anangnga eema ya ku'bu nye'd'de kungngo.

<sup>35</sup> “Pupa yaada ya ka 'dotombo'do ya ara talinggo ana aaga nggeege üürü taalo aaga kana 'bangnga aaga tafa ka kadu ma kömüsü ndama eedi tiya iini ka teene.”

## 19

### *Tarna nja tadheene (Murkus 10.1-12)*

<sup>1</sup> Ka Yasu ka ndatiümö tumma ya, ikirii ka tunggeene ka Jaliil öö'dö ka naanya ma Yahüüdiya ndama nda'da ma Ri ma Ürdün. <sup>2</sup> A kadu tuurna i'i keere kadhabbu oolona egee kanna.

<sup>3</sup> A naFariisi tö'dö kini kindini i'i ma tasaasa ta'b'ba i'i, kiki iini, “A'diila ömö'di kara tadheene nja aka tammo iini a 'banüümö idhilli kungngo?”

<sup>4</sup> Ikirii ka tiki eene, “Taalo aaga kagiirii sorne ma Masala ka dhidha, Masala marü'bü ömö'di ya miide ya nja aka tammo linyanya mo? <sup>5</sup> A Masala ka tiki a'da, ‘T'i yungngo ömö'di

ka tinyi pupa yiini ku'bu nja niimö tammo iini ara kada unggodho nja aka tammo iini, egee na eera no ata tuu'da na unggodho.’ <sup>6</sup> Nggeege taalo kara teera afe'de, lakiini kara tatuu'da ka unggodho sugi, niimö ya Masala ka tami'daana ya, taalo ömö'di ma tagildhaana ku'bu.”

<sup>7</sup> Ikirii naFariisi katindini i'i kiki iini, “A minna agu Müüsa iki a'da ömö'di tanangnga waraga ma tadheene a aka tammo iini ka dheeene?”

<sup>8</sup> Ikirii Yasu ka tiki eene, “Kudumma ma takidhö ka nanggeedi tanno ada no, egee kungngo kanangnga Müüsa ka tamma a'da aaga tadheene nja iiya tanno ada, lakiini taalo akafigi kungngo ka dhidha.

<sup>9</sup> Lakiini ara a'a tadirina tumma aaga, taalo ömö'di ara tadheene nja aka tammo iini illi kono ka tafüngngö nja ömö'di töccö anyooro, assa ka tapa kono kini ka arna aka ökönö i'i atemelö.”

<sup>10</sup> Yungngo a kadalaadene tanno iini ka tiki iini, “Üürü afiigi nggeege ana ömö'di nja aka fa kini afa tarna 'do.”

<sup>11</sup> Ikirii Yasu ka tiki eene, “Taalo kadu nye'd'de kara tammo ka tumma tanno, illi kadu na Masala kanangnga eene no. <sup>12</sup> Kadu kinggide kageenedene kada kadheemu ndama nakanüümö ka nanggeedi, könö kinggide a kadu kata'dili egee a kadu könö ka'dili nanggeyi

neene kudumma tauugaara ma 'dotombo'do, ömö'dü yasaasa tamma kide ya amma."

*Yasu amana baraka a laala tiya dhüdhi ya*

(Murkus 10.13-16; Lüüka 18.15-17)

<sup>13</sup> A kadu tö'dö ana laala iini a'da ümmünü iisine kene ka nanggüdü ara kfara ka Masala kudumma eene. Lakiini kadalaadene ka agirnaana kene. <sup>14</sup> İkiri Yasu ka tiki eene, "Aaga fa ka laala öö'dö kede kita aaga fa tafaga eege keere kudumma tauugaara ma 'dotombo'do ka tanno neene." <sup>15</sup> İkiri ka tagümmünü iisine kene ka nanggüdü unggeene ndama kanna.

*Ömö'dü ya ana eema dhabbu*

(Murkus 10.17-31; Lüüka 18.18-30)

<sup>16</sup> Ömö'dü inggide ö'dö ka Yasu iki iini, "Ka Tatalaan, minna i'i yungngo a'diila eede kara talingga amang kede taluna tefe ka 'dü ta'billi?"

<sup>17</sup> İkiri Yasu ka tiki iini. "Niki o'o a'da a'a na'diila amana, taalo ömö'dü ma ta'diila unggodho kungno illi Masala, üürü o'o nasaasa co ka tefe ka 'dü ya, ümmü tumma ma Masala dhorro."

<sup>18</sup> İkiri ka tiki iini, "Tumma öjö?"

Yungngo a Yasu ka tiki iini, "Fa tagirina kadu, fa tatemelö, fa tanyooro, fa tiki a'da o'o nadini ka niimö tiya

alinggo adene a korokoro. <sup>19</sup> Ümmü pupa yüdü nja niimö tammo üyüdü ana eedi dhorro, asaasa ömö'dü ya akete küdü afa müdüdü ka asaasa eyi yüdü kungngo."

<sup>20</sup> İkiri ömö'dü ya miini ya ka tiki, "Nussu a'a eema ya 'do aminna i'i yungngo öreene afe'de?"

<sup>21</sup> İkiri Yasu ka tiki iini, "Küdü ka asaasa tinsili ka eedi dhorro ya, kolo ta tanege ana eema tiya üyüdü nye'd'e nasümünaana gürüsü miini ka kadu tanno eema katitaalo kene no ku'bu, amang ka eema tanno küdü ka 'dotombo'do dhabbu na o'o saga tuurna a'a keere."

<sup>22</sup> Ka ömö'dü tiya miini ya ka taföönyö tumma no ya, ikiri ka tunggeene kada 'bandagoroo'bo ka oona kudumma iini ka taana eema dhabbu 'do.

<sup>23</sup> Yungngo a Yasu ka tiki a kadalaadene tanno iini, "Ara a'a tadirina tumma aaga dhorro, ara tiideene ana ömö'dü tiya ana eema dhabbu ya kara co ka tauugaara ma 'dotombo'do.

<sup>24</sup> Ara a'a tiki aaga afe'de, tadigaala ma malaga ka ööye ma ibira taalo ara tagu'daana afa ma ömö'dü tiya ana eema ya kara co ka tauugaara ma Masala."

<sup>25</sup> Ka kadalaadene ka taföönyö tumma no ya kadhere 'do kindini i'i, "Amada i'i yungngo ara toolonadene?"

<sup>26</sup> İkirī Yasu ka tassa kene ko'do iki eene, "Eema afa ma tiya ara tiideene ana ömö'di, illi i'i taalo ara tiideene a Masala."

<sup>27</sup> İkirī Bütrüs ka tiki iini, "Kinyi ungngo eema yiidi ku'bu nye'd'de ara ungngo kaduurna o'o keere. Ara ungngo taluna minna kide?"

<sup>28</sup> A Yasu tiki eene, "Ara a'a tadirina tumma aaga dhorro, uuru ma 'Bii'bala ma Tadü'd'dü kara temmi ka kööyö ma tiidhindhi ma tauugaara tanno iini ka ürüünü tiya ara tö'dö ya, ara aaga sa katemmi aaga na uurna a'a keere no ka nagööyö tanno ada'baaga kafünü eera no, aaga tümmü siliga ma Is-rayil na ö'dö kada'baaga kafünü eera no. <sup>29</sup> Ömö'di ya inyi 'dii yiini ku'bu nja nagöre tanno nagiide no nja tanno iiya no nja pupa nja niimö nja laala nja nasigeene kudumma eere tiya eede ya, ara taluna eema agusunja kini kide öö'dö a kadu küidümmü, aluna tefe ka 'dii ta'billi. <sup>30</sup> Lakiini kadu na dhidha no kadhabbu kara co keere, anno eere no kaco aadha."

## 20

*Kadu ma linggo ma ki'bim'bi*

<sup>1</sup> "Tauugaara ma 'dotombo'do kafeene nja ömö'di ma raaga ya illi ka fiki'dö ligitaka so'd'do ma tara co tawwa kadu ma linggo ka raaga tiya iini. <sup>2</sup> Adimi'di tumma

nja eene a'da kalinggo ana jine unggodho\* ka uuru ka unggodho uurugu eege co raaga. <sup>3</sup> İkirī ka tunggeene ana ndanaaya ka iidümmü afünü egüsö, öö'dö asala kadu könö ka'dingnge ana ko'do ka mansala, a linggo ka titaaloo kene. <sup>4</sup> İkirī ka tiki eene, 'Aaga afe'de agolo a siga ma ki'bim'bi tanno eede a'a saga nangnga faana miini aaga.' <sup>5</sup> Kikirī ka co. Unggeene afe'de uuru ka teene ana ndanaaya kiidoona amuru ma siiya adagüünü nggeege afe'de. <sup>6</sup> Unggeene siiya kungngo ana ndanaaya ka iidümmü aduna kadu öccö ka'dingnge ana ko'do alinggo katitaalo kene, ikirī ka tiki eene, 'Minna agu aaga aaga ta'dingnge ana ko'do uuru na in'dili no a'da taalo aaga kalinggo?'

<sup>7</sup> "Kiki iini, 'Taalo ömö'di ma tagümmünü ungngo alinggo.'

"İkirī ka tiki eene, 'Aaga unggeene aaga co a siga ma ki'bim'bi tanno eede aaga co talinggo afe'de.'

<sup>8</sup> "A 'buugu kanda siiya, ikirī ömö'di ma raaga ka tiki ömö'di tiya amanaga kadu co raaga ya, 'Ümmünü kadu na kalinggo ka raaga no nye'd'de nanangnga talingnge eene in'dili kungngo, nanangnga a kadu tanno ö'dö keere no ka dhidha no sa anangnga a tanno ö'dö ka dhidha

\* **20:2** 20.2 Jine ya miini ya i'i ya ma linggo ma uuru unggodho.

no keere.' <sup>9</sup> A kadu na öö'dö ana ndanaaya ka iidümmü no, tö'dö ka taama nakajine ka unggodho. <sup>10</sup> A kadu na kalinggo ka dhidha no tö'dö kiki kide a'da ara eege ta'duga yeene adhabbu, kadaama nakajine ka unggodho. <sup>11</sup> Kadaama nakajine kassa ka ta'digini ömö'di ma siga. <sup>12</sup> Keema kiki a'da, 'Kadu na ö'dö keere no kagalinggo ana ndanaaya ka unggodho nassa ka tanangnga ungngo kada köje nja eene amana? Kidä ka tagalinggo uuru na in'dili no ka ndanaaya ka teene.'

<sup>13</sup> "Ikirii ömö'di ma siga ka tiki ömö'di töccö ana kene, 'Ka teefe ma a'a taalo a'a nüünii ada o'o ku'bu, taalo a'a nimi'di tumma nja o'o a'da faana ana jine unggodho? <sup>14</sup> 'Duga yüdü nunggeene. Ömö'di ya ö'dö keere ya nasaasa a'a tanangnga iini afä ma o'o kungngo. <sup>15</sup> Nasaasa a'a tüünii niämö yeede ka asaasa ya ana almaala a maraada tammo eede, o'o nana kirimä kudumma eede ka'diila?'"

<sup>16</sup> Ikirii Yasu ka tiki, "Kadu na eere no katö'dö ka dhidha a kadu na dhidha no kaganna keere."

*Yasu ageema tumma ma inde tanno iini nja tafiki'i'dö*  
(Murkus 10.32-34; Lüüka 18.31-34)

<sup>17</sup> Aga Yasu ka sörö aco Örsaliim ya, ikirii ka tagümmänü kadalaadene niini unggodho eege na ö'dö kada'baaga kafünü eera

no, eema nja eene ka fiinii iki, <sup>18</sup> "Angnga kungngo kasirögö co Örsaliim a 'Bii'bala ma Tadü'ddü ara tümmününja a naguugaara ma ka'boge nja katalaana ma seriye, kümmänü i'i ka inde. <sup>19</sup> Kümmänü i'i a kajeene, küünii midhi ku'bu ana i'i kabbü i'i kassa kabünnü i'i ka salil'bi assa ka fiki'i'dö a fungngö iidoona."

*Nüümö ma Yaguub nja  
Yühanna masaasa nüümö*  
(Murkus 10.35-45)

<sup>20</sup> A niämö ma Yaguub nja Yühanna laala ya Za'bedi tö'dö kini nja laala tiya oono ateera meene, müürü ka Yasu kidha ana küüge masaasa i'i alinggo ada niämö ya 'diila ya oono.

<sup>21</sup> Ikirii Yasu ka tiki oono, "Nasaasa o'o minna?"

Miki iini, "Nasaasa a'a o'o a'da neema tumma dhorro a'da nanangnga laala yeede ya eera ya katemmi, aya temmi küdü ka niisö ma kuri aya temmi küdü ka niisö ma küüle ka tauugaara tanno üdü."

<sup>22</sup> Ikirii Yasu ka tiki, "Taalo aaga kussu niämö maada ka asaasa ya, ara aaga tambaanya dhügürü yeede ka tadhügürü ya?"

Kiki iini a'da, "Ara ungngo tambaanya."

<sup>23</sup> Iki eene, "Timin'da ara aaga tambaanya dhügürü afa a'a, lakiini temmi kede ka niisö ma kuri nja niisö ma küüle taalo a'a nungngo nara tanangnga aaga, illi

kadu na Pupa tiya eede ka tindinaana kene ku'bu no."

<sup>24</sup> Aga kadalaadene na ada'baaga no ka taföönyö tumma no, kagoroo'bo nja nagöre tanno eera no.

<sup>25</sup> İkirī Yasu ka tagümmünü eege nye'd'de kungngo iki eene, "Kussu aaga a'da naguugaara ma kajeene kapusu eege a kadu neene na iīfi no tüünü dhanu ku'bu ana eege. <sup>26</sup> Taalo a'a nasaasa tumma afa ma tanno ka tanna ka kadu ka söödö, ömö'dii ya tadhabbu ana kada ya, fa kini alinggo ada aaga. <sup>27</sup> A ömö'dii ya asaasa tanna ka kadu kidha ana kada ya, fa kini ada tasaga tiya ada. <sup>28</sup> Kudumma 'Bii'bala ma Tadü'd'dü taalo ö'dö a'da a kadu talingga ada iini, lakiini ö'dö talingga ada eene üpü eyi yiini co, amang kini toolona kadu dhabbu."

*Yasu oolona kisinsoro keera*  
(Murkus 10.46–52; Lüüka 18.35–43)

<sup>29</sup> A kene ka ndunggeene ka Ariiha ya a kadu kadhabbu tako'd'do ka Yasu keere. <sup>30</sup> A kisinsoro kungngo ka tinggini ma nafiinü keera, kaföönyö a'da Yasu ara tadigaala kita, kikirii ka tiidhe kiki, "Ka Uugaara, 'Bii'bala ya Dawud, ana 'bangnga ma ungngo.'

<sup>31</sup> A kadu kadhabbu tagirnaana kene a'da ki'döönö lakiini eege ka kardha ku'bu kiidhe dhindho, "Ka Uugaara, 'Bii'bala ya Dawud, ana 'bangnga ma ungngo.'

<sup>32</sup> İkirī Yasu ka töödhü a tümmünü eege iki eene, "Kasaasa aaga a'a a'da nöönyö ana aaga?"

<sup>33</sup> Kiki iini, "Nafa'da ungngo ka iiye, Uugaara."

<sup>34</sup> A 'bangnga meene tümmü Yasu anangnga niisö eene ka iiye, karooro ka tasala 'buugu kuurna i'i keere.

## 21

*Yasu inynyo Örsaliim*  
(Murkus 11.1–11; Lüüka 19.28–38; Yühanna 12.12–19)

<sup>1</sup> Kene ka ndakete ka Örsaliim ya kikirii köö'dö ka Beet Faji ka Anya ma 'Dikidiyö, ikirī Yasu ka kürünü kadalaadene niini keera. <sup>2</sup> Iki eene, "Aaga kolo a nöö'dii tanno ada kidha no aaga taluna kisine mimi'dinja ku'bu nja 'bing kisine aaga tagildhe eege aaga tö'dö ana eege a'a.

<sup>3</sup> Üürü ömö'dii öccö iki aaga a'da niimö ya, aaga tiki iini a'da Uugaara asaasa eege, assa ka tafada ana eege areere."

<sup>4</sup> Amang ka tumma tanno ne'bi ka takiki no co ööye miini.

<sup>5</sup> "Aaga tirina eema a kadu ma Sahyüün a'da, Uugaara yüüdü unggunu küdü taalo an'dinigi eyi yiini coo'do, aka ka 'bing kisine.'"

<sup>6</sup> İkirī kadalaadene na eera no ka co kadalinggo afa ma tiya Yasu kadirina eene ya kungngo. <sup>7</sup> Kikirii

köö'dö a 'bing kisine kadhifi en'di yeene kide ikirii Yasu ka taka kide.<sup>8</sup> A kadu töö'dö kadhabbu kakese en'di yeene ka nafüni anno tasede iisine ma naafa kakese ka fiini.<sup>9</sup> A kadu na unggene ka Yasu kidha no nja tanno ö'dö kini keere no kiidhe kiki a'da,

"Aaga amana tüdhindhi a 'Bii'bala tiya Dawud.

Aaga nangnga ta'diila ömö'di tiya ö'dö ana eere ma Uugaara ya nja tüdhindhi ka fiini ma ndanaaya."

<sup>10</sup> Aga Yasu ka ndö'dö ka Örsaliim anya co kamuli muli nye'd'de kungngo a kadu tindini ajeene kiki a'da, "Mada i'i yungngo."

<sup>11</sup> A kadu kadhabbu tiki a'da, "Yasu i'i ya miini ne'bi ma Nasira ka Jaliil."

*Yasu asoro kadu na anadene ka la ma Masala no* (Murkus 11.15-19; Lüüka 19.45-48; Yühanna 2.13-22)

<sup>12</sup> A Yasu co ka la ma Masala adagasoro kadu na anadene ana eema ka la ma Masala no. Apudu naterbeesa na kadu na aregere gürüüsü no nja eema ma temmiimi ma kadu tanno anadene ana alambo no.  
<sup>13</sup> İkiri ka tiki eene, "Tumma no ka sorne kiki a'da, "Dü yeede ama teema nja Masala kide," aaga kanangnga i'i kada 'tumba ma kanyooro.'

<sup>14</sup> A kadu na kisinsoro no nja kadu tanno sogo'do no tö'dö kini ka la ma Masala

oolona eege.<sup>15</sup> İkiri naguugaara ma ka'boge nja a katalaana ma seriye kene ka tasala türü na Yasu ka tagalinggo no, nja ndhiidhe ma laala tiya dhiidhi ya ka la ma Masala kagu'du eege ka oona eene ka tiidhe kiki a'da, "Tüdhindhi na 'Bii'bala tiya Dawud."

<sup>16</sup> Kikiri ka tiki a Yasu, "Naföönyö o'o tumma na laala no?"

I'i yungngo iini ka tiki eene, "İi, taalo aaga kagiirii sorne ka tiki a'da,  
 'Ndama nanüünö ma laala tiya dhiidhi ya tumma ma tafünügü ko'do kungngo eene ka nanüünö'?"

<sup>17</sup> İkiri ka tinyi eege ku'bu ara ka öö'dö kürö aco anya ma Beet Aniya iiyü kide.

*Yasu aga'da fa ma indüüye* (Murkus 11.12-14, 20-24)

<sup>18</sup> Aga Yasu ka ndafada unggunu co anya ligitaka kungngo ya iiire tümmü i'i.

<sup>19</sup> Asala fa ma indüüye ka tinggini ma fiini öö'dö kide asala co, taalo asala niimö kide illi dhaaru miini. İkiri ka tiki eene, "Taalo o'o nara teene afe'de turi." İkiri indüüye karume ka ööye minni.

<sup>20</sup> Aga kadalaadene ka tasala eema ya, kadhere kiki, "Karume indüüye nya areere kungngo?"

<sup>21</sup> İkiri Yasu ka tiki eene, "Ara a'a tadirina tumma aaga dhorro, kada kara

tamma aaga tafa ta'doore ka nanggeedi ya taalo aaga kara ka tüünä ana eema yeede ka tagüünä ana fa ma indiiye sugi, lakiini afe'de ara aaga tiki anya tammo, 'Fiki'dö napügü eyi yüdü co to,' ara tafiigi nggeege.<sup>22</sup> Niümö yaada ka asaasa ya a'da kafara aaga ka Masala a tamma ya, ara aaga taluna."

*Türü kananja a Yasu  
(Murkus 11.27-33; Lüüka 20.1-8)*

<sup>23</sup> İkiri Yasu kico la ma Masala alaana kadu, a naguugaara ma ka'boge nja kadiifi ma anya tö'dö kini kiki iini, "Türü öjö eege kungngo üdü ka talinggo iini, a mada ya anangnga türlü o'o nalinggo iini?"

<sup>24</sup> İkiri Yasu ka tiki eene, "Ara a'a tindini aaga ma niümö unggodho, kada kara tadirina a'a ya, ara a'a tiki aaga a'da türlü öjö eege kungngo eede ka talinggo iini ungngo.<sup>25</sup> Türü na Yühanna ka tambeese iini no ö'dö ndama 'dotombo'do alla ndama kadu?"

Kikiri ka teema unggodho eege kiki, "Kaja kara tiki a'da, 'Ndama 'dotombo'do ya,' ara tiki a'da, 'Aminna agu aaga aaga taalo kamma kini?'"<sup>26</sup> A kaja kara tiki a'da, 'Ndama kadu ya,' kari'ba angnga a kadu kudumma eene 'do ya kümmü Yühanna kada ne'bi."<sup>27</sup> Kikiri ka tiki a Yasu, "Taalo ungngo kussu."

İkiri ka tiki eene, "A'a tekere taalo a'a nara tadirina aaga a'da türlü öjö eege

kungngo eede ka talinggo iini."

*Tafeene ma tumma ma laala eera*

<sup>28</sup> İkiri Yasu ka tiki, "Kussu aaga minna? Ömö'di inggide ana laala eera, adagümmünü ya dhidha ya iki iini, "Bii'bala eede, unggeene naco talinggo ka siga ma ki'bim'bi tanno eede."

<sup>29</sup> "A 'bii'bala tiki, 'Taalo a'a nasaasa co,' lakiini agere eedi yiini unggeene aco.

<sup>30</sup> "Öö'dö ka 'bii'bala tiya eera ya asaasa niümö yiini ka tasaasa ka 'bii'bala tiya dhidha ya iki, 'Ara a'a co uugaara,' lakiini i'i taalo in-yño.

<sup>31</sup> "Mada i'i yungngo agal-inggo a tumma tanno pupa tiya iini ungngo?"

Kiki a'da, "Ya dhidha ya."

İkiri ka tiki eene, "Ara a'a tadirina tumma aaga dhorro kadu ma tulu'ba nja katemelö kara tadhe aaga kaco ka tauugaara ma Masala.<sup>32</sup> Kudumma Yühanna ya Tatambeese ya öö'dö ada ala aaga ka fiinü tiya dhorro ya, aaga taalo kamma kini, a kadu ma tulu'ba nja kadu tanno temelö no tamma kini, aaga tijöögö aaga taalo kafada ka tatoroko keere aaga tamma kini.

*Kadu ma linggo ma ki'bimb'i*  
(Murkus 12.1-12; Lüüka 20.9-19)

<sup>33</sup> "Aaga toodo ka tafeene ma tumma töccö afe'de,

akodho ömö'di naafa ma ki'bim'bi adagasaara ataasa anya ma tiyaana kide atagalinggo 'dasala anangnga tamönggö kide anangnga a kadu ma linggo töccö ara ka tunggeene.<sup>34</sup> Ka uuru ma tawaana ki'bim'bi koona ka ndö'dö ya, ikirii ka kürünü kadu ma linggo niini kene a'da kaco ta'duga ki'bim'bi.<sup>35</sup> Kikirii kadu na linggo no ka tümmü eege katabbü ya, kada kidi ya, kada tüdiri könö a nüigisi.<sup>36</sup> İkirii ömö'di ma ki'bim'bi ka kürünü kadu ma linggo niini afe'de kadhabbu a tanno adhidha no kadagünni ana eege afa ma tanno dhidha no.<sup>37</sup> Keere kungngo ya ikirii ka kürünü 'bii'bala yiini kene iki a'da, 'Kara tari'ba a 'bii'bala tiya eede.'

<sup>38</sup> "Lakiini kadu na linggo no ka tasala 'bii'bala ya, kikirii ka teema ana ka oona unggodho eege kiki a'da, 'Tandaya ara takarna ka eema ya, i'i yungngo kada kidi i'i, angnga ta'duga eema yiini.'<sup>39</sup> Kümmü i'i kapükü co kürö ndama raaga ma ki'bim'bi kadagiidi i'i.

<sup>40</sup> "Aga ömö'di ma raaga ma ki'bim'bi kara tö'dö ara tönynyö a kadu tanno?"

<sup>41</sup> Kiki iini, "Ara tagirina oroko ya 'do ara ka anangnga raaga ma ki'bim'bi a kadu töccö no, ara tanangnga ki'bim'bi iini ka uuru miini no."

<sup>42</sup> İkirii Yasu ka tiki eene, "Taalo aaga kagiirii tumma

ka Sorne ma Masala? 'Misi ma katürböönö kanu kide mo, oogo mungngo ma misi ma kadese, ma Uugaara ka tadina mo yungngo a kadu katadhere.'

<sup>43</sup> "I'i yungngo eede ka tiki aaga, ara Masala ta'duga tauugaara noonoo kada manangnga a kadu tanno ara talinggo köö'dö keere a tööyö tammo dhorro mo.<sup>44</sup> Ömö'di ya a'dingga ka misi tammo ya, atili oona, aya misi ka'dingga kini ko'do ya manyiki'daana i'i ku'bu."

<sup>45</sup> Aga naguugaara ma ka'boge nja naFariisi ka ndaföönyö tafeene ma tumma tanno Yasu no, kussu a'da i'i yeema kene ko'do.<sup>46</sup> Ka asaasa tarefe i'i illi eege kari'ba a kadu kudumma eene katümmü i'i kada ne'bi.

## 22

*Tafeene ma tumma taanyara ma tarna  
(Lüüka 14.15-24)*

<sup>1</sup> A Yasu tageema nja kadu a tafeene ma tumma afe'de iki, <sup>2</sup> "Tauugaara ma 'dotombo'do kafeene nja uugaara agünni ada taanyara ma tarna a 'bii'bala tiya iini. <sup>3</sup> İkirii ka kürünü kadu na linggo nja iini no a'da kaco tümmüni kadu a'da köö'dö ka taanyara ma tarna, illi eege ka'dükü co. <sup>4</sup> Agürünü kadu könö afe'de a'da kiki a kadu tanno

akümmünüdene no, 'Nakin-dinaana a'a kuri needhe a'a nagodha na indhi no, nakindinaana eema ku'bu nye'd'de kungngo, aaga ö'dö ka taanyara ma tarna.'<sup>5</sup> Lakiini eege taalo kindineene, ömö'di ya co a siga tanno iini, aya tunggeene aco tanadene ana eema tiya iini.<sup>6</sup> A kadu könö tümmü kadu na agürünüdene no katabbü eege kadakalinggo tatoroko ana eege kagirina eege.<sup>7</sup> I'i yungngo uugaara kagoroo'bo agürünü nasi-gira niini kateefe tagirina kadu na kiidi kadu no, kinyogo anya meene.<sup>8</sup> İkiri ka tiki a kadu tanno alinggo no, 'Kuri ungngo akindinaana njaana anakubu, illi kadu na kümmünüdene no taalo eege kamiini.<sup>9</sup> Agolo a nafiiñi na falangnga no, aaga tümmünü kadu, ömö'di yaada ka aduna i'i ka nafiiñi ya aaga tö'dö ana i'i ka tarna.'<sup>10</sup> Kikiri kadu na linggo no kaco nafiiñi ka awagaana kadu neene ka tuna eege no, na na'diila no nja tanno oroko no, a 'buugu ma tarna tadigine a kadu tanno akümmünüdene no.

<sup>11</sup> "Aga uugaara ka co 'bügööri ma co tassa ka kadu tanno kagümmünüdene no ikiri ka tasala ömö'di öccö a'da taalo en'di ma tarna iini ka oona.<sup>12</sup> İkiri ka tiki iini, 'Nö'dö o'o kita nya teefe ma a'a? En'di ma tarna saga titaalo üdü ka oona?' Ömö'di ya miini ya takidöönö.<sup>13</sup> İkiri uugaara ka tiki a kadu tanno

alinggo no, 'Aaga imi'di i'i ka iisine nja uune aaga tapügü i'i co kürö ka ndüüli afara abbünaana igin ika oona.'<sup>14</sup> Kudumma a kadu tanno akümmünüdene no kadhabbu, lakiini na agessedene no kidhilli."

*Tamana tulu'ba a uu-gaara*

(Murkus 12.13–17; Lüüka 20.20–26)

<sup>15</sup> İkiri naFariisi ka tunggeene kateefe teema ana ka oona ma tümmü Yasu a 'bandumma ndama nüünö tanno iini.<sup>16</sup> Kikiri ka kürünü kadalaadene neene nja kadu tanno Hirüdüs kiki iini, "Ka Tatalaana, kussu ungngo a'da tumma dhorro eege kungngo üüdü nalaana kadu ka fiini ma Masala tiya dhorro ya, na o'o taalo nalinggo a tumma tanno ömö'di na o'o taalo nari'ba iiye ma kadu.<sup>17</sup> Tirina ungngo, niki o'o nya? A'diila aja kara tamana tulu'ba a Kayisar alla taalo a'diila?"

<sup>18</sup> İkiri Yasu ka tussu ünggü meene, ikiri ka tiki eene, "Aaga na 'dinigi oona coo'do no, minna agu aaga aaga tasaasa takinne a'a?<sup>19</sup> Aaga ala gürüüsi ma tulu'ba a'a," kikiri ka anangnga jine iini.<sup>20</sup> İkiri ka tiki eene, "Koronggore ya mada i'i yungngo a tarigiri tanno?"

<sup>21</sup> Kiki a'da, "Na Kayisar."

İkiri ka tiki eene, "Aaga nangnga niimö ya Kayisar a Kayisar, aya Masala aaga tanangnga a Masala."<sup>22</sup> Kene ka taföönyö tumma

no, kadhere ka tumma tanno iini. Kikirii ka tunggeene kinyi i'i ku'bu.

*Tafiki'i'dö ka inde*  
(*Murkus 12.18-27; Lüüka 20.27-40*)

<sup>23</sup> Ka uuru tanno miini no köö'dö Sadügiin eege no iki a'da kitaalo tafiki'i'dö ka inde kindini i'i.<sup>24</sup> "Ka Tatalaana, Müüsa iki a'da ömö'dü kara teyi a'da taalo 'bii'bala kini, örre yiini ta'duga aka ma örre tiya iini ya eyi ya, amang kini teene ada laala iini.<sup>25</sup> Kaganna nagöre kide ka iidümmü kafünü eera, aya dhidha ya tarna eyi a'da taalo laala kini inyi aka ka örre ku'bu.<sup>26</sup> Eyi afe'de aya iidoona ya teyi afe'de nja tiya iidümmü afünü eera ya.<sup>27</sup> Keere kungngo aka teyi afe'de.<sup>28</sup> Mara ta aka tammo mada ana kene ka uuru ma kadu ka tafiki'i'dö ka inde? Kudumma oono kada aka tammo eene nye'd'de kungngo."

<sup>29</sup> İkiri Yasu ka tiki eene, "Kaama aaga, aaga taalo kussu niimö ya tumma ka sorne nja türü ma Masala.

<sup>30</sup> Taalo kadu karnadene kitaalo karna ajeene ka uuru ma tafiki'i'dö ka inde, lakiini eege kara tafeene nja kadhangga ka 'dotombo'do.<sup>31</sup> A kudumma ma tafiki'i'dö ka inde no, taalo aaga kagiirii tumma na Masala ka tiki aaga ka sorne?<sup>32</sup> 'A'a na Masala tammo Abrahiim, Masala ma Ishak nja Masala tammo Yaguub,' " taalo

Masala ma kadu tanno aaya no lakiini oogo ma Masala ma kadu tanno efe ka 'dö no.

<sup>33</sup> A kadu taföönyö tumma niini kadhere ka talaana tanno iini.

*Tumma na dhorro*  
(*Murkus 12.28-34; Lüüka 10.25-28*)

<sup>34</sup> Aga naFariisi ka taföönyö a'da Yasu agii'bi Sadügiin ya kümmüünü ana oona, a tumma ta unggodho kene.<sup>35</sup> İkiri tatalaana ma seriye ka tindini i'i,<sup>36</sup> "Ka Tatalaana, tumma öjö eege kungngo kiidhindii ka seriye ma Masala ungngo?"

<sup>37</sup> İkiri Yasu ka tiki iini, "'Asaasa Masala Uugaara müüdü ana eedi tiya yüdü nye'd'de nja oona tanno üüdü nye'd'de nja üüdü tiya üüdü.'<sup>38</sup> Tumma na dhidha no na idhindii no eege kungngo.<sup>39</sup> A tumma na asigi kide afe'de no nggeege afe'de, 'Asaasa ömö'dü ya akete küdü ya afa müüdü ka asaasa eyi yüdü kungngo.'<sup>40</sup> Tumma na eere no eege kungngo kama seriye nja talaana ma nagane'bi."

*Almasiiji nja Dawud*  
(*Murkus 12.35-37; Lüüka 20.41-44*)

<sup>41</sup> Aga naFariisi ka tümmüünü ana oona, ikiri Yasu ka tindini eege.<sup>42</sup> "Kiki aaga a'da Almasiiji aminna? I'i ya 'bii'bala tiya mada 'do?"

Kiki iini, "'Bii'bala ya Dawud."

<sup>43</sup> İkürü ka tiki eene, "Dawud sa agala köö'dö nya ümmünü i'i a'da 'Uugaara' eema a türü ma Korong-gore?"

<sup>44</sup> Iki Uugaara Uugaara tiya eede,

Emmi kede ka niisö ma kuri  
ara a'a ka anangnga di-di yüdü dü ka uune ka teene.'

<sup>45</sup> Üürü Dawud ka tümmünü i'i a'da, 'Uugaara,' assa kara tö'dö nya ada 'bii'bala tiya iini?"

<sup>46</sup> A ömö'dü ana kene unggodho kungngo taalo kara tapadaga tumma iini, ömö'dü ma tana rüsü ka eedi ma tindini i'i kungngo titaalo.

## 23

*Yasu eema tumma ma katalaana ma seriye nja na-Fariisi*

(Murkus 12.38–40; Lüüka 11.37–52; 20.45–47)

<sup>1</sup> A Yasu tageema nja kadu nja kadalaadene tanno iini. <sup>2</sup> Iki, "Kemmi katalaana ma seriye nja a naFariisi ka kööyö tiya Müüsa." <sup>3</sup> Niimö yeene kara tiki aaga a'da aaga talinggo ya, aaga linggo, lakiini aaga fa talinggo afa meene kungngo, kudumma eene kadeema kassa taalo kalinggo iini. <sup>4</sup> Kudumma eene kimi'dinaana eema ka tindhi kamana ka kadu ka na'dakeyi, lakiini eege taalo kara ta'dina ko'do a 'banüsö.

<sup>5</sup> Kalinggo eema amang ka kadu tadinö kene kamana na'dugiisine ma en'di tiya

eene kada kadhonggoro.

<sup>6</sup> Kasaasa temmiimi ka nagööyö ma kadu tanno iifi no ka na'buugu ma taanyara nja na'buugu tanno kidha no ka naala ma talaana, <sup>7</sup> kasaasa töjülü kadu ka namansala, amang ka kadu tümmünü eege a'da, 'Tatalaana.' <sup>8</sup> Lakiini aaga ya aaga fa tamma ka kadu kümmünü aaga a'da, 'Tatalaana,' kudumma aaga in'dili kungngo aaga ka nagöre a Tatalaana ungngo ada unggodho. <sup>9</sup> Aaga tafa tümmünü ömö'dü ka 'büdhülü a'da pupa tiya ada, kudumma Pupa tiya ada unggodho ka 'dotombo'do.

<sup>10</sup> Aaga tafa tamma ka ömö'dü ka tümmünü aaga a'da dhabbu, kudumma dhabbu ma aaga unggodho, Almasiihi. <sup>11</sup> Ömö'dü ya dhabbu ana kada ya, i'i yungngo ara talinggo ada aaga. <sup>12</sup> Ömö'dü ya 'dinigi eyi yiini coo'do ya ara tapadaga keere, ömö'dü ya ümmü eyi yiini ka tiicolo ya ara ta'diniginja ko'do.

<sup>13</sup> "Am'ba kada ya aaga ka katalaana ma seriye no nja naFariisi na 'dinigi nanggeyi naada coo'do no, keere aaga ka inye ma tauugaara ma 'dotombo'do ka kadu kidha aaga, ka eyi tiya ada alla aaga co alla aaga tafa ka kadu tanno asaasa co no kaco.

<sup>14</sup> "[Am'ba kada ya aaga ka katalaana ma seriye no nja naFariisi na 'dinigi nanggeyi

naada coo'do no, kiišinii  
iiya ma nagüüme kaama  
eema yeene, kafara ka  
Masala tafifinni amang ka  
kadu tiki a'da eege ka'diila,  
eege no miini no, tapusu  
adene neene kara tatoroko  
dhindho.]

<sup>15</sup> "Am'ba kada ya aaga  
no katalaana ma seriye no  
nja naFariisi no an'dinigi  
nanggeyi naada coo'do no,  
kata'da aaga dhiile nja  
naato amang kada taluna  
ömö'di unggodho, a nüümö  
yaada ka talaana i'i kide ya  
atanangnga i'i aco ka issi  
ma Jahanam teera adhabbu  
atiya ada.

<sup>16</sup> "Am'ba kada ya aaga no  
naguugaara kada kisinsoro  
no, kiki aaga, 'Ömö'di ya  
aküdöönö ka la ma Masala  
taalo tafa ka taküdöönö  
niini dhorro, lakiini ömö'di  
ya aküdöönö ana dahaba  
ma la ma Masala ya, afa  
ka taküdöönö tanno iini.'  
<sup>17</sup> Aaga kanagaaga aaga tak-  
isinsoro minna i'i yungno  
idhindhi? Dahaba alla la ma  
Masala ya amana dahaba

ka tinsili ya? <sup>18</sup> Aaga tiki  
a'da, 'Ömö'di ya aküdöönö  
ana eere ma misi ma tirri  
ya, taalo tafa ka taküdöönö  
tanno iini dhorro, lakiini  
ömö'di ya aküdöönö ana  
nüümö ka misi ma tirri ya,  
ara tafa ka taküdöönö tanno  
iini.' <sup>19</sup> Öjö i'i yungno  
idhindhi aaga na kisinsoro  
no? Tirri alla misi ma  
tirri ma amana nüümö ma  
tirri ka tinsili mo? <sup>20</sup> Taalo  
aaga kussu a'da ömö'di ya

aküdöönö ana eere ma misi  
ma tirri ya ara taküdöönö  
ana eema tiya inggide ya  
nye'd'de? <sup>21</sup> Ömö'di ya  
aküdöönö ana eere ma la  
ma Masala, aküdöönö iini  
nja Masala tammo anna kide  
mo. <sup>22</sup> Ömö'di ya aküdöönö  
ana eere ma 'dotombo'do  
ya, aküdöönö ana eere  
ma 'buugu ma temmi ma  
Masala nja ömö'di tiya emmi  
kide ya.

<sup>23</sup> "Am'ba kada ya aaga  
no katalaana ma seriye  
nja naFariisi no an'dinigi  
nanggeyi neene coo'do no,  
kamana aaga faana ma  
naana ku'bu, kondho nja  
mürteega. Lakiini aaga sa  
kadüuni tö'bö a nüümö tiya  
a'diila ka seriye ya, tadho ka  
nafiini dhorro nja 'bangnga  
nja tindinaana kadu ku'bu,  
eema ya miini ya yungno  
ada kara tagalinggo iini aaga  
tafa tüürü ma töccö. <sup>24</sup> Aaga  
na naguugaara na kisinsoro  
no, ka'duga aaga aruuge ka  
'büüdi lakiini aaga ka 'duuru  
malaga.

<sup>25</sup> "Am'ba kada ya aaga  
na katalaana ma seriye no  
nja naFariisi na an'dinigi  
nanggeyi neene coo'do no,  
kagunu aaga 'dugeere ma  
ker'de nja 'dugeere ma dho  
lakiini teene miini adigine  
ana eema, ma nyoro nja  
tallogo. <sup>26</sup> O'o na taga  
Fariisi na soro no, aagala  
teene ma ker'de nja teene  
ma dho, amang kene tinsili  
afa 'dugeere miini.

27 "Am'ba kada ya aaga no katalaana ma seriye no nja naFariisi aaga no an'dinigi nanggeyi naada coo'do no, kafeene aaga nja naala ma oofo ka'diila ndama kürö lakiini ndama teene münni kadigine a ku'buuni ma kadu tanno aaya no kada nyoro katunya. 28 Aaga kafiigi nggeege ndama kürö kafeene aaga nja kadu tanno a'diila no lakiini nanggeedi naada ka teene nye'd'de kungngo, tadigine ana eema ma korokoro nja tatoroko.

29 "Am'ba kada ya aaga no katalaana ma seriye no nja naFariisi aaga no 'dinigi nanggeyi naada coo'do no, karü'bü aaga naala ma oofo ma nagane'bi aaga tindinaana naala ma oofo ma kadu tanno 'diila no. 30 Aaga teema aaga tiki a'da, 'Kaja kara taganeene ka naguuru tanno kafaafa ma angnga no, taalo angnga kara tagosso ka tagirina nagane'bi eene.' 31 Aaga tussu nanggeyi tanno ada a'da aaga ka laala ma kadu tanno agirina nagane'bi no, 32 Aaga tümö eema ya toroko ya kafaafa ma aaga ka tagüünii ya.

33 "Aaga ka nöönii aaga ta laala ma nöönii ara aaga sa karünö ka tapusu adene ma issi ma Jahanam nya? 34 I'i yungngo eede kara sa kürünü nagane'bi kada nja kadu tanno 'dara no nja katalaana, aaga tagirina könö aaga tabünnü

no ka salii'bi, aaga tabbü könö ka naala ma talaana aaga tasoro eege ka naanya kadara co anya tökömö. 35 Amang ka eriidö tiya kadu tanno agirinadene na adho ka fiinii no ya uurunja ka 'büdhülü ya, ndama eriidö tiya Habiil tiya a'diila ya nja eriidö tiya Sakariya 'bii'bala ya Barkiya yaada ka tagiidi i'i ka söödö ma la ma Masala nja müsi ma türri. 36 Ara a'a tadirina tumma aaga, eema ya in'dili kungngo ara tö'dö ka sere tiya.

### *Yasu asaasa Örsaliim (Lüüka 13.34-35)*

37 "Örsaliim, Örsaliim, o'o no kirina nagane'bi na tüidiri kadafiiñi na Masala ka tagürünü eege kono no taanya nasaasa a'a tawaana laala yüdü ka oona afa koogoro ka tawaana laala yoono ka tüm'bü ma egedhe tiya oono, aaga tanu. 38 Aaga assa ka 'dii tiya ada ungngo ara tinyi kada ku'bu. 39 Ara a'a tiki aaga, taalo aaga kara tassa kede afe'de illi ada kara tiki, 'Baraka ka ömö'dii tiya öö'dö ana eere ma Uugaara ya.'

## 24

*Yasu eema tumma ma taga'dadene ma la ma Masala  
(Murkus 13.1-2; Lüüka 21.5-6)*

<sup>1</sup> Ikirü Yasu ka öö'dö kürö ndama la ma Masala ya, ikirü kadalaadene niini kalaga i'i ka tarü'böönö ma la ma

Masala.<sup>2</sup> Õkirri ka tiki eene, "Kiji aaga eema ya nye'd'de ara a'a tadirina tumma aaga dhorro, taalo müsi ma unggodho kungngo mara türeene ka ma tööje ko'do kara türküdü nye'd'de kungngo."

<sup>3</sup> Aga Yasu ka temmi ka Anya ma 'Dikidiyö ya, a kadalaadene niini tindini i'i ka unggondho kiki iini a'da, "Tirina ungngo 'ba, tumma no kara talingga adene aada, a nüümö i'i yungngo iidü kara tussu iini a'da ara o'o tö'dö nja titaalo ma 'büdhülü?"

<sup>4</sup> A Yasu tiki eene, "Aaga adinö ko'do iidü ömö'dü öccö tüpu aaga ka taama. <sup>5</sup> Ara kadu sa köö'dö kada kadhabbu ana eere tiya eede kiki, 'A'a na Almasiihi,' iisini kadu kadhabbu. <sup>6</sup> Ara aaga sa kaföönyö tumma ma kadu kadeema koro'bo, aaga taföönyö tumma ma koro'bo ka teemadene ku'b'ba, lakiini aaga fa tari'ba aaga ta'deedene ka oona, tafiigi miini i'i ya miini lakiini taalo titaalo ma 'büdhülü eege kamiini. <sup>7</sup> Ara koro'bo tanna ka anya nja anya tököönö, a tauugaara no teema koro'bo nja tauugaara töccö, a 'buugu ka oona ta iire a 'büdhülü ta'dig'i'dü ajeene ka oona nye'd'de. <sup>8</sup> Tatta tüm'bü ma tin'di ma teene.

<sup>9</sup> "Ka naguuru tanno miini no ara aaga tümmününja a kadu kapusu aaga kagirina aaga a kadu ma 'büdhülü nye'd'de tanu kada kudumma eere tiya eede.

<sup>10</sup> Ka uuru tanno miini no, ara kadu kadhabbu ka tapadaga oona keere ka tamma ma Masala kümmünü kadu töccö a kadu töccö kakirimi ajeene unggodho eege ömö'dü ya tanu ka tööje. <sup>11</sup> A nagane'bi na iisini kadu no, tabbü 'dala kadhabbu kaama kadu kadhabbu. <sup>12</sup> Kudumma tadhabbu ma eema ya toroko ya a tasaasa ajeene tiicolo kadu ka nanggeedi kadhabbu. <sup>13</sup> Ömö'dü ya idhi oona ku'bu ya ara toolonadene. <sup>14</sup> Ara tumma ma ïnjüili ma tauugaara teemadene ka 'büdhülü in'dili amang ka kadu nye'd'de tussu uuru na eere no sa köö'dö keere.

*Taga'dadene na dhorro no  
(Murkus 13.14-23; Lüüka 21.20-24)*

<sup>15</sup> "Kada kara tiji tatoroko ma 'buugu na ne'bi Danial ka tageema a'da kara tö'dö ka 'buugu tiya insili ya, fa ka ömö'dü ya iröönö ya ussu. <sup>16</sup> A kadu na ka Yahüüdiya no tarünö kaco na'dikinya. <sup>17</sup> Ömö'dü ya ka la ko'do ya taalo atö'dö ku'bu ma co tindi eema ka 'bügööri. <sup>18</sup> A ömö'dü ya ka siga ya taalo ara tapadaga oona keere aco 'dö ta'duga en'di yiini. <sup>19</sup> Am'ba kada aaga na iiya na agüröönö no nja tanno indine no ka naguuru tanno miini no. <sup>20</sup> Aaga fara ka Masala amang kada tafa tarünö feele kungngo nja uuru ma Sa'bidi. <sup>21</sup> Ara tagoroo'bo tö'dö ka 'buugu katoroko taalo agöö'dö ka

'büdhülü jiddi ma Masala ka tadina i'i ta'bütüngngö taalo agalinggo adene a'da taalo talinggo adene afe'de.<sup>22</sup> Ka Masala kara tafa tanangnga naganuuru na miini no kadhägündhägü ya taalo ömö'di ma ta koolonadene 'do, lakiini kudumma kadu tanno Masala ka tagesse eege no i'i yungngo, oono kanangnga naganuuru no miini no kadhägündhägü.<sup>23</sup> Aga ömö'di töccö kara tiki aaga a'da, 'Almasiihi ungngo kita,' alla, 'Inni kanna,' aaga fa tamma kini kide.<sup>24</sup> Ara kadu kadhabbu sa köö'dö, kiki a'da eege ka Almasiihi na iiśinii kadu no nja nagane'bi tanno korokoro no tabbü 'dala kalinggo eema keefe kale'bele eema kamana i'i ka tidihindhi ma taga'da kadu ka nanggüdü iini, üürü kaluna fiinii miini nja kadu tanno Masala ka tagesse eege no.<sup>25</sup> Aaga föönyö, nilli a'a ka tirina tumma no aaga 'bütingngö.

<sup>26</sup> "Üürü ömö'di ka tiki aaga a'da, 'I'i inni ka dhüile kanna,' aaga fa co, üürü kiki a'da, 'Ungngo ka 'bügööri kita,' aaga tafa tamma kide.<sup>27</sup> Kudumma tö'dö tanno 'Bii'bala ma Tadü'd'dü no, kafeene nja talimaana ma tombo'do na alimaana ndama fiinii ma ndanaaya, öyeene ka niimö ma ndanaaya.<sup>28</sup> 'Buugu ya niimö ka teyi kide ya ara nagolo tarügü kide.

*Tö'dö ma 'Bii'bala ma  
Tadü'd'dü*  
(Murkus 13.24-27; Lüüka 21.25-28)

<sup>29</sup> "Ka tatoroko ma 'buugu ka naganuuru tanno miini no,  
'ara ndanaaya talifi  
a tere taalo ara töyeene,  
a midigi ta'dinggeeene  
ndama 'dotombo'do,  
a türü ma 'dotombo'do  
tatinggi'di.'

<sup>30</sup> "Ka uuru tanno miini no ara koola ma 'Bii'bala ma Tadü'd'dü tabbü 'dala ka 'dotombo'do a kadu tafara ka naanya ka oona nye'd'de kungngo, a kadu tiji 'Bii'bala ma Tadü'd'dü ka tunggunu tö'dö ndama tülüögü ka 'dotombo'do a türü a tidihindhi miini.<sup>31</sup> Assa ka kürünü kadhangga niini a tiniidö kafara ko'd'do ka na'buugu tanno egiisö no ma tawagaana kadu niini ka tagesse eege no koona ndama 'dotombo'do koona nye'd'de kungngo.

*Talaana ma indiyye*  
(Murkus 13.28-31; Lüüka 21.29-33)

<sup>32</sup> "Aaga 'duga talaana ma indiyye no amang kada tussu iini kada katiji naseldhe miini kandana dhaaru ka kirikiri ya aaga tussu a'da kooro ka ndakete.<sup>33</sup> Kadu kara tiji eema ya nye'd'de kungngo afe'de ya, aaga tikiri ka tussu a'da 'buugu andakete kara tö'dö.<sup>34</sup> Ara a'a tadirina tumma aaga dhorro, ara eema talinggo adene a'da aleefe sere ya kide.<sup>35</sup> Ara 'dotombo'do

titaalo nja 'büdhülü, laki-ini tumma neede taalo kara titaalo.

*Tadinö ko'do  
(Murkus 13.32-37; Lüüka 17.26-30, 34-36)*

<sup>36</sup> "Lakiini uuru no miini no nja ndanaaya tanno miini no taalo ömö'dii ma tara tussu unggodho kungngo salla kadhangga ka 'dotombo'do alla 'Bii'bala illi Pupa unggodho i'i. <sup>37</sup> Afa ma tiya agalinggo adene ka uuru ma Nööh, nggeege afe'de ka uuru ma tö'dö tanno 'Bii'bala ma Tadü'dü. <sup>38</sup> Ka uuru tanno 'büüdi ka tüfürü taga'duga 'büdhülü ya kaguri kadu, kooye karnajeene idhi uuru na Nööh kaco a mürkabü no tö'dö. <sup>39</sup> Kitaalo kussu tumma no, idhi a 'büüdi tö'dö a 'duga kadu nye'd'de kungngo, ara tafiqi nggeege ka uuru ma 'Bii'bala ma Tadü'dü kara tö'dö no. <sup>40</sup> Ka uuru tanno miini no ara kadu tanna ka siga keera akonadene unggodho, aya türeene. <sup>41</sup> A iiya tawöönö keera ka 'doonya ma tawöönö ammo tagonadene ammo tüütü.

<sup>42</sup> "Aaga adinö ko'do so, kudumma ada taalo ka tussu uuru ma Uugaara ka tö'dö kide no. <sup>43</sup> Aaga ussu tumma no, ka ömö'dii ma 'dii kara tussu a'da ara tanyooro tö'dö aada ya, ara tadinö ko'do, taalo ara tarigide taalo tafa ka 'dii tiya iini anyoorodene. <sup>44</sup> Aaga indinaana oona ku'bu dhorro, kudumma 'Bii'bala ma Tadü'dü kara tö'dö ka uuru tanno ada katitaalo kündhigü i'i kide no.

*Ömö'dii ma linggo ya adho ka fiinü ya  
(Lüüka 12.41-48)*

<sup>45</sup> "Ömö'dii ma linggo öjö i'i yungngo odho ta'dara ka ömö'dii ma 'dii, kanangnga i'i ka amana eema ma kuri a kadu ka uuru miini. <sup>46</sup> A'diila nja ömö'dii ma linggo tiya miini ya, ömö'dii tiya iini ka tö'dö aduna i'i ka talinggo kungngo. <sup>47</sup> Ara a'a tadirina tumma aaga dhorro, ara tanangnga i'i kafa ka eema tiya iini nye'd'de kungngo. <sup>48</sup> Uuru ömö'dii ma linggo ya miini ya atoroko ka eedi ya, iki ka eyi tiya iini a'da, 'Ara ömö'dii ma 'dii tadoono ku'bu taalo ara tö'dö areere,' <sup>49</sup> ikirü ka abbü köje na linggo nja iini no, a kuri oyee nja kadu tanno nake ka ngeeli no. <sup>50</sup> Ikirü ömö'dii ma 'dii ka öö'dö ka uuru tanno iini ya, taalo ussu a'da ara tö'dö kide no. <sup>51</sup> Ikirü ka ta'dekeraana i'i ku'bu anangnga i'i ka afeene nja kadu tanno oroko no, afara abbünaana iginä ka oona.

## 25

*Tafeene ma tumma ma lömü na ada'baaga no*

<sup>1</sup> "Ka naguuru tanno miini no, tauugaara ma 'dotombo'do kafeene nja lömü na ada'baaga ka'duga nagalamba kunggeene ma tara co toreene nja tatarna. <sup>2</sup> A könö ka inggide ka iidümmü kanagaaga ka oona, anno iidümmü no ka'dara. <sup>3</sup> Anno nagaaga no tadhifi nagalamba, illi eege

kitaalo kagufu uu'ba miini  
nja eene.<sup>4</sup> Anno na 'dara  
no, ta'duga ügü'de ka tigine  
ana uu'ba ma nagalamba  
tanno eene.<sup>5</sup> A tatarna  
tadoono ku'bu taalo ö'dö  
areere a lomü tanyege'de  
ku'bu karigide eege in'dili.

<sup>6</sup> "Ooso ka teene ya,  
asa ndhiidhe tafara, 'Assa  
tatarna tö'dö, aaga ö'dö kürö  
aaga toreeene nja iini.'

<sup>7</sup> "İkiri lomü kafiki'dö  
nye'd'de ma tindinaana  
nagalamba neene ku'bu.  
<sup>8</sup> İkiri na nagaaga no ka  
tiki a tanno 'dara no, 'Aaga  
inyi uu'ba yaada ungngo  
kudumma nagalamba niidü  
ka tadhülü ku'bu.'

<sup>9</sup> "İkiri na 'dara no ka tiki  
eene, 'Taalo ara ta'dimo kaja  
in'dili lakiini agolo ka kadu  
tanno anadene iini no aaga  
co tana yaada.'

<sup>10</sup> "A kene ka ndunggeene  
ma tara co tana uu'ba ya,  
a'da adhe tatarna. A lomü  
na kindinaana eema yeene  
ku'bu no kaco 'buugu ma  
tarna nja iini keere ka inye.

<sup>11</sup> "Amussu kungngo ya  
asa türeene ma lomü tö'dö  
afe'de kiki, 'Ka Uugaara, ka  
Uugaara, fa'da inye ungngo.'

<sup>12</sup> "İkiri ka tiki eene, 'Ara  
a'a tadirina tumma aaga  
dhorro a'da, taalo a'a nussu  
aaga.'

<sup>13</sup> "Nggeege aaga adinii  
ko'do. Kudumma ada  
katitaalo kussu uuru nja  
ndanaaya tanno 'Bii'bala ma  
Tadü'ddü kara tö'dö iini.

*Tafeene ma tumma ma  
gürüüsü ma linggo  
(Lüüka 19.11-27)*

<sup>14</sup> "A tauugaara ma  
'dotombo'do kafeene afa  
ömö'dii asaasa tunggeene,  
assa ka tagümmünü kadu  
ma linggo niini asümünaana  
gürüüsü ma linggo eene  
ku'bu.<sup>15</sup> Adakinaana kene  
ku'bu, tamana ma türü  
tanno iini, anangnga a tiya  
eema iidümmü, anangnga  
a tiya eera, anangnga a  
tiya unggodho. Assa ka  
tunggeene.<sup>16</sup> A ömö'dii  
ya 'duga eema iidümmü  
ya, tunggeene ateefe tal-  
inggo iini, aduna ada kide  
iidümmü afe'de.<sup>17</sup> A ömö'dii  
ya a'duga eera ya, tagalinggo  
nggeege aduna kide eema  
eera.<sup>18</sup> Lakiini ömö'dii  
ya a'duga niimö unggodho  
ya, eefe tasigi'di ööye ka  
'büdhülü atü'bü eema ya  
uugaara tiya iini ya kide.

<sup>19</sup> "Kene ka ndagu'du  
dhabbu ya, ikiri uugaara  
ka öö'dö ma ta'duga eema  
yiini kene.<sup>20</sup> Ömö'dii ya  
aga'duga eema iidümmü  
ya, tö'dö adhifi eema ya  
agusunja kide iini iidümmü  
afe'de, iki iini, 'Ka uugaara,  
naganangnga o'o gürüüsü  
a'a ma linggo iidümmü, na  
a'a tagalinggo nagusu kide  
iidümmü afe'de assa kide.'

<sup>21</sup> "İkiri uugaara yiini ka  
tiki iini, 'Nagalinggo o'o  
ka'diila na o'o nadho ka fiinii  
no nagaafa o'o ka ligeema  
tiya dhilli ya nara tanangnga  
o'o kafa ka tiya adhabbu ya,

aayu kico ka dhodho tanno uugaara tiya yüdü.'

22 "A ömö'dü ya aga'duga eema eera ya tö'dö iki, 'Ka uugaara, nakadhifi o'o gürüüsü ma linggo a'a eera naduna kide eera, eede ka tagusu kide afe'de assa kide.'

23 "İkiri ka tiki iini, 'Nagalinggo o'o ka'diila na o'o nadho ka fiinii no nagaafa o'o ka ligeema tiya idhilli ya nara tanangnga o'o kafa ka tiya adhabbu ya, aayu kico ka dhodho tanno uugaara tiya yüdü.'

24 "A ömö'dü ya a'duga niimö unggodho ya tö'dö iki, 'Nussu a'a a'da o'o na ömö'dü tiya toroko ya, naraana o'o a'da taalo o'o naleele nawaana eema koona a'da taalo o'o nadiniigü. 25 Nari'ba a'a na teefe tatü'bü eema yüdü ka 'büdhülü assa kide la niimö yüdü.'

26 "İkiri uugaara yiini ka tiki iini, 'O'o no toroko nadhunu! Nussu o'o a'da a'a naraana a'da taalo a'a nadiniigü nawaana eema koona a'da taalo a'a naleele? 27 O'o nama tanangnga gürüüsü yeede ka benki, eede ka töö'dö naluna niimö kide.'

28 "İkiri ka tiki a kadu ma linggo, 'Aaga 'duga eema ya kini, aaga tanangnga ömö'dü tiya ana eema ada'baaga ya. 29 Kudumma ömö'dü tiya ana niimö agusunja kini kide adhabbu, aya niimö ka titaalo kini ya 'bantiya ungngo kini ya ara ta'dugadene. 30 A ömö'dü ya toroko ya aaga

pügü i'i co kürö ka ndüüli aaco afara abbünaana igini ka oona.'

### *Tahükümü na eere no*

31 "Ka uuru ma 'Bii'bala ma Tadü'd'dü kara tö'dö ka tiidhindhi tanno iini nja kadhangga tanno iini, emmi ka kööyö ma tauugaara tiya iini ya idhindhi ya ka 'dotombo'do. 32 A kadu ka 'büdhülü nye'd'de kungngo tö'dö karügü kini kidha ikiri ka tagedhaana eege ku'bu afa tadasaana ka tagedhaana kidheefele ku'bu nja ki'biini kungngo. 33 Uuru kidheefele kini ka niisö ma kuri, uuru ki'biini kini ka niisö ma küüle.

34 "İkiri Uugaara ka tiki a kadu tanno iini ka niisö ma kuri no, 'Aaga kö'dö aaga na Pupa tiya eede ka anangnga baraka aaga no, aaga takarna ka tauugaara tanno, akindinaana kada ku'bu a'da üfürü 'büdhülü tagarü'bü adene.

35 Kudumma iire ka tagu a'a aaga tinyi eema ma kuri a'a, a tenege tagu a'a aaga tinyi 'biidü a'a, na taga töölöge aaga tagamma kede ka nöö'dü tanno ada. 36 A en'di titaalo kede ka oona aaga tagona en'di a'a, na a'a tagamaara aaga tanaana iifye kede, nadaganna ka pabuusu aaga tö'dö tassa kede.'

37 "A kadu na adho ka fiinii no tindini i'i, 'Ka Uugaara, kaduna ungngo o'o kiga iire kagu o'o, ungngo tinya kuri o'o nja tenege ka tagu o'o ungngo tinyi 'biidü

o'o? <sup>38</sup> Ungngo taduna o'o kada töölöge kiga ungngo tamma küdü ka nöö'dü tanno iidü, nja en'di ka titaalo küdü ka oona ungngo tagona o'o, nagirnii küdü ka oona? <sup>39</sup> Ungngo taluna o'o ka tamaara kiga, nja üüdü ka tanna ka pabuusu ungngo teefe tassa küdü?

<sup>40</sup> "I'i yungngo Uugaara ka tiki eene, 'Ara a'a tadirina tumma aaga dhorro, eema yaada ka küünii a nagöre tanno eede no dhiidhi no, aaga kagüünii ana a'a.'

<sup>41</sup> "Ikirii ka tiki a kadu tanno iini ka niisö ma küüle no, 'Aaga sigi co kannaa eede ka oona aaga na aga'dadene no, agolo ka issi ta'billi, na akindininja ka Ebliisi ku'bu nja kadhangga tanno iini.

<sup>42</sup> Kudumma iiire ka tagu a'a aaga taalo kinya kuri a'a, a tenege tagu a'a aaga taalo kinya 'biidü a'a. <sup>43</sup> Na a'a taga töölöge taalo aaga kamma kede ka nöö'dü tanno ada, a en'di titaalo eede ka oona taalo aaga kanangnga a'a nagirnii kede ka oona, na a'a tagamaara nadaganna ka pabuusu aaga taalo kanana iiye kede.'

<sup>44</sup> "A kadu na miini no tikirii ka tiki iini, 'Ka Uugaara, kaduna ungngo o'o kiga iiire kagu o'o nja tenege, na taga töölöge, en'di titaalo küdü ka oona, na o'o tagamaara na o'o taganna ka pabuusu ungngo saga taalo kamünüğü o'o ko'do?'

<sup>45</sup> "I'i ara sa katiki eene, 'Ara a'a tadirina tumma ma timin'da aaga, niimö yaada

ka titaalo kagüünii ada a kadu tanno dhiidhi no aaga taalo kagüünii ada a'a.'

<sup>46</sup> "A kadu na miini no kaco ka tapusu adene ta'billi, ara na 'diila no kaco ka tefe ka 'dü ta'billi."

## 26

*Kadu keemaana ka oona ma tümmü Yasu*

(Murkus 14.1-2; Lüüka 22.1-2; Yühanna 11.45-53)

<sup>1</sup> Aga Yasu ka ndatüümö tumma niini nye'd'de kungngo ya, ikirii ka tiki a kadalaadene tanno iini,

<sup>2</sup> "Kussu aaga a'da Taanyara ma Tada'da ka Eriidö ka ndöreene füngngö eera, 'Bii'bala ma Tadü'd'dü ara tahükümüdene abünnünja ka salii'bi."

<sup>3</sup> A ka uuru tanno miini no kemmi naguugaara ma ka'boge nja kadiiffi ma anya ka 'dü tiya Kiyaafa ya uugaara ma ka'boge ya.

<sup>4</sup> Kada keemaana ka oona ma tümmü Yasu ana ünggü kiidi i'i. <sup>5</sup> Lakiini eege kiki, "Kada fa talinggo tumma no ka Taanyara ma Tada'da ka eriidö ii'dü kadu co ka muli muli."

*Aka muuru kondho ka Yasu ka oona*

(Murkus 14.3-9; Yühanna 12.1-8)

<sup>6</sup> Aga Yasu ka taganna ka Beet Aniya ya ka 'dü tiya Samaan ya akaana kutukunya ya, <sup>7</sup> aka tö'dö a sügü'de adigine a kondho tammo agu'daana mo marooro ka tuuru kini ka üüdü a'da agu eema.

<sup>8</sup> Ikirii kadalaadene niini

ka tasala linggo no ya, kagoroo'bo kiki, "Minna agu kondho maga'dadene ün'düngüngö. <sup>9</sup> Taalo ama aja kara tagatenege iini ka agu'daana a gürüüsü miini tananja kadu tanno eema ka titaalokene no."

<sup>10</sup> İkiri Yasu ka tussu iki eene, "Minna agu aaga, aaga tanyamanya aka mo ka oona? Oogo magalinggo nüümö ya a'diila ya ana a'a. <sup>11</sup> Kadu na eema ka titaalokene no kaneene nja aaga turi, lakiini taalo a'a nara taneene nja aaga turi kungngo. <sup>12</sup> A kono ka 'bunaana kondho kede ka oona ya, oogo mindinaana a'a ku'bu ma tatü'büdene. <sup>13</sup> Ara a'a tadırına tumma dhorro, ka kadu kara tadünüğü tumma ma injüili co a kadu ka 'buugu koona in'dili kadünnü tumma na aka tammo afe'de amang kene tagiigii oogo iini."

*Yahüüsa amma ka tümmünü Yasu a kadu*  
(Murkus 14.10-11; Lüüka 22.3-6)

<sup>14</sup> A tatalaadene könö ana kada no ada'baaga kafünü eera no ya ana eere a'da Yahüüsa Askaryüütü unggene aaco ka naguu-gaara ma ka'boge. <sup>15</sup> Iki eene a'da, "Ara aaga tanangnga minna a'a ara a'ka tümmünü Yasu aaga?" Kikiri ka anangnga gürüüsü iini ukumu ömö'dii aco ii sine. <sup>16</sup> Ndama uuru tanno miini no, andawwa fiinii ma tara tümmünü i'i eene.

*Yasu agu kuri ma tada'da nja kadalaadene tanno iini*  
(Murkus 14.12-21; Lüüka 22.7-14, 21-23; Yühanna 13.21-30)

<sup>17</sup> Ka uuru ma Taanyara ma Dheedhifi na dhidha no, ikiri kadalaadene ka öö'dö ka Yasu kiki iini, "Kiga i'i yungngo üüdü kasaasa a'da ungngo co tindinaana kuri ma Taanyara ma Tada'da ka Eriidö?"

<sup>18</sup> İkiri ka tiki eene, "Agolo ka ömö'dii ka anya aaga tiki iini, 'Tatalaana, asa uuru neede tö'dö nara co tagu eema ma Taanyara ma Tada'da ka Eriidö ka 'dii kita üüdü nja kadalaadene tanno eede.' " <sup>19</sup> İkiri kadalaadene ka tagüünii afa ma tiya Yasu ka tirina eene ya, kikiri ka takindinaana eema ma Taanyara ma Tada'da ka Eriidö ku'bu.

<sup>20</sup> Aga 'buugu kanda siyya ya, ikiri Yasu ka temmi ka tarabeesa ma kuri nja kadalaadene tanno iini na ö'dö kada'baaga kafünü eera no ma tara tagu eema. <sup>21</sup> A kene ka ndaguri ya, ikiri Yasu ka tiki eene, "Ara a'a tadırına tumma aaga dhorro, ömö'dii öccö ana kada ara tümmünü a'a a kadu."

<sup>22</sup> A kadalaadene tamüürü kindini i'i ka unggondho kiki, "A'a no miini, Uugaara?"

<sup>23</sup> İkiri ka tapadaga tumma eene iki, "Ömö'dii ya ara tunggu nüüsö ka dho nja a'a ya, i'i yungngo ara tümmünü a'a a kadu. <sup>24</sup> A 'Bii'bala ma Tadü'd'dü ara

teyi afa ma sorne ka tiki, lakiini am'ba ka ömö'dü tiya ara tümmünü 'Bii'bala ma Tadü'd'dü a kadu ya. A'diila kini kara tafa tageneedene."

<sup>25</sup> İkiri Yahüusa ya ara tümmünü i'i a kadu ya ka tapadaga tumma iini indini i'i iki iini, "Ka Tatalaan, timin'da taalo a'a na miini?"

İkiri ka tiki iini, "İi, O'o na miini."

*Kuri ma taamu ya Uugaara ya eere ya*

(Murkus 14.22-26; Lüüka 22.15-20; 1 Kürünsüs 11.23-25)

<sup>26</sup> A kene ka ndagu eema ya ikiri ka 'duga miteene anangnga ta'diila a Masala asümünaana ku'bu anangnga a kadalaadene tanno iini iki, "Aaga la aaga kuri, tuu'da neede eege kamiini."

<sup>27</sup> A'duga ker'de ma ngeeli anangnga ta'diila a Masala anangnga eene iki, "Aaga ooye kide aaga in'dili kungngo.

<sup>28</sup> Kudumma eriidö tiya eede i'i yungngo, eriidö ma timi'di tumma, ya uurunja co ka üdü ma kadu kadhabbu ma toolona tatoroko neene. <sup>29</sup> Ara a'a tiki aaga, ndama uuru tanno taalo a'a nara tooye ngeeli na edhe no, ara uuru ka öö'dö na a'a sa tooye i'i kada issi nja aaga ka tauugaara tanno Pupa tiya eede."

<sup>30</sup> Kikiri ka tüwe tüüsü kö'dö kürö ka co Anya ma 'Dikidiyö.

*Yasu ussu ara Bütrüs ara ta'düsünü i'i*  
(Murkus 14.27-31; Lüüka 22.31-34; Yühanna 13.36-38)

<sup>31</sup> İkiri Yasu ka tiki eene, "Ka ooso tanno ara aaga tinyi a'a ku'bu, kudumma sorne ka tiki,  
'Ara a'a tabbü tadasaana a kidheefele tarünö kasananjaana ku'bu.'

<sup>32</sup> Lakiini kede kara tafiki'dö ka inde ya, ara a'a tadhe aaga naco Jaliil."

<sup>33</sup> İkiri Bütrüs ka tiki, "Üürü kadu kinyi o'o ku'bu nye'd'de ya, taalo a'a nara tinyi o'o ku'bu."

<sup>34</sup> İkiri Yasu ka tiki iini, "Tumma eege kungngo eede kara tadırina o'o, ka ooso tanno ara o'o ta'düsünü a'a tiidoona a'da üfürü dhimbi tafara."

<sup>35</sup> A Bütrüs tiki iini, "Assa kada inde ara a'a teyi nja o'o, taalo a'a nara ta'düsünü o'o." A kadalaadene tatiraana nggeege nye'd'de kungngo.

*Yasu afara ka Masala ka Jetsemaani*

(Murkus 14.32-42; Lüüka 22.39-46)

<sup>36</sup> İkiri ka öö'dö nja kadalaadene tanno iini ka 'buugu inggide ana eere a'da Jetsemaani, ikiri ka tiki eene, "Aaga emmi kita ara a'a ka co tafara ka Masala."

<sup>37</sup> A'duga Bütrüs nja laala tiya Za'bedi keera nja iini, a müürü tümmü i'i kada inde. <sup>38</sup> İkiri ka tiki eene, "Namüürü a'a 'do afa meede kara teyi kungngo, aaga

öödhü kita aaga adinö ko'do nja a'a."

<sup>39</sup> İkiri ka tasigi keere kene ka oona idhilli kungngo iti dhugudha ku'bu ka 'büdhülü eema nja Masala iki, "Pupa yeede, üürü nasaasa 'duga ker'de ma tadhügürü mo kede, lakiini taalo a'da a'a nasaasa lakiini ndama eedi tiya üüdü ka asaasa kungngo."

<sup>40</sup> Apadaga ka kadalaadene aduna eege ka tarigide, ikiri ka tiki a Bütrüs, "Taalo aaga kambaanya tadinö ko'do nja a'a ana ndanaaya ka unggodho kungngo? <sup>41</sup> Aaga adinö ko'do aaga tafara ka Masala, ii'dü aaga ta'b'badene a tatoroko. Koronggore ana türü illi tuu'da ka ki'di."

<sup>42</sup> Afada asigi keere afe'de eema nja Masala iki, "Pupa yeede, üürü taalo o'o nasaasa ta'duga ker'de ma dhügürü mo kede ka oona illi na a'a tooye, fa kide ada tumma tanno üüdü eege kamiini."

<sup>43</sup> Afada öö'dö aduna eege ka tarigide kudumma tarigide ka talingga eege dhorro. <sup>44</sup> İkiri ka tinyi eege ku'bu apadaga ka fara ka Masala asa tiidoona ütü ka teema tumma na unggodho no.

<sup>45</sup> Afada apadaga ka kadalaadene tanno iini iki eene, "Aaga kaleefe tafüngnö aaga tarigide? Aaga assa, uuru ma tahükümü tanno 'Bii'bala ma Tadü'dü miini kara tahükümüdene ananja ka

iisine ma kadu tanno oroko no. <sup>46</sup> Aaga fiki'dö, angnga tunggeene, asa ömö'dü ya ara tümmünü a'a a kadu ya andö'dö."

*Tümmöönö ma Yasu  
(Murkus 14.43-50; Lüüka 22.47-53; Yühanna 18.3-12)*

<sup>47</sup> Ka Yasu ka taleefe teema kungngo ya, a'da adhe Yahüusa tatalaadene ana kadu tanno ö'dö kada'baaga kafünü eera no, nja kadu kungngo iini kadhabbu a magulu'ba na kadhonggoro no a maguufi, a naguugaara ma ka'boge nja kadiifi ma anya ka kürünü eege. <sup>48</sup> A ömö'dü ya ara tümmünü i'i a kadu tiki eene, "Ömö'dü yeede kara tööjülü i'i ya i'i ya miini aaga ümmü i'i." <sup>49</sup> İkiri Yahüusa ka tasigi ka Yasu kete iki iini, "Tatalaana! Aa nööjülü o'o."

<sup>50</sup> İkiri Yasu ka tiki iini, "Ömö'dü eede, alingga nüümö yüüdü ka öö'dö kide ya," kikiri ka öö'dö kümmü i'i. <sup>51</sup> İkiri ömö'dü könö ana ka kadu tanno Yasu ka afanna kulu'ba ma dhonggoro mo armuna ömö'dü ya alingga ada uugaara ma ka'boge ya ka neeso iini.

<sup>52</sup> İkiri Yasu ka tiki iini, "Padaga kulu'ba müüdü mo dhonggoro mo co 'buugu miini, ömö'dü ya tafanna kulu'ba ma dhonggoro mo ya, ara tiididene iini.

<sup>53</sup> Kiki aaga kide a'da taalo nara tambaanya tiki a Pupa tiya eede akinyi a'a ma tagürüniigü a nasigira ma kadhangga kadhabbu

kada'baaga kafünü eera ö'dö iini a'a? <sup>54</sup> Ara tumma na ka sorne no co ööye miini nya, iki a'da eema ya 'do ya ara talinggo adene nggeege."

<sup>55</sup> Ka uuru tanno miini no ageema Yasu nja kadu kadhabbu, "A'a na tataga'da 'buugu yungngo ada köö'dö a magulu'ba tammo kad-honggoro mo nja maguufi? Nagemmi a'a ka 'booro ma la ma Masala nalaana aaga, aaga taalo kümmü a'a. <sup>56</sup> Tumma nye'd'de kungngo no, kö'dö amang ka tumma tanno nagane'bi co ööye miini." İkiri kadalaadene ka rünö nye'd'de kinyi i'i ku'bu.

*Yasu ungngo kidha ma naguugaara ma Yahüüdü*

(Murkus 14.53–65; Lüüka 22.54–55, 63–71; Yühanna 18.13–14, 19–24)

<sup>57</sup> A kadu na ümmü Yasu no keefe tunggu i'i co Kiyaafa, ya uugaara ma ka'boge ya, a'da katalaana ma seriye nja kadiifi ma anya kinggide kemmi nja iini. <sup>58</sup> A Bütrüs tako'd'do kene keere ndama ku'b'ba kadara co öö'dü tiya uugaara ma ka'boge aco a 'bügööri ka teene emmi nja kadu tanno afä ka 'dü tiya Kiyaafa, iiri niimö ya ara talinggo adene ya.

<sup>59</sup> A naguugaara ma ka'boge nja naguugaara tanno emmi no tagawwa niimö ma korokoro ma tafünü ka Yasu ka oona amang kene tiidi i'i. <sup>60</sup> Kitaalo kaduna niimö a'da kö'dö kadu kadhabbu kataküüfü korokoro illi

kadu keera kafiki'dö küfü korokoro kiki, <sup>61</sup> "Ömö'dü ya iki a'da, 'Ara a'a tambaanya türküdü 'dü ma Masala nassa ka arü'bü i'i a füngngö iidoona."

<sup>62</sup> İkiri uugaara ma ka'boge ka fiki'dö iki a Yasu, "Taalo o'o na tadiri niimö 'do? Tumma öjö eege kungngo a kadu tanno kadeema küdü ka oona ungngo?" <sup>63</sup> A Yasu takı'döönö dhore, ikiri uugaara ma ka'boge ka tiki iini, "Aküdöönö ana eere ma Masala tammo adinö mo tirina tumma ungngo üürü o'o na Almasiihi 'Bii'bala ma Masala."

<sup>64</sup> İkiri Yasu ka tiki iini, "İi, o'o niki. Lakiini ara a'a tiki aaga, aaga nye'd'de kungngo ndama uuru tanno ara aaga sa kiji 'Bii'bala ma Tadü'dü ka temmi ka niisö ma kuri ma Masala tammo ana türü mo ka tunggunuaku'bu ka tülüögü ndama 'dotombo'do."

<sup>65</sup> İkiri uugaara ma ka'boge ka tarisina en'di ku'bu iini ka oona iki, "Eela Masala! Kasaasa angnga taföönyö minna afe'de? Ka föönyö aaga teelaana ma Masala niini. <sup>66</sup> Kiki aaga nya ka tumma tanno?"

Kikiri ka tiki iini, "Fa kini eyi."

<sup>67</sup> Karooro ka'binyyi alaaga kini ka dhugudha kabbü i'i ka karama. <sup>68</sup> Kiki iini, "O'o na Almasiihi no, tirina ungngo, mada i'i yungngo abbü o'o?"

*Bütrüs a'düsünüü Yasu  
(Murkus 14.66-72; Lüüka 22.56-62; Yühanna 18.15-18, 25-27)*

<sup>69</sup> A Bütrüs ungngo ka 'booro ma 'dii, a 'badaada ma linggo mo tö'dö kini kete miki, "Naganeene o'o nja Yasu ya ma Jaliil ya."

<sup>70</sup> Lakiini a'düsünigü ka kadu kidha nye'de kungngo iki, "Taalo a'a nussu niimö yüdü ka teema ya."

<sup>71</sup> A Bütrüs tunggeene aco inye, a 'badaada kömö tasala i'i miki a kadu tanno kete kono no, "Ömö'dii ya aganeene nja Yasu ya ma Nasira ya."

<sup>72</sup> A Bütrüs ta'düsünigü afe'de andeera aküdöönö iki, "Taalo a'a nussu ömö'dii ya."

<sup>73</sup> Amussu kungngo ya, a kadu na 'dingnge ana ko'do no tö'dö ka Bütrüs kiki iini, "O'o dhorro ya o'o na ma kadu tanno, tumma nüdü kafeene nja tanno eene."

<sup>74</sup> A ndeela 'buugu aküdöönö, "Taalo a'a nussu ömö'dii ya!" İkiri dhimbi ka tagolo fara. <sup>75</sup> İkiri Bütrüs ka tagiigü tumma na Yasu, "A dhimbi ka tüfürü tafara ya ara o'o ta'düsünüü a'a tiidoona." İkiri ka co akürö afara fara ya dhiiri ya.

## 27

*Yasu kidha ma Bilatus  
(Murkus 15.1; Lüüka 23.1-2; Yühanna 18.28-32)*

<sup>1</sup> Ligitaka so'd'do kungngo ya, ikiri naguugaara ma

ka'boge nja kadiifi ma anya ka teema ana ka oona ma tiidi Yasu. <sup>2</sup> Kikiri ka timi'di i'i küügü i'i kümmünü uugaara Bilatus.

*Inde na Yahüüsa  
(Kadafün 1.18-19)*

<sup>3</sup> Aga Yahüüsa ya agümmünü Yasu a kadu ya ka tasala eege katümmü Yasu ya, a tagussu tümmü i'i, afada ana gürüüsü ya ö'dö ukumu ömö'dii aco iisine ya, anangnga a naguugaara ma ka'boge nja kadiifi ma anya. <sup>4</sup> Iki eene, "Tatoroko neede eede ka tümmünü ömö'dii ya insili ka eedi ya aaga."

Kikiri ka tiki iini, "Minna yiidi iiri tessu kide nüdü."

<sup>5</sup> İkiri Yahüüsa ka tadhifi gürüüsü co la ma Masala. Ara ka tunggeene ateefe tamir'di eyi yiini.

<sup>6</sup> İkiri naguugaara ma ka'boge ka 'duga gürüüsü kiki a'da, "Eema ma eriidö i'i yungngo taalo ama aja ka'duga angnga tanangnga ka la ma Masala."

<sup>7</sup> Kadimi'di tumma kadaana 'buugu ka ömö'dii ya adina nadhafala ya ma tatü'bü kölöge kide. <sup>8</sup> I'i yungngo a kadu ka tümmünü siga na miini no Lodho ma Erividö ta'bütengngö. <sup>9</sup> Amang ka tumma tanno ne'bi Armiya co ööye miini iini ka tiki a'da, "Ka'duga gürüüsü ukumu ömö'dii aco iisine, i'i yungngo kadu ma Israyil ka takiki a'da faana miini i'i ya miini,

<sup>10</sup> kadaana siga ma ömö'dii tiya adina nadhafala

ya af a ma tiya Uugaara ka tiki a'a ya kungngo."

*Bilatus indini Yasu*  
(*Murkus* 15.2-5; *Lüüka* 23.3-5; *Yühanna* 18.33-38)

<sup>11</sup> İkirī Yasu ka 'dïngnge ka uugaara kidha, uugaara tindini i'i iki, "O'o na uugaara ma Yahüdü?"

İkirī Yasu ka tiki iini, "İi, O'o niki."

<sup>12</sup> A naguugaara ma ka'boge nja kadiüfi ma anya ta'buna tumma iini ka oona assa ki'döönö taalo adiri niimö. <sup>13</sup> İkirī Bilatus ka tiki iini, "Taalo o'o naföönyö eema yeene ka teema küdü ka oona ya?" <sup>14</sup> A Yasu takı'döönö taalo adirina niimö iini, idhi uugaara tadhere 'do.

*Yasu ümmününja ka inde*  
(*Murkus* 15.6-15; *Lüüka* 23.13-25; *Yühanna* 18.39—19.16)

<sup>15</sup> Katadaada uugaara amanaga ömö'di ma pabuusu kürö unggodho ndama pabuusu ya kadu kasaasa ya ka uuru ma taanyara.

<sup>16</sup> A ömö'di aganna kide ussudene 'do ana eere a'da Barabas. <sup>17</sup> Ka kadu kandarüğü ya ikirī Bilatus ka tiki eene, "Kasaasa aaga a'a a'da nuurugu mada aaga? Barabas alla Yasu ya ana eere a'da Almasiihi ya?" <sup>18</sup> Kudumma iini ka tussu a'da kirimü i'i yungngo anangnga eege katümmü Yasu.

<sup>19</sup> Aga Bilatus ka ndemmi ka köyö ma tauugaara ya, mikirī aka miini ka kürünü kini miki, "Ömö'di ya a'diila

ya i'i yungngo, ii'di o'o tüünü niimö ana i'i, nadhügürü a'a ka uuru tanno 'do ana kümboödö kudumma iini."

<sup>20</sup> Lakiini naguugaara ma ka'boge nja kadiüfi ma anya kafünü kadu a'da kasaasa Barabas ka öö'dö kürö kara katiidi Yasu. <sup>21</sup> İkirī uugaara ka tindini eege iki eene, "Kasaasa aaga a'a a'da nuurugu mada ada kürö?"

Kiki a'da, "Barabas."

<sup>22</sup> A Bilatus tiki eene, "A'a nara tönynyö ana Yasu tiya ana eere a'da Almasiihi ya?"

Kikirī ka tiki eege in'dili kungngo, "Bünnü i'i ka salii'bi!"

<sup>23</sup> Iki eene, "I'i agalinggo minna ya toroko ya?"

Kakogoona ma tiidhe ko'd'do, "Bünnü i'i ka salii'bi!"

<sup>24</sup> Ka Bilatus ka tasala tumma no ya, taalo ka tö'dö keere a niimö ya, adha ara tö'dö a talumuli kadhabbu, indi 'biidü agala iisine iini ka kadu kidha iki, "Nagu'b'ba a'a ka eriidö ma ömö'di tiya, aaga iirri yaada kara tüünü ya."

<sup>25</sup> İkirī kadu nye'd'de ka tiki, "Eriidö yiini ungngo iidü ka oona nja laala tiya iidü."

<sup>26</sup> İkirī ka tuurugu Barabas eene kürö ara ka tabbü Yasu assa ka anangnga eene a'da kaco tabünnü i'i ka salii'bi.

*Nasigira kamidhi Yasu*  
(*Murkus* 15.16-20;  
*Yühanna* 19.2-3)

<sup>27</sup> İkirī nasigira na uugaara ka a'duga Yasu kaco 'di ma uugaara, a nasigira kakedhe i'i ko'do nye'd'de

kungngo. <sup>28</sup> Kakirnö en'di iini ka oona kara kagirnö ten'di ma öödhe mo kini ka oona. <sup>29</sup> Ka'duga immi kataküüfö nüümö ma tu'daana kini ka üüdü afa uugaara kanangnga tam'bala iini ka nüüsö ma kuri, kamidhi i'i küürü kini kidha, kiki, "Ungngö kööjülü o'o na uugaara ma Yahüüdü no." <sup>30</sup> Kümmü tam'bala kabbü i'i ka üüdü iini ka'binyyi alaaga kini ka oona. <sup>31</sup> Kene kandagüünö midhi ku'bu ana i'i kikirri ka kirnö ten'di kini ka oona ma öödhe mo iini ka oona ka'duga i'i ma taco tabünnü i'i ka salii'bi.

*Yasu ungngo ka salii'bi*

(Murkus 15.21-32; Lüüka 23.26-43; Yühanna 19.17-27)

<sup>32</sup> Kene ka ndöö'dö kürö ndama anya ana i'i, kikirri ka toreene nja ömö'dü tiya ana eere a'da Samaan ya ma Keriwan ya, kadagapusu i'i kanangnga i'i katümmü salii'bi ya Yasu. <sup>33</sup> Kene ka ndala 'buugu ya ana eere a'da Jüljüsa (Dho ma Üüdü). <sup>34</sup> Kanangnga ngeeli ka tatonggoonyo a kembelö, ikirri ka tagolo aanu ka tooye. <sup>35</sup> Kabünnü i'i ka salii'bi kafanna muduru kasümünaana en'di yiini kene ku'bu. <sup>36</sup> Kemmi kanna kafa kini. <sup>37</sup> Kanangnga nüümö kini ka üüdü kakiri tumma, ma tümmü adene niini kide, "YASU YA UU-GAARA MA YAHÜÜDÜ YA I'I YUNGNGO." <sup>38</sup> Kabünnü i'i ku'bu nja kanyooro keera, ya ndama nüüsö

ma kuri aya ndama nüüsö ma küüle. <sup>39</sup> A kadu na unggeene ka fiinö no teela i'i ka'digi'dü nanggüüdü kiki, <sup>40</sup> "Tataga'da la ma Masala arü'böönö a füngngö iidoona, üürü o'o na 'Bii'bala ma Masala ya oolona eyi yüüdü nöö'dö ku'bu ndama salii'bi."

<sup>41</sup> A naguugaara ma ka'boge nja katalaana ma seriye nja kadiifi ma anya kamidhi i'i, <sup>42</sup> kiki, "I'i ya oolona kadu öccö assa ka titaaloo ambaanya toolona eyi yiini. Üürü i'i ya Uugaara ma Israyil ya tö'dö ku'bu ndama salii'bi amang kidi tamma kini. <sup>43</sup> Agümmünö eyi yiini a Masala iki a'da i'i ya 'Bii'bala tiya Masala moolona i'i 'bitüngngö üürü oogo mamma kini." <sup>44</sup> A kanyoro na bünnünja ku'bu nja iini no teela i'i keema nggeege.

*Inde na Yasu*

(Murkus 15.33-41; Lüüka 23.44-49; Yühanna 19.28-30)

<sup>45</sup> A 'buugu ka nduuru ka teene a 'büdhüüli nye'd'de talifi ada ndüüli ndanaaya tidhi ka öö'dö kiidoona amuru ma siiya. <sup>46</sup> Ka ndanaaya ka ndö'dö kiidoona ya, ikirri Yasu ka tadhiya ko'd'do iki, "Iili, Iili, lima sabaktani?" a'da, "Masala meede, Masala meede, minna agu o'o ninyi a'a ku'bu?"

<sup>47</sup> A kadu könö na kanna kide no taföönyö kiki a'da, "I'i ümmünö İliya." <sup>48</sup> A

ömö'dü könö tarünö areere a'duga sifinja anyo'do ka ngeeli ka tonggoonyo a kembelö ka tam'bala amünögü a Yasu a'da ooye.<sup>49</sup> A kadu könö tiki, "Aaga öödhü angnga takassa kini ara İliya tö'dö toolona i'i!"

<sup>50</sup> İkiri Yasu ka tadhiya ko'do dhindho afe'de assa ka teyi.<sup>51</sup> A ten'di ma la ma Masala töorese ndama üüdü miini alla aco aa'bu, a 'büdhülü tatinggi'dü ka oona a nüügsi türrüdü kasana njaana ku'bu.<sup>52</sup> A naala ma oofo tatanfa'da a kadu na insili na kaaya no tafiki'dö kadhabbu a tuu'da tanno eene keefe ka 'dü.<sup>53</sup> Ka Yasu ka fiki'dö ka inde kaco anya tammo insili mo kala oona a kadu kadhabbu.

<sup>54</sup> A uugaara ma nasigira na ö'dö a kadu ka iidümmü no (100) nja kadu tanno iini na afa ka Yasu no ka tasala 'büdhülü ka tingeni'dü nja eema tiya agüünii adene ya nye'de ari'ba tümmü eege kiki, "Tumma dhorro ömö'dü ya 'Bii'bala ma Masala i'i ya miini."

<sup>55</sup> Iiya kinggide kadhabbu küröönö ndama ku'b'ba eege kungno kunggeene nja Yasu ndama Jaliil kalinggo ada iini.<sup>56</sup> Eege kinggide nja Mariyom Almajdaliya nja Mariyom niimö ma Yaguub nja Yüüsü, nja niimö tammo laala tiya Za'bedi.

### *Tatü'böönö ma Yasu*

(Murkus 15.42–47; Lüüka 23.50–56; Yühanna 19.38–42)

<sup>57</sup> Ömö'dü inggide ana almaala dhabbu ana eere a'da Yüüsüf, ö'dö ndama Raama

a 'buugu kanda siiya, i'i aga tatalaadene tiya Yasu afe'de.<sup>58</sup> Inynyo ka Bilatus asaasa oofa ya Yasu, ikiri Bilatus ka tiki a kadu a'da kanangnga iini.<sup>59</sup> İkiri Yüüsüf ka 'duga oofa ya Yasu a'bürü i'i ka oona a ten'di tammo insili mo.<sup>60</sup> Unggu i'i co la ma oofa tiya iini ka taleefe takii'dödene ka 'dakamba agürü dhembeliili ma dhabbu aküdhü ka la ma oofa ara ka tunggeene.<sup>61</sup> A Mariyom Almajdaliya nja Mariyom tökömö temmi kadinö co la ma oofa.

### *Tafa ka la ma oofa*

<sup>62</sup> A taka ka ndaadha ya, kindinaana oona ku'bu ma uuru ma Sa'bidi, ikiri naguugaara ma ka'boge nja naFariisi kico ka Bilatus.<sup>63</sup> Kiki iini, "Ka uugaara, kagiigü unngno tumma no ta korokoro tiya iini ka takaleefe tadinö iki, 'Ara a'a tafiki'dö ka inde a fungngö iidoona.'

<sup>64</sup> Nggeege nangnga kadu kafa ka la ma oofa idhi a fungngö tö'dö iidoona kudumma a kadalaadene tanno iini kara tanggaaga tanyooro i'i, kassa ka tiki a'da i'i afiki'dö ndama inde a tumma no takogoona ma tatoroko dhindho adagii'bi korokoro ya dhidha ya."

<sup>65</sup> İkiri Bilatus ka tiki eene, "Kadu ma tafa ka 'buugu kungno ada, agolo aaga co tafa kide unggodho aaga."

<sup>66</sup> Kikiri ka co kateefe tafa ka la ma oofa kabünnü hitimi ka dhembeliili kanangnga kadu kafa kide.

## 28

*Tafikii'dö na Yasu*

(*Murkus 16.1-8; Lüüka 24.1-12; Yühanna 20.1-10*)

<sup>1</sup> Ka uuru ma Sa'bidi kanco a taka taadha so'd'do ma uuru ma Lahada ya, ikiri Mariyom Almajdaliya nja Mariyom tökömö tö'dö tassa co la ma oofo. <sup>2</sup> A 'buugu tatinggi'di dhindho kudumma tadhangga ma Masala ö'dö ku'bu agürü dhembelili ka la ma oofo emmi kide. <sup>3</sup> Alimaana ka oona afeene nja ten'di tiya a'bassa afa köröörö. <sup>4</sup> Ari'ba tümmü kadu na afa kini no kafeene nja kadu tanno aaya no kene ka tasala i'i.

<sup>5</sup> Ikiri tadhangga ka tiki iiya tanno eera no, "Aaga fa tari'ba, nussu a'a a'da aaga kasaasa Yasu ya abünnünja ka salii'bi ya. <sup>6</sup> Itaalo kita kudumma iini ka fiki'dö afa miini ka takiki, aaga assa ka 'buugu tiya iini ka taganna kide ya. <sup>7</sup> Aaga unggeene areere aaga co ka kadalaadene tanno iini aaga tiki eene a'da, 'Ti afiki'dö ndama inde, i'i ara tadhe aaga aco Jaliil ara aaga taluna i'i kanna, a'a nungngo nadirina aaga 'bitingngö."

<sup>8</sup> Ikiri iiya ka öö'dö kürö ndama la ma oofo küüsö ari'ba kagu eege, küüsö kadhodho 'do kateefe tadirina eema a kadalaadene tanno iini, <sup>9</sup> Ikiri Yasu ka toreeene nja eene iki eene, "A'a nööjülü aaga," kö'dö kini kete küürü kini kidha kümmü i'i ka uune, <sup>10</sup> Ikiri Yasu ka tiki eene, "Aaga fa

tari'ba agolo tiki a nagöre tanno eede a'da kaco Jaliil kaco toreeene nja a'a kide."

*Korokoro ma kadu ma Yahüüdü*

<sup>11</sup> Kene ka ndunggeene ya, a kadu na kaafa ka 'buugu no kaco anya kateefe tadirina eema a naguugaara ma ka'boge ma eema tiya agalinggo adene ya nye'd'de kungngo. <sup>12</sup> A naguugaara ma ka'boge nja kadiifi ma anya tageema ana ka oona, kanangnga gürüüsü a nasi-gira adhabbu. <sup>13</sup> Kiki eene a'da, "Kadünüğü eema a kadu a'da, 'Kadalaadene na Yasu köö'dö ooso kungngo a'da karigide ungngo kada-ganyoro i'i.' <sup>14</sup> Ka uu-gaara Bilatus kara taföönyö tumma no ya, ara ungngo teema nja iini amma a nüümö ya toroko taalo ara tö'dö kada 'do." <sup>15</sup> A nasigira ta'duga gürüüsü kadagüünö afa ma tiya kadu ka tiraana ya kungngo, a tumma no tanyala ku'bu ka Yahüüdü ta'bitingngö.

*Yasu adele oona a kadalaadene tanno iini*

(*Murkus 16.14-18; Lüüka 24.36-49; Yühanna 20.19-23; Kadafüni 1.6-8*)

<sup>16</sup> Illi kadalaadene na ada'baaga kafünü unggodho no kunggeene kaco Jaliil ka sörö anya kita a Yasu ka takiki eene ya. <sup>17</sup> Kene ka tasala i'i ya küürü ku'bu ana küüge kini kidha. Lakiini öccö ana kene a'doore ka nanggeedi miini, <sup>18</sup> Ikiri Yasu ka öö'dö kene iki eene,

"Manangnga Masala tauugaara a'a nye'd'de ndama 'dotombo'do nja 'büdhülü.  
19 Aaga unggeene aaga co talaana kadu ka na'buugu nye'd'de, aaga tambeese eege ana eere ma Pupa nja 'Bii'bala nja Koronggore tiya Insili ya. 20 Aaga laana eege a'da kalinggo a tumma tanno eede ka tadirina aaga iini no, tumma dhorro a'a nungngo naneene nja aaga a naganuuru ta'billi idhi a 'büdhülü titaalo."

## İnjili Murkus Tafa'da tumma

Murkus arigiri sorne ya.  
I'i ya aga tatalaadene tiya  
Yasu ö'dö takinyi linggo a  
tafiini Bölis ka naguuru ma  
tino tanno iini. I'i aga ana  
eere a'da Yühanna Murkus.  
I'i aga senaana tumma  
na Yahüdü kadhabbu nja  
eema ma Masala tiya eene,  
afeene afa i'i arigiri ada  
co kadu tanno taalo ka  
Yahüdü no.

Murkus arigiri ma eema  
tiya Yasu ka talinggo ada  
aaga nja talaana ya. Yasu  
iki a kadu a'da tauugaara  
na Masala ka ndö'dö. Türü  
kungngo iini ma nagorong-  
gore tanno oroko no, i'i  
oolona kadu na maara no  
kadhabbu, aji 'badaada ka  
inde, a'duga tatoroko ka  
kadu, iki a kadalaadene  
tanno iini a'da ömö'di ya  
assaasa tatalaadene tiya  
iini ya, fa kini amma ka  
dhügürü eyi. Ka Yasu ka  
ndeyi afiki'dö afe'de, iki  
a kadalaadene tanno iini  
a'da kaco ka na'buugu 'do  
kadünnü tumma miini co  
kadu nye'd'de kungngo.

*Lingga na Yühanna ya  
Tatambeese ya  
(Matta 3.1-12; Lüüka 3.1-  
9, 15-17; Yühanna 1.19-28)*

<sup>1</sup> İnjili ma dhidha mo  
meema tumma Yasu Almasi-  
ihî 'Bii'bala ma Masala.

<sup>2</sup> Karigirinja ka sorne ma  
ne'bi Asaiya,

"A'a nungngo na tagürünü  
tafiini yeede küdü  
kidha,  
aco tindinaana fiinii  
yüdü."

<sup>3</sup> "Kafara takeere ka dhiile,  
'Aaga indinaana fiinii ka Uu-  
gaara ku'bu,  
aaga indinaana fiinii yi-  
ini ku'bu,  
aaga tanangnga nafiiñi  
niini ka tadhidho.' "

<sup>4</sup> Yungngo Yühanna ka  
öö'dö ka dhiile atagambeese  
kadu iki eene, "Aaga aadha  
ka tatoroko aaga tam-  
beesedene amang ka Masala  
toolona aaga ma'duga  
tatoroko ada ka oona." <sup>5</sup> A  
kadu takicci kini ndama  
naanya ma Yahüüdiya nja  
Örsaliim nye'd'de kungngo,  
ambeese eege ka Ri ma  
Ürdün, kamma ka tatoroko  
tanno eene.

<sup>6</sup> A Yühanna tagümmü  
en'di ma musa ma naga-  
malaga ka oona, imi'di  
eedi ana jönnö ma öttö,  
aagu müdüünii nja küde ma  
dhiile. <sup>7</sup> Adageema tumma  
iki a'da, "Ömö'di inggide  
assa öö'dö kede keere ana  
türü adagii'bi a'a, mündä  
meena ma egiide tiya iini  
taalo a'a natambaanya  
tüürü ku'bu nanggilaana.  
<sup>8</sup> Ara a'a tambeese aaga a  
'bii'di, illi i'i a tambeese aaga  
a Koronggore tiya Insili ya."

*Tambeesedene nja ta'b'badene tanno Yasu (Matta 3.13-17; Lüüka 3.21-22)*

<sup>9</sup> Ka naguuru tanno miini no, agöö'dö Yasu ndama Nasira ma ka Jaliil mo, a Yühanna takambeese i'i ka Ri ma Ürdün. <sup>10</sup> Aga Yasu ka öö'dö kürö ndama 'bii'dü ya, asala 'dotombo'do ka tatafa'da, a Koronggore ya Insili ya tidhi kini ka oona ka afeene nja ndalambo. <sup>11</sup> A tumma tö'dö ndama 'dotombo'do kiki, "O'o na 'Bii'bala tiya eede ka asaasa i'i ya, namma a'a küdü."

<sup>12</sup> A Koronggore ya Insili ya tarooro ka tüögü i'i aco a dhiile iini. <sup>13</sup> Adaganna kide a fungngö ukumu kadu keera, Ebliisi ta'b'ba i'i. Anna kide nja eema ma eriidö tiya oroko ya, a kadhangga tagalinggo ada iini.

*Kadalaadene na akümmünüdene ka dhidha no (Matta 4.12-17; Lüüka 4.14-15)*

<sup>14</sup> Ka Yühanna kananja ka pabuusu ya, a'da ö'dö Yasu ka Jaliil adünnü tumma ma ïnjülli. <sup>15</sup> Iki, "Assa ürüünü tö'dö, a tauugaara na Masala ka ndakete, aaga aadha ka eema tiya toroko ya, aaga tamma ka ïnjülli."

<sup>16</sup> Aga Yasu ka tunggeene ka tinggini ma to ma Jaliil ya, ikiri ka tasala kadu keera kakinne kilöögö, Samaan nja örre tiya iini Andraws karara'baga sa'baka co to kudumma eene kada kadu ma tümmü kilöögö.

<sup>17</sup> A Yasu tiki eene, "Aaga ö'dö kede keere ara a'a tanangnga aaga ka kinne kadu." <sup>18</sup> Kikiri karooro kaafa ka nasa'baka tanno eene kara ka turna i'i keere.

<sup>19</sup> Akalogo tino co aadha, asala Yäguub 'bii'bala ya Za'bedi nja örre tiya iini Yühanna, kungngo ka mürkabü kindinaana nasa'baka neene. <sup>20</sup> Kini ka tümmünü eege ya, karooro ka tinyi pupa yeene Za'bedi ka mürkabü nja kadu tanno linggo nja iini no, kara katuurna i'i keere.

*Yasu asoro koronggore ya toroko ya*

(Lüüka 4.31-37)

<sup>21</sup> Kikiri ka öö'dö ka Kafarnahööm, aco la ma talaana ka uuru ma Sa'bidi, alaana kadu. <sup>22</sup> A kadu tadhere ka talaana tanno iini, kudumma iini ka talaana kadu a türü tanno iini, taalo afeene afa katalaana ne kadu ma seriye.

<sup>23</sup> Ömö'dü ungngo eene ka la ma talaana a koronggore tiya toroko ya ka tuurunja iini ka oona iidhe, <sup>24</sup> "Minna yüdü nja ungngo, Yasu ya ma Nasira ya? Nö'dö o'o kita ma tiidi ungngo? Nussu a'a a'da o'o na mada, o'o na ömö'dü ma Masala tiya Insili ya."

<sup>25</sup> İkiri Yasu ka kirnaana kini iki, "Kï'döönö, aayu kürö ndama ömö'dü tiya ka oona." <sup>26</sup> A koronggore ya toroko ya tüpü i'i co aadhiya ko'd'do öö'dö kürö ndama iini ka oona. <sup>27</sup> A kadu tadhere nye'd'de ka tumma tanno iini kiki a'da,

"Talaana öjö eege kungngo kaleefe tö'dö? Kabbü 'dala a talaana nja türü. Mündä nagoronggore na oroko no i'i amana tumma eene kaföönyö." <sup>28</sup> A tumma na Yasu tadhala ku'bu areere ka Jaliil ka oona nye'd'de kungngo.

*Toolona 'berki ma Bütrüs ka maara*  
(Matta 8.14-17; Lüüka 4.38-41)

<sup>29</sup> Kini ka öö'dö kürö ndama la ma talaana ya, ikirü ka tunggeene nja Yaguub nja Yühanna kaco ka 'dï tiya Samaan nja Andraws. <sup>30</sup> Kajo kaduna 'berki ma Samaan ka tamaara magu'daana ka oona mafüngngö, kikirü ka tirina iini. <sup>31</sup> İkirü ka öö'dö kono kete ümmü oogo ka niisö a'dina oogo ko'do, a maara taadha kono ka oona, mafikü'dö malinggo ada eene.

*Toolona ma kadu kadhabbu*

<sup>32</sup> Ka 'buugu kanda siiya, ka ndanaaya ka nda'dünggö caa'bu ya, a kadu tö'dö a kadu tanno maara no a Yasu nye'd'de kungngo nja tanno kaana nagana'bu ka oona no. <sup>33</sup> A kadu ma anya nye'd'de tö'dö kadigi ka inye ma 'bügöörü dhirri kungngo. <sup>34</sup> A Yasu toolona kadu ma maara kadhabbu adagasoro nagana'bu ka kadu ka oona kadhabbu, afaga nagoronggore na oroko no keere ka teema, kudumma eene ka tussu i'i.

*Yasu afara ka Masala a 'buugu tiya kadu katitaalo kide ya*  
(Lüüka 4.42-44)

<sup>35</sup> A ligitaka so'd'do a'da aleefe 'buugu talüllü, afiki'dö Yasu öö'dö kürö aco a 'buugu tiya kadu katitaalo kide ya, afara ka Masala kide. <sup>36</sup> A Samaan tagawwa 'buugu miini nja köje. <sup>37</sup> Kene kandaluna i'i kadhere kiki iini, "Kadu nye'd'de kawwa 'buugu ma o'o."

<sup>38</sup> İkirü Yasu ka tiki eene, "Aaga ö'dö kijagö anaanya tanno kete no, naco talaana kadu miini afe'de, eege kungngo eede ka öö'dö kudumma eene." <sup>39</sup> Adagalööle ka Jaliil koona nye'd'de alaana kadu ka naala ma talaana asoro nagana'bu ka kadu ka oona.

*Yasu oolona ömö'di ya ana kutukunya ka oona ya*  
(Matta 8.1-4; Lüüka 5.12-16)

<sup>40</sup> Ömö'di inggide ana kutukunya ö'dö üürü ku'bu iki iini a'da, "Küdü ka tasaasa ara o'o tanangnga a'a ka tinsili."

<sup>41</sup> A 'bangnga miini tümmü Yasu, akilina niisö ümmü i'i ka oona iini, iki iini, "Nasaasa a'a a'da o'o tinsili." <sup>42</sup> A kutukunya tadhe ko'do amanyaga kini ka oona insili.

<sup>43</sup> A Yasu tuuru i'i ka tino a tumma dhorro. <sup>44</sup> Kini ka tiki iini a'da, "Afa tadirina ömö'di. Lakiini unggeene naco ka ta'boge nala oona iini, na o'o sa ka türri oona nüüdü afa ma tiya Müüsa

ka tageema ya a kadu tussu iini." <sup>45</sup> Lakiini ömö'dü afiki'dö adagadünnü eema, a tumma tanyala ka 'buugu ka oona nye'de kungngo, a Yasu taalo ussu ka tunggeene ma co na'buugu dhorro, ikirii ka tan'danaga co lodho a kadu tö'dö ndama na'buugu kadhabbu kadigi kini ka oona.

## 2

### *Yasu oolona mügüre*

(Matta 9.1-8; Lüüka 5.17-26)

<sup>1</sup> A füngngö idhilli kungngo ya, a Yasu tapadaga co Kafarnahööm, a kadu taföönyö a'da ö'dö ka 'dii. <sup>2</sup> Kikirii kadu ka tagawaana oona kadhabbu kadigi ka 'bügööri tiya iini ka ö'dö kide ya idhi a 'buugu ma tatüküülü ka ïnye titalo, ikirii ka talaanaga tumma ma ïnjilli co eene. <sup>3</sup> A kadu könö ka egüsö kö'dö a mügüre iini. <sup>4</sup> Illi 'buugu meene ka tigaala kide ana i'i kunggu co Yasu, titalo kudumma kadu ka tadhabbu yungngo eene kasirö 'dasala kaparsaana tisi ku'bu ka 'diniga mügüre ku'bu a sekede. <sup>5</sup> Ka Yasu ka tassa ka tamma ana eedi tiya eene ya, ikirii ka tiki a mügüre, "'Bii'bala eede, noolonadene o'o ka tatoroko."

<sup>6</sup> Kaganna katalaana ma seriye kide kemmi, kikirii ka teema ka nanggeedi tanno eene, <sup>7</sup> "Minna agu ömö'dü ya eela Masala kungngo. Mada ana türü ma tama

tatoroko ka kadu ka oona illi Masala unggodho oogo?"

<sup>8</sup> A Yasu tadhe ko'do ussu a koronggore tiya iini a'da eege keema kini ko'do ikirii ka tindini eege, "Minna agu aaga, aaga teema tumma no kungngo? <sup>9</sup> Öjö i'i yungngo ipalapala? Tiki a mügüre a'da, 'Noolonadene o'o ka tatoroko tanno üüdü,' alla niki iini, 'Fiki'dö na'duga sekede yüüdü nunggeene'?

<sup>10</sup> Lakiini ara aaga tussu a'da tauugaara kungngo a 'Bii'bala ma Tadü'd'dü ka 'büdhülü kita ma toolona tatoroko," ikirii ka tiki a mügüre, <sup>11</sup> "A'a niki o'o, fiki'dö na'duga sekede yüüdü naco 'dii."

<sup>12</sup> A mügüre tarooro ka fiki'dö a'duga sekede yiini ka kadu kidha aco kürö. A kadu nye'de tadhere kanangnga ta'diila a Masala kiki, "Taalo ungngo kadinö ka tumma tanno anooso 'do."

### *Tümmüneene na Laawi*

(Matta 9.9-13; Lüüka 5.27-32)

<sup>13</sup> A Yasu tafada aco a tinggini ma to afe'de. A kadu tö'dö kini kadhabbu alaana eege. <sup>14</sup> Kini ka tunggeene ya, ikirii ka tasala Lawi 'bii'bala ya Halfa ka temmi ka 'buugu ma tulu'ba, ikirii ka tiki iini, "Aayu kede keere." A Lawi tafiki'dö aco iini keere.

<sup>15</sup> Ka Yasu ka ndemmi ka 'bügööri tiya Lawi ma tagu eema ya, a kadalaadene temmi nja iini nja kadu ma tulu'ba kadhabbu nja kadu tanno oroko no kagu

eema nja iini, kudumma kadu kadhabbu ka kata'da kini keere.<sup>16</sup> Ka naFariisi no katalaanma seriye no kadin'i ka Yasu ka agu eema nja kadu tanno oroko no nja kadu ma tulu'ba, kikirii ka tiki a kadalaadene tanno iini, "Minna agu i'i agu eema ooye nja kadu ma tulu'ba nja kadu tanno oroko no?"

<sup>17</sup> A Yasu taföönyö tumma neene no iki eene, "Kadu na taalo kamaara no taalo kasaasa digtöörö, illi kadu na maara no eege ka asaasa digtöörö. Taalo a'a nö'dö tümmünü kadu na 'diila no, a'a nö'dö ka kadu tanno oroko no."

*Tindineene ma tümmü te-nege*

(Matta 9.14-17; Lüüka 5.33-39)

<sup>18</sup> A 'bitingngö kadalaadene na Yühanna nja naFariisi kümmü tenege. Yungno a kadu könö köö'dö ka Yasu kiki iini, "Kafaanya kadalaadene na Yühanna nja tanno naFariisi kümmü tenege ara nüüdü kitaalo kümmönö?"

<sup>19</sup> A Yasu tapadaga tumma eene iki, "Ara kafala ma tatarna, tümmü tenege nya a'da i'i ungno eene ka söödö? Eege taalo ka tümmü tenege a'da i'i ungno eene ka söödö.<sup>20</sup> Lakiini uuru kinggide assa köö'dö a tatarna saga a'dugadene kene ka uuru tanno miini no kassa ka tümmü tenege.

<sup>21</sup> "Taalo ömö'dü ara tar'da ten'di ya issi ya ka tiya illi ya, üürü i'i agalinggo nggeege, a ten'di ya issi ya

ara töörese ya illi ya, alinggo ööye adhabbu.<sup>22</sup> Ngeeli na aleefe tedhe no taalo kara tuurunja ka 'belde tammo illi mo, ara ngeeli na edhe no, tadhösö 'belde kuurunja co. Ara ngeeli ma 'bitingngö tananja ka 'belde maleefe ta'diila mo."

*Uugaara ma uuru ma Sa'bidi*  
(Matta 12.1-8; Lüüka 6.1-5)

<sup>23</sup> Ka uuru ma Sa'bidi kinggide ka Yasu ka tigaala ka nasigene. İkiri kadalaadene niini ka armuna migile eene ka tunggene.<sup>24</sup> İkiri naFariisi ka tindini Yasu, "Assa kide, minna agu kadalaadene nüüdü taalo kama tüünü tumma no ka uuru ma Sa'bidi?"

<sup>25</sup> Yungno a Yasu ka tapadaga tumma eene iki, "Taalo aaga ka kiiri tumma na Dawud ka iire katümmü i'i nja kadu tanno iini?<sup>26</sup> I'i inynyo la ma Masala ka ürüünü tiya Abiyatra uugaara ma ka'boge, a'duga kuri ya amananja ka linggo ma Masala ku'bu, adaguri inya a kadu tanno iini a'da ömö'dü ma tagu kuri ya miini ya taalo, illi ka'boge ungodho eege."

<sup>27</sup> A Yasu tüü ka tiki eene, "Uuru ma Sa'bidi agalinggo nja a kadu, taalo Masala madina ada kadu ka uuru ma Sa'bidi.<sup>28</sup> A 'Bii'bala ma Tadü'dü i'i ya Uugaara ma Sa'bidi afe'de."

**3**

*Toolonadene ka uuru ma Sa'bidi  
(Matta 12.9–14; Lüüka 6.6–11)*

<sup>1</sup> A Yasu tapadaga co la ma talaana, aduna ömö'dü kide eyi ka niisö. <sup>2</sup> A kadu könö tadinaana i'i ko'do miini ka tanangnga i'i ka a'diila ka niisö ka uuru ma Sa'bidi, amang kene tümmü i'i. <sup>3</sup> İkiri ka tiki ömö'dü tiya eyi ka niisö ya, "Fiki'dö ka kadu kidha."

<sup>4</sup> İkiri ka tiki a kadu tanno emmi no, "Ata'diila aja kadalingga niimö ya a'diila ya ka uuru ma Sa'bidi? Nalinggo niimö ya a'diila ya alla niimö ya toroko ya, noolona ömö'dü alla niidi i'i?" Kaki'döönö.

<sup>5</sup> İkiri Yasu ka tassa kene ko'do, agoroo'bo ümmü eedi kini kiji nanggeedi neene ka takidhö, ikiri ka tiki ömö'dü, "Kilinana niisö." İkiri ka tapadaga co ööye miini ka'diila afa tööje. <sup>6</sup> Kikiri naFariisi ka öö'dö kürö nja kadu tanno Hirüdüs kimi'di tumma ma tiidi Yasu.

*Kadu kadhabbu kata'da ka Yasu keere*

<sup>7</sup> Yasu unggeene aco to nja kadalaadene tanno iini, a kadu ma Yahüüdiya tata'da kini keere kadhabbu. <sup>8</sup> Anno tö'dö ndama Yahüüdiya nja Örsaliim nja Adümiya nja kadu tanno afaga co 'dakeyi ma Ürdün no, nja kadu ma Suur nja Saiyda. Eege no nye'd'de kungngo kaföönyö tumma ma eema tiya iini ka tagalinggo ya

kikiri köö'dö. <sup>9</sup> İkiri ka tiki a kadalaadene tanno iini a'da kindinaana 'bamürkabü kini ku'bu, kudumma kadu ka tadigi kini ka oona. <sup>10</sup> Kudumma iini ka toolona kadu kadhabbu, idhi a kadu na maara no tagürünüğü kadu keere ma tawwa nafiinii ma taa'ba i'i ka oona. <sup>11</sup> Ka nagoronggore tanno oroko no kadasala i'i ya, ka'dingga kini kidha kiidhe, "O'o na 'Bii'bala ma Masala." <sup>12</sup> Lakiini i'i ageema nja eene dhorro a'da kafa teema tumma no iini.

*Tessedene na kadafiinii no ada'baaga kafünü eera no  
(Matta 10.1–4; Lüüka 6.12–16)*

<sup>13</sup> A Yasu tasirigö co 'dikinya, adagümmünü kadu niini ka asaasa eege no. Kikiri ka öö'dö kini. <sup>14</sup> Agesse kadafiinii ana kene kada'baaga kafünü eera ma tunggeene nja iini agürünü eege ka talaana kadu, <sup>15</sup> anangnga türü eene meene ka tasoro nagoronggore na oroko no ka kadu ka oona.

<sup>16</sup> Kadu na ada'baaga kafünü eera no niini ka tagümmünü eege no, Samaan (anangnga eere a Samaan a'da Bütrüs), <sup>17</sup> Yaguub 'bii'bala ya Za'bedi, nja örre tiya iini Yühanna anangnga eere eene a'da Bwanerjis (Laala ma tombo'do tanno abaana no), <sup>18</sup> nja Andraws nja Filibüs nja Bartülmaws, nja Matta nja Tööma, nja Yaguub 'bii'bala ya Halfa, nja Tatawus nja Samaan

ya tatagu'daana ka eedi ya.  
<sup>19</sup> Nja Yahüusa Askaryüütü  
 ya agümmünü Yasu a kadu  
 ya.

*Yasu nja Balsabül*  
*(Matta 12.22-32; Lüüka 11.14-23; 12.10)*

<sup>20</sup> A Yasu tö'dö ka 'dii, a  
 kadu tafada ka tagawagaana  
 oona dhabbu, a Yasu nja  
 kadalaadene tanno iini taalo  
 kaduna fiinii ma tagu eema.  
<sup>21</sup> İkiri kadu niini ka föönyö  
 köö'dö ta'duga i'i kudumma  
 a kadu töccö kadeema a'da,  
 "I'i taalo a'diila ka üüdü."

<sup>22</sup> Illi katalaana ma seriye  
 na öö'dö ku'bu ndama  
 Örsaliim no kiki a'da,  
 "Balsabül ungngo iini ka  
 oona uugaara ma naEbliisi  
 i'i yungngo iini ka tasoro  
 naEbliisi ka kadu ka oona  
 iini."

<sup>23</sup> İkiri Yasu ka tagümmünü  
 eege adünügü a tafeene  
 ma tumma eene iki, "Ara  
 Ebliisi tasoro Ebliisi nya?  
<sup>24</sup> Üürü tauugaara ka  
 tasümününjaana ku'bu  
 keera, taalo ka tana türlü  
 afe'de. <sup>25</sup> Üürü 'dii ka  
 tasümününjaana ku'bu  
 taalo a ta'dingnge ana türlü.  
<sup>26</sup> Üürü Ebliisi ka tüünü  
 tatoroko ana eyi tiya iini  
 unggodho i'i, taalo atefe  
 ka 'dii ara taama. <sup>27</sup> Taalo  
 ömö'dii aco a 'bügööri tiya  
 ömö'dii tiya ana türlü ya  
 anyooro eema yiini, illi kini  
 kimi'dina ömö'dii ya ana  
 türlü ya ku'bu tikinggi assa  
 ka tanyooro 'dii yiini.

<sup>28</sup> "Ara a'a tadirina tumma  
 aaga dhorro, kadu na linggo  
 eema ya toroko ya, keela

Masala ara Masala ta'duga  
 tumma na miini no kene  
 ka oona. <sup>29</sup> Illi ömö'dii  
 ya eela Koronggore ya In-  
 sili ya, taalo Masala ma  
 tagala tatoroko kini ka oona  
 ta'billi, ara tüütü kini ka oona  
 ta'billi." <sup>30</sup> I'i iki nggeege  
 kudumma eene katiki a'da  
 "Koronggore ya toroko ya  
 ungngo iini ka oona."

*Nüümö ma Yasu nja*  
*nagöre tanno iini*  
*(Matta 12.46-50; Lüüka 8.19-21)*

<sup>31</sup> A nüümö miini tö'dö nja  
 nagöre tanno iini köödhü  
 kürö, kassa ka kürünü  
 kini a'da öö'dö tamma  
 eene. <sup>32</sup> A'da kadu kemmi  
 kadhabbu kikiri ka tiki iini,  
 "Nüümö müüdü nja nagöre  
 tanno üüdü kungngo kürö  
 kasaasa o'o."

<sup>33</sup> İkiri ka tiki eene,  
 "Mada yungngo a nüümö  
 tammo eede a kamada eege  
 kungngo ka nagöre tanno  
 eede?" <sup>34</sup> İkiri ka tassa ka  
 kadu tanno rügü kini ka  
 oona no iki, "Nüümö meede  
 oogo mungngo nja nagöre  
 tanno eede. <sup>35</sup> Kudumma  
 ömö'dii tiya linggo tumma  
 na Masala ya i'i ya örre tiya  
 eede nja iñye tammo eede  
 nja nüümö tammo eede."

## 4

*Tafeene ma tumma ma*  
*taleele*  
*(Matta 13.1-9; Lüüka 8.4-8)*

<sup>1</sup> A Yasu tagalaana kadu  
 ka tinggini ma to. A  
 kadu tarügü kini ka oona  
 kadhabbu 'do ikiri ka takaa

ka mürkabü ka to emmi kide a'da kadu nye'd'de kungngo kürö ka tinggini mo to. <sup>2</sup> Adagalaana egee ka eema dhabbu a tafeene ma tumma, ikirii ka tiki eene ka talaana tanno iini,

<sup>3</sup> "Aaga föönyö! Taleele inggide unggene aco a siga tadiniigü. <sup>4</sup> Kini ka tiniigü ya, a migile ökönö ta'dinggaö ka tinggini ma fiinü, uyi tö'dö eeraga. <sup>5</sup> A migile kömö tasuli ka 'dokon'da a kuraaga ka titaalo kadhabbu kide, mafü'döönö areere kudumma a kuraaga miini taalo kinyño aa'bu. <sup>6</sup> Aga ndanaaya ka öö'dö ko'do matinyogo, kudumma areere katitaalo kide marume. <sup>7</sup> A kömö ta'dinggaö ka immi ka teene, ikirii immi katasese mamir'di oogo mitaalo mana iiye. <sup>8</sup> A kömö ta'dinggaö ka tüm'bööri tanno a'dila no, mïkiri ka fü'döönö masere, möö'dö ana iiye kukumu ömö'di aco iisine, ammo tö'dö a kadu kiidoona, ammo tö'dö a kadu küidümmü."

<sup>9</sup> A Yasu tiki, "Ömö'di ya ana iisine ma taföönyö eema ya, fa kini aföönyö."

<sup>10</sup> A kini ka ndagedhe oona unggodho i'i ya, ikirii kadalaadene na ada'baaga kafünü eera no nja kadu tököönö kungngo iini kete kindini i'i ma tafeene ma tumma tanno kiki nya. <sup>11</sup> Ikirii ka tiki eene, "Nanangnga tauugaara ma Masala na tünggündü no

aaga, illi kadu na kürö no ka taföönyö eema nye'd'de a tafeene ma tumma.

<sup>12</sup> Salla 'ka adinö kide kassa taalo kijöögö  
salla kaföönyö kassa ka taalo kara tussu,  
amang kene taadha ka tatoroko a Masala toolona kene.'

*Tasaana tafeene ma tumma ma taleele*  
(Matta 13.18-23; Lüüka 8.11-15)

<sup>13</sup> Ikirii ka tiki a kadalaadene tanno iini, "Taalo aaga kussu tafeene ma tumma tanno? Aaga sa katussu tafeene ma tumma töccö nya? <sup>14</sup> A taleele tadinö tumma na Masala. <sup>15</sup> A kadu könö kafeene nja migile tammo a'dinggaö ka 'dakeyi ma fiinü mo, kaföönyö tumma na Masala ikirii Ebliisi ka tareere aco tamuru tumma neene ka nanggeedi no. <sup>16</sup> Kadu öccö kafeene nja migile tammo 'dinggaö ka kuraaga tanno ka 'dokon'da no, kaföönyö tumma na Masala karooro ka tamma kide a dhodho. <sup>17</sup> A tumma no taalo kinyño kene ka eedi kita asigüri kita, kitaalo kidhi oona ku'bu. Ikirii niimö ya toroko ya ka tö'dö kene ka eyi kaadha ka tumma ma ïnjiili areere. <sup>18</sup> A kadu könö kafeene nja migile tammo afiki'dö ka immi ka teene mo, kaföönyö tumma na Masala. <sup>19</sup> Lakiini tadinigöögö ma eema ma 'büdhülü nja tiisineene ma eema dhabbu nja tasaasa ma eema kafiri

kene ka nanggeedi kamir'di tumma na Masala kitaalo kö'dö keere a niämö. <sup>20</sup> A kadu öccö kafeene nja migile tammo fiki'dö ka tüm'böörï tanno a'diila no, kaföönyö tumma na Masala kamma kide köö'dö ana iïye kukumu ömö'di kaco iisine (30), ammo tö'dö ukumu kadu kiidoona (60), ammo tö'dö iini ukumu kadu ka iidümmü (100)."

*Lamba ka 'daasa  
(Lüüka 8.16-18)*

<sup>21</sup> İkiri Yasu ka tiki eene, "Ara ömö'di tö'dö a lamba ma tiji 'buugu iini aküdhü ka dhafala nja iini kanangnga ka tenggere ka tüm'bü? Taalo a ta'dala oogo ka 'daasa sa? <sup>22</sup> Niämö ya tadünggüdhü ya atabbü 'dala, a niämö ya ka kume ya a tadiridene. <sup>23</sup> Ömö'di ya ana iisine ma taföönyö eema ya fa kini aföönyö."

<sup>24</sup> A Yasu tiki eene, "Aaga adin'i ko'do ma eema tiya ada ka föönyö ya, almiti maada ka mana eema a kadu iini mo, ara eema tamananja aaga iini agusu könö ada kide afe'de. <sup>25</sup> Kudumma ömö'di tiya niämö ka tanna iini ya, könö tagusunja iini kide dhabbu, aya niämö ka titalo kini ya, ara ta'dugadene kini mündä ya niämö ka titalo kini ya."

*Tafeene ma tumma ma tööyö ma Siga*

<sup>26</sup> İkiri ka tiki afe'de, "Kafeene tauugaara na Masala nja ömö'di tiya adin'i migile ka tüm'böörï ya.

<sup>27</sup> Arigide ooso kungngo afiki'dö uuru kungngo, ara migile ka fü'döönö minggiridene a'da taalo ussu a'da ma inggiridene nya. <sup>28</sup> 'Büdhülü ka eyi tiya iini ünfü'dü ooyo ka dhidha, assa tunggu koforo kürö, a koforo saga ndö'dö a migile dhabbu. <sup>29</sup> Aga migile ka nda'diila ya, ikiri ömö'di ka 'duga kulu'ba miini, kudumma uuru ma taraana ka ndö'dö."

*Tafeene ma tumma ma iïye ma tanuure  
(Matta 13.31-32; Lüüka 13.18-19)*

<sup>30</sup> Iki afe'de, "Kafaanya tauugaara na Masala, alla ara angnga tiki a tafeene ma tumma nya kide? <sup>31</sup> Kafeene nja iïye ma tanuure no dhiidhi no yüdü ka täniigü ka 'büdhülü no <sup>32</sup> Kini ka tänidene asere adhonggoro ooyo ka siga a naseldhe tüffü, uyi tafü nafü kide kanna ka tallappa miini."

<sup>33</sup> A Yasu tageema a tafeene ma tumma kafeene, ma talaana kadu ka tumma ma İnjüili dhabbu amang kene tussu ka ümmöönö ka nanggeedi. <sup>34</sup> I'i taalo eema nja eene illi a tafeene ma tumma. Lakiini iini ka tagedhe oona nja kadalaadene tanno iini, alaala ege ka eema in'dilii.

*Yasu anangnga tanya ka töödhii  
(Matta 8.23-27; Lüüka 8.22-25)*

<sup>35</sup> Ka uuru tanno miini no siiya kungngo, iki a

kadalaadene tanno iini, "Aaga ö'dö angnga caago nda'da tinni." <sup>36</sup> Kikirii ka tunggeene kinyi kadu ku'bu kaka ka mürkabü tammo Yasu ka taganna kide mo, kungeene nja iini, a'da namürkabü könö kaganna kide kadhabbu. <sup>37</sup> A tanya tagiisö dhindho, a 'biidü tabbü mürkabü midhi makete kadigine. <sup>38</sup> A Yasu tarigide keere ma mürkabü akaraga üüdü ko'do a mahada, kikirii kadalaadene kiji i'i ka füngngö kiki iini, "Ka tatalaana, taalo o'o nanaana iïye miidü ka ta'duuru 'biidü?"

<sup>39</sup> Afiki'dö agirnaana ka tanya iki, "Öödhi! Kï'döönö!" A tanya töödhi a 'buugu ta mudhudhuli 'do.

<sup>40</sup> A Yasu tiki a kadalaadene tanno iini, "Minna agu aaga, aaga tari'ba? Küfürü tumma ma İnjilli co ada ka nanggeedi?"

<sup>41</sup> Lakiini euge kari'ba dhorro, keema unggodho euge kiki, "Mada i'i yungngo sii? Idhi atanya nja to taföönyö tumma niini!"

## 5

*Yasu oolona ömö'di ma nagana'bu*

(Matta 8.28-34; Lüüka 8.26-39)

<sup>1</sup> Kaala nda'da ma to ma Jaliil, ndama 'dakeyi ma Jarasiin. <sup>2</sup> Aga Yasu ka ta'barda ndama mürkabü ya, koreene nja ömö'di ö'dö ndama naala ma oofo ana koronggore tiya toroko ya. <sup>3</sup> Anna ka naala ma

oofo, ömö'di ma tambaanya timi'di i'i salsa ana jansiiri titaalo. <sup>4</sup> I'i agamin'dadene ka niisö nja awwa ana jansiiri, lakiini i'i a'buna jansiiri aparsaana ku'bu, a'buna ndaliili niini ka uune no. Taalo ömö'di ma tana türü ma timi'di i'i. <sup>5</sup> Anna ka naala ma oofo nja na'dikinya ooso kungngo nja uuru, iidhe aara oona niini a nügsi.

<sup>6</sup> Kini ka taasala Yasu ka tadhe ku'b'ba kannya ya, areere aco üürü ku'bu ana küüge kini kidha. <sup>7</sup> Idhe ko'd'o eema iki, "Minna yüüdü nja a'a Yasu 'Bii'bala ma Masala tammo ko'do mo? A'a nagüdünü o'o ka Masala a'da nafa tapusu a'a." <sup>8</sup> Kudumma Yasu ka tiki iini, "Koronggore ya toroko ya, aayu kürö ka ömö'di tiya ka oona."

<sup>9</sup> İkiri Yasu ka tindini i'i, "Eere yüüdü a'da mada?"

Iki, "A'a nana eere a'da Nasigira, kudumma iidi kadadhabbu." <sup>10</sup> Adageema nja Yasu dhabbu asaasa i'i a'da afa tasoro ana euge co kürö ndama 'buugu tiya.

<sup>11</sup> A nagüdürü kungngo kadhabbu kaguri ka anya ka tüm'bü. <sup>12</sup> Kikirii nagoronggore na oroko no ka tiki iini, "Uurugu ungngo ka nagüdürü ungngo co ta'dingga kene ka oona." <sup>13</sup> İkiri ka tamma kene kide, ikiri nagoronggore na oroko no köö'dö kürö kuurunja ka nagüdürü ka oona na ö'dö na alif keera no. İkiri nagüdürü karünö

ndama nsorondho kafiri co  
to ka'duuru 'büüdi.

<sup>14</sup> A katasaana tarünö, a  
tumma tanyala ka anya nja  
na'buugu ka oona nye'd'de,  
a kadu tö'dö kürö ma co  
tassa ka niimö tiya agüünii  
adene ya. <sup>15</sup> Kene kaala  
'buugu ya Yasu ka tanna  
kide ya, kaduna ömö'dü ya  
agaana nagana'bu ka oona  
ka dhabbu ya, ka temmi  
ana en'di ka oona ka'diila  
ka üüdü, ari'ba tümmü eege.

<sup>16</sup> A kadu na tünö kini no  
tadirina eema ya kalinggo  
adene ya, ma nagana'bu nja  
nagüdürü.

<sup>17</sup> Kikirii ka teema nja Yasu  
kasaasa i'i ka tunggeene ka  
anya tammo eene.

<sup>18</sup> Kini ka ndaka ka  
mürkabü ma tunggeene ya,  
ömö'dü ya kaana nagana'bu  
ka oona ya, tiki iini a'da  
a'duga i'i nja iini. <sup>19</sup> A Yasu  
taalo amma ka tunggeene  
nja iini, lakiini i'i ya iki  
iini, "Pataga co 'dü tiya  
üüdü nja kadu tanno üüdü  
nadirina eema ya Uugaara  
ka tagalinggo ana o'o ya co  
eene, Uugaara ana 'bangnga  
ma o'o nya."

<sup>20</sup> Ömö'dü tikirii ka  
tunggeene adagööleele  
ka Naanya tanno ö'dö  
kada'baaga no adünnü eema  
ya Yasu ka tagüünii ana i'i  
dhabbu, a kadu tadhere  
nye'd'de kungngo.

*'Badaada ma eyi mo nja  
aka tammo maara mo  
(Matta 9.18-26; Lüüka  
8.40-56)*

<sup>21</sup> Ka Yasu ka tada'da  
mürkabü afe'de ata'daga

co nda'da ma to tököönö,  
a kadu tarügü kini ka  
oona ka tinggini ma to  
kadhabbu. <sup>22</sup> Ömö'dü inggide  
ö'dö, a uugaara ma la  
ma talaana ana eere a'da  
Yayiros. Kini ka taasala Yasu  
ya üürü ku'bu ana küüge.  
<sup>23</sup> Adageema tumma nja iini  
dhabbu iki iini, "Badaada  
meede madhilli mo ma  
maara manda kete ka teyi!  
Ma aayu nanangnga iisine  
nüüdü kono ka oona amang  
kono toolonadene ma efe ka  
'dü." <sup>24</sup> İkiri ka tunggeene  
nja iini a kadu tuurna i'i  
keere kadhabbu kiti ajeene.

<sup>25</sup> Aka minggide eriidö  
ka tüüsö kono mandagu'du  
nagürüünü kada'baaga  
kafünü eera. <sup>26</sup> A nagadektöörö  
kadhabbu kamana dawwa oono, madhifi eema  
yoono ka 'dü nye'd'de  
massa ka tüü kungngo  
taalo ma'diila, magala ka  
takogoona ma tasigi co.  
<sup>27</sup> Kono ka taföönyö tumma  
na Yasu ya maco ka kadu  
ka teene maa'ba ten'di ka  
Yasu ka oona ndama eere.  
<sup>28</sup> Kudumma oono ka tiki ka  
eyi tiya oono a'da, "Kede ka  
taa'ba ten'di miini ka oona  
ara a'a toolonadene."

<sup>29</sup> Eriidö tarooro karumeene,  
mussu a tuu'da tanno oono  
a'da moolonadene ka eriidö.  
<sup>30</sup> A Yasu tarooro ka tussu  
a'da türü kö'dö kürö kini ka  
oona, afele ka kadu ka teene  
iki a'da, "Mada i'i yungno  
ümmü ten'di meede?"

<sup>31</sup> A kadalaadene niini tiki  
iini, "Nussu o'o a'da kitaana  
kadu o'o ka oona, na o'o saga  
tindineene niki a'da, 'Mada  
ümmü ten'di meede?'"

<sup>32</sup> Lakiini i'i afele keere iiri ömö'di ya kalinggo tumma no ya. <sup>33</sup> Ari'ba tümmü aka ma'deedene ka oona kudumma oono ka tussu niämö ya agalinggo adene ana oogo ya, möö'dö müürü kini kidha madirina eema ma timin'da iini nye'd'de. <sup>34</sup> A Yasu tiki oono, "Badaada eede, tamma nüüdü ka Masala no ka oolona o'o, unggeene a ta'diila, eema ya agu o'o ya taalo a tagu o'o afe'de."

<sup>35</sup> Ka Yasu kadeema kungngo ya a'da kö'dö kadu ndama 'dii tiya uugaara ma la ma talaana ana eere a'da Yayörös kiki, "Meyi 'badaada müüdü fa ta'digi'di tatalaana ka oona."

<sup>36</sup> A Yasu tanangnga iïye a tumma tanno eene iki uugaara ma la ma talaana, "Fa tari'ba amma ka Masala."

<sup>37</sup> Taalo asaasa ömö'di ka tunggeene nja iini illi Bütrüs nja Yaguub nja Yühanna ya örre tiya Yaguub ya. <sup>38</sup> Kene ka ndala 'dii ya uugaara ma la ma talaana ya, a Yasu tasala kadu kiidhe kabbü tageere kafara. <sup>39</sup> İkiri ka co iki eene, "Minna agu aaga, aaga tafara aaga ti-idhe? Taalo 'badaada meyi oogo marigide!" <sup>40</sup> Kikiri ka takiji i'i. İkiri ka tuurugu eege kürö in'dili kungngo, ara kico ka 'badaada ka la nja pupa tiya oono nja niämö nja kadalaadene tanno kaneene nja iini no.

<sup>41</sup> Ümmü oogo ka niisö iki oono, "Talisa kom!" I'i ya tiki a'da, "Badaada ma idhilli mo a'a niki o'o nafiki'dö!"

<sup>42</sup> Mikiri ka arooro ka fiki'dö ma unggunaana ku'bu, nagürüünü noono kö'dö kada'baaga kafünü eera a kadu tarooro katadhere 'do. <sup>43</sup> A Yasu tageema nja eene dhabbu a'da kafa teema tumma ma eema tiya a küünidene ya, anangnga kadu kanangnga eema oono ma kuri.

## 6

*Kadu ma Nasira kanu ka Yasu  
(Matta 13.53-58; Lüüka 4.16-30)*

<sup>1</sup> İkiri Yasu ka ö'dö kürö ndama kanna aco anya tammo iini a kadalaadene niini turña i'i keere. <sup>2</sup> Aco la ma talaana ka uuru ma Sa'bidi alaana kadu, a kadu tadhere kadhabbu kene ka tatoodo kini kiki, "Aluna tumma no kiga? Atindiri eema tanno ananja iini a türü tanno iini ka talinggo keefe no? <sup>3</sup> Ka'da 'bii'bala ya Mariyom ya asa kee'di ya i'i ya miini? Taalo örre ya Yaguub nja Yüüsü nja Yahüusa nja Samaan sa? Ka'da naginye niini kungngo aja kita?" Kassa ka midhi i'i.

<sup>4</sup> İkiri Yasu ka tiki eene, "Taalo kadu kanu ka ne'bi illi kadu ma anya tammo iini, nja siliga tiya iini nja kadu ma öö'dii tiya iini."

<sup>5</sup> A Yasu taalo ambaanya talinggo eema ma türü kanna, illi kadu na maara no kidhilli iini ka tümmünü iisine kene ka nanggüüdü ka'diila. <sup>6</sup> A Yasu tadhere a kadu ka titalo kümmü Masala ana eedi. İkiri

ka tunggeene ka na'buugu  
alaana kadu.

*Yasu agürünü kadalaadene  
niini*

(Matta 10.1, 5–15; Lüüka  
9.1–6)

7 İkiri ka adagümmünü  
kadalaadene nö'dö kada'baaga  
kafünü eera no, agürünü  
eege kerra kerra a'da kaco  
talaana kadu, anangnga türü  
eene ma tasoro nagorong-  
gore na oroko no.

8 Iki eene, "Aaga fa tagufu  
nuumö ma nafiinii 'do, illi  
kuufi, aaga fa ta'duga kuri  
nja njoko, aaga tafa tümmü  
gürüsü ka nagjeebe. 9 Aaga  
tagirnii egüide kada kuune,  
aaga tafa tagirnii en'di kada  
ka oona eera." 10 İkiri ka  
tiki eene, "Dü yaada kajo ya  
aaga tanna kide illi ka uuru  
maada ka tunggeene ka anya  
tammo iini mo. 11 Kita ada  
kara co kita, a kadu miini  
taalo kamma kada, kitaalo  
kaföönyö tumma naada,  
aaga inyi eege ku'bu aaga  
tafidhi ndhunggürü kada  
kuune amang kene tussu  
iini."

12 Köleele kadünügü  
tumma a kadu a'da kaadha  
ka linggo ma eema tiya  
toroko ya. 13 Kasoro  
nagana'bu ka kadu ka oona,  
kamana uu'ba ka kadu  
tanno maara no kadhabbu  
koolonadene.

*Inde na Yühanna ya  
Tatambeese ya*

(Matta 14.1–12; Lüüka  
9.7–9)

14 Uugaara Hirüdüs  
taföönyö tumma ma Yasu  
kudumma eere tiya iini ka

tüdhindhi. A kadu öccö  
tiki a'da, "Afiki'dö Yühanna  
ka inde, i'i yungno iini ka  
talinggo eema ma türü."

15 A kadu öccö tiki, "İliya  
i'i ya miini." Anno tiki,  
"Ne'bi könö ana ka na-  
gane'bi ma 'billi."

16 Ka Hirüdüs ka taföönyö  
ya iki a'da, "Yühanna yeede  
ka armuna i'i ka üüdü ya  
i'i yungno, afiki'dö ka  
inde!" 17 Kudumma Hirüdüs  
ka tanangnga kadu ka  
tümmü Yühanna kadimi'di  
i'i anangnga i'i ka pabuusu,  
kudumma Herüdiya aka  
ma örre tiya iini Filibüs  
miini ka tarna oogo mo.  
18 Kudumma Yühanna ka  
tageema nja Hirüdüs iki iini,  
"Taalo a'diila nggeege küdü  
ka 'duga aka ma örre tiya  
üüdü."

19 Kudumma Herüdiya  
tagoroo'bo nja iini, masaasa  
tiidi i'i masa ka titaalo  
maduna fiinii miini.

20 Kudumma Hirüdüs aga  
ari'ba a Yühanna afa kini,  
ussu a'da i'i ya ömö'dü a'diila  
insili. Ka Hirüdüs ka tatoodo  
ka Yühanna ya, adhere 'do,  
lakiini asaasa tatoodo kini.

21 Keere kungno ya,  
uuru ma taanyara ma  
tageenedene tanno Hirüdüs  
ka ndö'dö. İkiri Hirüdüs  
ka tagümmünü kadu niini  
na iifi no, na linggo nja  
iini no, nja naguugaara ma  
nasigira nja naguugaara  
ma naanya ma Jaliil ka  
taanyara. 22 Mikiri 'badaada  
ma Herüdiya kico ma tasiili,  
oona ta'diila ka Hirüdüs  
nja kafala tanno iini ka  
tagümmünü eege no, ikiri

Uugaara Hirüdüs ka tiki a 'badaada, "Arangnga nüümö yüdü ka asaasa ya, ara a'a tanangnga o'o." <sup>23</sup> Eema tumma nja oono dhorro aküdöönö iki oono, "Ara a'a tanangnga nüümö yüdü ka asaasa ya o'o, üürü 'dakeyi ma tauugaara tanno eede."

<sup>24</sup> A 'badaada tükiri ka afiri co kürö ma teefe tindini nüümö moono, "Ara a'a tasaasa minna?"

A nüümö moono tiki oono, "Üdü ma Yühanna tiya Tatambeese ya!"

<sup>25</sup> Mükiri ka tareere maco ka uugaara miki iini, "Nasaasa o'o nanangnga üdü ma Yühanna tiya Tatambeese ya a'a, ka dho 'bitingngö."

<sup>26</sup> Oona tangooro ka uu-gaara 'do, illi i'i taalo asaasa ta'dükü oono, kudumma iini ka taküdöönö dhorro kidha ka kafala tanno iini ka tagümmünü eege no, illi i'i taalo asaasa ta'dükü oono. <sup>27</sup> İkiri ka tareere agürünü tasigira iki iini a'da aco ö'dö ana üdü tiya Yühanna. İkiri ka co ka pabuusu ka teene armuna i'i ka üdü, <sup>28</sup> öö'dö iini ka dho. Anangnga a 'badaada mateefe tunggu co nüümö tammo oono, <sup>29</sup> A tumma tala kadalaadene na Yühanna, kikiri ka öö'dö ka'duga oofo yiini kateefe tatü'böönö ka la ma oofo.

*Yasu amana kuri a kadu kö'dö na alif ka üdümmü*  
(Matta 14.13-21; Lüüka 9.10-17; Yühanna 6.1-14)

<sup>30</sup> A kadafüni na Yasu tarügü kini ka oona,

kadirina eema yeene ka tagalinggo nja talaana. <sup>31</sup> A kadu takunggunaana ku'bu kaleele kene ka oona kitaalo kaduna fiini meene kagu eema, ikiri Yasu ka tiki eene, "Aaga ö'dö unggodho aaga ka 'buugu tiya mudhudhuli ya aaga tagönü idhilli." <sup>32</sup> Kunggeene a mürkabü unggodho eege kaco 'buugu tiya kadu katitaalo kide ya. <sup>33</sup> A kadu tasala eege katunggeene, a kadu könö kadhabbu kussu kita eene ka tunggunu co, kunggeene ndama naanya tanno eene ana uune kadhe eene kaco kita eene kara co ya. <sup>34</sup> Aga Yasu ka öö'dö kürö ndama mürkabü ya, asala kadu kadhabbu a muuyu meene tagu i'i, kudumma eene kafeene afa kidheefele na tadasaana katitaalo kene no, ikiri ka talaana eege ka eema dhabbu. <sup>35</sup> A 'buugu tefe co a kadalaadene tiki, "Asa 'buugu tefe co, a 'buugu ya a'döngngönyö taalo nüümö kide. <sup>36</sup> Iki a kadu kunggeene kaco nasigeene tanno kete no nja nadaara kaco tana eema kide kaguri."

<sup>37</sup> A Yasu tiki eene, "Aaga inya eema eene kaguri." Kikiri ka tiki iini, "Nasaasa o'o ungngo a'da ungngo co tana eema ma taguri ana nakajine kukumu kadu kada'baaga (200), ungngo tanangnga eene kaguri?"

<sup>38</sup> İkiri Yasu ka tiki, "Miteene mungno ada maanya? Agolo tiiröönö." Kene kandussu a'da maanya

miteene, kiki iini, "Miteene miidümmü a kılöögö keera."

<sup>39</sup> İkiri ka anangnga eege kamana kadu katemmi ka'dügüllü ka ooyo tiya kirikiri ya. <sup>40</sup> Kikiri ka temmi ka'dügüllü kukumu kadu ka iidümmü (100), anno ukumu kadu keera kaco iisine (50). <sup>41</sup> İkiri Yasu ka 'duga miteene miidümmü mo nja kılöögö tanno eera no assala co 'dotombo'do anangnga ta'diila a Masala, a'düsünaana miteene ku'bu. Anangnga a kadalaadene tanno iini kasümünaana ka kadu ku'bu kasümünaana kılöögö na eera no kene ku'bu nye'd'de kungngo.

<sup>42</sup> Kadaguri eege in'dili kungngo küüsü. <sup>43</sup> A kadalaadene tareena türeene ma miteene koona nja türeene ma kılöögö tanno eera no, kadigi nasınggili kada'baaga kafünü eera. <sup>44</sup> A kadu na nagiide no na agu kuri no, kö'dö na alif kiidümmü.

*Yasu unggeene ka 'büdü*

(Matta 14.22-23; Yühanna 6.15-21)

<sup>45</sup> İkiri Yasu ka rooro ka tiki a kadalaadene tanno iini a'da kaka ka mürkabü kunggunu kini kidha kaco Beet Sayida ka nda'da ma to ara ka tuuru kadu ka tino. <sup>46</sup> Kini ka tuuru eege ka tino ya, ikiri ka sörö anya aaco tafara ka Masala. <sup>47</sup> Maganna mürkabü ka to ka söödö siiya kungngo a'da Yasu unggoko ka nda'da ma to unggodho i'i. <sup>48</sup> A Yasu tiji kadalaadene niini kad Hügürü kagürünü

mürkabü ko'do a tanya ka talinggo eege, ikiri ka tadhe kene ka oona a na'bu ma taka unggene ana uune ka to, anda kete kene. <sup>49</sup> Kene kiji i'i ka tunggeene ka to kiki kide a'da na'bu ya miini kiidhe ko'd'o, <sup>50</sup> kudumma eene ka tasala i'i ari'ba tümmü eege. İkiri ka tareere iki eene, "Aaga idhi oona ku'bu, aaga fa tari'ba! A'a na miini." <sup>51</sup> İkiri ka sörö aco kene ka mürkabü, ikiri tanya ka töödhü, kadhere 'do. <sup>52</sup> Kuri ma miteene nja kılöögö, taalo inynyo eene ka nanggüdü, kudumma eene taalo kussu eema, epe kö'dö eene ka oona.

*Yasu oolona kadu ka maara kadhabbu*  
(Matta 14.34-36)

<sup>53</sup> Kada'da to kaco nda'da ma Genisaret kimi'dina mürkabü meene kide. <sup>54</sup> Kene ka nda'barda ndama mürkabü ya, a kadu tarooro ka tessu Yasu. <sup>55</sup> Kada kunggeene ka na'buugu nye'd'de kama kadu na maara no ka akede kuurna i'i keere ka 'buugu tiya eene ka föönyö a'da inggide ya. <sup>56</sup> 'Buugu yiini kara co ya a kadu tuurna i'i keere ka nadaara nja nasigeene nja naanya 'do, kamana kadu na maara no ka namansala. Kiki iini a'da kara tafa kene a'da kümmü tinggini ma ten'di tammo miini, a kadu na ümmü i'i ka oona no nye'd'de ta'diila.

<sup>1</sup> A naFariisi nja katalaana ma seriye na ö'dö ndama Örsaliim no, karügü ka Yasu ka oona. <sup>2</sup> Kikiri ka tasala kadalaadene niini könö kagu eema ana iisine kada "nyoro," a'da taalo ka tanggala. <sup>3</sup> (Kudumma naFariisi nja Yahüdü 'do, kümmü eema ya kadaada meene ya ma 'billi ya, taalo ka tagu eema illi kagala iisine neene ta'diila. <sup>4</sup> A kene ka tafada ndama mansala ya, taalo ka taguri illi kene ka tagala. Eema ma kadaada inggide adhabbu eene ka talinggo iini, afa tagonaana ma naadho nja nasoro nja eema ma tanyaanya.)

<sup>5</sup> İkiri naFariisi nja katalaana ma seriye kadin-dini Yasu, "Minna agu kadalaadene nüüdü taalo kümmü tumma na kadaada ma angnga no ma 'billi no kara kagu eema ana iisine kada nyoro?"

<sup>6</sup> İkiri ka tiki eene, "Aaga na 'dinigi oona coo'do no. Tumma na ne'bi Asaiya ka takeema no kö'dö timin'da, 'Kadu na kindhiigii a'a ko'do ana nüünö, lakiini nanggeedi neene kagu'b'ba kede.

<sup>7</sup> Kümmü tumma ma a'a a korokoro, lakiini talaana neene köö'dö iini no na kadu."

<sup>8</sup> Taalo aaga kümmü tumma ma Masala dhorro, ara aaga katümmü talaana ma tadü'd'dü."

<sup>9</sup> İkiri ka tiki eene, "Kümmü aaga fiinii ya a'diila ya maada kanu ka tumma tanno Masala ara aaga katümmü fiinii yaada ya ma 'billi ya. <sup>10</sup> Iki Müüsa a'da, 'Aföönyö tumma na pupa tiya üüdü nja nüümö tammo üüdü,' ana 'Ömö'di ya eela pupa yiini nja nüümö tammo iini ya, a tiididene.' <sup>11</sup> Kudumma ada ka tiki a'da, üürü ömö'di ya ana eema amana a pupa tiya iini nja nüümö tammo iini, assa ka tiki eene a'da türri eege kamiini, nja eede ka tagalinggo ada Masala. <sup>12</sup> Aaga fa tafa kini amana eema a pupa tiya iini nja nüümö tammo iini. <sup>13</sup> Aaga tagere tumma na Masala, a tumma tanno ada aaga takarna kide ana eema könö adhabbu ada kadalinggo."

*Eema ya amana ömö'di ka tanyoro ya*  
(Matta 15.10-20)

<sup>14</sup> İkiri Yasu ka tagümmünü kadu nye'd'de iki eene, "Aaga toodo kede aaga nye'd'de aaga taföönyö.

<sup>15</sup> Taalo nüümö ya ömö'di ka tunggu kini ka eedi ndama kürö ata 'nyoro' i'i, lakiini nüümö ya tö'dö kürö ndama ömö'di ka eedi ya i'i yungngo 'a tanyoro' i'i.  
<sup>16</sup> [Ömö'di ya ana iisine ma taföönyö eema ya atoodo kide!]"

<sup>17</sup> Kini ka tinyi kadu ku'bu ara kico 'dii, a kadalaadene

niini tindini i'i ma tafeene ma tumma tanno kiki nya.  
<sup>18</sup> İkiri ka tiki eene, "Aaga taalo kussu tumma no afe'de, taalo aaga kussu a'da niimö ya ömö'di ka tunggu kini ka eedi ndama kürö ya taalo a tanangnga i'i ka tanyoro? <sup>19</sup> Kudumma iini taalo inynyo kini ka eedi, lakiini i'i inynyo kini ka eedi, öö'dö kürö ndama tuu'da tanno iini." (Ka tumma tanno, a Yasu tiki a'da, kuri nye'd'de insili.)

<sup>20</sup> Afada iki eene, "Niimö ya tö'dö kürö ndama ömö'di ka eedi ya, i'i yungngo a tanangnga i'i ka tanyoro.  
<sup>21</sup> Tumma na toroko no kicci kürö ndama kadu ka nanggeedi ka teene, taga'da 'buugu, füngngö nja iiya a nyooro, nyooro, tagirina kadu, temelö, <sup>22</sup> tallogo, taga'da 'buugu, nja korokoro nja tar'daana eema nja kürimi nja ker'de ker'de nja tan'dinigi oona coo'do nja taa'baga. <sup>23</sup> Eema ya toroko ya nye'd'de ya icci akürö ndama ömö'di ka eedi i'i yungngo amana i'i ka 'tanyoro.'

### Tamma na aka ma Kanaan

(Matta 15.21-28)

<sup>24</sup> A Yasu tunggeene ndama kanna aco a riifö ma Suur ya, aco a 'bügöörö, kudumma iini taalo asaasa kadu ka pussu tumma iini kide, a taküdhü niini tiideene küdhü kö'dö. <sup>25</sup> Aka minggide eema ma 'buugu ka tuurunja ka 'badaada tammo oono ka oona, kono ka taföönyö a'da

Yasu ungnego kanna mikiiri ka tareere maco müürü kini kidha ana küüge.  
<sup>26</sup> Miki iini a'da aco tuurugu nagana'bu kürö ka 'badaada tammo oono ka oona, aka miini mo taalo madaga Yahüdü, ma taga Süüriya ma Finikiya. <sup>27</sup> A Yasu tiki oono, "Fa ka laala küüsü tikinggi, taalo ama ta'duga kuri ya laala nangnga a tiini."

<sup>28</sup> Aka tiki, "İi Uugaara, a tiini ka eyi tiya eene ya kera kuri ya susuli ka laala ka noodho ya."

<sup>29</sup> İkiri ka tiki oono, "Kolo kudumma tumma tanno üüdü ka tiraana no, kö'dö na'bu kürö ka 'badaada tammo üüdü ka oona."

<sup>30</sup> Aka tapadaga co 'dö tiya oono maco taluna 'badaada moono ka tenggere, a koronggore tiya toroko ya köö'dö kürö oono ka oona.

*Toolona möri nja ömö'di  
tiya taalo ussu ka teema ya*

<sup>31</sup> A Yasu tunggeene ka anya ma Suur, adigaala aco Saiyda apadaga co to ma Jaliil, akilaana ka Naanya tanno ö'dö kada'baaga no.

<sup>32</sup> A kadu könö tö'dö a möri iini taalo ussu ka teema, kadageema nja Yasu a'da anangnga niisö iini ka oona.

<sup>33</sup> A Yasu ta'duga i'i asigi co ku'b'ba iini ka kadu ka oona. Anangnga lakiisine iini ka ii sine a'binyyi alaaga ku'bu aa'ba i'i ka onggo'do. <sup>34</sup> Assa co 'dotombo'do, eela tanya iki ömö'di, "Afaata!" a'da, "Atanfa'da!" <sup>35</sup> A ii sine niini tarooro ka tatanfa'da,

onggo'do miini tatinggildhe,  
aana tumma ka'diila.

<sup>36</sup> A Yasu tageema nja  
eene a'da kafa tadirina a  
kadu 'do, eema nja eene  
illi eege kütü kadeema iini  
'do. <sup>37</sup> A kadu tadhere 'do  
kiki, "I'i agalinggo eema  
in'dili ka'diila anangnga  
nakinggaři kaföönyö eema  
a nagaaga teema."

## 8

*Yasu anangnga kuri a  
kadu na alif ka egüsö*

(Matta 15.32-39)

<sup>1</sup> A kadu könö tagawaana  
oona ka naguuru tanno  
miini no kadhabbu a  
niimö meene kaguri titaalo,  
ikiri Yasu ka tagümmünü  
kadalaadene niini iki eene,  
<sup>2</sup> "Magu muuyu ma kadu  
tanno a'a eene kataneene  
nja a'a a füngngö iidoona  
a'da taalo eema ma taguri  
kene. <sup>3</sup> Kede ka tuuru eege  
ka tino ana iire, kara tagi'di  
ka nafiiñi, kudumma kadu  
töccö kö'dö ndama 'buugu  
tiya ku'b'ba ya."

<sup>4</sup> Lakiini kadalaadene ni-  
ni tiki iini, "Ara angnga  
taluna kuri kiga ka dhüile  
kita, angnga tanangnga a  
kadu küüsü kide?"

<sup>5</sup> İkiri ka tindini eege,  
"Miteene mungngo ada  
maanya?" Kiki iini a'da,  
"Miidümmü mafünü eera."

<sup>6</sup> İkiri Yasu ka tiki  
a kadu a'da kemmi ka  
'büdhülü, ara ka'duga  
miteene müidümmü mafünü  
eera anangnga ta'diila a  
Masala, a'düsünaana ku'bu  
anangnga a kadalaadene

tanno iini a'da kinaana ka  
kadu ku'bu in'dili, kikiri  
ka tinaana kene ku'bu.  
<sup>7</sup> A likilöökö taganna a  
kadalaadene idhiidhi ikiri  
Yasu ka 'duga anangnga  
ta'diila a Masala, anangnga  
kadalaadene tanno iini  
kasümünaana ka kadu  
ku'bu afe'de. <sup>8</sup> A kadu  
taguri kidhi küüsü, kikiri  
kadalaadene ka teeragaana  
türeene ma miteene tammo  
öreene mo konna, möö'dö  
ana singgili ka iidümmü  
kafünü eera. <sup>9</sup> A kadu na  
nagiide na aguri no kö'dö na  
alif ka egüsö. İkiri Yasu ka  
tuuru eege ka tino, <sup>10</sup> aka ka  
mürkabü nja kadalaadene  
tanno iini ka öö'dö ka riifö  
ma Dalmanusa.

<sup>11</sup> A naFariisi tö'dö ka Yasu  
kindini i'i ka'b'ba i'i ka eedi  
a'da aala türü na Masala  
eene ndama 'dotombo'do.

<sup>12</sup> İkiri eedi köö'dö kini  
ko'do iki, "Minna agu sere  
ma 'bitingngö ka asaasa  
kala nja türü tanno Masala?  
Ara a'a tadirina tumma  
aaga dhorro, taalo türü na  
Masala ka talanja a sere  
ma 'bitingngö." <sup>13</sup> Inyi  
eege ku'bu ara ka tafada a  
mürkabü aco nda'da tanno  
afaga co kanna no.

*Tigüdi no naFariisi nja  
Hirüdüs*

(Matta 16.5-12)

<sup>14</sup> A kadalaadene tüürü ma  
tagufu miteene ka fiini, a  
niimö ma taguri titaalo kene  
ka mürkabü illi tamiteene  
ka unggodho. <sup>15</sup> A Yasu  
tanangnga tumma eene  
dhorro iki, "Aaga ümmü  
nanggeyi naada ka tigüdi

ma naFariisi nja tammo Hirüdüs ka oona."

<sup>16</sup> Kikirii ka tindini ajeene kiki a'da, "Kudumma miteene ka titaaloo kaja."

<sup>17</sup> A Yasu tussu tumma neene kadeema kide no indini eege, "Minna agu aaga teema tumma ma miteene katitaalo kada? Kaleefe aaga aaga tüfürü tussu kitaalo kinynyo ada ka nanggüdü? Nanggeedi naada kakidhö?

<sup>18</sup> Taalo iifye kada ma tiji 'buugu iini, iisine titaaloo kada ma taföönyö eema iini? Taalo aaga kagiigii?

<sup>19</sup> Kede ka tasümünaana miteene ku'bu müdümmü a kadu tanno ö'dö na alif ka iidümmü no, nasinggili kö'dö kaanya ma türeene ma miteene?"

Kiki, "Kada'baaga kafünü eera."

<sup>20</sup> Iki, "Kede ka tasümünaana namiteene ku'bu ka iidümmü kafünü eera, ma kadu tanno ö'dö na alif ka egiisö no, ka'duga aaga nasinggili kadigine kaanya ma türeene miini?"

Kiki, "Küdümmü kafünü eera!"

<sup>21</sup> "Küfürü tumma no co ada ka nanggüdü ta'bütängngö?"

*Yasu afa'da soro ka iifye ka Beet Sayida*

<sup>22</sup> Kikirii ka öö'dö ka Beet Sayida, a kadu tö'dö a soro a Yasu, kiki iini a'da, ümmü i'i ka oona. <sup>23</sup> İkiri ka tümmü soro ka nüüsö üögü i'i kaco kürö ndama daara, a'binynyi alaaga iini ka iifye, ümmünü iisine iini ka oona

assa ka tindini i'i, "Niji o'o niimö?"

<sup>24</sup> İkiri ka tasalaana ku'bu iki, "Niji a'a kadu ka tunggeene afa ma naafa kungngo."

<sup>25</sup> A Yasu tanangnga ii-sine yiini ka ömö'di ka iifye afe'de. İkiri iifye niini ka tatanfa'da iji 'buugu ka'diila 'do. <sup>26</sup> İkiri Yasu ka tuuru i'i ka tino aco 'di tiya iini iki iini a'da, "Afa co daara."

*Bütrüs eema tumma ma Almasiihi*  
(Matta 16.13-20; Lüüka 9.18-21)

<sup>27</sup> A Yasu tunggeene nja kadalaadene niini kaaco anaanya ma Kaiysariya Filippi, kene ka ndala ka nafüni ya, ikiri ka tindini kadalaadene niini, "Kadu 'dee kiki a'da a'a na mada?"

<sup>28</sup> Kiki iini, "Kadu könö kiki a'da o'o na Yühanna ya Tatambeese ya, anno tiki a'da o'o na İliya, anno tüütü ka tiki a'da o'o na ne'bi öccö."

<sup>29</sup> Lakiini i'i indini eege, "Aaga ka eyi tiya ada kiki aaga a'da a'a na mada?"

A Bütrüs tiki, "O'o na Almasiihi!" <sup>30</sup> İkiri ka tiki eene a'da, kafa tadırina ömö'di töccö.

*Yasu ussu uuru ma inde tanno iini*  
(Matta 16.21-28; Lüüka 9.22-27)

<sup>31</sup> A Yasu talaana eege iki, "Bii'bala ma Tadü'd'dü ara tümmü adene abbü adene, a kadüfi tanu kini nja naguugaara ma ka'boge nja katalaana ma seriye, atiididene afiki'dö

ka inde a füngngö iidoona.”  
 32 Adagadünögү tumma no eene 'biini kungngo. İkiri Bütrüs ka 'duga i'i ooso iini agirnaana kini. 33 İkiri Yasu ka tassa keere asala kadalaadene niini, ikiri ka teela Bütrüs iki iini, “Sigi keere eede ka oona o'o na Ebliisi no! Kudumma tumma tanno üdü no, taalo tumma na Masala tumma ma tadü'dü eege kamiini.”

34 İkiri ka tagümmünü kadu nye'd'e kungngo nja kadalaadene tanno iini iki eene, “Üürü ömö'dü ya asaasa tö'dö kede keere ya, a'düsünü eyi yiini a'duga salii'bi yiini uurna a'a keere.

35 Kudumma ömö'dü tiya asaasa toolona eyi yiini ara taama eege, lakiini ömö'dü ya aama eyi yiini kudumma a'a ya nja talaana ma injili ya a toolona eege. 36 Ara ömö'dü tö'dö keere a minna kini kara tana eema ma 'büdhülü in'dili kungngo ara ka taama eyi yiini?

37 Ara ömö'dü tafa eyi tiya iini aminna? 38 Kudumma ömö'dü tiya ana modolo ma a'a nja tumma tanno eede ka sere ma 'bitingngö na temelö ka oroko no, ara 'Bii'bala ma Tadü'dü tana modolo miini kini kara tö'dö ka tiidhindhi tanno Pupa tiya iini nja kadhangga tanno insili no.”

## 9

<sup>1</sup> İkiri ka tiki eene, “Ara a'a tadirina tumma aaga dhorro, kadu könö kungngo aja kita 'bitingngö, taalo

kara tassa ka inde, illi kassa ka tauugaara ma Masala tanno atö'dö a türü no.”

*Ta'bele oona*  
*(Matta 17.1-13; Lüüka 9.28-36)*

<sup>2</sup> Ka füngngö ka ndiidümmü afünü unggodho ya ikiri Yasu ka 'duga Bütrüs nja Yaguub nja Yühanna, unggeene nja eene kasirö anya ma dhonggoro mo, kadaganna kide unggodho eege, a'bele oona kene kidha kungngo.  
<sup>3</sup> A en'di yiini talimaana insili kata'bassa, taalo nüümö ka 'büdhülü insili nggeege 'do. <sup>4</sup> İliya nja Müüsa tatele oona eene, keema nja Yasu.

<sup>5</sup> İkiri Bütrüs ka tiki a Yasu, “Ka Tatalaana, a'diila 'do aja ka tanna kita, angnga tabünnü angga ku'bu iidoona, müüdü ma unggodho ammo Müüsa ma unggodho ammo İliya ma unggodho.” <sup>6</sup> I'i taalo ussu nüümö miini ka teema ari'ba kagu i'i nja köje tanno aneene nja iini no.

<sup>7</sup> İkiri tülüügü ka öö'dö a tallappa miini takara ndanaaya eene ka oona, a tumma tö'dö ndama tülüügü kiki, “Bii'bala yeede ka asaasa i'i ana eedi ya i'i yungngo. Aaga aföönyö tumma niini.”

<sup>8</sup> Kara tasalaana ku'bu ya, taalo kasala ömö'dü nja eene illi Yasu unggodho i'i.

<sup>9</sup> Kene ka ta'bardaga ku'bu ndama 'dikinya ya, a Yasu tanangnga tumma eene a'da kafa tadirina eema yeene ka

tadinö kide ya a ömö'dü, illi ka 'Bii'bala ma Tadü'd'dü ka afiki'dö ka inde.

<sup>10</sup> Kikirii ka tümmü tumma niini kafa kide, illi eege kindini ajeene, tafiki'dö ka inde a'da minna i'i ya minni? <sup>11</sup> Kikirii ka tindini i'i, "Minna agu katalaana ma seriye kiki a'da İliya ara tö'dö ka dhidha?"

<sup>12</sup> İkiri Yasu ka tiki eene, "Timin'da İliya ara tö'dö ka dhidha indinaana eema ku'bu ïn'dili, assa öö'dö nya a tumma no ka kirinja ka sorne a'da 'Bii'bala ma Tadü'd'dü a tadhügürü, a kadu tüünö midhi ku'bu ana i'i? <sup>13</sup> Lakiini ara a'a tiki aaga, İliya ö'dö ka tagüünü eema nye'd'de ya tatoroko ya ana i'i, afa ma tiya a sorne kadiri tumma miini ya kungngo."

*Yasu oolona 'bii'bala ya ana koronggore ya toroko ya  
(Matta 17.14-20; Lüüka 9.37-43)*

<sup>14</sup> Kene ka ndapadaga ka kadalaadene tököönö ya, kasala kadu kadhabbu ka tarügü kene ka oona a katalaana ma seriye, ta'bununjaana ku'bu nja eene. <sup>15</sup> Amussu kungngo a kadu tasala Yasu kadhere nye'd'de kungngo kareere koreene kaco töjülü i'i. <sup>16</sup> İkiri ka tindini eege, "Niimö minna yungngo ada kadeema nja eene ungngo."

<sup>17</sup> Ömö'dü öccö ka kadu ka teene tiki, "Tatalaana, nö'dö a'a a 'bii'bala tiya eede o'o, kudumma koronggore tiya toroko ya ungngo iini ka

oona amana i'i ka titalo ussu ka teema.<sup>18</sup> Insigiri kümmü i'i üpü ndoore ka nüünö, abbünaana igini ka oona akidhö, niki a kadalaadene tanno üdü a'da kasoro koronggore kini ka oona kitaalo ki'disi kide."

<sup>19</sup> İkiri ka tiki eene, "Aaga na sere ma 'bitingngö no 'dee minna agu aaga taalo kümmü tumma na Masala ana eedi, ara a'a taneene nja aaga tagaada? Aaga ö'dö a 'bii'bala a'a." <sup>20</sup> Kikirii ka ö'dö ana i'i iini. A koronggore tiya toroko ya ka tassa kini ya, üpü i'i co asigiridene üpü ndoore ka nüünö.

<sup>21</sup> İkiri ka tindini pupa ma 'bii'bala, "Maara mümmü i'i aada?"

Iki, "Mümmü i'i miini ka ta kidhilli. <sup>22</sup> Koronggore ya üpübü i'i co turi kungngo ka issi nja 'biidü ma tasaasa tiidi i'i, üürü ara o'o tambaraanya linggo no, ana 'bangnga ma ungngo nakinyi ungngo."

<sup>23</sup> A Yasu tiki iini, "Üürü namma o'o dhorro ya, eema nye'd'de ara tananja ömö'dü tiya amma ya."

<sup>24</sup> A pupa ma 'bii'bala tarooro kalneuge, "Tamma na Masala kungngo eede ka eedi, akinyigi a'a amang kene tadhabbu."

<sup>25</sup> İkiri Yasu ka iji kadu katawaana oona agirnaana ka koronggore tiya toroko ya, "Koronggore ya möri ya a'a niki o'o a'da nöö'dö kürö ndama 'bii'bala ka oona, nafa tapadaga kini afe'de."

<sup>26</sup> İkiri koronggore ka tadhiya üpü i'i co dhindho

öö'dö kürö, a 'bii'bala tafeene afa ma teyi, a kadu 'do kiki kide a'da, "Eyi."  
<sup>27</sup> Lakiini Yasu ümmü i'i ka nüüsö a'dina i'i ko'do afiki'dö.

<sup>28</sup> İkiri ka co a 'bügööri, a kadalaadene tindini i'i ka unggondho, "Minna agu ungngo ungngo titaalo kam-banya toosoraana ma korrangore tiya toroko ya?"

<sup>29</sup> Iki eene, "Eema afa ma tiya taalo asorodene illi ada ka fara ka Masala."

*Yasu eema tumma ma inde tanno iini*  
*(Matta 17.22-23; Lüüka 9.43-45)*

<sup>30</sup> Köö'dö kürö ndama kanna kunggeene kadigaala ka Jaliil. A Yasu taalo asaasa ömö'di öccö ka tussu tumma miini,  
<sup>31</sup> kudumma iini ka tagalaana kadalaadene niini iki eene. "Ara 'Bii'bala ma Tadü'd'dü tümmününja a kadu, kiidi i'i, a kene ka tiidi i'i ya assa ka fiki'dö a fungngö iidoona."  
<sup>32</sup> Lakiini eege taalo kussu tumma no, kari'ba ka tindini i'i.

*Mada yungngo adhabbu?*  
*(Matta 18.1-5; Lüüka 9.46-48)*

<sup>33</sup> Kikiri ka co Kafarnahööm. Kene kico a 'bügööri ikiri ka tindini eege, "Minna i'i yungngo ada ka taga'bununjaana ku'bu miini ka fiinii sii?"

<sup>34</sup> Lakiini eege kakidöönö, kudumma eene ka taga'bununjaana ku'bu ka fiinii ma ömö'di tiya adhabbu ana kene ya.

<sup>35</sup> İkiri ka temmi adagümmünü kadalaadene

niini na ada'baaga kafünü eera no iki eene, "Üürü ömö'di ya asaasa tadhabbu ma kadu ya, apadaga oona keere alingga ada eene."

<sup>36</sup> A'duga 'bii'bala ya idhilli ya anangnga kene ka söödö iti kini ka orro iki eene,  
<sup>37</sup> "Ömö'di ya amma ka 'bii'bala tiya idhilli ya ana eere tiya eede i'i ya amma kede, ömö'di ya amma kede ya taalo amma kede lakiini amma ka ömö'di tiya agürünü a'a ya."

*Ömö'di ya taalo adiidi angnga ya i'i ömö'di tiya aja*

<sup>38</sup> İkiri Yühanna ka tiki iini, "Ka Tatalaana, kaduna ungngo ömö'di ka tasoro nagoronggore na oroko no ka kadu ka oona ana eere tiya üüdü ungngo tafaga i'i keere kudumma iini taalo nja angnga."

<sup>39</sup> İkiri Yasu ka tiki iini, "Aaga fa tafaga i'i keere, taalo ömö'di ya talinggo a türü ma eere tiya eede assa ka tafada eema tumma ma tatoroko no kede ka oona.  
<sup>40</sup> Ömö'di ya taalo adiidi ma angnga i'i nja angnga.  
<sup>41</sup> Ara a'a tadirina tumma aaga dhorro, ömö'di ya inynya 'biidii aaga ana eere tiya eede ya, kudumma ada kada tanno Almasiihi, ara talingnge niini taalo ka taama 'do."

*Nüümö ya anangnga angnga ka talinggo tatoroko ya*

*(Matta 18.6-9; Lüüka 17.1-2)*

<sup>42</sup> A Yasu tiki, “Ömö'di ya amana laala ya dhiidhi no ya amma kede ya kadüünii tatoroko ya, ara ta'diila ana i'i aja kara ta'duga nya ma tawöönö angnga tamin'dna kini ka eyi kapügü co to. <sup>43</sup> Üürü nüüsö nüüdü kalinggo eema ya toroko ya rumunuga eege co, a'diila nggeege küdü ka co ka tefe ka 'di a nüüsö ka unggodho, bala üdü ka co ka issi ma Jahanam tanno taalo ka tadhülünja ku'bu no, <sup>44</sup> ['a'dii'do miini taalo teyi issi miini taalo ka tadhülü ku'bu.] <sup>45</sup> Üürü awwa yüüdü ka tüpü o'o ka tatoroko ya rumuna i'i, a'diila üdü ka co ka tefe ka 'di ana awwa unggodho bala üdü kana uune keera nassa kico ka issi ma Jahanam, <sup>46</sup> ['a'dii'do miini taalo teyi issi miini taalo ka tadhülü ku'bu.] <sup>47</sup> Üürü ööye yüüdü ka tanangnga o'o ka talinggo niimö ya toroko ya, agodhe i'i nüpü co, a'diila üdü kara co ka tauugaara ma Masala ana ööye unggodho, bala üdü ka ana iiye keera nassa tapügünja ka issi ma Jahanam,

<sup>48</sup> 'a'dii'do miini taalo a teyi issi miini taalo ka tadhülü ku'bu.'

<sup>49</sup> Kadu 'do kara ta tangga'dala tatanja kene ka oona ana issi.

<sup>50</sup> Tangga'dala ka'diila, lakiini tanye'deny'e'de neene kara titaaloo 'dee ara aaga tanangnga eege ka

tanye'deny'e'de nya? Aaga feene nja tangga'dala, aaga tasaasa ajeene.”

## 10

### *Tarna nja Tadheene (Matta 19.1-12)*

<sup>1</sup> A Yasu tafikii'dö ndama kanna aco a naanya ma Yahüüdiya ndama nda'da ma Ürdün. A kadu tarügü kini ka oona kadhabbu, ada-galaana eege afa ma tiya iini 'bucca kungngo ya.

<sup>2</sup> A naFariisi könö tö'dö kini kete, kindini i'i ma tasaasa ta'b'ba i'i kiki, “Ömö'di ka tapa ka aka tammo iini 'dee a'diila?”

<sup>3</sup> İkiri ka tiki eene, “Iki Müüsa aaga nya?”

<sup>4</sup> Kiki a'da, “Müüsa iki a'da ömö'di tarigiri waraga ma tadheene anangnga oono uruu oogo ka tino.”

<sup>5</sup> İkiri Yasu ka tiki eene, “Kudumma takidhö ma nanggeedi tanno ada, ikiri Müüsa ka tarigiri ada tumma ma seriye no aaga.

<sup>6</sup> Lakiini jiddi ma Masala ka tarü'bü ömö'di ya miide ya nja aka tammo linyanya mo. <sup>7</sup> 'Nggeege ömö'di tikiri ka tinyi pupa yiini ku'bu nja niimö tammo iini ara ka tümmünaana oona nja aka tammo iini.

<sup>8</sup> Kümmünaana oona a tuu'da ta unggodho kene taalo keera, lakiini tuu'da ka unggodho.' <sup>9</sup> Niimö ya Masala ka tümmünaana i'i koona ya, taalo ömö'di ma tadhagaana ku'bu.”

<sup>10</sup> Kene kico a 'bügöörü afe'de ya, a kadalaadene niini tindini i'i ma tumma tanno. <sup>11</sup> İkiri ka tiki eene, "Ömö'dii ya apa ka aka tammo iini ara karna kömö ya, afüngnö nja oono kada temelö ün'dügüngnö. <sup>12</sup> Üürü aka ka tapa ka nyori tiya oono mara ka 'duga ömö'dii öccö ya, oogo mafüngnö nja nagiide ün'dügüngnö."

*Laala ya dhiidhi ya nja Yasu*

(Matta 19.13-15; Lüüka 18.15-17)

<sup>13</sup> A kadu tö'dö ana laala iini a'da ümmünü iisine eene ka oona, lakiini kadalaadene kagirnaana kene.

<sup>14</sup> Ka Yasu tiji tumma no, agoroo'bo iki eene, "Aaga fa ka laala öö'dö kede, aaga tafa tafaga eege keere kudumma tauugaara na Masala ka ma kadu afa laala ya. <sup>15</sup> Ara a'a tadirina tumma aaga dhorro, ömö'dii ya taalo amma ka tauugaara ma Masala afa laala ya dhiidhi ya taalo aco." <sup>16</sup> Ümmü eege ümmünü iisine eene ka oona, anangnga baraka eene.

*Ömö'dii ya ana almaala ya*  
(Matta 19.16-30; Lüüka 18.18-30)

<sup>17</sup> Ka Yasu ka tunggeene ka fiin'i ya, ömö'dii toreeene nja iini üürü kini kidha ana küüge indini i'i iki, "Ka Tatalaana ya a'diila ya, ara a'a tüüni minna amang

kede takarna ka tefe ka 'di ta'billi?"

<sup>18</sup> A Yasu tiki iini, "Minna agu o'o nümmünü a'a a'da a'a na'diila? Taalo ömö'dii ma ta'diila illi Masala unggodho oogo. <sup>19</sup> Nussu o'o tumma na Masala kiki a'da, 'Fa tagirina kadu, fa tafüngnö nja iiya tanno kadu, fa tanyooro, fa tafünü korokoro ka kadu ka oona, fa tüüni ada kadu ku'bu, ümmü pupa yüdü nja nüümö tammo üyüdü ana eedi dhorro.'

<sup>20</sup> Ömö'dii tiki, "Ka Tatalaana, nakalingngo a'a tumma no nye'd'de jiddi meede ka takaleefe takadhilli."

<sup>21</sup> A Yasu tassa kini ko'do ana eedi ka'diila iki iini, "Nüümö inggide öreeene unggodho üdü kitaalo nussu, unggeene naco ta tanege ana eema tiya üyüdü nye'd'de, nasümünaana nagürüüsü miini ka kadu tanno eema ka titaalo kene no, amang küdü tana eema ka 'dotombo'do dhabbu, nassa ka öö'dö kede keere." <sup>22</sup> Ömö'dii tagoroo'bo ka tumma tanno Yasu ka tiraana no, unggeene kudumma eema ungngo iini adhabbu.

<sup>23</sup> İkiri Yasu ka tinaana iiye ku'bu iki a kadalaadene tanno iini, "Tumma ma co ka tauugaara ma Masala kara tiideene a kadu tanno ana eema dhabbu no."

<sup>24</sup> A kadalaadene tädhere ka tumma tanno iini, ikiri ka tiki eene afe'de, "Laala eede, kündhi co ka tauugaara ma Masala! <sup>25</sup> Tadigaala ma

malaga ka ööye ma ibira taalo ara tagu'daana afa ma ömö'dü tiya ana eema ya kara co ka tauugaara ma Masala."

<sup>26</sup> A kadalaadene tako-gona ma tadhere kindineene kiki, "Mada i'i yungngo a tambaanya toolonadene adha?"

<sup>27</sup> A Yasu tassa kene iki, "Tumma no ka tiideene ka kadu illi eege kitaalo ka tiideene a Masala, kudumma eema nye'd'de taalo iideene a Masala."

<sup>28</sup> A Bütrüs tiki iini, "Kinyi ungngo eema ku'bu nye'd'de ara ungngo tuurna o'o keere."

<sup>29</sup> A Yasu tiki iini, "Ara a'a tadirina tumma aaga dhorro, taalo ömö'dü a tinyi 'dü yiini ku'bu nja nagöre nja nagïnye nja niimö nja pupa nja laala nja nasigeene kudumma a'a nja tumma ma Īnjilli, <sup>30</sup> a taluna ka 'büdhülü tiya, nja kirimi, nöö'dü kadhabbu ukumu kadu ka iidümmü nja nagöre nja nakanimö nja laala nja nasigeene, illi keere ya a taluna tefe ka 'dü ta'billi. <sup>31</sup> Lakiini kadu na ooso kidha no köö'dö keere, a kadu na kanna keere no co aadha."

*Yasu eema tumma ma inde tanno iini*  
(Matta 20.17-19; Lüüka 18.31-34)

<sup>32</sup> A Yasu nja kadalaadene tanno iini tagunggunu co Örsaliim a Yasu tunggeene kene kidha, a kadalaadene tadhere ari'ba tümmü kadu na unggeene nja eene no,

a Yasu tagedhe oona nja kadalaadene tanno iini na ada'baaga kafünü eera no, adünögü eema ya talinggo adene ana i'i eene. <sup>33</sup> Iki a'da, "Angnga kungngo kara tasirigö co Örsaliim, a 'Bii'bala ma Tadü'd'dü ara tümmününja a naguugaara ma ka'boge nja katalaana ma seriye kümmünü i'i ka inde kanangnga i'i a kajeene. <sup>34</sup> Küüni midhi ku'bu ana i'i ka'binnyi alaaga iini ko'do kabbü i'i, kiidi i'i. Afiki'dö afüngngö iidoona."

*Tasaasa na Yaguub nja Yühanna*  
(Matta 20.20-28)

<sup>35</sup> A laala ya Za'bedi, Yühanna nja Yaguub tissigi kini kete kiki iini, "Talaana, kasaasa ungngo o'o namma ka niimö tiya iidü ka asaasa ya."

<sup>36</sup> A Yasu tiki eene, "Kasaasa aaga a'da nüünä ada minna aaga?"

<sup>37</sup> Kikiri ka tiki, "Nanangnga ömö'dü öccö ka temmi küdü ka niisö ma kuri aya temmi küdü ka niisö ma küüle küdü ka tö'dö ka tauugaara tanno üdü na idhindhi no."

<sup>38</sup> A Yasu tiki, "Taalo aaga kussu niimö mada ka tindineene, ara aaga tambaanya tooye ker'de meede kara tooye mo, alla ara aaga tambeesedene a tambeese tanno eede kara tambeesedene iini no?"

<sup>39</sup> Kiki a'da, "Ara ungngo tambaanya." A Yasu tiki eene, "Ara aaga tooye ker'de meede kara tooye

mo, aaga tambeesedene a tambeeese tanno eede kara tambeesedene iini no. <sup>40</sup> Lakiini tumma ma temmi kede ka niisö ma kuri nja niisö ma küüle no, taalo a'a nama tanangnga aaga kudumma Masala ka takindinaana 'buugu ka kadu miini ku'bu."

<sup>41</sup> A türeene ma kadalaadene na ada'baaga no taföönyö tumma no kagoroo'bo ada ka Yaguub nja Yühanna. <sup>42</sup> A Yasu tagümmünü euge iki eene, "Kussu aaga a'da naguugaara ma kadu tanno taalo ka Yahüdü no, ka naguugaara ma kadu tanno eene, a kadu neene na iifi no tüüni ada euge ku'bu. <sup>43</sup> Eema afa ma tiya afa tanna kada, ömö'dii ya asaasa tadhabbu ana kada ya, apadaga oona keere alinggo ada aaga. <sup>44</sup> Ömö'dii ya asaasa co aadha ana kada ya, ada tasaga tiya ada aaga in'dili kungngo.

<sup>45</sup> Kudumma 'Bii'bala ma Tadü'd'dü taalo ö'dö a'da a kadu talingga ada iini, lakiini ö'dö ma talingga ada eene, afa kömüsü ma kadu kadhabbu ana eyi tiya iini."

*Toolonadene na Bartimaus ya soro ya*  
(Matta 20.29-34; Lüüka 18.35-43)

<sup>46</sup> Köö'dö ka Ariiha, a kini ka ndö'dö kürö ndama Ariiha nja kadalaadene tanno iini nja kadu kadhabbu, a'da Bartimaus 'bii'bala ya Timaws asoro, emmi ka tinggini ma fiini arangnga.

<sup>47</sup> Kini ka taföönyö a'da Yasu ya ma Nasira ya i'i ya miini ya, ikirii ka tiidhe, "Ka Yasu, 'Bii'bala ya Dawud, ana 'bangnga ma a'a."

<sup>48</sup> A kadu kadhabbu tagir-naana kini a'da aki'döönö illi i'i akogoona ma tiidhe ko'd'do, "Ka 'Bii'bala ya Dawud, ana 'bangnga ma a'a."

<sup>49</sup> Ikirii Yasu ka töödhii iki, "Aaga ümmünü i'i."

Kikirii ka tagümmünü soro, "Adhodho nafiki'dö na'düngnge ana uune. I'i ya ümmünü o'o!" <sup>50</sup> Ara'baga ten'di miini co afiki'dö ana uune aco ka Yasu.

<sup>51</sup> A Yasu tindini i'i, "Nasaasa o'o a'da nönynyö ana o'o?"

Ikirii ka tiki, "Tatalaana, nasaasa a'a tiji 'buugu!"

<sup>52</sup> A Yasu tiki, "Unggeene, tamma nüüdü ka oolona o'o." Ikirii ka arooro ka tasala 'buugu uurna Yasu keere ka fiini.

## 11

*Yasu inynyo Örsaliim  
(Matta 21.1-11; Lüüka 19.28-40; Yühanna 12.12-19)*

<sup>1</sup> Kene ka ndakete ka Örsaliim, kassa ndala Beet Faji nja Beet Aniya ka Anya ma 'Dikidiyö, a Yasu tagürünü kadalaadene niini keera. <sup>2</sup> Iki eene, "Aaga agolo daara tiya ada kidha ya, kada kara co ya, ara aaga taluna a 'bing kisine amin'dinja ku'bu, üfürü ömö'dii takaka kide, aaga kildhe i'i, aaga tö'dö iini kita. <sup>3</sup> Üürü ömö'dii ka

tindini aaga a'da, 'Minna ada kadalinggo?' aaga tiki iini a'da, 'Uugaara asaasa, assa ka tafada iini areere.'

<sup>4</sup> A kadalaadene co kaduna a 'bing kisine kimi'dinja ku'bu ka fiinii ka inye kete kakildhe i'i, <sup>5</sup> a kadu na 'dingnge kene kete no tindini eege kiki, "Kinggli aaga a 'bing kisine amana?"

<sup>6</sup> Kadirina eene afa ma tiya Yasu ka tünüğü co eene ya kungngo, a kadu tikiiri kafa kene ka unggeene.

<sup>7</sup> A kadalaadene na eera no tö'dö a 'bing kisine a Yasu, kakese en'di yeene kide aka kide. <sup>8</sup> A kadu kadhabbu takese en'di yeene ka fiinii, anno takese dhaaru neene ka taku'baana ka lodho no ku'bu. <sup>9</sup> A kadu na unggeene ka Yasu kidha no nja tanno unggunu kini keere no teema,

"Kafünügü Masala ko'do, Tanangnga ta'diila ömö'dü tiya tö'dö ana eere ma Uugaara ya.

<sup>10</sup> Aaga nangnga ta'diila a tauugaara tanno ara tö'dö no  
tauugaara na pupa tiya aja Dawud.

Kidhindhi ka fiinii ma ndanaaya."

<sup>11</sup> A Yasu co Örsaliim aaco la ma Masala adagiiri eema in'dili, ka 'buugu kanda siiya ya, ikiiri ka öö'dö kürö aaco Beet Aniya nja kadalaadene tanno iini nö'dö kada'baaga kafünü eera no.

### *Yasu aga'da indiyye (Matta 21.18-19)*

<sup>12</sup> Ka taka ka taadha ya kikiiri ka tunggeene ka Beet Aniya, iire tümmü Yasu.

<sup>13</sup> Ikiiri ka tasala fa ma ndiyye ka kirikiri ikiiri ka tunggunu co iki kide a'da laala inggide, kini ka ndalaana ya, taalo aduna laala kide illi dhaaro, kudumma uuru ma teene tanno ndiyye ka aleefe. <sup>14</sup> Ikiiri ka tiki iini, "Taalo ömö'dü ma tagu tööyö müüdü afe'de ta'billi." A kadalaadene taföönyö eema yiini ka teema ya.

### *Yasu asoro kadu ka la ma Masala*

(Matta 21.12-17; Lüüka 19.45-48; Yühanna 2.13-22)

<sup>15</sup> Köö'dö ka Örsaliim, ikiiri Yasu ka co la ma Masala adagasoro kadu na anadene ana eema kide nja tanno ana eema no apudu eema ma temmiimi nja kadu tanno aregere gürüüsü kide no, adhifi eema ya kadu tanno anadene ana alambo no co, <sup>16</sup> afaga kadu keere ka co la ma Masala ana eema ma ana. <sup>17</sup> Ikiiri ka talaana eege iki eene, "Taalo sorne ma Masala iki a'da,

"Dü yeede 'dü ma tafara ka  
Masala  
ma kadu ka ajeene  
nye'd'de?"

Aaga ta'duga, aaga tanangnga i'i kada tumba ma kanyooro."

<sup>18</sup> A naguugaara ma ka'boge nja katalaana ma

seriye taföönyö tumma no, kikiri ka tawwa fiini ma tiidi Yasu, Kudumma eene ka ri'ba iini, kudumma kadu in'dili kadhere ka talaana tanno iini. <sup>19</sup> Köö'dö kürö ndama anya a 'buugu kada siiya kunggeene.

*Fa ma indiye arume*  
(Matta 21.20-22)

<sup>20</sup> A kene ka ndafada ligitaka kungngo ya, kaduna fa ma ndiyye ka teyi arume kadara ka ereere miini. <sup>21</sup> A Bütrüs tagiigi tumma na Yasu iki iini, "Ka Tatalaana, assa ka fa ma indiyye nüüdü ka taga'da eege no, ka'bayaga ko'do."

<sup>22</sup> İkiri Yasu ka tiki eene, "Aaga amma ka Masala. <sup>23</sup> Ara a'a tadirina tumma aaga dhorro, üürü ömö'dii iki anya tammo, 'Fiki'dö na'dingga co to,' a'da taalo asanaana eedi ku'bu ya, lakiini amma ana eedi, a'da niimö yiini ka tiki ya a tüüninja iini. <sup>24</sup> Nikiri a'a ka tiki aaga a'da niimö yaada ka tasaasa ada kara tafara ka Masala ya, aaga amma ana eedi a'da ara aaga taluna, mikkiri Masala ka anangnga aaga. <sup>25</sup> Kada kara tafiki'dö aaga tafara ka Masala ya, üürü niimö ya toroko ya ungngo üüdü ku'bu nja ömö'dii naadha kide, amang ka Pupa tiya ada ya ka 'dotombo'do ya, ta'duga tatoroko kada ka oona." <sup>26</sup> [Kada ka titalo kaadha ka eema tiya kadu kadalinggo ana aaga ya toroko ya, taalo Pupa

yaada ya ka 'dotombo'do ya, ta'duga tatoroko naada.]

*Tindineene ma tauugaara na Yasu*  
(Matta 21.23-27; Lüüka 20.1-8)

<sup>27</sup> Kapadaga co Örsaliim, a kini ka tunggunaana ku'bu ka la ma Masala ya, a naguugaara ma ka'boge nja kataalaana ma seriye nja kadiifi ma anya, tö'dö kini. <sup>28</sup> Kikiri ka tindini i'i, "Türü nüüdü ka talinggo eema ya iini no 'dee na mada? Mada i'i yungngo anangnga türü o'o nalinggo iini ungngó?"

<sup>29</sup> A Yasu tiki eene, "Ara a'a tindini aaga ma niimö unggodho, aaga tirina a'a, na a'a sa tirina türü öjö eege kungngo eede ka talinggo iini. <sup>30</sup> Aaga tirina a'a, tambeese na Yühanna 'dee, köö'dö ndama 'dotombo'do alla ndama kadu?"

<sup>31</sup> Keema unggodho eege, "Kaja ka tiki a'da, 'Ndama 'dotombo'do ya,' ara tiki a'da, 'Aminna agu aaga, aaga taalo kamma kini?'" <sup>32</sup> Ara angnga tiki a'da, 'Ndama kadu?'" Lakiini eege kari'ba a kadu, kudumma kadu 'do kümmü Yühanna kada ne'bi. <sup>33</sup> Kikiri ka tiki a Yasu, "Taalo ungngo kussu!"

A Yasu tiki eene, "A'a tekere taalo na tadirina aaga a'da mada anangnga türü neede ka talinggo iini no a'a."

## 12

*Tafeene ma tumma ma katalaleele*

(Matta 21.33-46; Lüüka 20.9-19)

<sup>1</sup> Ìkiri ka teema nja eene a tafeene ma tumma, "Ömö'di inggide adin'i fa ma ki'bim'bi, adagasaara eege koona adagii'dö ada anya ma tiyaana kide, atarü'bü 'dasala anangnga a kadu ma leele kide ara ka tunggeene.

<sup>2</sup> Ka uuru ma tarumaana ma ki'bim'bi ka ndö'dö ya, agürünü ömö'di ya linggo nja iini ya ka kadu ma linggo aaco ta'duga iiye ma ki'bim'bi. <sup>3</sup> Lakiini kümmü i'i, kabbü i'i kuuru i'i ka tino ana iisine 'döngngönyö. <sup>4</sup> Ìkiri ka kürünü ömö'di ma linggo öccö kene afe'de, kabbü ömö'di ya miini ya ka üdü, kadagünni midhi ku'bu ana i'i. <sup>5</sup> Ütü kagürünü könö kadagiidi ya miini ya, agürünü öccö kadhabbu katabbü könö kadagiidi könö.

<sup>6</sup> "Ömö'di taalo öreeene kini miini kara tagürünü illi 'bii'bala yiini ka asaasa ya ma tagürünü i'i keere ma kadu tanno in'dili no, iki a'da, 'Eege kara taföönyö tumma na 'bii'bala tiya eede.'

<sup>7</sup> "Illi kadu ma linggo ma ki'bim'bi keema ung-godho eege kiki, 'Taya ya a takakarna ka eema ya i'i yungngo, aaga ö'dö angnga tagiidi i'i amang kaja takarna ka eema.' <sup>8</sup> Kümmü

i'i kadagiidi i'i kara'baga co kürö ndama 'booro ma ki'bim'bi.

<sup>9</sup> "Ömö'di ma ki'bim'bi 'dee ara tönynyö? Ara tö'dö tagirina kadu na linggo no, ara kanangnga ki'bim'bi a kadu tököönö. <sup>10</sup> Taalo aaga kagiiri tumma na sorne ma Masala?

'Misi ma katarü'böönö kanu kide mo, oogo mungngo ma misi ma kadesse.

<sup>11</sup> Uugaara agalinggo eema ya, angnga takadhere! "

<sup>12</sup> Kikiri ka asaasa tümmü i'i kudumma eene katussu a'da i'i ya eema a tafeene ma tumma kene ko'do. Lakiini eege kari'ba a kadu kadhabbu, kikiri ka tunggeene kinyi i'i ku'bu.

*Tamana tulu'ba a Kayisar*  
(Matta 22.15-22; Lüüka 20.20-26)

<sup>13</sup> Kagürünü kadu ma naFariisi nja Hirüdüsiin ka Yasu a'da kümmü i'i a tumma ma niinö tanno iini. <sup>14</sup> Kikiri ka öö'dö kini kiki iini, "Ka Tatalaana, kussu ungngo a'da neema o'o tumma dhorro nitaalo nalinggo a tumma tanno kadu, taalo o'o nalomana kadu ko'do, lakiini nadünnü o'o tumma ma Masala dhorro, a'diila kaja ka tamana tulu'ba a Kayisar alla angnga tanu? <sup>15</sup> Ara angnga tamana ku'bu alla angnga tanu?"

Ìkiri Yasu ka tussu ünggü meene Ìkiri ka tiki eene, "Minna agu aaga, aaga

ta'b'ba a'a ka eedi aaga ungge jine a'a nasala kide."

<sup>16</sup> Kikirii ka anangnga jine iini, ikirii ka tiki eene, "Koronggore ya mada i'i yungngo nja eere tiya?"

Kiki a'da, "Ya Kayisar."

<sup>17</sup> İkirii Yasu ka tiki eene, "Aaga nangnga eema ya Kayisar a Kayisar, aaga tanangnga eema ya Masala a Masala." Kadhere ka tumma tanno iini.

*Tarna nja tafiki'i dö ka inde  
(Matta 22.23-33; Lüüka 20.27-40)*

<sup>18</sup> İkirii na Sadügiin na iki a'da kitaalo tafiki'i dö ka inde kö'dö kini kindini i'i. <sup>19</sup> Kiki, "Tatalaana, Müüsa arigiri ada angnga ka sorne a'da ömö'di ka teyi inyi aka miini ku'bu a'da taalo mageene laala, örre yiini takarna ka aka ma küüme amang kini teene ada laala örre tiya iini. <sup>20</sup> Kadu kinggide ka iidümmü kafünü eera ka nagöre, ömö'di ya dhidha ya arna aka eyi a'da taalo ageene laala. <sup>21</sup> Aya ta'duga oogo eyi a'da taalo ageene ada oono, nja türeene miini nye'd'de nja tiya iidoona ya. <sup>22</sup> Tumma dhorro taalo ömö'di unggodho ana ka kadu tanno ka iidümmü kafünü eera no taalo ageene, keere kungngo aka teyi afe'de. <sup>23</sup> Oogo ma aka tammo mada ka uuru ma kadu tafiki'i dö ka inde? Kudumma oono kada aka tammo kadu ka iidümmü kafünü eera?"

<sup>24</sup> A Yasu tiki eene, "Kaama aaga kudumma aaga katitaalo kussu naksorne na insili no nja türü tanno Masala. <sup>25</sup> Taalo kadu karna ajeene ka uuru ma tafiki'i dö ka inde, kafeene nja kadhangga ka 'dotombo' do. <sup>26</sup> A 'bïtingngö kudumma ma tafiki'i dö ka inde ma kadu tanno ake no, taalo aaga kagiirii sorne ya Müüsa ma 'bamfa, Masala miki iini, 'A'a na Masala tammo Abrahiim nja Masala tammo Ishak nja Masala tammo Yaguub'? <sup>27</sup> Oogo taalo Masala ma kadu tanno ake no, lakiini oogo ma Masala ma kadu tanno adinö no aaga ya kaama aaga 'do.'

*Tumma na Masala na idhindhi no  
(Matta 22.34-40; Lüüka 10.25-28)*

<sup>28</sup> Tatalaana ma seriye könö ö'dö aföönyö eene kata'bununjaana ku'bu a tumma. A Yasu tapadaga tumma co Sadügiin ka'diila, ikirii ka tindini i'i iki, "Tumma na dhidha no eege kiiye ana kada na in'dili no?"

<sup>29</sup> A Yasu tiki, "Tumma na dhidha no kiki, 'Kadu ma Israyil, aaga aföönyö, Masala Uugaara maaja, Uugaara unggodho. <sup>30</sup> Asaasa Masala Uugaara müüdü ana eedi tiya üüdü nye'd'de nja oona tanno üüdü nja üüdü tiya üüdü nye'd'de nja türü tanno üüdü nye'd'de.' <sup>31</sup> A tumma öccö afe'de kiki, 'Asaasa ömö'di ya kete küdü

ya afa müdüdü ka asaasa eyi  
yüdüdü kungngo.' " Kungngo  
taalo tumma könö kïdhïndhi  
ka tagii'bi tumma no.

<sup>32</sup> A tatalaana ma seriye  
tiki iini, "A'diila, nadiri  
o'o tumma dhorro a'da  
Masala ma unggodho taalo  
Masala kömö illi oogo.

<sup>33</sup> Ömö'di tasaasa oogo ana  
eedi nye'd'de a tussu miini  
nye'd'de, a türü tanno iini  
nye'd'de asaasa ömö'di ya  
kete kini ya afa miini ka  
asaasa eyi yiini kungngo,  
kagii'bi tara eriidö nja türri."

<sup>34</sup> A Yasu tussu a'da ömö'di  
ya adiri tumma ma ta'dara  
ikirii ka tiki iini, "Taalo  
o'o na ku'b'ba ka tauugaara  
ma Masala ku'bu." Taalo  
ömö'di könö ma tana rüsü  
ka eedi ma tindini i'i dhabbu  
kungngo.

*Almasiihi nya Dawud*  
(Matta 22.41-46; Lüüka  
20.41-44)

<sup>35</sup> Ka Yasu ka tagalaana  
kadu ka la ma Masala ya, in-  
dineene iki, "Katalaana ma  
seriye 'dee, kiki a'da Almasi-  
ihi i'i ya 'Bii'bala tiya Dawud  
nya? <sup>36</sup> A'da Dawud ka eyi  
tiya iini eema a türü ma  
Koronggore tiya Insili ya,  
'Iki Uugaara Uugaara tiya  
eede,

Emmi kede ka niisö ma  
kuri,  
ara a'a ka anangnga  
kadu ma kirimi  
nüüdü küdü ka uune.

<sup>37</sup> A Dawud ka eyi tiya iini  
ümmünü Almasiihi a'da Al-  
masiihi a'da 'Uugaara,' assa  
ka ta'bii'bala tiya iini nya?"

A kadu tagatoodo ka Yasu ka  
teema oona a'diila eene.

*Yasu iki aaga aadha ka  
katalaana ma seriye ka oona*  
(Matta 23.1-36; Lüüka  
20.45-47)

<sup>38</sup> A Yasu tagalaana eege  
iki eene, "Aaga aadha  
ka katalaana ma seriye  
ka oona. Eege kasaasa  
tunggunaana ku'bu ana  
en'di tiya kadhonggoro ya  
ka oona, a kadu tööjülu eege  
ka namansala, <sup>39</sup> kemmiimi  
ka kadu kidha ka la ma  
talaana nja na'buugu ma  
te'd'deema. <sup>40</sup> Kiisiñi iiya  
ma nagüüme kagu eema  
yeene, kümmü nanggeyi  
neene a'da eege kafara ka  
Masala keema tafifinni.  
Eege na miini no ara Masala  
tapusu eege dhindho."

*Gürüüsü ma aka ma  
küüme ka tamana ku'bu mo*  
(Lüüka 21.1-4)

<sup>41</sup> A Yasu temmi ka la  
ma Masala ka teene, napele  
ana iiye ka oona nja 'buugu  
ma tamana ker'de ma mon-  
soona kide, adinö ka kadu  
kadapüpügü gürüüsü yeene  
ka 'buugu ma gürüüsü ka  
la ma Masala, a kadu nana  
gürüüsü dhabbu no, tamana  
ku'bu dhabbu. <sup>42</sup> Lakiini  
aka ma küüme mo, eema  
ka titaalo kono mo, mafaana  
ana giriisi keera idhilli.

<sup>43</sup> Ikirii Yasu ka tagümmünü  
kadalaadene niini iki eene,  
"Ara a'a tadirina tumma  
aaga dhorro, aka ma küüme  
mo, eema ka titaalo kono  
mo, manangnga gürüüsü

ku'bu adhabbu ka 'buugu ma tafaana madagii'bi kadu nye'd'de. <sup>44</sup> Kudumma eene kanangnga türeene ma eema tiya eene ya dhabbu ya ku'bu, lakiini oogo, manangnga ya aganna kono ya ku'bu, moono kara takuri ya nye'd'de kungngo."

## 13

*Yasu eema tumma titaalo ma 'büdhülü*  
(Matta 24.1-2; Lüüka 21.5-6)

<sup>1</sup> Kini ka öö'dö kürö ndama la ma Masala ya a kadalaadene niini könö tiki iini, "Tatalaan, ma assala ka niigisi nja tarü'böönö tanno ka'diila nya!"

<sup>2</sup> İkiri Yasu ka tiki iini, "Niji o'o tarü'böönö na 'diila no? Taalo mäsi ma türeene ka ma tööje ko'do, kara tasananjaana ku'bu."

*Dhügürü nja talinggo kadu*  
(Matta 24.3-14; Lüüka 21.7-19)

<sup>3</sup> Kini ka asirö Anya ma 'Dikidiyö emmi adinö co la ma Masala, ikiri Bütrüs nja Yaguub nja Yühanna nja Andraws ka tindini i'i unggodho eege, <sup>4</sup> "Tirina ungngo, ara tumma no talinggo adene aada a nüümö ya tanangnga angnga ka tussu a'da ndakete ka talinggo adene i'i ya iiye?"

<sup>5</sup> A Yasu tiki eene, "Aaga adinö ko'do aaga fa tafaga ömö'dü töccö iisini aaga.  
<sup>6</sup> Kadu kinggide kassa ka öö'dö kadhabbu kiisini kadu ana eere tiya eede kiki,

'A'a namiini!' Kiisini kadu kadhabbu 'do. <sup>7</sup> Kada ka taföönyö tumma ma koro'bo kateemadene afa ma tiya miini ya, aaga fa tari'ba ara tüünidene, lakiini taalo sugi miini eege kamiini. <sup>8</sup> Ara anya tadiidi ma anya tökömö a tauugaara tadiidi ma tauugaara könö, a 'buugu tatänggi'dü ka na'buugu kadhabbu, a 'buugu ta iire tata ma tin'di eege kamiini.

<sup>9</sup> "Aaga adinö ko'do, ara kadu tümmü aaga kümmünü a naguugaara ma seriye, kabbü aaga ka naala ma talaana, küügü aaga kamanaga co kidha ma naguugaara ma anya na dhiidhi no nja tanno iifi no kudumma a'a, aaga öödhü dhorro aaga tasahüüdü kene. <sup>10</sup> Ara tumma na İnjüili teemadene ka dhidha ka ajeene ka naanya koona nye'd'de kungngo. <sup>11</sup> Ka kadu kara tümmü aaga kümmünü a naguugaara ya, aaga tafa tadinigöögö a'da taalo aaga kussu nüümö maada ka teema, aaga eema tumma na tö'dö kada ka nüünö no ka ööye miini, kudumma Koronggore tiya Insili ya i'i yungngo eema taalo aaga.

<sup>12</sup> Ara ömö'dü tümmünü örre yiini ka inde, a pupa tümmünü 'bii'bala yiini ka inde, a laala tasilli eema ya kafaafa meene kagirina eege. <sup>13</sup> Ara kadu takirimi aaga nye'd'de kungngo kudumma eere tiya eede, ömö'dü ya idhi oona ku'bu turi ya oolonadene."

*Tatoroko ma 'buugu  
(Matta 24.15–28; Lüüka  
21.20–24)*

14 "Kada ka tiji 'tanyoro ma 'buugu ka tatoroko ya,' na taalo kama tagalinggo adene no amang kada tussu aaga na iröönö no, a kadu na ka Yahüüdiya no tarünö kaco na'dikinya. 15 Ömö'dü ya ka la ko'do ya, taalo atö'dö ku'bu alla aco a 'bügöörü tagona nüümö kide. 16 Ömö'dü ya ka siga ya, taalo tafada aco a'duga ten'di yiini. 17 Am'ba ka iiya tanno agüröönö no nja tanno indine no ka naganuuru tanno miini no. 18 Aaga afara ka Masala a tumma no tafa tö'dö feele kungngo. 19 Ka naganuuru tanno miini no ara tagoroo'bo tö'dö ka anya a 'buugu tatoroko, üfürü tagatoroko nggeege taka öccö jiddi ma Masala ka tarü'bü 'büdhülü itaalo a tö'dö nggeege afe'de. 20 Üürü Uugaara ka titaaloo anangnga naganuuru na miini kadhägüngü ya, taalo ömö'dü ma tagoolonadene unggodho kungngo. Lakiini kudumma kadu tanno oono ka tagesse euge no, mikiiri karmuna naganuuru manangnga euge kadhägüngü.

21 "Ka uuru tanno miini no üürü ömö'dü iki aaga a'da, 'Assa, Almasiihi ungngo kita,' nja iini ka tiki a'da, 'Inni kannaa ya,' aaga tafa tamma kini kide. 22 Namasiihi na iisini kadu no nja nagane'bi tanna

korokoro no, kara sa kabbü 'dala kalinggo eema keefe nja eema ma türü meene ka taama kadu na Masala ka tagesse euge no, üürü kaluna fiinü miini. 23 Nggeege aaga adinü ko'do, a'a 'bitingngö nagadünögü a'a eema aaga in'dili kungngo a'da küfürü uuru miini tö'dö.

*Tö'dö na 'Bii'bala ma  
Tadü'dü  
(Matta 24.29–31; Lüüka  
21.25–28)*

24 "Lakiini ka naguuru tanno miini no ara sa tatoroko 'do, 'A ndanaaya talifi a tere taalo ara töyeene,

25 A midigi ta'dinggaene ndama 'dotombo'do a türü ma 'dotombo'do tatinggi'dü.'

26 "Ka uuru tanno miini no ara kadu sa kiji 'Bii'bala ma Tadü'dü ka tunggunuaku'bu a tülüögü a türü nja tiidhindhi. 27 Assa kagürünü kadhangga niini ka na'buugu tanno tanya ka tüüsö na egiisö no koona nye'd'de kungngo, kaco tawaana kadu niini ka tagesse euge no ka 'büdhülü koona nye'd'de nja 'dotombo'do.

*Talaana ma fa ma indiïye  
(Matta 24.32–35; Lüüka  
21.29–33)*

28 "A 'bitingngö aaga kussu fa ma indiïye, kada kiji i'i ka tasere a dhaaro miini ta kirikiri, aaga tussu a'da kooro ka ndakete. 29 Kada ka tiji eema ya ka talinggo adene nye'd'de ya,

ikirii aaga ka tussu a'da uuru miini ka ndakete ka inye.<sup>30</sup> Neema a'a nja aaga dhorro, taalo sere ya tadhe ko'do a'da taalo eema agalinggo adene nye'd'de kungngo.<sup>31</sup> 'Dotombo'do nja 'büdhü'lü ka tamanyaga kitaalo, lakiini taalo tumma neede ka titaalo."

*Taalo ömö'di ussu uuru na Masala*  
(Matta 24.36-44)

32 "Taalo ömö'di ma tussu uuru na miini no, alla kadhangga ka 'dotombo'do alla 'Bii'bala illi Pupa. 33 Aaga adinö ko'do aaga tafa tarigide kudumma ada ka titaalo kussu a'da uuru na miini no ka tö'dö aada. 34 Afeene afa ömö'di ya inyi 'di yiini ku'bu ara ka tunggeene anangnga kadu na alinggo no kafa kide, ömö'di ya talingga linggo niini keefe, iki a taya afa ka inye ya, adinö afa tarigide. 35 Nggeege aaga adinö ko'do kudumma ada kitaalo kussu tafada na ömö'di ma 'di, siiya kungngo alla ooso ka teene, alla a dhimbä ka fara alla ka taka ka taadha. 36 Üürü i'i ö'dö aluna aaga afa taluna aaga ka tarigide. 37 Tumma neede ka tirina aaga no, nadünögü a'a co kadu nye'd'de, 'Aaga adinii ko'do.' "

## 14

*Tawwa fiinii ma tiidi Yasu*  
(Matta 26.1-5; Lüüka 22.1-2; Yühanna 11.45-53)

<sup>1</sup> 'Bitengngö Taanyara ma Tada'da ka Eriidö nja

Taanyara ma Dheedhifi füngngö miini anda öreeene eera, a naguugaara ma ka'boge nja katalaana ma seriye tagawwa fiinii meene ka tümmü Yasu kiidi i'i.<sup>2</sup> Lakiini eege kiki a'da, "Taalo angnga ka tüüni nggeege ka taanyara ma türri ii'di kadu taga'da 'buugu."

*Aka muuru kondho ka Yasu ka oona*  
(Matta 26.6-13; Yühanna 12.1-8)

<sup>3</sup> Ka Yasu ka taganna ka 'di kita Samaan ya akaana kutukunya ya, ka Beet Aniya kemmi, aka tadhe a sügü'de ka niisö a kondho ma nardiin ma dhorro mo kide magu'daana mo, ma'böyö sügü'de muuru kondho iini ka üdü.

<sup>4</sup> A kadu könö tagoroo'bo, keemaana ka oona kiki a'da, "Minna agu kondho maga'dadene kungngo?

<sup>5</sup> Taalo maaja ka tadenegi iini ana gürüüsü ma ürüünü unggodho (gürüüsü 300), angnga tüsümünaana nakanjine miini ka kadu tanno eema ka titaalo kene no," kikirii kamana hetti aka 'do.

<sup>6</sup> Ikirii Yasu ka tiki eene, "Minna agu aaga, aaga talingga oogo? Aaga Aadha oono ka oona, magalinggo ada niimö ya a'diila ya a'a. <sup>7</sup> Kadu no eema ka titaalo kene no kinggide 'do aaga amana eema eene üürü aaga kasaasa. Illi a'a ya, taalo a'a na taneene nja aaga turi.

<sup>8</sup> Oogo magüünii a türü tanno oono muuru kondho eede ka oona ka dhidha matindinaana ku'bu ma tatü'bü

a'a. <sup>9</sup> Ara a'a tadirina tumma aaga dhorro, kita İnjüili ka teemadene kide ka 'buugu ka oona nye'd'de kungngo ya, keema tumma ma eema tiya oono ka tagüünii ya a kadu tagüigii oogo iini."

*Yahüüsa amma ma Yasu ka tümmü adene*  
(Matta 26.14-16; Lüüka 22.3-6)

<sup>10</sup> İkiri tatallaadene na Yasu könö ana ka tanno ada'baaga kafünü eera no ana eere a'da Yahüüsa Askaryüütü tunggeene aco ka naguugaara ma ka'boge ma tümmünü Yasu eene. <sup>11</sup> Oona ta'diila kene eene kadaföönyö tumma no, kiki iini a'da, ara eege tanangnga gürüsü iini. İkiri ka adinaana i'i ko'do ma taluna fiinii ma tümmünü i'i eene.

*Yasu agu kuri ma tada'da nja kadalaadene tanno iini*  
(Matta 26.17-25; Lüüka 22.7-14, 21-23; Yühanna 13.21-30)

<sup>12</sup> Ka uuru tanno dhidha no ma Taanyara ma Dheed-hifi ka ndö'dö yeene kaara kidheefele ma Taanyara ma Tada'da ka Eriidö kide ya, a kadalaadene na Yasu tindini i'i kiki iini a'da, "Nasaasa o'o ungngo kico tindinaana kuri ma Tada'da küdü ku'bu kiga?"

<sup>13</sup> Agürünü kadalaadene niini keera iki eene, "Agolo anya aaga taduna ömö'di unggeene a'bandhafala ma 'biidü aaga turna i'i keere.

<sup>14</sup> Kini ka co a 'bügööri ya, aaga tiki ömö'di ma 'dö a'da, 'Tatalaana iki a'da la yeede

ka tagu kuri ma Taanyara ma Tada'da ka eriidö nja kadalaadene tanno eede i'i iiye?' <sup>15</sup> Ara talaala aaga ka la ko'do, la ko'do adhabbu akesenja ku'bu ka'diila, aaga tindinaana kuri kaja ku'bu kide."

<sup>16</sup> İkiri kadalaadene na eera no ka co, kaluna tumma na Yasu afa ma tiya iini ka tageema kungngo, ka takindinaana kuri ma tada'da ku'bu.

<sup>17</sup> A 'buugu kanda siiya kungngo ya, a Yasu tö'dö nja kadalaadene tanno iini na ö'dö kada'baaga kafünü eera no. <sup>18</sup> A kene ka ndemmi ma tagu eema ya, a Yasu tiki, "Ara a'a tadirina tumma aaga dhorro, ömö'di öccö ungngo aja aguri nja a'a ara tümmünü a'a a kadu."

<sup>19</sup> Oona tatoroko ka kadalaadene kindini i'i ka unggodho, ka unggodho, "Tumma dhorro taalo a'a namiiini?"

<sup>20</sup> İkiri ka tiki eene, "A könö ana ka tanno na öö'dö kada'baaga kafünü eera no, ara türri niisö ka dho nja a'a. <sup>21</sup> A 'Bii'bala ma Tadü'd'dü ara teyi afa ma tiya ka kasorne ma Masala na insili no katiraana ya kungngo, lakiini am'ba ka ömö'di tiya ara tümmünü 'Bii'bala ma Tadü'd'dü a kadu ya, a'diila kini kara tafa tageenedene."

*Kuri ma taamu ya Uugaaara*

(Matta 26.26-30; Lüüka 22.15-20; 1 Kürünsüs 11.23-25)

<sup>22</sup> Kene kagu eema ya, ikiri Yasu ka 'duga miteene anangnga ta'diila a Masala

a'düsünü anangnga eene iki, "Aaga la tuu'da neede eege kungngo."

<sup>23</sup> İkiri ka a'duga ker'de anangnga ta'diila a Masala, anangnga eene, kadakooye kide eege in'dili. <sup>24</sup> İkiri ka tiki eene, "Erüidö yeede i'i yungngo, ma timi'di tumma ya uurunja co ka üüdü ma kadu kadhabbu. <sup>25</sup> Ara a'a tadirina tumma aaga dhorro ndama uuru tanno, taalo a'a na tooye 'büüdö ma ki'bim'bi, ara uuru neede ka saga tooye i'i kada issi ka tauugaara tanno Masala."

<sup>26</sup> Kikiri ka ndaküüwe tüüsü köö'dö kürö kaco Anya ma 'Dikidiyö.

*Yasu eema ta'düsünü i'i na Bütrüs*

(Matta 26.31-35; Lüüka 22.31-34; Yühanna 13.36-38)

<sup>27</sup> İkiri Yasu ka tiki eene, "Ara aaga sa karünö aaga nye'de kungngo aaga tinya a'a ku'bu, kudumma sorne ma Masala ka tiki,  
'Ara a'a tabbü tadasaana,  
kidheefele tanyala-  
gaago.'

<sup>28</sup> Lakiini kede ka tafiki'dö ka inde ya, ara a'a co Jaliil kada kidha."

<sup>29</sup> İkiri Bütrüs ka tiki, "Kassa ka tinyi o'o ku'bu eege nye'de, taalo a'a nara tinyi o'o ku'bu."

<sup>30</sup> A Yasu tiki iini, "Ara a'a tadirina tumma o'o dhorro ka ooso tanno 'bitüngngö no, a'da üfürü dhüm'bi taafara teera ya, ara o'o ta'düsünü tumma ma üüdü ka tussu a'a tiidoona."

<sup>31</sup> A Bütrüs takogoona ma teema tumma niini iki, "Taalo a'a na ta'düsünü o'o assa kata inde, ara a'a teyi nya o'o." A kadalaadene nye'de tatiraana nggeege.

*Yasu afara ka Masala ka Jetsemaani*  
(Matta 26.36-46; Lüüka 22.39-46)

<sup>32</sup> Köö'dö ka 'buugu tiya ana eere a'da, Jetsemaani ya, ikiri Yasu ka tiki a kadalaadene tanno iini, "Aaga emmi kita ara a'a kaafara ka Masala." <sup>33</sup> İkiri ka 'duga Bütrüs nja Yaguub nja Yühanna arooro ka ta'deedene ka oona, ari'ba tümmü i'i. <sup>34</sup> İkiri Yasu ka tiki eene, "Ka toroko oona eede dhindho kada inde, aaga anna kita aaga tadini ko'do."

<sup>35</sup> Isigi co eene ka oona idhilli kungngo, üürü ku'bu eema nja Masala, amang ka uuru tanno tadhe ko'do iini ka oona, üürü Masala masaasa. <sup>36</sup> İkiri ka tiki, "Abba, Pupa yeede, eema nye'de nana o'o türü miini, 'duga tatoroko no kede ka oona, lakiini taalo tumma ma eedi tiya eede ka asaasa, lakiini afa ma tiya üüdü ka asaasa ya kungngo."

<sup>37</sup> A Yasu tafada aluna eege ka tarigide, ikiri ka tiki a Bütrüs, "Samaan narigide o'o sa? Taalo o'o nambaanya tadinö ana ndanaaya ka unggodho?" <sup>38</sup> Aaga eema nja Masala eege tadinö ko'do ii'di aaga ta'dingga

ka ta'b'badene. Koronggore asaasa, illi tuu'da kagi'di."

<sup>39</sup> Isigi keere kene ka oona afe'de, eema nja Masala indiri tumma na unggodho no.

<sup>40</sup> Afada afe'de aduna eege ka tarigide, a tarigide talinggo eege ka iiye, taalo kussu niimö meene kadirina iini.

<sup>41</sup> Afada tiidoona iki eene, "Kaleefe aaga tarigide, aaga tagünü? Anda 'dimo! Asa uuru tö'dö. Aaga assa kide, 'Bii'bala ma Tadü'd'dü tümmününja ka iisine ma

kadu tanno oroko no.

<sup>42</sup> Aaga fikik'dö angnga tagunggeene, a ömö'dü ya tümmünü a'a a kadu ungngo kede kita."

*Tümmü adene na Yasu  
(Matta 26.47-56; Lüüka 22.47-53; Yühanna 18.3-12)*

<sup>43</sup> Kini ka aleefe ateema kungngo ya, a'da adhe Yahüusa ya kadalaadene ya ndama tanno ö'dö kada'baaga kafünü eera no, nja kadu kungngo iini a maguufi a nakulu'ba, a naguugaara ma ka'boge nja katalaana ma seriye nja kadiifi ma anya kagürünü eege. <sup>44</sup> Ömö'dü ya ümmünü i'i a kadu ya, ala eege ka niimö ma tussu iini iki eene, "Ömö'dü yeede ka tööjülü i'i ya, i'i ya miini, aaga ümmü i'i aaga co ku'b'ba iini aaga tafa kini dhorro."

<sup>45</sup> Ka Yahüusa ka ndö'dö ya ikirri ka öö'dö ka Yasu kete iki iini, "Ka Tatalaana!" ikirri ka tööjülü i'i. <sup>46</sup> Kikirri ka 'dinggö kini ana iisine

karefe i'i. <sup>47</sup> Ömö'dü öccö ana kene a'düngnge ana ko'do kene kete tafanna kulu'ba ma dhonggoro mo, eedhe tasigira ya alinggo nja uugaara ma ka'boge ya ka neeso armuna.

<sup>48</sup> A Yasu tiki eene, "Kö'dö aaga kürö a maguufi nja nagulu'ba afa a'a ka ka'da 'buugu?" <sup>49</sup> Naganeene

a'a nja aaga, a naguuru, nalaanaga kadu ka 'booro ma la ma Masala aaga taalo kümmü a'a lakiini tumma no ka Kasorne ma Masala no eege kungngo ada kadalinggo iini ungngo."

<sup>50</sup> A kadu nye'd'de kungngo tarünö ka inyi i'i ku'bu.

<sup>51</sup> A 'bii'bala inggide ö'dö kini keere ana oona ku'bu illi i'i aramba oona a 'banden'di, kikirri ka tümmü i'i. <sup>52</sup> İkirri ka tapa eene ka ten'di, ara ka arünö ana oona ku'bu.

*Yasu ka kidha ma naguugaara ma Yahüüdü*

*(Matta 26.57-68; Lüüka 22.54-55, 63-71; Yühanna 18.13-14, 19-24)*

<sup>53</sup> Kümmü Yasu kateefe tunggu co uugaara ma ka'boge, kikirri naguugaara ma ka'boge nja naguugaara ma anya, nja katalaana ma seriye ka temmi eege in'dili kungngo. <sup>54</sup> A Bütrüs tako'd'do kini keere ndama ku'b'ba kalla kaco 'booro ma 'di tiya uugaara ma ka'boge, ikirri ka co aduna kadu katille issi, ille nja eene.

<sup>55</sup> A naguugaara ma ka'boge nja na ataya ma

'buugu ma temmi ma Yahüüdü tanno kagiirii nüümö matra tümümü Yasu ma tiidi i'i iini, lakiini eege kitaalo kaduna.<sup>56</sup> Kudumma kadu kadhabbu kafünü korokoro iini ka oona illi tumma neene kambananjaana ku'bu, kitaalo ka unggodho.

<sup>57</sup> A kadu könö tafiki'dö ana kene kafünü eema iini ka oona kiki a'da,<sup>58</sup> "Kaföönyö ungngo iini ka tiki a'da, 'Ara a'a tarüdü la ma Masala ya kadu ka tarü'böönö ana iisine ya, na a'a sa karü'bü könö a füngngö iidoona taalo ömö'dü arü'böönö ana iisine.'"<sup>59</sup> Nggeege a tumma neene tafada kambananjaana ku'bu.

<sup>60</sup> İkiri uugaara ma ka'boge ka fiki'dö ko'do kene kidha indini Yasu, "Taalo tumma müüdü ka tatiraana? Ka eema tiya kadu kadeema küdü ko'do ya?"

<sup>61</sup> Aki'döönö dhore kungngo, taalo adiri nüümö, uugaara ma ka'boge tindini i'i afe'de, "O'o 'dee na Almasiihi 'Bii'bala ma Masala mana baraka mo?"

<sup>62</sup> A Yasu tiki iini, "A'a namiini ara aaga sa kadinö ka 'Bii'bala ma Tadü'd'dü ka temmi ka Masala ka 'dakeyi ma nüüsö ma kuri, ka tadhe ka tülüügü ka 'dotombo'do."

<sup>63</sup> Uugaara ma ka'boge tarisina ten'di iini ka oona iki, "Ara angnga tasaasa ömö'dü ma tadini ka tumma tanno afe'de?<sup>64</sup> Kaföönyö aaga teela Masala niini, aaga

kiki aaga nya 'bitüngngö?" Kikiri ka tiki eege nye'd'de kungngo, eege nye'd'de kasaasa i'i a'da eyi.

<sup>65</sup> A kadu öccö ta'binnyi alaaga iini ka oona, kaküdhü i'i ka üye, kabbü i'i ana iisine, kiki iini, "Eema." A nasigira ta'duga i'i katabbü i'i.

*Bütrüs a'düsünü Yasu  
(Matta 26.69-75; Lüüka 22.56-62; Yühanna 18.15-28)*

<sup>66</sup> Ka Bütrüs ka taleefe ka ünye ma 'bügööri ka ta'buugu ya a'da mö'dö 'badaada ma alinggo nja uugaara ma ka'boge mo.

<sup>67</sup> Mikiri ka tasala Bütrüs ka tille issi masa kini ko'do miki iini, "O'o ka eyi tiya üüdü naganeene o'o nja Yasu ya ma Nasira ya!"

<sup>68</sup> A'düsünüigü iki, "Taalo a'a nussu nüümö yüüdü ka teema ya," ikiri kico akürö ndama a 'bügööri.\*

<sup>69</sup> Mikiri 'badaada ka tassa kini ko'do madirina eema a kadu tanno kete no miki, "Ömö'dü ya nja eene."<sup>70</sup> A'düsünüigü afe'de. Amussu kungngo, a kadu na 'dängnge kete no kiki a Bütrüs, "Tumma dhorro o'o nja eene, kudumma üüdü o'o na taga Jaliil."

<sup>71</sup> İkiri ka teela eyi yiini aküdünü eene iki a'da, "Taalo a'a nussu ömö'dü yaada ka teema tumma miini ya."<sup>72</sup> Amussu kungngo a dhümbi tafara afe'de ikiri Bütrüs ka tagüigü tumma na Yasu a'da, "A dhümbi ka

\* 14:68 14.68 A nakasorne könö kiki a'da, afara dhüm'bü.

tüfürü tafara teera ya, ara o'o ta'düsünü a'a tiidoona," ikirii ka ndafara.

## 15

*Yasu kidha ma Bilatus*  
(Matta 27.1-2, 11-14;  
Lüüka 23.1-5; Yühanna  
18.28-38)

<sup>1</sup> Ligitaka so'd'do, ikirii naguugaara ma ka'boge nja kadiifi nja katalaana ma seriye nja kadu ma la ma kadiifi ma Yahüdü nye'd'de ka tageema ana ka oona, kikirii ka tümmü Yasu kadimi'di i'i kanangnga i'i a Bilatus. <sup>2</sup> İkirii Bilatus ka tindini i'i, "O'o no uugaara ma Yahüdü?"

A Yasu tiki iini, "O'o natiraana."

<sup>3</sup> A naguugaara ma ka'boge tafünü tumma ma korokoro kini ka oona kadhabbu. <sup>4</sup> A Bilatus tindini i'i afe'de, "Taalo niimö müüdü ka tiraana? Naföönyö o'o eema ya kadu kadeema küdü ko'do ya?"

<sup>5</sup> A Yasu taalo adiri niimö 'do a Bilatus tidhi adhere.

*Yasu ümmününja ka inde*  
(Matta 27.15-26; Lüüka  
23.13-25; Yühanna 18.39—  
19.16)

<sup>6</sup> A Bilatus katadaada amanaga ömö'di ma pabuusu kürö unggodho ndama pabuusu ya kadu kasaasa ya ka uuru ma taanyara.

<sup>7</sup> Ömö'di inggide ana eere a'da Barabas aganna ka pabuusu nja kadu tanno oroko no, na kirina kadu ka uuru ma taga'da 'buugu. <sup>8</sup> A kadu tawagaana oona, kiki a

Bilatus a'da üünü niimö yiini ka tüünidene katadaada ya.

<sup>9</sup> İkirii ka tiki eene, "Kasaasa aaga a'a a'da napa ada ka uugaara ma Yahüdü?" <sup>10</sup> Kudumma iini ka tussu a'da naguugaara ma ka'boge kakirimi oona kene kümmünü Yasu iini.

<sup>11</sup> A naguugaara ma ka'boge tafünü kadu a'da kapa ka Barabas. <sup>12</sup> A Bilatus Albunti tiki eene afe'de, "Ara a'a tönynyö ana ömö'di tiya ada ka tümmünü i'i a'da uugaara ma Yahüdü ya ma?"

<sup>13</sup> Keele ka tumma kiki, "Bünnü i'i ka salii'bi."

<sup>14</sup> İkirii ka tiki eene, "Amana? Agüüni minna ya toroko ya?"

Kakogoona ma tiidhe kiki, "Bünnü i'i ka salii'bi!"

<sup>15</sup> A Bilatus tasaasa kadu ka'diila nja iini nye'd'de kungngo, ikirii ka tapa kene ka Barabas. Kene ka ndabbü Yasu a tiiso ya, kanangnga i'i eene ma tara co tabünnü i'i ka salii'bi.

*Nasigira ka üünü midhi ku'bu ana Yasu*  
(Matta 27.27-31; Yühanna  
19.2-3)

<sup>16</sup> A nasigira tüögü Yasu kaco 'di ma uugaara kawagaana nasigira koona.

<sup>17</sup> Kagirni ten'di ma öödhe mo kini ka oona kadagüüfü tagiya ma immi kagirni kini ka üüdü. <sup>18</sup> Kööjülü i'i kiki, "Ungngo kööjülü o'o Uugaara ma Yahüdü."

<sup>19</sup> Kabbü i'i ka üüdü a tam'bala, ka'binynyi alaaga iini ka oona küürü kini kidha ana küüge. <sup>20</sup> Kene

ka ndüünii midhi ku'bu ana i'i ya, kakirnö ten'di ma öödhe mo iini ka oona kara kagirnö en'di yiini kini ka oona ka'duga i'i ma taco tabünnü i'i ka salii'bi.

*Yasu abünnünja ka salii'bi*

(Matta 27.32-44; Lüüka 23.26-43; Yühanna 19.17-27)

<sup>21</sup> Katakümmünü Samaan ya ma Keriwan ya pupa tiya Askander nja Rufas ya, kapusu ada i'i ka tümmü salii'bi a'da aleefe tunggunu co 'dii ndama siga kungngo.

<sup>22</sup> Köö'dö ana Yasu ka 'buugu tiya ana eere a'da Jüljüsa ya, 'buugu ma Dho ma Üüdü. <sup>23</sup> Kanangnga kembelö iini kada tonggoonyo a tümmü tanno 'diiri no, aanu ka tooye.

<sup>24</sup> Kabünnü i'i ka salii'bi, kasümünaana en'di yiini kene ku'bu kafanna muduru kassa kide ata a'dingga ka mada. <sup>25</sup> Kabünnü i'i ka salii'bi ana ndanaaya ka iidümmü kafönü egüsö ligitaka kungngo. <sup>26</sup> Kada rigiri tumma kiki, "UUGAARA MA YAHÜÜDÜ."

<sup>27</sup> Kabünnü i'i ka salii'bi nja kanyooro keera, ya ndama niisö ma kuri, aya ndama niisö ma küüle. <sup>28</sup> [Afa ma sorne ka tiki, "Kakinaana i'i ka oona nja kadu na oroko no."]

<sup>29</sup> A kadu ma nafiinii tasala kini ka'dig'i'di nanggüüdü keela i'i kiki, "O'o nara taga'da la ma Masala na o'o sa karü'böönö a füngngö iidoona. <sup>30</sup> Oolona eyi

yüüdü, nö'dö ku'bu ndama salii'bi!"

<sup>31</sup> A naguugaara ma ka'boge nja katalaana ma seriye kamidhi i'i afe'de, anno teema ana ka oona kiki a'da, "Oolona kadu öccö assa taalo ambaanya toolona eyi yiini! <sup>32</sup> Aaga fa ka Almasiihi tiya, Uugaara ma Israyil ya ö'dö ku'bu ndama salii'bi, amang küdi tiji i'i, ungngo tamma kini." A kanyooro no bünnünja ku'bu nja iini keera no teela i'i afe'de.

*Inde na Yasu*

(Matta 27.45-56; Lüüka 23.44-49; Yühanna 19.28-30)

<sup>33</sup> A 'buugu ta ndüüli ka oona nye'd'de uuru kungngo kadara ka muru ma siiya.

<sup>34</sup> A 'buugu ka ndamuru ma siiya ana ndanaaya kiidoona ya, ikirü Yasu katadhiya ya ko'do iki, "Iloy, Iloy, lima sebakatani?" I'i iki a'da, "Masala, Masala, minna agu o'o ninyi a'a ku'bu?"

<sup>35</sup> A kadu na 'dingnge kete no taföönyö tumma no kiki a'da, "I'i ya ümmünü İliya."

<sup>36</sup> Ömö'di könö tareere a'duga 'banden'di onyo'do ka kembelö, anangnga ka üüdü ma tam'bala amünügü co iini a'da ooye iki, "Aaga öödhü angnga tasala İliya ka ta'dinigi i'i ku'bu ya."

<sup>37</sup> A Yasu tadhiya ko'd'do agiri tanya na eere no eyi.

<sup>38</sup> A ten'di ma la ma Masala törerese ndama oo'do alla aco aa'bu. <sup>39</sup> Uugaara ma nasigira ta'dingnge kete ma

salii'bi kini ka föönyö Yasu ka tadhiya asala i'i ka teyi iki, "Tumma dhorro, ömö'di ya 'Bii'bala ma Masala i'i yungngo."

<sup>40</sup> Ka kanna iiya kide kadhabbu kadinö co ndama ku'b'ba, Mariyom Almajdaliya minggide nja eene, nja Mariyom nüümö ma Yaguub tiya idhilli ya nja Yuüsü, nja Salooma.

<sup>41</sup> Eege kungngo ka kunggeene nja Yasu kalinggo ada iini, kini ka taganna ka Jaliil ya nja tököönö kadhabbu kasirigi co Örsaliim nja iini.

*Tatü'böönö ma Yasu*  
(Matta 27.57-61; Lüüka 23.50-56; Yühanna 19.38-42)

<sup>42</sup> Ka uuru ma tindinaana oona ku'bu a 'buugu kanda siiya, a'da üfürü uuru ma Sa'bidi tö'dö ya. <sup>43</sup> İkiri Yuüsif ya ma Raama, ya taga adaya ma la ma kadiifi ma Yahüdü, i'i aganeene indhgü tauugaara na Masala, ikiri ka takuru rüsü ana eedi aco ka Bilatus, iki iini a'da, anangnga oofo ma Yasu iini. <sup>44</sup> A Bilatus tadhere iini ka föönyö a'da Yasu anda eyi. Kümmünü uugaara ma nasigira indini i'i, "Illi Yasu kada keyi?" <sup>45</sup> Kini ka taföönyö tumma ka uugaara ma nasigira ya, ikiri kafa ka Yuüsif a'duga oofo ma Yasu. <sup>46</sup> İkiri ka taana ten'di ka'dinaka i'i ku'bu ndama salii'bi, kaküdhü i'i ka oona, katü'bü i'i ka la ma oofo iini ka takü'dödene ka 'dakamba. Kikiri ka tagü'dü misi keere

ka inye ma la ma oofo. <sup>47</sup> A Maryom Almajdaliya nja Mariyom nüümö ma Yuüsü tadinö ka 'buugu tiya eene ka anangnga i'i kide ya.

## 16

*Tafiki'dö na Yasu Almasi-  
ihi*  
(Matta 28.1-8; Lüüka 24.1-12; Yühanna 20.1-10)

<sup>1</sup> Ka uuru ma Sa'bidi kanco kürö ya, mikiri Mariyom Almajdaliya nja Mariyom nüümö ma Yaguub nja Salooma kadaana kondho meene kaco tasanna ka Yasu ka oona. <sup>2</sup> Ka takäka ndaadha ka uuru ma Lahada ya, a ndanaaya ka ndö'dö ko'do, kikiri ka co la ma oofo. <sup>3</sup> Keema kindini ajeene kiki a'da, "Mada i'i yungngo atagürü dhembeliili kaja ka inye ma la ma oofo 'bitüngngö?" <sup>4</sup> Kene kadasala co ya, kaasala dhembeliili ka kürüdene a'da ma dhabbu. <sup>5</sup> Kikiri ka co la ma oofo, kasala ömö'di ka temmi ndama nüisö ma kuri, a ten'di tiya 'bassa ya ka oona, a ri'ba tümmü eege.

<sup>6</sup> İkiri ka tiki eene, "Aaga fa tari'ba! Ka asaasa aaga Yasu ya ma Nasira ya bünnünja ka salii'bi ya, itaalo kita, afiki'dö, kita iini kada kanna kide ya i'i yungngo. <sup>7</sup> Lakiini aaga unggeene aaga co tadirina eema a kadalaadene nja Bütrüs, 'I'i a tadhe aaga aco Jaliil, aaga sa kico tassa kini kanna, afa ma tiya iini kada tirina aaga ya kungngo.' <sup>8</sup> Kafiri a kürö

ndama la ma oofo kadhore a ri'ba tümmü eege, ka arünö, kitaalo kadirina ömö'di 'do a ri'ba katümmü eege.

*Yasu atele oona a  
Mariyom Almajdaliya  
(Matta 28.9–10; Yühanna  
20.11–18)*

<sup>9</sup> [Ka Yasu ka fiki'dö ka inde ligitaka so'd'do ka uuru ma Lahada ya, ala oona a Mariyom Almajdaliya ka dhidha mo iini ka tagasoro ngoronggore na oroko no ka oona ka iidümmü kafünü eera no. <sup>10</sup> Mikiři Mariyom ka tunggeene maco tadirina eema a kadalaadene tanno iini, maco maduna eege ka tamüürü kafara 'do. <sup>11</sup> Kitaalo kamma ka tumma tanno oono, kono ka tiki eene a'da i'i afiki'dö ka inde madadinö kini.

*Yasu adele oona a  
kadalaadene keera  
(Lüüka 24.13–35)*

<sup>12</sup> A Yasu tatele oona, ana oona töccö ala oona a kadalaadene töccö keera, a'da kunggunu co a nya. <sup>13</sup> Kikiri ka tafada kadirina eema a türeene ma kadalaadene, kitaalo kamma ka tumma tanno eene.

*Yasu adele oona a  
kadalaadene na ada'baaga  
kafünü unggodho no  
(Matta 28.16–20; Lüüka  
24.36–49; Yühanna 20.19–23;  
Kadafiini 1.6–8)*

<sup>14</sup> Keere kungngo a Yasu tatele oona a kadalaadene tanno iini no ö'dö kada'baaga kafünü unggodho no, a'da kagu eema amana hetti eene kudumma eene taalo kamma nja

takidhö ka nanggeedi tanno eene kanu ka tamma ka kadu tanno adinö kini iini ka fiki'dö no.

<sup>15</sup> İkiri ka tiki eene, "Aaga unggeene aaga co ka 'büdhülü nye'd'de, aaga co tadünnü tumma ma İnjili co a kadu nye'd'de kungno.

<sup>16</sup> "Ömö'di ya amma ya, ambeesedene oolonadene, ömö'di ya taalo amma ya aama. <sup>17</sup> Eema ya ara tö'dö ya kadu na tamma ana eere tiya eede kara tasoro nagana'bu, keema tumma öccö keefe. <sup>18</sup> Kümmü nööni ana iisine, kara tooye tümmü taalo niimö a tagu eege 'do, kamana iisine ka kadu tanno amaara no ka nanggüdü ka'diila."

*Yasu a'diniginja co  
'dotombo'do  
(Lüüka 24.50–53;  
Kadafiini 1.9–11)*

<sup>19</sup> Ka Uugaara Yasu ka ndageema nja kadalaadene tanno iini ya, inynyo 'dotombo'do emmi ka Masala ka niisö ma kuri.

<sup>20</sup> İkiri kadalaadene ka tunggunaana ku'bu kadünnü tumma ma Masala ka na'buugu nye'd'de. A Uugaara tagalinggo nja eene, anangnga türü niini eene ka oona a linggo tanno eene eefe no.]

## İnjiiili Lüüka Tafa'da tumma

Lüüka agarigiri sorne ya nja sorne ma Linggo na Kadafünni, i'i arigiri ada sorne a Yahüüdü nja kadu tanno taalo ka Yahüüdü no. I'i ka eyi tiya iini taalo ataga Yahüüdü, i'i amma ka Yasu. Lüüka eema tumma ma tefe ka 'dii nja linggo tanno Yasu na adho ka fiinii no amang kaja tagussu.

Lüüka aga arigiri ma teenedene tanno Yühanna ya tatambeese ya nja teenedene tanno Yasu. I'i arigiri ma tumma nja linggo tanno Yühanna ya tatambeese ya, nja eema tiya agüünii adene üfürü Yasu tafü'dü linggo niini. Lüüka ala angnga a'da tasaasa na Masala ka kadu nye'd'de. A Yasu tagoolona aka ka maara a nagürüünü kö'dö kada'baaga kafünü eera, adagasoro nagana'bu ka ömö'dii ka oona. Lüüka anangnga tafeene ma tumma ma ömö'dii ma Samira ya amünögü taga Yahüüdü ko'do, ya kanyooro katabbü i'i ya (Lüüka 10). Ala tafeene ma tumma ma 'bii'bala tiya aga'da eema yiini ya, lakiini kini ka tapadaga ka pupa tiya iini ya, a pupa yiini tamma kini a dhodho (Lüüka 15).

Lüüka ala dhügürü nja inde tanno Yasu ka fiki'dö ka inde. Aala oona a kadalaadene tanno iini, kussu a'da i'i efe ka 'dii.

Yasu iki a'da ara i'i tagürünü Koronggore ya Insili ya kene, ikirii ka tafada aco 'dotombo'do.

<sup>1</sup> Kadu kadhabbu karigiri tumma ma eema tiya agalinggo adene kaja ka söödö ya. <sup>2</sup> Eege karigiri eema yüüdi ka taföönyö ka kadu tanno adinö ka eema tiya ka dhidha ya, kadagalinggo ada a Yasu no. <sup>3</sup> İkiri a'a ka tagüri tumma na miini no tekere afa meene ka tafü'düdene ka dhidha nye'd'de kungngó, nagiri nunggu o'o no Tiyafilos na ömö'dii ya adho ka fiinii dhorro ya, <sup>4</sup> amang küdü tussu a'da ka dhorro tumma nüüdü ka taföönyö no.

*Tadiridene ma teenedene ma Yühanna ya tatambeese ya*

<sup>5</sup> Ka ürüünü ma tauugaara tanno Hirüdüs, ka anya ma Yahüüdiya, aganna ta'boge kide ana eere a'da Sakariya ama 'bügööri tiya Abiya nja aka tammo iini mana eere a'da Alisabet 'bandaada ma Harüün. <sup>6</sup> Sakariya nja Alisabet kümmü tumma ma Masala ana eedi dhorro kaafa kide dhindho. <sup>7</sup> A eege ka ndakidhindharu a laala titaalo kene kudumma Alisabet ka tamele.

<sup>8</sup> İkiri uuru ma linggo tanno Sakariya nja kadu tanno iini ka ndö'dö, ikirii ka co talinggo ka Masala kidha. <sup>9</sup> Tafiigi ma linggo ma ka'boge ikirii tamuduru ka 'dïnggö kini ma ta'd'dïgi kondho ku'bu. İkiri ka co

la ma Masala.<sup>10</sup> A'da kadu kungngo kürö kadhabbu kafara ka Masala a'da ma dhüögö kondho.

<sup>11</sup> A tadhingga ma Masala tatele oona ndama nüüsö ma kuri ma fü'deene ma kondho ka tadhüögö kide mo. <sup>12</sup> İkiri Sakariya ka tasala tadhingga asin'i ko'do a ri'ba tümmü i'i. <sup>13</sup> A tadhingga tiki iini, "Sakariya, fa tari'ba, maföönyö Masala fara yüüdü, aka müüdü Alisabet mara tagüröönö ma teene 'bii'bala nanangnga eere iini a'da Yühanna. <sup>14</sup> O'o ta'deema a kadu tadhodho kadhabbu ka teenedene tanno iini. <sup>15</sup> Kudumma iini ka tiidhindhü kidha ma Uugaara. Taalo ara tooye ngeeli nja eema tiya üüfü ya, adigine a Koronggore tiya Insili ya a'da aleefe ka nüümö ka feelü. <sup>16</sup> Afada a kadu ma Israyil kadhabbu unggu eege ka nafiin'i tiya Uugaara Masala meene mo. <sup>17</sup> Ara tunggeene ka Masala kidha, a koronggore tiya İliya a türü tanno iini, tafada a kafaafa uuraana eege koona nja laala, a kadu na oroko no talinggo eema ya adho ka fiin'i ma ta'dara ya, amang kene tindinaana kadu ka Uugaara ku'bu."

<sup>18</sup> A Sakariya tiki a tadhingga, "Ara a'a tessu tumma no nya? Sa a'a tadharu aka meede manda dharu afe'de."

<sup>19</sup> A tadhingga tapadaga tumma iini iki, "A'a na Jibrayiil, na'dingnge ka Masala kidha. Oogo

magürünü a'a a'da nadirina tumma na o'o.<sup>20</sup> A 'bitingngö ya ara onggo'do müüdü timi'didene nitaaal nara tessu ka teema idhi a 'bii'bala teenedene kudumma üüdü taalo namma ka tumma tanno eede ara o'o tüü nggeege idhi a tumma neede tö'dö timin'da."

<sup>21</sup> A kadu takamoodo ku'bu kürö ma tindhígí Sakariya kadhere kini ka tutögü co la ma Masala. <sup>22</sup> Kini ka öö'dö kürö, taalo ussu ka teema nja kadu, kikiri ka tessu a'da i'i asala nüümö ya efe ya ka la ma Masala eema nja eene ana iiwine itaalo alneege a nüünö.

<sup>23</sup> Ka Sakariya ka ndatiümö füngngö ma linggo tanno iini ya, ikiri ka tapadaga co 'dii kita iini. <sup>24</sup> Ndama naganuuru tanno miini no aka miini Alisabet tagüröönö maküdhü eyi yoono ma tagidi nagatereene küdümmü, miki,<sup>25</sup> "Uugaara magüünü tumma no ana a'a ka naganuuru tanno oono ka tassa kede mabbü modolo kede ka oona ka kadu ka teene."

### Teenedene na Yasu

<sup>26</sup> Nagatereene ma tagüröönö tanno Alisabet ka ndö'dö ka iidümmü kafünü unggodho ya, mikiri Masala ka kürünü tadhingga Jibrayiil ka anya minggide mana eere a'da Nasira ka Jaliil,<sup>27</sup> ka 'badaada minggide ma tölömü mana eere a'da Mariyom, ömö'di inggide agümmünü oogo

ku'bu, ana eere a'da Yüüsif  
a 'bandaada ma Dawud.\*  
<sup>28</sup> A tadhingga co kono,  
iki oono, "A'a nööjülü o'o,  
natengese o'o ka kadu  
ka teene unggodho o'o  
kungngo! Uugaara taneeene  
nja o'o."

<sup>29</sup> A ri'ba tümmü oogo  
ma tagesenana eedi ku'bu  
miki a'da tööjülü öjö  
egee kungngo 'bitingngö.  
<sup>30</sup> İkiri tadhingga ka tiki  
oono, "Mariyom, fa tari'ba,  
naduna o'o ta'diila ka  
Masala kidha. <sup>31</sup> Ara o'o  
tagüröönö neene 'bii'bala  
nanangnga eere iini a'da  
Yasu. <sup>32</sup> Ara tüdhindhi ara  
tana eere a'da 'Bii'bala ma  
Masala tammo ko'do mo,  
a Masala Uugaara mara  
tanangnga i'i ka tauugaara  
tanno pupa tiya iini Dawud.  
<sup>33</sup> A tauugaara ma 'dii tiya  
Yaguub ta'billi a tauugaara  
niini taalo kara titaalo."

<sup>34</sup> A Mariyom tiki a tadhingga,  
"Ara tumma no  
tö'dö nya a'da taalo a'a  
nussu ömö'dii ya miide ya?"

<sup>35</sup> A tadhingga tapadaga  
tumma oono iki, "Koronggore  
ya Insili ya ara  
tadigi küdü ka oona, a  
türü ma Masala tammo ka  
'dotombo'do mo taküdhü  
o'o ka oona ka tanangnga  
tagüröönö o'o, a 'bii'bala  
yüdü ka teene ya a  
tana eere a'da 'Bii'bala  
ma Masala ya Insili ya.  
<sup>36</sup> Mündä Alisabet ma  
siliga ma o'o manda dharu  
mo mungngo magüröönö  
a nagatereene miini ka

ndiidümmü kafünü unggodho, a'da kiki kadu a'da  
mamele.<sup>37</sup> Kudumma niimö  
ma takilinigi Masala co  
kungngo itaaloo."

<sup>38</sup> A Mariyom tiki, "A'a na  
madasaga tammo Uugaara,  
a tumma nüüdü ka tiraana  
no, fa kene küünidene ana  
a'a." İkiri tadhingga ka  
tunggeene.

### *Mariyom meefe tassa ka Alisabet*

<sup>39</sup> Mükirii Mariyom ka  
tunggeene ka naguuru tanno  
miini no mareere maco  
anya ma ka na'dikinya ma  
Yahüüdiya. <sup>40</sup> Malla maco  
kita a Sakariya mööjülü  
Alisabet. <sup>41</sup> Ka Alisabet  
ka taföönyö tööjülü na  
Mariyom no, a 'bii'bala tafiri  
ko'do kono ka feelü, a Alisabet  
tadigini a Koronggore  
tiya Insili ya. <sup>42</sup> Ma'dili  
ko'd'do miki, "Manangnga  
Masala baraka o'o ka iiya  
ka söödö nye'd'de kungngo,  
manangnga baraka o'o ma  
'bii'bala tiya üüdü ka feelü  
ya. <sup>43</sup> A'a na mada a niimö  
ma Uugaara tiya eede tö'dö  
tassa kede. <sup>44</sup> Kede ka  
taföönyö tööjülü nüüdü,  
a 'bii'bala tafiri ko'do  
kede ka feelü a dhodho.  
<sup>45</sup> A'diila nja o'o küdü ka  
tamma tanno ö'dö nja oono  
no ndama Uugaara kara  
talinggo adene."

### *Tüüsü ma Mariyom*

<sup>46</sup> A Mariyom tiki,  
"Eedi yeede ïndhigü Uugaara  
ko'do,

- 47 a koronggore yeede tadhodho ada Masala tammo oolona a'a mo.
- 48 Kudumma oono ka tagiirii tiicolo ma eedi tiya madasaga tammo oono.
- Ndama uuru tanno ara sere in'dili tindhigii a'a ko'do.
- 49 Kudumma ma eema tiya idhindhi ya Masala tammo ana türü mo kadagalinggo ada a'a ya eere yoono a'da ma insili.
- 50 Mana 'bangnga ma kadu tanno ari'ba oono no, mosso ka sere tiya maco ka tiya.
- 51 Magalinggo a türü ma niisö tanno oono, maparsaana kadu na 'dinigi oona neene coo'do no maga'da tumma neene ka nanggeedi no.
- 52 Muurugu naguugaara keere ka tauugaara tanno eene, mara ka ta'diniga kadu na iicolo ka nanggeedi no ko'do.
- 53 Manangnga na iiire kagu eege no ka tüüsü mara ka tuuru kadu na üüsü no ka tino ana iisine 'dongngönyö.
- 54 Oogo mafa ka tumma tanno oono ka tadirina a kafaafa ma angnga no, oogo mandöö'dö takinyigi tasaga yoono Israyil, magiigii 'bangnga miini.
- 55 Afa moono ka tadirina Abrahiim nja kadaada miini, a'da ara oogo tafa kene ta'billi."
- 56 A Mariyom taganeene nja Alisabet a nagatereeene kiidoona massa ndapadaga co 'di kita oono.
- Teenedene na Yühanna tatambeese*
- 57 Ka uuru ma teene tanno Alisabet ka ndö'dönja oono ya, mikirii ka tageene 'bii'bala. 58 A siliga moono nja kadu tanno akete kono no taföönyö a'da Uugaara ala 'bangnga miini ma dhabbu mo, kikirii ka öö'dö kadhodho nja oono.
- 59 A Alisabet tiyyü füngngö iidümmü afünü iidoona ya, a kadu tö'dö ma tara 'bii'bala kanangnga eere ma pupa tiya iini iini a'da Sakariya. 60 Mikirii niimö ka anu miki a'da, "Ara tana eere a'da Yühanna."
- 61 A kadu tiki oono, "Taalo ömö'di ka siliga tiya üdü ana eere nggeege." 62 Ikiri kadu ka tage'de pupa ma 'bii'bala kindini i'i, "Ara o'o tanangnga eere a 'bii'bala a'da mada?"
- 63 Yungngo a Sakariya ka tarangnga maraayo, ikiri eere kide a'da Yühanna, a kadu tadhere nye'd'de kungngo. 64 A Sakariya tadhe ko'do atinggildhe ka onggo'do alneege ana tumma anangnga ta'diila a Masala. 65 A kadu nye'd'de kungngo tasini ko'do a ri'ba tümmü eege. A tumma no tadhala ku'bu a kadu

teema iini ka naanya ma  
Yahüüdiya ka oona 'do.

66 A kadu na föönyö tumma  
no tadhere ka indineene,  
"Bii'bala ya 'dee ara ta  
minna?" Kudumma a türü  
tanno Masala kungngo iini  
ka oona.

*Sakariya amana ta'diila a  
Masala*

67 A Koronggore ya Insili  
ya tadigi ka pupa tiya  
Sakariya ka oona eema  
ta'diila a Masala iki,

68 "Aaga nangnga ta'diila Uu-  
gaara, Masala ma Is-  
rayil,

kudumma oono ka  
öö'dö ka toolona kadu  
noono.

69 Magürünü tatoolona ya  
ïdhindhi ya kaja  
ndama 'bügöörö tiya  
tasaga tiya oono  
Dawud.

70 Afa moono ka tageema  
a nagonggo'do ma na-  
gane'bi tanno oono na  
insili no 'billi,

71 mara toolona angnga ka  
diidi ma angnga,  
nja tanno akirimi  
angnga no nye'd'de  
kungngo.

72 Mara tala 'bangnga a  
kafaafa ma angnga,  
magüigü tumma noono  
ka tamid'aana na in-  
sili no,

73 tumma noono ka  
tamid'aana nja pupa  
tiya aja Abrahiim no,

74 a'da ara oogo toolona  
angnga ka diidi ma  
angnga,  
amang kaja tafa tari'ba,  
angnga tagümmü

oogo a nanggeedi  
dhorro.

75 A angnga taga kadu  
tanno a'diila kinsili  
ka nanggeedi kidha  
moono,  
a naganuuru ma tefe ka  
'dö tanno aja nye'd'de  
kungngo.

76 O'o 'bii'bala, ara o'o  
ta ne'bi tiya Masala  
tammo ko'do mo,  
na o'o tooso ka Uugaara  
kidha na o'o co tindi-  
naana fiinii iini ku'bu,

77 na o'o talaana kadu noono  
amang kene tessu  
fiinii ma toolonadene,  
ma ta'duga tatoroko  
eene ka oona,

78 Masala maaaja mana  
'bangnga mana  
muuyu,  
mara ta'dara töyeene  
ma toolonadene ma  
takara kaja ka oona  
ndama fiinii ma  
ndanaaya.

79 Öyeene ada ka kadu tanno  
emmi ka talüllü  
nja koronggore ma inde,  
ara ka talaala angnga ka fiinii  
tiya a'diila ya."

80 A 'bii'bala taginggiri-  
dene ka tuu'da nja korong-  
gore, ada kananaga co dhüile  
assa ka ndadele oona Israyil.

## 2

*Teenedene na Yasu  
(Matta 1.18-25)*

<sup>1</sup> Ka nagürünü tanno  
miini no kagöö'dö tumma  
ndama uugaara tiya dhabbu  
ya ma Rööma ya, Akustus

Kayisar, a'da a kadu tinnidene ka naanya ma Rööma koona nye'd'de kungngo.<sup>2</sup> Tineene na dhidha no euge kamiini, ka ürüünü tiya Kariniyus kada uugaara ma Süüriya ya.<sup>3</sup> A kadu tikiiri ka tunggeene kaco naanya tanno eene, ma co takiri nagereene neene ku'bu.

<sup>4</sup> İkiri Yüüsif ka tunggeene ndama anya ma Nasira ka Jaliil matra co Beetlaham ka Yahüüdiya anya ma Dawud ya siliga tiya iini ya.<sup>5</sup> Miini kara co takiri nagereene neene ku'bu i'i nja 'bala tammo iini Mariyom, a'da magüröönö.<sup>6</sup> Kene ka ndö'dö ka Beetlaham ya, ikiri teene ka öö'dö ka Mariyom.<sup>7</sup> Mikiri ka tageene 'bii'bala ma dhidha kada miide, maküdhü i'i ka oona ma'düürü i'i ka ma ma kuri ma leefo, a 'buugu ma fungngö ka titalo ka la ma kafala.

### *Katasaana nja kadhangga*

<sup>8</sup> Ka lodho tiya miini ya katasaana kinggide kaguri ana eema ma eriidö, kalagalanjaana kide ooso kungngo.<sup>9</sup> İkiri tadhangga ma Masala ka tatele oona eene a türü na Uugaara ta'dara kene ka oona a ri'ba tümmü euge dhindho.<sup>10</sup> İkiri tadhangga ka tiki eene, "Aaga fa tari'ba kudumma eede nö'dö a'a a tumma aaga kühindhi ma tanangnga kadu ka tadhodho nye'd'de kungngo.<sup>11</sup> Ka uuru tanno ageenenja Tatoolona yaada, ka anya

tammo Dawud, Almasiihi ya Uugaara ya.<sup>12</sup> Ara aaga tussu a'da tumma neede ka dhorro ara aaga taluna 'bii'bala ka taküdhü oona afüngngö ka ma ma kuri ma leefo."

<sup>13</sup> Kadhimü ka kadhangga ka tatele oona kadhabbu, anno tö'dö ku'bu ndama a 'dotombo'do küüwe tüüsü kafünögü Masala ko'do.

<sup>14</sup> "Aaga nangnga tüdhindhi a Masala ka 'dotombo'do, a ta'diila ka 'büdhülü nja kadu tanno oona ka'diila nja eene no."

<sup>15</sup> Ka kadhangga ka ndanyalagaago kene ka oona kaco a 'dotombo'do ya, kadirinaana tumma eene ka oona kiki, "Kico aago Beetlaham tassa ka tumma tanno a Masala ka tirina angnga no."

<sup>16</sup> Kikiri kico areere kaduna Mariyom nja Yüüsif nja 'bii'bala kafüngngö ka ma ma kuri ma leefo.

<sup>17</sup> Kene ka ndadönö ka 'bii'bala ya, kikiri ka tagadünögü eene afa ma tiya tadhangga ka tagadünnü ma 'bii'bala tiya kungngo.<sup>18</sup> A kadu na föönyö tumma no, tadhere ka eema tiya katasaana kadeema ya.<sup>19</sup> A Mariyom taafa ka tumma tanno nye'd'de mümmü oono madinigöögö miini dhorro.<sup>20</sup> A katasaana tafada küüwe tüüsü kafünögü Masala ko'do ka eema tiya eene ka tadinö kide kataföönyö ka kadhangga kada tirina eene ya.

<sup>21</sup> Ka füngngö tiya 'bii'bala ka ndö'dö iidümmü afünü iidoona ya, keedhe 'bii'bala kanangnga eere iini a'da Yasu afa ma tiya tadhangga ka tanangnga iini a'da müfürü Mariyom tagüröönö ana i'i.

*Kö'dö a Yasu ka la ma Masala*

<sup>22</sup> Ka uuru ma tagala oona tiya eene ka ndö'dö afa ma seriye tiya Müüsa ka tiki, kikirii ka 'duga Yasu kaco Örsaliim iini ma co ndümmünü i'i a Masala.  
<sup>23</sup> Seriye ya Masala ya kirinja ka sorne ya iki a'da, "Aka mara teene 'bii'bala ya dhidha kada miide, ümmününja a Masala."\*  
<sup>24</sup> Kene kara türri 'bii'bala ya, köö'dö ana alambo eera afa ma seriye ma Masala ka tiki.†

<sup>25</sup> Ömö'dü inggide aga kannka ka Örsaliim ana eere a'da Samaan, ümmü tumma ma Masala ana eedi dhorro a Koronggore ya Insili ya yungngo iini ka oona ïndhigü toolonadene na Israyil. <sup>26</sup> A Koronggore ya Insili ya tiki iini, "Taalo o'o nara teyi a'da taalo o'o nadinö ka Almasiihi tiya Uugaara ya." <sup>27</sup> A Koronggore tüögü Samaan ko'do, öö'dö ka la ma Masala. Kikirii ka öö'dö ana Yasu ma tara tüünö ada taanyara iini afa ma tiya seriye ka tiraana ka sorne ya kungngo. <sup>28</sup> İkiri Samaan ka tabamba i'i ana iisine

anangnga ta'diila a Masala iki,

<sup>29</sup> "Ka Uugaara, nafa o'o ka tumma tanno üüdü afa müüdü ka takiki kungngö,  
 sa apa ka tasaga tiya üüdü eyi ta'diila kungngö.

<sup>30</sup> Asa a'a tadinö ka toolona tanno üüdü ana ööye tiya eede,

<sup>31</sup> yüüdü ka takindinaana ku'bu ka kadu kidha nye'd'de ya,

<sup>32</sup> töyeene ma talaana ka jeene  
 ma tanangnga türü a kadu tanno üüdü Is-rayil."

<sup>33</sup> A Yüüsif nja Mariyom tadhere ka eema tiya Samaan ka tagadünnü ma Yasu ya. <sup>34</sup> İkiri Samaan ka anangnga baraka eene ka oona iki a niimö tammo iini Mariyom, "'Bii'bala ma Masala mö'dö ana i'i ma kadu töccö kara taama, anno toolonadene ka Israyil, Masala mala eene meene ka talingga i'i, <sup>35</sup> ara tadhere ünggü meene ka nanggeedi mo kürö. Afa kulu'ba mana kuri ma tadhere eedi yüüdü."

<sup>36</sup> Aka minggide maka ne'bi, mana eere a'da Hanna 'badaada ma Fanwil ya, siliga ma Ashiir ya. Manda dharu, maka aneene nja nyuri tiya oono a nagürüünü ka iidümmü kafünü eera, <sup>37</sup> magu'du nagürüünü kukumu kadu ka egüsö kafünü egüsö. Ma'danaga

\* **2:23** 2.23 Tö'dö kürö 13.2,12 † **2:24** 2.24 Lawiin 12.8

co la ma Masala mümmü oogo ana eedi dhorro mümmü tenege mafara kono osooso nja naganuuru kungngo.<sup>38</sup> Mö'dö ka uuru tanno miini no mafünügü Masala ko'do madageema tumma a 'bii'bala nja kadu tanno ïndhígí Masala a'da moolona Örsaliim mo.

### *Tapadaga co Nasira*

<sup>39</sup> A kene ka ndafara eema nye'd'de afa ma tiya sorne ma Masala ka tiki ya, kikirii ka tafada kaco Jaliil ka anya tammo eene ka Nasira.<sup>40</sup> A Yasu taginggiridene ana türü adigine a ta'dara a ta'diila ma Masala.

### *Yasu ungngo ka la ma Masala*

<sup>41</sup> A nüümö ma Yasu nja pupa tiya iini tunggeene kaco Örsaliim, ka Taanyara ma tada'da ka eriidö turi kungngo a nagürüünü.<sup>‡</sup>

<sup>42</sup> Ka nagürüünü tanno Yasu ka ndö'dö kada'baaga kafünü eera ya, kikirii ka siringö co Örsaliim ka taanyara afa ma tiya eene ka tüünü a nagürüünü ya kungngo.<sup>43</sup> Ka taanyara ka nco a kürö kikirii ka tafada, a Yasu toorogo ütü ka Örsaliim a'da taalo Yüüsif ussu nja Mariyom.

<sup>44</sup> Eege kiki kide a'da i'i ungngo ka kadu ka teene, katagunggeene uuru in'dili kikirii ka tawwa i'i ka kadu ka teene eege nja kadu tanno ussu i'i no.<sup>45</sup> Kitaalo kaduna i'i, kikirii ka tafada kaco Örsaliim tawwa i'i.

<sup>46</sup> Katüümö füngngö iidoona kassa ka tuna i'i ka la ma Masala emmi nja katalaana ma seriye atoodo ka tumma tanno eene indini eege.

<sup>47</sup> A kadu na toodo kini no nye'd'de kungngo tadhere ka tussu eema tanno iini nja tapadaga tumma eene.

<sup>48</sup> Aga Mariyom nja Yüüsif ka ndasala i'i, kuurugu oona ku'bu a nüümö tiki iini, "Bii'bala eede minna agu o'o natagüünü ana ungngo kungngo? A'a nja pupa tiya üdüdü kadhwügü ungngo ma tawwa 'buugu ma o'o 'do."

<sup>49</sup> İkiri ka tiki eene, "Kawwa aaga 'buugu ma a'a amana? Taalo aaga kussu a'da ara a'a tanna ka 'di tiya Pupa tiya eede?"<sup>50</sup> Eege taalo kassumunaana ka tumma tanno iini ka teemaga co eene no.

<sup>51</sup> A Yasu tunggeene nja eene kaco Nasira taalo asilli tumma neene, a nüümö tagümmü tumma na miini no ka eedi mafa kide.

<sup>52</sup> A Yasu taginggiridene ka tuu'da nja ta'dara ka Masala kidha nja kadu.

## 3

### *Talaana na Yühanna ya tatambeese ya*

(Matta 3.1-12; Murkus 1.1-8; Yühanna 1.19-28)

<sup>1</sup> Ka Uugaara Tibaariyos Kayisar ka ndagu'du nagürüünü kada'baaga ana awwa ka tauugaara tanno iini ya, aga uugaara Bilatus Albunti ka Yahüüdiya,

<sup>‡</sup> 2:41 2.41 Tö'dö kürö 12.1-27

a Hirüdüs taga uugaara ma Jaliil, a'da aga uugaara örre yiini Filibüs ka Itooriya nja Tarkunitis, Lisanios taga uugaara ma Abilina.<sup>2</sup> Ka naguuru tanno Hanan nja Kiyaafa kada naguugaara ma ka'boge ma la ma Masala, ka naguuru tanno miini no ka köö'dönja tumma na Masala a Yühanna 'bii'bala ya Sakariya a'da ungngo ka dhiile.<sup>3</sup> İkiri ka co a naanya tanno akete ka Ürdün no ümmünü kadu a'da köö'dö tambeesedene amang kene taadha ka tatoroko.<sup>4</sup> Afa ma ne'bi Asaiya ka takiri ka sorne,

"Kafara takeere ka dhiile,  
Aaga indinaana fiinii ka Uu-  
gaara ku'bu,  
ka tadhidho.

<sup>5</sup> A nagoolo tadigine  
nye'd'de,  
a na'dikinya nja nakürünggürü  
tadhigiga ku'bu

a nafiinii nabuko'dolengge  
no tadhidho

a narukuteene takii'dinja  
ku'bu.

<sup>6</sup> A kadu nye'd'de tiji toolon-  
adene na Masala."<sup>\*</sup>

<sup>7</sup> A Yühanna tiki a kadu tanno öö'dö ka tambeese kini no, "Aaga na laala ma nööni no, mada agalaana aaga, aaga tüüsö a tagoroo'bo tanno unggunu tö'dö no?

<sup>8</sup> Aaga üünii eema ya a'diila ya amang kada tussu adene a'da kaadha aaga ka tatoroko, aaga tafa teema ka nanggeyi tanno ada a'da Abrahiim ya pupa tiya ada,

İkiri a'a ka tiki aaga, Masala mana türü mata'bele nügiisi no manangnga eege kada laala tiya Abrahiim.<sup>9</sup> A 'bitingngö asa kafa tananja ka 'bereere ma fa, fa ya taalo eene iiye ka'diila ya ara ta tendhe apüğünja ka issi."

<sup>10</sup> A kadu tindini i'i kiki, "Ara ungngo tönynyö 'bitingngö?"

<sup>11</sup> İkiri Yühanna ka tapadaga tumma eene iki, "Ömö'dü ya ana en'di eera ya, agona a tiya a ten'di ka titaalo kini ya, a ömö'dü ya kuri ka tanna kini ya, osso kide nja ömö'dü tiya 'döngngönyö ya."

<sup>12</sup> A kadu na ama tulu'ba no tö'dö kini ma tambeese eege kindini i'i kiki, "Ka Tatalaana, ara ungngo tönynyö 'bitingngö?"

<sup>13</sup> Iki eene, "Aaga fa tama tulu'ba ka kadu adhabbu ada yaada ka asaasa kene ya."

<sup>14</sup> A nasigira tindini i'i, "Ara ungngo tönynyö?"

Iki eene, "Aaga fa tarumuru eema ka kadu a rüsü aaga fa tümmü kadu a korokoro. Aaga amma ka tiya a naguugaara tanno ada kamaana aaga ya."

<sup>15</sup> Kadu 'do kakindhigü Almasiihi kindini ajeene ma Yühanna kiki, "Almasiihi yungngo?"

<sup>16</sup> İkiri Yühanna ka tiki eene, "Ara a'a tambeese aaga a 'büdü, lakiini ömö'dü inggide ara tö'dö ana türü adagii'bi a'a, taalo a'a nara tampaanya tinggili meena

\* 3:6 3.6 Asaiya 40.3-5

ma egüide tiya iini, i'i yungngo ara tambeese aaga a Koronggore tiya Insili ya nja issi. <sup>17</sup> Si'diga ma ungngo iini ka niisö miini kara tuunu migile ka 'deeli uurugu co 'boode ara kafü issi na taalo kara teyi no ka koforo."

<sup>18</sup> A Yühanna tageema tumma na 'diila no nja kadu ma eema dhabbu a'da kaadha ka nafüni tanno eene no. <sup>19</sup> A Yühanna tageema nja Hirüdüs ya uugaara ya, kudumma iini ka'duga aka ma örre tiya iini Filibüs mana eere a'da Herüdiya atagalinggo eema ya toroko ya dhabbu. <sup>20</sup> A Hirüdüs tagusu tatoroko ka tanno illi no niini ka tümmü Yühanna unguu ka pabuusu.

*Tambeesedene na Yasu  
(Matta 3.13-17; Murkus 1.9-11)*

<sup>21</sup> A kadu tagambeesedene nye'd'de kungngo, a Yasu tagambeesedene tekere, a kini ka ndeema nja Masala ya, a 'dotombo'do tatanfa'da. <sup>22</sup> A Koronggore ya Insili ya tidhi kini ka oona kafeene nja ndalambo. A tumma tö'dö ndama 'dotombo'do kiki, "O'o na 'Bii'bala yeede ka asaasa i'i dhorro ya, ka'diila oona eede ma o'o."

*Kadaada ma Yasu  
(Matta 1.1-17)*

<sup>23</sup> Ka nagürüünü tanno Yasu ka ndö'dö kukumu ömö'dü kaco iisine ikiri ka tümmü linggo niini a kadu tiki kide a'da 'bii'bala ya Yüüsif,

'bii'bala ya Aali, <sup>24</sup> 'bii'bala ya Matasat, 'bii'bala ya Lawi, 'bii'bala ya Maliki, 'bii'bala ya Yanna, 'bii'bala ya Yüüsif, <sup>25</sup> 'bii'bala ya Matasiyas, 'bii'bala ya Amus, 'bii'bala ya Nahüm, 'bii'bala ya Hasili, 'bii'bala ya Najayi, <sup>26</sup> 'bii'bala ya Mat, 'bii'bala ya Matasiyas, 'bii'bala ya Shamii, 'bii'bala ya Yüüsif, 'bii'bala ya Yahüusa, <sup>27</sup> 'bii'bala ya Yünan, 'bii'bala ya Riisa, 'bii'bala ya Zarbabil, 'bii'bala ya Shaltiil, 'bii'bala ya Niiri, <sup>28</sup> 'bii'bala ya Maliki, 'bii'bala ya Adi, 'bii'bala ya Küsam, 'bii'bala ya Elmidaam, 'bii'bala ya İira, <sup>29</sup> 'bii'bala ya Yashu, 'bii'bala ya Aliyaser, 'bii'bala ya Yüriim, 'bii'bala ya Matasat, 'bii'bala ya Lawi, <sup>30</sup> 'bii'bala ya Shamön, 'bii'bala ya Yahüusa, 'bii'bala ya Yüüsif, 'bii'bala ya Yünan, 'bii'bala ya Aliyakiim, <sup>31</sup> 'bii'bala ya Maliya, 'bii'bala ya Minan, 'bii'bala ya Matasa, 'bii'bala ya Nasaan, 'bii'bala ya Dawud, <sup>32</sup> 'bii'bala ya Yessi, 'bii'bala ya Obiid, 'bii'bala ya Büwas, 'bii'bala ya Salmöön, 'bii'bala ya Nahashön,

33 'bii'bala ya Aminadab,  
   'bii'bala ya Admi,  
   'bii'bala ya Arni,  
   'bii'bala ya Hasrüün,  
   'bii'bala ya Fares,  
   'bii'bala ya Yahüusa,  
   <sup>34</sup> 'bii'bala ya Yaguub,  
   'bii'bala ya Ishak, 'bii'bala  
     ya Abrahiim,  
   'bii'bala ya Tareh, 'bii'bala  
     ya Nahür,  
 35 'bii'bala ya Sürüüp,  
   'bii'bala ya Raw,  
   'bii'bala ya Falij, 'bii'bala ya  
     Abir,  
   'bii'bala ya Shaleh,  
   <sup>36</sup> 'bii'bala ya Ginan,  
   'bii'bala ya Arfakshaad,  
   'bii'bala ya Sam,  
   'bii'bala ya Nööh, 'bii'bala  
     ya Lamak,  
 37 'bii'bala ya Mütüsaleh,  
   'bii'bala ya Akanuk,  
   'bii'bala ya Yard, 'bii'bala ya  
     Mahaliil,  
   'bii'bala ya Ginan, <sup>38</sup> 'bii'bala  
     ya Anush,  
   'bii'bala ya Shiit, 'bii'bala ya  
     Adam,  
   'bii'bala ma Masala.

## 4

*Ta'b'badene na Yasu*  
*(Matta 4.1-11; Murkus*  
*1.12-13)*

<sup>1</sup> A Yasu tafada ka Ri ma Ürdün a Koronggore ya Insili ya tadigi kini ka oona, a Koronggore tükü i'i ko'do aaco dhülli. <sup>2</sup> Adaganna ka dhülli a füngngö ukumu kadu keera, Ebliisi ka ta'b'ba i'i itaalo aagu niimöö, kini ka ndatiimö

füngngö ya miini ya, ikiri  
 iiire ka tümmü i'i.

<sup>3</sup> Ikiri Ebliisi ka tiki iini,  
 "Üürü o'o na 'Bii'bala ma  
 Masala ya, iki a mïsi tammo  
 ma tem'bele kada miteene."

<sup>4</sup> A Yasu tiki iini a'da, "Iki  
 sorne a'da, 'Taalo miteene  
 oogo ma ungnego ömö'di  
 keefe ka 'dï iini unggodho  
 oogo."\*

<sup>5</sup> A Ebliisi tunggu i'i co  
 anya tammo adhonggoro mo  
 ko'd'do aala i'i ka eema  
 ma tauugaara ma 'büdhülü  
 nye'd'de. <sup>6</sup> Iki iini, "Ara  
 a'a tanangnga eema ya o'o  
 nye'd'de kungngo a türlü mi  
 ini, kudumma iini ka ananja  
 a'a nara tanangnga ömö'di  
 tiya eede ka asaasa i'i ya.  
<sup>7</sup> Kündü kara tüürü ku'bu  
 namma kede ana eedi ya,  
 ara eema ya ta tiya üüdü  
 nye'd'de kungngo."

<sup>8</sup> A Yasu tiki iini a'da,  
 "Sorne iki a'da, 'Üürü ku'bu  
 ana küüge kidha ma Masala  
 Uugaara müüdü nalinggo  
 ada oono unggodho oogo.'†"

<sup>9</sup> Ikiri Ebliisi ka 'duga i'i  
 aaco Örsaliim iini, unggu i'i  
 co 'dasala ma la ma Masala  
 ko'do assa ka tiki iini, "Üürü  
 o'o na 'Bii'bala ma Masala  
 ya, pügü eyi yüüdü caa'bu  
 ndama kita. <sup>10</sup> Kudumma  
 sorne ka tiki a'da,  
 'Ara Masala tiki a kadhangga  
 ta noono köö'dö tafa  
 küdü.

<sup>11</sup> Kara taada o'o ana iisine  
 tanno eene amang ka  
 mïsi tafa türinï o'o ka  
 awwa.'‡"

\* **4:4** 4.4 Seriye ya eera ya 8.3    † **4:8** 4.8 Seriye ya eera ya 6.13    ‡ **4:11** 4.11  
 Tüüsü ma nakaaru 91.11-12

<sup>12</sup> A Yasu tiki iini, "Iki sorne a'da, 'Fa ta'b'ba Masala Uugaara müüdü ka oona.'<sup>§</sup>

<sup>13</sup> Ka Ebliisi ka ndafara ta'b'baana niini ïn'dili ya ïkiri ka tinyi i'i ku'bu tik-ingga.

*Yasu atta linggo niini ka Jaliil*

(Matta 4.12-17; Murkus 1.14-15)

<sup>14</sup> A Yasu tafada a türü ma Koronggore aaco Jaliil a tumma niini tussu adene ka naanya ka oona nye'd'de kungngo. <sup>15</sup> A tagalaana kadu ka naala ma talaana tanno eene, a kadu nye'd'de takindhig'i i'i ko'do.

*Kadu ma Naasira kanu ka Yasu*

(Matta 13.53-58; Murkus 6.1-6)

<sup>16</sup> ïkiri Yasu ka co Nasira kita iini ka tasere kide ya, aaco la ma talaana ka uuru ma Sa'bidi afa ma tiya iini katadaada ya kungngo, ïkiri ka fiki'dö ma türi tumma ka sorne. <sup>17</sup> Kanangnga sorne ma ne'bi Asaiya iini, ïkiri ka tafa'da sorne aluna 'buugu ya iki a'da,

<sup>18</sup> "Koronggore ya Uugaara unngno eede ka oona, kudumma oono ka kürünü a'a nöö'dö teemaga tumma na'diila no co a kadu tanno asanggeema no.

Nuurugu kadu na ka pabusu no küröö, nafa'da kisinsoro ka ïkiye,

napa ka kadu tanno anna ka tadasaga no.

<sup>19</sup> Nadirina tumma a kadu ma ürüünü tiya Uugaara ka ndö'dö toolona kadu noono."

<sup>20</sup> ïkiri ka tapudaana sorne ka oona, ümmünü ömö'di tiya afa ka la ma talaana ya, ara ka temmi, a kadu na ka la ma talaana no nye'd'de kungngo takiri ïkiye iini ka oona. <sup>21</sup> ïkiri ka tiki eene, "Tumma naada kataföönyö 'bitingngö no, kagalinggo adene ka uuru tanno."

<sup>22</sup> A kadu tafünögü i'i ko'do nye'd'de kadhere ka tumma türü tanno ö'dö kürö ndama nüünö tanno iini no, keema kiki a'da, "Taalo 'bii'bala ya Yüüsif ya miini sa?"

<sup>23</sup> ïkiri Yasu ka tiki eene, "Nussu a'a a'da ara aaga teema ka tumma no kede ko'do a'da, 'Ka Digtöörö, oolona eyi ya üüdü.' Alingga eema yüüdü ka tagalinggo ka Kafarnahööm ya ka anya tammo üüdü kita."

<sup>24</sup> ïkiri ka tiki eene, "Ara a'a tadirina tumma ma timin'da aaga, taalo ne'bi ara tasaasadene ka anya tammo iini. <sup>25</sup> Ara a'a tadirina tumma aaga dhorro, kaganna iiya ma nagüüme ka Israyil ka ürüünü tiya ne'bi İliya kadhabbu a'da kakarumeene tombo'do kagu'du nagürüünü kiidoona a nagatereene ka iidüümü kafünü unggodho, iire tümmü anya ka oona nye'd'de kungngo. <sup>26</sup> A

Masala taalo magürünü İliya ka aka tökömö ma unggodho kungngo, illi aka ma küüme ka anya ma Sarfa ka Saiyda.<sup>27</sup> A nakünggü'dö taganna ka Israyil kadhabbu ka ürüünü tiya ne'bi Elias, taalo oolonadene unggodho kungngo, illi Numan ya ma Süüriya ya."

<sup>28</sup> A tagoroo'bo tümmü kadu no kannä ka la ma talaana no nye'd'de kungngo kene kataföönyö tumma no.

<sup>29</sup> Kikirii ka fiki'dö kuurugu i'i kürö ndama anya kaco nsorondho ma anya tammo oono ka tarü'bününja kide mo matra tagürünüğü i'i caa'bu.<sup>30</sup> Lakiini i'i aalugu kene ka söödö unggene.

*Ömö'dü ma koronggore  
tiya toroko ya*

(Murkus 1.21–28)

<sup>31</sup> A Yasu ta'barda aaco Kafarnahööm ka Jaliil, alaana kadu ka uuru ma Sa'bidi.<sup>32</sup> A kadu tadhere ka talaana tanno niini kudumma iini ka teema a türü.<sup>33</sup> Ömö'dü inggide ka la ma talaana a koronggore ma na'bu tiya toroko ya ungngo iini ka oona aadhiya ko'd'do iki,<sup>34</sup> "Ka Yasu ma Nasira, nasaasa o'o minna kädi ka oona? Nö'dö o'o ma taama ungngo? Nussu a'a a'da o'o na mada. O'o na ömö'dü tiya Masala ya Insili ya!"

<sup>35</sup> İkiri Yasu ka kirnaana kini iki iini, "K'i'döönö! Aayu kürö ka ömö'dü tiya ka oona!" İkiri na'bu ka tara'baga i'i co ka kadu ka

söödö öö'dö kürö, ömö'dü taalo ili oona.

<sup>36</sup> A kadu tadhere kindini ajeene kiki a'da, "Tumma öjö eege kungngo, kudumma iini ka teema nja nagoronggore tanno oroko no a türü kicci a kürö."<sup>37</sup> A eere ya Yasu tanyala ku'bu ka na'buugu ka oona nye'd'de kungngo.

*Yasu oolona kadu kadhabbu*  
(Matta 8.14–17; Murkus 1.29–34)

<sup>38</sup> A Yasu tö'dö kürö ndama la ma talaana aaco 'dü kita Samaan a'da maagu 'bürüdü 'berki miini, kikirii ka tageema nja iini a'da oolona oogo.<sup>39</sup> İkiri ka co iti kono ka oona asanna ka 'bürüdü marooro ka'diila mafiki'dö müüni ada kuri eene.

<sup>40</sup> A 'buugu ka ndataamu ya, ikiri kadu köö'dö a kadu tanno amaara no kadhoonyo a Yasu, tikiri ka tümmünü ii sine kene ka oona kanggondho oolona eege.<sup>41</sup> A nagana'bu ticci a kürö ka kadu ka oona dhabbu kiidhe keema kiki, "O'o no 'Bii'bala ma Masala!" Agirnaana kene taalo afa kene keema, kudumma eene ka tussu a'da i'i ya Almasihi.

*Yasu alaana ka la ma talaana*

(Murkus 1.35–39)

<sup>42</sup> Ka taka ka ndaadha ikiri Yasu ka öö'dö kürö aaco 'buugu tiya kadu ka titaaloo kide ya, a kadu tagawwa 'buugu miini, kikirii kaluna i'i kümmünü i'i ku'bu ii'dü tunggene inyi

eege ku'bu. <sup>43</sup> İkiri ka tiki eene, "A'a nasaasa teema ka tumma ma tauugaara ma Masala na 'diila no, naco ka kadu ka naanya töccö afe'de, kudumma eede nagürünüdene a'da naco teema tumma no."

<sup>44</sup> A Yasu tagalaana kadu ka naala ma talaana ka Yahüüdiya nye'd'de kungngo.

## 5

*Yasu ümmünü kadalaadene na dhidha no*  
(Matta 4.18-22; Murkus 1.16-20)

<sup>1</sup> Uuru miini kinggide ka Yasu ka ta'düngnge ka tinggini ma to ma Genisaret, a kadu tarügü kini ka oona ma taföönyö tumma ma Masala. <sup>2</sup> İkiri Yasu ka tasala namürkabü keera ka tinggini ma to, a kadu na ümmü kilöögö no tö'dö ko'do ndama eene kagunu nasa'baka. <sup>3</sup> İkiri Yasu ka sörö mürkabü ma Samaan iki iini, "Sigi keere ka 'dukundaala ka oona." İkiri ka temmi ka mürkabü alaana kadu.

<sup>4</sup> Kini ka ndatiümö tumma niini ya, ikiri ka tiki a Samaan, "Aaga sigi co söödö aaga tara'baga nasa'baka naada co 'büdü aaga tümmü kilöögö."

<sup>5</sup> İkiri Samaan ka tiki a Yasu, "Ka Tatalaana, kadhägürü ungngo ooso in'dili, ungngo taalo kaduna niimö, lakiini kudumma üdü ka tiki ara ungngo tara'baga co."

<sup>6</sup> Kikiri ka tara'baga nasa'baka co 'büdü kümmü kilöögö kadhabbu, a nasa'baka tadigine ka kete ka töörese. <sup>7</sup> Kaalaga iisine a köje tanno ka mürkabü tökömö no a'da köö'dö takinyi eene, yungngo eene köö'dö kadigi namürka'bü ateera meene ka ndakete ka töö'di. <sup>8</sup> Ka Samaan Bütrüs ka tassa ka tumma tanno ya, ikiri ka tüürü ku'bu ka Yasu kidha ana küüge iki iini, "Tatalaana, sigi co kanni kide ka oona, a'a na ömö'di tiya atoroko ya."

<sup>9</sup> A Samaan tadhere nja köje nye'd'de kudumma dhabbu ma kilöögö tanno eene ka tümmöönö no. <sup>10</sup> A Yaguub nja Yühanna, laala ya Za'bedi na linggo nja iini no tadhere afe'de, ikiri Yasu ka tiki a Samaan, "Fa tari'ba ndama uuru tanno ara a'a tanangnga o'o ka kinne kadu ka ööye ma kilöögö."

<sup>11</sup> Kene ka ndafada a namürkabü kaco a tinggini ma to ya, kikiri ka arooro ka'bilnaana eema ku'bu in'dili kungngo kara ka tuurna i'i keere.

*Yasu oolona ömö'di ma kutukunya*

(Matta 8.1-4; Murkus 1.40-45)

<sup>12</sup> A Yasu taganna ka anya tökömö, ömö'di inggide ana kutukunya ka oona, ikiri ka tasala Yasu, üürü kini kidha adho üdü ku'bu iki iini, "Ka Tatalaana, üürü küdü kara tasaasa ara o'o taagala maara eede ka oona."

<sup>13</sup> İkiri Yasu ka kilina niisö aa'ba i'i ka oona iki,

"Namma a'a sa a'diila ma." A kutukunya tarooro ka titaaloo.<sup>14</sup> İkiri Yasu ka tiki iini, "Fa tadirina ömö'di töccö 'do, lakiini kolo naco tala oona a ta'boge naco türri oona nüüdü afa ma tiya Müüsa ka tirina ya ma taagala oona nüüdü amang kene tussu iini."<sup>\*</sup>

<sup>15</sup> A tumma na Yasu tanyala ka na'buugu ka oona in'dili kungngo, a kadu tö'dö kini kadhabbu meene ka föonyö tumma niini koolonadene ka maara tammo eene. <sup>16</sup> Lakiini i'i unggeene agedhe eyi yiini ma teema nja Masala.

### *Yasu oolona mügüre*

(Matta 9.1-8; Murkus 2.1-12)

<sup>17</sup> Uuru öccö kinggide iini ka tagalaana kadu a'da naFariisi nja katalaana ma seriye tiya Müüsa kungngo kemmi, kö'dö ndama naanya ma Jaliil nja Yahüüdiya nja Örsaliim, a türü na Masala kungngo a Yasu miini ka toolona kadu ka maara. <sup>18</sup> A kadu tö'dö a mügüre ka sekede kadagawwa fiinii ma tunggu i'i co 'bügöörä ma tanangnga i'i ka Yasu kidha. <sup>19</sup> A kene ka titaaloo kaduna fiinii kudumma kadu ka tadhabbu ya, ikiri ka sиро 'dasala kafa'da ööye kunggu i'i caa'bu a sekede tiya iini ka kadu ka söödö ka Yasu kidha.

<sup>20</sup> Ka Yasu ka tasala tamma ana eedi neene eene dhorro no ikiri ka tiki a mügüre, "Ka

ömö'di, noolonadene o'o ka tatoroko tanno üüdü."

<sup>21</sup> Kikiri katalaana ma seriye nja naFariisi ka tindini ajeene kiki a'da, "Ömö'di öjö i'i yungngo eela Masala ungngo? Taalo ömö'di ma toolona tatoroko illi Masala unggodho oogo!"

<sup>22</sup> A Yasu tussu tumma neene ka nanggeedi no, iki eene, "Tumma minna eege kungngo ada ka nanggeedi?

<sup>23</sup> Öjö i'i yungngo ipalapala? Tiki a'da, 'Tatoroko nüüdü koolonadene,' alla tiki a'da, 'Fiki'dö nunggeene?'

<sup>24</sup> Amang kada tussu a'da türü kungngo a 'Bii'bala ma Tadü'dü ka 'büdhülü ma tama tatoroko ka kadu ka oona." İkiri ka tiki a mügüre, "A'a niki o'o fiki'dö na'duga sekede yüüdü naco 'di kita üüdü."

<sup>25</sup> Arooro ka fiki'dö kene kidha a'duga sekede yiini ka tafünngö kide ya, aco 'di kita iini afünügü Masala ko'do. <sup>26</sup> A kadu nye'd'de tadhere kafünügü Masala ko'do, a ri'ba tümmü eege kiki, "Kadinö ungngo ka eema keefe ka uuru tanno."

### *Yasu ümmünü Lawi*

(Matta 9.9-13; Murkus 2.13-17)

<sup>27</sup> Ndama kanna a Yasu tunggeene, asala ömö'di ya ama tuluba ka kadu ya, ana eere a'da Lawi, emmi ka 'buugu ma tuluba, ikiri ka tiki iini, "Uurna a'a keere."

<sup>28</sup> İkiri ka arooro ka fiki'dö uurna i'i keere a'bilnaana eema yiini ku'bu nye'd'de kungngo.

\* 5:14 5.14 Laawi 14.1-32

<sup>29</sup> A Lawi tagüüni ada kuri a Yasu dhabbu ka 'dī kita iini a kadu ma tulu'ba nja kadu töccö kinggide nja eene kadhabbu. <sup>30</sup> A naFariisi nja katalaana ma seriye tanno eene teema nja kadalaadene tanno Yasu kiki, "Kagu aaga eema aaga tooye nja kadu ma tulu'ba nja kadu tanno oroko no amana?"

<sup>31</sup> A Yasu tiki eene, "Taalo kadu na 'diila no kasaasa digtöörö illi kadu no amaara no. <sup>32</sup> Taalo a'a nö'dö tümmünü kadu na 'diila no nö'dö a'a tümmünü kadu na oroko no a'da kaadha ka tatoroko."

*Tindineene ma tümmü te-*

*(Matta 9.14-17; Murkus 2.18-22)*

<sup>33</sup> A kadu öccö tiki a Yasu, "Kadalaadene na Yühanna nja tanno naFariisi kümmü tenege kafara ka Masala turi, lakiini kadalaadene nüüdü kagu eema kooye."

<sup>34</sup> A Yasu tiki eene, "Ara aaga tanangnga kadu na tatarna ka tümmü tenege ka uuru tanno miini no a'da tatarna inggide nja eene? <sup>35</sup> Lakiini uuru kinggide a tatarna kara ta'dugadene kene ka söödö kara saga tümmü tenege ka uuru tanno miini no."

<sup>36</sup> A Yasu tadirina tumma eene, "Taalo ömö'di ara töörese ten'di ma issi mo ar'da ka tammo illi mo kudumma a ten'di tammo issi mo mara tiriseene, a ten'di ma illi mo taalo mara co konna nja tammo issi mo. <sup>37</sup> A ömö'di taalo ara tuuru ngeeli na

aleefe tedhe no ka 'belde tammo illi mo kudumma ngeeli tanno aleefe tedhe no, kara töörese 'belde, a ngeeli tuurunja co, a 'belde taga'dadene. <sup>38</sup> Lakiini ara ngeeli na aleefe tedhe no tuurunja ka 'belde tammo issi mo. <sup>39</sup> Taalo ömö'di asaasa tooye ngeeli na aleefe tedhe no a'da andakooye ngeeli na illi no assa ka tiki, 'Ngeeli na illi no ka'diila.'

## 6

*Tindineene ma uuru ma Sa'bidi*  
*(Matta 12.1-8; Murkus 2.23-28)*

<sup>1</sup> A Yasu tagunggeene ka nasigeene nja kadalaadene tanno iini ka uuru ma Sa'bidi, a kadalaadene niini tükiri ka tuu'bu migile kuuyu kaguri. <sup>2</sup> İkiri naFariisi öccö ka tindini eege iki eene, "Minna agu aaga, aaga tüüni eema ya taalo ya üünidene ka uuru ma Sa'bidi ya?"

<sup>3</sup> Yunggo a Yasu ka tiki eene, "Taalo aaga ka küri tumma ka sorne ma Dawud ka tagüüni ka iiire ka tümmü i'i nja kadu tanno iini? <sup>4</sup> A'da inynyo la ma Masala a'duga Miteene ma Masala, adaguri inya a kadu tanno iini, a'da taalo kadu nye'd'de kaguri illi ka'boge unggodho eege." <sup>5</sup> A Yasu tiki eene, "'Bii'bala ma Tadü'd'dü i'i ya uugaara ma Sa'bidi."

*Ömö'di ya eyi ka nüüsö ya*  
*(Matta 12.9-14; Murkus 3.1-6)*

<sup>6</sup> Ka uuru ma Sa'bidi tökönö a Yasu kico la ma

talaana alaana kadu a'da ömö'di inggide eyi ka nüüsö ma kuri.<sup>7</sup> A katalaana ma seriye ma Masala nja naFariisi tadinaana i'i ko'do ma tassa kini ara toolona kadu ka uuru ma Sa'bidi amang kene taluna nüümö ya toroko kini ma tümmünü i'i a naguugaara.<sup>8</sup> Lakiini Yasu ussu tumma neene ka nanggeedi no, ikirii ka tiki a ömö'di tiya eyi ka nüüsö ya, "Fiki'dö na'dingnge ka kadu kidha." Ikirii ömö'di ka fiki'dö a'dingnge kene ka söödö.<sup>9</sup> Ikirii Yasu ka tiki eene, "Ara a'a tindini aaga, ata'diila kaja kara tüüni eema ya a'diila ya ka uuru ma Sa'bidi alla linggo ma eema tiya toroko ya? Toolona ömö'di eefe ka 'di alla taama i'i?"<sup>10</sup> Ikirii Yasu ka 'dünüğü üye eene ko'do assa ka tiki a ömö'di tiya eyi ka nüüsö ya, "Kilina nüüsö niini karooro ka'diila."<sup>11</sup> A naFariisi tadiginigo a tagoroo'bo kindini ajeene ma nüümö tiya eene kara talingga ana Yasu ya.

*Yasu esse kadafiinii na ada'baaga kafünü eera no  
(Matta 10.1-4; Murkus 3.13-19)*

<sup>12</sup> Ka naguuru tanno miini no, asirigö Yasu co anya ko'do ma co tafara ka Masala, üpü ooso co in'dili miini kafara ka Masala.<sup>13</sup> Ka takaa ka ndaadha ya, ikirii ka tagümmünü kadalaadene niini, agese kene kada'baaga kafünü eera, anangnga eere eene a'da kadafiinii,<sup>14</sup> Samaan

yiini ka anangnga eere iini afe'de a'da Bütrüs ya nja Andraws örre yiini, nja Yaguub nja Yühanna nja Filibüs nja Bartülmaws,<sup>15</sup> nja Matta nja Tööma nja Yaguub 'bii'bala ya Halfa nja Samaan tiya eene katümmünü i'i a'da tatagu'daana ka eedi ya,<sup>16</sup> nja Yahüusa 'bii'bala ya Yaguub nja Yahüusa Askaryüütii ya kümmünü Yasu a nadiidi miini.

*Yasu alaana afada oloona  
(Matta 4.23-25)*

<sup>17</sup> Ikirii Yasu ka ta'bardaga caa'bu ndama 'dikinya nja kadafiinii tanno iini aco 'dolodho, a kadalaadene niini nja kadu kadhabbu tarügü kini ka oona, kö'dö ndama naanya ma Yahüüdiya nja Örsaliim nja naanya ma Suur nja Saiyda ka tinggini ma to.<sup>18</sup> Kö'dö taföönyö tumma kini nja iini ka toolona eege ka maara, a kadu na ana nagana'bu ka oona no toolonadene.<sup>19</sup> A kadu nye'd'de tasaasa tümmü i'i ka oona ana ii sine kudumma a türü ka takicci a kürö ndama iini ka oona koolona kadu nye'd'de kungngo.

*Dhodhdho nja müürü  
(Matta 5.1-12)*

<sup>20</sup> Assa ka kadalaadene tanno iini ko'do iki,  
"A'diila oona kada aaga na eema ka titalo ada no,  
kudumma ada kaluna tauugaara ma Masala.

- 21 A'diila nja aaga aaga  
no iire kagu aaga  
'bütingngö no,  
kudumma ada kara saga  
tüüsü.
- A'diila nja aaga aaga na  
afara 'bütingngö no,  
kudumma ada kara saga  
takijeene.
- 22 A'diila nja aaga a kadu  
kara takirimi aaga,  
kasoro aaga keela aaga,  
kanu ka eere tiya eede  
afa niimö ya toroko  
ya kudumma 'Bii'bala  
ma Tadü'd'dü.
- 23 "Aaga adhodho aaga  
tasiili ka uuru tanno miini  
no, kudumma eema ungngo  
ada ka 'dotombo'do ad-  
habbu kudumma kafaafa  
meene ka kalinggo ana  
nagane'bi nggeege.
- 24 Lakiini am'ba kada aaga  
na ma eema dhabbu  
no  
asa aaga taga'duga  
talängnge naada.
- 25 Am'ba kada aaga na üüsü  
'bütingngö no,  
ara iire sa kagu aaga.
- Am'ba kada aaga na kijene  
'bütingngö no,  
ara aaga sa katamüürü,  
aaga tafara.
- 26 Am'ba kada aaga na kadu  
ka tündhigü aaga ko'do  
nye'd'de no,  
kagüünii kafaafa ma  
aaga a nagane'bi  
tanna korokoro no  
nggeege.

*Tasaasa nadiidi*  
(Matta 5.38-48; 7.12)

- 27 "Lakiini ara a'a tadirina  
tumma aaga, aaga na toodo  
ka tumma tanno, aaga

asaasa nadiidi naada, aaga  
ta'diila nja kadu tanno  
akirimi aaga no. <sup>28</sup> Aaga  
amana baraka a kadu  
tanno linggo aaga no, aaga  
afara ka Masala ma kadu  
tanno akirimi aaga no.  
<sup>29</sup> Ka ömö'di kabbü o'o ka  
tanggarama ya, nafele no  
iini. Üürü ömö'di a'duga  
ten'di müüdü ma 'doogo mo  
nafa ta'dükü ten'di müüdü  
ma teene mo. <sup>30</sup> A ömö'di  
kara tasaasa niimö küdü  
nanangnga iini, a ömö'di  
kara ta'duga niimö küdü  
ya fa ta'duga kini afe'de.  
<sup>31</sup> Eema yaada ka asaasa  
kadu kadüünii ana aaga ya,  
agüünii ana eege nggeege.

<sup>32</sup> "Kada kara tasaasa  
kadu na asaasa aaga no  
'dee, ta'diila naada eege  
kiïye? Kadu na oroko no  
ka asaasa kadu na asaasa  
eege no afe'de. <sup>33</sup> A kada  
kara talänggo ta'diila nja  
tanno alinggo ta'diila nja  
aaga no, ara aaga tö'dö keere  
aminna? Münda kadu na  
oroko no küünii nggeege.  
<sup>34</sup> A kada kara tamana  
eema a kadu a kömüsü  
a'da kassa ka tapadaga aaga  
'dee, ara aaga tümmü minna  
kide? Münda kadu na oroko  
no kamana eema a kadu  
a kömüsü, amang kene  
tapadaga eene. <sup>35</sup> Lakiini  
aaga asaasa kadu na diidi  
aaga no, aaga ta'diila nja  
eene, aaga amana eema  
eene aaga tafa tam'birina  
kene. Nggeege ya, ara aaga  
taluna talängnge naada na  
dhabbu no, amang kada  
ta laala tiya Masala ma  
ko'do mo, kudumma oono

mamana eema a kadu tanno taalo kamana ta'diila oono no nja tanno oroko no.

<sup>36</sup> Aaga ana 'bangnga ma kadu, afa ma Pupa tiya ada ya ka 'dotombo'do ya kaana 'bangnga kungngo.

*Fa ta'bunu tumma ka kadu könö ka oona*  
(Matta 7.1-5)

<sup>37</sup> "Aaga fa ta'bunu tumma ka kadu könö ka oona, amang ka Masala tafa ta'bunu kada ka oona, aaga fa tümmü kadu amang ka Masala tafa tümmü aaga tekere, aaga eefi ada kadu amang ka Masala ta eefi kada." <sup>38</sup> Aaga amana eema a kadu amang ka Masala tamana aaga, almiti madigine ko'd'do mo, ara aaga ta'duga ana iisine, almiti maada ka talaala eema a kadu kide mo, oogo mungngo a Masala kara talaala eema ada kide."

<sup>39</sup> A Yasu tadirina tumma eene iki, "Ara soro tümmünü soro ka tino? Taalo kara ta'dünggö co ööye ateera meene?" <sup>40</sup> Taalo tatalaadene agii'bi tatalaana yiini, kini ka ndussu eema 'do ya assa ka taköje nja iini.

<sup>41</sup> "Minna agu o'o nadinö nde'de no ka örre tiya üdü ka ööye no, ara o'o ka titalo nadinö ndagee'di nüüdü ka ööye no amana?" <sup>42</sup> Ara o'o tiki a örre yüüdü a'da, aayu na'duga 'bandiisi üdü ka ööye nya, ara o'o kafa ka 'bandiisi üdü ka ööye taalo nindineene. Ka 'baga, unguu ndagee'di kürö üdü ka ööye tikinggi, amang

küdü tiji 'buugu ta'diila nassa ka tunggu 'bandiisi kürö ndama örre tiya üdü ka ööye.

*Fa nja iiye miini*

(Matta 7.16-20; 12.33-35)

<sup>43</sup> "Kudumma fa tiya a'diila ya taalo ateene iiye na oroko no, fa ya toroko ya taalo ateene iiye na a'diila no. <sup>44</sup> Kussu kadu fa ana iiye miini, taalo kadu karumu indiyye ka fa ma kira, kitaalo karumu ki'bim'bi ka ndhaaru. <sup>45</sup> Ömö'dü ya a'diila ya amanaga eema ya a'diila ya kürö ndama eedi tiya iini ya a'diila ya, a ömö'dü ya toroko ya, eema ya toroko ticci a kürö ndama eedi tiya iini ya toroko ya, niimö ya ka eedi ya i'i yungngo onggo'do ka teema iini."

*Katarü'böönö keera*

(Matta 7.24-27)

<sup>46</sup> "Kümmünü aaga a'a a'da, 'Uugaara, Uugaara,' amana aaga sa kitaalo kalinggo a tumma tanno eede?" <sup>47</sup> Ömö'dü ya ara tö'dö kede aföönyö tumma neede alinggo iini ya, ara a'a tiki aaga a'da afeene nja mada?" <sup>48</sup> Afeene

nja ömö'dü tiya arü'bü 'dü a'dükü'dü atagii'dö atageese kadese ka 'dokon'da assa ka tarü'bünü kide, ka faaya köö'dö akilaana ka 'dü, taalo akara tagi'dü i'i ka oona, kudumma iini ka tarü'bünja ka 'dokon'da." <sup>49</sup> Lakiini ömö'dü ya föönyö tumma neede assa ka titalo alinggo iini ya, afeene nja ömö'dü

tiya arü'bü 'dii ka 'büdhülü ün'dügüngngö a'da taalo ageese kadeset. İkiri faaya köö'dö agürü 'dii arooro ka 'dänggö areere türrüdü miini ka toroko 'do."

## 7

*Yasu oolona tasaga ya uugaara ma nasigira ma Rööma*

(Matta 8.5-13)

<sup>1</sup> Ka Yasu ka ndatiimö tumma niini nye'd'de a kadu taföönyö ya, ikiri ka tunggeene aco Kafarnahööm. <sup>2</sup> A ömö'dii ya alinggo ada uugaara ma nasigira tanno ukumu kadu ka iidümmü no, amaara akete ka teyi, uugaara ma nasigira tasaasa i'i dhorro. <sup>3</sup> İkiri ka föönyö tumma na Yasu, yungngo iini ka kürünü kadiifi ma Yahüdü ka Yasu, a'da öö'dö toolona ömö'dii yiini ka maara. <sup>4</sup> Kikiri ka co ka Yasu katagoolomo i'i 'do kiki iini, "Ömö'dii ya ama üüdü ka tamünüğü i'i ko'do, <sup>5</sup> kudumma iini asaasa kadu naaja, i'i yungngo arü'büü la ma talaana ungngo."

<sup>6</sup> İkiri Yasu ka tunggeene nja eene, kini ka ndakete ka 'dii ya, ikiri uugaara ma nasigira ka kürünü kateefe miini a'da kiki iini, "Ka Tatalaana, a'da afa ta'digi'dii oona üüdü, taalo a'a na'diila müüdü kara co a 'bügööri tiya eede. <sup>7</sup> A'a ka eyi tiya eede taalo na'diila meede kara ta'dängnge küdü kidha, lakiini tiri

tumma a ömö'dii yeede toolonadene. <sup>8</sup> A'a ka eyi tiya eede, uugaara ungngo eede tekere na a'a tauugaara ma nasigira tököönö, niki a tiya, 'Unggeene,' unggeene, niki a tiya, 'Aayu,' öö'dö. Niki ömö'dii tiya alinggo ada a'a ya, 'Alinggo niimö ya kungngo,' alinggo."

<sup>9</sup> A Yasu tadhere kini ka taföönyö tumma no afele, assa ka kadu tanno unggeene nja iini no ko'do iki eene, "Ara a'a tiki aaga nüfürü a'a taduna ömö'dii ka tümmü tumma ma Masala ka Israyil afa ömö'dii ya." <sup>10</sup> A kadafüni tikiri ka tafada kaco 'dii kaduna ömö'dii ya maara ya ka'diila.

*Yasu anangnga 'bii'bala ma aka ma küüme keefe ka 'dii*

<sup>11</sup> A taka ka ndaadha ikiri ka tunggeene aco anya tammo ana eere a'da Nayiin mo, a kadalaadene niini tunggeene nja iini a kadu töccö kungngo eene kadhabbu.

<sup>12</sup> Kene ka ndala inye ma anya, kikiri ka toreene nja kadu ka tunggeene ana ömö'dii ka tenggere ka teyi, ömö'dii ya eyi ya unggodho ka niimö, a'da oogo ma aka ma küüme, a kadu ma anya tammo iini mo kunggeene nja oono kadhabbu.

<sup>13</sup> Ka Uugaara ka tasala oogo a muuyu moono tagu i'i, iki oono, "Fa tafara." <sup>14</sup> Öö'dö kete aa'ba tenggere a niisö a kadu na ümmöönö no töödhii, ikiri Yasu ka tiki iini, "Bii'bala, a'a niki o'o

nafiki'i dö." <sup>15</sup> İkiri ka fiki'i dö emmi ana tumma, yungngó a Yasu ka anangnga i'i a nüümö tammo iini.

<sup>16</sup> A ri'ba tümmü kadu ïn'dili kungngó kamana ta'diila a Masala kiki a'da, "Ne'bi ya idhindhi ya adele oona kaja ka söödö. A Masala tö'dö a toolona a kadu tanno oono." <sup>17</sup> A tumma ma Yasu tanyala ka Yahüüdiya nye'd'de nja naanya tanno akete koona no.

*Yasu nja Yühanna ya tatambeese*

(Matta 11.2-19)

<sup>18</sup> A kadalaadene na Yühanna tagadünüğü eema ya co iini nye'd'de. <sup>19</sup> İkiri ka tagümmünü könö keera kagürünü eege ka Uugaara a'da kaco tindini i'i, "O'o nungngó nara tö'dö alla ungngó tündhigii ömö'di öccö afe'de?"

<sup>20</sup> Ka kadu tanno eera no ka ndö'dö kiki a Yasu, "Yühanna ya Tatambeese ya, agürünü ungngó a'da ungngó tö'dö tindini o'o, o'o nungngó nara tö'dö alla ungngó tündhigii ömö'di öccö?"

<sup>21</sup> Ka uuру tanno miini no akoolona Yasu kadu kadhabbu ka namaara, adagassoro nagoronggore na oroko no ka kadu ka oona, afa'da kisinsoro ka iiye.

<sup>22</sup> İkiri ka tapadaga tumma a kadalaadene tanno Yühanna iki eene, "Aaga fada aaga co tadiriniga eema a Yühanna ma eema tiya ada ka tadinö kide ya

aaga taföönyö ya, kisinsoro kafa'da iiye, a namügüre tunggeene, a kadu ma kutukunya tinsili ka oona, a nakünggiri taföönyö eema, a kadu na aaya no tajeene, a kadu na eema ka titaaloo kene no taföönyö tumma ma İnjüili. <sup>23</sup> A'diila nja ömö'di tiya taalo anu ka tamma tanno eede no."

<sup>24</sup> A kadu na Yühanna ka kürünü eege keera no tunggeene, ikiri Yasu ka tadünüğü tumma ma Yühanna a kadu iki eene, "Kada kaco lodho 'dee kadinö aaga ka minna? 'Bandam'bala a tanya ka'digi'di i'i ka oona? <sup>25</sup> Alla kinynyo aaga a kürö aaga taasala minna? Ömö'di ümmü en'di ya ku'daana ya ka oona? Lakiini kadu na ümmü en'di ya agu'daana ya nja kadu tanno eema kada dhabbu kene no, eege kungngó kanna ka nøö'di ma naguugaara. <sup>26</sup> Kinynyo aaga akürö aaga tadinö minna? Ne'bi? Ara tiki aaga a'da ii, lakiini agii'bi ne'bi. <sup>27</sup> Tumma na miini no eege kungngó a sorne ma Masala ka tiki,

'Ara a'a tagürünü tafüni yeede küdü kidha,  
öö'dö tindinaana fiinü üdü kidha.\*'

<sup>28</sup> Ara a'a tiki aaga, Yühanna idhindhi adagii'bi laala ya iiya kadegeene ya 'do, lakiini ömö'di ya idhilli ka tauugaara ma Masala ya idhindhi adagii'bi i'i."

\* 7:27 7.27 Malaki 3.1

29 A kadu nye'd'de taföönyö tumma no nja kadu ma tulu'ba kamma ka tumma ma Masala kudumma Yühanna ka tambeese eege.<sup>30</sup> Illi naFariisi nja katalaana ma seriye ma Masala kakaanu ka tumma tanno Masala kataanu ka Yühanna ka tambeese eege.

31 A Yasu tiki, "Ara a'a tiki a'da kafeene sere ma 'bitingngö nja mada? Kafeene nja minna?

32 Kafeene nja laala tiya anna ka 'dadillö, kiidhe ka köje, 'Kabünü ungngo kaaru aaga,

aaga tanu ka siili, ungngo tagüüwe tüüsü ma fara aaga,

aaga taalo kafara.'

33 Ö'dö Yühanna ya Tatambeese ya taalo agu miteene, taalo ooye ngeeli, aaga tiki a'da, 'T'i indima.'<sup>34</sup> A 'Bii'bala ma Tadü'd'dü tö'dö agu eema ooye ngeeli, aaga tiki a'da, 'Ömö'dü ya aguri, ake ka ngeeli a teefe ma kadu ma tulu'ba nja kadu tanno oroko no.'<sup>35</sup> Ata'dara ma Masala kussu adene ka kadu nye'd'de kungngo tanno amma ka tumma tanno a Masala no."

*Yasu oolona ka aka tammo toroko mo*

36 A taga Fariisi könö tagümmünü Yasu a'da aco 'di kita iini ma tagu eema, ikirri ka co 'di emmi ma tagu eema.<sup>†</sup><sup>37</sup> Maganna aka ka anya tammo iini mo ma toroko mikirri ka tussu

a'da Yasu inni kita taga Fariisi agu eema ya, mikirri ka öö'dö a sügü'de ma kondho.<sup>38</sup> Maco ma'dingnge ka Yasu keere mafara, a 'biidü ma iiye yoono tasuuru ada kini ka uune muppu ana awu ma üüdü tiya oono, mu'bibi i'i ka uune, ma'bunaana a kondho.

39 Ka taga Fariisi tiya agümmünü i'i ya ka tasala eema ya kadalinggo adene ya, ikirri ka teema kini ka eedi iki, "Ömö'dü ya kata kane'bi ya, ara tagussu aka mo mümmü i'i ka oona mo oogo ma toroko."

40 Ikirri Yasu ka tiki, "Samaan, ara a'a tadirina tumma o'o."

Ikirri Samaan ka tiki iini, "Tatalaana, tirina a'a."

41 Ikirri Yasu ka tiki, "Ömö'dü inggide asaasa kömüsü ka kadu ka oona keera, anangnga a tiya homsumiya jine, anangnga a tiya hamsiin jine.<sup>42</sup> A niimö titaalo kene ma tanangnga iini ka kömüsü, ikirri kafa kene kide nye'd'de kungngo." Ikirri ka tiki a Samaan, "Ömö'dü öjö ana kene tanno eera no, ara tasaasa i'i dhindho?"

43 A Samaan tapadaga tumma iini iki, "Niki a'a kide a'da ömö'dü ya ma kömüsü dhabbu ya, i'i yungngo agasaasa i'i dhindho."

Ikirri Yasu ka tiki iini, "Nadiri o'o tumma dhorro."

44 Ikirri Yasu ka tafele assa ka aka ko'do iki a Samaan,

† 7:36 7.36 Tafiigi ma kadu kata emiimi ka nagööyö kanangnga oona ku'bu kassa agu eema.

"Niji o'o aka mo? Nö'dö a'a ka 'bügööri tiya üüdü taalo o'o ninyi 'biiđi a'a a'da nagala uune iini, lakiini oogo magala a'a ka uune a 'biiđi ma iiye muppuugu ana awu ma üüdü tiya oono." <sup>45</sup> Taalo o'o nööjüü a'a dhorro, lakiini oogo marooro ka tu'b'bi a'a ka uune. <sup>46</sup> Na o'o taalo nakara ta'bunaana a'a ka üüdü ana uu'ba lakiini oogo ma'bunaana a'a ka uune a kondho. <sup>47</sup> Nikiri a'a ka tiki o'o, atatoroko tanno oono na dhabbu no moolona Masala kono, kudumma oono ka asaasa ana eedi dhorro, ömö'di ya Masala ka toolona kini idhilli ya i'i itaalo asaasa Masala ana eedi dhorro."

<sup>48</sup> İkiri Yasu ka tiki oono, "Katanggala tatoroko nüüdü."

<sup>49</sup> A kadu na agu eema no tindini ajeene kiki, "I'i ya mada ma tama tatoroko ka kadu ka oona?"

<sup>50</sup> İkiri Yasu ka tiki aka, "Tamma ka Masala nüüdü ka oolona o'o, unggeene a ta'diila."

## 8

*Tumma ma tadiniigü*  
(Matta 13.1-9; Murkus 4.1-9)

<sup>1</sup> A Yasu tagunggeene ka naanya nja kadafiinü tanno iini na ada'baaga kafünü eera no, adünnü tumma ma tauugaara na Masala, <sup>2</sup> nja iiya tököönö na unggeene nja iini no niini ka toolona euge ka nagorong-gore tanno oroko no nja maara tökömö, Mariyom

meene katümmü oogo a'da Almajdaliya mo, ma Yasu ka tagasoro nagana'bu ka iidümmü kafünü eera kono ka oona, <sup>3</sup> nja Hanna, aka ma Küsi ya afa ka eema tiya Hirüdüs ya, nja Sawsana nja tököönö kadhabbu, kamanaga eema ma eyi tiya eene a Yasu no.

<sup>4</sup> A kadu tüü ka tawaana oona ka Yasu ka oona köö'dö ndama naanya kadhabbu ikiri ka tirina tafeene ma tumma eene, <sup>5</sup> "Afiki'dö taleele ma tara co tadiniigü, kini ka ndadinigü ya, ikiri migile kömö ka tasuli ka fiinü, a kadu tüsiraana kide ana uune uyi teeraga. <sup>6</sup> Ammo tasuli ka 'dokon'da mafü'döönö mafada maaya kudumma oono taalo maduna tö'döögö. <sup>7</sup> A migile kömö tasuli ka immi ka teene mafü'döönö masere nja immi, immi tamiri'di oogo. <sup>8</sup> A migile kömö tasuli ka 'büdhüü tiya a'diila ya mafü'döönö, mana iiye dhabbu kukumu kadu ka iidümmü (100)."

Ka Yasu ka ndatiimö tumma ya ikiri ka tiki eene, "Ömö'di ya ana iisine ma taföönyö ya fa kini aföönyö."

*Teema tafeene ma tumma*  
(Matta 13.10-17; Murkus 4.10-12)

<sup>9</sup> A kadalaadene na Yasu tikiri katindini i'i kiki iini, "Kiki tumma no nya?"

<sup>10</sup> A Yasu tiki eene, "Masala manangnga tessu eema na küdhü no ma tauugaara ma Masala tanno aaga, lakiini kadu könö

nadünögü a'a eene a tafeene  
ma tumma,  
'Kassa ka tasala taalo kara  
tijöögö,  
Kassa föönyö taalo kara  
tussu.'\*\*

*Yasu adünögü tumma ma  
tadinügi co a kadu*  
(Matta 13.18-23; Murkus  
4.13-20)

<sup>11</sup> A Yasu tiki eene, "Tumma no kiki kungngo, migile tumma na Masala eege kamiini.

<sup>12</sup> "Migile ma asuli ka fiinü mo, mafeene nja kadu tanno aföönyö tumma na Masala a Ebliisi tö'dö a'duga kene ka nanggeedi, amang kene tafa tamma kide koolonadene.

<sup>13</sup> A migile ma asuli ka 'dokon'da mo, kadu na föönyö tumma na Masala kadhodho areere assa ka titalo kene, kamma ka Masala amussu kungngo. Ka 'buugu ka tatoroko ya kaadha kide. <sup>14</sup> A migile ma asuli ka immi ka teene mo, mafeene nja kadu tanno aföönyö tumma na Masala lakiini tadinigöögö nja tasaasa ma eema dhabbu, ikiri ka anangnga eege ka mir'didene kitaalo kö'dö keere ana iifye. <sup>15</sup> Ammo

a'dingga ka 'büdhülü tiya a'diila ya, mafeene nja kadu tanno aföönyö tumma na Masala kafa kide ana eedi dhorro kana iifye a tidhi oona ku'bu.

*Lamba mungngo ka koyo*  
(Murkus 4.21-25)

<sup>16</sup> "Taalo ömö'di ara tata  
issi ka lamba assa ka

taküdhü dho kide nja iini ka tunggu co tenggere ka tüm'bü, lakiini ara ta'dala ko'do amang kono töyeene a kadu na tö'dö ka 'bügööri no tiji 'buugu. <sup>17</sup> Niimö ya aküdhü ya ara tatele oona, a niimö ya kume ya ara tussu adene. <sup>18</sup> Aaga adinö ko'do, kaföönyö aaga tumma ma Masala nya? Ömö'di ya ana niimö ya ara tagonanja iini adhabbu, a ömö'di ya niimö ka titalo kini ya a'dugadene kini salsa assa ka tiki a'da ungngo iini idhilli."

*Niimö ma Yasu nja  
nagöre tanno iini*  
(Matta 12.46-50; Murkus  
3.31-35)

<sup>19</sup> A niimö ma Yasu nja nagöre tö'dö tassa kini kitaalo kaduna fiinü ma co kini ka 'bügööri kudumma kadu katiti ajeene. <sup>20</sup> İkiri kadu könö ka tiki iini, "Niimö müüdü nja nagöre tanno üüdü kungngo kürö ka'dingga ana ko'do ka asaasa tassa küdü."

<sup>21</sup> İkiri ka tiki eene, "Niimö meede nja nagöre tanno eede eege kungngo kaföönyö tumma na Masala ka linggo iini."

*Yasu arigi tanya*  
(Matta 8.23-27; Murkus  
4.35-41)

<sup>22</sup> Uuru öccö ka inggide ka Yasu ka taka ka mürkabü nja kadalaadene tanno iini, iki eene, "Kada kata'daga co a tinggini ma to ndama 'dakeyi tinni." Kikiri ka tunggunu co. <sup>23</sup> A kene

\* **8:10** 8.10 Asaiya 6.9

ka ndiisö ya, ikirii Yasu ka tüyü arigide, ikirii tanya ka 'düsöönö dhindho a 'biidi tadigi ka mürkabü moono kara töö'di atoroko nja eene.

<sup>24</sup> Kikirii kadalaadene kaco ka Yasu ka ici i'i ka füngngö kiki iini, "Ka Tataalaana, ka tataalaana! Ara angnga takaaya!"

İkirii Yasu ka fiki'dö agirnaana ka tanya, a tanya töödhii a 'buugu tamusuli ku'bu amudhud-huli. <sup>25</sup> Yungngo a Yasu ka tiki eene, "Tamma ka Masala naada kiyye?"

Kadhere a ri'ba tümmü ege kindini ajeene kiki, "Ömö'di öjö i'i yungngo adha sii? A tanya nja 'biidi taföönyö tumma niini."

*Yasu oolona ömö'di ma nagana'bu*

(Matta 8.28-34; Murkus 5.1-20)

<sup>26</sup> Kagisö a mürkabü köö'dö ka anya ma Jarasiin mungngo ka nda'da ma to ndama tafaga co Jaliil.

<sup>27</sup> Ka Yasu ka nda ta'daga co 'dukundaala ndama mürkabü ya, oreene nja ömö'di ma anya tammo iini mo indima, taalo en'di iini ka oona ma 'billi i'i taalo anna ka 'di illi anna ka naala ma oofo. <sup>28</sup> Kini ka ndasala Yasu ya, ikirii ka tadhiya üürü kini kidha ana küüge a'dili ko'd'o iki, "Yasu 'Bii'bala ma Masala tammo ko'do mo nasaasa o'o minna eede ka oona, nasaasa o'o nafa tapusu a'a." <sup>29</sup> Atiraana nggeege kudumma Yasu ka tiki a koronggore tiya atoroko ya

a'da öö'dö kürö iini ka oona, kudumma iini ka'dingi kini ka oona turi, a kadu tafa kini kimi'di i'i ana jansiiri nja ködhöle armuna, a koronggore ya toroko ya tasanagan i'i co lodho.

<sup>30</sup> A Yasu tindini i'i iki iini, "O'o na mada?"

Yungngo iini ka tiki a Yasu, "A'a nana eere a'da, 'Nasigira,' " kudumma nagana'bu kuurunco kini ka oona kadhabbu. <sup>31</sup> Kikirii ka tiki a Yasu a'da afa tuurugu eege co ööye tiya adhonggoro ya.

<sup>32</sup> A nagüdürü kungngo kaguri ka nsorondho ma anya kadhabbu, a nagana'bu tükirii ka tiki a Yasu a'da, uurugu eege ka nagüdürü tanno miini no ka oona. Yungngo a Yasu katamma kene kide. <sup>33</sup> A nagana'bu tafiri akürö ka ömö'di ka oona kafiri ka nagüdürü ka oona, a nagüdürü tarünö ndama nsorondho kafiri co 'biidi ka'duuru 'biidi.

<sup>34</sup> Yungngo a katasaana katassa ka tumma tanno agüüni adene a nagüdürü no, kikirii ka rünö kaco nöö'di nja nasigeene, kanyala tumma ku'bu 'do.

<sup>35</sup> A kadu tö'dö ma tassa ka eema tiya iini ka tagüüni ana ömö'di tiya akindima ya, kaduna ömö'di ya miini ya ka temmi ka Yasu ka uune ana en'di ka oona ka'diila, a ri'ba tümmü ege.

<sup>36</sup> A kadu na adinö ka Yasu ka toolona ka ömö'di tiya akindima ya tagadünüğü co a kadu töccö. <sup>37</sup> İkirii kadu ma anya ma Jarasiin ka tiki a Yasu a'da unggeene ka

anya tammo eene kudumma a ri'ba ka tümmü eege ka eema tiya Yasu ka tagalinggo ya. İkiri ka taka ka mürkabü afada. <sup>38</sup> Ömö'di ya Yasu ka tagasoro nagana'bu kini ka oona ya tiki a'da i'i asaasa taneene nja iini, lakiini Yasu ka tuuru i'i ka tino iki iini, <sup>39</sup> "Aafada naco 'di kita üüdü naco nadirina eema ya Masala ka tagalinggo ana o'o ya co eene." İkiri ka tunggeene atagadünügü eema ya Yasu ka tagüünä ana i'i ya ka anya ka oona nye'd'de kungngo.

*'Badaada ma Yayros nja aka tammo aa'ba Yasu ka ten'di mo*

(Matta 9.18-26; Murkus 5.21-43)

<sup>40</sup> Ka Yasu ka ndafada, a kadu tada'da i'i kadhabbu kudumma eene katindhiigü i'i eege in'dili kungngo. <sup>41</sup> A ömö'di inggide ana eere a'da Yayiros uugaara ma la ma talaana, ö'dö ka Yasu üürü kini kidha ana küüge olomo i'i a'da aco 'di nja iini, <sup>42</sup> kudumma 'badaada ma ungngo iini ma unggodho a nagürüünü noono kö'dö kada'baaga kafünü eera, a maara tümmü oogo makete ka teyi.

A kini ka ndunggeene ma taco, a kadu türrügü kini ka oona kitaana i'i ka oona. <sup>43</sup> Aka minggide eriidö ka tüüsö kono mandagu'du nagürüünü kada'baaga kafünü eera madaga'da eema yoono ku'bu a nadigtöörö, mitaalo

moolonadene. <sup>44</sup> Mikiri ka öö'dö ndama iini keere mümmü tinggini ma ten'di tammo iini, eriidö tarooro ka arumeene kono.

<sup>45</sup> A Yasu tindineene iki a'da, "Mada i'i yungngo aa'ba a'a ka oona ungngo?"

A kadu ta'düsünigü ikiri Bütrüs ka tiki a Yasu, "Ka Tatalaana, kitaana kadu o'o ka oona kadhabbu, na o'o saga tiki a'da mada i'i yungngo aa'ba a'a ka oona?"

<sup>46</sup> A Yasu tiki, "Ömö'di inggide aa'ba a'a ka oona, nussu a'a kudumma a türü kö'dö kürö kede ka oona."

<sup>47</sup> Aka miini mo tussu a'da taalo tumma noono kaküdhüdene ya, a ri'ba tümmü oogo mö'dö müürü kini kidha ana küüge ka kadu kidha madirina niimö ya anangnga oogo ka taa'ba i'i ka oona marooro ka toolonadene ka eriidö. <sup>48</sup> İkiri Yasu ka tiki oono, "'Badaada eede, tamma ka Masala nüüdü ka oolona o'o, unggeene a ta'diila ma Masala."

<sup>49</sup> Ka Yasu kaleefe ateema ya, a'da öö'dö ömö'di ndama 'di kita Yayiros ya uugaara ma la ma talaana ya iki iini, "Ma eyi 'badaada müüdü fa ta'digi'di tatalaana ka oona."

<sup>50</sup> İkiri Yasu ka föönyö iki a Yayiros, "Fa tari'ba, amma ka tumma tanno eede ana eedi mara tefe ka 'di."

<sup>51</sup> Kene ka ndala 'di ya, ikiri Yasu ka faga kadu keere kaco 'bügööri, illi Bütrüs nja Yühanna nja Yaguub nja pupa tiya 'badaada nja niimö. <sup>52</sup> A kadu tafara 'badaada, ikiri Yasu ka tiki

eene a'da, "Aaga fa tafara taalo meyi, oogo marigide."

<sup>53</sup> A kadu takiji Yasu, kudumma eene ka tussu a'da meyi 'badaada.

<sup>54</sup> Yungngo a Yasu ka ta'diniga oogo ko'do a nüüsö iki oono, "Badaada, fiki'dö."

<sup>55</sup> A koronggore tapadaga kono ka oona marooro ka fiki'dö, a Yasu tükiri ka tiki eene a'da kanangnga eema oono ma kuri. <sup>56</sup> A pupa yoono nja nüümö tadhere, ikirri Yasu ka tiki eene a'da kafa tadirina tumma na ömö'di töccö.

## 9

*Yasu agüriünü kadalaadene na ada'baaga kafünü eera no*  
(Matta 10.5-15; Murkus 6.7-13)

<sup>1</sup> A Yasu tagümmünü kadalaadene niini na ö'dö kada'baaga kafünü eera no, ümmünü türü eene meene ka tasoro nagana'bu nja türü ma toolona ka kadu tanno amaara no.

<sup>2</sup> İkirri ka kürünü eege a'da kaco tadünögü tumma ma tauugaara na Masala, koolona kadu ka maara.

<sup>3</sup> Anangnga tumma eene iki, "Aaga fa tagufu nüümö ada kara tunggeene alla kuufi alla njoko alla kuri alla a ömö'di öccö tafa tagufu en'di eera. <sup>4</sup> 'Bügöörri yaada kara co ya, aaga tüütü kide aaga tidhi aaga tunggeene ndama iini.

<sup>5</sup> Anya ma kadu miini ka titalo kamma kada mo, aaga ö'dö kürü ndama iini aaga tafidhi ndhunggürü miini kada

ka uune amang kene tussu iini." <sup>6</sup> Kikirri kadafiini ka tunggeene kosso naanya kadünnü tumma ma İnjili koolona kadu ka na'buugu koona nye'd'de kungngo.

*Hirüdüs adhere*  
(Matta 14.1-12; Murkus 6.14-29)

<sup>7</sup> İkirri Hirüdüs ya uugaara ma Jaliil ya, katadhore ka eema tiya alinggo adene ya kudumma kadu könö ka tiki a'da Yühanna afiki'dö ka inde. <sup>8</sup> Anno tiki a'da İliya adele oona a kadu, könö tiki a'da ne'bi ma 'billi adele oona. <sup>9</sup> A Hirüdüs tiki, "Narmuna a'a Yühanna ka üüdü a ömö'di öccö i'i yungngo eede ka föonyö tumma miini, afa ma tiya kungngo?" Atagasaasa takassa ka Yasu.

*Yasu anangnga kuri a kadu tanno öö'dö na alif ka üdümmü no*

(Matta 14.13-21; Murkus 6.30-44; Yühanna 6.1-14)

<sup>10</sup> Aga kadafiini na Yasu ka ndafada ya kikirri ka tirina eema yeene ka tagüünü ya a Yasu, ikirri ka 'duga eege nja iini unggodho eege kaco anya tammo ana eere a'da Beet Sayida mo. <sup>11</sup> A kadu tüütü kadussu 'buugu miini kuurna i'i keere, ada'da eege adageemaga tumma ma tauugaara ma Masala eene, oolona kadu na asaasa toolonadene ka maara no.

<sup>12</sup> Ka 'buugu ka ndamuru ma siiya ikirri kadafiini na Yasu no na ö'dö kada'baaga kafünü eera no köö'dö kini kiki iini, "Uuru kadu ka tino kaco naanya nja nasigeene

tanno kete no amang kene taluna eema ma taguri nja 'buugu ma füngngö kudumma lodho yungngo."

<sup>13</sup> İkiri Yasu ka tapadaga tumma eene iki, "Aaga nangnga eema eene kaguri."

Kiki iini, "Taalo niimö kiidü illi miteene mungngö iidü müidümmü a kilögö keera, illi kiidü kara co tana ada kuri a kadu tanno in'dili no."  
<sup>14</sup> Kadu na nagiide no kö'dö na alif kiidümmü.

İkiri Yasu ka tiki a kadalaadene, "Aaga nangnga kadu ka temmi kadu keera aco iisine." <sup>15</sup> Kikiri ka anangnga kadu ka temmi kadu keera aco iisine. <sup>16</sup> İkiri ka 'duga miteene müidümmü monja kilögö tanno eera no, assa co 'dotombo'do anangnga ta'diila a Masala,

a'düsünaana ku'bu assa ka anangnga a kadalaadene a'da kasümünaana ka kadu ku'bu. <sup>17</sup> A kadu taguri küüsü nye'd'de kungngö kinyi türeene miini ku'bu, a kadalaadene tawagaana koona kadigi nasinggili kada'baaga kafünü eera.

*Bütrüs amma ka Yasu dhorro*  
(Matta 16.13-19; Murkus 8.27-29)

<sup>18</sup> A Yasu tageema nja Masala unggodho i'i ka uuru kinggide a'da kadalaadene niini kinggide nja iini ikiri ka tindini eege, "Kadu 'dee, kiki a'da a'a na mada?"

<sup>19</sup> Kikiri ka tiki iini, "Kadu könö kiki a'da o'o na Yühanna ya Tatambeese ya,

anno tiki a'da İliya, anno tiki a'da ne'bi ma 'billi afiki'dö ka inde."

<sup>20</sup> İkiri Yasu ka tiki eene, "Aaga kiki a'da a'a na mada?"

A Bütrüs tikiri ka tiki iini, "O'o na Almasiihi ya Masala."

*Yasu eema tumma ma dhügürü tiya iini nja inde*  
(Matta 16.20-28; Murkus 8.30—9.1)

<sup>21</sup> İkiri Yasu ka anangnga tumma eene dhorro a'da kafa tadırına tumma no ömö'dü töccö. <sup>22</sup> Yungngö iini ka tiki a kadafüni tanno iini, "Ara 'Bii'bala ma Tadü'ddü tadhügürü 'do, a kadüifi nja naguugaara ma ka'boge nja katalaana ma seriye ma Masala tanu kini, kiidi i'i afiki'dö ka inde a füngngö iidoona."

<sup>23</sup> İkiri Yasu ka tiki a kadu in'dili, "Ömö'dü ya tö'dö kede keere ya fa kini a'düsünü eyi yiini a'duga salii'bi yiini ö'dö kede keere turi kungngö. <sup>24</sup> Ömö'dü ya asaasa toolona eyi yiini ya aama i'i, a ömö'dü ya aama eyi yiini kudumma a'a ya, ara toolonadene.

<sup>25</sup> Ara ömö'dü tö'dö keere a minna kini kara tana eema ma 'büdhülü in'dili kungngö ara ka taama eyi yiini? <sup>26</sup> Ömö'dü ya ana modolo ma a'a nja tumma tanno eede ya, ara 'Bii'bala ma Tadü'ddü tana modolo miini kini ka tö'dö ka tiddhindhi tanno iini nja tiddhindhi tanno Pupa nja kadhangga tanno insili no.

<sup>27</sup> Ara a'a tadırına tumma

aaga dhorro, kadu könö kungngo aja kita taalo kara tassa ka inde illi kassa ka tauugaara tanno Masala."

*Tadele oona  
(Matta 17.1-8; Murkus 9.2-8)*

<sup>28</sup> Kene ka ndaganeene a fungngö andö'dö iidümmü afünü iidoona ya, ikirü Yasu ka 'duga Bütrüs nja Yühanna nja Yaguub kasirö anya ma Yasu kara co teema nja Masala kide. <sup>29</sup> Ka Yasu ka ndeema nja Masala ya, ikirü dhugudha yiini ka tatem'bele, en'di yiini ta'bassa kalimaana. <sup>30</sup> A kadu tatele oona keera, Müüsa nja İliya keema nja Yasu. <sup>31</sup> Kadele oona a tidihindhi ma Masala keema nja iini ka inde tanno iini niini ka teyi ka Örsaliim no. <sup>32</sup> A tarigide tümmü Bütrüs nja köje, kene kajeene ya, ikirü ka tasala tidihindhi na Yasu nja kadu tanno a'dingnge nja iini no. <sup>33</sup> Aga kadu kandunggeene kene koona ya, ikirü Bütrüs ka tiki a Yasu, "Ka Tatalaana, a'diila 'do kaja kara taganna kita, katabünnü ligangga ku'bu iidoona, müüdü ma unggodho, ammo Müüsa ma unggodho, ammo İliya ma unggodho." I'i taalo ussu niimö miini ka teema.

<sup>34</sup> Ka Bütrüs ka taleefe ateema ya ka'dügüllü nja tülüügü kö'dö kaküdhü eege ka oona, a ri'ba tümmü kadalaadene kaco ka tülüügü ka teene. <sup>35</sup> A tumma tö'dö ndama tülüügü kiki, "'Bii'bala yeede ka

tagesse i'i ya yungngo, aaga föönyö tumma niini." <sup>36</sup> Ka tumma ka ndataalo ya, kaasala Yasu unggodho i'i, ikirü ka takumu oona taalo kadirina eema yeene kada adinö kide ya a ömö'dü 'do ka naguuru tanno miini no.

*Yasu oolona 'bii'bala ka na'bu  
(Matta 17.14-18; Murkus 9.14-27)*

<sup>37</sup> Kene ka nda'bardaga ku'bu ndama anya ka taka ka ndaadha kungngo ya, a kadu toreene nja iini dhabbu. <sup>38</sup> A ömö'dü talneege ka kadu ka teene iki, "Ka Tatalaana, ma oolona ka 'bii'bala tiya eede ya unggodho kede ya. <sup>39</sup> Koronggore ya toroko aga kö'dö kini iyini i'i co iidhe üpü ndoore ka nüönö, ütü kadhügürü ana i'i taalo ara tapa kini areere 'do. <sup>40</sup> Nageema a'a nja kadalaadene tanno üüdü a'da kasoro i'i illi eege taalo kana türü ma toolona i'i."

<sup>41</sup> Ikirü Yasu ka tiki eene, "Aaga oroko aaga na sere ma 'bitüngngö no, taalo aaga kümmü tumma ma Masala ana eedi, ara a'a taneene nja aaga taagaada nambaanya aaga?" Ikirü ka tiki ömö'dü, "Ungge 'bii'bala yüüdü a'a kita."

<sup>42</sup> Ka 'bii'bala ka leefe tunggunu ka Yasu ya, ikirü na'bu ka tara'baga i'i co 'büdhüllü asigiridene, ikirü Yasu ka kirnaana ka na'bu, a 'bii'bala ta'diila anangnga i'i a pupa tiya iini. <sup>43</sup> A

kadu tadhere ka tīdhīndhī ma Masala.

*Yasu eema tumma ma inde tanno iini afe'de*

(Matta 17.22-23; Murkus 9.30-32)

Kene kaleefe tadhere ka eema tiya Yasu ka tagalinggo ya, ikirü Yasu ka tiki a kadalaadene tanno iini,<sup>44</sup> "Aaga fa tüürü ma nüümö tiya eede kara tadirina aaga ya, ara 'Bii'bala ma Tadü'd'dü tümmü adene ananja a kadu."<sup>45</sup> A kadalaadene taalo kassumunaana ka tumma tanno iini ka teema no. Kudumma eene kataküdhü, amang kene tafa tussu, kari'ba tindini i'i miini.

*Mada yungngo idhīndhī*  
(Matta 18.1-5; Murkus 9.33-37)

<sup>46</sup> A kadalaadene takam'bana njaana ko'do a tumma a'da ömö'dü öjö i'i yungngo adhabbu ana kene.<sup>47</sup> Ikirü Yasu ka tussu tumma neene ka nanggeedi no, ikirü ka a'duga 'bii'bala ya idhilli ya anangnga i'i ka 'dingnge kini kete.<sup>48</sup> Iki eene, "Ömö'dü ya ara tamma ka 'bii'bala tiya idhilli ya ana eere ma a'a ya, ara tamma kede. A ömö'dü ya ara tamma kede ya, ara tamma ka ömö'dü tiya agürünü a'a ya. Kudumma ömö'dü tiya taalo ara tümmü eedi yiini ka tadhabbu ka kadu ka söödö ya i'i yungngo idhīndhī."

<sup>49</sup> Ikirü Yühanna ka tiki a Yasu, "Tatalaana, kaduna ungngo ömö'dü ka tasoro naganabu ka kadu ka oona

ana eere tiya yüdü, ungngo tasaasa tafaga i'i keere kide kudumma iini taalo ömö'dü tiya aja."

<sup>50</sup> Ikirü Yasu ka tiki eene, "Aaga fa tafaga i'i keere kudumma ömö'dü tiya taalo a diidi aaga ya i'i ya ömö'dü tiya ada."

*Daara ma Samira anu ka Yasu*

<sup>51</sup> Ka uuru tanno Yasu ka ndaco a 'dotombo'do ka ndakete ya, ikirü ka tunggeene a rüsü ma co Örsaliim.<sup>52</sup> Ikirü ka kürünü kadafünni kooso kini kidha kikirü ka co daara ma Samira ya ma co tindinaana 'buugu iini ku'bu.<sup>53</sup> Lakiini kadu ma daara tiya miini ya, taalo kamma kini kudumma iini ka tunggunugu co Örsaliim.

<sup>54</sup> Ka kadalaadene tanno iini Yühanna nja Yaguub ka tassa ka tumma tanno ya kiki iini, "Ka Uugaara, nasaasa o'o ungngo a'da ungngo tatümmünü issi ndama 'dotombo'do köö'dö tafinne eege?"<sup>55</sup> Ikirü Yasu ka tafele agirnaana kene.<sup>56</sup> Kikirü ka tunggeene kaco daara tököönö.

*Kadu no uurna Yasu keere no*  
(Matta 8.19-22)

<sup>57</sup> Kene ka ndunggeene ka nafünni ya, ikirü ömö'dü könö ka tiki iini, "Ara a'a tuurna o'o keere kita üdü ka co kita."

<sup>58</sup> Ikirü Yasu ka tapadaga tumma iini, "Kijeene kungngo a nasura, a nafü kungngo uyi, illi 'Bii'bala ma Tadü'd'dü taalo 'buugu

miini ka anangnga üüdü yiini kide."

<sup>59</sup> A Yasu tiki ömö'dü töccö afe'de, "Aayu kede keere."

Ömö'dü tiki iini, "Ka Tataalaana, fa kede naco tatü'bü pupa yeede."

<sup>60</sup> Yungngó a Yasu ka tiki iini, "Fa ka kadu tanno aaya no katü'bü kadu neene na aaya no, ara o'o ka co teema tumma ma tauugaara ma Masala."

<sup>61</sup> A ömö'dü öccö tiki a Yasu, "Nasaasa a'a tuurna o'o keere uugaara, lakiini fa kede tikinggi naco tattoo kadu ma 'dü tiya eede."

<sup>62</sup> A Yasu tiki iini, "Ömö'dü ya tümmünü nüüsö ka dhongga ma taleele, assa ka tasasala keere ya, taalo ara tamö'dü ma tauugaara ma Masala."

## 10

### *Yasu agürünü kadalaadene kadhabbu*

<sup>1</sup> Ndama kita miini kita iküri Uugaara Yasu ka tagesse kadu könö kukumu kadu kiidoona kaco iisine kafünü eera, agürünü eege kerra, kooso kini kidha ka naanya nja na'buugu tanno iini ka asaasa co no. <sup>2</sup> Iki eene, "Kadhabbu linggo ka siga illi kadu ma linggo taalo kadhabbu, aaga eema nja Uugaara ma alinggo amang kini tagürünü kadu ma tö'dö talinggo linggo niini. <sup>3</sup> Aaga agolo, ara a'a tagürünü aaga afa kidheefele na aneene nja needi no. <sup>4</sup> Aaga fa tagufu njoko, aaga tafa ta'duga

'belde nja egüide, aaga tafa tööjülü ömö'dü ka fiini.

<sup>5</sup> "Dü yaada kara co ya, aaga tööjülü kadu miini ka dhidha. <sup>6</sup> Üürü ömö'dü ma tasaasa tööjülü inggide ya, ara tööjülü naada taneeene nja iini, üürü anu ka tööjülü tanno ada ya, a tööjülü naada tüütü kada. <sup>7</sup> Aaga anna ka 'dü tiya eene ya, aaga taguri aaga tooye eema yeene kamana aaga ya, kudumma ömö'dü tiya alinggo ya, aguri talingnge ma linggo tanno iini, aaga tafa tunggunaana ka nöö'dü ün'dügüngngö. <sup>8</sup> Anya

maada kaco mo, a kadu miini tamma kada no aaga agu kuri yeene kara tinyi aaga ya. <sup>9</sup> Aaga oolona kadu na maara no, aaga tiki eene a'da, 'Asa tauugaara ma Masala takete kada.'

<sup>10</sup> Anya maada kara co a kadu miini tanu kada mo aaga unggeene aaga co a nafiini miini aaga tiki, <sup>11</sup> 'Mündä ndhunggürü ma anya tammo ada na amma'da kidü ka uune no, kafidhi ungngo eege ku'bu, lakiini aaga tussu a'da tauugaara na Masala ka ndakete' <sup>12</sup> Ara a'a tadirina tumma aaga dhorro, ara uru ma tahükümü ma kadu ma Sadöma ara tapalpala adagii'bi kadu ma anya tammo.'

*Naanya no taalo kamma ka Masala no*  
(Matta 11.20-24)

<sup>13</sup> A Yasu tüütü ka tiki, "Am'ba ka kadu ma anya ma Korosiin no, am'ba küdü

Beet Sayida, kudumma eema ma türü tanno agalinggo adene kada no kara tagalinggo adene ka Suur nja Saiyda ara kadu takaadha ka tatoroko ma 'billi kadu kemmi ka nataliisi nja fü'dö. <sup>14</sup> Lakiini Suur nja Saiyda ka uuru ma Masala ka ndaümmü kadu kada misaana ka oona kii'bi aaga. <sup>15</sup> O'o na Kafarnahööm no, na'diniga o'o oona nüüdü coo'do ara o'o saga tapügünja ka 'buugu ma inde." <sup>16</sup> Iki a kadalaadene tanno iini, "Ömö'di ya aföönyö tumma naada ya, i'i aföönyö tumma neede, a ömö'di ya anu kada ya, i'i anu kede, a ömö'di ya anu kede ya i'i anu ka ömö'di tiya agürünü a'a ya."

### *Tafada na kadalaadene*

<sup>17</sup> A kadalaadene na kukumu kadu kiidoona kaco iisine kafünü eera no, tafada kadhodho kiki a Yasu, "Ka Tatalaana, mündä nagana'bu kaföönyö tumma niidi ana eere tiya yüüdü."

<sup>18</sup> Apadaga tumma eene iki, "Nasala a'a Ebliisi ka'dingga ku'bu ndama oo'do afa talimi ma tombo'do kungngó.

<sup>19</sup> Nanangnga a'a türü aaga a'da aaga tüsirü ka nöönü nja na'baja, aaga tii'bi türü na diidi, a niimö ma tara tili aaga ka oona titaalo.

<sup>20</sup> Aaga fa tadhodho a'da nagana'bu kaföönyö tumma naada, lakiini aaga adha aaga dhodho kudumma a nagereene tanno ada

karigirinja ka sorne ka 'dotombo'do."

*Yasu adhodho*  
(Matta 11.25-27; 13.16-17)

<sup>21</sup> Ka uuru tanno miini no agadhadho Yasu a Korrongore tiya Insili ya iki, "Pupa yeede, nanangnga a'a ta'diila o'o no Uugaara ma 'dotombo'do nja 'büdhüü kudumma o'o ka taküdhü eema ya nitaalo nala a kadu tanno a'dara nja tanno ussu eema no, ara o'o kaala a laala tiya idhiidhi ya. Ii Pupa, o'o nasaasa nggege.

<sup>22</sup> "Pupa yeede anangnga eema a'a nye'd'de. Taalo ömö'di ma tussu 'Bii'bala illi Pupa. Kitaalo kussu Pupa, illi 'Bii'bala nja kadu tanno a 'Bii'bala ka tagesse eege ma tatele oona iini."

<sup>23</sup> Afele kadalaadene iki eene ka unggondho, "A'diila nja ömö'di tiya adinö ka eema tiya ada kadiinö kide ya.

<sup>24</sup> A'a tiki aaga, nagane'bi kadhabbu nja naguugaara kasaasa tadinö ka eema tiya ada kijöögö ya kitaalo kijöögö, kasaasa taföönyö eema yaada kaföönyö ya kitaalo kaföönyö."

### *Taga Samira ya a'diila ya*

<sup>25</sup> A tatalaana ma seriye tafiki'dö ma ta'b'ba Yasu iki iini, "Ka Tatalaana, ara a'a tönynyö amang kede taluna tefe ka 'dii ta'billi?"

<sup>26</sup> İkiri Yasu ka tiki iini, "Seriye ya Müüsa iki nya? Nasaana i'i ku'bu nya?"

<sup>27</sup> İkiri ka tiki a Yasu, "Asaasa Uugaara Masala

müüdü ana eedi dhorro ana oona tanno üüdü a türü tanno üüdü ana üüdü tiya üüdü nye'd'de,\* no 'Asaasa ömö'dü ya kete küdü ya afa müüdü ka asaasa eyi yüüdü kungngo.'†"

<sup>28</sup> A Yasu tiki iini, "Nussu o'o ka tiraana timin'da, alinggo nggeege amang küdü taluna tefe ka 'dü."

<sup>29</sup> İkiri tatalaana ma seriye ka asaasa tagildhe eyi yiini, ikiri ka tiki a Yasu, "Mada i'i yungngo akete kede ungngo?"

<sup>30</sup> Yungngo a Yasu ka tiki iini, "Ömö'dü inggide akunggunu aku'bu ndama Örsaliim unggunu co Ariihä ikiri kanyoro ka tako'do kini ka tabbü i'i kakirnö en'di iini ka oona kassa kafa kini kada inde.<sup>31</sup> A'da adhe ta'boge adigaala ka fiini tiya miini ya, ikiri ka tasala i'i ka 'büdhülü adheedhe ko'do.<sup>32</sup> A taga Lawi tö'dö adigaala ka fiini tiya miini ya asala i'i adheedhe kini ko'do unggene.‡<sup>33</sup> A taga Samira tagunggeene ka fiini tiya miini ya ikiri ka tasala i'i ka 'büdhülü a muuyu miini tagu i'i.<sup>34</sup> İkiri ka co kini, asiri uu'ba nja kembelö kini ka nagööla ami'daana a'diniga i'i ka kisine aco lokonda iini atakindinaana i'i ku'bu ka'diila.<sup>35</sup> A taka ka ndaadha ya, ikiri taga Samira ka 'duga nakajine keera anangnga ömö'dü ma

lokonda iki, 'Afa kini namana eema iini salla adhabbu kede kara tafada na a'a saga nanangnga faana miini o'o.'§<sup>36</sup> Ana ka kadu tanno iidoona no 'dee mada i'i yungngo üüdü ka ijöögö akete ka ömö'dü tiya kanyoro ka tabbü i'i ya?"

<sup>37</sup> İkiri ka tiki iini, "Ömö'dü ya ana 'bangnga miini ya."

Yungngo a Yasu ka tiki iini, "Kolo naco tüüni nggeege."

### *Yasu inynyo tassa ka Marsa nja Mariyom*

<sup>38</sup> Ka Yasu ka tunggeene nja kadalaadene tanno iini ya, kikiri ka co daara. Aka minggide mana eere a'da Marsa mada'da i'i aco 'dö kita oono.<sup>39</sup> İnye moono mana eere a'da Mariyom magemmi ka 'büdhülü ka Yasu kete matoodo kini ka teema.<sup>40</sup> A Marsa takürrada ku'bu anno kadüüni ada eema a kafala mikkiri ka öö'dö ka Yasu miki iini, "Ka Tatalaana, taalo agu'du o'o ka oona ka inye tammo eede kafa kede nalinggo ungodho a'a? Iki oono möö'dö takinyi linggo a'a."

<sup>41</sup> A Yasu tatümmünü oogo, "Marsa, Marsa, na'deedene o'o ka oona nadinigöögö ma eema dhabbu,<sup>42</sup> lakiini niimö inggide ungodho asaasadene, yungngo a Mariyom ka tümmü niimö ya a'diila ya, ömö'dü ka titaalo ara ta'duga kono ya."

\* **10:27** 10.27 Seriye ya eera ya 6.5 † **10:27** 10.27 Lawi 19.18 ‡ **10:32** 10.32 Kadu ma Lawi no linggo ka la ma Masala § **10:35** 10.35 Jine ya miini ya i'i ya ma linggo ma uuru ungodho.

# 11

*Yasu alaana kadu ka fara  
ka Masala*

<sup>1</sup> A Yasu tageema nja Masala ka 'buugu inggide kini ka ndaadha kide ya, ikirii tatalaadene yiini öccö ka tiki iini, "Ka Tatalaana, alaana ungngo ka teema nja Masala afa ma Yühanna ka tagalaana kadalaadene niini kungngo."

<sup>2</sup> Ikirii ka tiki eene, "Kada ka tafara ka Masala ya, aaga tiki kungngo,  
'Pupa yüdü,  
fa ka eere tiya yüdü  
idhindhi,  
a tauugaara nüdü tö'dö.

<sup>3</sup> Nanangnga kuri ma uru tanno ungngo.

<sup>4</sup> 'Duga tam'baga niidi kiidi  
ka oona,  
afa müdi ka afa ka kadu  
tanno üuni tatoroko  
ana ungngo no.

Fa tafa kiidi ungngo  
ta'dingga ka ta'b'badene  
[lakiini oolona ungngo  
ka tatoroko].\*," "

<sup>5</sup> Ikirii ka tiki eene, "Mada ana kada ara co ka teefe miini ka 'dii ooso ka teene iki, 'Ka teefe ma a'a, kona miteene a'a miidoona a kömüsü. <sup>6</sup> Kudumma teefe ma a'a ö'dö kede ka 'dii a niimö meede ka nanangnga iini titaalo.'

<sup>7</sup> "Yungngo a teefe miini ka tiki iini ndama la, 'Fa tanyamanya a'a ka oona, ka teere ka inye, a'a nungngo ka tenggere nja laala tiya eede, niidii ka fiki'dö ma tanangnga niimö o'o.' <sup>8</sup> Ara

a'a tiki aaga, assa ka titaalo afiki'dö ma tanangnga iini a'da a teefe miini ya miini, lakiini kudumma miini ka anyamanya i'i ka oona ara tafiki'dö anangnga niimö yiini ka asaasa ya.

<sup>9</sup> "Yungngo eede ka tiki aaga, aaga arangnga amang ka Masala tanangnga aaga, aaga awwa aaga taluna, aaga dhoodho inye ka fa'danja aaga. <sup>10</sup> Kudumma ömö'dii tiya arangnga ya ananja iini, ömö'dii ya awwa ya ara taluna, a ömö'dii ya dhoodho inye ya ka pa'danja iini.

<sup>11</sup> "Pupa öjö yungngo a 'bii'bala tiya iini kara tasaasa müdigilöögö kini, agala ka anangnga ni iini?

<sup>12</sup> Nja iini ka asaasa tünsüle kini, anangnga 'baja iini?  
<sup>13</sup> Aaga kada oroko kungngo kussu aaga kamana eema ya in'diila a laala tiya ada. Ara taköje nya ka Pupa tiya ada ya ka 'dotombo'do ya kara tanangnga Koronggore ya Insili ya a kadu tanno asaasa no?"

## *Yasu nja Balsabül*

<sup>14</sup> Uuru kinggide ka Yasu ka tagasoro koronggore ya möri ya ka ömö'dii ka oona, aga koronggore ka öö'dö kürö ya ömö'dii teema, a kadu tadhere. <sup>15</sup> Lakiini kadu könö kiki, "I'i asoro nagoronggore no oroko ka kadu ka oona a türü tanno Balsabül ya uugaara ma nagana'bu ya." <sup>16</sup> A kadu könö tiki iini a'da aala

\* 11:4 11.4 Matta 6.13

niimö ya iidhindhi eene ndama 'dotombo'do meene ka ta'b'ba i'i.

<sup>17</sup> İkiri Yasu ka tussu tumma neene iki eene, "Ka tauugaara kara tasümünü njaana ku'bu ya kara tatangga'da, a 'dii ya tasümünü njaana ku'bu ya ara türrüdü. <sup>18</sup> Ka tauugaara tanno Ebliisi kara tasümünü njaana ku'bu 'dee ara ta'dingnge aminna? Kudumma ada ka tiki a'da a'a nasoro nagana'bu ka kadu ka oona a türü tanno Balsabül. <sup>19</sup> Üürü a'a nasoro nagana'bu a türü tanno Balsabül 'dee, ara kadu naada tasoro eege aminna? Kara tümmü aaga. <sup>20</sup> Üürü a'a nasoro nagana'bu a türü ma niisö tanno Masala amang kada tussu a'da tauugaara na Masala ka ndö'dö kada.

<sup>21</sup> "Ömö'dii ya ana türü ana eema ma koro'bo ara tafa ka 'dii tiya iini taalo eema yiini ara ta'dugadene. <sup>22</sup> Lakiini üürü ömö'dii ya ana türü adagii'bi i'i ara tako'do kini ii'bini kini ya, ara tamuru eema ma koro'bo yiini ka takürrü kide ka oona a'duga eema nye'd'de asümünaana ka kadu ku'bu.

<sup>23</sup> "Ömö'dii ya taalo aneene nja a'a ya i'i ya diidi ma a'a, a ömö'dii ya taalo awaana kadu koona nja a'a ya, i'i aparsaana eege ku'bu.

### Tafada na na'bu

<sup>†</sup> **11:29** 11.29 Matta 16.4; Murkus 8.12  
1 Naguugaara 10.1-10; 2 Akhbar 9.1-12

<sup>24</sup> "Ka koronggore tiya toroko ya kara tö'dö kürö ka ömö'dii ka oona ya, ikiri ka talööle ka dhiile asaasa 'buugu ma talingnge kide. Üürü taalo aluna ya, ikiri ka tiki, 'Ara a'a tafada naco 'dii tiya eede ka öö'dö kürö ndama iini ya.' <sup>25</sup> İkiri ka co aluna 'dii ka tinsili ka takii'dinja ku'bu. <sup>26</sup> İkiri ka tafada aaco ö'dö a töccö ka iidümmü kafünü eera karisi kini ko'do kafiri kini ka oona kanna kide, a ömö'dii ya miini ya, tatoroko adagii'bi yiini ka dhidha ya."

### Dhodho na timin'da no

<sup>27</sup> Ka Yasu ka taleefe teema ya, aka talneege ka kadu ka teene miki iini, "A'diila nja aka tammo ageene o'o ma takindine o'o mo." <sup>28</sup> A Yasu tiki, "Ara tagala ka'diila nja kadu tanno aföönyö tumma na Masala kalinggo iini no."

### Tasaasa türü ma Masala

<sup>29</sup> A kadu tarüğü ka Yasu ka oona, ikiri ka tiki, "Sere ya oroko kasaasa tassa ka türü ma Masala eege kitaalo kara talanja eene illi no akalanja a ne'bi Yünan no.<sup>†</sup> <sup>30</sup> Afa ma ne'bi Yünan ka takalanja a kadu ma Ninawa aga türü nggeege ara 'Bii'bala ma Tadü'd'dü ta türü ma sere ma 'bitingngö. <sup>31</sup> Ara Uugaara ma küülü tafiki'dö ka uuru ma Masala kara tö'dö tümmü sere ya, mümmü eege kudumma oono ka öö'dö ndama ku'b'ba möö'dö taföönyö tumma na Siliman, a'a

**11:30** 11.30 Yünan 3.5    **11:31** 11.31

nungngo nagii'bi Siliman.  
 32 Ara kadu ma Ninawa tafiki'dö ka uuru ma tahükümü kara tö'dö no nja sere tiya 'bitüngngö ya kümmü kadu, kudumma eene kaadha ka tatoroko tanno eene kene ka taföönyö tumma na Yünan, a'a no kita nagii'bi Yünan."

### *Töyeene ma tuu'da*

33 "Taalo ömö'di ara tata issi ka lamba assa ka taküdhü nja iini ka anangnga ka dho ka tüm'bü, lakiini ara ta'dala ko'do a kadu na iji co 'büggööri no, tiji 'buugu iini. 34 İiye eege kungngo ka töyeene ma tuu'da, ka iiye tanno üüdü kara ta'diila ara tuu'da nüüdü ta töyeene, iiye nüüdü tara tatoroko ya ara oona nüüdü talüllü. 35 Aaga dini ko'do kudumma töyeene tanno ada ka oona no, kara tanangnga aaga ka talüllü. 36 Üürü oona nüüdü ka öyeene nye'd'de kungngo ya a 'ba'dakeyi öccö taalo kara talüllü ya, kara töyeene 'do afä ma lamba ka ta'dara töyeene küdü ka oona nye'd'de kungngo."

### *Yasu ümmü naguugaara ma Yahüüdü*

37 Ka Yasu ka taleefe teema ya ikirü taga Fariisi könö ka tiki iini a'da kaco 'di tagu eema nja iini, kikirü ka co 'di kemmi ma tagu eema. 38 A taga Fariisi tadhere kini ka anaana iiye ka Yasu ka agu eema a'da taalo agala iisine ka dhidha assa aguri.

39 İkirü Uugaara Yasu ka tiki iini, "Aaga naFariisi no kagunu aaga ker'de nja dho ndama 'dugeere miini, ara nanggeedi naada kadigine a tallogo nja tatoroko ma eema dhabbu. 40 Ka na-gaaga, taalo ömö'di ya agalinggo 'dugeere ma niimö yungngo agalinggo teene miini sa? 41 Aaga amana eema yaada a kadu tanno iini ka titalo kene no amang ka eema tiya ada tinsili nye'd'de kungngo.

42 "Am'ba kada aaga na-Fariisi no, kamana aaga eema ma naana nja eema tiya ada ka leeple ya a Masala, aaga sa kadüünü tö'bö, aaga tanu ka eema tiya dhorro ya, aaga tanu ka tasaasa ma Masala, kama aaga ma tagalinggo nggeege aaga tafa tagüünü tö'bö ana eege.‡

43 "Am'ba kada aaga naFariisi no, kasaasa aaga temmiimi ka kadu kidha ka naala ma talaana, aaga tasaasa kadu köötüü aaga ka nafünni.

44 "Am'ba kada aaga na afeene nja naala ma oofo kitaalo kussu adene no. A kadu na unggeene kide ko'do no taalo kussu a'da naala ma oofo eege kamiini."

45 Yungngo a tatalaana ma seriye ka tiki iini, "Ka Tatalaana, ka tumma tanno üüdü ka teema na o'o neela ungngo afe'de."

46 İkirü Yasu ka tiki, "Am'ba kada aaga na kata-

‡ 11:42 11.42 Laawi 27.30 Nanangnga 'dakeyi ma eema ma siga.

laana ma seriye no, kadho aaga kadu ka oona a tümmü eema ya ïndhi ya, aaga taalo ka kara tamünögü 'banüsö eene ma takinyi ta'dina nja eene.

<sup>47</sup> "Am'ba kada ka arü'bü aaga naala ma oofo ma nagane'bi a'da kafaafa ma aaga eege kungngo kagirina eege. <sup>48</sup> Kussu aaga tamma ka linggo tanno kafaafa ma aaga ka tagalinggo no, eege kagirina nagane'bi aaga tarü'bü naala ma oofo neene. <sup>49</sup> Yungngo a tumma ma tussu ma Masala ka tiki, 'Ara a'a tagürünü nagane'bi nja kadafüni kene kassa kagirina könö kapusu könö.' <sup>50</sup> Ara a'a tasaasa faana ka sere tiya ma eriidö ma nagane'bi tanno ada ka kirina eege jiddi ma 'büdhülü ka tarü'bü adene no, <sup>51</sup> jiddi ma eriidö tiya Habiil nja eriidö tiya Sakariya ya agiididene ka söödö ma müsi ma türri nja la ma Masala ya. Ara a'a tiki aaga a'da ara a'a tasaasa eriidö ya ka sere tiya kadu tanno in'dili kungngo. §

<sup>52</sup> "Am'ba kada aaga no katalaana ma seriye no, kudumma ada ka 'duga nangafata ma tussu eema, alla aaga co alla aaga tafa ka kadu tanno asaasa co no kaco."

<sup>53</sup> Kini ka leefe ateema tumma no ya, ikiri kata-laana ma seriye nja na-Fariisi karooro ka tamidhi i'i kar'dnaana eema iini

dhabbu. <sup>54</sup> Kadönö ana i'i ko'do ma tasaasa i'i kadiri tumma amang kene tafünü eema ma korokoro iini ka oona.

## 12

*Fa tüüsini kadu  
(Matta 10.26-27)*

<sup>1</sup> Uuru kinggide a kadu kadagawaana oona kadhabbu kitte ajeene anno tüüsiraana ka köje, ikiri Yasu ka tiki a kadalaadene tanno iini, "Aaga ümmü eyi yaada ka tigüidö ma naFariisi ka oona, kudumma eene ka tüüsini kadu, <sup>2</sup> Taalo niimö anna ka küdhü a'da taalo ussudene aya anna ka kume ya ara tadherenja kürö. <sup>3</sup> Eema yaada ka teema ka 'buugu ka talüllü ya ara taföönyödene uuru kungngo, tumma naada ka ayaaya ajeene iini no ka naala no kara saga teemadene ka naala ko'do."

*Kari'ba angnga a mada  
(Matta 10.28-31)*

<sup>4</sup> "Kadu eede ara a'a tadirina tumma aaga, aaga fa tari'ba a kadu tanno ara tiidi tuu'da ün'dügüngngö no kassa kitaalo katambaanya tüünö niimö no. <sup>5</sup> Lakiini aaga ö'dö nadirina ömö'dö yaada kara tari'ba iini ya aaga, aaga ari'ba ömö'dö tiya ana türü ma tiidi aaga apügü aaga ka issi ma Jahanam ya, nikiri a'a ka tiki aaga, ömö'dö ya i'i yungngo ada kara tari'ba iini. <sup>6</sup> Taalo kadu kanadene ana uyi iidümmü

ana nagirisi keera? Lakiini taalo Masala müürü ma tökööunggodho kungngo.<sup>7</sup> Mündä awu ma nanggüüdü tanno ada aginnidene nye'd'de kungngo aaga fatar'i'ba kudumma ada ka tagii'bi uyi dhabbu."

*Tamma nya tanu ka Yasu*  
(Matta 10.32-33; 12.32;  
10.19-20)

<sup>8</sup> "Ara a'a tiki aaga, ömö'dü ya ara tamma kede kidha ma kadu ya, a 'Bii'bala ma Tadü'd'dü tamma kini kidha ma kadhangga tanno Masala. <sup>9</sup> A ömö'dü ya ara ta'düsünü a'a ka kadu kidha ya, ara 'Bii'bala ma Tadü'd'dü ta'düsünü i'i kidha ma kadhangga tanno Masala.

<sup>10</sup> "Ömö'dü ya eela 'Bii'bala ma Tadü'd'dü ya, ara tafa kini illi ömö'dü ya eela Koronggore ya Insili ya, taalo Masala mara tafa kini.

<sup>11</sup> "Kada kara tadünggü ma co naala ma talaana nya ada kara tuurugunja kidha ma naguugaara no iifi no, iifya aaga tafa tadinigöögö a'da ara aaga tümmöönö ka nanggeyi tiya ada nya nya ada kara tiki a'da minna kene kidha. <sup>12</sup> Kudumma a Koronggore tiya Insili ya ara talaana aaga ka uuru tanno miini no ka niimö tiya ada kara teema ya."

*Tamma ma tafeene ma ömö'dü tiya üüsü aa'baga ya*

<sup>13</sup> İkiri ömö'dü könö ka kadu ka teene ka tiki a Yasu, "Ka Tatalaana, iki a örre tiya eede a'da asümünaana

eema ma ta pupa kädi ku'bu."

<sup>14</sup> İkiri Yasu ka tiki iini, "Ka ömö'dü, mada anangnga a'a ka tauugaara ma tasümünaana eema kada ku'bu?" <sup>15</sup> A Yasu tiki a kadu, "Aaga dünö ko'do aaga tafa tallogo, taalo ömö'dü efe ka 'dü ana eema tiya adhabbu ya."

<sup>16</sup> A Yasu tadirina tumma eene iki, "Ömö'dü inggide a siga tanno iini ka tageene eema dhabbu. <sup>17</sup> İkiri ka teema unggodho i'i iki, 'Ara a'a tönyöö 'bitingngöö? A 'buugu ka titaalo kede ma tanangnga eema yeede ka taleele ya kide.'

<sup>18</sup> "İkiri ka tiki, 'Ara a'a tüüni kungngo ara a'a türrüdü na'boode neede no, ara a'a ka rü'bü ya dhabbu ya, nawagaana migile kide nya eema tiya nye'd'de kungngo. <sup>19</sup> Na a'a saga tiki ka eyi tiya eede, Eema ungngo üüdü a'diila adhüküdhükü ara taneene a nagürüünü kadhabbu, linggae naguri nooye nadhodho.'

<sup>20</sup> "Mikiri Masala ka tiki iini, 'Ka 'baga, ka ooso tanno ara Masala ta'duga tefe ka 'dü nüüdü küdü. Eema yüüdü ka tagawaana koona ya, ara ta tiya mada?'

<sup>21</sup> A Yasu tiki, "Afeene nya kadu tanno awaana eema koona dhabbu ma eyi tiya eene no, lakiini eege kitaalo küüsü kidha ma Masala."

*Fa tadinigöögö*  
(Matta 6.25-34)

<sup>22</sup> A Yasu tiki a kadalaadene tanno iini, "Aaga fa tadinigöögö ma nanggeyi tanno ada a'da ara aaga tagu minna nya ada kara taluna en'di ma oona kiga. <sup>23</sup> Tefe ka 'di ka kii'bi kuri oona tagii'bi en'di. <sup>24</sup> Aaga iirii nakaaru taalo kadiniigji kitaalo karaana ka nasigeene, taalo na'boode kene nya nagüdhü, a Masala saga amana kuri eene aaga kagu'daana ka Masala ka oona aaga tagii'bi uyi. <sup>25</sup> Mada ana kada ara tagusu ürüünü unggodho ka tefe ka 'di tanno iini kara tadinigöögö. <sup>26</sup> Üürü taalo aaga kambaanya ligeema ya dhiidhi ya, aminna agu aaga, aaga tadinigöögö ma türeene miini.

<sup>27</sup> "Aaga iirii togoogo ma lodho inggidene nya, taalo kadhügürü kaya a kusuka kitaalo küüfü en'di. Ara a'a tadirina tumma aaga, münda Siliman ka tihindhi ma tauugaara tanno iini 'do taalo akümmü en'di ka'diila afa tangatogoogo ka unggodho. <sup>28</sup> Ooyo ya afü'döönö ka siga 'bitingngö, a tako taadha üpünja ka issi atinyogo, magala Masala ka kagirni en'di eene ka oona, aada aaga adha taalo ma tagirni en'di ada ka oona, ma aaga no taalo kümmü tumma ma Masala ana eedi dhorro no. <sup>29</sup> Aaga fa tasaasa kuri aaga tafa tasaasa tooye aaga fa tadinigöögö. <sup>30</sup> Eema ya i'i yungngo a kadu ma 'büdhülü kasaasa, lakiini Pupa yaada ussu

a'da kasaasa aaga eema ya. <sup>31</sup> Lakiini aaga asaasa tauugaara ma Masala eema ya nye'd'de kungngo assa ka kusunja kada kide.

### *Eema ka 'dotombo'do (Matta 6.19-21)*

<sup>32</sup> "Ligidheefele ya dhiidhi ya, aaga fa tari'ba kudumma Pupa tiya ada ka'diila oona iini ma tara tanangnga tauugaara aaga. <sup>33</sup> Aaga tanege ana eema tiya ada aaga tasümünaana gürüüsü miini ka kadu tanno eema ka titaalo kene no. Aaga amanaga eema ya agu'daana ada ka oona ya co 'buugu tiya kü'düü'dü ka titaalo kara talimaana ya, aaga tanangnga ya ka 'dotombo'do kita iini ka titaalo ataama, a tanyooro taalo ara co itaalo ara taala'ba. <sup>34</sup> 'Buugu ya eema tiya ada ka tanna kide ya, i'i yungngo a nanggeedi tanno ada kara tanna kide."

### *Kadu ma linggo no adho ka fiin'i no*

<sup>35</sup> "Aaga indinaana oona ku'bu aaga timi'di nanggeedi ma linggo aaga tafa ka nagalamba tanno ada kafinne. <sup>36</sup> Afa kadu na indhägi ömö'di ma 'di ara ka öö'dö ndama 'buugu ma tarna kini kara tafada öö'dö adhogo inye kafa'da areere. <sup>37</sup> A'diila nya kadu tanno miini no ka ömö'di ma 'di kara tö'dö aluna eege ka adinö. Ara a'a tadirina tumma aaga dhorro, ara takirnö ten'di iini ka oona anangnga eege ka temmi ara ka amanaga kuri eene.

38 A'diila nja eene kini kara tö'dö ooso ka teene üürü a na'bu ma taka aluna eege ka adinö nggeege. 39 Amang kada tussu a'da ömö'di ma 'di kara tagussu a'da ara tanyooro tö'dö aada ya, ara tadinö itaalo ara tafa ka 'di tiya iini anyoorodene.

40 "Aaga adinö ko'do turi kudumma ada ka titaaloo kussu uuru na 'Bii'bala ma Tadü'ddü kara tö'dö iini no."

41 İkiri Bütrüs ka tiki iini, "Ka Tatalaana, nadünögü o'o tumma no ungngo alla nja kadu in'dili kungngo?"

42 A Uugaara Yasu tiki, "Amada i'i yungngo adho ka fiini a'dara, a ömö'di ma 'di ara tanangnga i'i kafa ka 'di amana kuri a kadu tanno ma linggo no ka uuru miini?

43 A'diila nja ömö'di tiya miini ya ka ömö'di tiya iini ka talinggo ada iini ya ka tö'dö aluna i'i ka talinggo nggeege.

44 Ara a'a tadirina tumma aaga dhorro, ara tanangnga eema yiini nye'd'de kungngo afa kide. 45 Lakiini ka ömö'di tiya alinggo kara tiki ana eedi ka teene a'da taalo ömö'di ma 'di ara tö'dö areere, ikiri ka arooro ka abbü kadu na linggo no nja iiya aagu eema ooye ngeeli ake kide.

46 Ka ömö'di kara tafada ka uuru tanno iini ka titaaloo ussu, itaalo ussu a'da ara tö'dö aada, ikiri ka ta'dekeraana i'i ku'bu anangnga i'i kafeene nja kadu tanno taalo kaföonyö eema no.

47 "A ömö'di ya alinggo assa ka tussu taneene na ömö'di ma linggo assa ka

titaalo alinggo a fiini tiya iini ka asaasa ya, ara tabbü adene niini tadhabbu. 48 A ömö'di ya linggo a'da taalo ussu taneene na ömö'di assa ka tüüni eema ma tara tanangnga i'i ka abbü adene, taalo ara tabbü adene dhindho. Ömö'di ya eema ka ananja iini dhabbu ya asaasadene kini dhabbu, ömö'di ya eema ka tümmününja iini dhabbu ara tanangnga ku'bu dhabbu.

*Yasu nja kadu ma  
'büdhülü*  
(Matta 10.34-36)

49 "Nö'dö a'a tüpü issi ka 'büdhülü, a'a nasaasa eege a'da kassa andafinne.

50 Namma a'a ka tambeese tanno agu'daana dhindho no, nadinigöögö meene a'da ka öö'dö talinggo adene. 51 Kiki aaga kide a'da a'a nø'dö a ta'diila a kadu ka 'büdhülü? Taalo nggeege, nø'dö a'a tanangnga kadu kanu aana ka oona. 52 Ndama uuru tanno kadu ma 'bügöörü tiya unggodho ya ka iidümmü kara tanu aana ka oona, anno iidoona no takirimi na eera no anno eera no takirimi no iidoona no.

53 A pupa takirimi 'bii'bala yiini, a 'bii'bala takirimi pupa yiini, a niimö takirimi 'badaada moono a 'badaada takirimi niimö moono, a niimö ma 'bii'bala takirimi taada moono, aka ma 'bii'bala takirimi taada moono."

*Nagoola ma nagürüünü*  
(Matta 16.2-3)

<sup>54</sup> A Yasu tiki a kadu afe'de, "Kada kara tiji tülüögü ka tunggunu ko'do ndama ta'buugu ya, aaga tiki a'da ara tombo'do tede 'bitüngngö, a'da timin'da.

<sup>55</sup> Aga tanya kara tüüsö a ko'do ndama küülü, aaga tiki a'da ara 'buugu tagu'daana, a'da timin'da.

<sup>56</sup> Ka nagaaga, kussu aaga ka tassumunaana taneene ma eema ma 'büdhülü nja 'dotombo'do, a minna agu aaga taalo kussu tesaana eema ma 'bitüngngö ku'bu?"

*A'diila nja diidi tiya üüdü  
(Matta 5.25–26)*

<sup>57</sup> "Minna agu aaga, aaga taalo küüri nämö ma eyi tiya ada ya dhorro ya, yaada kara talingga ya?" <sup>58</sup> A küdü kara tungunugu co kita uugaara nja diidi ma o'o kardha ku'bu neema tumma ma ta'diila nja iini ka fiini, kudumma iini kara tümmänü o'o a uugaara, a uugaara tanangnga o'o a tasigira, a tasigira tanangnga o'o ka pabuusu. <sup>59</sup> Ara a'a tiki o'o, taalo o'o nara tö'dö kürö ndama kanna üürü taalo o'o nanangnga gürüüsü ku'bu nye'd'de kungngo."

## 13

*Taadha ka tatoroko*

<sup>1</sup> Ka uuru tanno miini no kadirina kadu eema a Yasu ma kadu ma Jaliil tanno Bilatus ka kirina eege ka la ma Masala assa ka takonyaana eriidö yeene ka oona nja eriidö ma eema ma eriidö tiya eene ka türri iini ya. <sup>2</sup> İkiri Yasu ka

tiki eene, "Kiki aaga kide a'da tatoroko na kadu ma Jaliil na miini no eege ka oroko ka tagii'bi kadu ma Jaliil nye'd'de, yungngo eene ka kirinadene?" <sup>3</sup> Taalo nggeege, ara a'a tiki aaga, kada ka titalo kaadha ka tatoroko tanno ada no, ara aaga taaya nye'd'de afa meene kungngo. <sup>4</sup> A kadu na ada'baaga ana awwa kafünü iidoona no, a sala ka türküdü kene ko'do ka Salwam kaaya no, kiki aaga kide a'da tatoroko neene kagii'bi tatoroko na kadu ma Örsaliim nye'd'de kungngo?

<sup>5</sup> Ara a'a tiki aaga a'da taalo nggeege, üürü taalo aaga kaadha ka tatoroko tanno ada no, ara aaga taaya nye'd'de afa meene kungngo."

*Tafeene ma tumma ma indüye no taalo kana üye no*

<sup>6</sup> Afada adirina tafeene ma tumma eene iki, "Ömö'di inggide fa ma indüye afü'döönö kini ka raaga ma ki'bim'bi, ikiri ka co asasa tarmuna aluna eege taalo kageene. <sup>7</sup> İkiri ka tiki a ömö'di tiya afa ka raaga ya, 'Andö'dö kede nagürüünü kiidoona eede ka ticci ka indüye tanno ma tasaasa tarumu üye miini nitaalo naduna, bünnögü eege co kaga'da 'büdhülü amana?'

<sup>8</sup> "A ömö'di ya alingga ka raaga ya tiki iini, 'Fa kini ömö'di eede, ka ürüünü tiya ara a'a ka tasigi'di i'i ka tüm'bü nanangnga tümükodho kide. <sup>9</sup> Üürü

keene iiye fa kene, üürü taalo keene ka ürüünü tiya unggunu tö'dö ya na o'o sa ka bünnügü co."

*Yasu oolona aka makür'dü ka 'dugeere ka uuru ma Sa'bidi*

<sup>10</sup> Uuru ma Sa'bidi ka inggide ka Yasu ka tagalaana kadu ka la ma talaana. <sup>11</sup> A'da aka minggide a nagana'bu ka'dingga kono ka oona mamaara makür'dü ka 'dugeere magu'du nagürüünü kada'baaga ana awwa kafünü iidoona taalo mambaanya ta'dingga madhidho 'do. <sup>12</sup> Ka Yasu ka tasala oogo ikiri ka tümmüni oogo iki, "Ka aka mo, madanggala maara üdü ka oona." <sup>13</sup> Ümmüni iisine oono ka oona, maroro ka fiki'dö madhidho mamana ta'dila a Masala.

<sup>14</sup> Ikiri uugaara ma la ma talaana ka koroo'bo kudumma Yasu ka toolona aka ka uuru ma Sa'bidi iki a kadu tanno ka la no, "Füngngö ungngo ada iidümmü afünü unggodho maada ka talinggo kide, aaga ö'dö aaga toolonadene kide, taalo ka uuru ma Sa'bidi."

<sup>15</sup> Ikiri Uugaara Yasu ka tiki eene, "Ka nagaaga, taalo ömö'di öccö ana kada ara tagildhe kisine yiini nja kodha tiya iini ka uuru ma Sa'bidi ka 'buugu ma kuri aco tunggu i'i co tooye 'biidi?" <sup>16</sup> Aka mo ma 'badaada tammo Abrahiim Eblisi ka timi'di oogo a nagürüünü kada'baaga ana awwa kafünü iidoona, taalo

ama oono kara tatingildhe ka uuru ma Sa'bidi?"

<sup>17</sup> Kini ka tiri tumma no, a modolo tümmü kadu na ka diidi i'i no, ara kadu in'dili katadhodho ma eema tiya iini ka tagüünü ya a'dila ya nye'd'de kungngo.

*Tafeene ma tumma ma tanuure*

<sup>18</sup> Ikiri ka tiki, "Tauugaara ma Masala 'dee ara a'a tiki a'da kafeene nja minna?

<sup>19</sup> Kafeene nja ndaniyiye ma tanuure ka ömö'di ka 'duga adadini ada ka siga tanno iini kafü'döönö kasere kada fa tiya dhabbu ya, a uyi ma 'dotombo'do taküüfunü nafü ka naseldhe miini."

*Tafeene ma tumma ma tigüüdi*

<sup>20</sup> Afada iki afe'de, "Ara a'a tiki a'da kafeene tauugaara ma Masala afa minna?

<sup>21</sup> Kafeene nja tigüüdi aka ka a'duga makoonyaana ka müsö ma dhabbu, elö tüüfü nye'd'de."

*Füni ya iciri ya*

(Matta 7.13-14, 21-23)

<sup>22</sup> A Yasu takunggunaana ku'bu ka naanya alaana kadu ka fiini a'da unggunu co Örsalim. <sup>23</sup> Ikiri ömö'di könö ka tiki iini, "Ka Talaana, kadu kadhilli eege kungngo kara toolonadene?"

A Yasu tapadaga tumma eene, <sup>24</sup> "Aaga kardha ku'bu aaga tagilaana ka inye tanno iciri no, ara a'a tadirina aaga, kadu kadhabbu kara tasaasa co ka tauugaara ma Masala, illi eege taalo kam-baanya. <sup>25</sup> Aga ömö'di ma 'di

kara tafiki'dö eere ka ïnye, aaga ta'dïngnge ana ko'do kürö, aaga tadhoodho ïnye aaga tiki, 'Ömö'di eede, fa'da ïnye ungngo.'

"Ikirii ka tiki, 'Taalo a'a nussu aaga, aaga ka ma kiga.'

<sup>26</sup> "Aaga tikirii ka tiki, 'Kagu ungngo eema ungngo tagooye nja o'o, na o'o tagalaana kadu ka nafiini tanno iidii.'

<sup>27</sup> "Ikirii ka tiki aaga, 'Taalo a'a nussu aaga, aaga kö'dö ndama kiga, aaga sigi co kannna kede ka oona, aaga ïn'dili kungngo aaga na oroko no.' <sup>28</sup> Aaga tafara aaga tabbünaana igini ka oona, kada kara tasala Abrahiim nja Ishak nja Yaguub nja nagane'bi ïn'dili kungngo ka tauugaara ma Masala aaga tuurugunja co kürö. <sup>29</sup> Ara kadu sa köö'dö ndama fiini ma ndanaaya nja ta'buugu nja küüle nja küülü nja na'buugu koona nye'd'de kungngo köö'dö temmi ka tauugaara ma Masala kagu eema. <sup>30</sup> Kadu na kannna keere no kaco kidha, a kadu na kannna kidha no tapadaga oona keere."

### *Yasu asaasa Örsalium (Matta 23.37-39)*

<sup>31</sup> Ka uuru tanno miini no, köö'dö naFariisi ka Yasu kiki iini, "Kolo kürö nunggeene kita kudumma Hirüdüs asaasa tiidi o'o."

<sup>32</sup> Ikirii ka tiki eene, "Aaga unggeene aaga co tiki a sura

tammo a'da, 'A'a nungngo nasoro nagana'bu ka kadu ka oona noolona kadu ka maara 'bitingngö nja taka, ka naguuru tanno iidoona no, ara a'a tatuumö linggo no nye'd'de.' <sup>33</sup> Lakiini ara a'a tunggeene ka fiini tiya eede ka uuru tanno nja taka nja taka eege, kudumma ne'bi taalo ara teyi kürö ma Örsalium.

<sup>34</sup> "Ka Örsalium, Örsalium, nagirina o'o nagane'bi natüidiri kadafii ni na ünggürününja küdü no, naguuru kadhabbu eede ka tasaasa tawaana laala yüüdü koona afa koogoro mawaana linsiö kono ka agedhe, aaga taalo kasaasa. <sup>35</sup> Aaga assa ka 'di tiya ada ungngo ara tinyi kada ku'bu. Ara a'a tiki aaga taalo aaga kara tassa kede afe'de, illi ada kara tiki, 'Baraka ka ömö'di tiya ö'dö ana eere ma Uugaara ya.'

## 14

*Yasu oolona ömö'di ka maara*

<sup>1</sup> A Yasu co kita dhabbu ma naFariisi ka uuru ma Sa'bidi töccö tagu eema kide, a kadu tadinö ana i'i ko'do. <sup>2</sup> A'da ömö'di ungngo iini kidha a maara alüfülü ka oona. <sup>3</sup> Ikirii Yasu ka tiki a kata-laana ma seriye nja naFariisi, "A'diila aja kara toolona ömö'di ka uuru ma Sa'bidi alla atoroko?" <sup>4</sup> Kikirii ka ki'döönö, yungngo a Yasu ka tümmü ömö'di ka niisö olona i'i uuru i'i ka tino.

<sup>5</sup> Assa ka tiki eene, "Mada ana kada a 'bii'bala tiya iini üürü kodha yiini ka 'dinggö co össe ka uuru ma Sa'bidi taalo ara tareere unggu i'i ko'do?" <sup>6</sup>Taalo nüümö meeene kateema.

*Tataafala nja tiicolo ka eedi*

<sup>7</sup> İkiri Yasu ka iji kadu na agümmünüdene no, katesse na'buugu ka kadu kidha kemmi kide, ikiri ka tirina tafeene ma tumma neene, <sup>8</sup>"Üürü agümmünü ömö'di o'o ma tö'dö ka tarna ya, fa temmi ka kere tanno kidha no, kudumma ömö'di töccö inggide agümmünüdene adhabbu o'o. <sup>9</sup> Nggaaga ömö'di ya agümmünü aaga ya tö'dö iki o'o, 'Fa ka ömö'di tiya ka 'buugu tiya üüdü,' a modolo tümmü o'o naco temmi keere. <sup>10</sup> Lakiini ka kadu kara tümmünü o'o, kolo nemmi ka 'buugu tiya keere ya amang ka ömö'di tiya agümmünü kadu ya, kara tö'dö iki o'o, 'Ömö'di eede, fik'i'dö naco temmi ka fiinii ma ndanaaya kanna.' Nggeege ya taalo modolo mara tagu o'o ka kadu kidha. <sup>11</sup> Kudumma ömö'di tiya 'dinigi oona niini coo'do ya, ara ta'dininja ku'bu, ömö'di ya ümmü eyi yiini ka tidhilli ya ara ta'dininja coo'do."

<sup>12</sup> Yunggo a Yasu ka tiki ömö'di tiya agümmünü kadu ya, "Küdü kara tümmünü kadu a kuri ma uuru nja ooso kungngo ya, fa tümmünü kateefe ma o'o nja nagöre tanno üüdü nja

siliga ma o'o nja tanno kete küdü no nja tanno ana eema dhabbu no, kudumma eene kara tümmünü o'o tekere kapadaga eema yüüdü o'o ka ööye miini. <sup>13</sup> Lakiini küdü kara tümmünü kadu a kuri ya, ümmünü kadu na eema ka titalo kene no nja kadu tanno namügüre no nja tanno sogo'do no nja tanno kisinsoro no. <sup>14</sup> A'diila nja kadu kara tünni nggeege ana eege kudumma eene taalo kara tapadaga eema o'o ka ööye miini, ara sa kananja o'o ka uuru ma tafiki'i'dö ma kadu tanno a'diila no."

*Tafeene ma tumma ma taanyara tanno dhabbu no*

<sup>15</sup> A ömö'di könö ana ka kadu tanno emmi no ka taföönyö ikiri ka tiki a Yasu, "A'diila nja ömö'di tiya ara temmi agu eema ka tauugaara ma Masala ya."

<sup>16</sup> İkiri Yasu ka tiki iini, "Ömö'di inggide agüünii eema ma kuri dhabbu adagümmünü kadu kadhabbu a'da köö'dö taguri. <sup>17</sup> İkiri ka kürünü ömö'di ma linggo yiini ka uuru ma kuri, a'da aco tiki a kadu tanno miini no a'da kasa andö'dö kudumma kuri andananja ku'bu.

<sup>18</sup> "Ka'dükü co kawwa eema ma tümmöönö ka nanggeyi tanno eene, a ya dhidha ya tiki iini, 'Naleefe a'a taana siga, yunggo eede kara co ndassa kide nasaasa o'o a'da nafa kede naco.'

<sup>19</sup> "A könö tiki iini, 'Naana a'a nagodha ka iidümmü ka trenggele a'a nunggunu co

nda'b'ba eege, nasaasa o'o a'da nafa kede naco.'

<sup>20</sup> "Aya tiki, 'Narna a'a aka taalo a'a nara tambaanya tö'dö.'

<sup>21</sup> "İkiri ömö'dü ya alinggo ya, ka öö'dö adirina eema ya kadu kadageema ya iini, ömö'dü ma 'dü a tagoroo'bo tümmü i'i, ikiri ka tiki ömö'dü tiya alinggo ada iini ya, 'Kolo akürö areere ka nafiiñi ma anya a narukuteene miini, nöö'dö a kadu tanno eema katitaalo kene no nja tanno namügüre no nja tanno asogo'do nja tanno kisinsoro no.'

<sup>22</sup> "İkiri ömö'dü ya linggo ya ka tiki iini, 'Ka ömö'dü eede, nagalinggo a'a afa tiya üüdü ka tiki ya a na'buugu öccö kinggide ka 'döngngönyö.'

<sup>23</sup> "İkiri ömö'dü ka tiki iini, 'Kolo a nafiiñi ma anya ku'b'ba nja eere ma nsaara nöö'dö a kadu kadigi 'bügööri yeede.  
<sup>24</sup> Ara a'a tiki aaga, taalo ömö'dü ana ka kadu tanno agümmünüdene no ara tagolo kuri yeede.'

*Minna asaasadene ka taalaana tanno Yasu*

<sup>25</sup> A kadu tunggeene nja Yasu kadhabbu ikiri ka tafele iki eene,<sup>26</sup> "Ömö'dü ya öö'dö kede assa ka taalo anu ka pupa tiya iini nja nüümö, nja aka tammo iini, nja laala tiya iini, nja nagöre tanno iini, nja nagïnye tanno iini, adagii'bi tasaasa ma eyi tiya iini ya, taalo ara tatalaadene tiya eede.<sup>27</sup> A ömö'dü ya taalo a'duga salii'bi yiini

uurna a'a keere ya taalo ara tatalaadene tiya eede.

<sup>28</sup> "Mada ana kada asaasa tarü'bü 'dü ya dhonggoro ya assa ka taalo emmi tikinggi inni eema yiini kara tarü'böönö iini ya, ara ta'dimo kini ka arü'böönö iini?<sup>29</sup> Kudumma iini kara tanggaaga kadesa ku'bu assa ka titaaalo ambaanya tarü'be, a kadu na unggeene ka fiini no nye'd'de kungngo, tadin'i i'i kamidhi i'i.<sup>30</sup> Keema kiki a'da, 'Ömö'dü ya ata tüm'bü ma tarü'böönö ku'bu assa ka taalo ambaanya tarü'be 'dü.'

<sup>31</sup> "Üürü uugaara inggide asaasa co ka soore ka uugaara töccö, taalo ara temmi tikinggi iiröönö ara i'i tambaanya teema koro'bo nja iini a nasigira kö'dö na alif kada'baaga nja uugaara tiya a nasigira kö'dö na alif kukumu ömö'dü no?<sup>32</sup> Üürü taalo atambaanya, ara tagürünü kadu kaco toreeene nja iini a'da aleefe ku'b'ba, kimi'di tumma a ta'diila nja iini.<sup>33</sup> Nggeege ya üürü ömö'dü ana kada itaalo afa ka eema tiya iini nye'd'de ya, taalo atambaanya ta tatalaadene tiya eede.

<sup>34</sup> "Tangga'dala ka'diila, lakiini kene ka ndasügüni 'dee kara tamana minna kide?<sup>35</sup> Taalo kara ta'diila nja 'büdhülü kitaalo kara ta'diila nja tommokodho, kara tadhifi co akürö.

"Ömö'dü ya ana iisine ma taföönyö ya, fa kini aföönyö."

## 15

### *Dheefeple ya aama ya*

<sup>1</sup> A kadu na ama talu'ba no nja tanno oroko no kanna ka Yasu kete katoodo kini. <sup>2</sup> İkiri naFariisi nja katalaana ma seriye kada a'digineene kiki, "Ömö'di ya asaasa kadu na oroko no agu eema nja eene."

<sup>3</sup> İkiri ka tageema nja eene a tafeene ma tumma tanno iki, <sup>4</sup> "Mada ana kada ana kidheefeple kukumu kadu ka iidümmü, aya taama ana kene unggodho taalo ara tinyi no kukumu kadu ka iidümmü aaco akürö unggodho no, ka lodho ara kaco ndawwa dheefeple ya aama ya idhi aduna? <sup>5</sup> Kini ka tuna i'i akarasa kini ka 'dakeyi adhodho. <sup>6</sup> Aco 'di ümmünü kateefe miini nja kadu tanno kete kini no iki eene, 'Aaga dhodho nja a'a kudumma eede ka tuna dheefeple yeede ya agaama ya.' <sup>7</sup> Yungngo eede kara tiki aaga, ara dhodho tanna ka 'dotombo'do nggeege ana ömö'di tiya atoroko ya unggodho kara taadha ka tatoroko tanno iini öö'dö ka Masala agii'bi kadu kukumu kadu ka iidümmü aaco akürö unggodho, na insili no taalo kasaasa taadha ka tatoroko."

### *Jine ya aama ya*

<sup>8</sup> "Üürü aka minggide mana nakajine\* kada'baaga assa ka taama unggodho, taalo mara tüfü issi ka lamba makinye 'di mawwa

jine amussu midhi maduna i'i? <sup>9</sup> Kono kara taduna ya, mümmünü kateefe moono nja kadu tanno akete kono no miki, 'Aaga dhodho nja a'a kudumma eede ka tunä jine yeede ya agaama ya.' <sup>10</sup> Yungngo eede ka tiki aaga a'da kadhangga ma Masala katadhodho ana ömö'di tiya toroko unggodho ka taadha ka tatoroko."

### *'Bii'bala ya aama ya*

<sup>11</sup> İkiri Yasu ka tiki, "Ömö'di inggide ana laala eera. <sup>12</sup> İkiri 'bii'bala ya idhilli ya ka tiki, 'Pupa, sa nangnga eema yeede a'a ndama almaala.' İkiri ka sümünaana almaala yiini kene ku'bu. <sup>13</sup> A füngngö idhilli kungngo ya, ikiri 'bii'bala ya idhilli ya ka tawagaana eema yiini koona nye'd'de, unggene aaco a naanya ku'b'ba, ataga'da eema yiini ka eema ma weerö ün'dügüngngö.

<sup>14</sup> Kini ka ndaga'da eema nye'd'de ya, assa iire tümmü naanya no miini no ka tatoroko, andasaasa kuri. <sup>15</sup> İkiri ka co ka ömö'di ma anya tammo iini mo, aco talinggo nja iini, ikiri ka tuurugu i'i co nasigeene tanno iini ma taguri a nagüdürü. <sup>16</sup> İire tümmü i'i dhindho asaasa tagu 'bisinggisi ya nagüdürü ya, illi ömö'di ma tanangnga iini taalo.

<sup>17</sup> "İkiri ka apadaga ka eyi tiya iini iki, 'Kadu no

\* 15:8 15.8 Jine ya miini ya i'i ya ma linggo ma uuru unggodho.

alinggo ada pupa tiya eede kagu eema dhabbu, ara a'a ka tanna kita ana iire.<sup>18</sup> Ara a'a tafiki'i dö naco ka pupa tiya eede niki iini, Pupa yeede, nagüünii a'a tam'baga kidha ma Masala a kidha ma o'o.<sup>19</sup> Taalo a'a nama tümmünüdene kada 'bii'bala tiya üdü, ümmü a'a ka tamö'di tiya alinggo ya ün'dügüngngö.'

<sup>20</sup> "Ikiri ka tunggeene aaco ka pupa tiya iini, a pupa yiini taasala i'i ka tadhe ku'b'ba a 'bangnga miini tümmü i'i, ikiri ka rünö aaco kini ümmü i'i iti kini ka oona ööjülü i'i.<sup>21</sup> Ikiri 'bii'bala yiini ka tiki iini, 'Pupa yeede, nagüünii a'a tam'baga kidha ma Masala ana o'o afe'de, taalo a'a nama tümmünüdene kada 'bii'bala tiya üdü.'

<sup>22</sup> "Yungngo a pupa tiya iini kadirina eema a kadu tanno alinggo ada iini no, 'Aaga ö'dö a ten'di tammo a'diila mo areere, aaga tagirni kini ka oona, aaga tagirni ndaneema iini ka 'banüsö aaga tagirni egilide iini ka uune.<sup>23</sup> Aaga ö'dö a 'bamiide tiya indhi ya, aaga teedhe angnga taguri angnga tagadhodho.<sup>24</sup> Kudumma 'bii'bala tiya eede ya, aga eyi ada ungngo efe ka 'dii, adagaama adunadene.' Kikiri kanda dhodho 'do.

<sup>25</sup> "A'da 'bii'bala ya dhabbu ya inni ka siga, kini ka ndafada ka siga assa ndakete ka 'dii ya, ikiri ka föonyö tüüsü nja

sili.<sup>26</sup> Yungngo iini ka tagümmünü ömö'di öccö ya alinggo ya, indini i'i a'da, 'Minna inggide?'<sup>27</sup> Yungngo iini ka tiki iini, 'Örre yüüdü afada ka a'diila, a pupa yüüdü tikiri ka teedhe 'bamiide ya indhi ya.'

<sup>28</sup> "Ikiri ka koroo'bo a'dükü co 'bügööri, a pupa yiini tö'dö kürö atakilli i'i a'da aaco.<sup>29</sup> Ikiri ka tiki a pupa tiya iini, 'Nalinggo ada a'a o'o a nagürüünü dhabbu, ni-taalo nasilli tumma nüüdü, taalo o'o nakara tümmünü 'banggoromo a'a unggodho kungngo a'da nadhodho nja kateefe ma a'a iini.<sup>30</sup> Lakiini ka 'bii'bala tiya üdü ya atömü eema yüüdü nye'd'de nja katemelö, kini ka tafada, na o'o tedhe 'bamiide ya indhi ya iini.'

<sup>31</sup> "A pupa yiini tiki iini, 'Bii'bala eede, nanna o'o ka 'dii nja a'a turi, eema yeede yüüdü i'i ya miini.<sup>32</sup> Lakiini a'diila nja angnga kara tagadhodho angnga taka'deema kudumma örre tiya üdü ya aga eyi ada ungngo efe ka 'dii, adagaama adunadene.'

## 16

*Ömö'di ya alinggo a ta'dara ya*

<sup>1</sup> A Yasu tadirina tumma a kadalaadene tanno iini afe'de, "Ömö'di inggide ana eema dhabbu, ömö'di öccö inggide alinggo nja iini, ömö'di könö tikiri ka tafünaana eema ömö'di tiya

ma eema ya iki a'da, 'Ömö'di yüdü ka anangnga i'i ka afa ka eema tiya üdü ya aga'da 'do.'<sup>2</sup> İkiri ka tagümmünü i'i iki iini, 'Eema minna i'i yungngo eede ka föönyö ma o'o ungngo? Tirina niimö yüdü ka tagüünii ana almaala tiya eede ya a'a, taalo o'o nara tafa ka eema tiya eede afe'de ndama uuru tanno.'

<sup>3</sup> "A ömö'di ya linggo teema ka eyi tiya iini, 'Ömö'di yeede ya ara tafada a'duga linggo no kede, ara a'a tönynyö 'bitingngö? Taalo a'a nara tambaanya leele, a modolo ma tarangnga tagu a'a.'<sup>4</sup> İkiri ka tiki, 'Nussu a'a niimö yeede kara tüünii ya, amang ka ömö'di ma linggo kara tasoro a'a ya, a kadu tamma kede ka nöö'di tanno eene.'

<sup>5</sup> "İkiri ka tagümmünü kadu ma kömüsü tanno ömö'di ma linggo tanno iini iki ada könö, 'Ömö'di yeede ya 'dee asaasa küdü ka oona aanya?'

<sup>6</sup> "Iki iini, 'Nadhafala ma uu'ba' kukumu kadu kiidümmü.'

"Iki iini, "Duga waraga nemmi areere nakiri kide eema a kadu keera kaco ii-sine.'

<sup>7</sup> "Iki ada öccö, 'Ömö'di yeede asaasa küdü ka oona aanya?'

"Iki iini, 'Taliisi ma migile kö'dö alif.'

"İkiri ka tiki iini, "Duga waraga nakiri kide

a'da eema ukumu kadu kada'baaga ta egüsö (800)."

<sup>8</sup> "İkiri ömö'di ya ma eema ka tündhigü ömö'di ya alingga nja iini ya ko'do ya taalo adho ka fiinii ya, kudumma iini ka tagüünii a ta'dara. Kudumma laala ma 'büdhülü tiya ka'dara kadagii'bi laala ma töyene kadalinggo nja kadu tanno eene.<sup>9</sup> Nikiri a'a ka tiki aaga, aaga ümmü kateefe ma aaga ana eema ma 'büdhülü, kini kara titaalo ya, kara tamma kada ka 'buugu ma tefe ka 'di ta'billi.

<sup>10</sup> "Ömö'di kara tafa ka niimö tiya idhilli ya ara tafa ka tiya adhabbu ya, a ömö'di ya üünii ada kadu ku'bu a niimö idhilli ya ara tüünii ada kadu ku'bu ana eema tiya dhabbu ya.<sup>11</sup> Üürü taalo aaga kafa ka almaala ma 'büdhülü 'dee, mada yungngo ara tamma kada ana eema tiya dhorro ya?<sup>12</sup> Üürü taalo aaga kafa ka eema tiya kadu tököönö a mada i'i yungngo ara tamana eema yaada aaga?

<sup>13</sup> "Taalo ömö'di ara tambaanya talingga ada kadu keera, kudumma iini kara tanu ka tiya ara ka asaasa öccö, nja iini ka föönyö tumma no ada öccö amidhi öccö, aaga taalo kara tambaanya talingga ada a Masala nja almaala."

<sup>14</sup> A naFariisi tagatoodo kini kamidhi i'i kudumma eene kasaasa almaala dhindho.<sup>15</sup> İkiri ka tiki eene, "Kümmü aaga nanggeyi naada ka'diila ka kadu

kidha, lakiini Masala mussu nanggeedi naada ka teene, kudumma eema tiya kadu katümmü i'i ka ku'daana ya atoroko ka Masala kidha.

<sup>16</sup> "Aga kanna seriye kide nja talaana ma nagane'bi idhi a Yühanna ya Tatambeese ya tö'dö. Ndama uuru tanno miini no, a kadu tagalaanadene a tumma ma tauugaara ma Masala, a kadu könö takardha ku'bu ma tasaasa co a rüsü kungngo. <sup>17</sup> Lakiini tamanyaga ma 'büdhülü nja 'dotombo'do taalo agu'daana afa titaalo ma 'ba'dakeyi ma seriye ungodho kungngo.

<sup>18</sup> "Ömö'dü ya adheene nja aka tammo iini atarna kömö ya, i'i ya atemelö, a ömö'dü ya arna aka ma nyuri ka dheene nja oono mo i'i ya atemelö.

### *Liyasiri nja ömö'dü ma almaala*

<sup>19</sup> "A ömö'dü inggide ana almaala dhabbu, ümmü en'di ya agu'daana ya nja tiya iđhindhi ya ka oona, ümmünaana kadu ka 'dü kita iini a naguuru kagu eema.

<sup>20</sup> A ömö'dü inggide ana eere a'da Liyasiri taalo eema kini, eema ya in'di yungngo iini ka oona nye'd'de kungngo, emiimi kini ka iňye ma 'bügöörü. <sup>21</sup> Asaasa tera türeene ma kuri tiya ömö'dü ma eema ka aguri ya, a tiini ticci atö'dö kanyege'de eema yiini ya in'di ya.

<sup>22</sup> "A ömö'dü ya eema ka titalo kini ya teyi,

a kadhangga ta'duga i'i kanangnga i'i ka Abrahiim kete, ömö'dü ya ana almaala ya, teyi afe'de adatü'büdene. <sup>23</sup> Ömö'dü ya ana almaala ya, andanna ka 'buugu ma inde üünü muuyu assa coo'do asala Abrahiim ku'b'ba nja Liyasiri ka temmi kini kete. <sup>24</sup> İkürü ka tümmüni eene iki, 'Ka Pupa yeede Abrahiim, oolona kede, kürünü Liyasiri allo üüdü ma 'baniisö tiya iini ka 'büdü öö'dö iini a'a natala kede ka onggo'do, kudumma eede nungngo ka issi nüünü muuyu.'

<sup>25</sup> "İkürü Abrahiim ka tiki iini, "Bii'bala eede, nagügi o'o yüüdü ka ndaga'duga eema ya a'diila yüüdü ka takaleefe ka 'dü, ara Liyasiri ka ta'duga dhügürü, i'i 'bitüngngö anda'duga talıngnge niini ara o'o ka tüünü muuyu kanna.

<sup>26</sup> Eema ya in'dili kungngo koolo ungngo iidi ka söödö nja aaga adhonggoro, taalo ömö'dü ma tassumunaana ka tada'da kide aco ada kanna, ömö'dü yaada taalo tassumunaana ka tada'da kide öö'dö kiidü kita.'

<sup>27</sup> "İkürü ömö'dü ya ma almaala ya ka tiki, 'Pupa yeede Abrahiim, nasaasa a'a o'o nagürünü Liyasiri ka 'dü tiya pupa tiya eede, <sup>28</sup> aco tadirina eema a nagöre tanno eede no iidümmü no amang kene tafa tö'dö ka 'buugu ma dhügürü tiya.'

<sup>29</sup> "Yungngo Abrahiim ka tiki iini, 'Müüsa ungngo

eene nja nagane'bi, fa kene katoodo kene.'

<sup>30</sup> "İkiri ömö'dii ka tapadaga tumma iini, 'Taalo nggeege Pupa yeede Abrahiim, lakiini ka ömö'dii unggodho kara tafiki'dö ndama inde aco kene kara taadha ka tatoroko.'

<sup>31</sup> "İkiri Abrahiim ka tiki iini, 'Kene ka titaaloo kaföönyö tumma na Müusa nja nagane'bi, ömö'dii saga fiki'dö ndama inde taalo kara tamma.' "

## 17

### Tatoroko

(Matta 18.6-7, 21-22; Murkus 9.42)

<sup>1</sup> İkiri Yasu ka tiki a kadalaadene tanno iini, "Eema ya amana kadu ka talinggo tatoroko ya ara tö'dö, lakiini am'ba ka ömö'dii tiya ara talinggo ya. <sup>2</sup> Ara ta'diila eene kara timi'dina arru iini ka eyi kimi'dina ka misi ka pügü co to afa tamana ma kadu tanno dhiidhi no ka talinggo eema ya toroko ya. <sup>3</sup> Aaga adinö ko'do, ka örre tiya üüdü kara tüünii tatoroko kirnaana kini, üürü aadha kide ya nafa kini. <sup>4</sup> Üürü agüünü tatoroko ana o'o tüdümümü afünü eera ka uuru ka unggodho ya, assa ka tapadaga küdü tüdümümü afünü eera assa ka tiki o'o a'da afada i'i aadha kide, na o'o tafa kini."

### Tamma ka Masala

<sup>5</sup> A kadafiinii tiki a Uugaara, "Tigini tamma ka Masala ungngo."

<sup>6</sup> İkiri Yasu ka tapadaga tumma eene, "Kada kara tamma ka Masala ana eedi idhilli afa ndaniiye ma tanure, aaga tiki a indiiye tanno, 'Fannadene nadhonja ka to,' kara taföönyö tumma naada.

<sup>7</sup> "Mada ana kada ömö'dii ka leele iini ka siga nja iini ka kuri a ki'biini, öö'dö ndama lodho iki iini, 'Ereere nemmi nagu eema'? <sup>8</sup> Ara tagala ka tiki iini, 'Indinaana oona nüüdü nindinaana kuri kede ku'bu nindhigi a'a naguri nooye, o'o sa ka öö'dö taguri nooye.' <sup>9</sup> Ömö'dii ya linggo ya 'dee ara ta'diila nja iini kini kara taföönyö tumma na ömö'dii tiya iini? <sup>10</sup> Kafeene aaga nggeege kada kara tüünii niimö ya kadu ka tiki a'da aaga tüünii ya, aaga tiki, 'Ungngo ka kasaga ma linggo ün'dügüngngö, ungngo tagalinggo eema ya ananja ungngo a'da ungngo talinggo ya.'

### Yasu oolona kadu ma kutukunya kada'baaga

<sup>11</sup> Aga Yasu ka ndunggeene ka fiinii ma tara co Örsaliim adigaala ka Samira nja Jaliil. <sup>12</sup> Kini ka co daara inggide ikiri ka toreene nja kadu kana kutukunya ka oona kada'baaga, kikiri ka töödhii ku'b'ba. <sup>13</sup> Kalneege ko'd'do kiki, "Yasu tatalaana, ana 'bangnga ma ungngo."

<sup>14</sup> İkiri Yasu ka tassa kene iki eene, "Aaga unggeene aaga co alaga oona naada co

ka'boge." A kene ka tung-gunugu co ya kikirii ka tinsili ka oona.

<sup>15</sup> A könö ungngo eene assa kini ka a'diila ya, afada afünügü Masala ko'do dhindho. <sup>16</sup> Ömö'di ya miini ya ataga Samira üürü ka Yasu kidha ana küüge nja dhugudha amana ta'diila iini. <sup>17</sup> İkiri Yasu ka tiki, "Taalo katang-galadene kada'baaga sa, anno iidümmü kafünü egüsö no kiye? <sup>18</sup> Taalo ömö'di ana kene afada öö'dö tündhigü Masala ko'do illi töölöge ya?" <sup>19</sup> İkiri Yasu ka tiki iini, "Fiki'dö nunggeene, tamma ka Masala nüüdü ka oolona o'o."

*Tö'dö ma tauugaara tanno Masala*

(Matta 24.23-28, 37-41)

<sup>20</sup> A naFariisi tindini i'i kiki, "Ara tauugaara na Masala tö'dö aada?"

Iki eene, "Taalo ömö'di ara tadinö ka tö'dö ma tauugaara ma Masala. <sup>21</sup> Ömö'di tafa tiki a'da, 'Ungngo kita,' nja iini ka tiki a'da, 'Inni kannan,' kudumma tauugaara tanno Masala kungngo ada ka nanggeedi."

<sup>22</sup> Iki a kadalaadene tanno iini, "Uuru kinggide kassa ka öö'dö, aaga tasaasa tassa ka uuru tanno 'Bii'bala ma Tadü'd'dü ka unggodho kungngo taalo aaga kara tijöögö. <sup>23</sup> Ara kadu saga tiki aaga a'da, 'Ungngo kita,' nja iini, 'Inni kannan,' aaga fa co, aaga tafa turna ömö'di öccö keere.

<sup>24</sup> Kudumma uuru ma tö'dö tanno 'Bii'bala ma Tadü'd'dü kara tafeene nja talimaana ma tombo'do na limi ku'b'ba kasa ka öö'dö töyeene ka 'dakeyi töccö no. <sup>25</sup> Lakiini i'i ara tadhügürü ana eema dhabbu tikinggi a sere ya ma 'bitingngö ya tanu kini.

<sup>26</sup> "Afa ma tiya agüünii adene ka naguuru tanno Nööh no, ara tüünidene ka naguuru tanno 'Bii'bala ma Tadü'd'dü. <sup>27</sup> Kagu kadu eema kooye ngeeli karna ajeene idhi Nööh co a mürkabü ka teene, a faaya tö'dö agirina eege nye'd'de kungngö.

<sup>28</sup> "Nja tiya agüünii adene ka naguuru tanno Luut no afe'de, kaguri kadu kooye, kanadene ana eema kaana eema, kaleele karü'bü nöö'di. <sup>29</sup> Lakiini ka Luut ka öö'dö kürö ndama Sadöma a Masala tunggu issi ku'bu nja albaarü kide ndama 'dotombo'do mafine eege nye'd'de kungngö.

<sup>30</sup> "Ara tafiigi nggeege ka uuru tanno 'Bii'bala ma Tadü'd'dü kara tatele oona.

<sup>31</sup> Ömö'di ya aganna ka la ko'do ka uuru tanno miini no ya, taalo ara tö'dö ku'bu aco a'duga eema yiini ka 'bügööri, a ömö'di ya ka siga ya taalo ara tapadaga oona keere. <sup>32</sup> Aaga agüigü aka ma Luut mo.\* <sup>33</sup> Ömö'di ya asaasa toolona eyi yiini ya ara taama i'i, ömö'di ya aama eyi yiini ya oolona eege. <sup>34</sup> Ara a'a tiki aaga ka ooso tanno miini no

ara kadu tafü ka tenggere  
tanno unggodho no keera,  
könö ta'dugadene aya tüütü.  
35 A iiya keera kawöönö  
ka 'doonya ma unggodho,  
a kömö ta'dugadene ammo  
tüütü. 36 [A kadu na nagiide  
no tanna ka siga keera,  
ökönö ta'dugadene aya  
tüütü.]”

37 A kadalaadene tindini  
i'i kiki, “Ka Uugaara, ara  
tumma no talinggo adene  
kiga?”

İkiri ka tiki eene, ““Buugu  
ya niimö ka teyi kide ya ara  
nagolo tarügü kide.”†

## 18

*Tafeene ma tumma ma  
aka ma küüme nja uugaara*

1 A Yasu Tageema nja  
kadalaadene tanno iini, a  
tafeene ma tumma a'da  
kafara ka Masala turi kafa  
tagi'di. 2 Iki eene, “Aganna  
uugaara ka anya minggide  
taalo ari'ba a Masala itaalo  
ari'ba a kadu. 3 Aka ma  
küüme taganna ka anya  
tammo iini mo, maleele  
kini ka oona miki iini,  
‘Ümmöönö kede kudumma  
diidi ma a'a.’

4 “Atakanu ka tumma  
tanno oono, lakiini kono ka  
ndakaleele kini ka oona ya,  
ikiri ka tiki ka eyi tiya iini,  
‘Taalo a'a nari'ba a Masala  
nitaalo nari'ba a kadu. 5 Ara  
a'a tümmöönö ka aka ma  
küüme tammo, kudumma  
oono ka anyamanya a'a ka  
oona, kudumma oono mara  
tüütü ka taleele kede ka oona  
manyamanya a'a ka oona.’”

6 İkiri Uugaara Yasu ka  
tiki, “Aaga toodo ka eema  
tiya uugaara tiya üünii ada  
kadu ku'bu ya ka teema.

7 Taalo Masala mara toolona  
kadu noonoo ka tagesse eege  
no, na afara kono ooso a  
naguuru? Mara tadoono  
ku'bu manangnga iiye eene?

8 Yungngo eede ka tiki  
aaga, mara tareere möödhi  
kene, lakiini 'Bii'bala ma  
Tadü'ddü 'dee ara taluna  
tamma ka 'büdhülü kini  
kara tö'dö?”

*Tafeene ma tumma ma  
taga Fariisi nja ömö'dü ma  
tulu'ba*

9 A Yasu Tageema ka  
tumma co kadu kinggide  
kümmü nanggeyi neene a'da  
eege ka'diila kamidhi kadu  
öccö, 10 “Kadu kinggide  
keera kasirigö co la ma  
Masala ma tafara ka Masala,  
könö a taga Fariisi, aya  
tamö'dü ma tulu'ba. 11 İkiri  
taga Fariisi ka fiki'dö  
adageema ka eyi tiya iini  
iki, ‘Nanangnga a'a ta'diila  
o'o Masala, taalo a'a nafeene  
nja türeene ma kadu na ama  
eema ya kadu na, nüünii ada  
kadu ku'bu no, nja tanno  
afüngngö anyooro no, taalo  
a'a nafeene nja ömö'dü ma  
tulu'ba tiya. 12 Nümmü  
a'a tenege teera ka üsbü  
unggodho namana faana  
ma la ma Masala ku'bu  
nye'd'de.’

13 “Lakiini ömö'dü ma  
tulu'ba öödhi ku'b'ba  
taalo asaasa tadini co  
'dotombo'do, agala ka

17:36 17.36 Matta 24.40 † 17:37 17.37 Ka uuru ma tapusu adene kara tö'dö  
ara aaga tussu 'buugu miini.

dhüüdhu orro iki, 'Ana 'bangnga ma a'a Masala kudumma eede ka tatoroko.'

<sup>14</sup> "Ara a'a tiki aaga, ömö'dü ma tulu'ba ya inynyo öö'dü kita iini ka'diila, ara taga Fariisi ka tüütü a tatoroko tanno iini. Ömö'dü ya 'dinigi oona niini coo'do ya ara ta'dininja ku'bu, ömö'dü ya ümmü eyi yiini ka tidhilli ya ara ta'dininja coo'do."

*Yasu nja laala tiya dhiidhi ya*

(Matta 19.13-15; Murkus 10.13-16)

<sup>15</sup> A kadu tö'dö ana laala iini a'da ümmünü iisine eene ka oona, a kadalaadene niini tasala eege kagirnaana kene. <sup>16</sup> Lakiini Yasu agümmünü eege, "Aaga fa ka laala köö'dö kede aaga tafa tafaga eege keere, kudumma tauugaara ma Masala kungngo eene. <sup>17</sup> Ara a'a tadirina tumma aaga dhorro, ömö'dü ya taalo amma ka tauugaara ma Masala afa 'bii'bala kungngo taalo ara co."

*Ömö'dü ya ana almaala ya*  
(Matta 19.16-30; Murkus 10.17-31)

<sup>18</sup> A tadiifi tindini i'i iki, "Ka Tatalaan ya a'diila ya, ara a'a tönynyö nassa ka aluna tefe ka 'dü ta'billi?"

<sup>19</sup> İkiri Yasu ka tiki iini, "Minna agu o'o nümmünü a'a a'da na'diila? Taalo ömö'dü ma ta'diila illi Masala unggodho oogo. <sup>20</sup> Nussu o'o tumma no iki a'da, 'Fa tatemelö, fa tagirina

kadu, fa tanyooro, fa tafünü korokoro ka kadu ka oona, ümmü pupa yüüdü nja niümö tammo üüdü.' "

<sup>21</sup> İkiri ka tiki a Yasu, "Nagalinggo a'a eema ya 'do a'da nakaleefe a'a taga idhilli."

<sup>22</sup> Ka Yasu ka ndaföönyö tumma niini no iki, "Niümö inggide unggodho öreene, adanege ana eema tiya üüdü nye'd'de nasüümünaana ka kadu tanno iini ka titalo kene no amang ka eema tanna küdü ka 'dotombo'do, na o'o sa ka öö'dö kede keere." <sup>23</sup> Ömö'dü tamüürü kini ka taföönyö tumma no kudumma jini ka ana eema dhabbu. <sup>24</sup> Yungngo a Yasu ka iji i'i ka koroo'bo, ikiri ka tiki, "Kiideene co ka tauugaara ma Masala ka kadu tanno ana eema dhabbu no. <sup>25</sup> Taalo tadigaala ka ööye ma ibiri ara tiideene ana malaga, afa co ka tauugaara ma Masala ka tiideene ka kadu tanno ana eema dhabbu no."

<sup>26</sup> A kadu na föönyö no tiki, "Amada i'i yungngo ara toolonadene adha?"

<sup>27</sup> İkiri Yasu ka tiki, "Niümö ya iiideene a kadu ya ara Masala talingga."

<sup>28</sup> İkiri Bütrüs ka tiki iini, "Kafa ungngo ka eema tiya iidi ara ungngo ka tuurna o'o keere."

<sup>29</sup> A Yasu tiki iini, "Ara a'a tadirina tumma aaga dhorro, ömö'dü ya inyi 'dü yiini ku'bu nja aka tammo iini, nja nagöre nja pupa nja niümö nja laala tiya

iini kudumma tauugaara ma Masala ya,<sup>30</sup> ara taluna eema dhabbu ka kusunja kini kide, a 'bitingngö nja tefe ka 'dī ta'billi."

*Yasu adiri tumma ma inde tanno iini tiidoona*  
(Matta 20.17-19; Murkus 10.32-34)

<sup>31</sup> A Yasu tümmünü kadafünni na ö'dö kada'baaga kafünü eera no iki eene, "Angnga kungngo kara tasirigö co Örsaliim 'bitingngö a tumma na sorne ma nagane'bi kadageema ma 'Bii'bala ma Tadü'd'dü kara talinggo adene.<sup>32</sup> Ara tümmününja a kajeene kadaana i'i kalama keela i'i ka'binynyi alaaga iini ka oona.<sup>33</sup> Kassa kabbü i'i kiidi i'i, assa ka fiki'dö ka inde a fungngö iidoona."

<sup>34</sup> A kadalaadene kitaalo kussu eema yiini ka teema ya, kudumma eene kaküdhüdene kitaalo kussu.

*Yasu afa'da soro ka iiye*  
(Matta 20.29-34; Murkus 10.46-52)

<sup>35</sup> Aga Yasu ka ndakete ka Ariiha ya a'da soro ungngo emmi ka tinggini ma fiinü arangnga.<sup>36</sup> Kini ka föonyö a kadu kadhabbu katunggeene ya, ikirü ka tindineene, "Minna yungngo?"<sup>37</sup> Kikirü ka tiki iini a'da, "Yasu ya ma Nasira ya, i'i yungngo unggeene kita."

<sup>38</sup> Ümmüneene dhindho iki, "Yasu, 'bii'bala ya Dawud, ana 'bangnga ma a'a."

<sup>39</sup> A kadu na unggeene kidha no tagirnaana kini a'da aki'döönö. Illi i'i iidhe ko'd'do, "Ka 'bii'bala ya Dawud, ana 'bangnga ma a'a."

<sup>40</sup> A Yasu töödhü iki eene a'da köö'dö ana i'i, kini ka ndöö'dö kete ikirü Yasu ka tindini i'i,<sup>41</sup> "O'o nasaasa a'a a'da nönynyö ana o'o?"

Ikirü soro ka tiki, "Nasaasa a'a tiji 'buugu, ömö'di eede."

<sup>42</sup> Ikirü Yasu ka tiki iini, "Jji 'buugu, tamma nüüdü ka oolona o'o."<sup>43</sup> Arooro kiji 'buugu uurna Yasu keere amana ta'dilä a Masala. Ka kadu ka ndiji tumma no, kündhigü Masala ko'do.

## 19

### *Yasu nja Zaka*

<sup>1</sup> A Yasu co Ariiha adheedhe ko'do. <sup>2</sup> Ömö'di ungngo ka Ariiha uugaara ma kadu ma tulu'ba ana almaala dhabbu ana eere a'da Zaka. <sup>3</sup> Ö'dö asaasa tassa ka ömö'dü tiya ana eere a'da Yasu ya, lakiini i'i ya adhüküdhükü, taalo iji Yasu kudumma a kadu katiti ajeene. <sup>4</sup> Ikirü ka rünö aaco ka kadu kidha asirö fa ma indiyye amang kini tiji i'i, kudumma Yasu kara tadigaala kide. <sup>5</sup> Ka Yasu ka ndala kita miini kita ya, assa coo'do asala i'i iki iini, "Zaka, aayu ku'bu areere, kudumma eede kara co tanna ka 'dī kita üüdü ka uru tanno."

<sup>6</sup> Ikirü ka öö'dö ku'bu areere oreene nja iini adhodho. <sup>7</sup> Ka kadu kadasala tumma no ya, ka'digineene

kiki a'da, "Unggeene aco tanna ka 'dī tiya ömö'dī tiya atoroko ya."

<sup>8</sup> A Zaka tafiki'dö iki Uugaara, "Ka Tatalaan, ara a'a tanangnga dhüdhü ma eema tiya eede a kadu tanno eema katitaalo kene no, üürü nagüünii ada ömö'dī ku'bu a nüümö, napadaga co iini ököje nja tiya iini ya ta egüsö."

<sup>9</sup> Yungno Yasu ka tiki iini, "Ndama uuru tanno ka ö'dö toolona ka 'dī tiya, kudumma ömö'dī tiya, i'i ya 'bii'bala tiya Abrahiim afe'de. <sup>10</sup> Kudumma 'Bii'bala ma Tadü'dü ö'dö tawwa kadu na aama no oolona eege."

### *Tafeene ma tumma ma gürüüsü ma linggo*

<sup>11</sup> Ka Yasu ka ndakete ka Örsaliim, a kadu na toodo ka tumma no kiki kide a'da tauugaara ma Masala kara tatele oona 'bitingngö, ütü ka teema, <sup>12</sup> iki, "Ömö'dī inggide tadiifi, unggeene aco anya ku'b'ba maco tümmününja ka tauugaara kide assa ka tafada. <sup>13</sup> İkiri ka tagümmünü kadu na linggo nja iini no kada'baaga adakinaana nakajine ma dahaba\* eene ku'bu iki eene, 'Aaga anadene iini ara a'a ka öö'dö.'

<sup>14</sup> "A kadu ma anya tammo iini taalo ka asaasa i'i yungno eene kagürünü kadu ka uurna keere kiki, 'Taalo ungno kasaasa

ömö'dī ya ka tauugaara tiya iidi."

<sup>15</sup> "A kadu tümmünü ömö'dī ya miini ya ka tauugaara afada aco 'dī adagümmünü kadu niini ka anangnga nakajine eene no amang kini tassa kide, ömö'dī öccö aluna ka tiya iini aanya. <sup>16</sup> Aya dhidha ya tö'dö iki, 'Ömö'dī eede, naluna a'a ka jine tiya nakajine kada'baaga.'

<sup>17</sup> "İkiri ömö'dī ka tiki iini, 'O'o no ömö'dī ma linggo tiya dhorro ya, a'diila nja o'o nafa o'o ka nüümö tiya idhilli ya, ara o'o tauugaara ma naanya kada'baaga.'

<sup>18</sup> "Aya tö'dö kini iki, 'Ömö'dī eede, jine yüdü ya, naduna a'a kide nakajine kiidümmü.'

<sup>19</sup> "İkiri ka tiki iini, 'Ara o'o tauugaara ma naanya kiidümmü.'

<sup>20</sup> "A könö tö'dö iki, 'Ka ömö'dī eede, jine yüdü ungngo a'a naküdhü a'a i'i ka mandiili. <sup>21</sup> Kudumma eede ka ri'ba o'o kudumma üdü o'o na ömö'dī taalo nasaasa kadu, narumuru eema a'da taalo yüdü, nama eema a'da taalo o'o nadiniiği.'

<sup>22</sup> "İkiri ka tiki iini, 'Ara a'a tümmü o'o a tumma tanno üdü, o'o na ömö'dī ma linggo ya toroko ya nussu o'o a'da a'a taalo nasaasa kadu narumuru eema ka kadu na ama eema yeede ka titalo nadiniiği ya. <sup>23</sup> A minna agu o'o nanu ka tanangnga jine

\* **19:13** 19.13 Jine ma dahaba ököje nja mahiyya ma nagatereene kiidoona.

yeede a kadu tanno alingga  
ana gürüsü no amang kede  
tafada nöö'dö taluna i'i  
köö'dö keere dhabbu?

<sup>24</sup> "İkiri uugaara ka tiki  
a kadu tanno 'dingnge kini  
kete no, 'Aaga 'duga jine kini  
aaga tanangnga ömö'dü tiya  
ma nakajine kada'baaga ya.'

<sup>25</sup> "Kikiri ka tiki iini,  
'Ka ömö'dü eede, nakajine  
kungngo iini kada'baaga.'

<sup>26</sup> "İkiri ka tiki, 'Ara a'a  
tadirina aaga, ömö'dü ya ana  
niimö agusunja kini kide,  
ömö'dü ya niimö ka titaalo  
kini ya, yungngo kini ya  
a'dugadene. <sup>27</sup> A kadu na  
diidi ma a'a no taalo kasaasa  
a'da na a'a tauugaara tiya  
eene no aaga ö'dö ana eege  
kita, aaga tagirina eege kede  
kidha.'

### *Yasu inynyo Örsaliim*

<sup>28</sup> A Yasu tageema tumma  
no, unggene asirö ma  
tara co Örsaliim. <sup>29</sup> Kini  
ka ndakete ka Beet Faji  
nja Beet Aniya ka 'dikinya

tammo ana eere a'da Anya  
ma 'Dikidiyö mo, ikiri ka  
kürünü kadalaadene keera.  
<sup>30</sup> Iki eene, "Agolo anya

tammo ada kidha mo, kada  
kara co ya aaga taluna 'bing  
kisine ka timi'dinja ku'bu  
üfürü ömö'dü takaka kide  
'do aaga kildhe i'i aaga  
tö'dö iini. <sup>31</sup> Ka ömö'dü  
kara tindini aaga ya a'da,  
'Kinggilaana aaga amana  
ya?' Aaga iki iini a'da,  
'Uugaara asaasa i'i.' " <sup>32</sup> A  
kadafiinä na eera no co  
kaluna afa ma tiya Yasu  
kadirina eene ya kungngo.

<sup>33</sup> A kene katinggili 'bing  
kisine ya a kadu miini  
tiki, "Minna agu aaga, aaga  
tinggili 'bing kisine?"

<sup>34</sup> Kikiri ka tiki, "Uugaara  
asaasa." <sup>35</sup> Kö'dö iini a Yasu  
kakese en'di yeene ka 'bing  
kisine a Yasu taka kide. <sup>36</sup> A  
kini ka ndunggeene a kadu  
takese en'di yeene ka fiinä.

<sup>37</sup> Kini ka ndakete  
ka nsorondho ma Anya  
ma 'Dikidiyö ya, ikiri  
kadalaadene kadhabbu  
katadhodho kündhigü Masala  
ko'do keema dhindho ka  
eema ma türü tiya eene kada  
kadönö kide ya nye'd'de, kiki  
a'da,

<sup>38</sup> "A'diila ka Uugaara tiya  
öö'dö ana eere ma  
Masala ya,  
fa ka ta'diila ka öö'dö  
ka 'dotombo'do nja  
tidhindhi ka fiinä ma  
ndanaaya."

<sup>39</sup> A naFariisi öccö ungngo  
ka kadu ka teene ya iki  
a Yasu, "Ka Tatalaana, iki  
ka kadalaadene tanno üüdü  
a'da ka ki'döönö."

<sup>40</sup> Apadaga tumma eene  
iki, "Ara a'a tadirina aaga,  
a kadu no saga ki'döönö ya,  
ara niigisi tiidhe."

### *Yasu ya afara kudumma Örsaliim*

<sup>41</sup> Kini ka ndakete ka  
Örsaliim assa kono afara  
kudumma oono. <sup>42</sup> İkiri

ka tiki, "Küdü kara tagussu  
fiinä ma ta'diila ka uru  
tanno. Lakiini 'bitingngö  
allafa küdü ka iiye. <sup>43</sup> Uru  
öccö ka inggide a diidi tiya  
üüdü kara takedhe o'o ka  
oona kasege ar'da küdü ka  
oona ka ku'du o'o ko'do

ka oona ïn'dili kungngo.  
<sup>44</sup> Kürrüdü ana o'o nja laala tiya üdü ya inggide ya taalo kara tafa ka misi küdü ka oona kudumma üdü taalo nussu uuru ma tö'dö tanno Masala ma toolona o'o."

*Yasu inynyo la ma Masala*

<sup>45</sup> İkiri ka co la ma Masala arooro ka tasoro kadu na anadene ana eema kide no, uurugu eege co akürö.  
<sup>46</sup> Eema nja eene iki, "Sorne ma Masala iki a'da, 'Di yeede ya, 'di ma tafara ka Masala, aaga ka anangnga i'i ka tatumba ma kanyooro.'"

<sup>47</sup> Adagalaana kadu ka la ma Masala a naganuuru a naguugaara ma ka'boge nja katalaana ma seriye nja kadiifi ma anya tasaasa tiidi i'i. <sup>48</sup> Kitaalo kaluna fiinii ma tiidi i'i kudumma kadu nye'd'de kungngo ka asaasa i'i ka toodo kini.

## 20

*Türü na Yasu*

<sup>1</sup> Uuru kinggide iini ka talaana kadu ka la ma Masala adünüğü tumma eene, ikiri a naguugaara ma ka'boge ka öö'dö kini nja katalaana ma seriye nja kadiifi. <sup>2</sup> Kiki iini, "Tirina ungngo, türlü öjö eege kungngo üdü ka talingga eema ya iini? Mada i'i yungngo anangnga türlü na o'o dhorro ungngo?"

<sup>3</sup> İkiri Yasu ka tiki eene, "Ara a'a tindini aaga a tumma ka unggodho, aaga tirina a'a, <sup>4</sup> tambeese na Yühanna 'dee ka ö'dö ndama 'dotombo'do alla ndama kadu?"

<sup>5</sup> Kadageemaana ka oona unggodho eege kiki, "Aja kara tiki a'da, 'Ndama 'dotombo'do ya,' ara tiki a'da, 'Minna agu aaga, aaga taalo kamma kini?' <sup>6</sup> Akaja kara tiki a'da, 'Ndama kadu ya,' ara kadu tatidiri angnga nye'd'de kungngo, kudumma eene ka tussu a'da Yühanna a ne'bi."

<sup>7</sup> Yungngo eene ka tiki iini a'da, "Taalo ungngo kussu a'da köö'dö ndama kiga."

<sup>8</sup> İkiri Yasu ka tiki eene, "A'a ka eyi tiya eede taalo a'a nara tiki aaga a'da türlü na mada eege kungngo eede ka talinggo eema ya iini."

*Tafeene ma tumma ma kaleele*

<sup>9</sup> İkiri ka ndeema nja kadu a tumma tanno iki eene, "Ömö'di inggide akodho ki'bim'bi adagümmünü kaleele anangnga eene, ara ka tunggeene atügöögö.

<sup>10</sup> "Ka uuru ma taraana miini ka ndö'dö ya, ikiri ka kürünü ömö'di ma linggo yiini kene a'da kanangnga faka ma iiye ma ki'bim'bi tanno iini, kikiri ka tabbü i'i kuuru i'i ka tino ana ii sine kada 'döngngönyö.  
<sup>11</sup> Agürünü ömö'di könö afe'de, katabbü ya miini ya afe'de katakeela i'i kuurugu i'i ka tino ana ii sine 'döngngönyö. <sup>12</sup> İkiri ka kürünü könö kassa kanda iidoona, katabbü i'i kanangnga nagoola iini ka oona kapüğü i'i co kürö ndama raaga ma ki'bim'bi.

<sup>13</sup> "A ömö'dü ma ki'bim'bi tiki, 'Ara a'a tönynyö 'bitüngngö? Ara a'a tagürünü 'bii'bala yeede ka asaasa i'i ya, amang kene tasala i'i ka ri'ba."

<sup>14</sup> "Kene ka ndasala i'i ya ka ndeema kiki a'da, 'Ömö'dü ya ara takarna ka ki'bim'bi, katagiidi i'i, angnga takarna ka eema.' <sup>15</sup> Kapügü i'i co kürö ndama raaga ma ki'bim'bi, katagiidi i'i."

İkiriü Yasu ka tiki, "Ara ömö'dü ma raaga ma ki'bim'bi tönynyö ana eege? <sup>16</sup> Ara tö'dö agirina kaleele, anangnga ki'bim'bi a kadu tököönö."

A kadu na toodo kini no tiki, "A Masala tafa tö'dö iini."

<sup>17</sup> Assa kene ko'do iki eene, "Tumma no ka sorne kiki a'da minna?

'Misi ma katarü'böönö yaada kanu kide mo, oogo mungngo ma misi ma kadese.'

<sup>18</sup> Ömö'dü ya a'dünggö ka misi tammo miini mo ya ara tadhösö, ömö'dü ya oono ka 'dünggö kini ko'do ya manyiki'daana i'i ku'bu."

### Faana ma tulu'ba

<sup>19</sup> A katalaana ma seriye nja naguugaara ma ka'bole tasaasa tümmü i'i ka uuru tanno miini no, illi eege kari'ba a kadu kudumma eene ka tussu a'da i'i eema tafeene ma tumma no kene ka oona.

<sup>20</sup> Katadinö ana i'i ko'do, ka kürünü kadu kini kümmü eyi yeene kada kadu tanno

a'diila no, amang kene tümmü i'i a 'bandumma kümmünü i'i uugaara ma Yahüüdiya nja türü tanno iini. <sup>21</sup> Kikiriü ka tindini i'i, "Ka Tatalaana, kussu ungngo a'da o'o neema tumma na dhorro no nja talaana tanno üüdü no, taalo nari'ba a ömö'dü, illi o'o neema tumma ma fiini ma Masala ma timin'da. <sup>22</sup> A'diila aja kara tamana tulu'ba a Kayisar alla taalo a'diila?"

<sup>23</sup> İkiriü Yasu ka tussu ünggü meene iki eene a'da, <sup>24</sup> "Aaga lage jine a'a, koronggore ya mada i'i yungngo, eere ya mada i'i yungngo?"

Kiki iini, "Ya Kayisar."

<sup>25</sup> Yungngo Yasu ka tiki eene, "Aaga anangnga niümö ya Kayisar a Kayisar, aaga tanangnga niümö ya Masala a Masala." <sup>26</sup> Kitaalo kassumunaana ka tumma meene kara tümmü i'i iini ka kadu kidha, kadhere ka tumma tanno iini kakumu oona.

### Tafiki'dö ka inde

<sup>27</sup> A Sadügiin no midhi tafiki'dö ka inde no tö'dö kini ka indini i'i, <sup>28</sup> "Ka Tatalaana, Müüsa arigiri ada angnga a'da, 'Ka örre tiya ömö'dü kara teyi a'da aka mo ungngo iini a 'bii'bala titaaloo kini, örre yiini ta'duga oogo eene ada laala örre tiya iini.\*" <sup>29</sup> Kadu kinggide ka nagöre ka iidümmü kafünü eera, aya dhidha ya tarna aka eyi a'da taalo 'bii'bala

\* <sup>20:28</sup> 20.28 Seriye ya eera ya 25.5-6

iini. <sup>30</sup> Aya asigi kini ya ta'duga aka eyi a'da taalo 'bii'bala iini. <sup>31</sup> Aya iidoona ya ta'duga oogo, idhi na iidümmü kafünü eera no taaya a'da taalo laala eene eege in'dili. <sup>32</sup> Aka mikirü ka teyi afe'de. <sup>33</sup> Oogo 'dee mara ta aka tammo mada ka uuru ma tafiki'dö ka inde, kudumma oono ka ta aka ma kadu ka iidümmü kafünü eera?"

<sup>34</sup> İkiriü Yasu kiki eene, "Kadu ma 'büdhülü karna ajeene. <sup>35</sup> Lakiini kadu na ma tafiki'dö ka inde no, kara tefe ka 'dö ta'billi taalo karna, kitaalo karna ajeene. <sup>36</sup> Eege kara tafeene nja kadhangga taalo kara taaya, eege ka laala tiya Masala, kada laala ma tafiki'dö ka inde. <sup>37</sup> A Müüsa adinö kide aala a kadu a'da tafiki'dö ka inde ka inggide ka 'bamfa ka tafinne, kini ka tümmünü Masala a'da, 'Masala ma Abrahiim nja Masala tammo Ishak nja Masala tammo Yaguub.'<sup>†</sup> <sup>38</sup> Taalo Masala ma kadu tanno ake no, lakiini Masala ma kadu tanno adinö no, kudumma eene nye'd'de kafe ka 'dö ana oogo."

<sup>39</sup> A katalaana ma seriye tiki iini a'da, "Nadiri o'o tumma dhorro, tatalaana." <sup>40</sup> Kitaalo ka'duga rüsü ma tindini i'i ma niimö töccö afe'de.

### Almasiihi ya Masala

<sup>41</sup> İkiriü Yasu ka tiki eene, "Keema kadu a'da Almasiihi a 'Bii'bala tiya Dawud nya?

<sup>42</sup> Ara Dawud ka eyi tiya iini ka tiki ka Sorne ma Tüüsü a'da,

'Iki Uugaara a Uugaara tiya eede,

Emmi kede ka niisö ma kuri,

<sup>43</sup> ara a'a ka anangnga o'o ka siri ka diidi tiya üüdü ana uune.'<sup>‡</sup>

<sup>44</sup> Aga Dawud ka ndümmünü i'i a'da, 'Uugaara 'dee,' assa kanda 'bii'bala tiya iini nya?"

*Yasu nja katalaana ma seriye*

<sup>45</sup> A Yasu tiki a kadalaadene tanno iini a'da, kadu kinggide nye'd'de kaföönyö, <sup>46</sup> "Aaga adinö ko'do kudumma katalaana ma seriye no asaasa tunggeene ka nafiiñi ana en'di ma oona tiya kadhonggoro ya, kasaasa kadu ka jööjülü eege ka namansala nja na'buugu ma tamiimi no kidha ka naala ma talaana nja 'buugu ma eema ma taguri ya dhidha kana taanyara no. <sup>47</sup> Küsini iiya ma nagüüme kagu eema yeene, kafara ka Masala tafifinni amang ka kadu tiki a'da eege ka'diila, eege no miini no, tapusu adene neene kara tatoroko dhindho."

## 21

### Faana ya aka ma küüme

<sup>1</sup> İkiriü Yasu ka türi 'buugu asala kadu na ana eema dhabbu no katamana faana yeene ka dho ka la ma

Masala. <sup>2</sup> Asala aka ma küüme eema ka titaaloo kono mafaana ana gürisi keera. <sup>3</sup> İkiri ka tiki, "Ara a'a tadirina tumma aaga dhorro, aka ma küüme ma 'döngngönyö mo, mafaana adhabbu a kadu nye'd'de kungngo. <sup>4</sup> Ya öreene ka kadu tanno ya, i'i yungno eene kanangnga ka faana ma la ma Masala, lakiini oogo ka ta'döngngönyö kungngo manangnga yoono ka niiśö ya ku'bu nye'd'de kungngo."

### *Taga'dadene ma la ma Masala*

<sup>5</sup> A kadu könö teema a'da la ma Masala akesedene a niigisi ka'diila ana eema tiya a'diila ka teene miini kananga a Masala, a Yasu tiki eene, <sup>6</sup> "Uuru kinggide kara sa köö'dö, eema yaada kadinö kide ya, taalo misi ma unggodho mara türeene ka madööje ko'do kara türküdü nye'd'de kungngo."

### *Dhügürü nja tüünii midhi*

<sup>7</sup> Kikiri ka tindini i'i, "Ka Tatalaana, ara tumma no talinggo adene aada sii? A niimö minna i'i yungno aja kara tessu iini a'da ara talinggo adene?"

<sup>8</sup> İkiri ka tiki eene, "Aaga adinö ko'do a'da ii'di ömö'di öccö taama aaga, kudumma kadu kadhabbu kara sa köö'dö ana eere tiya eede kiki, 'A'a namiini,' a'da, 'Uuru miini ka ndakete.' Aaga fa co eene keere.

<sup>9</sup> Kada kaföönyö a'da koro'bo inggide a tagoroo'bo

ma 'buugu, aaga tafa tari'ba kudumma iini ara tö'dö tikinggi, lakiini i'i titaaloo ma 'büdhülü küfürü tö'dö."

<sup>10</sup> İkiri ka tiki eene, "Ara kadu teema koro'bo ka naanya, a tauugaara tadiidi tauugaara könö. <sup>11</sup> A 'büdhülü tatänggi'di dhindho ka na'buugu kadhabbu a ii're tümmü kadu, a maara tümmü kadu kadhoonyo a ri'ba tagu kadu, eema tatele oona ka 'dotombo'do adhabbu keefe.

<sup>12</sup> "Keema tiya miini ya ka taleefe ya, ara kadu tümmü aaga kanangnga ka pabuusu küünii midhi ku'bu ana aaga, kümmünü aaga a kadu ma naala ma tatalaana nja pabuusu, kümmünü aaga a naguugaara nja kadiifi kudumma a'a. <sup>13</sup> Eema ya miini ya ara tafa kada aaga teema kudumma ma tefe ka 'di neede co kadu.

<sup>14</sup> Aaga idhi oona ku'bu, aaga tafa tadinigöögö a'da ara aaga tümmöönö ka eyi tiya ada nya? <sup>15</sup> Kudumma eede kara tanangnga tumma aaga nja tessu eema, nadidi naada tatiminaana ka tii'baana ma aaga, itaalo ara tiki a'da ka oroko aaga.

<sup>16</sup> Ara kupupa naada nja nakaniimö tanno ada, nja nagöre tanno ada nja siliga ma aaga nja kateefe ma aaga sa katümmünü aaga a kadu kiidi könö ana kada. <sup>17</sup> A kadu takirimi aaga nye'd'de kungngo kudumma eere tiya eede. <sup>18</sup> Taalo ndanawu ka unggodho kungngo kara takara ta suli ada ka nang-

güdü. <sup>19</sup> Aaga idhi oona ku'bu dhorro amang kada toolonadene.

*Yasu eema tumma ma tatingga'da ma Örsaliim*

<sup>20</sup> "Kada kara tasala nasigira ka takedhe Örsaliim ka oona ya, aaga tussu a'da taga'dadene noono ka ndakete. <sup>21</sup> A kadu na ka Yahüüdiya no, fa kene ka rünö ka sörö na 'dikinya, a kadu na ka anya ka teene no, tarünö ka co akürö ndama oono, a kadu na aganna ka nasigeene no kitaalo ka co anya ka teene. <sup>22</sup> Kudumma uuru ma tapusu adene, amang ka tumma tanno ka kirinja ka sorne no co ööye miini. <sup>23</sup> Am'ba ka iiya tanno agüröönö no nja tanno indine no ka naguuru tanno miini no, kudumma tagoroo'bo kadhabbu kara tö'dö ka 'büdhülü a tagoroo'bo ma Masala talinggo kadu. <sup>24</sup> Kagirinadene a kulu'ba, ököönö tümmü adene kada ömö'di ma pabuusu kaco ajeene nye'd'de ana eege, ajeene tisiraana ka Örsaliim idhi uuru neene tatüümö."

*Tö'dö na 'Bii'bala ma Tadü'd'dü*

<sup>25</sup> "Eema tatele oona ka ndanaaya nja tere nja midigi keefe, a kadu ka ajeene 'do tadhere kari'ba, afara ma 'bii'di ka to ara talumuli ajeene a tafiri coo'do ma 'bii'di. <sup>26</sup> A kadu öccö kara ta'dinggeene, ari'ba kagu eege nja tündhigü niimö ya ara tö'dö ka 'büdhülü ya, kudumma türü ma

'dotombo'do ka 'digi'di ajeene. <sup>27</sup> Ka uuru tanno miini no, ara kadu tiji 'Bii'bala ma Tadü'd'dü ka tunggeene ka tülüügü a türü nja tihindhü. <sup>28</sup> Ka eema tiya ka ndalinggo adene ya, aaga afiki'dö aaga ta'diniga nanggüdü naada coo'do kudumma ta oolonadene tanno ada ka ndakete."

*Tafeene ma tumma ma indüyye*

<sup>29</sup> Adirina tumma eene, "Aaga assa ka fa ma indüyye nja naafa nye'd'de kungno. <sup>30</sup> Kene ka ndasiri dhaaru ya, ikiri aaga ka tussu a'da kooro ka ndakete. <sup>31</sup> Nggeege ada kadasala eema ya, amang ka tussu a'da tauugaara na Masala ka ndakete.

<sup>32</sup> "Ara a'a tadiri tumma aaga dhorro, ara eema talinggo adene nye'd'de kungno a'da üfürü sere ya co. <sup>33</sup> Ara 'dotombo'do nja 'büdhülü tammanyaga lakiini tumma neede taalo kara titao.

*Tadinö ko'do*

<sup>34</sup> "Aaga adinö ko'do, aaga tafa takürrada ka tooye ngeeli aaga take kide, a tadinigöögö ma eema ma 'büdhülü, kudumma uuru tanno miini no kara tatiri aaga. <sup>35</sup> Kudumma iini afeene nja toore ma ta'dinggaöö ka kadu ka 'büdhülü nye'd'de kungno. <sup>36</sup> Aaga adinö aaga tafara ka Masala turi kungno, amang kada taduna fiini ma toolonadene ka eema tiya ara tö'dö ya, amang

kada ta'düngnge kidha ma 'Bii'bala ma Tadü'd'dü."

<sup>37</sup> A Yasu tagalaana kadu ka la ma Masala uuru kungngo, a 'buugu kara tooso kungngo unggene aco tüyü co 'dikinya tammo ana eere a'da Anya ma 'Dikiidiyö mo. <sup>38</sup> A kadu tilli ka fiki'dö so'd'do ma co la ma Masala ka toodo kini ka teema.

## 22

*Yahüüsa ümmünü Yasu a kadu*

<sup>1</sup> A uuru ma Taanyara ma Dheedhifi no ana eere a'da Taanyara ma Tada'da ka Eriidö no ka ndakete <sup>2</sup> A naguugaara ma ka'boge nja katalaana ma seriye tagawwa fiinii meene kara tiidi i'i kudumma eene ka ri'ba a kadu.

<sup>3</sup> İkiri Ebliisi ka 'dingga ka Yahüüsa ka oona yeene ka tümmünü i'i a'da Askaryüütä ya, i'i ya ta'ba ma kadalaadene tanno ö'dö kada'baaga kafünü eera no. <sup>4</sup> Unggene ateefe timi'di tumma nja naguugaara ma ka'boge nja nasigira tanno afa ka la ma Masala no ara tümmü i'i nya ümmünü eene. <sup>5</sup> Kadhodho 'do ka timi'di tumma nja iini a'da ara eege tanangnga gürüüsü iini. <sup>6</sup> Amma ikiri ka adinaana i'i ko'do ma taluna fiinii ma tümmünü i'i eene a'da taalo kadu kussu.

*Yasu agu kuri ma tada'da nja kadalaadene tanno iini*

(Matta 26.17-25; Murkus 14.12-21; Yühanna 13.21-30)

<sup>7</sup> İkiri uuru ma Miteene ma Dheedhifi ka ndö'dö

yeene kaara kidheefe ma Taanyara ma eriidö kide ya. <sup>8</sup> Yungngo a Yasu ka kürünü Bütrüs nja Yühanna iki eene, "Aaga unggene aaga co tindinaana kuri ma Tada'da kaja ku'bu."

<sup>9</sup> Kikiri ka tiki iini, "Kiga i'i yungngo üüdü ka asasa ungngo ka co tindinaana eema kide?"

<sup>10</sup> Apadaga tumma eene iki, "Kada kara co anya ya ara aaga toreene nja ömö'di a'bandhafa ma 'büüdi ungngo iini aaga uurna i'i keere ka 'dö tiya iini kara co ya. <sup>11</sup> Aaga iki a ömö'di ma 'dö, 'Tatalaana iki o'o a'da, la yeede kara tagu kuri ma Tada'da kide nja kadalaadene tanno eede i'i ya iiye?" <sup>12</sup> I'i ara tala aaga ka la tiya 'doogo ya adhabbu akesenja ku'bu. Aaga indinaana 'buugu ya miini ya ku'bu." <sup>13</sup> Kikiri ka co kaluna afa ma tiya iini kadirina eene ya kungngo, kadakindinaana kuri ma eriidö ku'bu.

*Kuri ma taamu ya Uugaara ya eere ya*

(Matta 26.26-30; Murkus 14.22-26; 1 Kürünsüs 11.23-25)

<sup>14</sup> Ka uuru ma tagu kuri ma eriidö ka ndö'dö ikiri Yasu ka temmi nja kadafiinii tanno iini ma tara tagu eema. <sup>15</sup> İkiri ka tiki eene, "Agu iiire a'a ma tagu eema ma eriidö nja aaga a'da nüfürü a'a tad Hügürü.

<sup>16</sup> Ara a'a tiki aaga a'da, ndama uuru tanno, taalo a'a nara taguri afe'de illi alinggo

adene ka tauugaara tanno Masala."

<sup>17</sup> A Yasu ta'duga ker'de anangnga ta'diila a Masala iki, "Aaga la aaga tasümünaana kada ku'bu.  
<sup>18</sup> Ara a'a tiki aaga a'da, taalo a'a nara tooye ngeeli ma ki'bim'bi afe'de ndama uuru tanno idhi a tauugaara na Masala tö'dö."

<sup>19</sup> A'duga miteene anangnga ta'diila a Masala asümünaana ku'bu anangnga eene iki, "Tuu'da no eege kungngo na nanja kudumma aaga, aaga alinggo maada ka tagiig'i a'a iini."

<sup>20</sup> A'duga ker'de nggeege afe'de eene ka ndagu eema iki, "Ker'de mo ma timi'di tumma ma 'bitüngngö ana eriidö tiya eede ya uurunco co kudumma aaga ya.

<sup>21</sup> Lakiini niisö na ömö'dii tiya ara tümmünü a'a a kadu ya, kungngo kita nja a'a.  
<sup>22</sup> 'Bii'bala ma Tadü'ddü ara teyi afa ma Masala ka tatiraana 'billi, lakiini am'b'ba ka ömö'dii tiya ara tümmünü i'i a kadu ya."

<sup>23</sup> İkiri kadafüni ka tindini ajeene kiki a'da kamada eege kamiini ka asaasa talingga tumma no.

### *Mada i'i yungngo adhabbu*

<sup>24</sup> Kadiisaana ka oona ungodho eege kiki a'da, mada i'i yungngo adhabbu ana kene ungngo. <sup>25</sup> İkiri Yasu ka tiki eene, "Naguugaara ma ajeene ka naguugaara meene, a kadiifi tasaasa

tümmünüdene a'da kateefe ma kadu.

<sup>26</sup> "Lakiini aaga ya taalo kara tafigi nggeege, fa ka ömö'dii tiya adhabbu ana kada ya ümmü eyi yiini ka tidhilli, aya dhabbu ya, tafeene nja ömö'dii tiya alinggo ada a kadu ya. <sup>27</sup> Amada i'i yungngo adhabbu, ömö'dii ya emmi agu eema ya alla ya alinggo ya? Ya emmi ya i'i yungngo adhabbu, a 'bitüngngö a'a nungngo ada ka söödö afa ömö'dii ya alinggo ya.

<sup>28</sup> Aaga kungngo köödhü nja a'a ka dhügürü tiya eede ya. <sup>29</sup> Ara a'a tanangnga tauugaara aaga afa ma pupa tiya eede ka anangnga a'a kungngo. <sup>30</sup> Ara aaga taguri aaga tooye nja a'a ka tauugaara tanno eede, aaga temmi ka nagööyö afa naguugaara, aaga tümmü siliga ma Israyil na ada'baaga kafönü eera no."

### *Bütrüs ara ta'düsünü Yasu*

<sup>31</sup> İkiri Yasu ka tiki, "Samaan, Samaan, Ebliisi ungngo asaasa ta'deke'de aaga afa migile. <sup>32</sup> Lakiini nafara a'a ka Masala kudumma o'o a'da atamma nüüdü tafa taama, a küdü kara tafada ya, nanangnga nagöre nüüdü ka tidhi oona ku'bu."

<sup>33</sup> Yungngo a Samaan ka tiki iini, "Ka Tatalaana, na amma a'a ka co ka pabuusu na eyi nja o'o."

<sup>34</sup> İkiri Yasu ka tiki iini, "Ara a'a tiki o'o no Bütrüs no, ara o'o ta'düsünü a'a

tiidoona a'da üfürü dhimbi tafara."

<sup>35</sup> İkiri ka tiki akadafiini tanno iini, "kede ka tagürünü aaga a'da taalo njoko nja 'belde ada nja egüide ka kasaasa aaga niimö?"

Kiki a'da, "Kaw."

<sup>36</sup> İkiri ka tiki eene, "A'bütengngö ya, ömö'di ma gürüüsü a'duga nja njoko, ömö'di ya kulu'ba ka titaalo kini ya, atannege a ten'di tiya iini aana kulu'ba iini. <sup>37</sup> Ara a'a tiki aaga, Tumma na sorne ka tiki a'da, 'Kada kinni i'i nja kanyooro,'\* kara tatüümö a tumma na kirinja ku'bu ma a'a no, kara tö'dö timin'da."

<sup>38</sup> Kiki iini, "Ka Tatalaana, magulu'ba mungngo iidi kita meera."

İkiri ka tiki eene, "Ma 'dimo."

*Yasu afara ka Masala unggodho i'i*

<sup>39</sup> İkiri ka öö'dö kürö aaco Anya ma 'Dikidiyö afa ma tiya iini ka tadaada ya, a kadalaadene niini tuurna i'i keere. <sup>40</sup> Kene ka ndala 'buugu ya, iki eene, "Aaga fara ka Masala ii'di aaga ta'dingga ka ta'b'badene."

<sup>41</sup> Asigi co ku'b'ba kene ka oona üürü ku'bu eema nja Masala. <sup>42</sup> İkiri ka tiki, "Ka Pupa yeede, üürü nasaasa o'o na'duga ker'de ma dhügürü mo kede ka oona, taalo tasaasa ma eedi tiya eede eege kamiini, lakiini üürü tasaasa ma eedi tiya üüdü fa kene küünidene."

<sup>43</sup> A tadhingga tatele oona ndama 'dotombo'do uu'bu i'i ka eedi. <sup>44</sup> Akardha ku'bu afara ka Masala dhindho idhi a 'büüdi ma dhugudha tasuuru afa ma eriidö a'dölö ka 'büdhülü.

<sup>45</sup> İkiri ka fiki'dö ka 'buugu ma teema nja Masala aaco ka kadalaadene aduna eege karigide, kudumma eene ka tamüürü. <sup>46</sup> İkiri ka tiki eene, "Minna agu aaga, aaga tarigide? Aaga fiki'dö, aaga tafara ka Masala ii'di aaga ta'dingga ka ta'b'badene."

### *Tümmü adene na Yasu*

<sup>47</sup> Kini ka taleefe teema ya, a'da kadhe kadu ana Yahüüsa ungngo eene kidha, tatalaadene ya Yasu ana ka tanno ada'baaga kafünü eera no, ö'dö ka Yasu ööjülü i'i. <sup>48</sup> İkiri Yasu ka tiki iini, "Ka Yahüüsa, nümmünü o'o 'Bii'bala ma Tadü'ddü a kadu a tööjülü?"

<sup>49</sup> Ka kadalaadene ka ndiji eema ya üünidene ya kiki, "Ka Uugaara, ungngo tabbü eege a nagulu'ba?" <sup>50</sup> A könö tabbü ömö'di ma linggo ya uugaara ma ka'boge ka neeso ma niisö ma kuri armuna.

<sup>51</sup> A Yasu tiki eene, "Aaga fa kide." Ümmü i'i ka neeso arooro ka lime.

<sup>52</sup> Yungngo a Yasu ka tiki a naguugaara ma ka'boge nja naguugaara ma nasigira ma la ma Masala nja kadüüfi tanno öö'dö kini no, "Tanyooro i'i yungngo ada ka co kini a magulu'ba a maguuifi?

\* 22:37 22.37 Asaiya 53.12.

53 Naganna a'a nja aaga ka la ma Masala a naguuru, taalo aaga kümmü a'a, lakiini uuru naada eege kungngo tauugaara ma talüllü eege kungngo."

### *Bütrüs a'düsünü Yasu*

54 Kikirii ka'duga i'i ka co 'dii tiya uugaara ma ka'boge iini, a Bütrüs tako'd'do kene keere ndama ku'b'ba. 55 A nasigira tafülle issi ka 'dadillö ma 'dii kemmi, a Bütrüs temmi kene ka söödö. 56 Aka ma linggo mo tasala i'i ka temmi ille issi manaana iiye iini miki, "Ömö'dii ya aganeene nja Yasu."

57 A'düsünüigü iki, "Aka mo, taalo a'a nussu ömö'dii ya."

58 Amussu kungngo ya, ömö'dii öccö tasala i'i iki, "O'o nja eene."

A Bütrüs tiki iini, "Ömö'dii, taalo a'a nja eene."

59 Kada kaneene a 'buugu tamuru ya, ömö'dii könö tüütü kadussu i'i iki, "Tumma dhorro, ömö'dii ya a kaneene nja iini kudumma iini ama Jaliil afe'de."

60 İkiri Bütrüs ka tiki iini, "Ka ömö'dii, taalo a'a nussu nüümö yüüdü ka teema ya." A kini ka aleefe ateema ya, a dhimbi tafara. 61 İkiri Uugaara ka tafele assa ka Bütrüs. A Bütrüs tagüigü tumma na Uugaara nja iini a'da, "Ka dhimbi ka tüfürü tafara ara o'o ta'düsünü a'a tiidoona." 62 İkiri ka öö'dö kürö adafara fara ya dhiiri ya.

### *Nasigira küüni midhi ana Yasu*

63 A kadu na afa ka Yasu no tüüni midhi ku'bu ana i'i kabbü i'i. 64 Ka küdhü i'i ka iiye, kassa ka tindini i'i, "Mada i'i yungngo abbü o'o, tiraana?" 65 Keema tumma kini ko'do kadhabbu keela i'i.

### *Yasu ungngo ka naguugaara kidha*

66 Ka taka ka ndaadha ya, a kadiifü ma Yahüdü temmi, eege no naguugaara ma ka'boge nja katalaana ma seriye, köö'dö ana Yasu kide. 67 Kiki iini, "Üürü o'o na Almasiihi tirina ungngo."

A Yasu tapadaga tumma eene iki, "Kede kara tadirina aaga, taalo aaga kara tamma. 68 A kede kara tindini aaga taalo aaga kara tadirina a'a. 69 Ndama uuru tanno, ara 'Bii'bala ma Tadü'dü temmi ka türü ma niisö ma kuri tanno Masala."

70 Kikirii ka tiki eege in'dili kungngo, "O'o no 'Bii'bala ma Masala?"

İkiri ka tiki, "Kiki aaga a'da a'a namiini."

71 Yungngo eene ka tiki, "Kasaasa angnga taföönyö ka ömö'dii afe'de? Angnga ana oona ma angnga kaföönyö angnga ndama niinö tanno iini."

## 23

### *Kadu kö'dö ana Yasu ka Bilatus kidha*

(Matta 27.1-2, 11-14; Murkus 15.1-5; Yühanna 18.28-38)

1 A naguugaara tafiki'dö nye'd'e küügü Yasu kaco

ka Bilatus ana i'i. <sup>2</sup> Kikirii ka tafünü tumma iini ka oona kiki, "Kaduna ungngö ömö'di ya agirnaana kadu ka oona afünü kadu a'da kafa tamana tulu'ba a Kay-isar iki a'da i'i ya Almasiihi ya uugaara."

<sup>3</sup> Yungngö a Bilatus ka tindini i'i, "O'o na uugaara ma Yahüüdü?"

A Yasu tiki iini, "O'o natiraana."

<sup>4</sup> İkiri Bilatus ka tiki a naguugaara ma ka'boge nja kadu nye'd'e, "Taalo a'a naduna niimö ya toroko ya ka ömö'di tiya." <sup>5</sup> Kütü ka tumma tanno eene kiki, "I'i ya agirnaana kadu ka oona a talaana tanno iini ka Yahüüdiya ndama Jaliil alla öö'dö kita."

### *Yasu ungngö ka Hirüdüs kidha*

<sup>6</sup> A Bilatus taföönyö a'da ömö'di ya ama Jaliil iki, "Ömö'di ya 'dee, i'i ya taga Jaliil?" <sup>7</sup> Kini ka ndussu a'da Yasu ama ma anya tammo Hirüdüs, ikiri ka tuurugu i'i co Hirüdüs kudumma Hirüdüs ka uuru tanno miini no agöö'dö ka Örsaliim.

<sup>8</sup> Ka Hirüdüs ka tasala Yasu ya oona ta'diila kini 'do kudumma iini ka tasaasa takassa ka Yasu magaada kudumma iini ka taföönyö tumma iini kadhabbu, asaasa tassa kini ka talingga niimö keefe. <sup>9</sup> Adakindini i'i ma eema dhabbu, itaaloo apadaga tumma iini ungodho kungngö. <sup>10</sup> İkiri

naguugaara ma ka'boge nja katalaana ma seriye ka fiki'dö kakogoona ma tüüfunü eema iini ka oona.<sup>11</sup> A Hirüdüs tagüünii midhi ku'bu ana i'i nja nasigira tanno iini küünii tatoroko ana i'i kagirni ten'di ma limaana mo kini ka oona apadaga i'i co a Bilatus.<sup>12</sup> A Hirüdüs tarooro ka'diila nja Bilatus ka uuru tanno miini no, a'da kadiidi ajeene ka dhidha.

*Yasu ümmününja ka tiidide*

*dene* (*Matta 27.15–26; Murkus 15.6–15; Yühanna 18.39–19.16*)

<sup>13</sup> A Bilatus tagümmünü naguugaara ma ka'boge nja kadiifi nja kadu 'do.

<sup>14</sup> Iki eene, "Kö'dö aaga ana ömö'di tiya a'a aaga tiki a'da i'i ya aga'da kadu ka nanggüüdü, na a'a takindini i'i kada kidha, taalo a'a naduna niimö yaada ka tümmü i'i kudumma miini ya. <sup>15</sup> A Hirüdüs afe'de taalo aluna niimö kini kudumma iini ka tapadaga i'i angnga, a ömö'di ya taalo agüüni niimö ma tanangnga i'i ka teyi.

<sup>16</sup> Ara a'a tabbü i'i nassa ka tapa kini." [

<sup>17</sup> A Bilatus ka tadaada apaapa ka ömö'di unggodho ndama pabuusu ka uuru ma taanyara.]

<sup>18</sup> A kadu teela ka tumma ko'do, "Iidi ömö'di ya ara o'o ka tapa ka Barabas!"

<sup>19</sup> Barabas ya anna ka pabuusu kudumma iini ka

taga'da 'buugu kaanya nja tagiidi ömö'di.

<sup>20</sup> A Bilatus tageema nja eene afe'de kudumma iini ka asaasa tapa ka Yasu. <sup>21</sup> Kütü ka tiidhe kiki, "Bünnü i'i ka salii'bi! Bünnü i'i ka ma salii'bil!"

<sup>22</sup> İkiri ka tiki eene asa ndiidoona a'da, "Ömö'di ya 'dee agüünü minna ya toroko ya? Taalo a'a naduna niimö kini ya ma tiidi i'i ya, ara a'a tabbü i'i nassa ka apa kini." <sup>23</sup> A kadu tüütü kiidhe a tumma ko'd'o kasaasa i'i ka bünnünja ku'bu, kakogoonaa ma tiidhe. <sup>24</sup> A Bilatus tamma ka tumma tanno eene a'da eyi. <sup>25</sup> Ara ka tapa kene ka Barabas tiya ungngo ka pabuusu ya ka kirnaana kadu ka oona, adagiidi ömö'di kene ka asaasa a'da öö'dö kürö, ara ka tümmänü Yasu eene kudumma nanggeedi tanno eene ka asaasa.

*Yasu ungngo ka salii'bi  
(Matta 27.32-44; Murkus 15.21-32; Yühanna 19.17-27)*

<sup>26</sup> Kene ka ndüögü Yasu kunggeene iini ya, kikirri ka tümmü Samaan ya ma Keriwan ya, anda fada ka siga kanangnga salii'bi iini unggene ka Yasu keere.

<sup>27</sup> A kadu tuurna i'i keere kadhabbu ana iiya kungngo eene ka dhüüdhü naaro a muuyu miini kagu eege.

<sup>28</sup> A Yasu tafele aßsa kene iki, "Ka iiya ma Örsaliiim, aaga fa tafara kede, aaga

afara nanggeyi naada nja laala tiya ada. <sup>29</sup> Naguuru kinggide kara sa köö'dö a kadu teema kiki, 'A'diila nja iiya tanno taalo kagüröönö no, kitaalo kageene kitaalo kindine laala no.' <sup>30</sup> Kiki a naanya a'da, 'Kürrüdü kidi ko'do,' iki a kürünggürü, 'Küdhü ungngo ka oona.'

<sup>31</sup> A kene ka ndalinggo kungngo ya a 'bamfa tiya kirikiri 'dee, ara tafaanya

nja 'bamfa tiya arume ya.'\*\*

<sup>32</sup> Köö'dö a kadu tanno oroko no keera ma tara tiidi eege nja Yasu. <sup>33</sup> Kene ka ndala 'buugu ya ana eere a'da, Dho ma Üüdü ya, kabünnü i'i ka salii'bi nja kadu tanno eera na weerö no, ya ndama niisö ma kuri aya ndama niisö ma küüle. <sup>34</sup> İkiri Yasu ka tiki, "Pupa yeede, fa kene kudumma eene taalo kussu niimö yeene ka talinggo ya." Kasümünaana en'di yiini kene ku'bu, kafanna muduru miini.

<sup>35</sup> A kadu ta'düngnge kadinö a naguugaara neene tamidhi i'i kiki, "Oolona kadu könö, toolona eyi yiini adha, üürü i'i ya Almasiihi ya Masala ka tagesse i'i ya."

<sup>36</sup> A nasigira tö'dö küüni midhi ku'bu ana i'i afe'de kamanga kembelö iini, <sup>37</sup> Kiki, "Oolona eyi yüüdü üürü o'o na uugaara ma Yahüüdü."

<sup>38</sup> Kada rigiri tumma ka bünnü kini ka üüdü ma

**23:30** 23.30 Hawsha 10.8 \* **23:31** 23.31 A kadu ka talinggo tatoroko ana Yasu a'da taalo agüünü niimö ya toroko 'dee, a'da kara sa kafaanya nja ömö'di tiya atoroko ya?

salii'bi a'da, "Uugaara ma Yahüüdü i'i yungno."

<sup>39</sup> Ömö'di öccö ana ka kadu tanno ka salii'bi na eera no, teela i'i iki iini, "Taalo o'o na Almasiihi sa? Oolona eyi yüdü noolona ungngo."

<sup>40</sup> A könö tagirnaana kini iki iini, "Taalo o'o nari'ba a Masala, o'o napusu adene ka eema tiya miini ya?" <sup>41</sup> Tapusu adene naaja no, ka timin'da kapusu adene angnga kudumma aja ka tagüüni tam'baga lakiini i'i taalo agüüni nüümö ya toroko ya."

<sup>42</sup> İkiri ka tiki, "Agüögü tumma a'a Yasu, küdü kara co ka tauugaara tanno üdü."

<sup>43</sup> İkiri Yasu ka tiki, "Ara a'a tadirina tumma o'o dhorro, uuru no ara o'o tanna ka 'di ma singgi nja a'a."

### *Inde na Yasu*

(Matta 27.45–56; Murkus 15.33–41; Yühanna 19.28–30)

<sup>44</sup> A 'buugu kanda uuru ka teene ya a ndüüli tö'dö ka 'büdhülü nye'd'de idhi a ndanaaya tö'dö kiidoona siiya kungngo. <sup>45</sup> A ndanaaya talifi, a ten'di ma la ma Masala tarisina njaana ku'bu ka söödö. <sup>46</sup> A Yasu tadhiya ko'd'do, "Pupa yeede, nümmünü a'a koronggore yeede üdü ka nüüsö." Iki nggeege eyi.

<sup>47</sup> Aga uugaara ma nasi-gira tanno ukumu kadu ka iidümmü no ka tasala eema ya afünügü Masala ko'do, iki, "Aga'diila ömö'di ya

dhorro." <sup>48</sup> A kadu na kanna kide dhabbu no ka tadönö ka eema tiya no kafada kad-hüüdhü naaro kunggeene. <sup>49</sup> A kateefe ma Yasu nja iiya nye'd'de kungngo na ö'dö nja iini ndama Jaliil no kadönö ka eema tiya ndama ku'b'ba.

### *Tatü'büdene na Yasu* (Matta 27.57–61; Murkus 15.42–47; Yühanna 19.38–42)

<sup>50</sup> Ömö'di inggide taga adaya ma la ma kadiifi ma Yahüüdü ana eere a'da Yüüsif a'diila ümmü tumma ma Masala dhorro. <sup>51</sup> Taalo agamma ka eema tiya Yahüüdü ka talinggo ya, i'i ya ma anya ma Yahüüdiya mana eere a'da Raama mo, i'i akindhigü tauugaara na Masala. <sup>52</sup> İkiri ka co ka Bilatus asaasa oofo ya Yasu.

<sup>53</sup> İkiri ka ta'dinigi i'i ku'bu ndama salii'bi a'bürü i'i ka oona a ten'di, atü'bü i'i ka la ma oofo tiya assadene ka 'dokon'da, üfürü ömö'di tatü'büdene kide. <sup>54</sup> Ka uuru tanno miini no, kindinaana kadu oona ku'bu ma uuru ma Sa'bidi ka ndakete. <sup>55</sup> A iiya no kata'da ka Yasu keere ndama Jaliil no kunggeene nja Yüüsif kada kanna ka la ma oofo, kadadönö ka oofo tiya iini ananja kide nya. <sup>56</sup> Kafada kateefe tindinaana kondho nja russu ku'bu, kalingnge ka uuru ma Sa'bidi afa ma Sorne ma seriye ka tiki ya kungngo.

## 24

*Tafiki'dö na Yasu ka inde*  
(Matta 28.1–10; Murkus

## 16.1-8; Yühanna 20.1-10)

<sup>1</sup> Iiya killi kafiki'dö ligitaka so'd'do ka uuru ma Lahada köö'dö ka la ma oofo a kondho tammo eene ka takindinaana ku'bu mo. <sup>2</sup> Kaduna dhembeliili ka 'dugadene ka iñye ma la ma oofo. <sup>3</sup> Kaco teene miini taalo kaluna oofo ya Uugaara Yasu kide. <sup>4</sup> Kene ka ndadhore ya, kadhiimi ka kadu ka tatele oona eene keera ana en'di ka oona kalimaana. <sup>5</sup> Ari'ba tümmü euge küssülü iÿe ka 'büdhülü a kadu na miini no tiki, "Kawwa aaga ömö'dü ya adinö ya ka kadu tanno aaya no ka teene amana? <sup>6</sup> Itaalo kita lakiini i'i afiki'dö, aaga küigü tumma niini ka tadirina aaga ka Jaliil no, <sup>7</sup> kini ka takiki a'da, "Bii'bala ma Tadü'd'dü ara tümmününja ka kadu tanno oroko no ka iisine kabünnü i'i ka salii'bi assa ka fiki'dö a füngngö iidoona." <sup>8</sup> Yungngó eene ka tagüigü tumma niini.

<sup>9</sup> Kafada ndama la ma oofo kadirina eema a kadafiinü no ö'dö kada'baaga kafünü unggodho no nja türeene ma kadu nye'd'de kungngo ma eema tiya nye'd'de. <sup>10</sup> Na Mariyom Almajdaliya nja Hanna nja Mariyom nüümö ma Yaguub nja iiya tököön kunggeene nja eene no kadirina eema ya a kadafiinü. <sup>11</sup> A kadafiinü taalo kamma ka tumma tanno iiya, kiki kide a'da tumma ün'dügüngngö.

<sup>12</sup> Lakiini Bütrüs afiki'dö a'diga co la ma oofo, itigili ku'bu asala en'di unggodho

i'i afada adhere ka eyi tiya iini ka eema tiya agüünü adene ya.

*Tino ma tra co Imwas  
(Murkus 16.12-13)*

<sup>13</sup> Ka uuru tanno miini no Kadu kinggide keera ka kadalaadene kunggeene ma tra co anya tammo ana eere a'da Imwas ma ku'b'ba ka Örsaliim ana nameele ka iïdümmü kafünü eera. <sup>14</sup> Kada keemaana ka oona unggodho eege ma eema tiya agüünü adene ya nye'd'de kungngo. <sup>15</sup> A kene ka ndeemaana ka oona kam'bana ko'do a tumma ya, ikirü Yasu ka eyi tiya iini ka öö'dö kene kete unggene nja eene. <sup>16</sup> Lakiini iÿe neene kaküdhü taalo kussu i'i 'do.

<sup>17</sup> Ikirü ka tindini eege, "Tumma minna eege kungngo ada kadeema iini a'da kunggeene aaga no?"

Köödhü kamüürü. <sup>18</sup> A könö ya ana eere a'da Kaliyubas tiki iini, "O'o nungngó nefé ka Örsaliim unggodho o'o nitaalo nussu eema ya agalinggo adene kide ka naguuru tanno ya?"

<sup>19</sup> Ikirü Yasu ka tiki, "Minna agüünü adene?"

Kiki iini, "Eema ya agalinggo adene ana Yasu ya ma Nasira ya i'i ya aga ne'bi ana türü ma tumma nja linggo kidha ma Masala nja kadu nye'd'de kungngo. <sup>20</sup> Naguugaara ma ka'boge nja kadiifi tanno aja kümmü i'i ma tiidaana kabünnü i'i ka salii'bi. <sup>21</sup> Kagümmü unggngó i'i a'da i'i yungngó

ara toolona Israyil adha ya a fungngö ma eema tiya agalinggo adene ya anda iidoona 'bitüngngö. <sup>22</sup> Lakiini iiya niidi tököön kinggide kanangnga ungngo katadhere. Kunggeene lititaka so'd'do kaco la ma oofo. <sup>23</sup> Kitaalo kaluna oofo yiini, kafada köö'dö kiki ungngo a'da kaduna eege kadhangga kiki eene a'da i'i adinö. <sup>24</sup> A kadu öccö tunggeene ana ka kadu tanno iidi ka co la ma oofo, kaduna afa ma tiya iiya ka tiraana ya kungngo, lakiini eege taalo kasala i'i."

<sup>25</sup> İkiri Yasu ka tiki eene, "Ka nagaaga aaga kadoono aaga ku'bu a tümmü Masala, ma tumma tanno nagane'bi katatiraana no nye'd'de.

<sup>26</sup> Taalo Almasiihi ara tadhügürü üün muuyu assa ka co ka tidhindhi tanno iini?" <sup>27</sup> Ada kadünögü tumma ma eyi tiya iini na ikirinja ka nakasorne ndama seriye tiya Müüsa nja nagane'bi nye'd'de kungngo.

<sup>28</sup> Kene ka ndakete ka anya tammo eene ka tunggunugu co mo, a Yasu tüün eyi yiini a'da i'i unggunugu co a 'buugu tiya agu'b'ba ya. <sup>29</sup> Kamma'da kini kiki iini a'da, "Aneene nja ungngo kudumma 'buugu kanda siyya ooso ka ndö'dö." İkiri ka co ma co taneene nja eene.

<sup>30</sup> A kene ka ndemmi ma tara tagu eema ya, a Yasu ta'duga miteene anangnga ta'diila a Masala, a'düsün anangnga eene. <sup>31</sup> İiye

tatanfa'da kene kussu i'i, ikiri ka tamanyaga eene ka oona. <sup>32</sup> Aya tiki a tööje, "Taalo tunugu abaana kaja ka naaro, kini ka tageema nja angnga ka fiini adagadünögü eema ya ka kasorne ma Masala ya angnga?"

<sup>33</sup> Karooro ka tafada kaco Örsaliim, kaduna kadafiini na ada'baaga kafünü ungodho no katemmi nja kadu töccö na aneene nja eene no. <sup>34</sup> Kadageema kiki,

"Afiki'dö Uugaara aala oona a Samaan timin'da." <sup>35</sup> İkiri kadalaadene na eera no ka tirina eema ya agalinggo adene ka fiini ya, kene ka tussu Uugaara kini ka 'düsünü miteene.

*Yasu adele oona a kadalaadene tanno iini (Matta 28.16–20; Murkus 16.14–18; Yühanna 20.19–23; Kadafiini 1.6–8)*

<sup>36</sup> Aga kadalaadene na eera no ka ndeema ya, ikiri Yasu ka 'dängnge kene ka söödö iki, "A'a nööjülü aaga." <sup>37</sup> A ri'ba tümmü eege ka'deedene ka oona kiki kide a'da eege kaasala koronggore. <sup>38</sup> Yungngo iini ka tiki eene, "Minna agu aaga, aaga ta'deedene, aaga tasanaana nanggeedi ku'bu?" <sup>39</sup> Aaga assa kede ka iisine nja uune, a'a namiini, aaga aa'ba a'a ka oona aaga tüörönö, taalo tuu'da ka koronggore nja ku'buuni afa maada ka tönö kede kungngo."

<sup>40</sup> Atiraana nggeege aala iisine niini eene nja uune

tanno iini. <sup>41</sup> Lakiini eege kütü taalo kamma, eene katadhere a dhodho tagu eege ka oona dhindho ïkiri ka tiki eene, "Nüümö ma taguri ungngo ada kita?" <sup>42</sup> Kagona 'bamidigilöögö ma ku'dudene mo iini. <sup>43</sup> A'duga adaguri kene kidha.

<sup>44</sup> ïkiri ka tiki eene, "Tumma neede ka tadirina aaga a'da nagaleefe a'a nja aaga no a'da tumma nakasorne ma seriye tiya Müüsa nja kasorne ma nagane'bi nja sorne ma Tüüsü ma nakaaru na keema tumma ma a'a no kara talinggo adene ana a'a nye'd'de kungngo."

<sup>45</sup> Yungno iini ka tafa'da eege ka nanggüdü amang kene tussu ka sorne. <sup>46</sup> ïkiri ka tiki eene, "Tumma na kakirinja ka sorne kiki a'da Almasiihi ara tadhügürü afiki'dö ndama inde a naguru kiidoona. <sup>47</sup> Ara kadu tadünnü tumma ana eere tiya iini ma kadu kataadha ka tatoroko, ma toolona tam'baga, kata tüm'bü miini ndama Örsaliim kadhala ka kadu nye'd'de kungngo. <sup>48</sup> Aaga kungngo kadinö ka eema tiya. <sup>49</sup> Ara a'a tunggu niümö ya Pupa tiya eede ka tatiraana aaga ya, aga aganna ka anya ma Örsaliim ara türü köö'dö kada ka oona ndama fiinii ma ndanaaya."

<sup>50</sup> ïkiri ka öö'dö kürö ana eege kaco Beet Aniya a'diniga iisine coo'do anangnga baraka eene. <sup>51</sup> A kini ka ndamana baraka eene ya, asigi keere eene ka oona assa ka ta'dininja co 'dotombo'do. <sup>52</sup> Küürü ku'bu kamma kini, kafada kaco Örsaliim kadhodho dhorro. <sup>53</sup> Kan'danaga co la ma Masala turi kungngo, kamana ta'diila a Masala.

*Yasu asirigö co 'dotombo'do  
(Murkus 16.19–20;  
Kadafüni 1.9–11)*

## İnjiiili Yühanna Tafa'da tumma

Yühanna aga tafiiñi tiya Yasu ana ka kadu na ö'dö kada'baaga kafünü eera no. I'i eema tumma ma eema keefe ma Yasu ka talinggo no nja talaadene tanno iini ka tamana a kadu no. Yühanna anangnga kadu ka tussu a'da Yasu i'i ya ömö'di dhorro i'i ya Masala afe'de.

Sorne ala angnga a'da Yasu ya tumma tanno Masala nja tumma ma tö'dö ka 'büdhülü. Yühanna ya tatambeese ya ümmünü i'i a'da dhünggü ma Masala, ala angnga a'da inde niini kara tatirri tanno ara ta'duga tatoroko ma 'büdhülü. Yasu i'i ya Almasi-ihı ya nagane'bi ma 'billi kadageema tumma tö'dö ma 'billi tanno iini. Yühanna eema tumma ma tasaasa tanno Yasu ka kadu tanno iini nja tumma ma ta'baga eege ka nanggeedi taamu kungngo a'da üfürü tümmü adene (Yühanna 13—17). Abünnünja ku'bu afiki'dö ka inde aala oona niini a kadu tanno iini a naguuru kadhabbu (Yühanna 18—21).

*Tumma na Masala ka tuu'da*

<sup>1</sup> Ka dhidha kaganna tumma kide, a tumma taganna ka Masala, a tumma eege ka Masala. <sup>2</sup> I'i ka dhidha aganeene nja

Masala. <sup>3</sup> Eema nye'd'de ö'dö ndama iini, üürü taalo i'i taalo eema adaganna kide. <sup>4</sup> Tefe ka 'dii kungngo iini, a tefe ka 'dii niini tamana töyeene a kadu nye'd'de. <sup>5</sup> A töyeene ada ka talüllü, a talüllü taalo kambaanya türü na töyeene.

<sup>6</sup> Ömö'di inggide adele oona ana eere a'da Yühanna, a Masala ka kürünü i'i. <sup>7</sup> I'i ö'dö teema tumma ma töyeene tammo iini ka tadinö kide no co kadu amang kene tamma ka Masala in'dili ndama tumma tanno iini. <sup>8</sup> I'i ka eyi tiya iini taalo a töyeene, i'i ö'dö teema tumma ma töyeene sugi. <sup>9</sup> I'i ya töyeene tanno dhorro no, kö'dö ka 'büdhülü ma tanangnga töyeene ka kadu ka oona.

<sup>10</sup> Aganna ka 'büdhülü, a Masala tarü'bü 'büdhülü ana i'i, a kadu ma 'büdhülü taalo kussu i'i. <sup>11</sup> Ö'dö ka kadu ma anya tammo iini, lakiini kadu niini taalo kamma kini. <sup>12</sup> Lakiini kadu na amma kini no, nja tanno kamma ka eere tiya iini no, anangnga tauugaara eene kada laala ma Masala. <sup>13</sup> Eege no taalo kageenedene ndama tuu'da nja eriidö kitaalo kageenedene ndama miide lakiini kageenedene ndama Masala.

<sup>14</sup> A tumma ta ömö'di adaganeene nja angnga, angnga tadinö ka tiidhindhi tanno iini, tiidhindhi na 'Bii'bala ya unggodho ya, ya ö'dö ndama Pupa adigine a türü nja timin'da. <sup>15</sup> Yühanna ijöögö,

adageema ko'd'do iki a'da, "Ömö'dü yeede ka takiki a'da ara tö'dö kede keere ya i'i yungngo, i'i idhindhü adagii'bi a'a kudumma iini ka taganeene a'da naleefe a'a takitaalo."

<sup>16</sup> Adigi baraka ma türü tanno iini kaja ka oona, adadigine türü kaja kide turi. <sup>17</sup> Kudumma Masala manangnga seriye a Müusa ö'dö iini angnga, lakiini türü nja timin'da tanno dhorro no kö'dönja angnga ndama Yasu Almasiihi. <sup>18</sup> Taalo ömö'dü ma tadinö ka Masala, lakiini Masala ma unggodho ma 'Bii'bala ya unggodho ya, ya ka Pupa ka tügüle ya i'i yungngo anangnga oogo ka tussu adene.

*Tumma na Yühanna ya tatambeese ya*

(Matta 3.1-12; Murkus 1.2-8; Lüüka 3.15-17)

<sup>19</sup> A tumma na Yühanna ka tiraana no euge kungngo a Yahüdü kagürünü ka'boge nja Lawiin ndama Örsaliim ma co tindini i'i, "O'o na mada?" <sup>20</sup> Ütü ka tamma itaalo a'düsünigü, iki a'da, "Taalo a'a na Almasiihi."

<sup>21</sup> Kikirü ka tiki iini, "O'o na mada ma? O'o na İliya?"

Iki, "Taalo a'a na İliya."

Kiki iini, "O'o na ne'bi?"

Iki eene, "Kaw."

<sup>22</sup> Keere kungngo kikirü ka tiki iini, "O'o na mada, amang küdü tapadaga tumma co ka kadu tanno kürünü unggno no. Niki o'o ka eyi tiya yüdü nya?"

<sup>23</sup> A Yühanna tiki, "Abbü ömö'dü takeere ka dhüile, 'Aaga indinaana fiinü ka Uugaara ku'bu, ka tadhidho,' " afä ma tiya ne'bi Asaiya ka tiki ya kungngo.

<sup>24</sup> A naFariisi eege kungngo kagürünüdene. <sup>25</sup> Kikirü ka tindini Yühanna kiki iini, "Üürü taalo o'o na Almasiihi, nitaalo na İliya, nitaalo na ne'bi o'o nambeese kadu amana?"

<sup>26</sup> A Yühanna tiki eene, "Ara a'a tambeese a 'büüdi, lakiini ömö'dü unggngo ada ka söödö ada katitaalo kussu i'i. <sup>27</sup> I'i yungngo a tö'dö kede keere taalo a'a natambaanya tinggili meena ma egüide tiya iini." <sup>28</sup> Tumma no kalinggo adene ka Beet Aniya ka nda'da ma Ri ma Ürdün kita Yühanna ka takambeese kide ya.

*Yasu i'i ya dhünggü ma Masala*

<sup>29</sup> Ka taka tököönö a Yühanna taasala Yasu ka tunggunu kini, ikirü ka tiki, "Aaga assa ka dhünggü tiya Masala ya ara ta'duga tatoroko ka 'büdhülü ya i'i yungngo. <sup>30</sup> I'i yungngo eede ka tageema tumma miini a'da, 'Ömö'dü inggide atö'dö kede keere kudumma iini aganna eede kidha adhabbu a'a.' <sup>31</sup> Taalo a'a nakussu i'i, illi a'a nö'dö tambeese a 'büüdi amang kini tatele oona a kadu ma Israyil."

<sup>32</sup> İkirü Yühanna ka adinö kide iki, "Niji a'a Koronggore

ka öö'dö ku'bu ndama 'dotombo'do afeene nja ndalambo idhi kini ka oona.<sup>33</sup> Taalo a'a nara tagussu i'i, illi ömö'dü ya kürünü a'a ka öö'dö tambeese a 'büdü ya, iki a'a a'da, 'Ömö'dü yüdü ka tasala Koronggore ya ka tidhi kini ka oona ütü kide ya, i'i yungngo ara tambeese a Koronggore tiya Insili ya.'<sup>34</sup> A'a nadinö kini nussu a'da 'Bii'bala ma Masala i'i ya miini."

*Kadalaadene na Yasu na dhidha no*

<sup>35</sup> Ka taka tököönö a Yühanna ta'dingga afe'e de nja kadalaadene tanno iini na eera no.<sup>36</sup> Kini ka tasala Yasu ka öö'dö adigaala, a Yühanna tasala i'i iki, "Aaga assa ka dhünggü ma Masala."<sup>37</sup> A kadalaadene na eera no tafoönyö iini ka teema, kikirii ka turna Yasu keere.<sup>38</sup> A Yasu tassa keere, asala eege kato'd'do kini keere, ikirii ka tiki eene, "Kasaasa aaga minna?"

Kiki, "Rabi" (a'da Tata-laana), "dü yüdü inggiga?"

<sup>39</sup> İkiri ka tiki eene, "Aaga ö'dö aaga co tassa co." Kikirii ka co kateefe tassa kita iini ka tanna kide kita, kadaganeene nja iini ka uuru tanno miini no, amuru ma siiya.

<sup>40</sup> A könö ana ka kadalaadene tanno eera no kaföönyö tumma na Yühanna kuurna Yasu keere no, ana eere a'da Andraws örre ya Samaan Bütrüs.

<sup>41</sup> Niimö ya Andraws ka talinggo ka dhidha ya i'i aduna örre yiini Samaan

iki iini, "Kaduna ungngo Almasiya" (a'da Almasiiji).

<sup>42</sup> Öö'dö ana i'i a Yasu, ikirii Yasu ka tassa kini iki, "O'o na Samaan 'bii'bala ya Yühanna, ara o'o tana eere a'da Kifa" (a'da 'dokon'da).

*Yasu ümmüni Filibüs nja Nasanayiil*

<sup>43</sup> Aga taka ka ndaadha ya a Yasu tasaasa co Jaliil, ikirii ka tuna Filibüs, iki iini, "Aayu kede keere."

<sup>44</sup> A Filibüs, i'i ya ma Beet Sayida, anya ma Andraws nja Bütrüs.<sup>45</sup> A Filibüs taduna Nasanayiil, iki iini, "Kaduna ungngo ömö'dü ya Müüsa ka tarigiri ada ka sorne ma Masala nja sorne ma nagane'bi ya, Yasu 'bii'bala ya Yüüsif ya ma Nasira ya."

<sup>46</sup> A Nasanayiil tiki iini, "Niimö ya a'diila inggide atö'dö ndama Nasira?"

A Filibüs tiki iini, "Aayu kolo tassa kide."

<sup>47</sup> Ka Yasu ka taasala Nasanayiil ka tunggunu kini ya, ikirii ka tiki iini, "Taga Israyil ya dhorro ya i'i yungngo taalo korokoro kide."

<sup>48</sup> A Nasanayiil tiki iini, "Nussu a'a nya?"

A Yasu tiki iini, "Nasala a'a o'o ka tüm'bü ma indiyye a'da üfürü Filibüs tagümmünü o'o."

<sup>49</sup> İkiri Nasanayiil ka tiki, "Tatalaana, o'o na 'Bii'bala ma Masala. O'o na Uugaara ma Israyil."

<sup>50</sup> İkiri Yasu ka tiki iini, "Namma o'o kudumma eede ka tiki a'da a'a nasala o'o ka

tüm'bü ma indiyye. Ara o'o sa adinö ka eema adhabbu a tiya." <sup>51</sup> İkiri ka tiki iini, "Tumma dhorro, ara a'a tadirina aaga, ara tiji 'dotombo'do ka tatafa'da, a kadhangga ma Masala tasirigö coo'do ka'dingga kö'bu ka 'Bii'bala ma Tadü'd'dü ka oona."

## 2

*Yasu a'bele 'büdü kada ngeeli*

<sup>1</sup> Ka füngngö kanda iidoona ya, a tarne taganna ka Kaana ka Jaliil, a niimö ma Yasu taganna kide, <sup>2</sup> a kadu tagümmünü Yasu nja kadalaadene kaco ka tarne. <sup>3</sup> Ka kadu kanda 'duuru ngeeli ya, ikiri niimö ma Yasu ka tiki iini, "Taalo ngeeli köreene kene."

<sup>4</sup> A Yasu tiki oono, "Ka aka mo, minna yüdü nja a'a. Küfürü uuru neede tö'dö."

<sup>5</sup> A niimö ma Yasu tiki a kadu tanno alinggo no, "Niimö yiini ka tiki aaga a'da aaga talinggo ya aaga linggo."

<sup>6</sup> A nadhafala kinggide ka iidümmü kafünü ungodho, kagalinggo adene a misi, kadu ma Yahüdü ka tadaada kagodene a nadhafala, aya tadigine a 'büdü dhabbu. <sup>7</sup> İkiri Yasu ka tiki a kadu tanno alinggo no, "Aaga tigi nadhafala a 'büdü," kikiri ka tigaana ö'dö ka niinö miini. <sup>8</sup> İkiri ka tiki eene, "'Bitingngö aaga indi ökönö aaga tunggo co

uugaara ma linggo." Kikiri ka tinya iini.

<sup>9</sup> Kini ka tagolo 'büdü atab'ele kada ngeeli ya, a'da taalo ussu a'da kö'dö ndama kiga, lakiini kasaga na amana ngeeli a kadu no, eege kungngo kussu, adagümmünü tatarna yeene. <sup>10</sup> Iki iini, "Kadu 'do kamana ngeeli na itoto no a kadu ka dhidha, a kadu kandaaya kide ya, kikiri kamana na 'büdü no eene. Lakiini nagala o'o ka afa ka ngeeli tanno itoto no, na o'o sa ka öö'dö iini 'bitingngö adha."

<sup>11</sup> Yasu ala eema keefe nja türü nja tiddhindhi tanno iini a kadu ka Kaana ka Jaliil ka dhidha a kadalaadene niini tadinö kide kamma kini.

<sup>12</sup> Ndama kanna a Yasu tasülü ku'bu nja niimö tammo iini nja nagore tanno iini nja kadalaadene tanno iini kaco Kafarnahööm, kagünü kide a füngngö idhilli.

*Yasu asoro kadu na anadene no ka la ma Masala (Matta 21.12-13; Murkus 11.15-17; Lüüka 19.45-46)*

<sup>13</sup> Aga Taanyara ma Tada'da ka Eriidö ma Yahüdü kanda kete ya, ikiri Yasu ka siriği co Örsalii.

<sup>14</sup> Aduna kadu ka la ma Masala, kanadene ana eefo nja kidheefele nja alambo, a'da kadu na aregere gürüüsü no kungngo kemmi ka naterbeesa. <sup>15</sup> İkiri ka takaaya feeri ma naaru adagasoro eege ka 'booro

ma la ma Masala nye'd'de kungngo, nja kidheefele nja eefo apudu naterbeesa ku'bu asanaana gürüüsü ya kadu tanno aregere no. <sup>16</sup> İkiri ka tiki a kadu tanno kanadene ana alambo no, "Aaga 'duga eema ya kita, aaga fa tanangnga 'dii ya Pupa tiya eede ka ta'buugu ma tanadene." <sup>17</sup> A kadalaadene niini tagiigü eene katiki a'da, "Ka Masala, tasaasa ma la tiya üüdü kagu'du a'a ka eedi."

<sup>18</sup> İkiri Yahüüdü ka tiki iini, "La türü ungngo niidi ka tussu iini a'da ara o'o talinggo tumma no?"

<sup>19</sup> İkiri Yasu ka tiki eene, "Aaga arüüdü la ma Masala ya na a'a sa ka arü'böönö a fungngö iidoona."

<sup>20</sup> A Yahüüdü tiki, "La ma Masala ya, arü'bü adene a nagürüünü a kadu keera kafünü kide ka iidümmü afünü unggodho (46), na o'o sa ka tarü'böönö a fungngö iidoona nya?" <sup>21</sup> Lakiini la ma Masala ya Yasu ka teema tumma miini ya, eema tumma ma tuu'da tanno iini. <sup>22</sup> A kini ka fiki'dö ndama inde ya, a kadalaadene niini tagiigü tumma no, kamma ka tumma ma sorne ma Masala nja tumma tanno Yasu ka tatiraana no.

<sup>23</sup> Kini ka taganna ka Taanyara ma Tada'da ka Eriidö ka Örsaliim ya, a kadu tamma ka eere tiya iini kadhabbu kene ka tadinö ka türü ma eema tiya iini ka talinggo keefe ya. <sup>24</sup> Lakiini

Yasu taalo üürü kene ka oona kudumma iini ka tussu kadu nye'd'de kungngo. <sup>25</sup> Kudumma iini taalo ama ömö'dii ka tirina tumma ömö'dii iini, kudumma iini ka tussu nanggeedi na kadu.

### 3

#### *Yasu alaana Niködimus*

<sup>1</sup> A 'bitingngö taga Fariisi inggide uugaara ma Yahüüdü ana eere a'da Niködimus, i'i ya ta'ba ma naFariisi. <sup>2</sup> Unggeene ooso kungngo aco ka Yasu iki iini, "Rabi, (a'da Tatalaana) kussu ungngo a'da o'o na tatalaana ya ö'dö ndama Masala ya. Taalo ömö'dii ma tabaanya talinggo eema keefe afa ma tiya üüdü ka talinggo ya itaalo illi ka Masala ka taneene nja iini."

<sup>3</sup> A Yasu tiki iini, "Ara a'a tadirina tumma o'o dhorro, taalo ömö'dii ma tassa ka tauugaara ma Masala illi iini ka tageenedene afe'de."

<sup>4</sup> A Niködimus tiki iini, "Ara ömö'dii teenedene nya iini ka tadhabbu? Atapadaga ka niimö ka feelü assa ka teenedene afe'de?"

<sup>5</sup> A Yasu tiki, "Ara a'a tadirina tumma o'o dhorro, taalo ömö'dii ma tara co ka tauugaara ma Masala illi kini ka teenedene ndama 'büüdi nja Koronggore.

<sup>6</sup> Ömö'dii ya ageenedene ndama tuu'da ya i'i ya tuu'da, lakiini ömö'dii ya ageenedene ndama Koronggore ya i'i ya koronggore.

<sup>7</sup> Fa tadhere ka tumma tanno

eede ka tiki o'o no a'da,  
'Aaga teenedene afe'de.'

<sup>8</sup> Tanya kiisö co kita eene  
kasaasa, aaga taföönyö  
tüüsö miini, lakiini aaga sa  
katitaalo kussu kita eene  
köö'dö ndama iini kita, aaga  
taalo kussu kita eene kiisö  
co, nggeege kafeene nja  
ömö'di tiya ara teenedene  
ndama Koronggore ya."

<sup>9</sup> A Niködimus tiki,  
"Tumma no katalingga  
adene nya?"

<sup>10</sup> A Yasu tiki iini, "O'o no  
tatalaana ma Israyil, na o'o  
sa ka titaaloo nussu tumma  
no?" <sup>11</sup> Ara a'a tadirina  
tumma o'o dhorro, keema  
ungngo niimö yüüdi ka tussu  
ya, ungnego tadirina niimö  
yüüdi ka tadinö kide ya, illi  
aaga taalo kamma ka tumma  
tanno iidii.

<sup>12</sup> Nageema a'a nja aaga ma eema ma  
'büdhülü aaga taalo kamma,  
ara aaga tamma nya kede  
kara teema nja aaga ana  
eema ma 'dotombo'do?

<sup>13</sup> Taalo ömö'di ma tasirö  
'dotombo'do illi 'Bii'bala ma  
Tadü'ddü i'i yungngo ö'dö  
ku'bu ndama 'dotombo'do.

<sup>14</sup> Afa ma tiya Müusa ka  
taga'dala ni ko'do ka dhüile  
kungngo ya, ara 'Bii'bala ma  
Tadü'ddü ta'dinanja ko'do  
nggeege, <sup>15</sup> amang ka kadu  
tanno amma kini no taluna  
tefe ka 'di ta'billi.

<sup>16</sup> "Kungngo Masala  
masaasa kadu nye'd'de,  
mikirii ka kürünü 'Bii'bala  
yoono ya unggodho ya,  
amang ka kadu tanno amma  
kini no tafa taama, lakiini  
kataluna tefe ka 'di ta'billi.

<sup>17</sup> Taalo Masala magürünen  
'Bii'bala yoono ka kadu  
a'da ümmü eege, lakiini  
moono ka toolona kadu ana  
i'i. <sup>18</sup> Ömö'di ya amma  
ka 'Bii'bala ya, taalo ara  
tahükümüdene, a ömö'di  
ya taalo amma kini ya,  
ümmü adene, kudumma  
iini taalo amma ka 'Bii'bala  
ma Masala tiya unggodho  
ya. <sup>19</sup> A tahükümü no,  
kudumma töyeene kö'dö  
ka 'büdhülü, illi kadu ka  
asaasa talüllü ka tagii'bi  
töyeene, kudumma eene ka  
talinggo eema ya toroko ya.

<sup>20</sup> Ömö'di ya linggo eema ya  
toroko ya anu ka töyeene,  
itaalo ara co ka 'buugu  
tiya öyeene ya, kudumma  
eene kari'ba a kadu katiji  
eema yiini ka talinggo ya.  
<sup>21</sup> Lakiini ömö'di ya alinggo  
eema ya dhorro ya, anna  
ka 'buugu tiya öyeene ya,  
amang ka kadu tiji linggo  
niini kussu a'da fiinii ma  
Masala i'i ya miini."

*Yasu nja Yühanna tiya  
Tatambeese ya*

<sup>22</sup> İkiri Yasu ka tunggeene  
aco anya ma Yahüüdiya  
nja kadalaadene tanno iini,  
adaganna kide nja eene  
atagambeese eege. <sup>23</sup> A

Yühanna takambeese afe'de  
ka Een Nün, kete ma Salim,  
kudumma 'büüdi ka tad-  
habbu kide, a kadu ticci ka  
tambeesedene kide. <sup>24</sup> A'da  
aleefe Yühanna üfürü co ka  
pabuusu. <sup>25</sup> A taga Yahüüdü  
ta'bununjaana ku'bu ka  
tumma nja kadalaadene

tanno Yühanna, kudumma tagunaana ma taanyara.  
<sup>26</sup> Kikirii ka öö'dö ka Yühanna kiki iini, "Rabi, (a'da Tatalaana) ömö'dü ya aganna ka nda'da ma Ürdün nja o'o ya yüdü ka tageema tumma müni ya, inni kannam ambeese, a kadu ticci kini kide."

<sup>27</sup> A Yühanna tiki eene, "Taalo ömö'dü ma ta'duga niimö ün'dügüngngö illi ka Masala ka anangnga iini ndama 'dotombo' do.  
<sup>28</sup> Aaga ka nanggeyi tanno ada kaföönyö aaga eede ka tiki a'da, 'Taalo a'a na Almasihi, illi a'a nagürünüdene kini kidha.'  
<sup>29</sup> Ömö'dü ya arna ya i'i yungngo a nyori ma aka. A teefe ma tatarna i'i a'dingnge atoodo ka tumma tanno iini adhodho kini ka föönyö tumma niini, a 'bitüngngö dhodho neede ka ndafaradene kudumma iini.  
<sup>30</sup> I'i ama tasisigi co aadha, ara a'a ka tapapataga keere."

### *Ömö'dü ya ö'dö ndama 'dotombo' do ya*

<sup>31</sup> Ömö'dü ya öö'dö ku'bu ndama oo'do ya, i'i yungngo ka kadu kidha nye'd'de, ömö'dü ya anna ka 'büdhülü ya, i'i ya ama 'büdhülü eema tumma ma kadu ma 'büdhülü. Aya ö'dö ndama 'dotombo' do ya i'i yungngo ka kadu kidha nye'd'de kungngo.  
<sup>32</sup> Eema tumma niini ka tadinö kide adaföönyö no, lakiini taalo ömö'dü unggodho kungngo amma ka tumma tanno

iini. <sup>33</sup> Ömö'dü ya amma ka tumma tanno iini ussu a'da tumma na Masala ka dhorro. <sup>34</sup> Ömö'dü ya Masala ka kürünü i'i ya, eema tumma ma Masala, kudumma Masala manangnga Koronggore a kadu a'da taalo faana kide.  
<sup>35</sup> A Pupa asaasa 'Bii'bala ümmünü eema iini ka niisö nye'd'de kungngo.  
<sup>36</sup> Ömö'dü ya amma ka 'Bii'bala ya ara taduna tefe ka 'dü ta'billi, ömö'dü ya taalo amma ka 'Bii'bala ya, taalo ara tassa ka tefe ka 'dü, ara tüütü ka tapusu adene ma Masala.

## 4

### *Yasu nya aka ma Samira*

<sup>1</sup> A naFariisi taföönyö a'da Yasu alaana kadalaadene ambeese eege kadhabbu a kadu tanno Yühanna.  
<sup>2</sup> Tumma dhorro Yasu ka eyi tiya iini taalo akambeese, lakiini kadalaadene niini eege kungngo kagambeese kadu.  
<sup>3</sup> Ka Yasu ka tussu tumma no ya, unggeene ka Yahüüdiya afada aaco Jaliil.  
<sup>4</sup> I'i ama tunggeene adho ka Samira.

<sup>5</sup> Ö'dö ka anya ma Samira mana eere a'da Sukar, makete ka 'buugu tiya Yaguub ka anangnga a 'bii'bala tiya iini Yüüsif.  
<sup>6</sup> Össe ma Yaguub makete kita miini kita, aga Yasu ka tagunggeene agi'di, ikirii ka temmi ka tinggini ma össe ka uuru ka teene.  
<sup>7</sup> Aka ma Samira mö'dö ma tindi 'bii'di, ikirii Yasu ka tiki

oono, "Nya 'biiđi a'a nooye."  
<sup>8</sup> Kudumma kadalaadene tanno iini ka ungeene kaco tana eema ma taguri kaanya.

<sup>9</sup> Mikiři aka ma Samira ka tiki iini, "O'o na taga Yahüüđü a'a na madaga Samira, o'o saga asaasa 'biiđi kede a'da nooye nya?" Kudumma Yahüüđü taalo kunggunaana konna nja kadu ma Samira.

<sup>10</sup> Ikiři Yasu ka tiki oono, "Küdü ka tussu eema ya Masala ka amana a kadu ya, na o'o tagussu ömö'di ya arangnga 'biiđi küdü a'da ooye ya, ara o'o takindini a'a ara a'a takinya 'biiđi ma tefe ka 'di o'o."

<sup>11</sup> Aka tiki iini, "Ka ömö'di eede, taalo rembe küdü, össe tadhonggoro na o'o sa taluna 'biiđi ma tefe ka 'di kiga? <sup>12</sup> Pupa yüđi Yaguub anangnga össe mo ungngo adakooye 'biiđi kide i'i nja laala tiya iini nja eema ma eriđö tiya iini, o'o nagii'bi Yaguub?"

<sup>13</sup> A Yasu tiki oono, "Ömö'di ya tooye 'biiđi ya ara tenege tagu i'i afe'de, <sup>14</sup> lakiini ömö'di yeede ka tinyi 'biiđi iini ooye ya, taalo tenege ka tagu i'i afe'de turi. A 'biiđi yeede ka tinya iini ya ara ta nduguli ma tefe ka 'di kini ka oona ta'billi."

<sup>15</sup> Aka tiki iini, "Nya 'biiđi ya a'a ömö'di eede, amang ka tenege tafa tagu a'a nafa tö'dö tügü 'biiđi kita."

<sup>16</sup> Iki oono, "Kolo tümmünü nyuri yüüđü na o'o sa ka tafada nöö'dö kita."

<sup>17</sup> Aka tiki, "Taalo nyuri eede."

A Yasu tiki oono, "Tumma dhorro eege kungngo üüđü ka teema a'da, 'Taalo nyuri üüđü,' <sup>18</sup> kudumma naganyori kada kannä küdü küdümümü, aya küdü 'bitingngö ya taalo nyuri yüüđü i'i ya miini a tumma tüüđü ka timin'da."

<sup>19</sup> Aka tiki, "Niji o'o kada ne'bi ömö'di eede. <sup>20</sup> Kafaafa ma ungngo kagüümümü Masala ka 'dikinya tammo, aaga na Yahüüđü no tiki a'da, Örsaliim 'buugu ma tümmü Masala kide."

<sup>21</sup> A Yasu tiki oono, "Amma ka tumma tanno eede aka, uuru kinggide aaga sa ka tümmü Pupa taalo ka 'dikinya tammo alla ka Örsaliim. <sup>22</sup> Aaga na ma Samira no kamma aaga ka niimö tiya ada ka titaalo kussu ya, ungngo na Yahüüđü no kümmü ungngo niimö yüđi ka tussu ya, kudumma toolona ka tö'dö ndama Yahüüđü. <sup>23</sup> Lakiini uuru kinggide kara sa köö'dö eege kungngo kandö'dö 'bitingngö a kadu na ümmü Masala timin'da no kasa ka tümmü Pupa a koronggore nja timin'da, eege kungngo ka kadu tanno ümmü Pupa ka asaasa eege no.

<sup>24</sup> Masala ma Koronggore, a kadu na ümmü oogo no, kümmöönö a koronggore dhorro."

<sup>25</sup> Aka tiki iini, "Nussu a'a a'da Almasiya (ana eere a'da Almasiihi) atö'dö. Kini

ka tö'dö ara tadirina eema ungngo in'dili kungngo."

<sup>26</sup> A Yasu tiki oono, "A'a nungngo neema nja o'o kungngo a'a namiini."

<sup>27</sup> Amussu kungngo ya ikiiri kadalaadene niini ka tafada, kaduna i'i ka teema nja aka kadhere. Lakiini taalo ömö'dii ana kene iki iini a'da, "Nasaasa o'o minna kono?" nja iini ka tiki a'da, "Neema o'o nja oono amana?"

<sup>28</sup> Aka tinyi see'de ma 'biiidü yoono ku'bu mara tapadaga co anya miki a kadu, <sup>29</sup> "Aaga kö'dö aaga tassa ka ömö'dii tiya adirina eema yeede ka tagalinggo ya nye'd'de kungngo. Taalo tanggaaga ta Almasiihi i'i ya miini?" <sup>30</sup> Kikiri ka öö'dö kürö ndama anya köö'dö ka kini.

<sup>31</sup> Kita miini kita ya, ikiiri kadalaadene ka tiki a Yasu, "Tatalaana agu eema."

<sup>32</sup> Ikiiri ka tiki eene, "Kuri ungngo eede ka kuri taalo aaga kussu i'i."

<sup>33</sup> Kikiri ka tindini ajeene kiki, "Ö'dö ömö'dii ana eema ma kuri iini?"

<sup>34</sup> A Yasu tiki eene, "Kuri yeede a'da nalinggo linggo na ömö'dii tiya agürünü a'a ya natuumö eege. <sup>35</sup> Taalo aaga kiki a'da, 'A nagatereene ka egiisö a kadu sa karaana'? Ara a'a tiki aaga, aaga afä'da iiye aaga tassa co nasigeene asa migile tarume masa ta'bassa ma tasaasa taradene. <sup>36</sup> A tataraana ma migile ara

ta'duga faana yiini, awagaana migile koonaa ma tefe ka 'dii ta'billi, ömö'dii ma siga tadhodho nja ömö'dii tiya araana ya. <sup>37</sup> A tumma na adiridene no tö'dö dhorro a'da, 'Ömö'dii öccö adinügi aya taraana.' <sup>38</sup> Nagürünü a'a aaga a'da aaga co tara migile ka siga tanno ada katitaalo kadhügürü iini no, ömö'dii könö agadhügürü iini aaga tara migile ma dhügürü tiya iini."

### *Kadu ma Samira kadhabbu kamma ka Masala*

<sup>39</sup> A kadu ma anya ma Samira kadhabbu kamma kini ka tumma tanno oono ka tirina eene no, kudumma oono miki a'da, "I'i ya tirina eema yeede ka tagalinggo ya nye'd'de kungngo." <sup>40</sup> A kadu ma Samira köö'dö kini kiki iini a'da, aneene nja eene, ikiiri ka taganeene nja eene afüngngö eera.

<sup>41</sup> A kadu na amma kini no tadhabbu kudumma eene kataföönyö tumma niini. <sup>42</sup> Kiki aka, "Taalo ungngo kamma kudumma iiidi ka taföönyö küdü sugi, lakiini ungngo kaföönyö, ungngo tadiinö kide ma eyi tiya iiidi unggodho ungngo, ungngo tussu a'da ömö'dii ya i'i ya Tatoolona ma kadu ma 'büdhülü timin'da."

### *Yasu oolona 'bii'bala*

<sup>43</sup> Ka Yasu ka ndiüyü füngngö eera ya, ikiiri ka tunggeene aco Jaliil. <sup>44</sup> (A Yasu ka eyi tiya iini iki a'da, "Taalo ne'bi asaasadene ka anya tammo iini.") <sup>45</sup> Kini ka ndala Jaliil ya, a kadu

miini tada'da i'i kudumma eene ka taganna ka Örsaliim ka Taanyara ma Tada'da ka Eriidö ma Yahüüdü kadadönö ka eema tiya iini ka tagalinggo ya ïn'dili kungngo.

<sup>46</sup> İkiri ka öö'dö ka Kaana ka Jaliil kita iini ka ta'bele 'biiđi kada ngeeli ya. Ömö'di ma Kafarnahööm ya alinggo nja uugaara ya, a 'bii'bala tiya iini ka tamaara. <sup>47</sup> İkiri ka föonyö a'da Yasu ö'dö ka Jaliil ndama Yahüüdiya ya, ikiri ka öö'dö kini, asaasa i'i a'da öö'dö ka Kafarnahööm oolona 'bii'bala yiini kini ka ndakete ka teyi.

<sup>48</sup> İkiri Yasu ka tiki iini, "Taalo aaga ka tamma illi aaga tiji türü nja eema keefe."

<sup>49</sup> İkiri ömö'di ka tiki iini, "Ka ömö'di eede, aayu ku'bu a'da üfürü 'bii'bala yeede teyi."

<sup>50</sup> İkiri Yasu ka tiki, "Unggeene! 'Bii'bala yüüdü efe ka 'dii." Ömö'di tamma ka tumma tanno Yasu unggeene. <sup>51</sup> Kini ka tunggeene ka fiinii ya, ikiri ka toreene nja kadu tanno alinggo nja iini no kiki iini, "'Bii'bala yüüdü adinö."

<sup>52</sup> İkiri ka tindini eege, "A'diila aada?"

Kiki iini a'da, "Ka ooso uuru ka teene, i'i yungngo a 'bürüdü ka taadha kini."

<sup>53</sup> A pupa ma 'bii'bala tagügi a'da tamana ya Yasu ka tiki iini a'da, "Adinö 'bii'bala yüüdü." İkiri ka tamma kini nja kadu ma 'dii tiya iini.

<sup>54</sup> Eema yiini ka tagalinggo a türü teera kini ka öö'dö ka Jaliil ndama Yahüüdiya.

## 5

### *Yasu oolona mügüre*

<sup>1</sup> Ka uuru tököönö, a Yasu tunggeene asirigö co Örsaliim ka taanyara ma Yahüüdü. <sup>2</sup> Ka Örsaliim kete ma inye ma kidheefele dhömbö inggide napese kiidümmü, a kadu ma Yahüüdü kümümü i'i a'da Beet Saiyda ya. <sup>3</sup> A kadu na maara no ka tinggini ma napese no, kisinsoro nja tanno sogo'do no nja namügüre [ka'dana ka 'biiđi a'da atingga'i'di.

<sup>4</sup> Kudumma tadhangga ma Uugaara ka ta'barda ka 'biiđi atingga'i'di. Ömö'di ya tafiri ka 'biiđi a'da atingga'i'di ya, ömö'di ya 'bardaga ka 'biiđi ya, ara toolonadene ka maara tammo agu i'i mo.]

<sup>5</sup> Ömö'di inggide akamaara a nagürüünü kukumu ömö'di kaco iisine kafünü kide iidümmü afünü iidoona. <sup>6</sup> Aga Yasu ka tasala i'i ka fungngö nggeege ya, ussu a'da illi ka maara, ikiri ka tiki iini, "Nasaasa o'o ta'diila?"

<sup>7</sup> Ömö'di ya maara ya tiki iini, "Ka ömö'di eede, taalo ömö'di ma ta'dinigi a'a co dhömbö a 'biiđi ka tatingga'i'di na a'a tasaasa co, ömö'di öccö tadhe a'a."

<sup>8</sup> İkiri Yasu ka tiki iini, "Fiki'dö na'duga sekede yüüdü nunggeene."

<sup>9</sup> Ömö'di tarooro ka'diila ka 'buugu miini kungngo

a'duga sekede yiini unggeene, a niïmö ya 'do agalinggo adene ka uuru ma Sa'bidi,<sup>10</sup> İkiri Yahüdü katiki ömö'di tiya oolonadene ya, "Uuru ma Sa'bidi seriye iki taalo o'o nama tümmü sekede yüdüyü kide."

<sup>11</sup> İkiri ka tiki eene, "Ömö'di ya nangnga a'a ka'diila ya iki a'da, 'Na'duga sekede yüdüyü nunggeene.'

<sup>12</sup> Kikiri ka tindini i'i, "Mada i'i yungngo iki o'o a'da na'duga sekede yüdüyü nunggeene?"

<sup>13</sup> Ömö'di taalo ussu mada i'i ya miini, kudumma Yasu ka talugu ka kadu tanno dhabbu no ka teene. <sup>14</sup> Keere kungngo ya, a Yasu taluna i'i ka la ma Masala iki iini, "O'o 'bitingngö sa o'o ta'diila, fa co talinggo eema ya toroko ya, ii'di niïmö tagu o'o dhindho." <sup>15</sup> İkiri ömö'di ka tunggeene acoadirina eema a Yahüdü a'da Yasu i'i yungngo anangnga i'i ka'diila.

### Tefe ka 'dii a 'Bii'bala

<sup>16</sup> İkiri Yahüdü ka talinggo Yasu 'do kudumma iini ka tünni tumma no ka uuru ma Sa'bidi. <sup>17</sup> İkiri Yasu ka tiki eene, "Pupa yeede alinggo a naganuuru na a'a talinggo afa miini kungngo." <sup>18</sup> A Yahüdü takogoona ma tasaasa tiidi Yasu, taalo kudumma iini kanu ka tumma ma Sa'bidi sugi, lakiini i'i iki afe'de a'da Masala a Pupa tiya iini ümmü eyi yiini kada köje nja Masala.

<sup>19</sup> İkiri Yasu ka tiki eene, "Ara a'a tadırina tumma aaga dhorro, taalo 'Bii'bala ma tambaanya talinggo niïmö unggodho i'i, alinggo eema yiini ka adinö ka Pupa tiya iini ka talinggo ya, a niïmö ya Pupa ka talinggo ya ara 'Bii'bala talinggo afa miini kungngo. <sup>20</sup> Yungngo a Pupa ka asaasa 'Bii'bala alaala i'i ka eema tiya iini ka talinggo ya in'dili. Nggeege ara aaga tadhere kini kara tala eema iini dhabbu adagii'bi ya. <sup>21</sup> Afa ma Pupa ka tinci kadu ka inde amana eege keefe ka 'dii, a 'Bii'bala tamana tefe ka 'dii ömö'di tiya iini ka asaasa tanangnga iini ya. <sup>22</sup> A Pupa taalo a tümmü kadu ka eyi tiya iini, kudumma iini ka tümmünü tauugaara a 'Bii'bala. <sup>23</sup> Amang ka kadu nye'd'de tafünügü 'Bii'bala ko'do afa meene katafünügü Pupa ko'do, a ömö'di ya taalo afünügü 'Bii'bala ko'do ya, i'i taalo atafünügü Pupa ya agürünü i'i ya.

<sup>24</sup> "Tumma dhorro eede ka tadırina aaga, ömö'di ya föonyö tumma neede amma ka ömö'di tiya agürünü a'a ya, ataluna tefe ka 'dii ta'billi taalo a tahükümüdene, kudumma iini ata'da ka inde aco ka tefe ka 'dii. <sup>25</sup> Tumma dhorro eede ka tirina aaga, uuru kinggide kassa ka öö'dö eege kandö'dö 'bitingngö, a kadu na aaya no kassa ka föonyö tumma na 'Bii'bala ma Masala, ömö'di ya toodo kini ya a tefe ka 'dii. <sup>26</sup> Afa

ma Pupa ka eefe ka 'dī ka eyi tiya iini, i'i anangnga tefe ka 'dī a 'Bii'bala ka eyi tiya iini.  
 27 Ümmünü tauugaara iini ka nüüsö ma tümmü kadu, kudumma iini kada 'Bii'bala ma Tadü'd'dü.

28 "Aaga fa tadhere ka tumma tanno, uuru kinggide kassa ka öö'dö a kadu no ka naala ma oofo no kassa ka föönyö tumma niini nye'd'de kungngo,  
 29 a kadu na kalinggo eema ya a'diila ya, kafiki'dö ndama inde kaco ka tefe ka 'dī, a kadu na linggo tatoroko no kafiki'dö ndama inde kaco ka hetti.  
 30 Taalo a'a nara tambaanya tüüni nüümö ndama eyi tiya eede, a'a nüünä afa meede ka aföönyö ya, tahükümü neede ka dhorro taalo üünü ada kadu ku'bu, kudumma eede taalo nasaasa nüümö ma eyi tiya eede, lakiini tasaasa ma eyi tiya ömö'di tiya agürünü a'a ya.

### *Teema tumma ma Yasu*

31 "Eede ka tageema tumma ma eyi tiya eede, ara tumma neede tagatoroko.  
 32 Ömö'di öccö inggide eema tumma ka üüdü ma a'a, nussu a'a a'da tumma niini ka teema ma a'a no ka dhorro.

33 "Kagürünü aaga kadu ka Yühanna, adagadünnü tumma na dhorro no.  
 34 Taalo a'a namma ka tumma tanno kadu, lakiini a'a neema tumma no ada amang kada toolonadene.  
 35 Yühanna aga lamba tammo afinne ma öyeene mo, aaga tasaasa tadhodho

a töyeene tanno iini ana ndanaaya ka unggodho.

36 "Tumma ma a'a kadhabbu a tanno Yühanna. Kudumma linggo tanno Pupa ka tanangnga a'a a'da natüümö no, eege kungngo eede ka talinggo eema a'da Pupa agagürünü a'a.  
 37 A Pupa ya agürünü a'a ya ka eyi tiya iini, ageema tumma ma a'a. Taalo aaga kaföönyö 'bugeyi yiini alla aaga tadinö ka oona tanno iini,  
 38 a tumma niini titaalo ada ka nanggeedi, kudumma ada ka titaalo kamma ka ömö'di tiya iini ka agürünü ya.  
 39 Aaga tüüri kasorne kudumma ada katiki kide a'da tefe ka 'dī ta'billi kinggide, lakiini eege kungngo keema tumma ma a'a,  
 40 lakiini aaga taalo kasaasa tö'dö kede amang kada taluna tefe ka 'dī.

41 "Taalo a'a narangnga tafününja ko'do ka kadu,  
 42 kudumma eede ka tussu aaga. Nussu a'da tasaasa ma Masala kitaalo ada ka nanggeedi.  
 43 Nö'dö a'a ana eere ma Pupa tiya eede, aaga taalo kamma kede, lakiini ka ömö'di tököönö ka tö'dö ana eere tiya iini ya, ara aaga tamma kini.  
 44 Ara aaga tamma nya ada ka tafünügü njaana ko'do unggodho aaga, lakiini taalo aaga kasaasa takardha ku'bu aaga taluna tafünügünja ko'do na ö'dö ndama Masala tammo unggodho mo?

45 "Aaga fa tiki kide a'da ara a'a tasigi aaga kidha ma Pupa. Ömö'di ya ara tasigi aaga ya inggide, Müüsa

yaada ka takikii ïïye iini ko'do ya a'da i'i ara tasigi aaga.<sup>46</sup> Kada ka tagamma ka Müüsa ya, ara aaga tagamma kede, kudumma iini ka tarigiri ada ka sorne ma a'a.<sup>47</sup> Lakiini kada katitaalo kamma ka tumma tanno iini ka tarigiri no 'dee, ara aaga tamma ka tumma tanno eede nya?"

## 6

*Yasu anangnga kuri a kadu na alif ka üidümmü*

(Matta 14.13-21; Murkus 6.30-44; Lüüka 9.10-17)

<sup>1</sup> Ndama kanna a Yasu tadigaala ka to ma Jaliil (mana eere a'da to ma Tabariya mo), <sup>2</sup> a kadu turna i'i keere kadhabbu, kudumma eene ka tadinö ka türü tanno iini ka tünni oolona kadu na maara no. <sup>3</sup> A Yasu tasirö 'ba'dakinya, emmi i'i nja kadalaadene tanno iini. <sup>4</sup> A uuru ma Taanyara ma Tada'da ka Eriidö ma Yahüdü kanda kete. <sup>5</sup> İkiri Yasu ka laga ïïye ko'do asala kadu ka tunggunu kini kadhabbu, ikiri ka tiki a Filibüs, "Ara anangnga tana kuri kiga ma tanangnga a kadu tanno kaguri?" <sup>6</sup> I'i atiraana nggeege ma ta'b'ba Filibüs ka eedi, a'da illi ka tussu niimö yiini ka talinggo ya.

<sup>7</sup> İkiri Filibüs ka tiki iini, "Kaja ka tana miteene ana miya jine keera\* taalo mara ta'dimo ka ömö'dü unggodho

ara taluna 'bandamiteene id-hilli."

<sup>8</sup> A tatalaadene yiini öccö ya ana eere a'da Andraws örre ya Samaan Bütrüs tiki iini,<sup>9</sup> "'Bii'bala ungngo kita a miteene ma sayeer ma ungngo iini müidümmü a kilöögö keera, illi eege taalo kara ta'dimo ka kadu tanno in'dili no?"

<sup>10</sup> İkiri Yasu ka tiki eene a'da, "Aaga nangnga kadu ka temmi." A 'buugu ya miini ya ooyo inggide dhabbu a kadu temmi kide a kadu na nagiide no kö'dö na alif kridümmü. <sup>11</sup> İkiri Yasu ka tadhifi namiteene anangnga ta'dila a Masala adakinaana ka kadu ku'bu tamana ya ma ta'dimo kene ya a tagalinggo a kilöögö tanno eera no nggeege.

<sup>12</sup> A kene ka ndüüsü ya, ikiri ka tiki a kadalaadene tanno iini, "Aaga wa-gaana türeene miini koona öccö tafa taama."<sup>13</sup> Kadagawaana türeene ma miteene ma sayeer müidümmü ma kadu ka taguri, kadigi nasinggili kada'baaga kafünü eera.

<sup>14</sup> Aga kadu katassa ka türü tanno Yasu ka tagalinggo no kiki a'da, "Tumma dhorro, ne'bi ya ara tö'dö ka 'büdhülü ya i'i yungngo."<sup>15</sup> A Yasu tussu a'da eege ka asaasa tümmü i'i kanangnga i'i ka tauugaara a rüsü, ikiri ka taculu unggodho i'i asirö anya.

\* **6:7** 6.7 Jine ya miini ya i'i ya ma linggo ma uuru unggodho.

*Yasu unggeene ka 'büüdi  
(Matta 14.22-27; Murkus  
6.45-52)*

<sup>16</sup> Ka 'buugu kanda siiya, a kadalaadene niini ta'barda ka to ma Jaliil, <sup>17</sup> kaka ka mürkabü kadigaala ma co Kafarnahööm a 'buugu tooso a'da taalo Yasu ala eege koona. <sup>18</sup> İkiri tanya ka tüüsö dhindho a to co kamuli muli. <sup>19</sup> Kene ka ndarmuna 'buugu tamana ma nameele kiidoona alla ka egiisö kasala Yasu ka tunggeene ka 'büüdi unggunu ka mürkabü ari'ba tümmü eege. <sup>20</sup> İkiri ka tiki eene, "A'a namiini aaga fa tari'ba." <sup>21</sup> Kikiri ka asaasa tamünüğü i'i ka mürkabü, a mürkabü tarooro ka ala 'buugu yeene ka tunggunu co ya.

<sup>22</sup> Aga taka kandaadha a kadu na kanna ka nda'da ma to no, kussu tumma mürkabü ka taganna kide ma unggodho, a Yasu taalo aka kide nja kadalaadene tanno iini, lakiini kunggeene unggodho eege. <sup>23</sup> Lakiini namürkabü könö kö'dö ndama Tabariya köödhü ka tinggini ma to kita eene ka tagu miteene kide, ka Yasu ka tanangnga ta'diila a Masala kide ya. <sup>24</sup> A kadu kandussu a'da Yasu taalo kanna alla kadalaadene niini kikiri ka taka ka namürkabü kaco tawwa 'buugu ma Yasu ka Kafarnahööm.

*Yasu a miteene ma tefe ka 'di*

<sup>25</sup> Kene kaduna i'i ka nda'da ma to kiki iini, "Ka Tatalaana, nö'dö o'o kita aada?"

<sup>26</sup> A Yasu tapadaga tumma eene iki, "Ara a'a tadirina tumma aaga dhorro, taalo aaga kawwa 'buugu ma a'a kudumma ada katadönö ka eema tiya eede ka tagalinggo keefe ya, lakiini kudumma ada ka tagu miteene aaga tüüsü. <sup>27</sup> Aaga fa talinggo a kuri tiya ara titaalo ya, lakiini a kuri tiya ara tüütü ka tefe ka 'di ta'billi ya, ya 'Bii'bala ma Tadü'd'dü kara tanangnga aaga. Kudumma Masala ma Pupa mo mabünnü hitimi yoono kini ka oona ussudene."

<sup>28</sup> Kiki iini, "Ara ungngo talinggo eema ya Masala ka asaasa ya nya?"

<sup>29</sup> A Yasu tapadaga tumma eene, "Lingga na Masala eege kungngo ömö'dü ya Masala ka agürünü i'i ya, i'i yungngo Masala ka asaasa aaga tamma kini."

<sup>30</sup> Kikiri ka tindini i'i, "La türü ungngo amang kidi tassa kide ungngo tamma küdü. Ara o'o talinggo minna? <sup>31</sup> Kafaafa ma angnga kagu alman ka dhüle afa ma tiya sorne ka tiki ya kungngo, 'I'i anangnga miteene eene ndama 'dotombo'do kadaguri.'"

<sup>32</sup> A Yasu tiki eene, "Ara a'a tadirina tumma aaga dhorro, taalo Müüsa i'i yungngo amana miteene

aaga ndama 'dotombo'do. Pupa yeede unggodho i'i yungngo amanaga miteene ma dhorro mo aaga ndama 'dotombo'do. <sup>33</sup> Miteene ma Masala oogo mö'dö ku'bu ndama 'dotombo'do manangnga tefe ka 'dii a kadu ma 'büdhülü."

<sup>34</sup> Kiki iini, "Tatalaana, amana miteene miini mo unggno 'bücca kungngo."

<sup>35</sup> İkürü Yasu ka tiki eene, "A'a nungngo na miteene ma tefe ka 'dii, ömö'dii ya tö'dö kede ya taalo iire tagu i'i, aya tamma kede ya taalo tenege ka tagu i'i turi. <sup>36</sup> Lakiini afa meede ka takiki aaga, kadınö aaga kede aaga sa kitaalo kamma. <sup>37</sup> Ömö'dii ya Pupa ka tümmünü i'i a'a ya amma kede, ömö'dii ya ö'dö kede ya taalo a'a nara tapadaga i'i ku'bu. <sup>38</sup> Kudumma eede taalo nö'dö ku'bu ndama 'dotombo'do ma tö'dö talinggo linggo ma eyi tiya eede, lakiini a'a nö'dö talinggo linggo na ömö'dii tiya agürünü a'a ya. <sup>39</sup> A niimö ya ömö'dii tiya agürünü a'a iini ya a'da natafa ka kadu tanno oono ka anangnga a'a no kaama, lakiini niji eege ka inde nye'd'de kungngo ka uuru ma tafiki'dö ka uuru na eere no. <sup>40</sup> A tumma na Pupa tiya eede ka asaasa no eege kamiini, ömö'dii ya tasala ka 'Bii'bala amma kini ya ataluna tefe ka 'dii ta'billi ara a'a ta'dina i'i ko'do ka uuru tanno eere no."

<sup>41</sup> A Yahüdü ta'digineene kudumma Yasu ka tiki a'da, "A'a na miteene tammo ö'dö ku'bu ndama 'dotombo'do mo." <sup>42</sup> Kiki, "Taalo Yasu ya 'bii'bala tiya Yüüsif sa? Assa tiki 'bitingngö a'da i'i öö'dö ndama 'dotombo'do nya?"

<sup>43</sup> A Yasu tiki eene, "Aaga fa tisaana ka oona unggodho aaga. <sup>44</sup> Taalo ömö'dii a tö'dö kede illi Pupa ya kürünü a'a ya, ka tuurugu i'i a'a, nanangnga i'i ka fiki'dö ka uuru tanno eere no. <sup>45</sup> Ikirinja ka sorne ma nagane'bi, 'A'da ara Masala talaana eege nye'd'de.' Ömö'dii ya föonyö tumma na Pupa ussu iini ya ö'dö kede. <sup>46</sup> Taalo ömö'dii öccö adinö ka Pupa, illi ömö'dii ya ö'dö ndama Masala ya i'i yungngo adinö ka Pupa. <sup>47</sup> Ara a'a tadirina tumma aaga dhorro, ömö'dii ya amma kede ya a taluna tefe ka 'dii ta'billi.

<sup>48</sup> A'a na miteene ma tefe ka 'dii. <sup>49</sup> Kafaafa ma aaga kagu alman ka dhüile kaaya. <sup>50</sup> Lakiini ömö'dii ya agu miteene ma ö'dö ku'bu ndama 'dotombo'do mo, taalo ara teyi. <sup>51</sup> A'a nungngo na miteene ma tefe ka 'dii ma öö'dö ku'bu ndama 'dotombo'do mo. Ömö'dii ya tagu miteene mo ya eefe ka 'dii ta'billi. A miteene meede ka tanangnga iini mo, tuu'da neede eege kamiini, neede ka öö'dö iini ma kadu ma 'büdhülü keefe ka 'dii iini."

<sup>52</sup> A Yahüdü tisaana ka oona unggodho eege

dhindho kiki, "Ara ömö'dü ya tanangnga tuu'da niini angnga taguri nya?"

<sup>53</sup> İkiri Yasu ka tiki eene, "Ara a'a tadirina tumma aaga dhorro, kada katitaalo kagu tuu'da na 'Bii'bala ma Tadü'ddü aaga tooye eriidö yiini ya, taalo aaga kataluna tefe ka 'dii. <sup>54</sup> Lakiini ömö'dü ya agu tuu'da neede adakooye eriidö yeede ya ara tefe ka 'dii ta'billi, ara a'a tiji i'i ka inde ka uuru na eere no. <sup>55</sup> Tuu'da neede eege kungngo kuri tiya dhorro ya, eriidö yeede i'i yungngo ama tooyedene dhorro. <sup>56</sup> Ömö'dü ya agu tuu'da neede adakooye eriidö yeede ya amma'da kede a'a tamma'da kini. <sup>57</sup> Afa ma Pupa tiya efe ka 'dii ya ka kürünü a'a na a'a tefe ka 'dii kudumma Pupa, ömö'dü ya agu a'a ya, ara tefe ka 'dii kudumma a'a. <sup>58</sup> Miteene ma ö'dö ku'bu ndama 'dotombo'do mo oogo mungngo. Kafaafa ma aaga kagu alman kaaya, lakiini ömö'dü ya agu miteene mo ara tefe ka 'dii ta'billi."

<sup>59</sup> Yasu adiri tumma no kini ka tagalaana kadu ka la ma talaana ka Kafarnahööm.

*Tumma ma tefe ka 'dii ta'billi*

<sup>60</sup> A kadalaadene niini kadhabbu kaföonyö tumma no kiki, "Kiideene tumma no 'do, mada i'i yungngo a tamaanya tatoodo ka tumma tanno?"

<sup>61</sup> A Yasu tussu a'da kadalaadene niini keemaana

ka oona ikiri ka tiki eene, "Kiideene tumma no ana aaga?" <sup>62</sup> Ara tafaanya ada ka tiji 'Bii'bala ma Tadü'ddü ka tasirigö co a 'buugu tiya iini ka öö'dö ndama iini ka dhidha ya? <sup>63</sup> Koronggore ya Masala i'i yungngo amana tefe ka 'dii a kadu illi tuu'da taalo ka talingga niimö, tumma neede ka tirina aaga no Koronggore i'i ya miini nja tefe ka 'dii. <sup>64</sup> Lakiini kadu könö kungngo ada ka söödö taalo kamma." Yasu iki nggeege kudumma iini ka tagilli ka tagussu ka dhidha a'da kadu kinggide taalo kamma kini, ussu a'da mada i'i yungngo atümmünü i'i a kadu ngo. <sup>65</sup> İkiri ka tiki, "I'i yungngo eede ka tiki aaga a'da taalo ömö'dü ma tö'dö kede illi a türü tanno Pupa tiya eede."

<sup>66</sup> Ndama uuru tanno miini no a kadalaadene niini kadhabbu kapadaga oona keere taalo kunggeene nja iini. <sup>67</sup> İkiri Yasu ka tiki a kadalaadene tanno iini na ö'dö kada'baaga kafünü eera no, "Aaga tekere taalo aaga kasaasa tunggeene?"

<sup>68</sup> İkiri Samaan Bütrüs ka tiki iini, "Ka Uugaara, ara ungngo co ka mada a'da tumma ma tefe ka 'dii ta'billi kungngo üdü?" <sup>69</sup> Kamma ungngo katussu a'da o'o na ömö'dü ma Masala ya Insili ya."

<sup>70</sup> İkiri Yasu ka tiki eene, "Taalo a'a nungngo nagesse aaga na ada'baaga kafünü eera no?" Lakiini ömö'dü ungodho ana kada,

Ebliisi." <sup>71</sup> (I'i eemaga ka Yahüüsa 'bii'bala ya Samaan Askaryüütü ko'do, kudumma iini i'i yungngo ara atümmünü i'i a kadu a'da i'i ka eyi tiya iini ama kadalaadene tanno ö'dö kada'baaga kafünü eera no.)

## 7

### *Yasu nja nagöre tanno iini*

<sup>1</sup> Ndama tiya miini ya a Yasu takunggunaana ku'bu ka Jaliil, i'i taalo asaasa tunggeene ka Yahüüdiya, kudumma Yahüüdü kasaasa tiidi i'i. <sup>2</sup> Ka uuru ma Taanyara ma nagangga ma Yahüüdü ka ndakete ya, <sup>3</sup> ikirri nagöre niini ka tiki iini, "Unggeene kita naco Yahüüdiya amang ka kadalaadene tanno üdü tadönö ka eema tiya üdü ka talinggo ya. <sup>4</sup> Taalo ömö'di ma talinggo nüümö ka küdhü assa ka asaasa kadu ka tussu i'i. Üürü o'o nalinggo eema ya, la eyi yüdü a kadu in'dili." <sup>5</sup> Nagöre niini ka eyi tiya eene taalo kagamma kini.

<sup>6</sup> İkirri Yasu ka tiki eene, "Küfürü uuru neede tö'dö, lakiini aaga ya, naganuuru na in'dili no naada egee kamiini. <sup>7</sup> Taalo kadu ma 'büdhülü kakirimi aaga, lakiini egee kakirimi a'a kudumma eede ka teema ka tatoroko tanno eene. <sup>8</sup> Agolo ka taanyara, taalo a'a nara co ka taanyara tanno, kudumma uuru tanno eede küfürü tö'dö." <sup>9</sup> Iki eene nggeege ara ka tüütü ka Jaliil.

<sup>10</sup> Aga nagöre tanno iini ka tunggeene ka co ka taanyara ya, ikirri ka taculu aaco eene keere taalo 'biini. <sup>11</sup> A Yahüüdü tagawwa 'buugu miini ka taanyara kindini ajeene kiki a'da, "Inggiga sii?"

<sup>12</sup> A kadu takayaaya ajeene kini ko'do, a könö tiki, "I'i ömö'di a'diila." Anno tiki, "Kaw i'i aga'da kadu ka nanggüüdü iisini eege."

<sup>13</sup> Taalo ömö'di ma teema tumma miini 'büni kungngo kudumma eene kari'ba a naguugaara ma Yahüüdü.

### *Yasu alaana kadu ka uuru ma taanyara*

<sup>14</sup> Aga taanyara ka ndadhidi miini ya, ikirri Yasu ka tunggeene aaco la ma Masala alaana kadu. <sup>15</sup> A Yahüüdü tadhere kiki, "Ussu tumma ka kasorne nya a'da taalo akalaanadene?"

<sup>16</sup> İkirri Yasu ka tiki eene, "Talaana neede taalo ndama a'a lakiini ndama ömö'di tiya agürünü a'a ya.

<sup>17</sup> Ömö'di ya asaasa talinggo tumma na Masala ya, ara tussu a'da talaana neede no kö'dö ndama Masala alla a'a neema ndama eyi tiya eede. <sup>18</sup> Ömö'di ya eema tumma ma eyi tiya iini ya, i'i ya asaasa tümmü eyi yiini ka tidhindhi, lakiini ömö'di ya ümmü ömö'di ya agürünü i'i ka tidhindhi ya, i'i adünnü tumma timin'da taalo korokoro kide.

<sup>19</sup> Taalo Müüsa i'i yungngo anangnga seriye aaga? Lakiini taalo ömö'di ungodho ana kada ümmü

seriye. Minna agu aaga aaga tasaasa tiidi a'a?"

<sup>20</sup> A kadu nye'd'de tiki iini, "Na'bu ungngo üüdü ka oona. Mada asaasa tiidi o'o 'bitingngö?"

<sup>21</sup> İkiri Yasu ka tiki eene, "Nagalinggo a'a türü ka unggodho, aaga tadhere nye'd'de kungngo. <sup>22</sup> Müusa iki aaga a'da aaga taradene, a'da taalo taradene na Müusa eege kamiini, lakiini kö'dö ndama kafaafa, aaga tara 'bii'bala ka uuru ma Sa'bidi. <sup>23</sup> A kada kara tara laala ka uuru ma Sa'bidi amang kada tafa taga'da tumma na Müusa, minna agu aaga aaga tagoroo'bo nja a'a a'da a'a noolona ömö'dü ka uuru ma Sa'bidi nya? <sup>24</sup> Aaga fa tümmü niimö ndama kürö miini aaga tümmü niimö ndama teene miini ya adho ka fiini ya."

*Yasu 'dee i'i ya Almasihi?*

<sup>25</sup> A kadu ma Örsaliiim könö tiki, "Taalo ömö'dü ya kadu kasaasa tiidi i'i ya i'i yungngo? <sup>26</sup> Aaga assa kini ka teema ka kadu kidha 'biinii kungngo kitaalo kindini i'i. Alla naguugaara kandussu dhorro a'da Almasihi i'i ya miini? <sup>27</sup> Lakiini kussu ungngo kita ömö'dü tiya ka öö'dö ndama iini kita ya, lakiini Almasihi kara tö'dö ya taalo ömö'dü ma tessu a'da ö'dö ndama kiga?"

<sup>28</sup> İkiri Yasu ka alneege ko'd'do kini ka talaana kadu ka la ma Masala iki,

"Kussu aaga a'a aaga tessu a'da nö'dö a'a ndama kiga, taalo a'a nö'dö ndama eyi tiya eede, lakiini ömö'dü ya agürünü a'a ya i'i yungngo adhorro. Aaga taalo kussu i'i, <sup>29</sup> illi a'a nussu i'i kudumma eede ka öö'dö ndama iini, i'i yungngo agürünü a'a."

<sup>30</sup> Kikiri ka asaasa tümmü i'i, illi ömö'dü ma tümmünü niisö iini ka oona itaalo, kudumma uuru tanno iini ka üfürü tö'dö. <sup>31</sup> Illi kadu kungngo kaköje ka teene kadhabbu kamma kini kiki, "Almasihi ka tö'dö 'dee ara talingga eema kadhabbu keefe ii'bi ömö'dü ya?"

<sup>32</sup> İkiri naFariisi ka föönyö a kadu kayaaya ajeene ka Yasu ko'do ma eema tiya. İkiri naguugaara ma ka'boge nja naFariisi kagürünü nasi-gira ma la ma Masala ma co tümmü i'i. <sup>33</sup> İkiri Yasu ka tiki eene, "Ara a'a tagünü nja aaga idhilli, na a'a saga tunggeene naco ka ömö'dü tiya agürünü a'a ya. <sup>34</sup> Ara aaga sa katawwa 'buugu ma a'a aaga taalo ka taluna a'a koonaa, a 'buugu yeede kara co ya, taalo aaga katambaanya tö'dö kide."

<sup>35</sup> İkiri Yahüüdü ka teemaana ka oona unggodho eege, "Ömö'dü ya asaasa co kiga angnga taalo kara taluna i'i? Ara co 'buugu tiya kadu tanno aja kadanna kide kasana njaana ku'bu ka kadu ma Yünan ka teene alaana kadu ma Yünan? <sup>36</sup> Minna iini ka teema a'da,

'Ara aaga tawwa a'a taalo aaga ka taluna a'a, a 'buugu yeede ka co ya taalo aaga katambaanya tö'dö kide?"

<sup>37</sup> Ka uuru ma taanyara tanno eere no na idhindhü no, ikirü Yasu ka fiki'dö alneege ko'd'do iki, "Ömö'dü ya tenege kagu i'i ya öö'dö kede ooye. <sup>38</sup> Ömö'dü ya amma kede ya afa ma Sorne ka tiki, 'Ara nduguli ma 'biidü ma tefe ka 'dü tiisö kini ka eedi.' <sup>39</sup> Nggeege i'i eema tumma ma Koronggore ma kadu tanno amma kini kara sa köö'dö tamma, kudumma uuru tanno miini no taalo Koronggore agananja eene, kudumma iini ka üfürü taga'duga tidhindhi.

<sup>40</sup> Ka taföönyö tumma niini, a kadu könö kiki, "Ömö'dü ya i'i ya ne'bi dhorro."

<sup>41</sup> A kadu könö tiki a'da, "I'i ya Almasiihi."

A könö tüütü ka tindineene, "Ara Almasiihi tö'dö ndama Jaliil nya? <sup>42</sup> Taalo Sorne iki a'da Almasiihi ara tö'dö ndama laala tiya Dawud, ndama Beetlaham anya ma Dawud?" <sup>43</sup> A kadu tasümünü njaana ku'bu kudumma Yasu. <sup>44</sup> A kadu könö tasaasa tümmü i'i, illi ömö'dü ma taada i'i ka oona kungngo taalo.

*Naguugaara ma Yahüüdü taalo kamma ka Yasu*

<sup>45</sup> A nasigira ma la ma Masala tapadaga ka naguu-gaara ma ka'boge nja naFariisi, a kadu na miini no tiki

eene, "Minna agu aaga taalo kö'dö ana i'i?"

<sup>46</sup> İkirü nasigira ka tapadaga tumma eene kiki, "Taalo ömö'dü ma tageema tumma afa ma tanno jiddi ma 'billi."

<sup>47</sup> İkirü naFariisi ka tiki eene, "İisini aaga afe'de?

<sup>48</sup> Taalo ömö'dü inggide ung-godho ana ka naguugaara nja naFariisi amma kini?

<sup>49</sup> Lakiini kadu na in'dili no taalo kussu seriye ya Müüsa ka öö'dö iini, eege kungngo linggi kagu eege."

<sup>50</sup> İkirü Niködimus ya ta'ba ma naFariisi ya, agöö'dö ka Yasu ka dhidha ya ka tindini eege, <sup>51</sup> "Seriye yaaja 'dee ümmü ömö'dü a'da taalo ageema tumma, angnga taföönyö angnga tussu nüümö yiini ka tagalinggo ya?"

<sup>52</sup> Kiki iini, "O'o no ma Jaliil afe'de sa? İri ka sorne, taalo aaga ka taluna ne'bi ma tö'dö ndama Jaliil."

<sup>53</sup> [A kadu tikirü ka tunggeene ka unggondho kaco nöö'dü tanno eene.

## 8

*Aka ma temelö mo*

<sup>1</sup> Lakiini Yasu unggene aco Anya ma 'Dikidiyö.

<sup>2</sup> Afada litakka so'd'do kungngo öö'dö ka la ma Masala, ikirü kadu ka öö'dö kini nye'd'de kungngo emmi alaana eege. <sup>3</sup> İkirü naFariisi nja katalaana ma seriye köö'dö ana aka a kadu katümmü oogo ka afüngngö

nja ömö'dü, kanangnga oogo ka 'dïngnge kene kidha,<sup>4</sup> kikirii ka tiki iini, "Ka tatalaana, aka mo mümmü adene ka füngngö nja ömö'dü.<sup>5</sup> A Müüsa iki ka serïye tiya iini a'da, aka afa ma tammo, maridene a niigisi. A 'bitingngö niki o'o nya?"<sup>6</sup> Eege kadiri tumma no meene kasaasa tawwa i'i ka eyi, amang kene tasigi i'i. Illi Yasu iti ku'bu arigiri ka 'büdhülü a 'baniisö.

<sup>7</sup> Kene kandakogoona ma tindini i'i 'do ya, ikirii ka fiki'dö iki eene, "Ömö'dü ya üfürü tagüuni tatoroko ya a'duga misi iiri oogo iini ka dhidha."<sup>8</sup> Afada iti ku'bu arigiri ada ka 'büdhülü.<sup>9</sup> A kene kandaföonyö tumma no ya, a modolo tümmü eege karooro katanculu ka ung-gondho kunggeene na iifi no ka dhidha, anno idhiidhi no turna eege keere a Yasu tüütü unggodho i'i aka tüütü ka 'dïngnge ana ko'do ka 'buugu tiya oono.<sup>10</sup> İkirii Yasu ka ta'diniga oona ko'do iki oono, "Ka aka, kadu na ö'dö ana o'o no kiiye? Taalo ömö'dü ma tümmü o'o ana kene?"

<sup>11</sup> Miki, "Kaw, taalo ömö'dü Uugaara."

İkirii Yasu ka tiki oono, "A'a tekere taalo a'a natüuni niimö ana o'o, unggeene nafa co tüünü tatoroko no afe'de."]

*Yasu i'i ya töyeene ma 'büdhülü*

<sup>12</sup> A Yasu tageema nja eene afe'de iki, "A'a nungngo

na töyeene ma 'büdhülü. Ömö'dü ya uurna a'a keere ya, taalo atunggeene ka ndüüli a taneene a töyeene ma tefe ka 'dü koona."

<sup>13</sup> İkirii naFariisi ka tiki iini, "Neema o'o tumma ma eyi tiya üdü, taalo tumma nüüdü ka dhorro."

<sup>14</sup> A Yasu tiki eene, "Üürü a'a neema a'a tumma ma eyi tiya eede, tumma neede ka tatimin'da, kudumma eede nussu a'a a'da a'a nö'dö ndama kiga, nussu 'buugu yeede kara co ya. Lakiini aaga taalo kussu kita eede köö'dö ndama iini ya, aaga titaaloo kussu 'buugu yeede kara co ya.<sup>15</sup> Kürii aaga tuu'da ma ömö'dü ndama kürö ün'dügängö illi a'a taalo nalinggo nggeege ana eege.

<sup>16</sup> Kede ka tümmü kadu ya, ara tümmü adene neede ta timin'da, kudumma eede taalo a'a nalinggo unggodho a'a, lakiini a'a na'dïngnge nja Pupa tiya agürünü a'a ya.

<sup>17</sup> Katarigirinja ka Serïye tiya ada, kadu keera ka tadinö ka niimö a tatimin'da.

<sup>18</sup> A'a nungngo neema tumma ma eyi tiya eede, a Pupa yeede ya agürünü a'a ya, i'i ussu tumma neede afe'de."

<sup>19</sup> Kikirii ka tiki iini, "Pupa yüdü i'i ikiye?"

A Yasu tiki eene, "Taalo aaga kussu a'a alla aaga taalo kussu Pupa yeede. Kada kadussu a'a ara aaga tagussu Pupa yeede afe'de."

<sup>20</sup> Yasu adiri tumma no a'da

ungngo akete ka 'buugu ma tonso gürüüsü ka la ma Masala iini ka talaana kadu. Taalo ömö'dü ma tümmü i'i kudumma uuru tanno iini ka üfürü tö'dö.

*Yasu eema nja Yahüüdü*

<sup>21</sup> İkirī Yasu ka tiki eene afe'de, "Ara a'a tunggeene, aaga sa katawwa 'buugu ma a'a, aaga taaya ka tatoroko tanno ada. A 'buugu yeede kara co ya taalo aaga ka tambaanya tö'dö kide."

<sup>22</sup> İkirī Yahüüdü ka tiki, "T'i a tiidi eyi yiini? Kudumma iini ka tiki, 'Kita eede ka co taalo aaga ka tambaanya tö'dö kide'?"

<sup>23</sup> Iki eene, "Aaga kama ta'buugu kita, lakiini a'a nö'dö ndama fiinii ma ndanaaya aaga kama 'büdhülü tiya, a'a taalo nama 'büdhülü tiya. <sup>24</sup> I'i yungngo eede ka tiki aaga a'da, ara aaga taaya ka tatoroko tanno ada, kada katitaalo kamma kede a'da a'a namiini."

<sup>25</sup> Kikirī ka tiki iini, "O'o na mada?"

A Yasu tiki, "Nagadirina a'a aaga ka dhidha. <sup>26</sup> Tumma kungngo eede kadhabbu eede ka teema napusu aaga iini. Lakiini ömö'dü ya agürünü a'a ya tumma niini ka timin'da, a nüümö yeede ka taföönyö kini ya nadirina a kadu."

<sup>27</sup> Kitaalo kussu a'da Yasu eema tumma ma Pupa tiya iini. <sup>28</sup> İkirī ka tiki eene, "Kada ka ta'diniga 'Bii'bala ma Tadü'dü coo'do, ara aaga sa ka tessu a'da a'a

namiini, taalo a'a nalinggo nüümö ma eyi tiya eede nitaaalo natiraana a'da taalo Pupa akalaana a'a. <sup>29</sup> A Pupa ya agürünü a'a ya aneene nja a'a taalo afa kede unggodho a'a, kudumma eede ka talingga eema yiini ka asaasa ya." <sup>30</sup> Kini ka tirina tumma no ya, a kadu tamma kini kadhabbu.

*Laala ya Abrahiim*

<sup>31</sup> İkirī Yasu ka tiki ą Yahüüdü tanno amma kini no, "Üürü aaga ka tüü ka talaana tanno eede ya, ara aaga ta kadalaadene tanno eede dhorro. <sup>32</sup> Aaga tessu tumma na dhorro no a tumma na dhorro no toolona aaga."

<sup>33</sup> Kiki iini, "Ungngo ka kadaada ma Abrahiim, ungngo taalo ka kasaga tanno ömö'dü töccö o'o sa ka tiki ungngo a'da ara ungngo sa kada kadu tanno dhorro no nya?"

<sup>34</sup> İkirī Yasu ka tiki eene, "Tumma dhorro eede ka tadirina aaga, ömö'dü ya üünii tatoroko ya, ara tadasaga ma eema tiya toroko ya. <sup>35</sup> A tasaga

taalo ara tanna ka 'dü turi nja kadu miini, lakiini 'bii'bala i'i yungngo a tanna ka 'dü ta'billi. <sup>36</sup> Aga 'Bii'bala ka toolona aaga ka tadasaga ya, ara aaga toolonadene ka tadasaga ma timin'da. <sup>37</sup> Nussu a'a a'da aaga ka kadaada ma Abrahiim. Lakiini aaga kasaasa tiidi a'a kudumma tumma tanno eede kitaalo ada ka nanggeedi. <sup>38</sup> A'a

neema tumma neede ka tadinö kide kidha ma Pupa tiya eede ya, aaga talingga eema yaada ka taföönyö ka pupa tiya ada ya."

<sup>39</sup> Kiki iini, "Pupa yiidi a'da Abrahiim."

İkiri Yasu ka tiki eene, "Kada ka talaala tiya Abrahiim ya, ara aaga tagalinggo eema ya Abrahiim ka tagalinggo ya." <sup>40</sup> Lakiini aaga 'bitingngö kasaasa aaga tiidi a'a, a'a nungngo nadünüğü tumma na dhorro no aaga afa ma tanno eede ka taföönyö ka Masala no. Abrahiim ka eyi tiya iini taalo agalinggo linggo no. <sup>41</sup> Kalinggo aaga eema ya pupa tiya ada."

Kiki iini, "Taalo ungngo ka laala ma nyoro, Pupa ungngo iidü unggodho i'i ya Masala."

<sup>42</sup> İkiri Yasu ka tiki eene, "Üürü Pupa yaada a'da Masala ya ara aaga tasaasa a'a, kudumma eede ka öö'dö ndama Masala nöö'dö kada, taalo a'a nöö'dö ma eyi tiya eede, lakiini Masala magürünü a'a. <sup>43</sup> Minna agu aaga taalo aaga kussu tumma neede ka teemaga co aaga no? Kudumma ada katitaalo ka asaasa tatoodo ka tumma tanno eede. <sup>44</sup> Aaga ka laala tiya pupa tiya ada Ebliisi, aaga fasaasa tuurna tumma na pupa tiya ada keere. I'i ya tatagirina kadu ka dhidha, taalo ümmü a tumma na dhorro no katitaalo kini. I'i ya korokoro, i'i ka eyi tiya iini akorokoro 'do,

kudumma iini ya korokoro ada pupa tiya kadu tanno korokoro no. <sup>45</sup> Aaga taalo kamma kede kudumma eede ka teema tumma ma tatinin'da na dhorro no. <sup>46</sup> Mada ana kada ka tümmü a'a ka linggo tanno toroko no? Üürü a'a neema a'a tumma ma timin'da a minna agu aaga taalo kamma kede? <sup>47</sup> Ömö'dü ya öö'dö ndama Masala ya, ara taföönyö tumma na Masala ka teema no. Nüümö ya anangnga aaga ka titalo kaföönyö ya kudumma aaga taalo ka kadu tanno Masala."

### *Yasu nja Abrahiim*

<sup>48</sup> İkiri Yahüdü ka tiki, "Taalo ungngo kadiri tumma dhorro kidi ka tiki a'da o'o no taga Samira, na'bu ungngo üdü ka oona?"

<sup>49</sup> A Yasu tiki eene, "Taalo na'bu eede ka üdü illi a'a nindhigü Pupa yeede ko'do illi aaga kamidhi a'a. <sup>50</sup> Taalo a'a nindhigü eyi yeede ko'do, lakiini ömö'dü inggide asaasa, i'i yungngo atümmü kadu. <sup>51</sup> Ara a'a tadirina tumma dhorro, ömö'dü ya alingga a tumma tanno eede no, taalo a tassa ka inde koona."

<sup>52</sup> İkiri Yahüdü ka tiki iini, "Asa ungngo tamma 'bitingngö a'da na'bu ungngo üdü ka üdü, eyi Abrahiim a nagane'bi taaya, na o'o sa ka tiki a'da ömö'dü ya ümmü tumma nüüdü ya taalo ara tassa ka inde ta'billi. <sup>53</sup> O'o nagii'bi pupa yiidi Abrahiim, ya eyi ya nja nagane'bi tanno aaya no?

Nümmü o'o eyi yüdü kada minna 'do?"

<sup>54</sup> İkirī Yasu ka tiki eene, "Kede ka tündhügī eyi yeede ko'do ya, taalo ara ta'diila, Pupa yeede i'i yungngo ïndhügī a'a ko'do, yaada ka tiki a'da Masala maada oogo miini. <sup>55</sup> Taalo aaga kussu oogo, illi a'a nungngo nussu oogo. Kede ka tiki a'da taalo a'a nussu oogo ya, ara a'a takorokoro afa ma aaga kungngo. A'a nussu oogo nümmü tumma noono. <sup>56</sup> Pupa yaada Abrahiim adinigöögö ma tasaasa tassa ka uuру tanno eede ka tö'dö no, adadini kide oona ta'diila kini."

<sup>57</sup> A Yahüdü tiki iini, "Nagürüünü nüdü küfürü tö'dö a kadu keera kaco ii-sine, o'o niji Abrahiim nya!"

<sup>58</sup> A Yasu tiki eene, "Tumma dhorro eede ka tirina aaga ka Abrahiim ka tüfürü tageenedene ya a'a ninggide." <sup>59</sup> Kikirī ka kona niigisi ma tadiidir i'i iini, lakiini Yasu aculu amanyaga kene ka söödö unggene ka la ma Masala.

## 9

### *Yasu oolona soro*

<sup>1</sup> Uuru kinggide a Yasu ka tunggeene ka fiinii, asala ömö'di ageenedene kada soro. <sup>2</sup> A kadalaadene niini tindini i'i, "Ka Tatalaana, mada i'i yungngo agüuni tatoroko, ömö'di ya alla pupa yiini nja niimö tammo iini, anangnga i'i ka tageenedene kada soro?"

<sup>3</sup> A Yasu tapadaga tumma eene iki, "Taalo i'i ya agüuni tatoroko alla pupa nja niimö eege kungngo kagüuni tatoroko, lakiini i'i ageenedene kada soro amang ka türü tanno Masala tijidene kini ka oona. <sup>4</sup> Ara a'a talingga eema ya ömö'di tiya agürünü a'a a'da a uuру 'buugu, kudumma 'buugu kada ooso ya, taalo ömö'di ma tambaanya linggo. <sup>5</sup> Kede ka tanna ka 'büdhülü ya, a'a na töyene ma 'büdhülü."

<sup>6</sup> Atiraana nggeege assa a'binnyi alaaga ka kuraaga akordhe 'bandam'bala iini asigiaana ka soro ka iifye. <sup>7</sup> İkirī ka tiki iini, "Unggeene, naco taagala iifye ka dhömbö ma Salwam" (ya ana eere a'da, Tagürünigj), ikirī kico aagala iifye aco öö'di ka iji 'buugu.

<sup>8</sup> A kadu na kete kini no nja tanno ussu a'da aga soro aatarangnga, anno tiki, "Taalo ömö'di ya agemmi aatarangnga ya i'i yungngo sa?" <sup>9</sup> A kadu könö tiki, "İi, i'i ya miini."

Anno tiki, "Kaw, afeene nja iini."

Illi i'i ka eyi tiya iini iki, "A'a namiini."

<sup>10</sup> Kikirī ka tiki iini, "Katanfa'da iifye nüdü nya?"

<sup>11</sup> İkirī ka tiki eene, "Ömö'di ya ana eere a'da Yasu ya, oojolo tam'bala amirijaana kide ka iifye iki a'a a'da, 'Naco a dhömbö ma Salwam naco tatanggala

kide,' nükirri ka co nagala nasala 'buugu."

<sup>12</sup> Kikirri ka tiki iini, "I'i iïye?"

Iki eene, "Taalo a'a nussu."

*NaFariisi kindini toolon-adene*

<sup>13</sup> Kikirri ka a'duga ömö'dü ya aga soro ya, köö'dö ana i'i a naFariisi. <sup>14</sup> A'da uuru ma Sa'bidi eege kungngo ka Yasu ka tagalinggo tam'bala afa'da ömö'dü ka iïye iini. <sup>15</sup> İkiri naFariisi ka tindini i'i kiki iini a'da, iji 'buugu nya.

İkiri ka tiki eene, "Anangnga tam'bala eede ka iïye natanggala a 'bitingngö nasala 'buugu."

<sup>16</sup> A naFariisi könö tiki, "Taalo ömö'dü ya ö'dö ndama Masala, kudumma iini taalo ari'ba uuru ma Sa'bidi."

Anno tiki, "Üürü ömö'dü atoroko atambaanya talinggo eema keefe afa ma tiya kungngo nya?" A tumma ta'bana ko'do kene.

<sup>17</sup> Kikirri ka tiki a soro, "Niki o'o a'da i'i afa'da o'o ka iïye, o'o niki nya ka tumma tanno?"

İkiri ka tiki eene, "I'i ya ne'bi."

<sup>18</sup> A Yahüdü taalo kamma a'da ömö'dü ya aga soro assa ndiji 'buugu, kikirri ka kürünü ka pupa tiya iini nja niimö köö'dö. <sup>19</sup> Kindini eege kiki eene, "'Bii'bala yaada i'i yungngo ada katiki a'da ageenedene kada soro? A 'bitingngö i'i iji 'buugu nya?"

<sup>20</sup> A pupa yiini nja niimö tiki, "Kussu ungngo a'da

'bii'bala yïidü i'i yungngo, ageenedene kada soro.

<sup>21</sup> Lakiini i'i iji 'buugu 'bitingngö nya, taalo ungngo kussu mada afa'da i'i ka iïye, taalo ungngo kussu, aaga indini i'i. I'i anda dhabbu, i'i ara tadirina tumma ma iïye tiya iini aaga." <sup>22</sup> Eege kiki nggeege kudumma eene ka ri'ba a Yahüdü, kudumma eene ka tiki a'da ömö'dü ya amma ka Yasu a'da i'i Almasiihi ya, kasoro i'i ka la ma talaana. <sup>23</sup> I'i yungngo a pupa tiya iini nja niimö katiki a'da, "Aaga indini i'i kudumma iini ka ndasere."

<sup>24</sup> A naFariisi tafada kadagümümü ömö'dü ya aga soro ya afe'de, kindini i'i kiki iini, "İndhigü Masala ko'do kussu ungngo a'da ömö'dü ya atoroko."

<sup>25</sup> İkiri ka tiki a'da, "Taalo a'a nussu a'da i'i atoroko alla taalo atoroko, nussu a'a niimö unggodho, naga soro a'a a 'bitingngö niji a'a 'buugu."

<sup>26</sup> Kafada kindini i'i, "Agüünü minna ana o'o? Afa'da o'o ka iïye nya?"

<sup>27</sup> Iki eene, "Nilli a'a ka tagadünüğü aaga itaalo inynyo ada ka nanggüdü, aaga kasaasa taföönyö minna afe'de? Alla aaga kasaasa ta kadalaadene tanno iini afe'de?"

<sup>28</sup> Kikirri ka teela i'i kiki iini, "O'o nungngo na talaadene tiya iini, illi ungngo kadalaadene tanno Müüsa. <sup>29</sup> Kussu ungngo a'da Masala

mageema nja Müüsa, laki-ini ömö'dü ya taalo ungngo kussu ö'dö ndama kiga."

<sup>30</sup> İkiri ömö'dü ka tiki eene, "Kaneene tumma naada nya, ömö'dü afa'da a'a ka iïye aaga sa ka tiki a'da taalo aaga kussu a'da ö'dö ndama kiga?" <sup>31</sup> Kussu ungngo a'da Masala taalo maföönyö tumma na kadu tanno oroko no, illi oogo maföönyö tumma na ömö'dü tiya aföönyö tumma noonoo alingga iini ya. <sup>32</sup> Taalo ömö'dü ma taföönyö jiddi ma nagürüünü 'do a'da ömö'dü inggide afa'da ömö'dü ka iïye ka tageenedene kada soro. <sup>33</sup> Üürü ömö'dü ya taalo ö'dö ndama Masala ya, taalo takambaanya talinggo eema afa ma tiya kungno."

<sup>34</sup> Kikiri ka tiki iini, "O'o nama talaana ungngo üdü ka tageenedene a tatoroko 'do kungno?" Kikiri ka tagasoro i'i kuurugu i'i co kürö.

### *Tasoro ma koronggore*

<sup>35</sup> A Yasu taföönyö a'da eege kagasoro i'i, kini ka toreene nja iini, ikiri ka tiki iini "Namma o'o ka 'Bii'bala ma Tadü'd'dü?"

<sup>36</sup> Ömö'dü tiki, "I'i ya mada ömö'dü eede, amang kede tamma kini."

<sup>37</sup> A Yasu tiki, "O'o niji i'i 'bitüngnö, tumma dhorro i'i yungngo eema nja o'o 'bitüngnö."

<sup>38</sup> İkiri ka tiki, "Namma a'a Uugaara." Üürü ku'bu kini kidha.

<sup>39</sup> İkiri Yasu ka tiki iini, "Nö'dö a'a ka 'büdhülü ma tümmü kadu, amang ka kadu tanno kisinsoro no tiji 'buugu, anno iji 'buugu no ta kisinsoro."

<sup>40</sup> İkiri naFariisi könö na kanna kini kete no kaföönyö kiki iini minna, "Ungngo ka kisinsoro afe'de?"

<sup>41</sup> A Yasu tiki eene, "Kada ka takisinsoro taalo tatoroko ka taganna kada koona. Lakiini kiki aaga a'da kiji aaga 'buugu ya ara tatoroko naada tüütü kada ka oona."

## 10

### *Yasu i'i ya tadasaana tiya dhorro ya*

<sup>1</sup> A Yasu tiki, "Ara a'a tadirina tumma aaga dhorro, ömö'dü ya taalo inyno a 'booro ma kidheefele ndama inye ma ondo ya, ara ka kilaana ndama eere miini ya i'i ya tanyooro. <sup>2</sup> Illi ömö'dü ya inyno ndama inye ya, i'i ya tadasaana ya dhorro ya. <sup>3</sup> A ömö'dü ya afa ka inye ya tafa'da inye iini, a kidheefele taföönyö tumma niini ümmünü kidheefele ka nagereene tanno eene kaföönyö uurugu eege kürö.

<sup>4</sup> İkiri ka tuurugu kidheefele kürö aaco kene kidha kurna i'i keere kudumma eene ka tessu 'bugeyi yiini. <sup>5</sup> Ömö'dü ya taalo yeene ya, kasala i'i karünö kitaalo kaco iini keere, kudumma eene ka titaaloo kussu 'bugeyi yiini."

<sup>6</sup> A Yasu tadirina tafeene ma tumma eene, lakiini taalo kinyno eene ka nanggüdü.

<sup>7</sup> İkürü Yasu ka tiki eene afe'de, "Ara a'a tadırina tumma aaga dhorro, a'a nungngo na iňye ma ondo ma kidheefeple. <sup>8</sup> Kadu na öö'dö kede kidha 'do no, kanyooro eege kamiini, a kidheefeple taalo kaföönyö tumma neene. <sup>9</sup> A'a nungngo na iňye, ömö'di ya tigaala kide ya, oolonadene aaco öö'dö kürö aduna kuri. <sup>10</sup> Taalo tanyooro a tunggeene ün'dügüngngö illi unggunu ka nyoro, aara kidheefeple agirina, lakiini a'a nö'dö amang kene taluna tefe ka 'dö na tigine no.

<sup>11</sup> "A'a na tadasaana tiya dhorro ya. A tadasaana ya dhorro ya ara teyi kudumma kidheefeple tanno iini. <sup>12</sup> Ömö'di ya asaana a faana ya, taalo a tadasaana ma kidheefeple. Lakiini kini ka tasala ti ka tunggunu ka kidheefeple arünö iňyi kidheefeple ku'bu, a ti tümmü eege maparsaana eege ku'bu. <sup>13</sup> Ömö'di ya asaana a kidheefeple a'da taalo ka niini no, ara tarünö kudumma eene taalo ka agu'du i'i ka oona.

<sup>14</sup> "Lakiini a'a nungngo na tadasaana tiya dhorro ya, nussu a'a kidheefeple neede, a kidheefeple neede tussu a'a. <sup>15</sup> Afa ma Pupa ka tussu a'a nussu Pupa, ara a'a teyi ka üüdü ma kidheefeple tanno eede. <sup>16</sup> Kidheefeple könö kungngo eede kitaalo ka 'booro tiya, ara a'a co tö'dö ana eege afe'de, ka taföönyö tumma neede nuuraana eege koona ka unggodho a tadasaana

unggodho. <sup>17</sup> Nüümö ya Pupa tiya eede ka asaasa a'a ya, kudumma eede ka tüpü eyi yeede co amang kede taluna afe'de. <sup>18</sup> Taalo ömö'di ma ta'duga kede, lakiini a'a nara tanangnga eege ku'bu ma eyi tiya eede. A türü kungngo eede ma tanangnga eege ku'bu a türü kungngo eede ma tan'dinaga eege ko'do afe'de. Tumma no, na'duga eege ka Pupa tiya eede."

<sup>19</sup> A tumma ta'bana ko'do ka Yahüüdü kasümünü njaana ku'bu kudumma tumma tanno. <sup>20</sup> A kadu ana kene kadhabbu tiki, "Na'bu ungnego iini ka üüdü atangga'da ka üüdü, katoodo aaga ka tumma tanno iini amana?"

<sup>21</sup> Anno tiki, "Taalo tumma ma ömö'di tiya ana na'bu ka oona eege kungngo. Ara na'bu tamaanya tafa'da ömö'di ya soro ya ka iiye?"

### *Yahüüdü kanu ka Yasu*

<sup>22</sup> A Taanyara ma türri ma la ma Masala tadhe ka Örsaliim a'da afeeple 'buugu, <sup>23</sup> a Yasu takunggunaana ku'bu ka fangga tammo Siliman ka la ma Masala. <sup>24</sup> İkürü Yahüüdü ka tarügü kini ka oona kiki iini, "Ara o'o talüülü ungnego ka iiye taagaada? Tirina tumma ungnego dhorro o'o na Almasihi?"

<sup>25</sup> İkürü Yasu ka tiki eene, "Nadirina a'a aaga, lakiini aaga taalo kamma ka tumma tanno eede, eema yeede ka talinggo ana eere ma Pupa tiya eede ya, i'i

yungngo ada ka tussu iini.  
<sup>26</sup> Lakiini taalo aaga kara tamma kede kudumma ada katitaalo ka kidheefele tanno eede. <sup>27</sup> Kidheefele neede kaföönyö tumma neede nussu euge, ko'd'do kede keere. <sup>28</sup> Namana a'a tefe ka 'd'i ta'billi eene, kitaalo ka taaya 'do, ömö'd'i ma tamuru euge kede ka niisö kungngo taalo. <sup>29</sup> Pupa yeede i'i yungngo anangnga euge a'a, i'i yungngo agii'bi kadu nye'd'de kungngo, ömö'd'i ma tamuru euge ka Pupa tiya eede ka niisö kungngo itaalo. <sup>30</sup> A'a nja Pupa ka ungodho ungngo."

<sup>31</sup> Afe'de ikiri Yahüdü ka tadhifi nügisi afe'de ma tadiidiri i'i, <sup>32</sup> ikiri Yasu ka tiki eene, "Kiji aaga eema ya a'diila yeede ka tagalinggo ya dhabbu a Pupa ka anangnga a'a, öjö i'i yungngo ada kasaasa tadiidiri a'a kudumma miini ngo?"

<sup>33</sup> A Yahüdü tiki iini, "Taalo ungngo kasaasa tadiidiri o'o kudumma eema tiya üüdü ka talinggo ya a'diila ya, lakiini kudumma teela Masala nüüdü! O'o na ömö'd'i ün'dügüngngö na o'o sa ka tümmü eyi yüüdü kada Masala."

<sup>34</sup> İkiri Yasu ka tiki eene, "Taalo tumma no ka kirinja ka seriye tiya ada, 'A Masala ka tiki, Aaga namasala'?

<sup>35</sup> A kini kara tümmünü euge a'da 'namasala,' a'da euge kungngo a tumma ma Masala ka öö'dö kene, a

Sorne ma Masala taalo ara taama, <sup>36</sup> Kiki aaga nya ma ömö'd'i tiya Pupa ka tagesse i'i kada tiya oono dhorro magürünü i'i ka 'büdhü'lü. Minna agu aaga tümmü a'a a'da a'a neela Masala kudumma eede ka tiki a'da a'a na 'Bii'bala ma Masala? <sup>37</sup> Kede ka titalo nalinggo linggo na Pupa ya, aaga fa tamma kede. <sup>38</sup> Lakiini na a'a sa ka talinggo ya, salla aaga saga taalo kamma kede, aaga amma ka eema keefe tiya ada kara tussu a'da Pupa ungngo eede, a'a na Pupa." <sup>39</sup> Kasaasa tarefe i'i, lakiini adulu'bi kene ku'bu.

<sup>40</sup> Afada aco ada'da to ma Ürdün kita Yühanna ka takambeese kide ka dhidha ya anna kide. <sup>41</sup> A kadu tö'dö kini kadhabbu kiki, "Taalo Yühanna agalinggo nüümö ungodho keefe, lakiini tumma niini ka tiraana ma ömö'd'i tiya ka tatimin'da." <sup>42</sup> A kadu tamma ka Yasu kadhabbu kanna.

## 11

### Inde na Liyasiri

<sup>1</sup> A maara tümmü ömö'd'i inggide ana eere a'da Liyasiri ama Beet Aniya, ama daara tammo Mariyom nja inye tammo oono Marsa.

<sup>2</sup> A Mariyom mo, oogo mungngo muuru kondho ka Yasu ka uune matakuppu ana awu tiya oono, örre yoono i'i yungngo amaara, ana eere a'da Liyasiri.

<sup>3</sup> Mikiiri Mariyom nja Marsa ka kürünü ka Yasu kiki

iini, "Ka Uugaara, teefe ma o'o yüdü ka asaasa i'i ya amaara."

<sup>4</sup> Ka Yasu ka föönyö tumma no ya iki, "Taalo maara ma inde oogo miini, lakiini tiddhindhi ma Masala, amang ka 'Bii'bala ma Masala tiddhindhi iini."

<sup>5</sup> A Yasu tagasaasa Marsa nja inye tammo oono nja Liyasiri. <sup>6</sup> Lakiini i'i ütü kanna iifyü kide naganuuru keera kini ka aföönyö a'da Liyasiri amaara, <sup>7</sup> ikirii ka tiki a kadalaadene tanno iini, "Aaga ö'dö ungngo tapadaga co Yahüüdiya."

<sup>8</sup> Ikirii kadalaadene niini ka tiki iini, "Ka Tatalaana kete kungngo kasaasa Yahüüdü tiidi o'o a nüigisi ara o'o tagapadaga co kanna afe'de?"

<sup>9</sup> Ikirii ka tiki a'da, "Taalo uuru ka unggodho ka ndanaaya kada'baaga kafünü eera? Ömö'di ka tunggeene uuru kungngo taalo ataseene kudumma iini ka adinö ka töyeene ma 'büdhülü nye'd'de.

<sup>10</sup> Ömö'di ya unggene ooso kungngo ya, ataseene kudumma töyeene ka titaaloo kini." <sup>11</sup> Iki nggeege assa ka tafada iki eene, "Teefe ma angnga Liyasiri arigide, a'a tunggeene naco tiji i'i."

<sup>12</sup> Ikirii kadalaadene ka tiki iini, "Uugaara, üürü i'i arigide ya ara ta'dila."

<sup>13</sup> Yasu ageema tumma inde taalo tarigide ma timin'da, kiki kide a'da fungngö ma tarigide ün'düngngö.

<sup>14</sup> Ikirii Yasu ka tirina eene dhorro, "Liyasiri eyi, <sup>15</sup> ka'diila oona eede kudumma aaga amang kada tamma a'da taalo a'a naganna kanna nja iini, aaga fiki'dö angnga co kini kanna."

<sup>16</sup> Ikirii Tööma yeene ka tümmünü i'i a'da Miiso ya, ka tiki a köje tanno a kadalaadene no, "Kico tekere angnga co takaaya nja iini."

*Yasu uu'bu nagïnye na  
Liyasiri ka eedi*

<sup>17</sup> Ikirii Yasu ka ala kanna aduna Liyasiri ka la ma oofo andatiümö fungngö egüsö. <sup>18</sup> A Beet Aniya ma ku'b'ba ka Örsaliim ana nameele keera, <sup>19</sup> a Yahüüdü kadhabbu kö'dö ka fara kuu'bu Marsa nja Mariyom eege ka eedi kidhi oona ku'bu ma örre tiya eene. <sup>20</sup> Mikiirii Marsa ka föönyö a'da Yasu inni ö'dö ya, mikiirii ka öö'dö kürö marogo kini ara Mariyom ka tüütü ka büögööri.

<sup>21</sup> A Marsa tiki ka tiki a Yasu, "Ka Uugaara, üdü ka taganna kita, taalo örre yeede ara takeyi. <sup>22</sup> Lakiini nütü a'a ka tessu a'da ara Masala tanangnga niimö yüüdü ka asaasa kono ya o'o."

<sup>23</sup> Ikirii Yasu ka tiki oono, "Ara örre yüüdü tafiki'dö ka inde afe'de."

<sup>24</sup> Mikiirii Marsa ka tiki iini, "Nussu a'a a'da atafiki'dö ka inde ka uuru ma tafiki'dö tanno eere no."

<sup>25</sup> İkiri Yasu ka tiki oono, "A'a nungngo na tefe ka 'dī nja tafiki'dö. Ömö'dī ya amma kede ya ara tefe ka 'dī, munda kini kara teyi.  
<sup>26</sup> Ömö'dī ya efe ka 'dī amma kede ya, taalo teyi. Namma o'o ka tumma tanno?"

<sup>27</sup> Miki iini, "İi, namma a'a Tatalaana, namma a'a a'da o'o na Almasiihi, 'Bii'bala ma Masala ya atö'dö ka 'büdhülü ya."

<sup>28</sup> Ka Marsa ka tiraana nggeege ya, mikiri ka tafada maco ka Mariyom matagümmünü oogo mayaaya oogo miki, "Ö'dö Tatalaana asaasa 'buugu ma o'o." <sup>29</sup> A Mariyom tikiri ka fiki'dö kono ka taföönyö tumma no, marooro ka tunggeene maco ka Yasu.  
<sup>30</sup> A'da üfürü Yasu tala daara aleefe ka 'buugu tiya Marsa ka takoreene nja iini kide ya. <sup>31</sup> Ka Yahüdü na köö'dö kafara ka Mariyom ka 'dī no, kasala oogo ka fiki'dö areere maco kürö, kuurna oogo keere, kiki kide a'da oogo ma co la ma oofo tafara kide.

<sup>32</sup> A Mariyom tö'dö ka 'buugu tiya Yasu ka taganna kide ya, kono ka tasala Yasu ya, müürü kini kidha ana küüge miki iini, "Ka Tatalaana, küdü ka taganna kita taalo örre yeede ara takeyi."

<sup>33</sup> Aga Yasu ka iji oogo ka fara a Yahüdü na öö'dö nja oono no tafara nja oono, oona tö'dö kini ko'do angooro tümmü i'i a

koronggore. <sup>34</sup> İkiri ka tiki, "Katü'bü aaga i'i kiga?"

Kiki iini, "Aayu kolo tassa kide, Uugaara."

<sup>35</sup> A Yasu tafara.

<sup>36</sup> İkiri Yahüdü ka tiki, "Aaga assa kini agasaasa i'i nya."

<sup>37</sup> Lakiini kadu könö kiki, "I'i afa'da soro ka iiye taalo atanangnga Liyasiri keefe ka 'dī?"

*Yasu iji Liyasiri ka inde*

<sup>38</sup> Oona tangooro ka Yasu afe'de öö'dö ka la ma oofo, a müsi mungngo ka inye ma tumba. <sup>39</sup> İkiri ka tiki, "Aaga kürünüğü müsi keere."

A Marsa ma inye tammo Liyasiri mo tiki, "Ka Tatalaana, anda unynya, ungngo iini ka la ma oofo füngngö egüsö."

<sup>40</sup> İkiri Yasu ka tiki oono, "Taalo a'a niki o'o a'da küdü ka tamma, na o'o tiji tıdhindhi na Masala?"

<sup>41</sup> Kikiri ka a'dina müsi. A Yasu tassa coo'do iki, "Nanangnga a'a ta'diila o'o Pupa yeede, kudumma üüdü ka föönyö tumma neede.

<sup>42</sup> Nussu a'a a'da ara o'o taföönyö kede a naguru. Lakiini a'a neema nggeege amang ka kadu tanno kita nja a'a no, tamma a'da o'o nagürünü a'a."

<sup>43</sup> Kini ka tiraana nggeege, ikiri ka alneege ko'd'do iki, "Liyasiri, aayu kürö."

<sup>44</sup> Ömö'dī ya eyi ya, ikiri ka öö'dö kürö ka timi'didene ka uune nja iisine ana en'di adimi'didene ka iiye a ten'di, ikiri Yasu ka tiki eene, "Aaga

kildhe eema iini ka oona  
aaga tafa kini unggeene."

### *Ünggü ma tiidi Yasu*

<sup>45</sup> A Yahüdü köönö kadhabbu na öö'dö tassa ka Mariyom no, tiji eema ya Yasu ka tagalinggo ya kamma kini. <sup>46</sup> Lakiini kadu könö ana kene keefe tadirina eema a naFariisi ma eema tiya Yasu ka tagalinggo ya. <sup>47</sup> A naguugaara ma ka'boge nja naFariisi temmi ka la ma kadiifä ma Yahüdü ma türi tumma no kiki, "Ara angnga takönynyö ana ömö'di tiya, iini ka talinggo eema dhabbu keefe. <sup>48</sup> Kaja ka tafa kini nggeege ara kadu tamma kini nye'd'de a kadu ma Rööma tö'dö taga'da anya maaja nja la ma Masala tiya aja."

<sup>49</sup> İkiri köönö ana kene ana eere a'da Kiyaafa ya aga uugaara ma ka'boge ka ürüünü tiya miini ya ka tiki, "Taalo aaga kussu niimö 'do, <sup>50</sup> taalo aaga kussu a'da a'diila ka ömö'di kara teyi ka üdü ma kadu amang ka kadu tafa taaya in'dili." <sup>51</sup> Lakiini Kiyaafa taalo adiri tumma no ndama eedi tiya iini, kudumma iini kada uu-gaara ma ka'boge ka ürüünü tiya miini ya, ikiri ka teema ussu a'da Yasu a teyi ka üdü ma kadu ma Yahüdü. <sup>52</sup> Lakiini taalo a teyi ka üdü meene unggodho eege, lakiini ka üdü ma kadu tanno Masala na asanana-jaana ku'bu ka ajeene no anangnga eege kada unggodho. <sup>53</sup> Ndama uuru tanno

miini no kandawwa fiinii ma tiidi i'i.

<sup>54</sup> Nggeege taalo Yasu aga unggunaana ku'bu 'bünni kungngo ka söödö ma Yahüdü, agala ka tunggeene aco a riifö tiya kete ka dhiile ka anya tammo ana eere a'da Afraim mo, ada kamma kide nja kadalaadene tanno iini.

<sup>55</sup> Aga Taanyara ma Tada'da ka Eriidö ma Yahüdü ka ndakete ya, a kadu ma naanya 'do tö'dö ka Örsaliim ma tindinaana oona ku'bu a'da aleefe uuru ma tirri. <sup>56</sup> Kawwa 'buugu ma Yasu kindini ajeene ka la ma Masala kiki, "Kiki aaga nya? Ara tö'dö ka taanyara alla taalo atö'dö?" <sup>57</sup> İkiri naguugaara ma ka'boge nja naFariisi ka tiki a'da ömö'di ya tussu 'buugu ma Yasu ya, atiraana a kadu tümmü i'i.

## 12

*Aka masanna kondho ka Yasu ka uune ka Beet Aniya*  
(Matta 26.6-13; Murkus 14.3-9)

<sup>1</sup> Ka füngngö ka ndöreene iidümmü afünü unggodho ma Taanyara ma Tada'da ka Eriidö, ikiri Yasu ka öö'dö ka Beet Aniya ka 'di tiya Liyasiri yiini ka tiji i'i ka inde ya. <sup>2</sup> Kadagüüni ada eema ma kuri ma ooso iini, a Marsa oogo mungngo malinggo ada eene, a Liyasiri taguri nja eene. <sup>3</sup> Mikiri Mariyom ka 'duga sügü'de ma kondho a kadu kaana kagu'daana agalinggo adene ana nardiin ya dhorro ya, masanna ka

Yasu ka uune ma'bunaanago ana awu ma üüdü tiya oono a 'bügööri tafilli a kondho. <sup>4</sup> İkiri Yahüüsa Askaryüütä, ya tatalaadene ya, assa ka tümmünü Yasu a kadu ya ka anu kide, <sup>5</sup> "Taalo a'diila aja katenenge a kondho tammo ana nakajine kö'dö na miya kiidoona kanangnga a kadu tanno eema ka titaaloo kene no?" <sup>6</sup> Taalo i'i atiraana nggeege a'da i'i ya ana 'bangnga meene, lakiini kudumma iini kada tanyooro i'i yungngo ümmü njoko ma gürüüsü, anggona kide ma eyi tiya iini.

<sup>7</sup> İkiri Yasu ka tiki, "Aaga fa kono, oogo mafa ka kondho tammo ma uuru ma tatü'büdene tanno eede. <sup>8</sup> Kadu na eema ka titaaloo kene no kaneene nja aaga turi kungngo, lakiini a'a taalo nara taneene nja aaga turi."

<sup>9</sup> A Yahüüdü kadhabbu taföönyö a'da Yasu ungngo ka Beet Aniya, kikiri ka co tassa kini kara kaco tassa ka Liyasiri tiya Yasu ka anangnga i'i ka fiki'dö ndama inde. <sup>10</sup> I'i yungngo a naguugaara ma ka'bole kadimi'di tumma ma tiidi Liyasiri afe'de. <sup>11</sup> Kudumma ma Liyasiri Yahüüdü kadhabbu ka unggeene kaco ka Yasu kamma kini.

*Yasu inynyo Örsaliim*  
(Matta 21.1-11; Murkus 11.1-11; Lüüka 19.28-40)  
<sup>12</sup> İkiri kadu na öö'dö ka Örsaliim ka taanyara no,

kaföönyö a'da Yasu inni ara tö'dö kanna. <sup>13</sup> Kikiri ka a'buna ii sine ma naafa ma tamuru koreene nja iini kiidhe kiki, keema a'da,

"Tidhindhi."

"Aaga nangnga baraka ka ömö'dü tiya ara tö'dö ana eere ma Uugaara ya."

"Aaga nangnga baraka ka Uugaara ma Israyil."

<sup>14</sup> İkiri ka tuna 'bing kisine aka kide afa ma tiya sorne ka tiki ya kungngo,

<sup>15</sup> "Fa tari'ba, 'badaada ma Sahyüün,  
assa, uugaara yüüdü tunggunu atö'dö  
aka ka 'bing kisine tiya idhilli ya."

<sup>16</sup> Ka uuru tanno miini no taalo kadalaadene niini kussu niimö miini illi eene kadagügi i'i kini ka tafünüğünja ko'do, sorne ageema tumma miini, eege kagalinggo ada eema ya iini.

<sup>17</sup> Kadu na kunggeene nja iini no kini ka tagümmünü Liyasiri kürö ndama la ma oofo iji i'i ndama inde kadünüğü tumma miini co kadu. <sup>18</sup> A kadu tö'dö kürö kadhabbu koreene nja iini kudumma eene ka taföönyö a'da i'i agalinggo eema keefe. <sup>19</sup> İkiri naFariisi ka teemaana ka oona unggodho eege, "Taalo niimö maaja

kara talinggo, aaga assa ka kadu ïn'dili ka tuurna i'i keere nya."

*Yasu eema tumma ma inde tanno iini*

<sup>20</sup> A kadu ma Yünan kagöö'dö nja kadu tanno köö'dö ka Örsaliim ka uuru ma Taanyara ma Tada'da ka Eriidö. <sup>21</sup> Köö'dö ka Filibüs ya ma Beet Sayida ka Jaliil ya kiki iini, "Ömö'di eede, kasaasa ungngo tassa ka Yasu." <sup>22</sup> İkiri Filibüs ka tirina Andraws, a Filibüs tunggeene nja Andraws ka tirina a Yasu.

<sup>23</sup> İkiri Yasu ka tiki eene, "Uuru ma 'Bii'bala ma Tadü'd'dü ka ndö'dö miini ka tafünüğünja ko'do. <sup>24</sup> Ara a'a tadirina tumma aaga dhorro, üürü taalo ndaniïye ma tinggile ka asuli ka 'büdhülü keyi ya, a tüütü unggodho eege. Lakiini kene ka teyi ya, kara tö'dö ana iïye kadhabbu. <sup>25</sup> Ömö'di ya asaasa eyi yiini ya ara taama, ömö'di ya a'düsünü eyi yiini ka 'büdhülü tiya, ara tafa kene ma tefe ka 'dii ta'billi. <sup>26</sup> Ömö'di ya asaasa talinggo ada a'a ya, fa kini uurna a'a keere, kita eede ka tanna kide ya, ara talinggo ada a'a, ömö'di ya alinggo ada a'a ya, ara Pupa yeede tamünüğü i'i ko'do.

<sup>27</sup> "Kalullu oona eede a 'bitingngö ara a'a tiki nya? Ara a'a tiki a'da, 'Pupa yeede, oolona a'a ka uuru tanno'? Kaw, kudumma tumma tanno, eege kungngo eede ka öö'dö ka uuru tanno.

<sup>28</sup> Pupa yeede, fa ka eere tiya üüdü idhindhi."

A tumma tö'dö ndama 'dotombo'do, "Nanangnga a'a i'i ka tihindhi nara tafa kini idhindhi afe'de."

<sup>29</sup> A kadu na kanna kide no kataföönyö kiki a'da baana ma tombo'do, anno tiki a'da tadhangga ageema nja iini.

<sup>30</sup> İkiri Yasu ka tiki, "Taalo tumma no kö'dö kudumma ma a'a, eege kö'dö kudumma aaga. <sup>31</sup> A 'bitingngö uuru no, uuru ma kadu ma 'büdhülü ka tagümmü adene eege kungngo, a 'bitingngö uuru no ara uugaara ma 'büdhülü atasorodene. <sup>32</sup> Kede ka ta'digi coo'do ndama 'büdhülü, ara a'a tagufu kadu nja a'a nye'd'de kungngo."

<sup>33</sup> Atiraana nggeege ma tala eege ka inde tanno iini kara teyi no.

<sup>34</sup> A kadu nye'd'de tiki iini, "Kaföönyö ungngo ka serïye ka tiki a'da, Almasiihi ara tüütü ka 'dii ta'billi, o'o sa köö'dö nya niki a'da ara 'Bii'bala ma Tadü'd'dü ara ta'digi coo'do? 'Bii'bala ma Tadü'd'dü ya i'i ya mada?"

<sup>35</sup> İkiri Yasu ka tiki eene, "Ara töyeene tagünü nja aaga idhilli, aaga unggene ka töyeene ii'dii ndüüli tanggaaga tala aaga ka oona, kudumma ömö'di tiya unggene ka ndüüli ya taalo ussu 'buugu yiini ka tunggunu co ya. <sup>36</sup> Aaga ümmü töyeene ana eedi dhorro, kudumma eene kungngo ada 'bitingngö amang kada ta laala tiya töyeene." Ka

Yasu ka alneege nggeege ya,  
unggeene itaalo.

*Yahüüdü kanu ka tamma  
ka Yasu*

<sup>37</sup> A'da agalinggo ada eema keefe ya eene kidha 'do, kassa kitaalo kamma kini. <sup>38</sup> Afa ma tumma tanno ne'bi Asaiya ka tiraana no ka timin'da iki,

"Ka Uugaara, mada i'i yungngo amma ka tumma tanno aja?

A mada i'i yungngo a niisö tanno Masala ka alanja iini ungngo?"

<sup>39</sup> Taalo kambaanya tamma kini kudumma Asaiya ka tiki afe'de,

<sup>40</sup> "Masala ma'binnyi eege ka iiye

manangnga eege ka takidhö ka nanggeedi, amang kene tafa tiji 'buugu ana iiye tanno eene, kafa tussu eema a nanggeedi tanno eene, amang kene tafada na a'a toolona eege."

<sup>41</sup> Asaiya adiri tumma no kudumma iini ka tasala tiddhindhi ma ta'diila tanno Yasu, adageema tumma miini.

<sup>42</sup> Lakiini naguugaara ma Yahüüdü kadhabbu ka eyi tiya eene kamma ka Yasu. Lakiini eege taalo kasaasa kadu ka tussu iini, kudumma eene kari'ba a naFariisi ii'di tasoro eege ka la ma talaana. <sup>43</sup> Eege

kasaasa kadu ka tafünögü eege ko'do dhabbu kii'bi tafünögü ko'do na Masala.

<sup>44</sup> İkiri Yasu ka alneege ko'do iki, "Ka ömö'di ka tamma kede ya, taalo i'i ya amma kede sugi, lakiini i'i amma ka ömö'di tiya agürünü a'a ya. <sup>45</sup> Ömö'di ya iji a'a ya, iji ömö'di ya agürünü a'a ya. <sup>46</sup> A'a na töyeeene tanno ö'dö ka 'büdhülü no, ömö'di ya amma kede ya taalo tanna ka ndüüli.

<sup>47</sup> "Ömö'di ya föönyö tumma neede assa ka titalo amma kide ya, taalo a'a natümmü i'i. Kudumma eede taalo a'a nö'dö tümmü kadu ma 'büdhülü, a'a nö'dö toolona kadu ka 'büdhülü.

<sup>48</sup> Ömö'di ya anu kede itaalo amma ka tumma tanno eede ya, ömö'di ma tümmü i'i inggide, a tumma neede ka tiraana no katümmü i'i ka uuru tanno eere no. <sup>49</sup> Taalo a'a neema tumma ma eyi tiya eede, lakiini Pupa ya agürünü a'a ya, i'i yungngo anangnga tumma a'a a'da nöö'dö tatiraana neema iini.

<sup>50</sup> A'a nussu a'da tumma niini, eege ka tefe ka 'di ta'billi. A tumma neede ka teema no ara a'a tatiraana afa ma tiya Masala ka tiki ya kungngo."

## 13

*Yasu agunu kadalaadene  
niini ka uune*

<sup>1</sup> Ka Taanyara ma Tada'da ka Eriiidö ka ndakete ya, a'da ussu Yasu a'da uuru

miini ka ndunggeene ka 'büdhülü ma co ka Pupa tiya iini. I'i asaasa kadu niini na ka 'büdhülü no asaasa eege dhorro ta'billi.<sup>2</sup> Ka Yasu ka ndemmi ooso kungngo ma tagu eema nja kadalaadene tanno iini, ikirü Eблиisi ka üüsüni Yahüüsa Askaryüütü 'bii'bala ya Samaan, ya ümmünü Yasu a naguugaara. <sup>3</sup> A Yasu ussu a'da Pupa yiini ümmünü eema iini ka niisö nye'd'de. Ussu a'da i'i ö'dö ndama Masala ara tapadaga ka Masala afe'de. <sup>4</sup> İkiri ka fiki'dö ka kuri akirnö ten'di miini, aramba dhiiri niini a ten'di. <sup>5</sup> İkiri ka tuuru 'bii'dü ka dho agunu kadalaadene niini ka uune, uppu a ten'di tammo iini ka mi'di dhiiri iini mo.

<sup>6</sup> Kini ka ndö'dö ka Samaan Bütrüs ya, ikirü Samaan ka tiki iini, "Ka Tatalaana, ara o'o tagunu a'a ka uune?"

<sup>7</sup> İkiri Yasu ka tiki iini, "O'o 'bitingngö ya, taalo o'o nussu niimö yeede ka talinggo ya, lakiini ara o'o saga tussu taka öccö."

<sup>8</sup> İkiri Bütrüs ka tiki iini, "Taalo o'o nara tagunu a'a ka uune 'do."

A Yasu tiki iini, "Kede ka titaaloo natagunu o'o ka uune ya, taalo o'o nara tosso ka niimö nja a'a."

<sup>9</sup> İkiri Samaan Bütrüs ka tiki, "Ka Tatalaana, fa tagala a'a ka uune unggodho eege, agala a'a ka iisine nja üüdü afe'de."

<sup>10</sup> İkiri Yasu ka tiki iini, "Ömö'di ya agoodene ya, a tinsili ka oona 'do, taalo ama tagoodene ka oona nye'd'de, illi uune sugi, kinsili aaga lakiini taalo aaga nye'd'de kinsili ka nanggeedi." <sup>11</sup> Yasu iki a'da, "Taalo aaga nye'd'de kinsili ka nanggeedi," kudumma iini ka tussu a'da mada i'i yungngo atümmünü i'i a naguugaara.

<sup>12</sup> A kini ka ndagala eege ka uune agirnö ten'di iini ka oona afada aco a 'buugu ma kuri, iki eene, "Kussu aaga niimö yeede ka talinggo ana aaga ya? <sup>13</sup> Kümmünü aaga a'a a'da 'Tatalaana' nja 'Uugaara,' a'da tumma dhorro kudumma a'a namiini. <sup>14</sup> A 'bitingngö a'a na Uugaara nja Tatalaana nagunu a'a aaga ka uune, aaga tekere aaga kunu ajeene ka uune.

<sup>15</sup> Nala a'a aaga ka fiinii miini amang kada talinggo afa meede ka tagalinggo ada kungngo. <sup>16</sup> Ara a'a tadirina tumma aaga dhorro, taalo ömö'di ya linggo ya agii'bi ömö'di yiini ka talinggo nja iini ya, a taffiinii taalo agii'bi ömö'di ya agürünü i'i ya. <sup>17</sup> A 'bitingngö sa aaga tussu fiinii ya dhorro ya, ara aaga taluna baraka kada kara talinggo iini."

<sup>18</sup> "Taalo a'a neema tumma aaga nye'd'de, nussu a'a kadu neede ka tagesse eege no, lakiini tumma na Sorne ma Masala ka takiki no kara co ööye miini a'da,

'Ömö'dü ya agu kuri yeede ya apadaga kede alingga a'a.'<sup>19</sup> Ara a'a tadirina aaga 'bitingngö a'da küfürü tüünidene, amang kene kara tö'dö aaga tamma a'da a'a namiini.<sup>20</sup> Tumma dhorro ara a'a tadirina aaga, ka ömö'dü tiya amma ka kadu tanno eede ka kürünü eege no, amma kede, ömö'dü ya amma kede ya, i'i ya amma ka ömö'dü tiya agürünü a'a ya.'

*Yasu eema tumma ma  
tümümü adene tanno iini  
(Matta 26.20-25; Murkus  
14.17-21; Lüüka 22.21-23)*

<sup>21</sup> Ka Yasu ka ndageema tumma ya, oona tarooro ka ta'deedene kini, ikiri ka tiki eene, "Ara a'a tadirina tumma aaga dhorro, ömö'dü inggitta ana kada atümmü a'a ümmünü a'a a kadu."

<sup>22</sup> Ikiri kadalaadene ka tasalaana ka oona unggodho eege, kadhere taalo kussu ömö'dü yiini ka teema kini ka oona ya.<sup>23</sup> A tatalaadene inggide a Yasu ka asaasa i'i, emmi kini kete.<sup>24</sup> Ikiri Samaan Bütrüs ka tage'de i'i ana üüdü indini i'i, "Mada i'i yungno iini ka teema kini ka oona?"

<sup>25</sup> Ikiri tatalaadene ya miini ya ka tasigi ka Yasu kete indini i'i, "Tatalaana, mada i'i ya miini ungno sii?"

<sup>26</sup> Ikiri Yasu ka tiki iini, "Ömö'dü yeede ka tata miteene ka kala nanangnga iini ya." Ikiri Yasu ka tindi miteene ata ka kala anangnga a Yahüusa Askaryüütü 'bii'bala ya

Samaan.<sup>27</sup> Ka Yahüusa ka ndagu miteene ya, ikiri Ebliisi ka taka kini, ikiri Yasu ka tiki iini, "Üüni nüümö yüüdü ka asaasa talingga ya, nafa tadoono ku'bu."<sup>28</sup> A kadu na emmi ma tagu eema no, taalo kussu a'da i'i iki iini nggeege amana?<sup>29</sup> A Yahüusa i'i yungno amünögü njoko ma gürüüsi eene, kikiri ka tiki kide a'da Yasu agürünü i'i a'da aaco tana eema ma taanyara nja iini kara co tagona eema a kadu tanno eema ka titalo kene no.<sup>30</sup> Ka Yahüusa ka tamü miteene, arooro kico kürö a'da aga ooso 'buugu.

### *Tumma na issi no*

<sup>31</sup> Kini kico kürö ikiri Yasu ka tiki, "'Bitingngö ara 'Bii'bala ma Tadü'd'dü tafünüğünja ko'do, a Masala tafünögü ko'do kini.<sup>32</sup> Üürü tidihindhi na Masala kungno iini ka oona, ara Masala tanangnga 'Bii'bala ka tidihindhi ana oogo, mara tanangnga i'i ka tidihindhi areere.<sup>33</sup> Laala eede, taalo a'a nara tagünü nja aaga dhabbu. Ara aaga saga tawwa a'a taalo aaga ka taluna a'a afa ma tiya eede ka tirina a Yahüüdü ya kungno, ara a'a tadirina aaga 'bitingngö. 'Buugu yeede kico ya, taalo aaga ka tö'dö kide.

<sup>34</sup> "Ara a'a tadirina tumma na issi no aaga, aaga asaasa ajeene afa meede ka asaasa aaga kungno, aaga asaasa ajeene.<sup>35</sup> Kada kasaasa ajeene ya, ara kadu nye'd'de

kungngo tussu a'da aaga kadalaadene tanno eede."

*Yasu eema tumma ma ta'düsünü i'i na Bütrüs  
(Matta 26.31-35; Murkus 14.27-31; Lüüka 22.31-34)*

<sup>36</sup> Õkirri Samaan Bütrüs ka tiki iini, "Ara o'o co kiga sii Uugaara?"

A Yasu tiki iini, "'Buugu yeede kara co ya taalo o'o nara tambaanya co eede keere 'bitingngö, lakiini ara o'o saga co eede keere ka uuru töccö."

<sup>37</sup> Õkirri Bütrüs ka tiki iini, "Ka Uugaara, minna tagu a'a nitaalo natambaanya co üdü keere 'bitingngö? Namma a'a ka teyi ka üdü ma o'o."

<sup>38</sup> A Yasu tiki iini, "Ara o'o teyi ka üdü ma a'a? Tumma dhorro eege kungngo eede ka tadirina o'o, ka dhimbä ka tüfürü tafara ya, ara o'o ta'düsünü a'a tiidoona."

## 14

*Yasu a fiinii ma co ka Pupa*

<sup>1</sup> "Aaga fa ta'deedene ka nanggeedi. Aaga amma ka Masala aaga tamma kede afe'de. <sup>2</sup> Naala kungngo ka 'dï tiya Pupa tiya eede dhabbu, üürü taalo nggeege, taalo a'a nagadirina aaga ara a'a co tindinaana 'buugu kada ku'bu. <sup>3</sup> A kede kara co, naco tindinaana 'buugu ada ku'bu ya, nafada nöö'dö ta'duga aaga nja a'a, aaga co tanna ka 'buugu ya kara co tanna kide ya nja a'a. <sup>4</sup> Kussu aaga fiinii ma 'buugu tiya eede kara co ya."

*Yasu a fiinii ma co ka Pupa*

<sup>5</sup> Õkirri Tööma ka tiki iini, "Ka Tatalaana, taalo ungngo kussu kita üdü kara co ya, ara ungngo tussu fiinii nya?"

<sup>6</sup> A Yasu tiki iini, "A'a nungngo na fiinii, a'a nungngo na dhorro nja tefe ka 'dï. Taalo ömö'dï ma co ka Pupa illi ndama a'a. <sup>7</sup> Kada kussu a'a dhorro ya, ara aaga tagussu Pupa yeede afe'de. Ndama uuru tanno kussu aaga i'i aaga tadinö kini."

<sup>8</sup> A Filibüs tiki iini, "Ka Uugaara, la ungngo ka Pupa sugi."

<sup>9</sup> Õkirri Yasu ka tiki iini, "Ka Filibüs, naneene a'a nja aaga magaada 'do na o'o saga taalo nussu a'a? Ömö'dï ya adinö kede ya, i'i ya adinö ka Pupa, na o'o saga tiki a'da la ungngo ka Pupa nya?

<sup>10</sup> Taalo o'o namma a'da a'a na ka Pupa a Pupa ungngo eede? Tumma neede ka teemaga co o'o no, taalo a'a neema eege ndama eyi tiya eede, lakiini Pupa ya anna kede ka oona ya, i'i yungngö alinggo linggo niini.

<sup>11</sup> "Aaga amma ka tumma tanno eede kede ka tiki aaga a'da a'a na ka Pupa a Pupa ungngo eede. Lakiini üürü aaga taalo kamma kede, aaga amma kudumma linggo ka eyi tiya iini. <sup>12</sup> Ara a'a tadirina tumma aaga dhorro, ömö'dï ya amma kede ya a talinggo eema yeede ka talinggo ya, kara tüünii kii'bi i'i kudumma eede kara tunggeene naco ka Pupa tiya eede. <sup>13</sup> A niimö

yaada ka asaasa ana eere  
tiya eede ya, ara a'a talinggo  
amang ka Pupa tündhiginja  
ko'do ka 'Bii'bala.<sup>14</sup> Kada  
kara tasaasa nüümö öccö ana  
eere tiya eede ara a'a tal-  
inggo.

*Yasu eema tö'dö ma Koronggore tiya Insili ya*

<sup>15</sup> "Kada katasaasa a'a  
ara aaga tümmü tumma  
neede. <sup>16</sup> Ara a'a tarangnga  
Pupa yeede anangnga  
Tatamünüğü ko'do öccö  
aaga aneene nja aaga ta'billi,  
<sup>17</sup> i'i ya Koronggore ma  
timin'da ya. Ya kadu  
ma 'büdhülü taalo ka  
tambaanya tamma kini ya,  
kudumma eene taalo kiji i'i  
kitaalo kussu i'i. Lakiini  
aaga kungngo kussu i'i,  
kudumma iini ara tüütü nja  
aaga anna kada ka oona.  
<sup>18</sup> Taalo a'a nara tinyi aaga  
ku'bu kada nagüülö, ara a'a  
tafada nöö'dö kada. <sup>19</sup> A  
fungngö idhilli kungngo,  
taalo kadu ma 'büdhülü  
kara tiji a'a, lakiini aaga  
kungngo katassa kede,  
kudumma eede ka eefe ka  
'dö, aaga tefe ka 'dö tekere.  
<sup>20</sup> Ka uuru tanno miini no,  
ara aaga tessu a'da a'a na  
ka Pupa tiya eede, aaga  
kungngo eede, a'a nungngo  
ada. <sup>21</sup> Ömö'dö ya amma ka  
tumma tanno eede afa kide  
i'i ya asaasa a'a, ömö'dö ya  
asaasa a'a ya, a Pupa yeede  
tasaasa i'i, a'a tasaasa i'i  
nadele oona neede iini."

<sup>22</sup> İkiri Yahüüsa, (taalo  
Yahüüsa Askaryüütü i'i ya  
miini) ka tiki iini, "Ka  
Tatalaana, minna agu o'o

nadele oona ungngo nitaalo  
natatele oona a kadu ka  
'buugu koona 'do?"

<sup>23</sup> A Yasu tiki iini, "Ömö'dö  
ya asaasa a'a ya, ara  
taföönyö talaana neede.  
A Pupa yeede tasaasa  
i'i, ungngo tö'dö kini ma  
taneene nja iini. <sup>24</sup> Ömö'dö  
ya taalo asaasa a'a ya, taalo  
ataföönyö talaana neede,  
a tumma no taalo neede,  
tumma na Pupa yeede ka  
kürünü a'a iini.

<sup>25</sup> "Nadirina tumma aaga  
'bitüngngö a'da naleefe  
a'a nja aaga. <sup>26</sup> Lakiini  
Tatamünüğü ko'do, Ko-  
ronggore ya Insili ya, ya  
Pupa tiya eede ka tagürünü  
i'i ana eere tiya eede, i'i  
yungngo ara talaana aaga,  
aaga tagiigü eema yeede  
ka tagadünüğü aaga ya  
nye'd'de kungngo.

<sup>27</sup> "Ara a'a tinyi ta'diila  
kada ku'bu, nanangnga  
ta'diila neede aaga taalo  
atafeene afa ya kadu ma  
'büdhülü kamana aaga  
kungngo, aaga fa ta'deedene  
ka nanggeedi aaga tafa  
tari'ba. <sup>28</sup> Kaföönyö aaga  
eede ka tiki aaga a'da,  
'Ara a'a tunggeene na saga  
tafada nöö'dö kada.' A  
kada ka tasaasa a'a ara  
aaga tagadhodho kudumma  
eede ka tiki a'da ara a'a  
co ka Pupa kudumma Pupa  
adhabbu a'a. <sup>29</sup> Nilli a'a ka  
tirina aaga 'bitüngngö a'da  
üfürü tüünidene amang  
kene tara tüünidene, aaga  
tammasa kide. <sup>30</sup> Taalo a'a  
nara teema tumma nja aaga  
dhabbu kudumma uugaara

ma 'büdhülü ara tö'dö, lakiini i'i taalo uugaara ma a'a,<sup>31</sup> lakiini amang ka kadu ma 'büdhülü tussu a'da nasaasa a'a Pupa, a tumma na Pupa ka tirina a'a no nalinggo a'a iini.

"Aaga fiki'dö angnga tunggeene ndama kita.

## 15

*Yasu i'i ya taki'bim'bi tanno dhorro no*

<sup>1</sup> "A'a na taki'bim'bi tanno dhorro no, a Pupa yeede i'i ya yungngo afa ka ki'bim'bi.<sup>2</sup> Seldhe yeede ya taalo ana iïye ya adhege i'i co, a seldhe ya ara tana iïye ya indianaago amang kini tana iïye dhabbu.<sup>3</sup> A 'bitüngngö kinsili aaga kudumma a tumma tanno eede ka tirina aaga no.<sup>4</sup> Aaga amma'da kede afa ma a'a nja aaga kungngo, seldhe taalo ara teene unggodho i'i illi kini ka tüütü kada ki'bim'bi, aaga kafiigi nggeege, kada kati-taalo kamma'da kede ya, taalo aaga kara tö'dö keere ana iïye.

<sup>5</sup> "A'a na taki'bim'bi aaga ka naseldhe, ömö'dii ya ütü nja a'a ya a'a tüütü kini, atö'dö a tööyö dhabbu, lakiini kede ka titaalo ya, taalo aaga kara tüünii nüümö.

<sup>6</sup> Ömö'dii ya taalo ütü nja a'a ya, i'i afeene nja seldhe tiya kadhifinja co arume, naseldhe na miini no ka'dugadene kadhifinja ka issi kafinne.<sup>7</sup> Kada kara tüütü nja a'a a tumma neede tüütü kada, nüümö yaada

ka tasaasa ya, ara aaga taluna.<sup>8</sup> Ara Pupa yeede tüdhindhi kada ka tö'dö ana iïye dhabbu, nggeege ara aaga ta kadalaadene tanno eede.

<sup>9</sup> "Nasaasa a'a aaga afa ma Pupa tiya eede ka asaasa a'a kungngo, 'bitüngngö aaga tüütü ka tasaasa ma a'a.<sup>10</sup> Kada kara tafa ka tumma tanno eede, ara aaga tüütü ka tasaasa tanno eede, afa meede ka afa ka tumma tanno Pupa tiya eede nüütü ka tasaasa tanno iini.<sup>11</sup> A'a nadirina aaga nggeege amang ka dhodho tanno eede tüütü kada a dhodho tanno ada tatüümö.<sup>12</sup> Tumma neede eege kungngo, a'da aaga tasaasa ajeene afa meede ka asaasa aaga kungngo.<sup>13</sup> Taalo tasaasa ma tüdhindhi afa ma tanno kungngo, ma ömö'dii ka tüüpü eyi yiini eyi ka üüdü ma kateefe miini.<sup>14</sup> Aaga ka kateefe ma a'a, kada kara talinggo a tumma tanno eede ka anangnga aaga no.<sup>15</sup> Taalo a'a nara tümmünü aaga a'da kasaga ndama uuru tanno, kudumma a tasaga taalo ussu nüümö ya ömö'dii tiya iini ka talinggo ya nye'd'de. Lakiini ara a'a tümmünü aaga a'da kateefe ma a'a, kudumma eede ka tirina eema nye'd'de yeede ka taföönyö ka Pupa tiya eede ya aaga.<sup>16</sup> Taalo aaga kungngo kagesse a'a, lakiini a'a nagesse aaga nagürünü aaga ma co tö'dö ana iïye tanno ara teene ta'billi no, nüümö yaada ka asaasa ana

eere tiya eede ya, ara Pupa tanangnga aaga.<sup>17</sup> A tumma neede eege kungngo, aaga tasaasa ajeene dhorro.

*Kadu ma 'büdhülü taalo kasaasa kadalaadene*

<sup>18</sup> "Ka kadu kara takirimi aaga, aaga tagiigii a'da kagakirimi a'a ka dhidha.

<sup>19</sup> Kada kara ta kadu ma 'büdhülü ya, ara kadu ma 'büdhülü tasaasa aaga kada kadu tanno eene. Kudumma eede ka tagesse aaga ka 'büdhülü, aaga taalo kama iini afe'de i'i yungngo a kadu ma 'büdhülü kanu kada.

<sup>20</sup> Aaga agiigii tumma neede ka tageema nja aaga no, 'Taalo ömö'dii ya alinggo ya agii'bi ömö'dii yiini ka talinggo nja iini ya.' Kene ka takirimi a'a ya, kara takirimi aaga afe'de, a kene kara taföönyö talaana neede ya, kara taföönyö tumma naada.

<sup>21</sup> Kara talinggo ana aaga nggeege nye'd'de kungngo kudumma eere tiya eede, kudumma eene taalo kussu ömö'dii ya agürünü a'a ya.

<sup>22</sup> Kede kara tafa tagöö'dö nadageema nja eene ya, taalo tatoroko ka tagöö'dö kene ka oona, lakiini 'bitüngngö taalo niimö ma takara kene ka oona iini afe'de, kudumma eene ka ndaföönyö.

<sup>23</sup> Ömö'dii ya kirimi a'a ya, i'i ya akirimi Pupa yeede afe'de.

<sup>24</sup> Kede ka tafa tagalinggo eema kene ka söödö ya,

a'da taalo ömö'dii könö agalinggo nggeege, taalo

tatoroko ka töö'dö kene, lakiini eege 'bitüngngö ka adinö ka eema keefe, kassa ka tüütü kadakirimi a'a, nja Pupa tiya eede.

<sup>25</sup> Lakiini amang ka tumma tanno kakirinja ka Sorne ma seriye tiya eene ya töö'dö timin'da, 'Eege kakirimi a'a a'da taalo nagüünü tatoroko.'

<sup>26</sup> "Ka Tatamünüğü ko'do ka öö'dö, yeede kara tagürünü kada ndama Pupa, Koronggore ma timin'da ya icci kürö ndama Pupa ya, i'i yungngo ateema tumma ma a'a.

<sup>27</sup> Lakiini aaga tekere ara aaga teema tumma ma a'a co a kadu kudumma ada kada kaneene nja a'a ka dhidha.

## 16

<sup>1</sup> "Nadirina a'a tumma no aaga in'dili kungngo ii'di aaga tapadaga keere ka tumma tanno eede.

<sup>2</sup> Ara aaga sa kadasorodene ka naala ma talaana, tumma dhorro uuru kinggide kara sa köö'dö, a kadu na kirina aaga no tiki kide a'da eege kalinggo ada a Masala.

<sup>3</sup> Eege kalinggo nggeege kudumma eene katitaalo kussu Pupa yeede kitaalo kussu a'a.

<sup>4</sup> Nadirina a'a tumma no aaga, amang ka uuru tanno miini no kara töö'dö, aaga tagiigii a'da nagadirina a'a aaga, taalo a'a nagadirina aaga ka dhidha kudumma eede ka taleefe taganeene nja aaga.

*Lingga na Koronggore tiya Insili ya*

\* **15:25** 15.25 Tüüsü ma nakaaru 35.19; Tüüsü ma nakaaru 69.4

<sup>5</sup> "A 'bitüngngö ara a'a tunggeene naco ka ömö'dü tiya agürünü a'a ya, taalo ömö'dü öccö ana kada tindini a'a a'da, 'Ara o'o co kiga?' <sup>6</sup> Kudumma eede ka tiri tumma no, aaga tümmü nanggeedi.

<sup>7</sup> Lakiini ara a'a tadirina tumma aaga dhorro, agala ka'diila nja aaga eede kara tunggeene adha, kede ka titalo nunggeene, taalo Tatamünüğü ko'do ya afa kada ya ara tö'dö, lakiini kede kara tunggeene ara a'a tagürünü i'i kada. <sup>8</sup> A kini kara tö'dö ya, aala tatoroko ma kadu ma 'büdhülü eene nja ta'diila nja tahükümü tanno Masala.

<sup>9</sup> Kudumma tatoroko, kudumma eene taalo kamma kede. <sup>10</sup> Kudumma eene taalo kümmü tumma ma Masala ta'diila, yungno eede kara tunggeene naco ka Pupa, aaga taalo ka tiji a'a afe'de. <sup>11</sup> Kudumma tahükümü, asa uugaara ma 'büdhülü tahükümüdene.

<sup>12</sup> "Tumma kungngo eede kadhabbu eede ka asaasa tadirina aaga, lakiini aaga 'bitüngngö ya, taalo aaga kara tambanya eege. <sup>13</sup> Aga Koronggore ma timin'da ya kara tö'dö, assa ka talaana aaga ka eema tiya timin'da ya nye'd'de kungngo. Kudumma iini taalo eema tumma ma eyi tiya iini, lakiini i'i ara teema tumma niini ka taföönyö no, ara teema nja aaga ma niimi tiya tö'dö ya. <sup>14</sup> I'i ara tindhigü a'a ko'do, kudumma iini ka

ama tumma neede adünüğü aaga. <sup>15</sup> Eema ya ka Pupa tiya eede ya nye'd'de yeede i'i ya miini. Yungno eede ka tiki aaga a'da Koronggore ara ta'duga tumma kede anangnga aaga ka tussu eegē.

### *Fara ara tatem'bele kada dhodho*

<sup>16</sup> "Amussu kungngo ya taalo aaga kara tiji a'a, amussu kungngo afe'de ara aaga tiji a'a." <sup>17</sup> İkiri kadaladene niini könö ka tindini ajeene unggodho eege kiki a'da, "Minna yungno iini ka teema iki a'da, 'Amussu kungngo taalo aaga kara tiji a'a, amussu kungngo ara aaga tiji a'a,' ana 'Kudumma eede kara co ka Pupa'?" <sup>18</sup> Kindini ajeene kiki a'da, "Minna i'i yungno ana eere a'da, 'Idhilli ungngo'?" Taalo angnga kussu niimö yiini ka teema ya."

<sup>19</sup> İkiri Yasu ka tussu a'da eege kasaasa tindini i'i, ikiri ka tiki eene, "Aaga kindini ajeene ma niimö tiya eede ka teema ya, 'Idhilli kungngo taalo aaga kara tiji a'a, idhilli kungngo ara aaga tiji a'a'?" <sup>20</sup> Ara a'a tadirina tumma aaga dhorro, ara aaga sa kafara, aaga tüünü ngooro ara kadu ma 'büdhülü katadhodho. Ara aaga tadinigöögö aaga tiki iïye ku'bu, lakiini tadinigöögö naada no kassa ka ta'bele kada dhodho. <sup>21</sup> Aka kara teene 'bii'bala a tin'd'di, kudumma uuru ma teene

tanno oono ka ndö'dö, lakiini ka 'bii'bala kara teene-dene ya, müürü ma tin'd'di miini kono ka tadhodho kudumma oono ka tageene ada ömö'dii ka 'büdhülü.<sup>22</sup> A 'bitüngngö aaga kafiigi nggeege, kadiniögöögö aaga 'bitüngngö lakiini kede ka tafada ya, ara nanggeedi naada sa katadhodho ömö'dii ma ta'duga kada kungngo itaalo.

<sup>23</sup> "Ka uuru tanno miini no, taalo aaga ka tasaasa niimö kede, ara a'a tadi-rina tumma aaga dhorro, niimö yaada katasaasa ka Pupa ana eere tiya eede ya, ara tanangnga aaga.<sup>24</sup> Ta'bitüngngö taalo aaga karangnga niimö öccö ana eere tiya eede, aaga arangnga ara tananja aaga amang ka dhodho tanno ada tatuumö.

<sup>25</sup> "Nadiri a'a tumma aaga a tafeene ma tumma ün'dügüngngö, lakiini uuru kinggide kassa ka öö'dö taalo a'a nara teema a tafeene ma tumma nja aaga, ara a'a teema tumma ma Pupa tiya eede nja aaga 'biini kungngo.<sup>26</sup> Ka uuru tanno miini no ara aaga tarangnga ana eere ma a'a taalo a'a natiki a'da ara a'a tarangnga Pupa ka üüdü ma aaga.<sup>27</sup> Kaw, Pupa ka eyi tiya iini kungngo ya, asaasa aaga kudumma ada ka asaasa a'a, aaga tamma a'da a'a nöö'dö ndama Pupa.<sup>28</sup> A'a nöö'dö ndama Pupa nöö'dö ka 'büdhülü, a 'bitüngngö ara a'a tinyi 'büdhülü ku'bu napadaga ka

Pupa."

<sup>29</sup> İkiri kadalaadene niini ka tiki iini, "O'o 'bitüngngö neema o'o tumma dhorro, taalo o'o neema eege a tafeene ma tumma.<sup>30</sup> A 'bitüngngö kussu ungngo a'da nussu o'o eema nye'd'de kungngo, na o'o taalo nama ömö'dii ka tindini o'o ma niimö 'do, i'i yungngo iidi ka tamma a'da nöö'dö o'o ndama Masala."

<sup>31</sup> İkiri Yasu ka tiki eene, "Sa aaga tamma keere kungngo.<sup>32</sup> Uuru kinggide kara tö'dö, eege ka ndö'dö 'bitüngngö, aaga sa ka tanyala njaana ku'bu, ömö'dii tapadaga co 'buugu tiya iini unggodho i'i aaga tinyi a'a ku'bu unggodho a'a, lakiini taalo a'a nara taneene unggodho a'a kudumma ma Pupa tiya eede ataneene nja a'a.

<sup>33</sup> "Nadirina a'a eema ya aaga amang kada taluna ta'diila kede, ara aaga tadhügürü ka 'büdhülü tiya, lakiini aaga fa tari'ba, nagii'bi a'a türü ma 'büdhülü."

## 17

*Yasu afara ka Masala ma eyi tiya iini*

<sup>1</sup> Ka Yasu ka tiri tumma no ya, assa co 'dotombo'do iki,

"Pupa, asa uuru tö'dö, indhiği 'Bii'bala yüüdü ko'do amang kini tafünüğü o'o ko'do.<sup>2</sup> O'o nanangnga tauugaara ma kadu nye'd'de iini, amang kini tanangnga tefe ka 'dii ta'billi a kadu nye'd'de

nüdü ka anangnga iini no.<sup>3</sup> A tefe ka 'dī ta'billi meene ka tussu a'da, o'o na Masala tammo dhorro mo unggodho mo, kussu Yasu Almasiihi yüdü ka kürünü i'i ya.<sup>4</sup> Nö'dö a'a a tüdhindhi o'o ka 'büdhülü kita ma tatimö linggo nüdü ka anangnga a'a a'da nalinggo no.<sup>5</sup> Nangnga tüdhindhi a'a 'bitingngö küdü kidha Pupa yeede a tüdhindhi na kanna kede nja o'o no a'da üfürü 'büdhülü tagalinggo adene."

*Yasu afara ka Masala kudumma kadalaadene tanno iini*

<sup>6</sup> "Nanangnga eere yüdü ka tussu adene ka kadu tanno üdü ka anangnga eege ka 'büdhülü no. Kadu nüdü eege kamiini, nanangnga o'o eege a'a kikirri ka föonyö tumma nüdü dhorro.<sup>7</sup> A 'bitingngö eege kussu a'da eema yüdü ka anangnga a'a nye'd'de ya, ö'dö ndama o'o.<sup>8</sup> Nadirina tumma nüdü ka tirina a'a no eene kamma kide. Eege kussu a'da tumma dhorro a'da nö'dö a'a ndama o'o, kamma a'da o'o nagürünü a'a.<sup>9</sup> Ara a'a tafara ka Masala kudumma eene. Taalo a'a natafara kudumma a kadu ma 'büdhülü, lakiini kudumma a kadu tanno üdü ka anangnga a'a no, kudumma eene kada kadu tanno üdü.<sup>10</sup> Eema ya inggide nye'd'de yüdü i'i ya miini, aya küdü

ya nye'd'de, yeede i'i ya miini. A'a tüdhindhi ana eege.<sup>11</sup> Taalo a'a nara tüdü ka 'büdhülü, illi eege kara tüdü kide, ara a'a tö'dö küdü, Pupa yeede ya Insili ya, afa kene a türü ma eere tiya üdü ka anangnga a'a ya, amang kene ta unggodho, afa ma o'o nja a'a kada unggodho kungngo.<sup>12</sup> Kede ka taganeene nja eene ka 'büdhülü ya nakafa a'a kene ana eere tiya üdü ka anangnga a'a ya, nakafa a'a kene taalo könö ana kene aama illi ömö'di ya illi ka tagaama ya afa ma tiya Sorne ka tiki ya kungngo.

<sup>13</sup> 'Bitingngö ara a'a tö'dö küdü, a'a nadiri tumma no kede ka aleefe ka 'büdhülü, amang ka dhodho tanno eede tanna kene ka oona.<sup>14</sup> Nadirina tumma nüdü eene, illi kadu ma 'büdhülü kanu kene kudumma eene ka titalo kama 'büdhülü, afa ma a'a taalo nama 'büdhülü.<sup>15</sup> Taalo a'a niki o'o a'da na'duga eege ka 'büdhülü, lakiini na o'o tafa kene kudumma Ebliisi.<sup>16</sup> Eege taalo kama 'büdhülü a'a taalo nama 'büdhülü afe'de.<sup>17</sup> Nanangnga eege ka tinsili a tumma tanno üdü na dhorro no, kudumma tumma tanno üdü ka dhorro.<sup>18</sup> A'a nagürünü eege ka 'büdhülü afa müdü ka kürünü a'a ka 'büdhülü kungngo.<sup>19</sup> Nanangnga a'a eyi yeede ka tinsili kudumma

eene, amang kene tinsili tekere ka tumma tanno üüdü na dhorro no."

*Yasu afara ka Masala ma kadu tanno amma no*

<sup>20</sup> "Taalo a'a nafara kene kudumma eene unggodho eege, lakiini a'a nafara ka kadu tanno ara tamma kede no a tamma ka tumma tanno eene. <sup>21</sup> Nanangnga eege kada unggodho nye'd'de kadanna kaja ka oona, afa ma o'o ka tanna kede, a'a nungngo küdü, fa kene tekere kanna kaja ka oona amang ka kadu ma 'büdhülü tussu a'da o'o nagürünü a'a. <sup>22</sup> Nunggu a'a tiddhindhi nüüdü ka anangnga a'a no nanangnga eene, amang kene ta unggodho afa ma angnga kada unggodho kungngo. <sup>23</sup> A'a nungngo eene ka oona o'o nungngo eede ka oona amang kene ta unggodho tatuumö amang ka kadu tussu a'da o'o nagürünü a'a, o'o nasaasa eege afa müüdü ka asaasa a'a kungngo.

<sup>24</sup> Ka Pupa, o'o nanangnga eege a'a nasaasa eege a'da kaneene nja a'a ka 'buugu tiya eede ka tanna kide ya, amang kene tiji tiddhindhi nüüdü ka anangnga a'a no, kudumma üüdü ka asaasa a'a a'da üfürü 'büdhülü tarü'bü adene. <sup>25</sup> Ka Pupa ya a'diila ya, salsa kadu ma 'büdhülü taalo kussu o'o illi a'a nungngo nussu o'o, a kadalaadene tussu a'da o'o nagürünü a'a.

<sup>26</sup> Nanangnga eege ka tussu o'o nara tala eege kide amang ka tasaasa tanno kede no, tanna kene, a'a ka eyi tiya eede nanna kene."

## 18

*Tümmü adene na Yasu  
(Matta 26.47-56; Murkus 14.43-50; Lüüka 22.47-53)*

<sup>1</sup> Ka Yasu ka tüümö fara ka Masala ya, öö'dö kürö nja kadalaadene tanno iini kada'da Koolo ma Kitröön 'booro inggide ka 'buugu tiya miini ya, ikirü ka co nja kadalaadene tanno iini.

<sup>2</sup> A'da ussu Yahüüsa ya agümmünü i'i a kadu ya, ussu 'buugu ya, kudumma Yasu ka takicci tanna inggide nja kadalaadene tanno iini.

<sup>3</sup> Ikirü Yahüüsa ka öö'dö ka 'booro nja nasigira nja kadu tanno afa ka naguugaara ma ka'boge nja tanno naFariisi no kagürünü eege a'da ka'duga lamba nja issi ma tam'bala kafinne nja eema ma koro'bo. <sup>4</sup> Ikirü Yasu ka toreene nja eene a'da ussu nüümö ya atalinggo adene ana i'i ya, iki eene, "Kasaasa aaga mada?"

<sup>5</sup> Kiki, "Yasu ya ma Nasira ya."

A Yasu tiki eene, "A'a nungngo," a'da Yahüüsa ya ümmünü i'i a kadu yungngo a'dingnge nja eene. <sup>6</sup> Aga Yasu ka tiki eene a'da, "A'a nungngo ya," kadagitigi keere ka'dingga ka 'büdhülü.

<sup>7</sup> İkirī Yasu ka tindini eege afe'de, "Kasaasa aaga mada?"

Kiki a'da, "Yasu ya Nasira ya."

<sup>8</sup> İkirī Yasu ka tiki eene a'da, "A'a niki aaga, a'a nungngo, üürü aaga kasaasa a'a, aaga fa ka kadu tanno kunggeene." <sup>9</sup> A tumma niini ka tatiraana no co ööye miini, "Taalo a'a naama ömö'di öccö unggodho ana ka kadu tanno üüdü ka nanangnga a'a no."

<sup>10</sup> A'da kulu'ba ma dhonggoro mo mungngo a Samaan Bütrüs, ikirī ka fanna armuna tasigira ya uugaara ma ka'boge ka neeso ma kuri, ya ana eere a'da Malkis ya.

<sup>11</sup> İkirī Yasu ka tiki a Bütrüs, "Apadaga kulu'ba ma dhonggoro mo müüdü co la miini, taalo a'a nara tooye ker'de ma dhügürü tiya Pupa tiya eede ka anangnga a'a sa?"

*Yasu ungngo kidha ma Hanan*

<sup>12</sup> İkirī nasigira nja uugaara tiya eene nja nasigira ma la ma Masala ka tümmü Yasu kadimi'di i'i. <sup>13</sup> Ka'duga Yasu kaco ka Hanan ana i'i ka dhidha, ya 'berki ma Kiyaafa ya i'i ya uugaara ma ka'boge ka ürüünü tiya miini ya. <sup>14</sup> A Kiyaafa ya i'i yungngo akiki a Yahüüdü a'da, "A'diila ka ömö'di unggodho ka teyi ka üüdü ma kadu."

*Bütrüs a'düsünü Yasu*  
(Matta 26.69-70; Murkus 14.66-68; Lüüka 22.55-57)

<sup>15</sup> A Samaan Bütrüs nja tatalaadene töccö tako'd'do ka Yasu keere. Kudumma a tatalaadene tiya miini ya, tagussu ajeene nja uugaara ma ka'boge, aco nja Yasu ka 'booro tiya uugaara ma ka'boge. <sup>16</sup> İkirī Bütrüs ka töödhü ka inye ndama kürö, a tatalaadene öccö, ya uugaara ma ka'boge ka tussu i'i ya, tapadaga co kürö adageema nja 'badaada tammo mafa ka inye mo, oogo mungngo munggu Bütrüs co a 'bügööri. <sup>17</sup> İkirī 'badaada ma fa ka inye mo, ka tiki a Bütrüs, "Taalo o'o na tatalaadene tiya ömö'di tiya?"

A Bütrüs tiki, "Taalo a'a nja iini."

<sup>18</sup> İkirī kadu ma linggo nja nasigira kafülle issi, ka'dingnge ana ko'do kille issi kudumma ma 'buugu ka tiicolo, ikirī Bütrüs ka a'dingnge ille issi nja eene.

*Uugaara ma ka'boge indini Yasu*  
(Matta 26.59-66; Murkus 14.55-64; Lüüka 22.66-71)

<sup>19</sup> İkirī uugaara ma ka'boge ka tindini Yasu ma kadalaadene tanno iini nja talaana tanno iini. <sup>20</sup> A Yasu tiki iini, "Nageema a'a nja kadu ana ndanaaya ko'do nalaana kadu 'bucca ka naala ma talaana nja la ma Masala kita Yahüüdü ka tamiimi kide eege nye'd'de ya, na a'a taalo nageema niimö öccö unggodho ka küdhü. <sup>21</sup> O'o nindini a'a amana? Indini kadu na föönyö kede no, niki a'a a'da

minna, eege kussu nüümö yeede ka tageema ya."

<sup>22</sup> Aga Yasu ka tiraana nggeege ya, ikirii tasigira ökönö aganna kini kete a abbü i'i ka tanggarama iki iini, "Neema o'o nja uugaara ma ka'boge nggeege amana?"

<sup>23</sup> İkirii Yasu ka tiki iini, "Üürü nadiri a'a nüümö ya toroko ya, tiri i'i ka kadu kidha, üürü nadiri a'a tumma na dhorro no a minna agu o'o nabbü a'a?"

<sup>24</sup> İkirii Hanan ka timi'di i'i uurugu i'i co Kiyaafa ya uugaara ma ka'boge ya.

*Bütrüs a'düsünü Almasi-  
ihı teera tiidoona*

(Matta 26.71-75; Murkus 14.69-72; Lüüka 22.58-62)

<sup>25</sup> Ka Samaan Bütrüs ka 'dingnge ille issi ya, kikirii ka tiki iini, "Taalo o'o na tatalaadene tiya iini?"

A'düsüniggi iki, "Taalo a'a nja iini."

<sup>26</sup> İkirii könö ana ka kadu ma linggo tanno uugaara ma ka'boge ya siliga ma ömö'di tiya Bütrüs ka rumuna i'i ka neeso ya, iki iini, "Taalo a'a nadinö küdü ka 'booro nja iini?"

<sup>27</sup> A Bütrüs ta'düsünü i'i afe'de a'da arooro dhimbii ka tagolo fara.

*Yasu ungngo ka Bilatus  
kidha*

(Matta 27.1-2, 11-14;  
Murkus 15.1-5; Lüüka 23.1-5)

<sup>28</sup> A Yahüdü tikirii ka a'duga Yasu ndama kita ka Kiyaafa kaco 'di tiya uugaara ma Rööma ligitaka so'd'do,

a Yahüdü taalo kinyno 'dii tiya uugaara, kudumma eene taalo kasaasa tanyoro ka uuru ma taanyara amang kene tagu kuri ma Tada'da ka Eriidö. <sup>29</sup> İkirii Bilatus ka öö'dö kene kürö indini eege, "Kümmü aaga ömö'di ya amana?"

<sup>30</sup> Kiki, "Kini ka tafa tagüüni nüümö ya tatoroko ya, taalo ungngo kara tagöö'dö ana i'i o'o."

<sup>31</sup> İkirii Bilatus ka tiki eene, "Aaga 'duga i'i aaga tümmü i'i a tumma ma seriye tiya ada."

Kiki iini, "Taalo ungngo kama tümmü i'i ma tiidi i'i." <sup>32</sup> A tumma na Yasu ka tiraana a'da inde niini kara tatüümö timin'da.

<sup>33</sup> İkirii Bilatus ka co la ma tauugaara atümmünü Yasu iki iini, "O'o na uugaara ma Yahüdü?"

<sup>34</sup> A Yasu tiki iini, "O'o natiraana unggodho o'o alla kadu könö kadirina o'o ma a'a?"

<sup>35</sup> İkirii Bilatus ka tiki, "A'a na Yahüdü sa? Kadu nüüdü nja naguugaara ma ka'boge kümmü o'o köö'dö ana o'o kede, nagalinggo o'o minna?"

<sup>36</sup> İkirii Yasu ka tiki iini, "Tauugaara neede taalo kama 'büdhülü tiya, ka tauugaara tanno eede ka taga ama 'büdhülü ya, ara kadu neede tafaga Yahüdü keere ka tümmü a'a, a tauugaara neede kitaalo kama 'büdhülü."

<sup>37</sup> İkirii Bilatus ka tiki iini, "O'o no uugaara 'ba?"

A Yasu tiki iini, "O'o niki a'da a'a na uugaara, i'i yungngo eede ka tageenedene nöö'dö ka 'büdhülü amang kede tadünnü tumma na dhorro no, ömö'dü ya adho ka fiinii ma timin'da ya, ara taföönyö tumma neede."

<sup>38</sup> İkiri Bilatus ka tiki iini, "Minna yungngo a dhorro ngo?" Kini ka tiraana nggeege ikiri ka co ka Yahüdü kürö afe'de iki eene, "Taalo a'a naduna niimö ya toroko ya ma tümmü i'i iini. <sup>39</sup> Lakiini tafiigi ma aaga katadaada napaapa a'a ka ömö'dü ma pabuusu ka uuru ma Taanyara ma Tada'da ka Eriidö, kasaasa aaga a'a a'da napa ka uugaara ma Yahüdü?"

<sup>40</sup> Keela ka tumma ko'do nye'd'de kungngo kiki, "Kaw, fa tapa ka ömö'dü tiya, apa ka Barabas." A Barabas agosso ka taga'da 'buugu.

## 19

*Yasu ümmü adene ma teyi*

<sup>1</sup> İkiri Bilatus ka anangnga kadu katabbü Yasu. <sup>2</sup> A nasigira tagu'daana tagiya ma immi konna kanangnga kini ka üdü kagirni ten'di ma tauugaara ma öödhe mo kini ka oona. <sup>3</sup> Keema kini ka oona, "A'a nööjülü uugaara ma Yahüdü," kabbü i'i ka karama.

<sup>4</sup> A Bilatus tapadaga ka Yahüdü iki eene, "Ara a'a turugu i'i kada kürö amang kada tussu a'da taalo a'a naluna niimö ya toroko ya kini." <sup>5</sup> İkiri Yasu ka öö'dö

kürö ana tagiya ma immi ka üdü a ten'di ma tauugaara ma öödhe mo ka oona, ikiri Bilatus ka tiki eene, "Aaga assa ka ömö'dü ungngo."

6 Aga naguugaara ma ka'boge nja nasigira ka tasala i'i ya, keela ka tumma kiki, "Bünnü i'i ka salii'bi! Bünnü i'i ka salii'bi!"

İkiri Bilatus ka tiki eene, "Aaga 'duga i'i aaga tabünnü ka salii'bi unggodho aaga taalo a'a naluna niimö ya toroko ya kini ma tümmü i'i."

7 A Yahüdü tiki iini, "Tumma ma seriye nüüdi kiki a'da, i'i ama teyi, kudumma iini ka tümmü eyi yiini kada 'Bii'bala ma Masala."

8 Ka Bilatus ka taföönyö tumma neene no ya, a ri'ba tümmü i'i dhindho.

<sup>9</sup> Apadaga co la ma tauugaara afe'de iki a Yasu, "O'o no ma kiga 'do?" A Yasu tagin'dü iini dhore kungngo.

<sup>10</sup> İkiri Bilatus ka tiki iini, "Taalo o'o nasaasa teema nja a'a? Taalo o'o nussu a'da türü kungngo eede, ma tapa küdü, alla nabünnü o'o ka salii'bi?"

<sup>11</sup> İkiri Yasu ka tiki iini, "Taalo o'o nana türü ma a'a, taalo Masala manangnga üürü o'o, lakiini ömö'dü ya ümmünü a'a o'o ya, tatoroko niini kadhabbu a tatoroko tanno üdü."

<sup>12</sup> A Bilatus taka'b'ba oona ma tasaasa tapa ka Yasu, lakiini Yahüdü kiidhe ko'do kiki, "Küdü ka tapa kini taalo o'o na teefe ma Kay-isar. Kudumma ömö'dü tiya

ümmü eyi yiini kada uugaara ya i'i ya diidi tiya Kayisar."

<sup>13</sup> Ka Bilatus ka ndaföönyö tumma no ya, ikirii ka turugu Yasu co kürö ara ka temmi ka kööyö ma tauugaara ka 'buugu tiya ana eere a'da 'dokon'da ya, (a kadu ma Yahüüdü ka tümmüneene a'da Kabatha). <sup>14</sup> Uuru ma Juma eege kamini, na kadu ka tindinaana oona ku'bu ma Taanyara ma Tada'da ka Eriidö no, a'da asa 'buugu ta uuru ka teene, ikirii ka tiki a Yahüüdü, "Uugaara yaada ungngo."

<sup>15</sup> Keela ka tumma kiki, "Aaga iidi i'i. Aaga iidi i'i. Bünnü i'i ka salii'bi."

İkirii Bilatus ka tiki eene, "Niidi uugaara yaada?"

İkirii naguugaara ma ka'boge ka tiki, "Taalo uugaara kidi illi Kayisar."

<sup>16</sup> Keere kungngo ikirii Bilatus ka anangnga i'i eene kaco tabünnü i'i ka salii'bi, kikirii ka 'duga Yasu kunggeene iini.

*Yasu abünnünja ka salii'bi*

(Matta 27.32-44; Murkus 15.21-32; Lüüka 23.26-43)

<sup>17</sup> İkirii Yasu ka öö'dö kürö a'duga salii'bi yiini aco a 'buugu tiya ana eere a'da Dho ma Üüdü ya, (ya kadu ma Yahüüdü ka tümmünnü i'i a'da Jüljüsa ya). <sup>18</sup> Kabünnü i'i ka salii'bi kanna nja kadu keera, ömö'dii öccö ka 'dakeyi tiya aya ka 'dakeyi tiya, a Yasu tanna kene ka

söödö. <sup>19</sup> İkirii Bilatus ka ta'dala ndagee'di ko'do ka salii'bi adarigiri ada kide a'da, "YASU YA MA NASIRA YA I'I YA UUGAARA MA YAHÜÜDÜ." <sup>20</sup> A Yahüüdü kadhabbu tagiirii tumma no, kudumma a 'buugu tiya miini ya akete ka anya, kari-giri ada kide a tumma ma Yahüüdü nja tangga Latiini nja tangga Yünan. <sup>21</sup> İkirii naguugaara ma ka'boge ma Yahüüdü ka tiki a Bilatus, "Fa tarigiri a'da, 'Uugaara ma Yahüüdü,' lakiini arigiri a'da, 'Ömö'dii ya iki a'da i'i ya Uugaara ma Yahüüdü.'"

<sup>22</sup> İkirii Bilatus ka tiki eene, "Nüümö yeede ka tarigiri ya, atütü nggeege."

<sup>23</sup> Ka nasigira ka bünnü Yasu ka salii'bi ya, ka'duga en'di yiini kasümünaana kene ku'bu egüsö, a tasigira ya ta'duga yiini, aya ta'duga yiini, ka'duga ten'di ma oona miini mar'dadene ndama ta'doogo möö'dö ku'bu taalo mar'dadene nye'd'de. <sup>24</sup> A nasigira tököönö tiki, "Kada fa tagodho aana ten'di ma oona ku'bu, illi angnga tafanna muduru angnga taküöröönö mara ta'dingga ka mada?" Amang ka tumma ma sorne co ööye miini,

"Kasümünaana en'di yeede  
kene ku'bu  
kafanna tamuduru ma  
ten'di tammo eede."

I'i yungngo nasigira ka tüünii.

<sup>25</sup> A kadu na kanna ka salii'bi tiya Yasu kete no, nüümö miini nja ïnye tammo nüümö, Mariyom aka ma Kilooba nja Mariyom Almajdaliya. <sup>26</sup> A Yasu tasala nüümö miini ka 'dïngnge nja tatalaadene tiya iini ka asaasa i'i ya, ikirri ka tiki a nüümö tammo iini, "Aka mo, 'bii'bala yüüdü i'i yungngo," <sup>27</sup> ikirri ka tiki a tatalaadene, "Nüümö müüdü oogo mungngo." Ndama uuru tanno miini no ikirri tatalaadene ka a'duga oogo aaco 'dï tiya iini.

### *Inde na Yasu*

(Matta 27.45–56; Murkus 15.33–41; Lüüka 23.44–49)

<sup>28</sup> Ikirri Yasu ka ndussu a'da asa eema nye'd'de tafaradene ikirri ka tiki, "Kagu te nege a'a." Afa ma tiya Sorne ka tiki ata tiimö. <sup>29</sup> A'da maganna dho kide madigine a kembelö, kikirri ka mi'dini sifinja ka 'boola ma timerö kollo ka kembelö kunggu coo'do kümmünü kini ka niinö. <sup>30</sup> Aga Yasu ka tagolo kembelö iki, "Asa eema tafaradene nye'd'de." Iti ku'bu eyi.

### *Yasu üfüdene ka tügüle*

<sup>31</sup> Ka uuru tanno miini no kindinaana kadu oona ku'bu ma uuru ma Sa'bidi, ikirri Yahüüdü ka tiki a Bilatus a'da, afa kene ka'buna kadu na bünnünja ka salii'bi no ka uune kunggu eege ku'bu, kudumma Yahüüdü taalo kasaasa oofo yeene ka

tütü ka salii'bi ka uuru ma Sa'bidi, kudumma uuru ma Sa'bidi idhindhi. <sup>32</sup> Ikirri nasigira köö'dö ka'buna uune na ömö'di tiya dhidha ya nja tiya eere ya na bünnünja ku'bu nja Yasu no. <sup>33</sup> A kene kandö'dö ka Yasu ya, kaduna i'i ka teyi itaalo ka'buna i'i ka uune. <sup>34</sup> Lakiini tasigira könö üfü i'i ka tügüle a kandha eriidö tö'dö kürö nja 'büüdi. <sup>35</sup> Ömö'di ya adinö kide ya eema tumma dhorro, i'i ussu a'da eema i'i tumma dhorro amang kada tamma. <sup>36</sup> Amang ka tumma tanno sorne ka tiki no, co ööye miini, "Taalo ku'ba yiini unggodho kungngo ara ta'bunadene." <sup>37</sup> A sorne tiki afe'de, "Ara kadu sa kiji ömö'di ya üfü i'i ya."

### *Tatü'büdene na Yasu*

(Matta 27.57–61; Murkus 15.42–47; Lüüka 23.50–56)

<sup>38</sup> Ikirri Yüüsif ya ma Raama ya aga tatalaadene tiya Yasu ka küdhü, kudumma iini ka ri'ba a Yahüüdü, ö'dö iki a Bilatus anangnga Yasu iini, ikirri ka 'duga oofo ya Yasu. <sup>39</sup> Ikirri Niködimus ya agöö'dö ka Yasu ooso kungngo ya nja Yüüsif, ö'dö a kondho matonggoonyo a felengidhi tamana ma nakajine kukumu kadu kiidoona kaco iisine ana awwa. <sup>40</sup> Kikiri ka 'duga Yasu ka'bürü i'i ka oona a ten'di nja kondho afa tatü'böönö na Yahüüdü no

kungngo. <sup>41</sup> Kita eene ka tabünnü Yasu kide ya, raaga inggide, ka raaga tiya miini ya la ma oofo inggide aleefe takii'dödene, ömö'di tüfürü tatü'büdene kide. <sup>42</sup> İkiri ka tü'bü Yasu kide kudumma eene ka 'digaana, kudumma uuru ma tindinaana oona ku'bu, a la ma oofo akete kene taalo agu'b'ba.

## 20

*Uuru ma tafiki'i dö na Yasu*

<sup>1</sup> Ka uuru ma Lahada mikiri Mariyom Almajdaliya ka tunggeene ligitaka so'd'do a'da aleefe 'buugu tirifirifi maco la ma oofo maluna dhembeliili ka a'dugadene ka iyye. <sup>2</sup> Mikiri ka tareere maco ka Samaan Bütrüs nja tatalaadene tiya Yasu ka asaasa i'i ya, miki eene, "Ka'duga Uugaara ka la ma oofo ungngo taalo kussu kanangnga i'i kiga."

<sup>3</sup> İkiri Bütrüs nja tatalaadene töccö kaco la ma oofo. <sup>4</sup> Kada kiisö ateera meene ka dhidha illi tatalaadene aküpü Bütrüs aaco la ma oofo ka dhidha. <sup>5</sup> Iti ku'bu asala co teene miini asala en'di yeene ka ta'bürü i'i ka oona iini ya, illi i'i taalo inynyo la ma oofo ka teene. <sup>6</sup> A Samaan Bütrüs tö'dö kini keere arooro kico la ma oofo asala en'di ka 'büdhülü. <sup>7</sup> A mandiili ma aganna ka Yasu ka üdü mo ta'dukunjaana ko'do, unggodho oogo, taalo makete ka en'di ma tatü'böönö. <sup>8</sup> Keere kungngo, ikiri tatalaadene ya adhe a Bütrüs ya, kico

la ma oofo asala amma kide. <sup>9</sup> Kudumma eene ka tüfürü tagussu tumma na ka Sorne ma Masala no, iki a'da Yasu ara tafiki'i dö ndama inde. <sup>10</sup> İkiri kadalaadene ka tafada kaco 'di tiya eene.

*Yasu atele oona a  
Mariyom Almajdaliya  
(Matta 28.9-10; Murkus 16.9-11)*

<sup>11</sup> A Mariyom ta'düngnge ana ko'do ka la ma oofo kürö mafara, miti ku'bu ka la ma oofo mafara, <sup>12</sup> maasala kadhangga keera ana en'di ka oona kada ka'bassa katemmi ka 'buugu tiya Yasu ka taganna kide ya, ököönö emmi ndama üdü, aya ndama uune.

<sup>13</sup> A kadhangga na eera no tiki oono, "Ka aka mo, minna agu o'o nafara?"

Miki eene, "Ka'duga Uugaara yeede, taalo a'a nussu kanangnga i'i kiga?"

<sup>14</sup> Kono ka tiki nggeege ya, maasala keere maasala Yasu ka 'düngnge ana ko'do mitaalo mussu a'da Yasu i'i ya miini.

<sup>15</sup> İkiri Yasu ka tiki oono, "Ka aka mo, minna agu o'o nafara? O'o nasaasa mada?"

Miki kide a'da ömö'di ma 'booro i'i ya miini, miki iini, "Ka ömö'di eede, üürü o'o na'duga i'i 'dee, la a'a kita üdü ka anangnga i'i kide ya amang kede co ta'duga i'i."

<sup>16</sup> İkiri Yasu ka tiki oono, "Ka Mariyom."

Mikiri ka tassa kini mussu i'i, miki iini, "Rabbuni," Tatalaan a tangga Yahüdü.

<sup>17</sup> İkiri Yasu ka tiki oono, "Fa tümmü a'a ka oona a nüüsö, kudumma eede ka tūfürü tasirigö coo'do ka Pupa, lakiini unggene naco ka nagöre tanno eede no niki eene a'da, 'Ara a'a co ka Pupa tiya eede a'da a Pupa tiya ada, Masala meede a'da ma tammo ada afe'de.'

<sup>18</sup> Mikiři Mariyom Almaj-daliya ka tafada maco madirina eema a kadalaadene a'da oogo madinö ka Uugaara, oogo madirina eene a'da i'i ya tirina tumma no oono.

*Yasu atele oona a kadalaadene tanno iini  
(Matta 28.16-20; Murkus 16.14-18; Lüüka 24.36-49)*

<sup>19</sup> Ka uuru ma Lahada siiya kungngo ka kanna kadalaadene ka la, keere ka naginyeene eene kari'ba a Yahüdü. İkiri ka öö'dö a'dingnge kene ka söödö, iki eene, "A'a nööjülü aaga."

<sup>20</sup> İkiri ka ala iisine eene nja tūgule, kikiri kadalaadene ka tadhodho kene ka tasala Uugaara. <sup>21</sup> İkiri Yasu ka tiki eene afe'de, "Nööjülü aaga, afa ma Pupa ka kürünü a'a kungngo, ara a'a tagürünü aaga." <sup>22</sup> Kini ka tiraana nggeege ya, ikiri ka fülle ada kene ka oona iki eene, "Aaga 'duga Koronggore ya Insili ya.

<sup>23</sup> Üürü aaga kaadha ka tatoroko tanno ömö'di kara taadha, üürü aaga taalo kaadha kene, taalo kara taadha."

*Yasu atele oona a Tööma*

<sup>24</sup> A tatalaadene ököönö ana kene no ö'dö kada'baaga

kafünü eera no ana eere a'da Tööma (a'da Miiso) akitaalo, ya Yasu ka tagöö'dö kene. <sup>25</sup> İkiri kadalaadene ka tiki iini, "Kadinö ungngo ka Uugaara."

İkiri ka tiki eene, "Taalo a'a nara tamma illi eede ka tasala kijeene ma namusmara kini ka iisine nanangnga 'banüsö yeede ka 'buugu ma namusmara, nanangnga iisine neede kini ka tūgule."

<sup>26</sup> Ka füngngö ka ndö'dö iidümmü afünü iidoona ya, a kadalaadene kungngo ka la afe'de a'da Tööma inggide nja eene a'da kateere naginyeene, ikiri Yasu ka öö'dö a'dingnge kene ka söödö iki eene, "A'a nööjülü aaga."

<sup>27</sup> İkiri ka tiki a Tööma, "Aayu a 'banüsö tiya üüdü kita nassa kede ka nüüsö nöö'dö, aayu a nüüsö nanangnga kede ka tūgule nafa ta'doore ka eedi, lakiini namma."

<sup>28</sup> İkiri Tööma ka tiki, "Uugaara yeede nja Masala tammo eede."

<sup>29</sup> İkiri Yasu ka tiki iini, "Ka Tööma, namma o'o kudumma üüdü ka tadinö kede! A'diila ada a kadu tanno amma a'da taalo kijöögö no."

<sup>30</sup> Eema inggide adhabbu keefe, a Yasu ka tagalinggo ka kadalaadene kidha, illi i'i taalo ikirinja ka sorne tiya.

<sup>31</sup> Illi eema ya ikirinja kita, amang kada tamma a'da Yasu i'i ya Almasiihi 'Bii'bala ma Masala, amang kada taluna tefe ka 'di ana eere

tiya iini ada kara tamma kini.

## 21

*Yasu atele oona a  
kadalaadene tanno na  
üdümmü kafünü eera no*

<sup>1</sup> A Yasu tala oona a kadalaadene tanno iini afe'de ka tinggini ma to ma Tabariya. <sup>2</sup> A'da kaganeene nja Samaan Bütrüs nja Tööma yeene ka tümmünü i'i a'da Miiso ya, nja Nasanayiil ya ama Kaana ma ka Jaliil mo, nja laala tiya Za'bedi, nja kadalaadene tanno Yasu könö keera. <sup>3</sup> İkiri Samaan Bütrüs ka tiki eene, "Ara a'a co takinne kilöögö."

Kikiri ka tiki iini, "Ara ungngo co nja o'o tekere." Kikiri ka öö'dö kürö kaka ka mürkabü, lakiini eege ka ooso tanno in'dili no taalo kümmü müdigilöögö 'do.

<sup>4</sup> Ligitaka kungngo a Yasu ta'dingnge ka tinggini ma to, a kadalaadene taalo kussu a'da Yasu i'i ya miini. <sup>5</sup> İkiri ka tümmünü eege iki eene, "Kateefe ma a'a taalo aaga kümmü müdigilöögö?"

Kiki iini a'da, "Kaw."

<sup>6</sup> Iki eene, "Aaga ra'baga sa'baka co 'büüdi ndama 'dakeyi ma nüüsö ma kuri ma mürkabü amang kada tümmü nüümö." Kikiri ka tara'baga sa'baka co kitaalo kambaanya töösi, kudumma iini ka tigine a kilöögö.

<sup>7</sup> İkiri tatalaadene ya Yasu ka asaasa i'i ya, ka tiki a Bütrüs, "Uugaara i'i ya miini!" Areere kungngo ya

ka Samaan Bütrüs ka föönyö iini ka tiki a'da Uugaara ya miini, ikiri ka kırni ten'di iini ka oona kudumma iini ka taganeene ana oona ku'bu afri co 'büüdi. <sup>8</sup> İkiri kadalaadene ökönö ka öö'dö a mürkabü köösü sa'baka adigine a kilöögö kide, kudumma eene kitaalo ka ku'b'ba ka tinggini ma to illi namitiri kö'dö miya. <sup>9</sup> A kene ka ndöö'dö ko'do ka 'dukundaala ya, kasala issi ma kiya ka finne a kilöögö kide nja miteene.

<sup>10</sup> İkiri Yasu ka tiki eene, "Aaga ö'dö a kilöögö tanno ada ka tümmöönö 'bitüngngö no."

<sup>11</sup> İkiri Samaan Bütrüs ka öö'dö ko'do asirö mürkabü asisigi sa'baka ka 'büdhülü kadigine a kilöögö kadhabbu köö'dö 153, lakiini salsa kada dhabbu tanno eene no taalo sa'baka öörese. <sup>12</sup> İkiri Yasu ka tiki eene, "Aaga ö'dö aaga tagu eema." Taalo öccö ana kene a'buna eedi ma tindini i'i a'da, "O'o na mada?" Kudumma eene katussu a'da i'i ya Uugaara. <sup>13</sup> İkiri Yasu ka öö'dö a'duga miteene anangnga eene nja kilöögö afe'de.

<sup>14</sup> Anda iidoona ka Yasu ka tatele oona a kadalaadene tanno iini jiddi miini ka takafiki'dö ndama inde.

### *Yasu nja Bütrüs*

<sup>15</sup> Kene kandaguri ya, ikiri Yasu ka tiki a Samaan Bütrüs, "Samaan 'bii'bala ya Yühanna nasaasa o'o a'a natagii'bi tasaasa na kadu tanno nye'd'de kungngo?"

Iki iini a'da, "İi, Uugaara, nussu o'o a'da nasaasa a'a o'o."

İkiri Yasu ka tiki iini, "Asaana a kidheefele tanno eede."

<sup>16</sup> Afada indini i'i afe'de, "Ka Samaan 'bii'bala ya Yühanna, nasaasa o'o a'a dhorro?"

A Samaan tiki iini, "İi, Uugaara nussu o'o a'da a'a nasaasa o'o."

İkiri Yasu ka tiki iini, "Asaana a kidheefele tanno eede."

<sup>17</sup> Afada indini i'i tiidoona afe'de, "Ka Samaan 'bii'bala ya Yühanna, nasaasa o'o a'a?"

İkiri Bütrüs ka koroo'bo kudumma Yasu ka tindini i'i tiidoona a'da, "Nasaasa o'o a'a." İkiri ka tiki, "Ka Uugaara, nussu o'o eema nye'd'de kungngo, nussu a'da nasaasa a'a o'o."

A Yasu tiki iini, "Asaana a ki'biini tanno eede. <sup>18</sup> Ara a'a tadirina tumma o'o dhorro, küdü ka takaleefe takadhilli ya, naga kirni en'di küdü ka oona unggodho o'o nunggunaana ku'bu kita üdü ka asaasa co kita, lakiini küdü kanda dhabbu ya ara o'o ta'diniga iisine nüdü coo'do ara ömö'di ökönö ka kirni ten'di ümmünü o'o ka tino matara co a 'buugu tiya üüdü ka titalo nasaasa co ya."

<sup>19</sup> A Yasu atiraana nggeege kudumma iini ka tussu inde na Bütrüs kara teyi, indhigii Masala ko'do iini no, ikiri ka tiki iini, "Uurna a'a keere."

<sup>20</sup> A Bütrüs tasala keere asala tatalaadene ya Yasu ka asaasa i'i ya, ka to'd'do kene

keere, i'i yungngo agöö'dö ka Yasu kita eene kagu eema ooso kungngo, a'dangnga 'dugeere ka Yasu iki iini, "Ka Uugaara, mada i'i yungngo ara tümmünü o'o a kadu ngo?" <sup>21</sup> Aga Bütrüs ka tasala i'i ya, iki a Yasu, "Ka Uugaara, niki o'o nya ka taya?"

<sup>22</sup> A Yasu tiki iini, "Üürü kede ka asaasa i'i ka eefe ka 'dii ara a'a ka öö'dö, aminna yüüdü inggide? Aayu kede keere."

<sup>23</sup> A tumma no tanyala ku'bu ka kadu 'do a'da tatalaadene ya taalo ara teyi, lakiini Yasu taalo iki a Bütrüs a'da i'i taalo a teyi, lakiini iki iini, "Kede kara tasaasa a'da eefe ka 'dii ara a'a köö'dö, aminna yüüdü inggide?"

<sup>24</sup> Tatalaadene ya miini ya i'i yungngo adinö ka eema tiya adarigiri ada ka sorne, ungngo tussu a'da tumma niini ka timin'da.

<sup>25</sup> Eema inggide adhabbu a Yasu ka talinggo üürü arigiridene nye'd'de ya, niki a'a a'da taalo kasorne miini na arigiridene no kara ta'dimo ka 'büdhülü nye'd'de.

## Lingga na Kadafiini Tafa'da tumma

Ömö'dü ya arigiri sorne ya, i'i ya Lüüka, sorne ya ütü ka teema tumma na Lüüka ka tarigiri ada ka İnjüili tamma Lüüka. Sorne ya eema tumma ma kadu tanno Yasu ka tanyalaana tumma ma İnjüili ma Yasu ku'bu a türü tanno Koronggore tiya Insili ka Örsaliim nja Yahüüdiya nja Samira nja tököönö ka na'buugu töccö. Tamma ka Yasu kaganna ka kadu ma Yahüüdü kadhadha assa ka tanyala ka na'buugu koona in'dili.

Koronggore ya Insili ya ö'dö a türü ka a kadu tanno Yasu ka oona ka Örsaliim ka uuru tanno ö'dö a kadu keera kaco iiwine no (Taanyara ma Koronggore). Türü niini kalaala eema eene kamana türü a naguugaara tanno eene ka oona. Tumma na kadu tanno adünnü tumma ma İnjüili kakirinja ka sorne tiya, talaana na kalaala angnga kiji talaana ma İnjüili ma Yasu a kadu ka naanya kadhoonyo.

<sup>1</sup> Ka Tiyafilos, naga-rigiri a'a ka sorne tiya eede ya dhidha ya, ma Yasu ka tafü'dü linggo ka dhidha adagalaana kadu iini nye'd'de, <sup>2</sup> kadara ka uuru tanno iini ka co a 'dotombo'do no. A'da anangnga türü ma

Koronggore ya Insili ya eene adadünüğü tumma a kadafiini tanno niini ka tagesse euge no.<sup>3</sup> Agalaala oona eene ka adinö kini ka fiki'dö ka inde adagalaala eema eene dhabbu adaganeene nja eene a fungngö ukumu kadu keera adageema tumma ma tauugaara ma Masala nja eene.<sup>4</sup> Kini ka agu eema nja eene ikirü ka tiki eene, "Aaga fa tunggeene ka Örsaliim, aaga öödhügi nüümö ya Pupa ka takiki aaga aaga taföönyö kede ya.<sup>5</sup> Yühanna akambeese kadu a 'büüdi, aaga 'bitüngngö ara aaga tambeesedene a Koronggore tiya Insili ya a fungngö miini anda öreeene idhilli."

*Yasu inynyo a 'dotombo'do (Murkus 16.19–20; Lüüka 24.50–53)*

<sup>6</sup> A kadafiini tarügü kini ka oona kindini i'i kiki iini, "Uugaara uuru no 'dee ara o'o tapadaga tauugaara a kadu ma Israyil?"

<sup>7</sup> A Yasu tapadaga tumma eene iki, "Taalo aaga kama tussu nagürüünü na Masala ka takindinaana ku'bu a türü tanno oono no.<sup>8</sup> Lakiini Koronggore ya Insili ya a ta'dinggö kada ka oona anangnga türü aaga, aaga tadünnü tumma na üünidene ana a'a ka Örsaliim nja Yahüüdiya nja Samira nja 'büdhülü ka oona nye'd'de kungngo."

<sup>9</sup> Ka Yasu ka tiri tumma no ya, assa ka ta'diniginja co 'dotombo'do kadinö kini

keere a tülüügü taküdhü i'i ka oona kitaalo kiji i'i afe'de.

<sup>10</sup> Kene ka adinii kini keere ka tunggunu co 'dotombo'do, kadhiim kada keera ana en'di ka oona kada ka'bassa. <sup>11</sup> Kiki eene, "Ka kadu ma Jaliil, minna agu aaga, aaga ta'dingnge ko'do aaga tadinö co 'dotombo'do? Yasu ya iny aaga ku'bu ya, a'diniginja co 'dotombo'do, assa ka tafada afa ma tiya ada kiji i'i ka tunggunu co ya kungngo."

*Matiyas akarna ka 'buugu tiya Yahüüsa*

<sup>12</sup> İkiri kadalaadene ka tapadaga co Örsaliim ndama anya minggide mana eere a'da Anya ma 'Dikidiyö, makete ka Örsaliim. <sup>13</sup> Kene ka tö'dö ka Örsaliim ya kasirigö co 'dasala ko'do kita eene ka fungngö kide ya, eege na Bütrüs nja Yühanna, nja Yaguub nja Andraws, nja Filibüs nja Tööma, nja Bartülmaws nja Matta, nja Yaguub 'bii'bala ya Halfa, nja Samaan ya tatagu'daana ka eedi ya, nja Yahüüsa 'bii'bala ya Yaguub. <sup>14</sup> Eege nye'd'de kungngo kafara ka Masala turi ana eedi unggodho, nja iiya töccö nja Mariyom niimö ma Yasu nja nagöre tanno iini.

<sup>15</sup> Ka uuru tanno miini no a Bütrüs afiki'dö ma teema, nja kadu tanno amma ka Yasu no, a kadu na kanna kide nja eene no, kukumu kadu ka iidümmü ukumu

ömö'di (120) iki,<sup>16</sup> "Nagöre eede, tumma na Korongore tiya Insili ya na Dawud ka tagadünnü ka sorne 'billi no, kinynyo ööye miini a'da Yahüüsa ya ka alaala kadu ka Yasu kümmü i'i ya. <sup>17</sup> I'i agosso ka linggo tanno nja angnga."

<sup>18</sup> Gürüüsü yiini ka 'duga ka kadu tanno ümmü Yasu ya, eenege siga iini, a'dinggö a'buna üüdü ku'bu adhösönjaana ku'bu, eema ma eedi tö'dö kürö nye'd'de kungngo. <sup>19</sup> A tumma no tussu adene ka Örsaliim koona nye'd'de kungngo, kidhi kanangnga eere a 'buugu tiya miini ya a'da Hakil Dama (Lodho ma Eriidö.)

<sup>20</sup> A Bütrüs tiki, "Sorne ma Tüüsü ma nakaaru tiki, 'Ara 'di yiini ta'döngngönyö, a tööyö niini titaalo.'

Iki afe'de,  
'Ara ömö'di öccö tagala ka 'buugu tiya iini.'

<sup>21</sup> Kadu kungngo aja 'bitingngö kaneene nja angnga, ndama uuru tanno Uugaara Yasu ka takafiki'dö a linggo, <sup>22</sup> ma uuru tanno Yühanna ka takambeese i'i no, idhi aaco a 'dotombo'do, ikiri angnga ka asaasa tümmü ömö'di öccö ana kene ya tadinö kide nja angnga ka tafiki'dö ka inde tanno Yasu."

<sup>23</sup> Kikiri kagona kadu keera, Yüüsif ya ana eere a'da Barsaba ya, eere ma töögöje yiini a'da Yustus, nja

tiya ana eere a'da Matiyas ya. <sup>24</sup> Kikiri ka tageema nja Masala kiki, "Ka Masala, o'o nussu nanggeedi na kadu nye'd'de, la ungngo ka ömö'di tiya üdü ka asaasa ana ka kadu tanno eera no. <sup>25</sup> Amang kini tafiki'dö a linggo ma tafiiñi na Yahüusa ka tinyi ku'bu no, unggene ateefe taluna inde niini." <sup>26</sup> Kafanna muduru, a tameerö ta'dingga ka Matiyas, akoonyo oonana ka kadafiinii tanno ada'baaga kafünü unggodho no.

## 2

### *Tö'dö ma Koronggore tiya Insili ya*

<sup>1</sup> Ka Taanyara ma Koronggore ka ndö'dö ya, a kadalaadene tarügü ka 'buugu unggodho kanna kide. <sup>2</sup> Kadhimii ka tumma ko'do ndama 'dotombo'do, afa tanya no iisö dhindho no, ka tigi ka 'bügöörü tiya eene ka tanna kide ya. <sup>3</sup> Kadhimii ka nagonggo'do kafeene nja issi. Kasümünü njaana kene ka nanggüdü ka'dingnge kide. <sup>4</sup> A Koronggore ya Insili ya tö'dö kene ka oona nye'd'de, keema tumma öccö a'da taalo neene, a Koronggore tanangnga türü kene ka oona keema.

<sup>5</sup> Ka uuru tanno miini no a'da sa Yahüdü na ümmü tumma ma Masala no, tö'dö ka Örsaliim ndama na'buugu koona nye'd'de kungno. <sup>6</sup> Kene

kandaföönyö tumma no ya, kawagaana oona kadhere, kudumma ömö'di kaföönyö tumma niini ka teemadene no. <sup>7</sup> Kadhere kiki, "Ma kadu na eema no 'dee taalo kadu ma Jaliil eege kamiini sa? <sup>8</sup> Angnga sa ka tö'dö nya ndaföönyö tumma ma anya tammo aja eene ka teema? <sup>9</sup> Kadu no kö'dö ndama Parsiya nja Madiya nja Alam nja naaya ma Naato Keera nja Yahüüdiya nja Kabadökiya nja Büntüs nja Asiya, <sup>10</sup> nja Frajya nja Bamfiliya nja Misiri nja rüifö ma Libya ka Keriwan nja kadu ma Rööma na anna kita no. <sup>11</sup> Nja kadu ma Kireet nja Piirigide nja Yahüüdü nja kajeene tanno amma ka Masala tammo Yahüüdü no, angnga sa kaföönyö kene kadeema tumma naaja keema tumma ma Masala na 'diila no." <sup>12</sup> A kadu tadhere nye'd'de keema kiki, "Minna yungno 'bitüngngö?"

<sup>13</sup> A kadu öccö türi eege kadamidhi ka oona kiki a'da, "Eege kaaya ka ngeeli."

### *Bütrüs ageema nja a kadu*

<sup>14</sup> İkiri Bütrüs ka fiki'dö nja kadafiinii tanno ö'dö kada'baaga kafünü unggodho no alneege ko'd'do iki eene, "Aaga Yahüüdü nja kadu ma Örsaliim 'do, akatoodo ka tumma tanno eede no kara teeme no. <sup>15</sup> Aaga keema a'da kadu na kaaya ka ngeeli kaleefe ndanaaya ta iidümmü kafünü egüsö

ligitaka kungngo, a tumma no taalo ka timin'da.<sup>16</sup> Tumma no na ne'bi Jüwiil ka tageema eege kungngo,

<sup>17</sup> 'Masala makiki a'da,  
Ka naguuru tanno eere  
no  
na a'a sa ka tuuru  
Koronggore yeede ka  
kadu ka oona in'dili  
kungngo.

A laala yaada ya nagiide  
ya nja tanno iiya  
no teema tumma a  
kümböödö.

A kadimöögö tiji tumma  
neede,  
a kümböödö tagu kadu  
na iifii no.

<sup>18</sup> Nuuru Koronggore yeede  
ka iiya ka oona nja nagi-  
ide no ümmü tumma  
ma a'a  
ka uuru tanno miini no,  
keema tumma neede.

<sup>19</sup> Nalinggo eema ka  
'dotombo'do keefe,  
nalinggo ya ka 'büdhülü  
keefe,  
a 'buugu ta eriidö  
nja issi nja ndhiigö  
dhabbu.

<sup>20</sup> A ndanaaya talifi  
a tere ta eriidö  
a'da küfürü uuru na  
Uugaara na öyeene  
küdhindhü no tö'dö.

<sup>21</sup> Ömö'di ya amma ka eere  
ma Uugaara ya ara  
toolonadene.'

<sup>22</sup> "Kadu ma Israyil aaga  
föönyö tumma no, Yasu  
ya ma Nasira ya Masala  
manangnga türü iini ada-  
galingga eema keefe kada  
ka söödö aaga tussu i'i,  
adagalingga eema dhabbu

keefe adale'bele eema a türü  
tanno Masala, aaga tussu  
iini.<sup>23</sup> Kini ka tümmününja  
aaga ya, a'da milli Masala  
ka tagussu iini, aaga tümmü  
i'i aaga tabünnü ka salii'bi  
aaga tafa ka kadu tanno  
oroko no ka tagiidi i'i.<sup>24</sup> I'i yungngo a Masala ka  
tagildhe türü ma inde kini  
ka oona afikü'dö, inde taalo  
ka tümmü i'i.<sup>25</sup> Kudumma  
Dawud ka tadiri tumma  
miini iki,

'Niji a'a Uugaara kede kidha  
turi kungngo,  
kudumma iini anna  
kede ka niisö ma kuri  
amang ka ri'ba tafa tagu  
a'a.

<sup>26</sup> İkürü eedi yeede ka'diila,  
a onggo'do meede  
tadhodho nawe tüüsü  
nindhígí Masala  
kudumma tuu'da tanno  
eede afe'de kara  
tindhígí Masala.

<sup>27</sup> Kudumma o'o taalo o'o  
natafa kede nütü ka  
'buugu ma inde  
taalo o'o natafa ka  
ömö'di tiya üüdü ya  
insili ya anna ka  
'buugu tiya tasürdö  
ya.

<sup>28</sup> Nalaala a'a ka fiinii ma tefe  
ka 'di,  
ara o'o saga tadigi a'a  
a dhodho kidha ma  
o'o."

<sup>29</sup> A Bütrüs tiki, "Nagöre  
eede, aaga afa kede nadirina  
tumma aaga dhorro,  
eyi pupa yaaja Dawud  
atatu'büdene a la ma  
oofo yiini ungngo aja kita  
ta'bítengngö.<sup>30</sup> I'i aga

ne'bi, ussu a'da Masala maküdöönö ada iini miki iini a'da ara oogo masa anangnga 'bandaada miini könö ka kööyö tiya iini.<sup>31</sup> A Dawud illi ka tasala tumma na Masala ka talinggo adageema a'da Almasiihi a tafiki'dö ka inde iki,

'Taalo Masala matafa kini ka 'buugu ma inde  
a tuu'da niini taalo ka tasürdö.'

<sup>32</sup> Yasu afiki'dö ka inde a türü tanno Masala, angnga tijöögö angnga ïn'dili kungngo. <sup>33</sup> Aga Masala ka ta'dina i'i ko'do manangnga i'i kono ka niisö ma kuri, i'i a'duga ka Pupa Koronggore ya Insili ya kada tiraana ya, uuru kaja ka oona i'i yungngo ada ka adinö kide 'bitingngö aaga taföonyö.

<sup>34</sup> "A Dawud taalo asirö 'dotombo'do, i'i ka eyi tiya iini iki,

'Iki Uugaara a Uugaara tiya eede,

Emmi kede ka niisö ma kuri,

<sup>35</sup> ara a'a ka anangnga o'o ka siri ka diidi tiya üüdü ana uune.'

<sup>36</sup> "Amang ka kadu ma Israyil tussu dhorro a'da Yasu yaada ka tagiendaana ya, Masala manangnga i'i kada Uugaara ada Almasiihi."

<sup>37</sup> A kadu ka taföonyö tumma na Bütrüs, a tumma no tala eege ka nanggeedi, kindini Bütrüs nja kadafiini könö kiki, "Ungngo 'bitingngö ara

ungngo tönyöö, nagöre iidii?"

<sup>38</sup> A Bütrüs tiki eene, "Aaga aadha ka eema tiya toroko ya, aaga tambeesedene ka unggondho ana eere ma Yasu Almasiihi a'duga tumma na toroko no kada ka oona, a Koronggore tiya Insili ya tananja aaga.

<sup>39</sup> Tumma na Masala ka teema a'da aaga tindhigü oogo nja laala tiya ada nja kadu tanno ku'b'ba no na ümmünü Uugaara a'da Masala maaja mo."

<sup>40</sup> Agadünüğü eema eene ma eema adhabbu iki eene, "Aaga oolonadene aaga taadha ka sere tiya toroko ya ka oona."<sup>41</sup> A kadu na amma ka tumma tanno iini no kakambeesedene, a kadu öccö tö'dö kene na alif ka iidoona.

### *Taneene na kadu ma kaniisa*

<sup>42</sup> Kada kümmünü nanggeyi neene ka talaana tanno kadafiini kagu eema ka 'buugu tiya unggodho ya kafara ka Masala eege nye'd'de.

<sup>43</sup> A kadafiini tagalinggo eema dhabbu keefe a türü tanno Masala ari'ba tümmü kadu nye'd'de kungngo.

<sup>44</sup> A kadu na amma ka Yasu no, tumma neene ka unggodho kafaana ka oona, kosso ka eema.

<sup>45</sup> Kanadene ana ana almaala tiya eene nja eema ma nasigeene tiya eene kosso ka gürüüsü nja kadu tanno iini na eema ka titaalo kene no ku'bu.

turi ka la ma Masala ka Örsaliim ana eedi unggodho, kagoreene ka nöö'dü tanno eene kagu eema ka'deema. <sup>47</sup> Küüwe tüüsü ka dhodho ada a Masala a kadu tamma ka tumma tanno eene nye'd'de, a Uugaara tagusu kadu tanno oolonadene no ka köje 'bücca kungngo.

### 3

#### *Tafiki'dö ma mügüre*

<sup>1</sup> Uuru kinggide Bütrüs nja Yühanna co la ma Masala ana ndanaaya kiidoona amuru ma siiya ma taco tafara ka Masala. <sup>2</sup> A kadu tadhe ana ömö'dü ka tageenedene kada mügüre. Kamanaga i'i ka ïnye ma la ma Masala ya ana eere a'da ïnye na 'Diila a naguuru no arangnga kadu na icci no. <sup>3</sup> Kini ka tasala Bütrüs nja Yühanna kata unggunugu co ya, ikirü ka rangnga eege a'da kanangnga nüümö iini. <sup>4</sup> Kikirü ka tasala kini ko'do, a Bütrüs tiki iini, "Assa kidi!" <sup>5</sup> İkirü ka adinö eege iki kide a'da ka tanangnga nüümö iini.

<sup>6</sup> A Bütrüs tiki iini, "Taalo gürüüsü kede, a dahaba titaalo kede lakiini yungngo eede ara tanangnga o'o, ana eere ma Yasu Almasihi ya ma Nasira ya, fiki'dö nunggeene."

<sup>7</sup> Ümmü i'i ka niisö ma kuri a'dina i'i ko'do, uune tarooro ka takidhö ka uuru miini, <sup>8</sup> Afiki'dö imbiiri unggunaana ku'bu, aaco la ma Masala ka teene nja eene, unggene imbiiri ïndhigü Masala ko'do. <sup>9</sup> A

kadu tadinö i'i nye'd'de ka tunggeene ïndhigü Masala ko'do. <sup>10</sup> Kussu a'da ömö'dü ya kannu ka ïnye ma la ma Masala tiya ana eere a'da A'diila ya atarangnga ya, i'i ya miini kuurugu oona ku'bu kadhere ka nüümö tiya küünidene ya.

#### *Tumma na Bütrüs ka la ma Masala*

<sup>11</sup> Aga ömö'dü tiya arangnga ya tama'da ka Bütrüs nja Yühanna ka fangga tammo Siliman mo, a kadu nye'd'de tadhere kisi kene keere.

<sup>12</sup> Ka Bütrüs ka tasala eege nggeege ya iki eene, "Ka kadu ma Israyil minna agu aaga, aaga tadhere ka eema tiya agalinggo adene ya? Minna agu aaga tadinö ungngo afa ungngo ka anangnga ömö'dü ya ka fiki'dö a türü tanno iidi a ta'diila tanno iidi?" <sup>13</sup> Masala ma kadaada ma angnga, Masala ma Abrahiim nja Ishak nja Yaguub. Oogo mungngo manangnga türü ka tatasaga tiya oono Yasu yaada ka ta'düsünü i'i ka Bilatus kidha, aaga tümmünü i'i a kadu tanno diidi i'i no kada kiidi i'i. A Bilatus ta kasaasa tapa kini illi aaga kanu. <sup>14</sup> Kanu aaga ka ömö'dü tiya a'diila insili ya ara aaga ka tapa ka tatagirina kadu.

<sup>15</sup> Kagiidi aaga nduguli ma tefe ka 'dü illi Masala miji i'i ka inde ungngo tadinö kide. <sup>16</sup> Tamma ana eere tiya Yasu, ömö'dü yaada kiji, aaga tussu a'da kapadaga türü kini ya,

eere ya Yasu nja tamma na öö'dö ndama iini no ka anangnga i'i ka oolonadene 'do yaada kijöögö aaga in'dili ya.

<sup>17</sup> "A 'bütingngö nagöre eede, nussu a'a aaga ka linggo a'da taalo aaga kussu afa ma naguugaara tanno ada ka tagüün. <sup>18</sup> A Masala tatüümö ada kide ka tumma tanno oono ka tageema a nagane'bi nye'd'de a'da Almasiihi a tadhügürü. <sup>19</sup> Aaga aadha ka eema tiya toroko ya aaga tamma ka Masala amang kono toolona tatoroko naada ka oona no. <sup>20</sup> Amang ka Uugaara tafa'da fiini ya a'diila ya aaga ka Yasu Almasiihi afa moono ka tageema. <sup>21</sup> Ara töödhi ka 'dotombo'do ara uuru ka öö'dö ma Masala ka anangnga eema in'dili ka issi afa moono ka tageemaga co nagane'bi tanno oono na insili no 'billi. <sup>22</sup> Müusa iki a'da, 'Masala Uugaara müüdü massa ka kürün ne'bi afa ma a'a kungno aaga taföönyö tumma niini ka teema nja aaga no. <sup>23</sup> Ömö'di ya taalo taföönyö tumma na ne'bi tiya miini ya, atakedhekanja keere ndama ka söödö.'

<sup>24</sup> "A nagane'bi nye'd'de ndama Samwiil nja tanno ö'dö kini keere no, kageema tumma tö'dö ma uuru tanno. <sup>25</sup> Aaga kungno kakarna ka nagane'bi nja timi'di tumma tanno Masala nja kafaafa ma aaga miki Abrahiim,

'Laala yüüdü tanangnga kadu ka aduna baraka ka 'büdhülü nye'd'de.' <sup>26</sup> A Masala manangnga tasaga yoono ka fiki'dö ndama inde magürünü i'i kada ana baraka ka dhidha amang kada taadha ka tatoroko."

## 4

### *Tahükümü na Bütrüs nja Yühanna*

<sup>1</sup> Ka Bütrüs nja Yühanna tadünüğü eema a kadu ya, a ka'boge nja uugaara ma kadu tanno afa ka la ma Masala no nja Sadügiin tadhe ko'do kene ka oona.

<sup>2</sup> Kagoroo'bo a'da eege kalaana kadu a'da kadu kara tafiki'dö ka inde ana Yasu. <sup>3</sup> Kümmü eege kanangnga ka pabuusu kudumma 'buugu kanda siiya ara taka kataadha. <sup>4</sup> A kadu kadhabbu kaföönyö Bütrüs nja Yühanna kadeema kamma ka Yasu, kadu na nagiide no kö'dö na alif küüdümümü.

<sup>5</sup> Ka taka ka taadha ya a naguugaara ma Yahüdü nja katalaana ma seriye nja kadiifi temmi ka 'buugu tiya unggodho ya ka Örsaliim.

<sup>6</sup> Nja Hanan uugaara ma ka'boge nja Kiyaafa nja Yühanna nja Askander nja siliga ma uugaara ma ka'boge in'dili. <sup>7</sup> Kikirii ka tagümmün Bütrüs nja Yühanna kanangnga eege ka 'dingnge kene kidha kindini eege, "Kagalinggo aaga eema

ya ana eere töccö nja türü töccö?"

<sup>8</sup> A Koronggore tiya Insili ya tuurunja ka Bütrüs ka oona iki eene, "Ka naguugaara ma anya nja kadiifi ma anya, <sup>9</sup> katindini ungngo 'bitingngö ma ömö'di tiya maara ya a'da a'diila nya? <sup>10</sup> Amang kada tussu iini aaga kadu ma Israyil nye'd'de kungngo a'da ömö'di ya 'dingnge kada kidha ya a'diila ana eere tiya Yasu Almasihi ya ma Nasira ya, yaada ka tagiidi i'i ya, aaga tabünnü i'i ka salii'bi ya, a Masala tiji i'i afiki'dö ka inde. <sup>11</sup> I'i ya 'Misi ma katarü'böönö yaada kanu kide mo, oogo mungngo ma misi ma kadesse.'

<sup>12</sup> Taalo toolona illi ana eere tiya Yasu, eere titaaloo ma toolona kadu ka 'büdhülü, i'i yungngo Masala ka kürünü i'i ma toolona angnga."

<sup>13</sup> Ka kadu ma la ma kadiifi kiji rüsü na Bütrüs nja Yühanna, oona tadhere kene kuurunja ku'bu kene kaföonyö a'da eege taalo ka kalaanadene illi eege kandussu a'da eege kaganene nja Yasu. <sup>14</sup> Kiji ömö'di ya oolonadene ka 'dingnge kene kete, kikirri ka titaaloo kiji niimö ma ta'bununjaana ku'bu miini. <sup>15</sup> Kikirri ka tiki eene a'da kunggeene ka la ma kadiifi kikirri ka teema ana ka oona. <sup>16</sup> Kiki, "Ara angnga tönynyö a kadu tanno eera no 'bitingngö? Kudumma

kadu ma Örsaliim nye'd'de kussu a'da kadu no eema keefe angnga taalo ka tussu ka 'düsuniigii. <sup>17</sup> Kudumma ma tumma ka tanyalanjaana ku'bu, angnga tiki eene, kafa teema ana eere ma Yasu ka kadu kidha taalo kasaasa eege ka tanyala ku'bu."

<sup>18</sup> Kikirri ka tagümmüñü eege kiki eene a'da, kafa talaana kadu, kafa teema ana eere ma Yasu. <sup>19</sup> Lakiini Bütrüs nja Yühanna kiki, "Aaga iiröönö ka nanggeyi tanno ada öjö i'i yungngo adhorro ka Masala, ungngo taföonyö tumma naada alla na Masala. <sup>20</sup> Ungngo teema tumma ma eema tiya iidi ka tadinö kide yungngo taföonyö ya."

<sup>21</sup> Kene kanda kuuru ri'ba eene ka nanggeedi ya kapa kene kunggeene, kitaalo kaluna fiinii ma tapusu eege, kudumma kadu nye'd'de ka tafünügü Masala ko'do ka eema tiya agalinggo adene ya. <sup>22</sup> Kudumma ömö'di tiya oolonadene ya, nagürüünü niini ko'do a kadu keera.

### *Kadu ma kaniisa kafara ka Masala*

<sup>23</sup> Ka naguugaara ka tapa ka Bütrüs nja Yühanna, kafada kaco ka kadu tanno eene kadirina eema ya naguugaara ma ka'boge nja kadiifi kadirina eene ya.

<sup>24</sup> Kene ka taföonyö tumma no ya, kafara ka Masala ana eedi unggodho, kiki, "Ka Uugaara, o'o narü'bü 'dotombo'do nja 'büdhülü

nja to ana eema tiya kide ya nye'd'de. <sup>25</sup> Dawud ageema tumma nüüdü a Koronggore tiya üüdü ya Insili ya iki, 'Minna agu ajeene kafiki'dö ka linggo ajeene, a kadu ana eema tiya atoroko ya?

<sup>26</sup> Kafiki'dö naguugaara ma 'büdhülü ka timi'di tumma nja naguugaara ka 'buugu nye'd'de kungngo ma takirimi Masala Uugaara nja Almasiihi.'

<sup>27</sup> Hirüdüs nja Bilatus Albunti ya nja kadu ma Israyil nja kadu ma kajeene ka anya tammo kümmü tumma ka kirimi Yasu tatalinggo yüüdü ya insili ya yüüdü ka tümmünü i'i kada Almasiihi ya. <sup>28</sup> Kagalinggo tatoroko nüüdü killi kadageeme a türü tanno üüdü a'da kara tüünidene. <sup>29</sup> A 'bitingngö Uugaara, iiri rüsü neene nja ungngo no, nanangnga türü a kasaga tanno üüdü ka eema tumma nüüdü a'da kitaalo ungngo kari'ba. <sup>30</sup> Kilina niisö nüüdü noolona kadu na maara no nüünii eema keefe ana eere ma tasaga tiya yüüdü Yasu ya Insili ya."

<sup>31</sup> Kene ka teema nja Masala ya, a 'buugu tatänggi'di, a Koronggore ya Insili ya taka ka kadu nye'd'de, kadünnü tumma ma Masala ari'ba titaalo.

*Kadu ma kaniisa kosso ka eema*

<sup>32</sup> A kadu ma kaniisa taganna ana eedi ka unggodho kosso ka eema, taalo ömö'di ma tiki a'da eema yiini yungngo. <sup>33</sup> A kadafiini talaana kadu keema iini a'da Yasu Uugaara afiki'dö ndama inde, a türü na Masala tu'bu eege ka nanggeedi in'dili, <sup>34</sup> Taalo ömö'di ma tasaasa nüümö, kudumma kadu kanadene a nöö'di nja nasigeene kaamana eema miini ka 'buugu tiya unggodho ya, <sup>35</sup> kasümünaana ku'bu a ömö'di ya ta'duga tamana yiini ka asaasa ya.

<sup>36</sup> Afe'de a Yüüsif taga Lawi ya ma Kuburus, ya kadafiini kanangnga eere iini a'da, Barnaba tafireeri. <sup>37</sup> Adanege a siga tanno iini a'duga gürüüsü miini ö'dö iini a kadafiini.

## 5

*Hananiya nja aka tammo iini Safira*

<sup>1</sup> 'Bitingngö ömö'di ingide ana eere a'da Hananiya, agataneg a siga tanno iini nja aka tammo iini mana eere a'da Safiira. <sup>2</sup> Karmuna türeene ma gürüüsü ku'bu ma eyi tiya iini a'da mussu, ara ka öö'dö a türeene miini anangnga a kadafiini kidha.

<sup>3</sup> A Bütrüs tiki iini, "Ka Hananiya, minna agu o'o nafa ka Ebliisi aaco küdü ka eedi niisöni Koronggore ya Insili ya? Narmuna türeene ma gürüüsü ma siga? <sup>4</sup> Taalo siga nüüdü eege kamiini a'da nafürü

o'o tagatenege iini? A kene kanda tennege taalo o'o nama tafa ka gürüüsü ma eyi tiya üüdü? Minna agu o'o nalinggo tumma afa ma tanno kungngo. O'o niisini Masala taalo o'o niisini kadu."

<sup>5</sup> Aga Hananiya ka föönyö tumma no ya, a'dingga eyi, ari'ba tümmü kadu na föönyö tumma no. <sup>6</sup> A kadimögö kö'dö ka'bürü i'i ka oona a ten'di, ka'dina i'i katü'bü i'i.

<sup>7</sup> Ka ndanaaya ka öö'dö kidoona ya, aka miini töö'dö a'da taalo mussu niimö ya agüuni adene ya. <sup>8</sup> A Bütrüs tindini oogo iki oono, "Tirina tumma a'a dhorro ma eema ma siga tiya ada ka tanadene iini ya, i'i yungngo?"

Miki, "İi, i'i ya miini."

<sup>9</sup> A Bütrüs tiki oono, "Kimi'di aaga tumma nja nyuri yüüdü aaga ta'b'ba Koronggore ya Uugaara amana? Assa! Ka ton'do ma uune tanno kadu tanno a'duga nyuri yüüdü katü'böönö ka ïnye, kara ta'duga o'o afe'de!" <sup>10</sup> Marooro ka 'dingga ka Bütrüs kidha meyi. A kadimögö tö'dö kaduna oogo ka teyi, ka'dina oogo katü'böönö ka nyuri kete. <sup>11</sup> A ari'ba tümmü kadu ka kaniisa nye'd'de nja kadu tanno föönyö no nye'd'de.

*Toolona kadu a türü tanno Masala*

<sup>12</sup> A kadafiini tagalinggo eema keefe kadhabbu nja türü kidha ma kadu. A kadu na amma no

ïn'dili kicci toreene turi ka fangga tammo Siliman.

<sup>13</sup> Taalo ömö'di unggodho kungngo ma taga'da tumma neene, lakiini kadu nye'd'de kamma kene kafünüğü eege ko'do. <sup>14</sup> A kadu na amma ka Masala no tamanya kadhabbu nagiide nja iiya.

<sup>15</sup> A kadu tama kadu na maara no kamana eege ka nafiini ka'düürü eege ka kere nja akede, ka Bütrüs ka tunggeene ya, a tallappa niini tagilaana kene ka oona ka'diila. <sup>16</sup> A kadu takicci ka Örsaliim ndama na'buugu tanno akete no, a kadu tanno maara no nja kadu tanno indima no koolonadene nye'd'de.

*Kadafiini kananja ka pabuusu*

<sup>17</sup> Uugaara ma ka'boge nja kadu tanno iini na Sadügiin no kadigine akirimi. <sup>18</sup> Kümmü kadafiini kuuru eege ka pabuusu.

<sup>19</sup> İkiri tadhangga ma Uugaara ka öö'dö ooso kungngo, aafa'da ïnye ma pabuusu uurugu kadafiini kürö iki eene, <sup>20</sup> "Aaga unggeene, aaga co la ma Masala, talaana kadu ka tumma ma tefe ka 'di na Masala ka ö'dö iini no."

<sup>21</sup> Kamma ka tumma kaco la ma Masala ligitaka so'd'do kalaana kadu.

Uugaara ma ka'boge nja kadu tanno iini nja la ma kadiifi ma Yahüüdü tagürünü kadu kaco tö'dö a kadafiini ndama pabuusu. <sup>22</sup> A nasigira co pabuusu taalo kaduna ömö'di kide,

kafada köö'dö ka naguu-gaara.<sup>23</sup> "Kaduna ungngo pabuusu kada teere a kadu na afa kide no ka'dingnge ana ko'do ka naginyeene, lakiini kidi ka tafa'da eege, ungngo taalo kaduna ömö'di ka teene miini."<sup>24</sup> Uugaara ma nasigira tanno afa ka la ma Masala no nja naguugaara ma ka'boge, kene ka taföönyö tumma no ya, oona tadhore kene kuurunja ku'bu, kiki, "Kaneene tumma no nya?"

<sup>25</sup> İkiri ömö'di öccö ka ö'dö iki eene, "Kadu naada ka tadhifi eege ka pabuusu no, kinni ka la ma Masala kalaanaka kadu!"<sup>26</sup> Uugaara ma nasigira ma la ma Masala nja kadu tanno iini ta üögü kadafiini ta'diila kungngo, kudumma eene kari'ba ii'di kadu tadiidirii eege.

<sup>27</sup> A kene ka öö'dö a kadafiini ka naguugaara kidha, ikiri uugaara ma ka'boge ka tiki eene,<sup>28</sup> "Kageema ungngo nja aaga dhabbu a'da aaga tafa talaana kadu ana eere tiya talaana naada kadhala ka Örsaliim ka oona nye'd'de, kasaasa aaga tagirni inde ma ömö'di tiya kidi ko'do?"

<sup>29</sup> A Bütrüs nja kadafiini tiki, "Ara ungngo taföönyö tumma na Masala taalo ungngo kataföönyö tumma na kadu.<sup>30</sup> Masala ma kupupa tanno aja, mijj Yasu ka inde yaada ka tagiidi i'i aaga kabünnü i'i ka salii'bi ya.<sup>31</sup> Masala oogo mungngo ma'dinigi i'i ko'do

ka niisö ma kuri tanno oono, manangnga i'i kada Uugaara nja tatoolona ma kadu ma Israyil amang kene taadha ka tatoroko a Masala tafa kene.<sup>32</sup> Ungngo ya kadinö ungngo ka eema tiya nye'd'de, a Koronggore ya Insili ya Masala ka anangnga i'i a kadu tanno aföönyö tumma niini no."

<sup>33</sup> Aga naguugaara taföönyö tumma no, kagoroo'bo kasaasa tagirina eege.<sup>34</sup> Illi ömö'di inggide ana eere a'da Gamalayiil taga Fariisi, i'i a tatalaana ma seriye, a kadu nye'd'de tindhigü i'i ko'do, afiki'dö ka la ma kadiifü ma Yahüdü, ikiri ka tiki a kadafiini kuurugu kadu co kürö tikinggi.<sup>35</sup> İkiri ka tiki eene, "Kadu ma Israyil, aaga aadha ka tumma tanno ada ka asaasa talinggo a kadu tanno no.<sup>36</sup> Afiki'dö ömö'di inggide ana eere a'da Südas, kete kungngo ümmü eyi yiini kada dhabbu, a kadu tuurna i'i keere miya ka egüsö. Adagiididene a kadu tanyalanjaana ku'bu a tumma miini titaalo.

<sup>37</sup> Afe'de a Yahüusa ya ma Jaliil ya adele oona ka uru tanno kadu kadaginni kadu no, a kadu tisi kini keere kadhabbu. Eyi afe'de, a kadu na isi kini keere no, tanyalanjaana ku'bu.<sup>38</sup> A 'bitingngö ya ara a'a tiki aaga, kadu afa ma tanno aaga fa talinggo a tumma tanno eene, tumma neene ka talaana kadu iini no, kassa ka titaalo kene kada tumma

ün'dügüngngö. <sup>39</sup> A kene kada tumma ma Masala eege kamiini, taalo aaga ka tarigi eege, ii'di aaga tünni ada tagoroo'bo ada ku'bu nja Masala."

<sup>40</sup> A kadu tamma ka tumma tanno iini. Kadagümmünü kadafiini, katabbü eege kuuru eege ka tino kiki eene, kafa talaana kadu ana eere tiya Yasu.

<sup>41</sup> A kadafiini tunggeene kadhodho, kudumma Masala manangnga eege ka tabaanya dhügürü kudumma eere tiya Yasu. <sup>42</sup> A kadafiini taalo kaadha ka talaana kadu 'bucca kungngo, ka la ma Masala nja nöö'di kalaana kadu kadünüğü tumma ma İnjili a'da Yasu i'i ya Almasiihi.

## 6

*Kadu ma linggo no  
iidümmü kafünü eera no*

<sup>1</sup> Ka naguuru tanno miini no, asa kadalaadene tadhabbu kagusaana ka köje. A Yahüdü na eema tangga Yünan no, ta'digineene keema a'da Yahüdü na eema tangga Ebraniin no künni tö'bö ana iiya ma nagüüme tanno eene ku'bu taalo kamana eema ma takuri eene 'bucca kungngo. <sup>2</sup> İkiri kadafiini na ada'baaga kafünü eera no ka tagümmünü kadalaadene öccö kiki eene, "Taalo a'diila ungngo a kadünni tö'bö a tumma ma Masala ara ungngo katöödhii kasümünaana eema ma kuri ku'bu ün'dügüngngö.

<sup>3</sup> Nagöre eede akö'dö a kadu ka iidümmü kafünü eera na ussudene no na adigine a Koronggore tiya Insili ya nja tessu eema, angnga tanangnga linggo no eene. <sup>4</sup> Ara ungngo kadafara ka Masala ungngo tagalaana kadu ka tumma tanno oono."

<sup>5</sup> A tumma na ta'diila ka kadalaadene ka oona kümmü Istifanüüs, ya amma ka Masala dhorro ana eedi ya, adigine a Koronggore tiya Insili ya, nja Filibüs nja Brokoros nja Nikanors nja Temen nja Braminas, nja Nikola ya ma Antakiya ya amma ka tumma ma Yahüdü ya. <sup>6</sup> Kö'dö ana eege kidha ma kadafiini kümmünü iisine kene ka nanggüdü kafara ka Masala.

<sup>7</sup> A tumma na Masala takanyala ku'bu, a kadalaadene tö'dö kadhabbu ka Örsalim a ka'boge tamma ka Yasu kadhabbu.

*Tümmü adene na Istifanüüs*

<sup>8</sup> A türü na Masala tadigi ka Istifanüüs ka oona alinggo eema kefe ale'bele eema a kadu tadhere. <sup>9</sup> A kadu ma la ma talaana tiya ana eere a'da La ma kasaga na apa kene no, nja kadu ma Keriwan nja kadu ma Iskandariya, nja kadu ma Kilikiya nja kadu ma Asiya 'do, ka'bununjaana ku'bu nja iini a tumma. <sup>10</sup> A Masala tanangnga türü ma tumma Istifanüüs, a tumma niini tiligi kene kadagi'bi eege. <sup>11</sup> Kafünü kadu öccö

kanangnga niimö eene a'da kiki, "Kaföonyö angnga i'i eela Müüsa nja Masala!"

<sup>12</sup> Kagirnaana ka kadu ka oona nja kadiifi nja kataalaana ma seriye, kümmü Istifanüüs kaco la ma kadiifi ma Yahüdü iini. <sup>13</sup> Kö'dö a kadu kafünü korokoro ka Istifanüüs ka oona kiki, "Ömö'di ya öödhi ka teela la ma Masala nja tumma seriye tiya Müüsa turi kungno. <sup>14</sup> Kaföonyö ungngo iini ka tiki a'da, Yasu ya ma Nasira ya, ara tagü'dügü la ma Masala ya co, aadha kadu ka tumma tanno Masala na Müüsa ka öö'dö iini angnga no."

<sup>15</sup> A kadu na emmi nye'd'de ka la ma kadiifi ma Yahüdü, tassa ka Istifanüüs ko'do kasala dhugudha yiini kafeene nja dhugudha ma tadhingga.

## 7

### *Tumma na Istifanüüs nja naguugaara ma Yahüdü*

<sup>1</sup> İkiri uugaara ma ka'boge ka tiki Istifanüüs, "Tumma no 'dee ka timin'da?"

<sup>2</sup> Istifanüüs tapadaga tumma eene iki, "Nagöre eede nja kafaafa ma a'a, aaga toodo kede! Masala ma idhindhi mo matele oona a pupa tiya aja Abrahiim kini ka takaleefe ka anya ma Naato Keera a'da üfürü co Haran. <sup>3</sup> Miki iini, 'Ninyi anya müüdü ku'bu nja siliga ma o'o ara o'o ka tunggeene naco anya tammo meede

kara tala o'o kide mo.' <sup>4</sup> İkiri Abrahiim ka tinyi anya ma Kaldan ku'bu ara kico Haran emmi kide. A pupa tiya iini ka teyi, a Masala ta'duga i'i manangnga ka 'büdhülü tiya ada ka tanna kide 'bitingngö ya. <sup>5</sup> Ka uuru tanno miini no, taalo Masala manangnga niimö iini ma 'büdhülü tiya taalo makara tarmuna 'bam'buugu iini. A Masala tiki iini a'da oogo matanangnga 'büdhülü a kadaada ma iini kakarna kide, kudumma Abrahiim üfürü 'bii'bala taganna kini. <sup>6</sup> A Masala tiki iini, 'Laala yüüdü kara ta kölöge ka anya tammo taalo tanno eene. Eege kara ta kasaga küüni midhi ku'bu ana eege a nagürüünü na miya ka egüsö. <sup>7</sup> Lakiini ara a'a tapusu anya ma üüni eege kada kasaga mo, kassa ka tunggeene ka anya tammo iini mo, köö'dö tafara kede ka 'buugu tiya.' <sup>8</sup> A Masala tükiri ka timi'di tumma nja Abrahiim, ma taradene meene ka tussu adene iini. İkiri Abrahiim ka teene Ishak atiimö füngngö iidümmü afünü iidoona, eedhe i'i. Ishak tara 'bii'bala yiini Yaguub, a Yaguub tara kafaafa ma angnga na ada'baaga kafünü eera no.

<sup>9</sup> "A kafaafa ma angnga tagagirimi Yüüsif ka tanege ana i'i kaco Misiri iini, a Masala taganeene ma taafa kini. <sup>10</sup> A Masala toolona i'i ka dhögürü tiya in'dili

ya, manangnga tussu eema iini tumma tanno a'diila niini, a Faröön ya uugaara ma Misiri ya, tasaasa i'i ümmünü eema iini nye'd'de ada uugaara.

<sup>11</sup> "A ïire tümmü Misiri nye'd'de nja anya ma Kanaan, a kuri titalo a migile taga taalo a kafaafa ma angnga. <sup>12</sup> İkiri Yaguub ka föönyö a'da migile mungngo ka Misiri ya, i'i agürünü kafaafa ma angnga ka tino neene na dhidha no. <sup>13</sup> A kini ka kürünü eege afe'de, a Yüüsif tala eyi yiini a nagöre tanno niini, a Faröön tussu kadu na Yüüsif. <sup>14</sup> A Yüüsif tagürünü ka pupa tiya iini nja kadu tanno iini nye'd'de, na öö'dö kadu kiidoona kada'baaga ana awwa no. <sup>15</sup> A Yaguub tö'dö ka Misiri, eyi kide nja kafaafa ma angnga nye'd'de. <sup>16</sup> Ka'duga eege kaco Shakiim katatü'bü eege ka la ma oofo tiya Abrahiim ka taana ka laala tiya Hamüür ka Shakiim ana gürüüsü ya.

<sup>17</sup> "Ka uuru ma tafi'di tumma na Masala nja Abrahiim, a kadu naaja kakogoona kadhabbu ka Misiri. <sup>18</sup> A kadu tümmü uugaara öccö ka Misiri taalo ussu Yüüsif. <sup>19</sup> Adagüünü ada kadu naaja ku'bu ada kapusu kafaafa ma angnga no ma ta'bunu eege ka tapüüpü laala ya aleefe tageenedene co, amang kene tafa tefe ka 'di. <sup>20</sup> Ka

naguuru tanno miini no ageenedene Müüsa a 'diila 'do atiimö nagatereeene kiidoona ka 'di tiya pupa tiya iini. <sup>21</sup> Ka kadu ka taanu kini, a 'badaada ma Faröön ta'duga i'i ma tinggiri i'i kada 'bii'bala tiya oono. <sup>22</sup> A Müüsa takalaadene ka tussu eema ma Misiri. Ana türü ma teema tumma nja alingga.

<sup>23</sup> "Kini ka ndagu'du nagürüünü a kadu keera ya, ikiri ka tunggeene aaco tosso kadu niini ma Israyil. <sup>24</sup> İkiri ka tasala taga Misiri ka abbü taga Israyil akaraka i'i keere adagiidi taga Misiri. <sup>25</sup> A Müüsa takiki a'da ara nagöre niini tussu a'da Masala ma toolona eege, ndama nüüsö tanno iini, lakiini eege taalo kussu. <sup>26</sup> Ka uuru töccö kadu ma Israyil keera kabbü ajeene, adagümmünü eege ma tindinaana eege ku'bu. Iki eene, 'Aaga 'dee, a'da aaga ka nagöre sa kasaasa tili ajeene amana?'

<sup>27</sup> "Ömö'di öccö tagürünüğü i'i keere kini ka oona iki, 'Mada anangnga o'o kada uugaara tiya iidii? <sup>28</sup> Nasaasa o'o iidii a'a afa müüdü ka tagiidi ta Misiri ka ooso kungngo?' <sup>29</sup> Ka Müüsa ka föönyö tumma no ya, ikiri ka rünö aaco anya ma Midian, adaganna kide kada tajeene adageene laala eera kide.

<sup>30</sup> "Kini ka tatüimö nagürüünü a kadu keera

ya, a tadhingga ma Masala tatele oona iini ka 'dikinya ka dhüile ma Siina ka issi ka finne ka ndhaaru.<sup>31</sup> A Müüsa tadhere kini ka tasala issi ka finne ka ndhaaru, asigi kide kete amang kini tijöögö, a Masala tümmünü i'i ndama issi ka teene,<sup>32</sup> 'A'a na Masala ma kafaafa ma o'o, Masala ma Abrahiim nja Ishak nja Yaguub.' Ari'ba tümmü Müüsa taalo a'duga rüsü ana eedi ma tassa co.

<sup>33</sup> "A Masala tiki iini, 'Kirnö egüide ku'bu küdü kuune, kudumma 'büdhülü tiya üüdü ka 'dängnge kide ya 'büdhülü ya insili ya i'i ya miini.<sup>34</sup> A'a niji dhügürü ya kadu tanno eede ka Misiri nafoönyö fara yeene, nükirü a'a ka öö'dö ku'bu ma toolona eege. Aayu nagürünü o'o ka Misiri.'

<sup>35</sup> "A Müüsa ya kadu tanno iini ka tagaanu kini kiki iini, 'Mada anangnga o'o kada uugaara tiya iidii?' I'i yungngo Masala ka kürünü i'i ada uugaara atoolona a türü tanno tadhingga na alanja iini ka ndhaaru no.<sup>36</sup> Unggu kadu kürö ndama Misiri a türü tanno Masala niini ka talingga eema keefe a kadu ka Misiri nja tada'da ma to ma Dhöyö mo nja dhüile a nagürüünü a kadu keera.<sup>37</sup> A Müüsa ka eyi tiya iini iki a kadu ma Israyil, 'Ara Masala sa nangnga ne'bi aaga a tö'dö ndama aaga afa ma a'a

kungngo.'<sup>38</sup> A Müüsa i'i yungngo nja kadu ma Israyil ka dhüile ungngo ka söödö ma kafaafa ma angnga, nja tadhingga ya ageema nja iini ka 'dikinya ma Siina, anangnga tumma ma tefe ka 'dii iini öö'dö iini angnga.

<sup>39</sup> "Lakiini kafaafa ma angnga kanu kini kitaalo kaföönyö tumma niini, a nanggeedi neene kasaasa tapadaga co Misiri.<sup>40</sup> Kiki a Harüün, 'Adina namasala kunggeene kaja kidha mo, kudumma ungngo taalo kussu niimö ya ümmü Müüsa ya a'da i'i yungngo ö'dö ana angnga ndama Misiri.'

<sup>41</sup> Kadadina masala kafeene nja 'bileefo kataraana eema iini kad-hodho a niimö kadadina a niisö meene ya.<sup>42</sup> A Masala tümmü eyi yoono eene ka oona mafa kene kafara ka midigi, afa ma tiya ka takirinja ka sorne ma nagane'bi,

'Ka laala ya Israyil! Aaga 'dee kara aaga eema a'a ka dhüile kannna ka nagürüünü tanno kukumu kadu keera no?'

<sup>43</sup> U'u, lakiini ka'duga aaga fangga ma Muluk a timidigi ma masala tammo Romfan, namasala yaada kadadina ma tafara kono. Ara a'a tuurugu aaga co ka-jeene keere ma Babil.'

<sup>44</sup> "A kafaafa ma angnga kaganna fangga eene a

tumma ma teema tumma ma Masala kide nja eene ka dhiile. Afa ma tiya Masala ka tiki iini, a'da üünii afa miini ka ijöögö kungngo.<sup>45</sup> A kafaafa ma angnga ta'duga fangga ka niisö ma Yashu ka öö'dö iini nja eene kene ka tamuru 'büdhülü ya kajeene a Masala ka tagasoro eege kene kidha. Fangga maganna kannaa ka 'büdhülü idhi uuru na Dawud ka öö'dö.<sup>46</sup> A Masala tasaasa Dawud ma 'diila nja iini, a Dawud tiki oono a'da ara i'i tarü'bünü la a Masala tammo Yaguub.<sup>47</sup> Lakiini Siliman i'i yungngo arü'bü la oono.

<sup>48</sup> "Lakiini Masala taalo manna ka naala na arü'bü adene ana iisine no, afa ma tiya ne'bi ka tiraana ya kungngo,

<sup>49</sup> 'Uugaara iki, 'Buugu ma temmi tiya eede ka 'dotombo'do,  
a 'büdhülü 'buugu ma uune tiya eede.

'Dii ya faanya i'i yungngo ada ka tarü'bünü a'a?

'Buugu ma taneeene  
yeede i'i iiye?

<sup>50</sup> Taalo iisine neede eege kungngo kagalinggo eema ya nye'd'de kungngo?"

<sup>51</sup> "Aaga takidhö ka nanggüdü a nanggeedi aaga nakünggirii no! Kafeene aaga nja kafaafa ma aaga, kaleefe aaga tanu ka Koronggore tiya Masala ya Insili ya.

<sup>52</sup> Kafaafa ma aaga ka küünü

tatoroko ana nagane'bi kagirina kadu na keema tumma ma tö'dö na ömö'di tiya adho ka fiini yaada ka tümmü i'i, aaga tagiidi i'i ya.<sup>53</sup> Ka'duga aaga tumma na Masala ka kadhangga ka niisö aaga sa katitaalo kalinggo iini."

<sup>54</sup> Ka kadu ka föönyö tumma no Istifanüüs no, kagoroo'bo kadiginigo ka nanggeedi kabbünaana igini neene kini.

<sup>55</sup> Lakiini Koronggore ya Insili ya tadigi ka Istifanüüs ka oona, assa co a 'dotombo'do asala tüdhindhi ma Masala, a Yasu ka 'dängnge ka Masala ka niisö ma kuri.

<sup>56</sup> Istifanüüs tiki, "Niji a'a 'dotombo'do ka tatanfa'da a 'Bii'bala ma Tadü'd'dü ta'dängnge ka niisö ma kuri tanno Masala!"

<sup>57</sup> Kafiri ko'do keela ka tumma ko'd'do, kaküdhü iisine, kako'do kini eege in'dili.

<sup>58</sup> Kasisigi i'i co kürö ndama anya ma Örsaliim ma tadiidirii i'i a niigisi.

A kadu na adini kide no takirnö en'di eene ka oona, kümmünü ömö'di tiya ana eere a'da Sawl ya.

<sup>59</sup> Katiidirii Istifanüüs a niigisi, ikirii ka tümmüneene iki, "Ka Uugaara Yasu, 'duga koronggore yeede!"

<sup>60</sup> Üürü ku'bu adhiya ko'd'do iki, "Uugaara, fa tümmü eege ka tatoroko tanno kene no." Kini ka tiraana nggeege ya eyi.

## 8

*Sawl alingga kadu na amma ka Yasu no*

<sup>1</sup> A Sawl tagamma ka tiididene tanno Istifanüüs. A kadu ka naguuru tanno miini no, kagalinggo kadu na amma ka Yasu no kakirimi euge ka Örsaliim. A kadu na amma ka Yasu no, tarünö kanyalanjaana ku'bu nye'de kungngo, kapadaga co fiini ma Yahüüdiya nja Samira. Illi kadafiini, euge kungngo kütü ka Örsaliim. <sup>2</sup> A kadu könö na amma ka Masala no, tatü'bü Istifanüüs, kadafara i'i dhorro. <sup>3</sup> A Sawl tagunggeene ma taga'da kaniisa, öleele ka nöö'dü ümmü kadu na nagiide no nja iiya amanaga euge ka pabuusu.

*Lingga na Yasu kala Samira*

<sup>4</sup> A kadu na kanyalagaago no, taköleele kadünügü tumma ma Masala co kadu. <sup>5</sup> A Filibüs ta'barda aaco anya ma Samira adünügü tumma na Almasiihi co kadu kide. <sup>6</sup> A kadu tagatoodo ka tumma tanno iini ana eedi unggodho, kudumma eene ka taföönyö tumma ma eema keefe yiini ka talinggo a türü tanno Masala ya. <sup>7</sup> Kudumma ngoronggore tanno oroko no ka tam'biri kürö ka kadu ka oona dhabbu kiidhe dhindho. A kadu toolonadene, namügüre dhabbu nja tanno sogo'do no. <sup>8</sup> A kadu ka anya ka oona nye'de tadhodho ka'deema.

<sup>9</sup> A tadegeene inggide ana eere a'da Samaan, i'i agalinggo eema ya idhindhi ya dhabbu anangnga kadu ma Samira tadhere kini nye'de kungngo. A'diniga oona coo'do a'da ya i'i ya ömö'dü tiya idhindhi ya. <sup>10</sup> A kadu nye'de tisi kini keere, na iifi no nja tanno dhiidhi no kiki, "Ömö'dü ya türü na Masala, euge kamiini naaja ka tümmünü euge a'da tidhindhi no." <sup>11</sup> A kadu tisi kini keere kudumma iini ka amana euge ka tadhere nggeege 'bücca a tageene tanno iini no. <sup>12</sup> Kene ka tamma ka tumma tanno Filibüs ka teema tumma ma İnjüli ma Tauugaara ma Masala nja eere tiya Yasu Almasiihi ya, a kadu na nagiide no nja iiya tagambeesedene. <sup>13</sup> A Samaan tamma ka tumma tanno Yasu adakambeesedene öleele nja Filibüs, adinö ka eema yiini ka tagalinggo a türü tanno Masala no adhere.

<sup>14</sup> A kadafiini na kanna ka Örsaliim no taföönyö a'da kadu ma Samira tamma ka tumma tanno Yasu. Kikirri ka kürünü Bütrüs nja Yühanna kene. <sup>15</sup> A kene ka ndala Samira ya, kadageema nja Masala amang kene ta'duga Koronggore ya Insili ya. <sup>16</sup> Kudumma iini taalo ö'dö ka ömö'dü töccö ka oona illi euge kakambeesedene ana eere tiya Uugaara Yasu. <sup>17</sup> Bütrüs nja Yühanna kümmünü iisine eene ka nanggüdü a Koronggore ya Insili ya tö'dö kene ka oona.

<sup>18</sup> A Samaan taasala Masala ka anangnga Koronggore ya Insili ya ana Bütrüs nja Yühanna kümmünü iisine a kadu ka oona ya, ikirii ka 'duga gürüüsü amana eene. <sup>19</sup> Iki eene, "Aaga anangnga türü no a'a meede ka tümmünü iisine neede ka ömö'di ka oona a Koronggore ya Insili tö'dö kini ka oona!"

<sup>20</sup> A Bütrüs tiki iini, "O'o nja gürüüsü tiya yüdüyü nye'd'de agolo ka issi, o'o niki kide a'da o'o natana eema ya Masala ka amana a kadu ya ana gürüüsü. <sup>21</sup> Linggo niidi nitaalo nara tosso kide ka linggo tanno nja ungngo, kudumma eedi tiya yüdüyü taalo a 'diila nja Masala. <sup>22</sup> Aadha ka tatoroko tanno üdüyü no, ara o'o ka fara ka Masala amang kono ta'duga tumma na toroko no küdü ka eedi. <sup>23</sup> Niji o'o ka 'diiri afa tokotente a tatoroko timi'di o'o dhindho."

<sup>24</sup> A Samaan tapadaga tumma eene iki, "Aaga eema nja Uugaara amang ka tumma tanno tafa tilii a'a ka oona."

<sup>25</sup> Ka Bütrüs nja Yühanna ka tageema tumma ma Uugaara, kikirii ka tafada kaco Örsaliim kadünnü tumma ma İnjüili co kadu ka nadaara ma Samira dhabbu.

### Filibüs akambeese taga Habese

<sup>26</sup> A tadhangga ma Masala tiki a Filibüs, "Fiki'dö unggeene nasülügü caa'bū ka fiini tiya ö'dö ndama

Örsaliim ma co Kaza ka dhüle." <sup>27</sup> A Filibüs tafiki'dö unggeene, aduna taga Habese adheemu, afa ka almaala tiya uugaara ma Habese in'dili oogo mana eere a'da Kantaka mo. I'i agöö'dö ka Örsaliim ma tafara ka Masala. <sup>28</sup> Kini ka tafada ya, akaka ka karru tammo iini iiri ka sorne ma ne'bi Asaiya. <sup>29</sup> A Koronggore ya Insili ya tiki a Filibüs, "Unggeene naco ka carro tammo kete mo."

<sup>30</sup> A Filibüs tisi kono keere aföönyö ömö'di ka tiiri sorne ma ne'bi Asaiya iki iini, "Nussu niimö yüdüyü ka taföönyö kide ya?"

<sup>31</sup> Iki iini, "Ara a'a tessu nya a'da taalo ömö'di ma tadünüğü a'a?" İkirii ka tiki a Filibüs a'da, "Aaga emmi nja a'a."

<sup>32</sup> A tumma niini ka tiiri ka sorne no,  
"Eege kungngo afa dheeple  
ma tatendhe mo,  
afa dhünggü ki'döönö  
a kadu kateppe musa  
kono ka oona  
taalo akara taafa'da  
niinö.

<sup>33</sup> Taalo küünii eema ya  
a'diila ana i'i kanyooro eema yiini  
kadagüünii midhi ku'bu  
ana i'i,  
tefe ka 'di niini  
ka'dugadene ka  
'büdhülü, taalo  
ömö'di ma tambaanya  
teema tumma ma  
kadaada miini."

<sup>34</sup> Ömö'di tiki a Filibüs,  
"Tirina a'a 'ba ne'bi 'dee iki  
a'da minna a tumma tanno

eema tumma ma eyi tiya iini alla tumma ma ömö'dü tököönö?"<sup>35</sup> İkiri Filibüs ka tagadünüğü tumma ma İnjülli ma Yasu no iini alaana i'i ka tumma tanno ka sorne no.

<sup>36</sup> A kene ka tagunggeene kaala 'buugu ma 'biidi, ömö'dü tiki iini ka tindini Filibüs iki iini, "Biidi yungngo, amana i'i yungngo ara tafaga a'a keere ka tambeesedene?"<sup>37</sup> [A Filibüs tiki iini, "Taalo niimö ma tafaga o'o keere ka tambeesedene üürü namma o'o ana eedi ka teene dhorro." Ömö'dü tiki, "Namma a'a a'da Yasu Almasiihi ya 'Bii'bala ma Masala."]

<sup>38</sup> İkiri ka tarigi karro ka'barda co 'biidi nja Filibüs, a Filibüs takambeese i'i.<sup>39</sup> Kene köö'dö ko'do ndama 'biidi ya, a Koronggore ma Masala Uugaara ta'duga Filibüs, a dheemu taalo asala i'i afe'de, lakiini unggeene adhodho ka fiinii.<sup>40</sup> A Filibüs taluna eyi yiini ka Ashdüd, unggeene eema tumma ma İnjülli co kadu ka na'buugu nye'd'de idhi aala Kaiysariya.

## 9

*Saul amma ka fiinii tiya Yasu*

<sup>1</sup> A Sawl tüütü ka talinggo kadalaadene na Uugaara Yasu ma tagirina eege, unggeene aaco ka uugaara ma ka'boge.<sup>2</sup> Asaasa waraga kini ma co naala ma talaana ka Demasak, ma co tümmü kadu na nagiide no nja iiya

na amma ka fiinii tiya Yasu öö'dö ana eege ka Örsaliim.

<sup>3</sup> A kini ka tunggeene asa takete ka Demasak ya, ikiri 'dotombo'do karooro ka talimi ka öyeene ada kini ka oona.<sup>4</sup> İkiri ka 'dinggö ka 'büdhülü, aföönyö ömö'dü ka tümmüneene iki iini, "Sawl, Sawl, minna agu o'o nalinggo tatoroko ana a'a?"

<sup>5</sup> A Sawl tiki, "O'o na mada Uugaara?"

A Yasu tapadaga tumma iini iki, "A'a na Yasu yüdü ka talinggo tatoroko ana i'i ya.<sup>6</sup> Fiki'dö 'bitingngö naco anya kara saga tirina niimö yüdü kara tüünii ya."

<sup>7</sup> A kadu na kunggeene nja Sawl no töödhü, taalo keema, kaföönyö tumma, lakiini taalo kiji ömö'dü.<sup>8</sup> A Sawl tafiki'dö ndama 'büdhülü afa'da iiye asa taalo iji niimö. A kadu tümmü i'i ka niisö kümmünü i'i ka tino kaco a Demasak iini.<sup>9</sup> Adaganeene a füngngö iidoona taalo iji 'buugu itaalo agu eema itaalo oyoye 'biidi.

<sup>10</sup> A tatalaadene ka Demasak ana eere a'da Hananiya. A Uugaara Yasu tageema nja iini a kümböödö miki iini, "Hananiya."

Apadaga tumma iini iki, "İi, Uugaara."

<sup>11</sup> Uugaara Yasu tiki iini, "Fiki'dö naco a fiinii tiya ana eere a'da Dhidho ya, naco tindini ömö'dü inggide ama Tarsuus ana eere a'da Sawl. Ka 'di tiya Yahüusa inni kide eema nja Masala.<sup>12</sup> Asala

ömö'di a kümböödö ana eere a'da Hananiya öö'dö ümmünü iisine iini ka oona iji 'buugu."

<sup>13</sup> A Hananiya tiki, "Uugaara Yasu, kadu dhabbu kiki a'a a'da ömö'di agüünü tatoroko a kadu tanno üüdü ka Örsaliim. <sup>14</sup> I'i a'duga waraga ka naguugaara ma ka'boge, ma tö'dö kümmü kadu na amma küdü no anangnga eege ka pabuusu."

<sup>15</sup> Uugaara Yasu tiki iini, "Kolo kini kudumma eede ka tagesse i'i aaco teema ka tumma neede co kadu tanno kitaalo ka Yahüüdü no nja naguugaara nja kadu ma Israyil. <sup>16</sup> Ara a'a tala kini ka ööye, ara tambaanya dhögürü ma linggo ma eere tiya eede."

<sup>17</sup> A Hananiya co 'di anangnga iisine ka Sawl ka üüdü iki, "Örre yeede Sawl, Uugaara Yasu ya adele oona o'o ka fiinü tiya üüdü ka öö'dö ndama iini ya i'i agürünü a'a küdü amang küdü taafa'da iiye natiji 'buugu na'duga Koronggore ya Insili ya." <sup>18</sup> Eema tarooro ka tasuli ndama iini ka iiye afa mudhangga asala 'buugu adakambeesedene. <sup>19</sup> İkiri ka tagu eema a türü niini tapadaga kini. A Sawl taganna ka Demasak nja kadalaadene füngngö idhilli.

*Sawl alaana kadu ka Demasak*

<sup>20</sup> A Bölis tarooro ka tadünüğü eema a kadu ka naala ma talaana a'da Yasu ya 'Bii'bala ma Masala. <sup>21</sup> A

kadu na föönyö no tadhere kiki, "Taalo ömö'di ya kalinggo kadu ka Örsaliim kudumma eere tiya Yasu? I'i ya ö'dö kita ma tümmü kadu na amma ka Yasu ma tunggu eege co naguugaara ma ka'boge?" <sup>22</sup> Lakiini Sawl akogoona ma tana türü, anangnga Yahüüdü no kanna ka Demasak no ka tadhere kini ka teema dhorro a'da Yasu i'i ya Almasiihi.

<sup>23</sup> Ka füngngö ka tafijo dhabbu ya ikiri Yühanna ka timi'di tumma ma tiidi i'i. <sup>24</sup> A tumma no tala i'i kafünü ku'bu ana i'i ka ïnye ma anya ooso kungngo ana uuru meene ka tiidi i'i kini kaco kürö. <sup>25</sup> Lakiini kadu niini ka a'duga i'i ooso kungngo ka'dinigi i'i caa'bu ndama ööye ma ar'da.

<sup>26</sup> Aga Sawl ka ö'dö ka Örsaliim, asaasa taneeene nja kadalaadene ya kari'ba iini kitaalo kamma kini a'da i'i ya tatalaadene. <sup>27</sup> Lakiini Barnaba a'duga i'i öö'dö ana i'i a kadafiini. Adagadünüğü tumma eene iki, Sawl ka tino tanno iini iji Uugaara nya, Uugaara tageema nja iini. Adirina eema eene a'da Sawl agadünüğü tumma co kadu ma Demasak ana eere tiya Uugaara a'da taalo ri'ba kini ka eedi.

<sup>28</sup> İkiri Sawl ka tunggu-naana ku'bu nja kadafiini ka Örsaliim, eema tumma na Uugaara Yasu a'da taalo ri'ba kini ka eedi. <sup>29</sup> Adageema nja Yahüüdü na eema tangga Yünan no, a'bununjaana ku'bu nja

eene lakiini euge kasaasa tiidi i'i.<sup>30</sup> A kadalaadene ka ndussu ya, ka'duga i'i kunggu co Kaiysariya ndama kanna kuurugu i'i co Tarsuu. <sup>31</sup> A kaniisa ma Yahüüdiya nja Jaliil nja Samira teema ta'diila. Midhi oona ku'bu a kadu tadhabbu ka anya a türü tanno Koronggore tiya Insili ya kaneene a ri'ba ma Uugaara.

### *Bütrüs ungngo ka Lidda*

<sup>32</sup> A Bütrüs ta kunggeene ka na'buugu nye'd'de, alla öö'dö ka kadu tanno Masala ka Lidda. <sup>33</sup> Aluna ömö'dii inggide a mügüre ana eere a'da Inas, ungngo iini ka 'büdhülü nagürüünü ka iïdümümü kafünü iidoona. <sup>34</sup> A Bütrüs tiki iini, "Inas, Yasu Almasiihi oolona o'o. Fiki'dö na nindinaana eema ma füngngö yüdü ku'bu a niisö ma o'o." Arooro ka fiki'dö. <sup>35</sup> A kadu ma Lidda nja kadu ma Saroon tadinö ka eema tiya nye'd'de kamma ka Uugaara Yasu.

<sup>36</sup> Madatalaadene maganna ka Yaafa mana eere a'da Tabiita mana eere tangga Yünan a'da Dorkas (a'da kosaala) mamana eema a kadu tanno eema kitaalo kene no, ma linggo eema ya a'diila ya. <sup>37</sup> Ka uuru tanno miini no mümmü maara oogo meyi. Kagala oogo ka oona kunggu co la tiya ta'doogo ya. <sup>38</sup> A Lidda makete ka Yaafa, a kadalaadene taföönyö a'da Bütrüs ungngo ka Lidda kagürünü kadu kini keera

kiki iini a'da, Öö'dö areere afa tadoono ku'bu.

<sup>39</sup> A Bütrüs tüküri ka fiki'dö areere afada nja eene kaco Yaafa, a kene ka ndalaana ya, kiküri ka 'duga i'i kaco la tiya 'doogo ya. Iiya ma nagüüme toreene nja iini kafara kalaala en'di ya Dorkas ka tar'daana yeene kono ka takaleefe ka 'dii. <sup>40</sup> A Bütrüs tuurugu kadu kürö ndama la nye'd'de, ara katüürü ku'bu afara ka Masala. İküri ka tasala ka oofo ma ko'do iki oono, "Tabiita, fiki'dö." Müküri ka tafa'da iïye, masala Bütrüs mafiki'dö memmi. <sup>41</sup> Ümmü oogo ka niisö mafiki'dö. Adagümmünü kadu ma Masala nye'd'de nja iiya ma nagüüme anangnga oogo eene ka adinö. <sup>42</sup> A tumma no tadhalo ka Yaafa nye'd'de, a kadu tamma ka Uugaara Yasu kadhabbu. <sup>43</sup> A Bütrüs tagünü a füngngö dhabbu ka Yaafa ka 'dii tiya ömö'dii tiya linggo ödeene ya ana eere a'da Samaan ya.

## 10

### *Kornolius agümmünü Bütrüs*

<sup>1</sup> Ömö'dii inggide aganna ka Kaiysariya ana eere a'da Kornolius, aga uugaara ma nasigira na ö'dö miya no ma Rööma tanno ana eere a'da Tiliyani no. <sup>2</sup> Ari'ba a Masala nja kadu ma 'dii tiya iini, asaasa kadu nye'd'de amana eema a kadu na eema katitaalo kene no, afara ka Masala turi.

<sup>3</sup> İkiri ka tasala a kümböödö tadhingga ma Masala ana ndanaaya kidoona amuru ma siiya ka tunggunu kini atümmünü i'i, "Ka Kornolius!"

<sup>4</sup> Assa kini ko'do ka tari'ba ka oona iki iini, "Niki o'o nya ömö'di eede?"

A tadhingga tiki iini, "Ta fara ka Masala nüüdü no nja linggo tanno üüdü na 'diila no, Masala mussu tumma miini. <sup>5</sup> 'Bitüngngö agürünü kadu ka Yaafa a'da köö'dö ana ömö'di tiya ana eere a'da Samaan yeene ka tümmünü i'i a'da Bütrüs ya. <sup>6</sup> I'i yungngo ka 'di tiya ömö'di tiya linggo ka ödeene ana eere a'da Samaan, 'di yiini ka tinggini ma to."

<sup>7</sup> Ka tadhingga tiya ageema nja iini ya ka tunggeene, ikiri ka tagümmünü kadu na linggo nja iini no keera nja tasigira tiya amma ka Masala ya unggodho. <sup>8</sup> Adirina eema tiya agüüni adene ya nye'de agürünü eege ka Yaafa.

<sup>9</sup> Kene ka tunggeene ligitaka kungngo kasa ndö'dö kete ka anya ma Yaafa ya. A Bütrüs tasirigi co la ko'do ma teema nja Masala uuru ka teene. <sup>10</sup> İkiri iire ka tümmü i'i asaasa tagu eema. Kene ka tünni ada eema ma taguri iini ya, eyigi ko'do, <sup>11</sup> asala a kümböödö 'dotombo'do ka tatafa'da, asala niimö afeene nja ten'di adhabbu afi'dadene ka karama ada egüsö miini unggunu ku'bu

ka 'büdhülü. <sup>12</sup> Madigine ana eema ma 'büdhülü ana eema ma eriidö, nja eema tiya ürneeene ya nja uyi ma 'dotombo'do. <sup>13</sup> Aföönyö tumma kiki, "Bütrüs, fiki'dö naraana naguri."

<sup>14</sup> A Bütrüs tiki, "Uugaara, taalo a'a nagu eema ya toroko ya nja tiya nyoro ya."

<sup>15</sup> A tumma tiki iini afe'de, "Niimö ya Masala ka talinggo ka'diila ya, fa tiki a'da atoroko." <sup>16</sup> A tumma no tüünidene tiidoona, a ten'di tarooro ka a'dugadene mapadaga 'dotombo'do.

<sup>17</sup> A Bütrüs tabbü falandaana asanaana eedi ku'bu ma eema tiya iini ka tijöögö ya, a kadu na Kornolius ka agürünü eege no kaduna 'di kada 'dingnge ana ko'do ka inye. <sup>18</sup> Kümmünü kadu kindineene kiki a'da, "Samaan ya ana eere a'da Bütrüs ya 'dee ö'dö kita?"

<sup>19</sup> A Bütrüs tüütü ka tesenana eedi ku'bu ma eema tiya iini ka tijöögö ya, a Koronggore ya Insili ya tiki iini, "Kadu kungngo kürö ka iidoona kasaasa o'o, <sup>20</sup> fiki'dö na caa'bu nunggeene nja eene nafa tari'ba kudumma eede, a'a nungngo nagürünü eege."

<sup>21</sup> A Bütrüs tö'dö ku'bu iki a kadu, "A'a nungngo ada katawwa 'buugu ma a'a, kö'dö aaga tiki nya?"

<sup>22</sup> A ömö'di tiki, "Kö'dö ungngo ndama Kornolius ya uugaara ma nasigira. I'i ya ömö'di a'diila ari'ba a Masala, kadu ma Yahüdü in'dili ka'diila nja iini.

Tadhangga ya insili ya tiki iini a'da nöö'dö ka 'dii kita iini, amang kini taföönyö niimö yüüdü kara teema ya." <sup>23</sup> İkiri Bütrüs ka tagümmünü kadu köö'dö kada kafala tiya iini.

<sup>24</sup> İkiri Bütrüs ka öö'dö kita Kornolius ka Kaiysariya, ka taka ka ndaadha. Kaduna Kornolius ka tindhigë eäge nja kadu tanno iini nja kateefe miini. <sup>25</sup> Aga Bütrüs kaco a 'bügööri, a Kornolius tooreene nja iini üürü ku'bu kini kidha. <sup>26</sup> A Bütrüs ta'diniga i'i ko'do iki iini, "Fiki'dö, a'a na ömö'dii afa o'o!"

<sup>27</sup> Aaco 'bügööri eema nja iini, aduna kadu kadhabbu. <sup>28</sup> A Bütrüs iki eene, "Kussu aaga a'da ungngo na Yahüüdü no, taalo ungngo kongoonyo ajeene nja kadu tanno taalo ka Yahüüdü no, ungngo taalo kaco nöö'dii tanno eene, lakiini Masala mala a'a a'da nafa tümmü kadu öccö katoroko kanyoro. <sup>29</sup> A kadu kada kümmünü a'a ya nadheedhe ko'do, nikiri ka tindini aaga, aaga kümmünü a'a amana?"

<sup>30</sup> A Kornolius tiki, "Nafara a'a ka Masala ka 'dii tiya eede, a füngngö ka egüsö, nümmü tenege ana ndanaaya kiidoona amuru ma siiya, nasala ömö'dii kede kidha ana en'di ka oona kada 'bassa. <sup>31</sup> Iki a'a, 'Kornolius, maföönyö Masala fara yüüdü mussu eema ya a'diila yüüdü ka talinggo ya. <sup>32</sup> Agürünü kadu ka Yaafa ka ömö'dii inggide ana eere

a'da Samaan ya ana eere a'da Bütrüs. I'i yungngo ka 'dii tiya ömö'dii tiya linggo ka ödeene ana eere a'da Samaan, 'dii yiini ka tinggini ma to.' <sup>33</sup> Nikiri a'a ka kürünü kadu areere, a tö'dö nüüdü ka'diila. Angnga kungngo ka Masala kidha, 'bitingngö nye'd'de ma aja ka taföönyö niimö ya Uugaara ka tiki o'o ya."

<sup>34</sup> İkiri Bütrüs ka tiki a'da, "'Bitingngö sa a'a tussu a'da Masala dhorro ya taalo mümmü ka ömö'dii öccö, taalo mambanaana kadu ku'bu. <sup>35</sup> Ömö'dii ya ri'ba oono ya, üünii eema ya a'diila ya, mamma kini.

<sup>36</sup> Kussu aaga a'da Masala magürüniiği a tumma tanno oono möö'dö iini a kadu ma Israyil a'da keema tumma ma İnjülli na'diila ma Yasu Almasiihi ma Uugaara ma kadu in'dili ya. <sup>37</sup> Kussu aaga eema ya agalinggo adene ka Yahüüdiya, tata tüm'bü ka Jaliil ndama tambeese tanno Yühanna ka tagümmüneene iini.

<sup>38</sup> Yasu ya ma Nasira ya, Masala manangnga türü ma Koronggore ya Insili ya iini, adakölele ka na'buugu üünii eema ya a'diila ya, olona kadu in'dili na türü ma Ebliisi ka tuurunja kene ka oona no, kudumma Masala ka taganeene nja iini.

<sup>39</sup> "Ungngo kadinö ka eema tiya iini ka tagalinggo ya a'diila ya kanaanya ma Yahüüdiya nja Örsaliim kabünnü i'i ka salii'bi kada kiidaana. <sup>40</sup> Lakiini Masala

## 11

*Tumma na Bütrüs ka  
Örsaliim*

manangnga i'i ka fiki'dö ka la ma oofa a fungngö iidoona manangnga i'i ka takalaala oona a kadu,<sup>41</sup> taalo adele oona a kadu nye'd'de, illi kadu na Masala ka tagesse eege kadhadha no. Ungngo kadinö kini ungngo taguri nja iini ungngo tagooye nja iini kini ka afiki'dö ka inde.<sup>42</sup> Anangnga tumma ungngo iki a'da ungngo tadünügü eema a kadu a'da Masala manangnga i'i kara tümmü kadu na aaya no nja tanno adinö no.<sup>43</sup> A nagane'bi nye'd'de tageema a tumma miini kiki a'da, ömö'di ya amma kini ya ara Masala toolona tatoroko kini ana eere tiya iini."

<sup>44</sup> Ka Bütrüs ka aleefe teema kungngo ya ikirii Koronggore ya Insili ya ka ö'dö ka kadu tanno katoodo kini no ka oona nye'd'de kungngo.<sup>45</sup> A Yahüdü na amma ka Yasu no kunggeene nja Bütrüs no tadhere kene kiji Masala ka anangnga Koronggore ya Insili ya a kadu tanno taalo ka Yahüdü no ka oona afe'de.<sup>46</sup> Kudumma eene ka föönyö kene kageema tumma taalo neene kindhigü Masala ko'do. A Bütrüs tiki,<sup>47</sup> "Koronggore ya Insili ya ö'dö ka kadu tanno ka oona, afa ma angga, amada i'i yungngo tafaga eege keere ka tambeesedene?"<sup>48</sup> Anangnga eege ka tambeesedene ana eere tiya Yasu Almasiihi, kasaasa i'i a'da agünü nja eene a fungngö idhilli.

<sup>1</sup> A kadafiini nja kadu tanno amma ka Yasu ka Yahüüdiya no taföönyö a'da kadu na taalo ka Yahüüdü no kamma ka tumma tanno Masala. <sup>2</sup> Aga Bütrüs ka öö'dö ka Örsaliim ya, a Yahüüdü na kamma ka Yasu no teema tatoroko iini kiki iini,<sup>3</sup> "Ninynyo o'o ka 'dii tiya kadu na taalo karadene no natagu eema nja eene."

<sup>4</sup> A Bütrüs tadirina eema ya agüünii adene ana i'i ya iki,<sup>5</sup> "Nageema a'a nja Masala ka anya ma Yaafa, nasala eema a kümböödö, niimö afeene nja ten'di adhabbu imi'didene ka na'dugugini iini ada egüsö miini, a'bardaga ku'bu ndama 'dotombo'do idhi öö'dö kete.<sup>6</sup> Nasala co niji eema ma eriidö kide nja eema ma toroko ma dhüüle nja tiya ürneene ya nja uyi.<sup>7</sup> Naföönyö a'a tumma ka tiki a'a, 'Ka Bütrüs, fiki'dö naara eema ya naguri.'

<sup>8</sup> "Na a'a tiki, 'Taalo a'a nasaasa, Uugaara! Kede ka taneene 'do ma 'billi taalo a'a nagu niimö ya toroko ya nja tiya nyoro ya kede ka niünö.'

<sup>9</sup> "A tumma tö'dönja a'a ndama 'dotombo'do afe'de kiki, 'Niimö ya Masala kadalgalingga ka'diila ya, fa tiki a'da atoroko.'<sup>10</sup> Adiridene tiidoona, ikirii eema ka tapadaga co 'dotombo'do nye'd'de.

<sup>11</sup> "Ka uuru tanno miini no kö'dö kadu kiidoona

ka'dingnge ana ko'do ka inye ma ondo ma 'di tiya eede ka tanna kide ya, kagürünüdene ndama Kaiysariya.<sup>12</sup> A Koronggore ya Insili ya tiki a'a nunggeene nja eene nafa tümmü rümü. A nagöre na iidümmü ka afünü unggodho no tunggeene nja a'a ma co Kaiysariya, ungngo co 'bügööri tiya Kornolius.<sup>13</sup> Iki ungngo a'da iji i'i tadhangga ka 'di kita iini ka 'dingnge iki iini, 'Kürünü kadu ka Yaafa kaco tö'dö ana Samaan, ya kadu ka tümmünü i'i a'da Bütrüs ya.<sup>14</sup> Adünüğü tumma müüdü ka toolonadene nja kadu ma 'di tiya üüdü nye'd'de kungngo.'

<sup>15</sup> "A kede ka ndeema ya, a Koronggore ya Insili ya tö'dö kene ka oona afa ma tiya iini ka tagöö'dö kaja ka oona ka dhidha ya.<sup>16</sup> Nagiigii a'a tumma na Uugaara Yasu ka tatiraana no, 'Yühanna akambeese a 'biidi illi aaga ara tambeesedene a Koronggore tiya Insili ya.'<sup>17</sup> Masala 'dee kono ka anangnga eema a kadu tanno afa moono ka anangnga angnga kaja ka tamma ka Uugaara Yasu Almasiihi, nggeege 'dee a'a na mada natakara ka tumma tanno Masala?"

<sup>18</sup> Ka kadu ka ndaföönyö tumma na Bütrüs ka tageema no kidhi oona ku'bu kündhigii Masala ko'do kiki, "'Bitingngö kussu ungngo a'da Masala mafa ka kadu na taalo ka Yahüüdü

no a'da kaadha ka tatoroko tanno eene köö'dö ka fiini tiya dhorro ya nja fiini ma tefe ka 'di."

### *Kaniisa ma ka Antakiya mo*

<sup>19</sup> A kadu na amma ka Yasu kanyalagaago kudumma inde tanno Istifanüüs kunggeene kalla kaco Finikiya nja Kuburus nja Antakiya kitaalo keema tumma ma Yasu co kadu nye'd'de illi Yahüüdü unggodho eege.<sup>20</sup> Lakiini kadu könö kungngo eene kama Kuburus nja Keriwan kö'dö ka Antakiya kadünüğü eema a kadu tanno taalo ka Yahüüdü no, keema ka tumma ma Uugaara Yasu na 'diila no co eene.<sup>21</sup> A Masala taganeene nja eene a kadu dhabbu tamma ka Uugaara Yasu.

<sup>22</sup> A kadu ma kaniisa ka Örsaliim no taföönyö tumma no, kikiri ka kürünü Barnaba ka Antakiya.<sup>23</sup> A kini kinco asala ta'diila ma Masala, a dhodho uu'bu eege ka nanggeedi nye'd'de ma tidhi oona ku'bu ka Uugaara ana eedi dhorro.<sup>24</sup> A Barnaba ömö'di a'diila a adigine a Koronggore tiya Insili ya nja tamma ka Yasu dhorro, a kadu kadhabbu tamma ka Uugaara Yasu.

<sup>25</sup> A Barnaba co Tarsuus ma co ndawwa Sawl.<sup>26</sup> A kini ka aluna i'i öö'dö ka Antakiya iini kagu'du ürüünü unggodho kadagalaana kadu na amma ka Yasu kadhabbu. Eere tananja a kadalaadene

ka Antakiya ka dhidha a'da na masihiin.

<sup>27</sup> Ka naguuru tanno miini no, kö'dö nagane'bi ndama Örsaliim kaco Antakiya. <sup>28</sup> A könö tafiki'dö ana kene ana eere a'da Akabüs, a Koronggore ya Insili ya tanangnga türü kini ka oona adageema iki, a'da iire inggide atoroko, ara ta'duga 'buugu ka oona nye'd'de. <sup>29</sup> Iire ya miini ya agöö'dö ka ürüünü tiya Kayisar Kalödiyös. <sup>30</sup> Kadalaadene tiki a'da ara eege tonsoona eema ka oona ömö'di ya asaasa tanangnga ku'bu tamana ma türü tanno iini kagürüniigü kunggu co nagöre no ka Yahüüdiya. <sup>31</sup> Kadagüünü nggeege, kagürüniigü ana eema co kadiifi ma kaniisa nja Sawl nja Barnaba.

## 12

*Bütrüs ö'dö kürö ndama pabuusu*

<sup>1</sup> Afiki'dö Uugaara Hirüdüs ka uuru tanno miini no ma talinggo kadu ma kaniisa 'do. <sup>2</sup> Adagiidi Yaguub ya örre tiya Yühanna ya anangnga kadu ka teedhe i'i ka eyi a kulu'ba. <sup>3</sup> A kini ka tassa ka oona ka'diila ka Yahüdü, iini ka tagiidi Yaguub ya, ümmü Bütrüs ka uuru ma Taanyara ma Dheedhifi. <sup>4</sup> Kini ka tümmü i'i anangnga i'i ka pabuusu anangnga nasigira kafa kini kanggiisö, asaasa tapusu i'i kidha ma kadu ka Taanyara

ma Tada'da ka Erüdö kara co kürö.

<sup>5</sup> Kini ka tanangnga i'i ka pabuusu ya, a kadu ma kaniisa tafara ka Masala turi kudumma iini.

<sup>6</sup> Ka ooso tanno Hirüdüs ka asaasa tala i'i a kadu no, a Bütrüs tagarigide ka söödö ma nasigira keera adimi'didene ana killi keera a'da nasigira könö kanangnga ka inye ma pabuusu kafa kide. <sup>7</sup> Amussu kungngo a tadhangga ma Masala tadhe, a 'buugu ta'dara öyeene ka pabuusu ka teene. İkiri tadhangga ka abbü Bütrüs ka oona iji i'i iki iini, "Fiki'dö areere!" A nakilli tasuli kini ka iisine.

<sup>8</sup> A tadhangga tiki iini, "Mi'di jönnö yüdü nimi'di egiiide yüdü." A Bütrüs tagalinggo nggeege, assa ka tiki iini, "Kirni ten'di yüdü ma kürö mo küdü ka oona nuurna a'a keere." <sup>9</sup> İkiri ka tuurna i'i keere kaco kürö, itaalo ussu a'da tumma dhorro eege kungngo a tadhangga ka tagüünü, iki kide a'da kümböödö. <sup>10</sup> Ata'da ka nasigira tanno dhidha no a tanno asigi kide no kö'dö ka inye ma ndaliili tanno afaga co anya no katanfa'da unggodho eege köö'dö kürö kada kunggeene ka fiinä a tadhangga tarooro kadheene nja Bütrüs.

<sup>11</sup> A Bütrüs tajeene iifye ta'dara kini iki, "Sa a'a tussu a'da Masala magürünü tadhangga, öö'dö ta'duga ka Hirüdüs ka iisine nja

tatoroko tanno Yahüdü ka asaasa tüüni ana a'a."

<sup>12</sup> Adakiki iifye ku'bu, amussu kungngo unggene aaco kita Mariyom niimö ma Yühanna ya kadu ka tümmünü i'i a'da Murkus ya, a'da kadu kungngo ka 'bügööri kadhabbu ka kafara ka Masala. <sup>13</sup> İkiri Bütrüs ka tadhogo ka inye na eera no, a 'badaada ma linggo nja eene mo, mana eere a'da Rawda ma öö'dö tassa kide. <sup>14</sup> Kono ka tussu a'da 'bugeyi ya Bütrüs i'i ya miini, mafanna üüdü areere maco a 'bügööri taalo mafa'da inye oona ka'diila kono miki eene a'da, "Bütrüs ungngo ka inye."

<sup>15</sup> Kiki oono, "Ta'bala ün'dügüngngö." Mütü ka teema tumma noono kiki oono a'da, "Tadhangga yiini i'i ya miini."

<sup>16</sup> A Bütrüs tüütü ka abbü inye kidhi kaafa'da iini, kene ka taasala i'i kadhere.

<sup>17</sup> Alaga niisö coo'do iki eene a'da ka ki'döönö adagadünögü tumma na Masala ka tunggu i'i kürö ndama pabuusu no iki eene, "Aaga tirina tumma no a Yaguub nja kadu tanno aja," ikiri ka öö'dö kürö aaco a 'buugu töccö.

<sup>18</sup> Ka taka ka ndaadha a ri'ba tümmü nasigira kindini ajeene a'da, minna agüünii adene ana Bütrüs?

<sup>19</sup> İkiri Hirüdüs ka kürünüigü a'da köö'dö ana i'i kitaalo kaluna i'i, adakindini nasi-gira anangnga kadu kagirina eege.

İkiri Hirüdüs ka tunggeene ndama Yahüüdiya aco tanna ka Kaiysariya.

### *Inde na Hirüdüs*

<sup>20</sup> A Hirüdüs tagoroo'bo nja kadu ma Suur nja kadu ma Saiyda. Eege 'bitingngö kimi'di tumma ka unggodho, kö'dö ka Hirüdüs. Kadhadha kadakilli Bilastos ya alingga ada Hirüdüs ya, kasaasa ta'diila kudumma kuri tiya eene ka ticci tö'dö ndama anya tammo Uugaara Hirüdüs.

<sup>21</sup> Ka uuru tanno iini ka teema nja eene no, ikiri ka kirni ten'di ma tauugaara iini ka oona emmi ka kööyö ma tauugaara eema nja kadu.

<sup>22</sup> A kadu tafiri kiki, "Tumma na Masala eege kungngo taalo tumma ma ömö'di eege kamiini."

<sup>23</sup> İkiri tadhangga ma Masala ka abbü i'i kudumma iini taalo anangnga ta'diila a Masala, ikiri a'diino ka tatamü i'i eyi.

<sup>24</sup> A tumma ma Masala tadhala ku'bu kadhabbu.

<sup>25</sup> Ka Barnaba nja Sawl ka ndatüümö linggo kafada ndama Örsaliim ya, a Yühanna ya ana eere a'da Murkus ya turna eege keere.

## 13

### *Barnaba nja Sawl kümmününja ka linggo*

<sup>1</sup> Akaganna nagane'bi ka kaniisa ma Antakiya nja katalaana, Barnaba, nja Shamön ya ana eere a'da Nijer, nja Lokios ya ma

Keriwan ya, nja Manayiin ya teefe ma Hirüdüs tiya uugaara ya miini ka takadhilli, nja Sawl.<sup>2</sup> Kene ka talinggo ada a Masala kafara kümmü tenuge, a Koronggore ya Insili ya tiki eene, "Aaga apa kede ka Barnaba nja Sawl kalinggo linggo neede ka tagümmünü eege iini no."<sup>3</sup> Kene ka tümmü tenuge kafara ka Masala ya. Kümmünü iisine neene eene ka nanggüdü kuuru eege ka tino.

*Barnaba nja Sawl kalaana  
kadu ka Kuburus*

<sup>4</sup> A Koronggore ya Insili ya tagürünü eege ka Salükiya ndama kita miini kita kunggeene a mürkabü kaco Kuburus.<sup>5</sup> A kene kaala Salamis ya kadünüğü tumma ma Masala a kadu ka naala ma talaana ma Yahüdü, a Yühanna Murkus takinyi linggo eene ka uuru tanno miini no.

<sup>6</sup> Katunggeene kada'da jazeera ma Kuburus nye'd'de munda anya ma Bafos, kaduna tadegeene ma Yahüdü, ümmü eyi yiini kada na'bi akorokoro ana eere a'da Bara-Yasu.<sup>7</sup> I'i ya teefe ma ömö'di tiya uugaara ma Rööma ya ma Kuburus ya ana eere a'da Sercius Bölis, ömö'di ya miini ya a'dara adagümmünü Barnaba nja Bölis iki eene a'da keemaga tumma ma Masala co iini.<sup>8</sup> Lakiini tadegeene ya ana eere a'da Elimas, afaga eege

keere asaasa tafünü i'i a'da afa tamma ka tumma tanno Yasu.<sup>9</sup> A Koronggore ya Insili ya tö'dö ka Sawl, ya ana eere afe'de a'da Bölis ya, assa ka tadegeene ko'do.<sup>10</sup> Iki iini, "Ma o'o 'bii'bala ma Ebliisi no, nanu o'o ka eema tiya a'diila ya, eedi yüdü adigine ana eema tiya toroko nja korokoro! Taalo o'o nasaasa taadha ka taga'da fiini ma Uugaara ya dhorro ya?<sup>11</sup> Ara niisö na Masala sa ka abbü o'o, ara takisinsoro taalo o'o nara tiji ndanaaya a naguuru." Eema tarooro ka tarifirifi kini ka iïye a'baana 'buugu, asaasa ömö'di ma tümmünü i'i ka tino.

<sup>12</sup> Ka uugaara ka tasala eema ya agalinggo adene ya, amma adakadhere ka talaana tanno.

*Bölis nja Barnaba ko'do  
ka Antakiya ka Besidiya*

<sup>13</sup> A Bölis tako ka mürkabü nja köje ndama Bafos kaco Barga ka Bamfiliya, a Yühanna Murkus tadheene nja eene aco Örsaliim.

<sup>14</sup> Illi eege kunggeene ndama Barga ka co Antakiya ka Besidiya, kaco la ma talaana ka uuru ma Sa'bidi kemmi.<sup>15</sup> Ka ömö'di kanda küri sorne ma seriye nja sorne ma nagane'bi ya, a naguugaara ma la ma talaana tagürünü kene kiki, "Nagöre ma ungngo, üürü tumma ma tafünüğü ko'do kungngó ada, aaga tadirina a kadu."

<sup>16</sup> A Bölis tafiki'dö alaga nüüsö coo'do iki, "Kadu ma Israyil nja kajeene tanno ümmü Masala no, aaga toodo kede. <sup>17</sup> Masala ma kadu ma Israyil magona kafaafa manangnga eege kada dhabbu yeene kada-ganna ka Misiri munggu eege kürö ndama anya tammo a türü ma nüüsö tanno oono. <sup>18</sup> I'i aganeene nja eene ka dhüle adakidhi oona ku'bu nja eene a nagürüünü a kadu keera. <sup>19</sup> Magirina kadu ka naanya ka iidümmü kafünü eera ka Kanaan manangnga 'büdhülü yeene a kadu tanno oono kakarna kide. <sup>20</sup> Eema ya 'do agalinggo adene a nagürüünü kö'dö namiya ka egüsö ada'baaga ka iidümmü (450).

"Masala massa kanangnga eege kada naguugaara ma tahükümü eege idhdhi ürüünü tiya ne'bi Samwiil tö'dö. <sup>21</sup> Kadarangnga Masala a'da mümmünü uugaara ya dhabbu yeene, a Masala tümmünü Sawl 'bii'bala ya Kaise eene kada uugaara i'i ya siliga tiya Binyamiin, adaganna kada uugaara a nagürüünü kadu keera. <sup>22</sup> Mikiiri ka tuurugu i'i keere ka tauugaara mara kanangnga Dawud kide, miki, 'Eedi yeede amma ka Dawud 'bii'bala ya Yessi dhorro, i'i ara talinggo eema yeede ka asaasa ya.'

<sup>23</sup> "A Masala tanangnga Yasu ka tageenedene kada 'bandaada ma Dawud tatoolona ma kadu ma

Israyil afa ma tiya oono ka tageema ya kungngo. <sup>24</sup> Ka Yasu ka tüfürü tö'dö ya, a Yühanna tageema tumma ma taadha ka tatoroko nja tambeese ma kadu ma Israyil nye'd'de. <sup>25</sup> Aga Yühanna ka ndakete ka tatüimö linggo niini ya ikiri ka tiki eene, 'Kiki aaga kide a'da a'a ungngo na tö'dö sa? Taalo a'a na ömö'di tiya ada ka tindhigü ya. Kaw, i'i yungngo ara tö'dö kede keere, taalo a'a natambaanya tinggili meena ma egüide tiya iini.'

<sup>26</sup> "Kadu eede ka laala ya Abrahiim nja kajeene tanno ümmü tumma ma Masala no, magürünügi a tumma ma toolona ma angnga. <sup>27</sup> Lakiini kadu ma Örsaliim nja naguugaara tanno eene taalo kussu Yasu, kitaalo kussu tumma ma nagane'bi neene kadiiröönö a naguuru ma Sa'bidi. Kene ka tahükümü Yasu ya, kanangnga tumma na nagane'bi ka co ööye miini. <sup>28</sup> A'da taalo kaduna nüümö ma tiidi i'i, kiki a Bilatus ya uugaara ma Rööma ya a'da iidi i'i. <sup>29</sup> Kene ka ndatüimö tumma na arigirinja ka nakasorne miini no, ka'dinigi i'i ku'bu ndama salii'bi kunggu i'i co la ma oofo. <sup>30</sup> Lakiini Masala miji i'i ndama inde. <sup>31</sup> I'i adele oona a kadu a füngngö dhabbu, a kadu tanno öö'dö nja iini ndama Jaliil kaco Örsaliim no, a 'bitüngngö eege kungngo keema tumma niini.

<sup>32</sup> "Ungngo kadünögü

tumma ma ïnjülli aaga na Masala ka takatirna a kafaafa ma angnga no.  
 33 Masala magalinggo ada angnga no laala tiya eene ya kono ka anangnga Yasu ka tafiki'dö ka inde. Afa ma sorne ma Tüüsü ma nakaaru ma eera mo katiki,  
 'O'o na 'bii'bala tiya eede,  
 ka uuru tanno nageene  
 a'a o'o.'

34 Masala mafiki'dö i'i ka inde, i'i taalo asürdö ka la ma oofo afa moono ka takiki a'da,

'Ara a'a tanangnga baraka ya insili ya ma timin'da aaga yeede ka adirina a Dawud ya.'

35 Miki ka sorne ma Tüüsü ma Nakaaru,

'Taalo o'o na tafa ka tata'diila tiya üüdü assa ka tasürdö.'

36 "Lakiini Dawud kini ka ndalinggo tumma na Masala kini ka aleefe ka 'di nye'd'de eyi ada tü'büdene ka kafaafa miini kete a tuu'da niini tasürdö. 37 Illi ömö'di ya Masala ka fiki'dö i'i ka inde ya taalo tuu'da niini ka sürdö.

38 "Kadu eede, keemaga ungngo tumma na Masala co aaga ana eere ma Yasu, ara tatoroko naada ta'dugadene.

39 Ömö'di ya amma ka Yasu ya a toolonadene ka eema tiya tumma tanno Müüsa taalo kambaanya talinggo ya. 40 Aaga adinö ko'do ii'di tumma na nagane'bi kadari-giri no tö'dö kada.

41 'Aaga adinö kide, aaga no midhi eema no,  
 aaga dhere aaga taaya,  
 ara a'a talinggo eema ka nagürüünü tanno ada ya ömö'di sa ka tirina aaga ya taalo aaga katamma kide.'

42 Aga Bölis nja Barnaba ka ndö'dö kürö ndama la ma talaana ya, a kadu tasaasa a'da köö'dö teema tumma ma eema tiya ka uuru ma Sa'bidi tiya unggunu tö'dö ya. 43 Ka kadu ka ndanyalaga, a Yahüdü dhabbu nja tanno ö'dö kada Yahüdü no turuna Bölis keere nja Barnaba kadageema nja eene kuu'bu egee ka nanggeedi a'da kütü ka türü ma Masala.

44 Aga uuru ma Sa'bidi ka ndö'dö ya, a kadu ma anya tagawaana oona ma taföönyö tumma ma Uugaara Yasu. 45 Aga Yahüdü ka tasala kadu kadhabbu ya, oona takirimi kene keela i'i kafaga i'i keere ka teema tumma niini.

46 A Bölis nja Barnaba takuru rüsü kapadaga tumma eene, "Ungngo kama tageemaga tumma na Masala co aaga ka dhidha. Lakiini kanu aaga kide aaga tümmü nanggeyi naada a'da aaga taalo ka tefe ka 'di ta'billi, ungngo 'bitingngö ara ungngo co ka kajeene. 47 Kudumma Uugaara ka tiki angnga,

'A'a nanangnga o'o ka öyeene ada kajeene, ma toolona kadu ka 'büdhülü nye'd'de kungngo.' "

<sup>48</sup> A kadu ma kajeene taföönyö tumma na Bölis, eege kadhadho kïndhigü tumma na Uugaara. A kadu na amma ka Masala no nye'd'de, kagessedene ma co ka tefe ka 'dï ta'billi.

<sup>49</sup> A tumma na Masala kanyala ka na'buugu koona nye'd'de. <sup>50</sup> Illi Yahüdü kagafünaana naguugaara ma anya küüfünü iiya tammo iifi na ari'ba a Masala no nja kadiifi ma anya. Kagalinggo Bölis nja Barnaba, kakirimi eege kasoro eege ka anya tammo eene. <sup>51</sup> İkiri Bölis nja Barnaba ka tafidhe ndhünggürü eene ka uune kagoroo'bo nja kadu ma anya kunggeene kaco Ikoniya. <sup>52</sup> A kadu na amma ka Masala no, tadiginigo adhodho nja Koronggore tiya Insili ya.

## 14

### *Bölis nja Barnaba kö'dö ka Ikoniya*

<sup>1</sup> A Bölis nja Barnaba co la ma talaana ma Yahüdü katadaada ka Ikoniya, kadageema ka tumma a Yahüdü nja kadu taalo ka Yahüdü no kadhabbu, kamma ka tumma ma Uugaara Yasu. <sup>2</sup> A Yahüdü no anu ka tamma no, takafünü kadu na taalo ka Yahüdü no, kaga'da eege ka nanggüdü kada diidi

ma nagöre tanno eene na amma ka Yasu no. <sup>3</sup> Lakiini Bölis nja Barnaba kütü ka anya kadünögü tumma ma Uugaara Yasu a kadu a rüsü. Uugaara ya miki a'da tumma neene katimin'da manangnga türü eene ma talingga eema ma türü nja tale'bele eema keefe.

<sup>4</sup> A kadu ma anya tasümünü njaana ku'bu, kadu no nja Yahüdü, anno nja na Bölis nja Barnaba kadafiini. <sup>5</sup> Yahüdü nja kadu tanno taalo ka Yahüdü no nja naguugaara tanno eene, kasaasa tüüni tatoroko ana eege ma tadiidirii eege a nügisi. <sup>6</sup> Ka tumma tanno ka tasurugu kene ka iisine ya kikirii ka rünö kaco Lestra nja Derba nja na'buugu tiya kete kene ya ka anya ma Ligööniya.

<sup>7</sup> Keemaga tumma ma İnjili a kadu kanna.

### *Bölis ö'dö ka Lestra nja Derba*

<sup>8</sup> Ömö'dü inggide ka Lestra ageenedene kada mügüre, taalo unggene 'do. <sup>9</sup> Kini ka tatoodo ka Bölis ka teema ya, ikiri Bölis ka tagiiri i'i aduna i'i amma ana eedi ma toolonadene. <sup>10</sup> A Bölis tiki iini, "Fiki'dö nümmü 'buugu ana uune tanno üdü nunggeene!" İkiri kafiri ko'do unggene.

<sup>11</sup> Ka kadu ka ndasala eema ya Bölis ka tagüüni ya, kiidhe a tumma ma Ligööniya, "Namasala kö'dö kaja ku'bu kafeene nja

ömö'dü." <sup>12</sup> Kagona eere a Barnaba a'da Masala Siyus, kanangnga eere a Bölis a'da Masala Hürmüs kudumma iini ana tumma. <sup>13</sup> A ta'boge ma Siyus, la ma masala mungngo iini kürö ma anya, ö'dö a tuli ma naafa nja nagodha anna ka ïnye ma anya asaasa türri eege nja kadu.

<sup>14</sup> Ka Barnaba nja Bölis ka taföönyö tumma no ya, köörese en'di ku'bu eene ka oona, ka'digaana ka kadu kiidhe kene, <sup>15</sup> "Hööy kadu, minna i'i yungngo ada ka talinggo? Ungngo ka kadu afa aaga, kö'dö ungngo teema ka tumma na 'diila no aaga taadha ka tatoroko tanno, aaga tamma ka Masala ma efe ka 'dii mo marü'bü 'dotombo'do nja 'büdhülü nja to nja eema tiya inggide ya nye'd'de. <sup>16</sup> Mafa kadu ka nagürüünü ma 'billi ka tagalinggo a fiinü tiya eene ün'dügüngnö. <sup>17</sup> Illi oogo madinii ka eema yoono ka tagalinggo ka'diila ya, manangnga tombo'do ka ede ada aaga, manangnga eema ka'diila ka uuru miini manangnga eema ma kuri aaga dhabbu a nanggeedi ta'diila kada." <sup>18</sup> A Bölis nja Barnaba ka'buna njaana ku'bu nja kadu ma tafaga eege keere ka türri eege kidhi kaadha.

<sup>19</sup> A Yahüüdü könö tö'dö ndama Antakiya nja Ikoniyä kada kafünaana kadu ka Bölis, katiidirii i'i kapügü i'i kürö ndama anya kiki kide a'da eyi. <sup>20</sup> A kadu na

amma ka Yasu no tarügü kini ka oona, afiki'dö aaco anya. Aga taka ka ndaadha ya, köö'dö kürö nja Barnaba kaco Derba.

### *Tapadaga co Antakiya ka Süüriya*

<sup>21</sup> A Bölis nja Barnaba tagadünüğü tumma na Yasu a kadu ka Derba a kadu tamma kadhabbu kafada kapadaga co Lestra. Ndama Lestra kunggeene kaco Ikoniyä nja Antakiya ka Besidiya. <sup>22</sup> Kütü kadünüğü tumma ma Masala eene kuu'bu eege ka nanggeedi a'da kümmü tumma ma Yasu ana eedi dhorro kiki eene, "Angnga ama co ka tadhügürü na dhabbu no amang kaja co ka tauugaara ma 'dotombo'do ma Masala." <sup>23</sup> 'Buugu yeene kaco ya kümmünü kadiifi ka linggo ma kaniisa, kassa ndafara ka Masala kümmü tenege kassa tümmünü eege ka niisö tanno Uugaara Yasu yeene ka tamma kini ya.

<sup>24</sup> Kunggeene ateera meene kadhe ka anya ma Besidiya ko'do köö'dö ka Bamfiliya. <sup>25</sup> Kadageema tumma ma Masala ka Barga kassa ka tunggeene kaco Atalia. <sup>26</sup> Ndama kanna kunggeene kadigaala ka to kapadaga co Antakiya ka Süüriya meene ka tagümmünü eege ka niisö ma Masala kudumma linggo tanno eene ka tagalinggo 'bitingnö no, ka tiimö.

<sup>27</sup> Kene kala Antakiya ya, kawagaana kadu ma

kaniisa ka oona, eema ya Masala ka tagalinggo nja eene mafa'da fiini a kadu na taalo ka Yahüdü no kamma kono.<sup>28</sup> Kagünü dhabbu nja kadalaadene.

## 15

*Temmi ma kadafiini nja kadiifi ka Örsaliim*

<sup>1</sup> A kadu tö'dö ndama Yahüüdiya kalaana kadu ma kaniisa kiki eene, "Toolon-adene kitaalo illi aaga taradene afa ma tiya Müüsa ya kungngo."<sup>2</sup> A Bölis nja Barnaba ta'bununjaana ku'bu nja eene kisaana ka oona. Kikiri ka tiki a Bölis nja Barnaba nja kadu töccö tindini kadafiini nja kadiifi ka Örsaliim.

<sup>3</sup> Aga kadu ma kaniisa ka kürünü eege ya, kadi-gaala ka Finikiya nja Samira kadünögü tumma ma kadu tanno taalo ka Yahüdü no katamma ka Yasu, oona ta'diila kadu kadhodho.<sup>4</sup> A kene ka ndala Örsaliim, a kadu ma kaniisa kadada'da eege, kadafiini nja kadiifi kene ka tagadünnü eema ya Masala ka tagalinggo ana eege nye'd'de.<sup>5</sup> A kadu na amma ka tumma tanno Yasu no naFariisi no tiki a'da, "Kadu na taalo ka Yahüdü no fa kene karadene kümmü tumma ma seriye tiya Müüsa."

<sup>6</sup> A kadafiini nja kadiifi temmi ma tassa ka tumma tanno.<sup>7</sup> Kene ka ta'bununjaana ku'bu a tumma dhabbu ya, a Bütrüs tafiki'dö iki eene, "Nagöre eede, kussu aaga a'da 'billi

Masala magesse a'a kada ka söödö amang ka kadu na taalo ka Yahüdü no taföönyö tumma ma İnjili kamma kide.<sup>8</sup> Masala oogo mussu nanggeedi, mamma kene manangnga Koronggore ya Insili eene afa moono ka anangnga angnga.<sup>9</sup> Taalo kambanan-jaana ku'bu nja angnga. Oogo magala eege ka nanggeedi kene ka tamma kono.<sup>10</sup> Ka'b'ba aaga Masala ka eedi amana aaga tanangnga linggo na indhi no a kadalaadene, kafaafa ma angnga nja angnga taalo angnga kambaanya tümmöönö?<sup>11</sup> Kamma angnga a'da ara angnga toolonadene a türü tanno Yasu, eege afe'de katoolon-adene nggeege."

<sup>12</sup> A kadu nye'd'de takı'döönö dhore katoodo ka Barnaba nja Bölis kadünögü eema ma türü ya Masala ka tanangnga eege ka talinggo ya ka söödö ma kadu tanno taalo ka Yahüdü no.<sup>13</sup> Kene ka ndaadha ka tumma ya, Yaguub tiki eene, "Nagöre eede, aaga toodo ka tumma tanno eede.<sup>14</sup> Iki Samaan aaga a'da Masala masaasa kadu na taalo ka Yahüdü no ma kona kadu kene ka söödö kada tanno oono.<sup>15</sup> Tumma no kagoreene nja tumma tanno nagane'bi ka sorne ma Masala tiya,

<sup>16</sup> 'Afe'de, ara a'a tafada nöö'dö tarü'bü la ya Dawud ya arüdü ya afe'de.

Ara a'a tarü'bünü ka nagu-  
udhu miini  
na'diniga i'i coo'do.

<sup>17</sup> A kadu nye'd'de co ka  
Masala  
nja kadu na taalo  
ka Yahüdü no  
nye'd'de no eede  
ka tagümmünü eege  
kada kadu tanno eede  
no.

A Masala marü'bü eema  
nye'd'de oogo  
mungngo ma eema  
'do.

<sup>18</sup> Masala manangnga  
eema ka tussu adene  
ma 'billi.'

<sup>19</sup> "Tumma neede a'da  
angnga tafa tanangnga i'i ka  
tündhi a kajeene tanno ö'dö  
ka Masala no. <sup>20</sup> Lakiini  
angnga kara tarigiri ada  
waraga co eene, angnga tiki  
eene a'da kafa tagu kuri ma  
tirri ma eema ma namasala  
ya nyoro ya nja füngngö  
kadhoonyo nja tuu'da ma  
eema tiya amiri'didene ya  
nja eriidö. <sup>21</sup> Tumma na  
Müüsa ka tiki a kadu ma  
'billi ka naanya kiiri ka  
naala ma talaana ka naguru  
ma Sa'bidi ka anya ka  
oona in'dili."

*Waraga ma co ka kajeene  
tanno amma ka Masala no*

<sup>22</sup> İkiiri kadafiini nja kadiifi  
nja kadu ma kaniisa 'do  
timi'di tumma ma tümmü  
kadu keera ma tagürünü  
eege ka Antakiya nja Barnaba  
nja Bölis, kikiri ka  
tümmü Yahüüsa yeene ka  
tümmünü i'i a'da Barsaba  
ya nja Siiла, kadu na ussudene  
a kadu tasaasa eege

no. <sup>23</sup> Katarigiri waraga  
kanangnga eene iki,

Kadafiini nja kadiifi nja  
nagore tanno ada kunggu  
ungngo waraga ya co a kadu  
na taalo ka Yahüdü na  
amma ka fiini tiya Yasu no  
ka Antakiya nja Süüriya nja  
Kilikiya.

Kafaanya aaga.

<sup>24</sup> Kaföönyö ungngo  
a'da kadu kinggide kö'dö  
kanna a'da taalo ungngo  
ka kürünü eege, kaga'da  
aaga ka nanggüdü.

<sup>25</sup> Ungngo in'dili kimi'di  
tumma ma tagesse kadu  
ungngo tagürünü eege  
kada nja örre ma angnga  
tiya Barnaba nja Bölis,  
<sup>26</sup> kadu na üpü nanggeyi  
neene co kudumma eere  
tiya Uugaara tiya aja Yasu  
Almasihi. <sup>27</sup> Ungngo

tikiri ka kürünü Yahüüsa  
nja Siiла a'da kadirina  
aaga a tumma ma niinö  
ma eema tiya iidü ka  
rigiri ya. <sup>28</sup> Ijidene  
ka'diila a Koronggore tiya  
Insili nja ungngo a'da  
ungngo tafa tudhu aaga  
ka oona ana eema tiya  
indhi ya, ma eema ya  
asaasadene ya. <sup>29</sup> Aaga

fa taadha ka kuri ma tirri  
ma eema ma namasala  
nja eriidö nja uu'da ma  
niimö tiya kamir'didene  
ya nja taneene ma temelö.  
A'diila nja aaga kada kara  
taadha ka eema tiya. A  
Masala taneene nja aaga.

<sup>30</sup> Kunggeene kaco Antakiya, kadagümmünü kadu na ka kaniisa no kanangnga waraga eene. <sup>31</sup> A kadu takiröönö kadhodho ka tafünüğünja tanno iini. <sup>32</sup> A Siila nja Yahüüsa eege ka eyi tiya eene ka nagane'bi kagadünüğü eema a kadu ma kaniisa dhabbu ma tuu'bu eege ka nanggeedi ka tamma ka Masala. <sup>33</sup> Kene ka tagünü ka Antakiya a kadu tattogo eege ana baraka ma ta'diila kaco ka kadu tanno kagürünü eege no. <sup>34</sup> [A Siila tüü kanna, ara Yahüüsa ka tafada unggodho i'i.] <sup>35</sup> A Bölis nja Barnaba tüü ka Antakiya, kalaana kadu ka tamma ma Uugaara Yasu nja kadu kungno eene dhabbu.

### *Bölis adheene nja Barnaba*

<sup>36</sup> Kene ka tatüümö naganuuru kadhilli a Bölis tiki kungno a Barnaba, "Aayu angnga ndapadaga keere ka naanya tanno aja ka tagalinggo tamma ma Uugaara Yasu kide no angnga tiiri taneene ma kadu tanno aja kide." <sup>37</sup> A Barnaba tasaasa Yühanna ya ana eere a'da Murkus ya ka tunggeene nja eene, <sup>38</sup> illi Bölis anu kini kico nja eene kudumma iini ka adheene nja eene ka Bamfiliya itaalo agalinggo nja eene. <sup>39</sup> Ka'digineene kadheene, Barnaba ta'duga Murkus kunggeene a tigaala ka to kaco Kuburus. <sup>40</sup> İkiri Bölis ka a'duga Siila kunggeene ka

Antakiya a kadu ma kaniisa tattogo eege a ta'diila tanno Uugaara Yasu. <sup>41</sup> Kadigaala ka Süüriya nja Kilikiya, keema tumma ma Yasu a kadu ka nakaniisa a'da kaneene a türü tanno Yasu dhorro.

## 16

### *Timosaws unggeene nja Bölis nja Siila*

<sup>1</sup> A Bölis tö'dö ka Derba nja Lestra. A tatalaadene inggide kanna ka Lestra ana eere a'da Timosaws, a niimö miini ma mada Yahüdü mümmü tumma ma Yasu dhorro, a pupa yiini taga Yünan. <sup>2</sup> A kadu ma kaniisa ma Lestra nja İkoniya teema tamma ta'diila tanno iini. <sup>3</sup> A Bölis tasaasa ta'duga i'i nja iini, ikiri ka teedhe i'i kudumma 'buugu tiya eene kaco ya, kadu ma Yahüdü kussu a'da pupa yiini ataga Yünan. <sup>4</sup> Kene ka tunggeene kosso naanya keema ka tamma na kadu ma kaniisa a'da kaföönyö tumma na kadafiini nja kadiifi no ka Örsaliim amang kene talinggo iini. <sup>5</sup> A kadu ma kaniisa tümmü tumma na Yasu dhorro ana eedi kafa kide, a kadu tagusunja ka köje a naganuru.

### *Tamma na ö'dönja Bölis ka Tarwas*

<sup>6</sup> Kadigaala ka anya ma Frajya nja Galatiya, kudumma Koronggore tiya Insili ya kafaga eege keere ka tadünnü tumma ma Yasu ka Asiya. <sup>7</sup> Kene ka ndakete ka Miisiya ya

kasaasa co Basiiniya, a Koronggore ya Yasu tafaga eege keere kaco.<sup>8</sup> Kagilaana ka Miisiya köö'dö ka Tarwas.<sup>9</sup> Aga 'buugu ka ndooso kungngo ya, a Bölis tasala ömö'di a kümböödö i'i taga Makadoniya ka a'düngnge ana ko'do ümmünü i'i iki, "Aayu ka Makadoniya noolona ungngo!"<sup>10</sup> Aga Bölis ka tasala tumma no ya, ungngo tarooro ka tunggeene ma taco Makadoniya kudumma iidi ka tussu a'da Masala mümmünü a'da ungngo co talaana kadu ka tumma noono kide.

### *Lidiya mamma ka Yasu*

<sup>11</sup> Ungngo taka ka mürkabü ka Tarwas ma co Samotrakiya, a taka taadha ungngo co a Niyabulis.<sup>12</sup> Ndama kita miini kita ungngo co Filippi, ka anya ma dhabbu mo ka Makadoniya, ma kadu ma Rööma katümmöönö. Ungngo taganna kide naguru kadhabbu.

<sup>13</sup> A ka uuru ma Sa'bidi ungngo tö'dö kürö ungngo co a tinggini ma ri, ungngo tiki kide a'da ungngo taduna 'buugu ma Yahüdü kadeema nja Masala kide, ungngo taduna iiya kemmi, ungngo temmi kene ka oona ungngo tageema nja eene.<sup>14</sup> Aka minggide matoodo kidi ka tumma, mana eere a'da Lidiya ma ma anya Tiyatira, manadene ana en'di ma öödhe mümmü tumma na Masala ana eedi, Uugaara Yasu tafa'da oogo

ka üüdü ma toodo ka Bölis ka teema.<sup>15</sup> Kono ka tagambeesedene nja kadu ma 'di tiya oono ya, miki ungngo, "Kada ka tussu a'da a'a namma ka Yasu dhorro ya, aaga ö'dö ka 'di tiya eede aaga tanna kide." Matakuu'buna ungngo ka nanggeedi ungngo tamma kono kide.

### *Bölis nja Siila kungngo ka pabuusu ka Filippi*

<sup>16</sup> Uuru kinggide kidi ka tunggunu kafara ka Masala ya, ungngo tikiri ka toreeene nja aka madasaga ma hatta. Oogo magawaana gürüüsü koona dhabbu, mada hatta mamana ömö'di tiya oono kada tasaga tiya oono ya.<sup>17</sup> Mikiri ka to'd'o ka Bölis keere nja ungngo, meema ko'd'o miki a'da, "Kadu ma Masala ma ko'do mo, eege kungngo kalaala aaga ka fiini ma toolonadene."<sup>18</sup> Malinggo nggeege turi kungngo a'dooko atoroko ka Bölis ka oona, ikiri ka tassa kono ko'do iki a koronggore tiya toroko ya, "A'a niki o'o ana eere tiya Yasu Almasi-ihhi a'da ö'dö kürö kono ka oona." Ikiri ka arooro ka öö'dö kürö.

<sup>19</sup> A kadu tanno oono ka tassa ka almaala kata arumeene itaaloo ya, kikiri ka tümmü Bölis nja Siila kaco 'dadillö ma seriye ana eege.<sup>20</sup> Kümmünü eege a naguugaara ma anya kiki eene, "Kadu na eera no ka Yahüdü kassa öö'dö taga'da anya maaja." <sup>21</sup> Kalaana kadu a tumma kefe taalo

kunggeene nja tumma tanno aja ungngo taalo kalinggo iini ungngo no ma Rööma.”<sup>22</sup> A kadu co kamuli muli ka linggo eege. A naguugaara ma anya tarisinana en'di ka Bölis ku'bu nja Siila kanangnga kadu kada abbü eege.<sup>23</sup> Kada abbü eege 'do kanangnga eege ka pabuusu, kikirri ka tiki a tasigira ma pabuusu a'da afa kene dhorro.<sup>24</sup> Ka ömö'di ma pabuusu ka taföönyö tumma no ya, ikirri ka tuuru eege co pabuusu ka teene afin'da eege ka ndagee'di amang kene tafa tarünö.

<sup>25</sup> A Bölis nja Siila ka ooso ka teene kafara ka Masala, küüwe tüüsü, a kadu na ka pabuusu no tatoodo kene kide.<sup>26</sup> A 'buugu tarooro ka tatinggi'di dhindho a naginyeene ka tatafa'da, a nakilli tatinggildhe ka kadu tanno ka pabuusu no nye'd'de kungngo.<sup>27</sup> Ömö'di ma pabuusu tajeene ka tarigide asala naginyeene ka tafa'danja ku'bu, iki kide a'da karünö kadu na anna ka pabuusu, ikirri ka afanna kulu'ba asaasa tiidi eyi yiini.<sup>28</sup> A Bölis tiidhe ya ko'do iki iini, “Fa tiidi eyi yüdü. Ungngo ka ingitta nye'd'de.”

<sup>29</sup> İkirri ömö'di ma pabuusu ka agürünü ka issi arünö aco co pabuusu ka teene ikirri ka tüürü ku'bu ana küüge ka Bölis kidha nja Siila a'deedene ka oona.<sup>30</sup> İkirri ka tuurugu eege kürö iki eene, “Ka kadu eede,

ara a'a tönynyö amang kede toolonadene?”

<sup>31</sup> Kikirri ka tiki iini, “Amma ka Uugaara Yasu amang küdü toolonadene nja kadu ma 'dii tiya üdü.”<sup>32</sup> Kada kadünügü tumma ma Uugaara Yasu co iini nja kadu ma 'dii tiya iini.

<sup>33</sup> A'duga eege ka ooso tanno miini aagala nagoola na in'di no, arooro ka tambeesedene nja kadu ma 'dii tiya iini.<sup>34</sup> A'duga eege aco öö'di nja eene anangnga kuri eene adhodho nja kadu ma öö'di tiya iini, kudumma eene ka tamma ka Masala.

<sup>35</sup> A taka ka ndaadha ya a naguugaara ma anya tagürünü nasigira kiki eene a'da, “Kapa ka kadu tanno eere no.”

<sup>36</sup> A ömö'di ma pabuusu tadırına tumma no a Bölis, iki iini a'da, “Naguugaara kiki a'da, a kadu tapa kada aaga tunggeene, a 'bitingngö aaga unggene a ta'diila.”

<sup>37</sup> A Bölis tiki, “Kabbü ungngo ka kadu kidha a'da taalo kageema seriye a'da ungngo ka kadu ma Rööma kanangnga ungngo ka pabuusu. A 'bitingngö kasaasa tapa kide kume kume ün'düngngö, taalo ungngo katunggeene. Fa kene köö'dö tuurugu ungngo kürö.”

<sup>38</sup> A nasigira ta'duga tumma no, kunggu co naguugaara. Kene ka ndussu a'da Bölis nja Siila ka ma Rööma, a ri'ba tümmü eege.<sup>39</sup> Kikirri ka öö'dö

kene kiki eene, "Aaga fa kädi, kussu ungngo a'da tatoroko niidi eege kamiini." Kuurugu eege kürö kiki eene a'da kunggeene kaco anya tököönö.<sup>40</sup> Kene köö'dö kürö ndama pabuusu kunggeene kaco kita Lidiya, kagoreene nja kadu ma kaniisa kuu'bu eege ka nanggeedi kikiri ka tunggeene.

## 17

### *Bölis nja Siila ka Tasalanüki*

<sup>1</sup> Ka kilaana ka Amifibulis nja Apolinia köö'dö ka Tasalanüki, Tasalanüki la ma talaana ma Yahüdü minggide. <sup>2</sup> İkiri Bölis ka co la ma talaana afa ma tiya iini ka tüünä katadaada ya alaala eege ka sorne ma Masala adageema a naganuuru ma Sa'bidi kiidoona. <sup>3</sup> Adünügü co eene a'da Almasiihi ya Masala ka kürünü i'i a tö'dö öö'dö tadhügürü idhi eyi afiki'dö ka inde iki eene a'da, "Yasu i'i yungngo eede ka teema ka tumma miini co aaga yungngo Almasiihi." <sup>4</sup> A kadu na Yahüdü könö tamma kuurna tumma na Bölis keere nja Siila, nja kadu ma Yünan dhabbu na ümmü tumma ma Masala dhorro no, nja iiya ma anya tanno iifi no.

<sup>5</sup> A Yahüdü tadigine a kirimii, kateefe tawagaana nagaaga ka oona nja kadu ma weerö nja tanno orro tino ün'düngngö no, kiidhe kalinggo weerö, kaco anya köö'dö ka 'dii kita Yason köö'dö ümmü Bölis nja Siila, ma tümmünü

egee a kadu. <sup>6</sup> Kitaalo kaduna eege, kikiri ka tükkü Yason nja kadu könö na amma ka Yasu no, ma tunggu eege co naguugaara ma anya kiidhe kiki a'da, "Kadu kagirnaana kadu ka oona ka na'buugu nye'd'de kungngo eege kungngo kita. <sup>7</sup> Eege kafala tanna Yason, eege 'do kanu ka tumma tanno Kayisar, kiki a'da, 'Uugaara öccö inggide ana eere a'da Yasu.' "<sup>8</sup> A tumma no tagu'du eege ka oona 'do nja naguugaara ma anya. <sup>9</sup> Kikiri kanangnga Yason nja kadu töccö ka taafa nanggeyi neene kassa ka tapa eene kunggeene.

### *Bölis nja Siila kungngo ka Beeriya*

<sup>10</sup> A kadu ma kaniisa tuurugu Bölis nja Siila co Beeriya ooso kungngo. Kene ka aala ya, kaco la ma talaana ma Yahüdü. <sup>11</sup> A kadu ma Beeriya ka'diila kadagii'bi kadu ma Tasalanüki, kudumma eene ka tagatoodo ka tumma ma Masala a tasaasa ma eedi dhorro kiri Sorne a naguuru ma tiiri eema ya Bölis ka tiki ya a timin'da. <sup>12</sup> A Yahüdü tamma ka tumma tanno eene kadhabbu a nagiide ma Yünan nja iiya tanno iifi no kadhabbu.

<sup>13</sup> A Yahüdü ma Tasalanüki tussu a'da Bölis anna ka Beeriya alaana kadu ka tumma ma Masala kuurna i'i keere kaco taga'da tumma kafunaana kadu kini. <sup>14</sup> A kadu ma kaniisa tikiri ka tuurugu Bölis co

fiinii ma to, lakiini Siila nja Timosaws kütü ka Beeriya.<sup>15</sup> A kadu na kunggeene nja Bölis no teefe tattogo i'i co Asiina, kikirri ka tafada kaco Beeriya, a Bölis tagürünü eege a tumma ka Siila nja Timosaws a'da köö'dö kini keere areere.

### *Bölis aganna ka Asiina*

<sup>16</sup> Ka Bölis ka tindhigii Siila nja Timosaws ka Asiina ya, agoroo'bo kiri ka tasala ka eema ma namasala ka anya kadhabbu. <sup>17</sup> İkiri ka ta'bununjaana ku'bu ka la ma talaana nja Yahüdü nja kadu ma Yünan tanno ari'ba a Masala no nja kadu tanno iini ka taduna eege ka mansala a naguuru no.

<sup>18</sup> A kadu na ussu eema no kinggide kana eere a'da Abikooriin nja Rwaakiin ka'bununjaana ku'bu a tumma nja iini, a kadu könö kungngo eene tiki, "Minna ada tar'daana eema tiya ka asaasa tatiraana?"

A kadu öccö tiki, "I'i eema tumma namasala keefe." Eege kiki nggeege kudumma Bölis ka teema tumma ma Yasu nja tafiki'dö ka inde.

<sup>19</sup> Kikirri ka 'duga Bölis kaco a 'banya ka 'buugu tiya ana eere a'da Ariusbaküüs, kiki iini, "Kasaasa ungngo tussu talaana na issi no üüdü ka öö'dö iini no?<sup>20</sup> Kudumma talaana tanno üüdü kefe, ungngo taalo kassumunaana kide, ungngo tasaasa tussu minna i'i ya miini ungngo." <sup>21</sup> A kadu ma Asiina nja kajeene tanno kanna kanna no, koraana

tino ku'bu ün'dügüngngö taalo kalinggo nüümö, lakiini kaana tumma katoodo ku'bu ma tumma tanno aleefe tabbü 'dala no.

<sup>22</sup> A Bölis tafiki'dö a'dingnge ana ko'do ka kadu ka söödö iki eene, "Ka kadu ma Asiina! Niji aaga ka tümmü namasala naada a nanggeedi dhorro.

<sup>23</sup> Nakunggunaana a'a ku'bu ka anya tammo ada nüüri naala ma masala naada, naduna 'buugu ma türri kömö ada kadakiri kide a'da taalo aaga kussu oogo. Oogo mungngo eede ka teema tumma moono aaga. <sup>24</sup> Masala magalinggo 'buugu nye'd'e ana eema tiya inggide ya 'do oogo ma Uugaara ma 'büdhülü nja 'dotombo'do taalo manna ka naala tanno kadu ka türböönö ana iisine no.

<sup>25</sup> Taalo angnga kama tamana eema oono, angnga taalo talinggo ada oono ana iisine mitaalo masaasa eema kudumma oono mungngo mamana eema a kadu manangnga tefe ka 'di eene nja teela tanya ana eema nye'd'e. <sup>26</sup> Marü'bü kadu nye'd'e ka 'büdhülü ndama ömö'di unggodho, manangnga 'büdhülü eene nye'd'e, madagalinggo ada naganuuru eene, mada-galaala eege ka na'buugu meene ka tanna kide.

<sup>27</sup> Nggeege ya, kene ka aduna 'buugu moono kaduna oogo, oogo taalo magu'b'ba kaja ku'bu. <sup>28</sup> 'Kefe angnga ka 'di ana oogo, angnga takung-gunaana ku'bu angnga tefe

'dii.' Afa ma katüüfü tüüsü tiya ada ka takiki, 'Angnga ka laala tiya oono.'

<sup>29</sup> "Kaja kada laala tiya Masala, taalo angnga kama tiki a'da Masala magalinggo adene dahaba nja fudda nja niigisi ya adinadene a niisö ma ömö'dii nja ta'dara miini. <sup>30</sup> A Masala mafa ka kadu kene ka titaalo kussu oogo mümmünü kadu ka na'buugu ka oona nye'd'de a'da kaadha ka tatoroko kapadaga kono. <sup>31</sup> Uuru kinggide kono ka tagümmü kadu ka 'buugu ka oona nye'd'de ana ömö'dii tiya oono ka tümmünü i'i a'da öö'dö tümmü kadu ya, maala a kadu kono ka fiki'dö i'i ka inde."

<sup>32</sup> Kene ka föonyö tumma ma tafiki'dö ka inde, a kadu könö kamidhi i'i, a könö tiki iini, "Kasaasa ungngo taföonyö tumma ma tafiki'dö ka inde no afe'de." <sup>33</sup> İkiri Bölis ka öö'dö kürö unggene. <sup>34</sup> A kadu könö kamma ka tumma tanno iini kaco iini keere, ömö'dii öccö ana eere a'da Diyanisos i'i ya taga adaya ma Ariusbaküüs, aka ma minggide mana eere a'da Damariis a kadu töccö nja eene.

## 18

### *Bölis ka Kürünsüs*

<sup>1</sup> Ndama tiya, ikiri Bölis ka tinyi Asiina ku'bu aco Kürünsüs. <sup>2</sup> Aduna taga Yahüdü kide ama Büntüs ana eere a'da Akilla aleefe tagunggeene ndama Italiya nja aka tammo iini mana eere a'da

Berskilla, kudumma Kayisar Kalödiyös ya uugaara ma Rööma ya agasoro Yahüdü nye'd'de a'da kunggeene ka Rööma. A Bölis tunggeene ma tassa kene. <sup>3</sup> Adaganeene nja eene adagalinggo nja eene kudumma iini ka taliggo naheema afa meene kungng. <sup>4</sup> Adaga'bununjaana ku'bu nja Yahüdü nja kadu ma Yünan ka naguuru ma Sa'bidi ka la ma talaana, ma tasaasa eege a'da kamma ka tumma tanno iini.

<sup>5</sup> Ka Siila nja Timosaws ka öö'dö ndama Makadoniya ya, a Bölis taadha ka eema nye'd'de ara kanaana iiye ka tagadünnü tumma ma Masala eemaga co a Yahüdü a'da Yasu i'i ya Almasiiji. <sup>6</sup> Kanu ka tumma tanno iini keela i'i, ikiri ka tafidhi ten'di miini eene, iki eene, "Eriidö yaada kada ka nanggüdü, nagu'b'ba kada ara a'a kunggeene ndama uuru tanno naco kajeene könö."

<sup>7</sup> Unggeene ndama kannaa aco 'dii tiya ömö'dii ya tajeene akete ka la ma talaana ana eere a'da Tito Yustus ümmü Masala ana eedi dhorro. <sup>8</sup> A Krisbus ya uugaara ma la ma talaana ya tamma ka Uugaara Yasu, i'i nja kadu tiya iini nye'd'de kungng. A kadu ma Kürünsüs kadhabbu taföonyö tumma na Bölis, kamma ka Yasu kakambeesedene.

<sup>9</sup> Uugaara tageema nja Bölis ooso kungng a kümböödö iki iini, "Fa tari'ba eema! Fa takidöönö.

10 A'a nja o'o, taalo ömö'dü a tüünii niümö ana o'o. Kudumma kadu kungngó eede ka anya tammo kadhabbu." 11 Adaganna kide ana ürüünü unggodho a nagatereene ka iïdümmü kafünü unggodho alaana kadu ka tumma ma Masala.

12 A kadu ma Rööma tümmüñü Kalion ka tümmü tauugaara ma Akaiya, a Yahüüdü tawagaana ka 'büdhülü kümmü Bölis kaco ka naguugaara iini. 13 Kiki, "Ömö'dü ya aga'da kadu ka nanggüüdü asaasa eege katümmü tumma ma Masala ka fiinii tiya diidi ma seriye."

14 İkiri Bölis ka asaasa teema, a Kalion tiki a Yahüüdü, "Kini ka tatumma tanno toroko no nja eema ma taga'da 'buugu eege kamiini ya ara tagatoodo ka tumma tanno ada natakindinaana ku'bu. 15 Üürü tumma eema ma ker'de ker'de nja tindiri nja nagereene nja tumma ma seriye tanno ada, aaga indinanago unggodho aaga kudumma eede taalo a'a nasaasa ta uugaara ma tumma tanno." 16 İkiri ka tagasoro eege kunggeene. 17 Kümmü Sustanis ya uugaara ma la ma talaana ya eege iin'dili kungngó katabbü i'i ka Kalion kidha a Kalion tanangnga iïye eene taalo indineene.

### *Tapadaga co Antakiya*

18 A Bölis taganna ka Kürünsüs dhabbu, a kadu ma kaniisa tattogo. I'i adigaala ka to nja

Berskilla nja Akilla ma taco Süüriya. Adagemedene ka Kankariya, kudumma iini ka timi'di tumma ma Masala. 19 Kene köö'dö ka Afosus ka 'buugu ya Bölis ka adheene nja Berskilla Akilla aco la ma talaana eema tumma ma Masala nja Yahüüdü. 20 Kikiri ka tiki iini a'da agünü nja eene dhabbu, illi i'i anu. 21 Lakiini kini ka tunggeene iki eene, "Ka Masala ka tafa kede ara a'a tafada." İkiri ka tunggeene ka Afosus adigaala ka to. 22 İkiri ka ta'barda ka Kaiysariya, ndama kannaa asirigö co Örsaliim ööjülü kadu ma kaniisa, a'barda aco Antakiya. 23 Kini ka tagünü kide idhilli ya, ikiri ka tunggeene aco Galatiya nja Frajya öö'dö a kadu ma kaniisa ka nanggeedi a'da kakardha ku'bu dhorro.

### *Apölös inynyo Afosus inynyo Kürünsüs*

24 A taga Yahüüdü inggide ama Iskandariya ana eere a'da Apölös, ö'dö ka Afosus ussu ka tadünnü eema, ussu tumma ma sorne ma Masala dhorro. 25 Akalaana kadu i'i ka fiinii tiya Uugaara adageema tumma kadhabbu dhorro, adageema ma Yasu ka'diila a'da ussu tambeese na Yühanna sugi. 26 Kini ka teema ka la ma talaana a rüsü, ikiri Berskilla nja Akilla ka föonyö, kikiri ka 'duga i'i kaco öö'dü kita eene iini kadagalaana i'i ka fiinii ma Masala tiya dhorro ya.

27 Apölös tasaasa tunggeene aco Akaiya,

a kadu ma kaniisa ma Afosus taguu'bu i'i ka eedi kagürünü i'i a waraga ma co tunggu a kadu ma kaniisa ka Akaiya iini a'da kamma kini aneene nja eene. A kini ka ndala Akaiya, a ta'diila nja kadu tanno amma ka Masala no.<sup>28</sup> Kudumma iini ka tagii'bi Yahüdü ka kadu kidha a tumma, alaala tumma ka kasorne ma Masala a'da Yasu i'i Almasihi.

## 19

### *Bölis ungngo ka Afosus*

<sup>1</sup> Ka Apölös ka taganna ka Kürünsüs ya, a Bölis tunggeene atigaala ka naanya ka söödö öö'dö ka Afosus aduna kadalaadene könö kide. <sup>2</sup> İkiri ka tiki eene, "Kada katamma ka Yasu 'dee ka'duga aaga Koronggore ya Insili ya?"

Kiki iini, "Taaloo ungngo kussu a'da Koronggore ya Insili ya inggide."

<sup>3</sup> İkiri ka tiki, "A tambeese na mada eege kungngó ada?"

Iki iini, "Tambeese na Yühanna."

<sup>4</sup> A Bölis tiki, "Akambeese Yühanna tambeese ma taadha ka linggo ma eema tiya toroko ya, ageema nja kadu a'da kamma ka ömö'di ya tö'dö kini keere ya i'i ya Yasu." <sup>5</sup> A kene ka taföönyö tumma no ya, kadakambeesedene ana eere tiya Uugaara Yasu. <sup>6</sup> Ka Bölis ka tümmünü iisine kene ka oona ya, a Koronggore ya Insili ya tö'dö

kene ka oona, karooro ka teema tumma taalo neene, keema tumma ma Masala. <sup>7</sup> A kadu kinggide kö'dö kada'baaga kafünü eera.

<sup>8</sup> A Bölis tükirri ka co la ma talaana eema tumma kanna a'da taalo ri'ba kini ka eedi, asaasa a'da kamma ka tauugaara ma Masala. <sup>9</sup> A kadu öccö tanu kide kamidhi tumma niini keema tatoroko kanu ka fiinii tiya Yasu kidha ma kadu könö. A Bölis taadha kene ka oona a'duga kadalaadene nja iini, adünüğü tumma eene turi ka 'buugu ma talaana ya Tiranus. <sup>10</sup> Ütü kadagalinggo nggeege a nagürüünü keera idhi iki a Yahüdü ma Asiya nja kadu ma Yünan taföönyö tumma na Uugaara Yasu.

### *Laala ya Sakawa*

<sup>11</sup> A Masala tanangnga Bölis ka talinggo eema ya idhindhü keefe. <sup>12</sup> A kadu tama namendeeli nja en'di tiya iini kamana a kadu tanno maara no ka oona. A maara talimi kene, a nagoronggore na oroko no taadha kene ka oona. <sup>13</sup> A Yahüdü könö kunggunaana ku'bu kasoro nagoronggore na oroko no, kikirri ka asaasa tasoro nagana'bu kürö ana eere tiya Uugaara Yasu. Kiki a'da, "Ana eere tiya Yasu afa Bölis ka teema iini ya, a'a niki aayu kürö." <sup>14</sup> Uugaara ma ka'boge ma Yahüdü inggide, ana eere a'da Sakawa, laala ungngo iini iidümmü afünü eera kalinggo eema ya miini ya. <sup>15</sup> A koronggore ya toroko ya tiki eene, "Nussu

a'a Yasu nussu Bölis aaga ka mada?"<sup>16</sup> Ömö'di ya ana koronggore ya toroko ya tako'do kene atabbü eege adagii'bi eege küküri ka rünö ana oona kada 'döngngönyö a nagööla ka oona.

<sup>17</sup> A kadu ma Afosus, Yahüdü nja kadu ma Yünan taföönyö tumma no nye'd'de a ri'ba tümmü eege, eere ya Uugaara Yasu tidihindhi.<sup>18</sup> A kadu na amma ka Yasu no tö'dö kadhabbu kamma ka kadu kidha a'da eege kagalinggo eema ya toroko ya.<sup>19</sup> A kadegeene takawagaana ka sorne ka kadu kidha nye'd'de kungngo küfü issi kide, kadakineene tamana miini kaduna i'i ö'dö nakajine hamsiin alif.\*<sup>20</sup> Nggeege tumma na Uugaara Yasu tanyala ka na'buugu kadhabbu, kinggiridene a türü.

<sup>21</sup> Ka eema tiya agüünü adene ka ndatiimö ya, ikirü Bölis ka asaasa tunggeene aco Makadoniya nja Akaiya assa ka tunggeene aco Örsaliim, ikirü ka tiki, "Kede ka taala kannaya ara a'a co tassa co Rööma."<sup>22</sup> Agürünü kadu na akinyi linggo iini no keera, Timosaws nja Arastus ka Makadoniya ara kütü ka Asiya agünü kide.

### *Taga'da 'buugu ka Afosus*

<sup>23</sup> A kadu taga'da ajeene ka Afosus ka uuru tanno miini

no kudumma fiini tiya Uugaara Yasu.<sup>24</sup> Tamodoo'do inggide ana eere a'da Dimitrios adina eema ma masala ma Artamis ana fudda ma kadu tafara kono. I'i nja kadu tanno iini kanadene nja kadu ana gürüüsü dhabbu.<sup>25</sup> İkirü ka tawagaana kadu na linggo eema nja iini no koona iki eene, "Kussu aaga a'da almaala yaaja kö'dö ndama linggo tanno.<sup>26</sup> Aaga adinö kide aaga taföönyö ömö'di ya ana eere a'da Bölis ya, i'i anangnga kadu kadhabbu ka föönyö tumma niini atafaga eege keere kafara ka masala, kalinggo tanno ka Afosus nja Asiya. Iki a'da namasala na alinggo adene ana iisine no, taalo Masala dhorro oogo miini.<sup>27</sup> A tumma no ka toroko 'do kara tanangnga kadu ka teema diidi ma angnga. Kara tamidhi la ma masala ma Artamis ma dhabbu mo. Kara tanangnga oogo ka titalo, oogo mungngo a kadu kafara kono ka Asiya nja 'buugu ka oona nye'd'de."

<sup>28</sup> A kadu ka taföönyö tumma no ya, ikirü kagoroo'bo kiidhe, "Artamis ma Afosus idhindhi!"<sup>29</sup> Amussu kungngo ya, anya nye'd'de co kalumuli.

A kadu tarefe Kayos nja Arrestarkos, eege kama Makadoniya, kunggeene nja Bölis küügü eege kaco 'dadillö ma ta'bala.<sup>30</sup> A

\* **19:19** 19.19 Jine ya miini ya i'i ya ma linggo ma uuru unggodho.

Bölis tasaasa co ka kadu ka teene ka 'dadillö, a kadu ma kaniisa sa faga i'i keere ka co.<sup>31</sup> A kadu ma Asiya na iïfi no eege ka kateefe ma Bölis tagürünü tumma iini a'da afa co tarigi eyi yiini ka tumma tanno, aaco 'dadillö.

<sup>32</sup> A kadu nye'd'de teema tumma kadhoonyo, aya teema tumma niini kefe aya teema niini unggodho i'i, könö taalo kussu nüümö yeene ka öö'dö kide ya.<sup>33</sup> A Yahüdü tüküri ka tuurugu ka Askander ka kadu kidha kiki a'da i'i ya kalinggo tumma no, ikirü ka alaga nüüsö coo'do asaasa teema.<sup>34</sup> Kene ka ndussu a'da i'i ya taga Yahüdü ya, eege in'dili kungngo kiidhe a tumma ka unggodho kabbü tageere 'do idhi katafara ndanaaya keera, kene katiidhe kiki a'da, "Artamis, Masala ma Afosus! Magu'daana ma idhindhi."

<sup>35</sup> Ömö'di ma anya ya arigiri ya, tanangnga kadu kada mudhudhuli iki, "Ka kadu ma Afosus, kadu ka 'buugu koona in'dili kussu a'da anya maaja Afosus oogo mafa ka la ma masala ma dhabbu mo Artamis nja koronggore tiya oono ya a'dünggö ku'bu ndama 'dotombo'do mo?<sup>36</sup> Taalo ömö'di ma tiki a'da katoroko tumma no, aaga idhi oona ku'bu aaga taadha ka tatoroko.<sup>37</sup> Aaga kö'dö a kadu no kita, lakiini eege taalo kanyooro eema ka la ma masala alla keela masala tammo aja.<sup>38</sup> Üürü

Dimitrios nja kadu tanno linggo nja iini no, tumma kungngo eene nja kadu, fa kene kaco teema seriye ka naguugaara kidha, ka uuru miini na dhorro no.<sup>39</sup> Üürü tumma kungngo ada afe'de, kateemadene ka fiini tiya dhorro ya kidha ma naguugaara.<sup>40</sup> A'a niki, ii'di kadu tapügü tumma kaja ka oona ma tagirnaana kadu koona kalinggo adene ka uuru tanno. A fiini ma aja ka'düsüniigi titaalo."<sup>41</sup> A kini ka ndageema nggeege ya uuru kadu ka tino.

## 20

### *Bölis inynyo Makadoniya nja Akaiya*

<sup>1</sup> Ka kadu ka ndaadha ka tiidhe a 'buugu tamudhudhuli ka Afosus ya, ikirü Bölis ka tagümmünü kadu ma kaniisa adageema nja eene uu'bu eege ka eedi ikirü ka tattogo eege unggene aco Makadoniya. <sup>2</sup> İkirü ka tunggeene ka na'buugu eema tumma ma Masala dhabbu nja kadu tanno amma ka Masala no, uu'bu eege ka nanggeedi. İkirü ka öö'dö ka Akaiya. <sup>3</sup> Adaganna kide a nagatereene kidoona, a kini ka ndasaasa tadigaala ka to ma taco Süüriya ya, ikirü Yahüdü ka üünü ünggü ma tiidi i'i, ikirü ka tussu tumma no asaasa tunggeene a fiini ma Makadoniya. <sup>4</sup> I'i unggene nja Subatros 'bii'bala ya Berus ya ma Beeriya ya, nja Arestarkos nja Skontos

ya ma Tasalanükü ya, nja Kayos ya ma Derba ya, nja Timosaws, nja Tikikos nja Trifimöös ya ma anya ma Asiya. <sup>5</sup> Kadhe ungngo kaco Tarwas ka takindhígí inggide. <sup>6</sup> Ungngo tunggeene ungngo tadho ka to ndama Filippi ka Taanyara ma Dheedhifi kinynyo kürö, ungngo tagureene nja eene ka Tarwas a füngngö kütümmü, ungngo taganna kide a füngngö ka iidümmü kafünü eera.

### *Bölis innyo Tarwas*

<sup>7</sup> A ka uuru ma Lahada ooso kungngo ungngo temmi ma takoreene ma kaniisa ikiri Bölis ka adünügü tumma ma Masala a kadu, idhi a 'buugu tooso ka teene kudumma iini ka asaasa tunggeene ligitaka kungngo. <sup>8</sup> Kaganna nagalamba ka la ka ta'doogo kadhabbu kita iidü katemmi kide kita. <sup>9</sup> A tadimögö inggide emmi ka ka tinggini ma subaga ma la, ana eere a'da Aftikös, ka Bölis ka leefe teema ya, a tarigide ta'duga i'i anyege'de ku'bu a'dinggö caa'bu ndama kürö ndama la ko'do ka'dina i'i ka teyi. <sup>10</sup> A Bölis ta'barda ku'bu iti i'i kini ka oona, iki eene, "Aaga afa ta'deedene ka oona. I'i adinö!" <sup>11</sup> A Bölis tasirigi co la a'duga miteene a'düsünü adaguri. Adageema nja kadu a taka taadha ikiri ka tunggeene. <sup>12</sup> A kadu tö'dö a 'bii'bala ka adinö, a nanggeedi neene ta'barda ku'bu.

### *Bölis innyo Miletos*

<sup>13</sup> Ungngo tunggeene, ungngo co mürkabü, ungngo tunggeene ma co Asos ma co a'duga Bölis nja ungngo ndama kanna kudumma iini ka tadirina ungngo no a'da i'i asaasa tunggeene ana awwa aaco. <sup>14</sup> A kini ka ala ungngo ka Asos ya, ungngo tanangnga i'i ka mürkabü ungngo tunggeene ma co Metilina. <sup>15</sup> Ka taka ka taadha, ungngo tunggeene a mürkabü, ungngo tö'dö ka Kios. A füngngö kanda iidoona ya, ungngo tala kete ma Samos, ungngo tö'dö ka Milits a füngngö tiya egüsö ya. <sup>16</sup> Kudumma Bölis ka asaasa tadheedhe ka Afosus ko'do kudumma iini taalo asaasa tatoodo ku'bu ka Asiya kini ka 'digaana ma taco Örsaliim a'da üfürü uuru ma Taanyara ma Koronggore.

### *Tumma na Bölis nja kadüfi ma Afosus*

<sup>17</sup> Ka Bölis ka taganna ka Milits i'i agürünü tumma co kadüfi ma kaniisa ma Afosus. <sup>18</sup> Kene ka öö'dö a tumma iini, iki eene, "Kussu aaga a'da nakan'deene a'a nja aaga ka naganuuru tanno in'dili no, ka uuru tanno eede ka öö'dö ka Asiya ta'bitingngö. <sup>19</sup> Nagalinggo a'a linggo na Uugaara Yasu ana eedi ka tinsili, taalo nümmü eyi yeede kada nüümö, nalinggo ada Uugaara Yasu a 'biidü ka iiye, ana eema tiya toroko ya Yahüdü ka tagüünü ana a'a ya. <sup>20</sup> Taalo a'a nüürü nüümö

öccö keere ma tö'dö keere a nüümö aaga, nagalaana aaga ka na'buugu nye'd'de kadara co nöö'dü tanno ada. <sup>21</sup> Nadagadünüğü eema a Yahüdü nja kadu ma Yünan a'da kaadha ka eema tiya toroko kamma ka Uugaara yaaja Yasu.

<sup>22</sup> "Ka uuru tanno ara co Örsalim, a Koronggore ya Insili ya ka tuurugu a'a co, nitaalo nussu a'da ara a'a co aduna minna kide. <sup>23</sup> Kudumma Koronggore tiya Insili ya eema nja a'a ka na'buugu neede ka taco no a'da dhügürü nja naaru ma timi'di a'a kindhigü a'a. <sup>24</sup> Lakiini a'a taalo nümmü eyi yeede kada nüümö tiya agu'daana ïndhi ya, kudumma eede ka asaasa tatüümö linggo na Uugaara Yasu ka tümmünen a'a no, nalaana a'a kadu ka tumma ma İnjülli ma türü tanno Masala.

<sup>25</sup> "Nussu a'a a'da taalo aaga kataasala ka dhugudha tiya eede ndama uuru tanno, aaga neede ka taganeene nja aaga nadageema tumma ma tauugaara ma Masala nja aaga no. <sup>26</sup> Nageema a'a tumma nja aaga uuru tanno a'da, nagu'b'ba a'a ka eriidö ma kadu nye'd'de. <sup>27</sup> Nageema tumma ma Masala nja aaga dhabbu nitaalo nüürü nüümö öccö keere. <sup>28</sup> Aaga adinö ko'do ma nangnga eyi tanno ada, nja kadu tanno a Koronggore tiya Insili ya ka anangnga aaga kafa kene no. Aaga ka katasaana

ma kaniisa tammo Masala moono ka taana ana eriidö tiya oono mo. <sup>29</sup> Nussu a'a a'da kede ka tunggeene, a kadu öccö tafiri kada ka teene afa needi na taalo kana 'bangnga ma kadu no kungngo. <sup>30</sup> A kadu könö kungngo ada ka söödö kadaga'da kadu ma kaniisa ka nanggüdü küsini eege ka uurna eege keere. <sup>31</sup> Aaga adinö ko'do, aaga agiigü nagürünenü na iidoona no taalo a'a naadha ka teema nja aaga osooso a naguuru a 'biidü ka iiye.

<sup>32</sup> "A'a 'bütengngö nümmünenü aaga ku'bu a Masala nja tumma ma türü tanno Masala, ma tanangnga türü aaga manangnga takarna ka eema ka kadu tanno oolonadene no. <sup>33</sup> Kede ka taneene nja aaga, taalo a'a nasaasa gürüüsü nja en'di ka ömö'dü ma eyi tiya eede. <sup>34</sup> Kussu aaga tumma meede ka talingga ana iisine tanno eede nöö'dö ana eema ma eyi tiya eede nja kadu tanno linggo nja a'a no. <sup>35</sup> Turi nageema a'a tumma aaga a'da angnga takinyi kadu na eema ka titaalo kene no, aaga agiigü tumma na Uugaara Yasu ka eyi tiya iini ka tiraana a'da, 'A'diila tamana eema a kadu adagii'bi a tamaana ka kadu.' "

<sup>36</sup> Aga Bölis ka ndatüümö tumma niini ya, üürü ku'bu nja kadu nye'd'de kafara ka Masala. <sup>37</sup> İkiri eege ka tattogo Bölis, kafara eege in'dili a 'biidü ka

iïye. <sup>38</sup> Nüümö ya dhorro tanangnga nanggeedi ka toroko kene kagoroo'bo ya, tumma iini ka tiki eene a'da, "Taalo aaga ka tasala ka dhugudha tiya eede afe'de." Kikirï ka tattogo i'i co mürkabü ka to.

## 21

### *Bölis ungngo ka Örsaliim*

<sup>1</sup> A kädi ka adheene nja eene, ungngo tapadaga co fiinii ma Kos ya, a taka taadha ungngo co Rodes ndama kanna ungngo co Batra. <sup>2</sup> Ungngo taluna mürkabü kanna ma tunggeene ma co Finikiya, ungngo taka kide ungngo tunggeene. <sup>3</sup> Kädi ka ndasala Kuburus ya, ungngo tinyi oogo ndama niisö ma küüle, ungngo tapadaga co fiinii ma Süüriya. Ungngo tapadaga ka Suur, ara kadu kadadhifigi eema ku'bu ndama mürkabü. <sup>4</sup> Ungngo taluna kadu na Yasu kanna, ungngo tagünü nja eene fungngö iidümmü afünü eera. A Koronggore ya Insili ya tanangnga eege ka tiki a Bölis a'da afa tasirigï co Örsaliim.

<sup>5</sup> Kede ka ndatümö taneene nja eene kanna ya, ungngo tö'dö kürö ungngo tunggeene. Kattogo ungngo eege nye'de kungngo nja iiya tanno eene nja laala tiya eene, ungngo tüürü ku'bu ka tinggini ma to ungngo tafara ka Masala. <sup>6</sup> Kikirï ka tattogo ungngo, ungngo taka ka mürkabü

kara ka tafada kaco nöö'di tanno eene.

<sup>7</sup> Ndama Suur ungngo tala Butlmaws, ungngo töjülü kadu ma kaniisa kide ungngo tüyü nja eene fungngö unggodho. <sup>8</sup> A taka taadha ungngo tunggeene ungngo co Kaiysariya, ungngo co 'dï tiya Filibüs ya alaana kadu ka tumma ma İnjülli ya i'i yungngo a kadu ka tagümmünü eege ka iidümmü kafünü eera ma linggo ma kaniisa. Ungngo taganeene nja iini. <sup>9</sup> A laala ya lõmü ya ungngo iini egüsö, kiji tumma ma Masala. Keemaga tumma ma Masala co a kadu.

<sup>10</sup> Kädi ka ndatümö fungngö dhabbu nja eene ya, a ne'bi inggide ana eere a'da Akabüs ö'dö ndama Yahüüdiya. <sup>11</sup> Ö'dö ka 'dï a'duga jönnö ya Bölis afin'di uune niini nja iisine iki, "Koronggore ya Insili ya iki a'da, 'Ömö'di ma jönnö tiya, ara Yahüüdü timi'di i'i nggeege ka Örsaliim kümmünü i'i a kajeene."

<sup>12</sup> Kädi ka taföönyö tumma no ya, ungngo nja kadu tanno iidü kete no ungngo tageema nja Bölis a'da afa tasirigï co Örsaliim. <sup>13</sup> İkiri Bölis ka tiki, "Minna agu aaga, aaga tafara aaga taga'da a'a ka eedi? A'a taalo namma ma timi'didene sugi, nagala a'a kindinaana eyi yeede co teyi ka Örsaliim kudumma eere tiya Uugaara Yasu." <sup>14</sup> A kädi ka ndagi'di

kini keere ka tumma ya, ikirii ungngo ka tiki, "Fa ka tumma tanno Uugaara Yasu kalinggo adene."

<sup>15</sup> Ka naganuuru ka ndatiimö ya, ungngo tindinaana oona ku'bu ungngo tunggeene ma co Örsaliim. <sup>16</sup> A kadu könö ma kaniisa tunggeene nja ungngo ndama Kaiysariya, kateefe tattoo ungngo co 'di tiya Manason ya ma Kuburus ya, i'i tatalaadene ya Yasu ma 'billi.

<sup>17</sup> Kidi kaala Örsaliim ya, a kadu ma kaniisa takoreene nja ungngo kad-hodho. <sup>18</sup> Ka taka ka ndaadha a Bölis tunggeene nja ungngo ma co kita Yaguub, a kadiifi ma kaniisa tö'dö kide nye'd'de kungngo. <sup>19</sup> İkirii Bölis ka tööjülü euge adagadünüğü eema ya Masala ka anangnga i'i ka tagalinggo ada kajeene no. <sup>20</sup> Kene ka taföönyö tumma niini no, kïndhiigü Masala ko'do. Kikirii ka a Bölis, "Nijöögö o'o örre ma angnga, Yahüdü na alif kadhabbu kamma ka tumma tanno Yasu illi euge in'dili kagu'daana ka nanggeedi ma seriye. <sup>21</sup> Eege kaföönyö a'da o'o nalaana Yahüdü na anna ka kajeene ka teene no a'da kaadha ka seriye tiya Müüsa. O'o tadünüğü eema eene a'da kafa tara laala yeene, kafa talinggo ana eema tiya kadaada ma angnga ma 'billi ya.

<sup>22</sup> Angnga 'bitengngö ara ta könnyö? Kudumma eene ka taföönyö a'da o'o nö'dö.

<sup>23</sup> Nüümö yiidü ka tiki o'o a'da nalinggo, kadu kungngo iiidü ka egiisö kimi'di tumma ma Masala. <sup>24</sup> 'Duga eege aaga co taagala oona ka la ma Masala nja eene nanangnga faana ma temme nanggüdü neene ku'bu amang ka kadu tussu nye'd'de a'da tumma ma o'o neene ka taföönyö no taalo katimin'da, nunggeene o'o ka fiinii tiya seriye tiya Müüsa afa meene kungngo. <sup>25</sup> A kadu na amma ka Yasu a'da taalo ka Yahüdü no, kunggugu ungngo tumma eene a'da kümmü eyi yeene ka kuri ma türri ma eema ma namasala nja eriidö nja eema tiya kadu kamir'daana ya nja füngngö kadhoonyo."

<sup>26</sup> A Bölis ta'duga kadu na egüsö no a taka ka ndaadha, kanangnga nanggeyi neene ka tinsili. İkirii kaco la ma Masala ma tadiri tumma a ta'boge ma naguuru ma tatuumö tinsili, amang kene tara eema yeene.

### *Bölis ümmü adene ka la ma Masala*

<sup>27</sup> A füngngö ya iidümmü afünü eera ya ka ndakete ka tatuumö ya, a Yahüdü ma Asiya tasala Bölis ka la ma Masala. Kadagafünaana kadu kini kümmü i'i. <sup>28</sup> Kiidhe kiki, "Ka kadu ma Israyil! Aaga akinyi ungngo, ömö'di ya i'i yungngo alaana kadu nye'd'de ka na'buugu eela kadu ma Israyil nja seriye ya Müüsa nja 'buugu tiya. Nja iini ka öö'dö a kadu ma Yünan ka la ma Masala kanyoro 'buugu ya insili ya." <sup>29</sup> Eege kiki

nggeege kudumma eene ka tiji Trifimöös ya ma Afosus ya ka tunggeene nja Bölis ka anya, kiki kide a'da Bölis a'duga i'i aco la ma Masala nja iini.

<sup>30</sup> Anya co kamuli muli nye'd'de, a kadu tagedhe Bölis kümmü i'i kasisigi i'i co kürö ndama ïnye ma la ma Masala karooro ka teere kide. <sup>31</sup> Kene ka ndasaasa tiidi Bölis ya, ikirii uugaara ma nasigira ya dhabbu ya ma Rööma ka taföönyö a'da Örsaliim nye'd'de kungngo minynyo kamuli muli. <sup>32</sup> İkirii ka kürünü nasigira köö'dö kene areere. A kene ka ndasala nasigira nja uugaara tiya eene ya, kikirii ka taadha ka baana ma Bölis.

<sup>33</sup> Uugaara ma nasigira ya dhabbu ya tö'dö kini kete iki eene a'da kimi'di i'i ana killi keera, ikirii ka tindini kadu miini a'da, "Mada i'i ya miini, i'i agalinggo minna?" <sup>34</sup> A kadu tam-bananjaana ku'bu a tumma niini, uugaara ma nasigira ya dhabbu ya itaalo ussu tumma niini dhorro, ikirii ka tiki a nasigira a'da ka üögü Bölis kaco 'buugu tiya eene iini. <sup>35</sup> A kene ka ndala kadhiki, ikirii nasi-gira ka ta'diniga i'i ko'do kudumma kadu katili i'i ka oona. <sup>36</sup> Kudumma eene ka tagöö'dö kene keere kiidhe a'da, "Aaga iidi i'il!"

*Bölis ümmü ka eyi tiya iini*

<sup>37</sup> Ka Bölis ka ndakete kaco a 'buugu ma nasigira

ya, ikirii ka tiki uugaara ma nasigira ya dhabbu ya, "Bandumma ungngo eede ka asaasa tadirina o'o?"

Uugaara ma nasigira ya dhabbu ya tiki iini, "Tara a'da nussu o'o tangga Yünan? <sup>38</sup> Taalo o'o na taga Misiri ya kirnaana ka kadu ka oona kambele, üögü kadu na alif ka egüsö ma koro'bo aco a dhüile iini?"

<sup>39</sup> İkirii Bölis ka tiki, "A'a na taga Yahüdü nanna a'a ka Tarsuus ka Kilikiya anya ma dhabbu mo. Fa kede neema nja kadu."

<sup>40</sup> İkirii ka tapa kini a'da eema, ikirii Bölis ka 'dingnge ka kadhiki alaga nüsö ko'do a kadu. A 'buugu tamud-hudhuli, adageema nja eene a tumma ma Yahüdü iki eene.

## 22

<sup>1</sup> "Aaga föönyö aaga na kafaafa ma a'a no nja nagöre tanno eede, tumma neede ka tadirina aaga 'bitüngngö meede ka tümmöönö ka eyi tiya eede." <sup>2</sup> Kene ka föönyö iini ka teema tangga Yahüdü ya, kamusuli ku'bu.

İkirii Bölis ka tiki, <sup>3</sup> "A'a na taga Yahüdü nageenedene a'a ka Tarsuus ma Kilikiya, illi a'a nasere ka anya tammo. A Gamalayiil akalaana a'a ka tumma ma seriye ma kadaada ma angnga ana eedi dhorro nasaasa linggo ma Masala afa tiya ada ka talinggo 'bitüngngö ya. <sup>4</sup> Nadagalinggo kadu na

ümmü fiinii ya na amanaga eege ka inde, kanangnga kadu na nagiide no nja iiya ka pabuusu. <sup>5</sup> Uugaara ma ka'boge nja naguugaara ma Yahüüdü nye'd'de kadinö kede. Nama a'a tumma kene co nagöre tanno aja ka Demasak, nafada naco kanna ma tö'dö a kadu ka Örsaliim ma tapusu adene."

*Bölis eema tumma miini  
ka tamma ka Yasu*  
(Kadafiini 9.1-19; 26.12-  
18)

<sup>6</sup> "Kede ka ndakete ka Demasak, uuru ka teene a 'buugu ta'dara öyeene kede ka oona a 'dotombo'do talimi. <sup>7</sup> Na'dingga ka 'büdhülü, naföönyö ömö'di ka tümmünü a'a, 'Sawl, Sawl, minna agu o'o nalinggo a'a?"

<sup>8</sup> "Niki, 'O'o na mada, Uugaara?"

"Iki, 'A'a na Yasu ya ma Nasira yüüdü ka talinggo i'i ya.' <sup>9</sup> A kadu na kunggeene nja a'a no, kiji töyeene kassa kitaalo kaföönyö tumma na ömö'di ya eema nja a'a ya.

<sup>10</sup> "İkiri a'a ka tiki, 'Nasaasa a'a ka tönyonyö 'bitingngö, Uugaara?'

"İkiri ka tiki a'a, 'Fiki'dö naco Demasak, ara kadu sa kadirina eema o'o ma nüümö tiya üüdü ka talinggo ya.' <sup>11</sup> Töyeene na limi no kakafa a'a ka iifye taalo niji 'buugu, a kadu na unggeene nja a'a no tagümmünü a'a ka tino ungnco Demasak.

<sup>12</sup> "Ömö'di inggide ana eere a'da Hananiya akümmü tumma ma Masala

ana eedi dhorro, a Yahüüdü na kanna ka Demasak no nye'd'de kungngo kadinö ka taneene tanno iini. <sup>13</sup> İkiri ka öö'dö a'dingga kede kete iki, 'Örre yeede Sawl, asala 'buugu.' İkiri a'a ka arooro ka tasala 'buugu.'

<sup>14</sup> "İkiri ka tiki, 'Masala ma kafaafa ma angnga magesse o'o manangnga o'o ka tussu fiinii yoono, nasala ta'dila niini, naföönyö tumma niini.

<sup>15</sup> Ara o'o tadünüğü eema yüüdü ka tadönö kide na o'o taföönyö ya co a kadu nye'd'de. <sup>16</sup> Minna agu o'o 'bitingngö nadoono ku'bu? Fiki'dö nambeesedene, a tatoroko tatanggala küdü ka oona ninsili ana eere tiya iini.'

*Masala magürünü Bölis  
ka kajeene*

<sup>17</sup> "Nikiri a'a ka tafada naco Örsaliim. A kede ka ndafara ka Masala ka la ma Masala ya, neyigi ko'do. <sup>18</sup> Nikiri a'a ka tasala Uugaara ka tiki a'a, 'Areere nöö'dö kürö ndama Örsaliim, kudumma eene taalo kara tamma ka tumma tanno üüdü ka teema ma a'a no.'

<sup>19</sup> "Nikiri a'a ka tiki, 'Ka Uugaara, eege kussu tumma no dhorro, kadakicci co naala ma talaana nümmü kadu na amma ka fiinii tiya namanaga a'a eege ka pabuusu nabbü eege. <sup>20</sup> Ka uuru tanno kadu ka tagidi Istifanüüs no a'da a'a ninggide, namma ka inde tanno iini nataafa ka en'di tiya kadu tanno kiidi i'i no.'

<sup>21</sup> "İkiri Uugaara Yasu ka tiki a'a, 'Aayu ara a'a tagürünü o'o naco co 'buugu ya a ku'b'ba, a kadu tanno taalo ka Yahüdü no.' "

<sup>22</sup> A kadu tagatoodo ka Bölis kini ka ndiri tumma no ya, kikiri ka teele ka tumma ko'd'do, "Aaga kiidi ömö'di ya apa ka anya. Kudumma iini taalo ama tefe ka 'di 'do." <sup>23</sup> Kikiri ka ndiidhe, kapüpügü en'di yeene kasanaana kuraaga coo'do.

<sup>24</sup> Uugaara ma nasigira ya dhabbu ya tanangnga nasi-gira ka a'duga Bölis kaco 'buugu ma nasigira ka teene ana i'i kabbü i'i kindini i'i a'da minna agu Yahüdü kiidhe kini ka oona afa ma tiya kungngo. <sup>25</sup> Kene kafin'di i'i ku'bu ma tabbü i'i, ikiri Bölis ka tiki uugaara ma nasigira ya a'dingnge kini kete ya, "A'dila kada nggeege maada ka tabbü ömö'di ya taga Rööma a'da taalo aaga kageema seriye, aaga taalo tussu nüümö ya agu i'i ya?"

<sup>26</sup> Uugaara ma nasigira ka taföonyö tumma no ya, areere aco ka uugaara ma nasigira ya dhabbu ya iki iini, "Ara o'o talingga minna? Ömö'di ya a taga Rööma."

<sup>27</sup> İkiri uugaara ma nasi-gira ya dhabbu ya ka öö'dö ka Bölis iki iini, "Eema nja a'a dhorro, o'o na taga Rööma?"

A Bölis tiki iini a'da, "İi."

<sup>28</sup> Uugaara ma nasi-gira ya dhabbu ya tiki iini, "Nafaana

a'a ana almaala dhabbu amang kede tataga Rööma."

İkiri Bölis ka tiki iini, "A'a ya, nageenedene a'a kide."

<sup>29</sup> A kadu na asaasa takindini i'i no, karooro kaadha kini ka oona. A ri'ba tümmü uugaara ma nasigira ya dhabbu ya kini ka ndussu a'da i'i imi'di Bölis ya taga Rööma ya a nakilli.

*Bölis ka kadiifi ma Yahüdü kidha*

<sup>30</sup> Ka taka ka ndaadha a uugaara ma nasigira ya dhabbu ya tasaasa tussu nüümö ya anangnga Yahüdü ka tümmü Bölis ka tumma iini ya, agildhe nakilli iini ka oona, iki a naguugaara ma ka'boge nja kadiifi ma la ma Yahüdü nye'd'de a'da köö'dö temmi. İkiri ka tapa ka Bölis öö'dö kene ka teene.

## 23

<sup>1</sup> A Bölis tassa ka kadu tanno emmi ka la ma kadiifi ma Yahüdü iki, "Nagöre eede, naga 'dila a'a nja tumma ma Masala ana eedi ka tinsili ta'bütängngö." <sup>2</sup> A Hananiya ya uugaara ma ka'boge ya, ka tiki a kadu na a'dingnge ka Bölis kete no, kabbü Bölis ka nüünö. <sup>3</sup> İkiri Bölis ka tiki iini, "Ara Masala tabbü o'o, o'o na 'dakala tiya lokoladene kata'bassa ya. Nemmi kannu nümmü a'a afa ma seriye ka tiki no, namana o'o ka abbü adene ka'bana ko'do nja tumma ma seriye tiya Masala?"

<sup>4</sup> A kadu na a'dingnge ka Bölis kete no kiki, "Neela

o'o uugaara ma ka'boge tiya Masala?"

<sup>5</sup> İkiri Bölis ka tiki, "Ka kadu eede, taalo a'a nakussu a'da i'i ya uugaara ma ka'boge ma Masala, kudumma Sorne ma Masala ka tiki a'da, 'Aaga tafa teela uugaara ma kadu tanno üdü.'"

<sup>6</sup> A Bölis tussu a'da kadu könö ka naFariisi öccö ta Sadügiin, ikiri ka alneege ka kadu ka teene iki, "Ka kadu, a'a na Fariisi 'bii'bala ma Fariisi, nümmü adene a'a 'bitingngö kudumma eede ka tamma nussu a'da tafiki'dö ma inde ka inggide."

<sup>7</sup> Iki iini ka tirina tumma no, a tumma ta'bana ko'do kene, naFariisi nja Sadügiin kasümününjaana ku'bu.

<sup>8</sup> Kudumma Sadügiin taalo kamma a'da ara kadu tafiki'dö ka inde, kitaalo kamma a'da kadhangga kinggide nja nagoronggore, a naFariisi kamma kide nye'd'de. <sup>9</sup> A kadu tiidhe ko'do, a naFariisi könö na alaana kadu ka tumma ma seriye tiya Masala ka'dingnge ko'do kam'bana ka tumma kiki, "Taalo ungngo kaduna niimö ya toroko ya ka ömö'di tiya. Aminna üürü koronggore alla tadhangga ageema nja iini."

<sup>10</sup> A kadu takardha ku'bu ta'bununjaana ku'bu a tumma ko'd'o a ri'ba tümmü uugaara ma nasigira ya dhabbu ya, ii'di kadu taresana Bölis ku'bu, ikiri ka kürünü nasigira a'da

ka'barda kaco tamuru i'i kene ka söödö kunggu i'i co 'buugu ma nasigira.

<sup>11</sup> Ka ooso töccö Uugaara Yasu ka tatele oona a Bölis, iki iini, "Kardha ku'bu! Afa müüdü ka tageema tumma neede ka Örsalim ya, ara o'o teema tumma neede nggeege ka Rööma."

### *Ünggü ma tara tiidi Bölis*

<sup>12</sup> Ka taka ka ndaadha a Yahüüdü timi'di tumma, kanu kagu eema kanu katooye ara eege katiidi Bölis. <sup>13</sup> A kadu na mi'di tumma no kadhabbu kö'dö ukumu kadu keera (40).

<sup>14</sup> Kikiri ka öö'dö ka naguugaara ma ka'boge nja naguugaara ma anya kiki eene, "Kümmü ungngo eedi taalo ungngo katagu eema illi ungngo tiidi Bölis. <sup>15</sup> Aaga kürünü ka uugaara ma nasigira ya dhabbu ya aaga na naguugaara no aaga tiki a'da uurugu Bölis aaga, a'da aaga asaasa tassa ka niimö tiya inggide ya, ara ungngo takadho ka fiini ungngo tindinaana oona ku'bu ma tiidi i'i ka fiini ma ta unggunu kada kita."

<sup>16</sup> A moole ma Bölis taföönyö ünggü ma tumma no, ikiri ka co ka Bölis ka 'buugu ma nasigiraadirina eema iini. <sup>17</sup> İkiri Bölis ka tümmünü uugaara ma nasigira iki iini, "Duga 'bii'bala ya naco tunggu i'i co uugaara ma nasigira ya dhabbu ya, kudumma tumma kungngo iini ma co tadirina iini."

<sup>18</sup> A uugaara

ma nasigira ta'duga i'i ateefe tunggu i'i co uugaara ma nasigira ya dhabbu ya iki iini, "Ömö'dü ya ka pabuusu ya, ya ana eere a'da Bölis ya agümmünü a'a iki a'da nö'dö a 'bii'bala tiya o'o, kudumma tumma kungngo iini ma tadirina o'o."

<sup>19</sup> Uugaara ma nasigira ya dhabbu ya tümmü i'i ka niisö kasigi keere, ikirü ka tindini i'i, "Minna inggide, tirina a'a?"

<sup>20</sup> Iki, "Yahüdü kimi'di tumma ma tasaasa tiki o'o a'da nuurugu Bölis kadha ma naguugaara taka kudumma eene ka asaasa tussu niimö ya kini ya dhorro. <sup>21</sup> O'o fa tamma kene kide, kudumma kadu kinggide kö'dö kukumu kadu keera kafünnügü ku'bu ana i'i, eege kanu kagu eema kanu ka 'bii'dü ara eege katiidi Bölis, eege 'bitüngngö kindinaana oona ku'bu, kündhigü o'o."

<sup>22</sup> Uugaara ma nasigira ya dhabbu ya tuuru 'bii'bala ka tino iki iini, "Fa tiki ömö'dü a'da nadirina eema a'a."

### *Bölis ö'dö ka Uugaara Fileks*

<sup>23</sup> Uugaara ma nasigira ya dhabbu ya tagümmünü naguugaara ma nasigira keera iki eene, "Aaga ümmünü nasigira na ö'dö ukumu kadu kada'baaga (200), a kadu ma naguttu kö'dö a kukumu kadu kiidoona kaco iisine (70), a kadu ma nakandha tö'dö a ukumu kadu kada'baaga (200) ma co Kaiysariya

ana ndanaaya ka iidümmü kafünü egüsö ooso kungngo. <sup>24</sup> Aaga tagona muttu a Bölis aka kide aco ka Uugaara Fileks."

<sup>25</sup> Adarigiri waraga ungu co Uugaara Fileks iki iini kide,

<sup>26</sup> "A'a na Kalödiyös Lisiyas nagarigiri waraga a Fileks, ya uugaara ya, nafaanya o'o.

<sup>27</sup> Yahüdü kümmü ömö'dü ya kasaasa tiidi i'i. A kede ka tussu a'da i'i ya taga Rööma ya, nikirü a'a ka tareere nja nasigira tanno eede noolona i'i.

<sup>28</sup> Nasaasa a'a tussu niimö yeene ka asaasa tümmü i'i ka tumma iini ya, nikirü a'a ka öö'dö ana i'i ka la ma kadiifi ma Yahüdü tiya eene. <sup>29</sup> Nussu a'da eege kümmü i'i ka tumma ma seriye tiya eene, lakiini tumma no taalo kama tadiidi miini, taalo ama tanangnga i'i ka teyi alla anna ka pabuusu.

<sup>30</sup> Nikirü a'a ka föonyö a'da eege kiiyü ku'bu ana i'i ma tiidaana, i'i yungno eede ka tunggugu i'i o'o 'bitüngngö. A'a tekere nikirü ka tiki a kadu tanno ümmü i'i no, a'da kasigi i'i küdü ma tumma tiya eene kadiidi i'i kide ya."

<sup>31</sup> A nasigira tagalinggo a tumma tanno uugaara tiya eene, ka'duga Bölis ooso kungngo kaco Antibritis.

<sup>32</sup> A taka ka ndaadha ya, ikirü nasigira na unggene no ka tafada kaco 'booro, ara kadu ma naguttu kico

tattogo i'i. <sup>33</sup> A kadu ma naguttu ka ndala Kaiysariya ya, kunggu Bölis co Uugaara Fileks kanangnga waraga iini. <sup>34</sup> İkiri ka taküüröönö indini Bölis ma anya tammo iini ka öö'dö ndama iini mo. A kini ka ndussu a'da i'i ama Kilikiya ya, <sup>35</sup> iki iini, "Ara a'a sa kaföönyö tumma a kadu tanno ümmü o'o no kene ka tö'dö." İkiri ka tiki a nasigira a'da kaafa ka Bölis ka 'dii tiya Hirüdüs.

## 24

### *Yahüüdü kasigi Bölis*

<sup>1</sup> A füngngö ka ndö'dö iidümmü ya ikiri uugaara ma ka'boge Hananiya ka co Kaiysariya nja naguugaara ma anya ökönö, nja ömö'di tiya ümmöönö ka kadu ya ana eere a'da Tartullos, kadakasigi Bölis ka Uugaara Fileks. <sup>2</sup> Ka uugaara ka tagümmünü Bölis, ikiri Tartullos ka tiki, "Uugaara Fileks, kadu niidi kaneene ta'diila kudumma o'o, nja eema tiya a'diila ya adhabbu ya, kudumma üüdü ka ta'dara nja tamünögü ungngo ko'do. <sup>3</sup> Ungngo ya kamma ungngo ka eema tiya turi nja 'buugu ka oona nye'd'de kungngo a tamana ta'diila. <sup>4</sup> A'a taalo nasaasa teema tumma kadhabbu, ungngo kasaasa o'o a'da natoodo kide a 'bandumma idhilli kungngo.

<sup>5</sup> "Kaduna ungngo ömö'di ya ka aga'da 'buugu, afünaana Yahüüdü ka oona ka na'buugu nye'd'de, i'i ya uugaara ma kadu tanno

uruna Yasu ya ma Nasira ya keere. <sup>6</sup> I'i asaasa tanyoro la ma Masala, yungngo iidü ka tagümmü i'i. [Ungngo kasaasa tahükümü i'i tamana ma seriye tanno aja <sup>7</sup> lakiini uugaara ma nasigira ya dhabbu ya Lisias tamuru i'i kidü ka iisine a rüsü kungngo. <sup>8</sup> İkiri ka tiki a nadiidi tiya iini a'da köö'dö a tumma tanno eene kasigi iini no o'o.] Küdü kara tindini i'i ma eema nye'd'de ya, ara o'o tessu eema yiidü ka tümmü i'i ya nye'd'de."

<sup>9</sup> A Yahüüdü tafünügü sigirri, anno tö'dö kiki a'da tumma no katimin'da.

### *Bölis ümmünü ka eyi tiya iini ka Fileks kidha*

<sup>10</sup> İkiri Fileks ka tage'de Bölis a'da öö'dö teema, ikiri Bölis ka tiki, "Nussu a'a a'da o'o na uugaara ma anya tammo a nagürüünü kadhabbu, ikiri ri'ba taalo kagu a'a eede kara tümmöönö ka eyi tiya eede. <sup>11</sup> Afa müüdü ka tessu eema ya 'do, ninyo a'a Örsaliim ka linggo ma Masala a füngngö ada'baaga kafünü eera. <sup>12</sup> A Yahüüdü taalo kaduna a'a ka na'buugu ka ta'bununjaana ku'bu nja ömö'di ka la ma Masala taalo nagirnaana kadu ka oona ka anya nja naala ma talaana. <sup>13</sup> Eege ya taalo ka takara tadiri niimö yeede ka tagalinggo dhorro ya. <sup>14</sup> Lakiini a'a namma a'da a'a nümmü tumma ma Masala tammo kupupa tanno aja ka fiini tiya eene ka tümmüneene

a'da korokoro ya. A'a namma ka tumma ma seriye nja tumma tanno nagane'bi ka tageema no ka nakasorne ma Masala no,<sup>15</sup> nindhig'i Masala afa meene ka tindhig'i oogo kungngo, kadu nye'd'de ka tafiki'dö ka inde nja tanno oroko no nja tanno 'diila no.<sup>16</sup> A'a nindinaana oona neede ku'bu na insili ka eedi nja Masala nja kadu.

<sup>17</sup> "Naleefe a'a tö'dö eede ka takitaalo a nagürüünü kadhabbu, nöö'dö ana eema ma tonsoona a kadu tanno eede kita, ara ka öö'dö tırri.<sup>18</sup> Nagalinggo a'a eema ya, kaduna a'a ka la ma Masala natüümö a'a linggo ma tanangnga tuu'da ka tinsili. A'da kitaalo kadu kadhabbu kide nja a'a nitaalo nagirnaana kadu ka oona.<sup>19</sup> Lakiini Yahüdü könö kö'dö ndama anya ma Asiya, kene kara taganna kita kidha ma o'o ka tagöö'dö küdü ka tadiri niämö yeene ka tasigi a'a ka tumma iini ya, üürü eege kussu niämö miini.<sup>20</sup> A 'bitingngö ya fa kene kadirina niämö yeene ka aduna a'a ka tagalinggo ya, eede ka ta'düngnge ka 'buugu ma temmi ma Yahüdü.<sup>21</sup> Lakiini tumma neede ka tageema kene kidha eede ka 'düngnge, 'Aaga ümmü a'a ka uuru tanno kudumma eede ka tumma a'da kadu kara tafiki'dö ka inde.'"

<sup>22</sup> A Fileks illi ka tagussu fiin'i ya Yasu, ikirii ka tanyalaana kadu ku'bu iki,

"Ka Lisiya uugaara ma nasigira ya dhabbu ya ka tö'dö kita ya a'a sa öö'dö tassa ka tumma tanno ada no."<sup>23</sup> İkirii ka tiki a uugaara ma nasigira a'da kafa ka Bölis, afa tafaga i'i keere ka teema nja kadu tanno ticci tassa kini no nja kateefe miini ma takinyi linggo iini no.

### *Bölis öö'dö ka Uugaara Fileks kidha nja Trusilla*

<sup>24</sup> Kene ka tagünü a füngngö idhilli kungngo ya, ikirii Fileks ka öö'dö nja aka tammo iini madaga Yahüdü mo, mana eere a'da Trusilla, atümmünü Bölis atoodo ka tumma tanno iini no ma tamma ka Yasu Almasiihi no.<sup>25</sup> Aga Bölis ka ndageema tumma ma ta'diila ma nanggeedi nja tümmü eyi nja tahükümü ma Masala kara tö'dö no, a ri'ba tümmü Fileks iki iini, "Unggeene 'bitingngö ya ara sa ka tümmünü o'o taka öccö afe'de kede ka tasaasa."<sup>26</sup> A Fileks tindhig'i Bölis a'da agona gürüüsü iini, ümmünaana i'i 'bucca kungngo eema nja iini.

<sup>27</sup> Aga nagürüünü ka ndö'dö keera ya a Borkios Fistös tagala ka 'buugu tiya iini. A Fileks tasaasa Yahüdü a'da ka'diila nja iini, ikirii ka afa ka Bölis ütü ka pabuusu.

## 25

*Bölis ungu tumma niini  
co Kayisar*

<sup>1</sup> Aga Füstös ka öö'dö ka anya ma Yahüüdiya ya atiimö fungngö iidoona ka Kaiysariya, unggeene ndama Kaiysariya asirögö co Örsaliim. <sup>2</sup> A naguugaara ma ka'boge nja naguugaara ma Yahüüdü tagadünögü eema ya Bölis ka tagalinggo ya. Kindini Füstös <sup>3</sup> a'da a'duga Bölis unguu i'i co Örsaliim, kudumma eene kasaasa tüyü ku'bu ana i'i ka fiini ma tiidi i'i. <sup>4</sup> A Füstös tiki, "Ara Bölis tüütü ka pabuusu ka Kaiysariya, kudumma eede ka co kanna ereere. <sup>5</sup> Aaga fa ka naguugaara tanno ada kaco ka Kaiysariya nja a'a, ümmü ömö'dü ya agalinggo niämö ya toroko ya, ka tiraana."

<sup>6</sup> Ka Füstös taganeene a fungngö iidümmü afünü iidoona alla fungngö ada'baaga, unggeene asülögü co Kaiysariya, ka taka ka taadha ikiri ka temmi ka 'buugu ma seriye, iki a'da agöö'dö ana Bölis.

<sup>7</sup> Aga Bölis ka ndö'dö ya, a Yahüüdü no ö'dö ndama Örsaliim no tarügü kini ka oona, kafunaana kini ana eema dhabbu kitaalo kaduna niämö kini atoroko iini ka tagalinggo.

<sup>8</sup> A Bölis tinggili tumma no kini ka eyi iki, "Taalo a'a nagalinggo niämö ya toroko ya ana Seriye tiya Yahüüdü nitaalo a'a nagüuni niämö ya toroko ya ka la ma Masala nitaalo nadirina tumma na toroko no ka uugaara ma Rööma ya ka oona 'do."

<sup>9</sup> A Füstös tasaasa ta'diila nja Yahüüdü, ikiri ka tiki a Bölis, "Nasaasa o'o co Örsaliim naco teema seriye kide kidha ma tumma tanno?"

<sup>10</sup> A Bölis tiki, "A'a na'dingnge ka 'buugu ma seriye tiya uugaara ma Rööma Kayisar, nara tahükümüdene ka seriye tiya kita. Nussu o'o tumma nye'de a'da a'a taalo nagalinggo niämö ya toroko ya ana Yahüüdü. <sup>11</sup> Üürü nagalinggo a'a niämö ya toroko ya ma tiidi a'a, taalo a'a nanu ka teyi. Üürü tumma neene ka teema taalo ka timin'da ya, taalo ömö'di ma tümmü a'a ümmünü a Yahüüdü. Ara a'a tunggu seriye yeede co uugaara ma Rööma."

<sup>12</sup> A Füstös tageema nja kadu tanno iini unggodho euge ikiri ka tapadaga tumma a Bölis, "Nunggu seriye yüüdü co uugaara ma Rööma."

### *Bölis inynyo ka Uugaara Agriiba kidha nja Barniki*

<sup>13</sup> A fungngö kinco akürö idhilli kungngo ya, Uugaara Agriiba nja Barniki tö'dö ka Kaiysariya kö'dö töjülü Füstös. <sup>14</sup> Kene ka tagünü nja eene dhabbu ya, ikiri Füstös ka tirina tumma seriye ya Bölis Uugaara Agriiba iki iini, "Ömö'dü inggide a Fileks ka tinyi i'i ka pabuusu. <sup>15</sup> Kede ka öö'dö ka Örsaliim a naguugaara ma ka'boge nja naguugaara ma Yahüüdü tasigi i'i kede

kiki a'da nümmünü i'i ka inde.<sup>16</sup> Nikirii a'a ka tiki eene, "Tafiigi mungngo kada kadu ma Rööma taalo angnga kümmü ömö'di ün'dügüngngö a'da taalo ö'dö ka kadu tanno asigi i'i no kidha, illi kaföonyö nüümö yiini ka tagalinggo kussu iini ya."<sup>17</sup> A kene ka öö'dö kita nja a'a narooro kaco a 'buugu ma seriye nitaalo nadoono ku'bu a tumma ma tasigi, ka taka ka ndaadha nikirii ka tiki a kadu a'da köö'dö ana i'i.<sup>18</sup> A kadu na ümmü i'i no tageema tumma neene kitaalo kadiri nüümö ya toroko ya ma tahükümü i'i iini ya, na a'a tiki kide a'da kadiri nüümö yeede ka asaasa ya.<sup>19</sup> Tumma kungngo eene nja iini ka'bununjaana ku'bu ma Masala tammo eene, ma ömö'di inggide ana eere a'da Yasu akeyi, illi Bölis iki a'da adinö.<sup>20</sup> Nikirii a'a ka ndabbü falandaana, nikirii ka tindini Bölis niki iini, üürü asaasa co teema seriye yiini ka Örsaliim.<sup>21</sup> Lakiini Bölis ungu tumma niini co uugaara ya dhabbu ya Kayisar, a'da assa kide. Yungngo eede ka tiki a'da ütü ka pabuusu kita nassa ka tuurugu i'i co Kayisar."

<sup>22</sup> İkiri Agriiba ka tiki a Fistös, "Nasaasa a'a taföonyö tumma na ömö'di tiya."

İkiri Fistös ka tiki iini, "Ara o'o sa föonyö taka."

<sup>23</sup> A taka ka ndaadha, Agriiba tö'dö nja Barniki ka 'buugu ma seriye. Adigine a

kadu ma anya tanno iifi no a naguugaara ma nasigira, ikiri Fistös ka kürünüigü a'da köö'dö ana Bölis, ikiri ka öö'dö.<sup>24</sup> A Fistös tiki, "Ka Uugaara Agriiba nja kadu tanno emmi kita no nye'de kungngo, ömö'di yaada kidha ya agasigi kadu ma Yahüdü i'i kede nye'de kungngo, ka Örsaliim nja kita ka Kaiysariya, kiidhe keema a'da afa tefe ka 'dö.<sup>25</sup> Illi a'a taalo naduna nüümö kini ya toroko ya ma tiidi i'i, illi i'i ya ungu seriye yiini co Kayisar. Yungngo eede ka asaasa tuurugu i'i co iini.<sup>26</sup> Illi a'a taalo naduna nüümö ya dhorro ya ma tarigiri ada a Kayisar, yungngo eede ka öö'dö ana i'i aaga, nja o'o ka eyi tiya üdü, o'o na Uugaara Agriiba no, aaga tindini i'i ma tumma tanno ka linggodene no, ara a'a tessu nüümö meede ka tarigiri ada a Kayisar.<sup>27</sup> Taa'baga eege kungngo eede, meede ka tuurugu ömö'di co pabuusu a'da taalo a'a nadiri nüümö yiini ka tagalinggo ya."

## 26

*Bölis ümmöönö ka eyi tiya iini*

<sup>1</sup> İkiri Agriiba ka tiki a Bölis, "Nasaasa o'o a'da na kildhe tumma no küdü ka eyi."

İkiri Bölis ka alaga nüsö coo'do ma tara tümmöönö ka eyi tiya iini iki,<sup>2</sup> "Ka Uugaara Agriiba, ka'diila oona eede kede ka a'düngne

küdü kadha ka uuru tanno ma tinggili tumma no kede ka eyi, napadaga tumma na Yahüdü na Yahüdü kafünü kede ka oona no nye'd'de.<sup>3</sup> O'o nussu tumma na Yahüdü ana eema tiya eene ka ta'bununjaana ku'bu iini ya, nasaasa eedi yüdü adhonggoro ma niimö tiya eede ka teema ya.

<sup>4</sup> "Yahüdü nye'd'de kussu jiddi ma taneene tanno eede yeede ka taleefe ta kidhilli nakinggiridene a'a ka anya tammo eede nja kadu ka Örsaliim afe'de.<sup>5</sup> Eege kussu a'a ma 'billi, kussu a'da a'a nafa ka tumma ma Masala tanno eede, na a'a taganeene kada taga Fariisi ürü eege kasaasa tadiri tumma a'da nuuruna na nafiiñi ma Masala keere nadagümümöönö dhorro.<sup>6</sup> A 'bitingngö nümmü adene a'a, kudumma eede ka tindhigü tumma na Masala ka tageemaga a kafaafa ma angnga no.<sup>7</sup> I'i yungngo siliga ma Israyil na ada'baaga kafünü eera no katindhigü tö'dö niini kümmü Masala osooso a naguuru, nggeege Uugaara yungngo Yahüdü katüfunü tumma eede ka oona.<sup>8</sup> Amana i'i yungngo aaga taalo kamma a'da Masala minci kadu ka inde?

<sup>9</sup> "A'a tekere nakiki kide a'da ara a'a tadiidi ma eere tiya Yasu ya ma Nasira ya a türü tanno eede in'dili.<sup>10</sup> Nagalinggo a'a nggeege ka Örsaliim, na a'a tamana kadu kadhabbu na amma ka Yasu no ka pabuusu, a

türü ma naguugaara ma ka'boge tagafünü tumma ma korokoro kede ka oona, a kene ka tagirinadene ya, nadagamma kene ka take.<sup>11</sup> Nadagapusu eege ka naala ma talaana, na'bunu eege ka'düsünü tumma Yasu, nagakardha ku'bu nakirimi eege, naco naanya ma kajeene nalinggo eege kide.

*Bolis eema tumma ma tamma ka Yasu*  
(Kadafiini 9.1-19; 22.6-16)

<sup>12</sup> "Nunggeene ma co Demasak a naguugaara ma ka'boge kagürünü a'a a türü ma tauugaara tanno eene.<sup>13</sup> A kede ka tunggeene ka fiini ma co Demasak uuru ka teene ya, ka uugaara, nasala a'a öyeene ka 'dotombo'do, alimaana adagii'bi ndanaaya, öyeene kede keere nja kadu tanno unggeene nja a'a no.<sup>14</sup> Ungngo ta'dingga ka 'büdhülü ungnego nye'd'de naföönyö tumma neene a tangga Yahüdü, 'Sawl, Sawl, minna agu o'o nalinggo a'a? Taalo o'o namma talinggo a'a, ara tiideene nja o'o küdü kara tüünö midhi ku'bu ana a'a.'

<sup>15</sup> "Nikirii a'a ka tiki, 'O'o na mada, ömö'dü eede?"

"A Yasu tiki, 'A'a na Yasu tiya üdü ka talinggo ajeene ana i'i ya.<sup>16</sup> Fiki'dö na'dingnge ana ko'do ana uune tanno üdü, a'a nala oona o'o nanangnga o'o kada ömö'dü ma linggo, neema tumma ma eema tiya üdü ka tadinö kide ma a'a

ya nja eede kara tala o'o ya.  
<sup>17</sup> Ara a toolona o'o ka kadu ma Israyil nja kajeene tanno eede ka tagürünü o'o kene no. <sup>18</sup> Amang küdü tafa'da eege ka iyi kafada ndama 'buugu tiya lüllü ya kara köö'dö ka töyeene, kinyi türü na Ebliisi ku'bu kara kico ka türü tanno Masala, amang katamma kede tanno eene ara a'a toolona eege ka tatoroko tanno eene, ara a'a tamma kene kada kadu tanno iini kudumma eene ka tamma kede.'

*Bölis eema tumma ma linggo tanno iini*

<sup>19</sup> "A ndama uuru tanno, o'o no Uugaara Agriiba, nitaalo a'a nanu ka tumma tanno ö'dö ndama 'dotombo'do no. <sup>20</sup> Na a'a tagadünögü tumma a kadu ma Demasak ka dhidha, nja kadu ma Örsaliim nja naanya ma Yahüüdiya nye'd'de, nassa co ka kajeene in'dili, nadünögü eema eene a'da kaadha ka tatoroko kara ka tapadaga ka Masala, kalinggo linggo na ussu a'da kaadha ka tatoroko no. <sup>21</sup> Yungno Yahüüdü ka tümmü a'a ka la ma Masala, kasaasa tiidi a'a. <sup>22</sup> Lakiini Masala mafa kede ta'bütängngö amang kede teema tumma noonoo co kadu tanno dhiidhi no nja tanno iifi no. Nitaalo neema niimö öccö illi tumma na Müüsa ka tageema nja nagane'bi no. <sup>23</sup> A'da Almasiihi a tadhügürü üünü muuyu, afiki'dö ka inde ka dhidha, adadünögü eema ya Yahüüdü nja kajeene

nye'd'de atöyeene ma toolonadene."

<sup>24</sup> Aga Bölis ka aleefe tinggili tumma iini ka eyi ya, ikirii Fistös ka alneege a tumma ko'do iki, "Ka Bölis, nindima o'o! Talaana na dhabbu no kanangnga o'o ka tindima!"

<sup>25</sup> İkirii Bölis ka tapadaga tumma iini iki, "Taalo a'a nindima nya ömö'dü eede, a'da a'a neema tumma na dhorro na adho ka fiin no.

<sup>26</sup> Uugaara ussu eema ya, ara teema nja iini a'da taalo ri'ba eede ka eedi. Nussu a'a taalo niimö ma ta'düsünü ada iini, kudumma meene taalo kagalinggo adene ka küdhü. <sup>27</sup> Ka Uugaara Agriiba, namma o'o ka tumma ma nagane'bi? Nussu a'a a'da namma o'o kide."

<sup>28</sup> İkirii Agriiba ka tiki a Bölis, "Nasaasa o'o tanangnga a'a kada Almasiihi ka 'bandaneene tiya idhilli kungngo ya?"

<sup>29</sup> A Bölis tiki iini, "Üürü idhilli üürü adhabbu, nasaasa a'a Masala a nangnga o'o nja kadu tanno föönyö 'bitängngö no a'da aaga tafeene nja a'a illi ka nakilli neede no eege kungngo katitaalo kada."

<sup>30</sup> İkirii Uugaara Agriiba nja Fistös nja Barniki ka fiki'dö nja kadu tanno emmi nja eene no. <sup>31</sup> A kadu tanyalagaago keema a'da, "Ömö'dü ya taalo agüünii niimö ma tiidi i'i itaalo ama tunggu i'i ka pabuusu."

<sup>32</sup> A Agriiba tiki a Fistös, "Ömö'dü ya ama kadu ka

tapa kini, kini kara tafa tunggu tumma niini co uu-gaara ma Rööma."

## 27

*Bölis aco Rööma a mürkabü*

<sup>1</sup> A kudumma ka tatümö ma iidü katunggeene ungngo tadigaala ka to ma co Italiya ya, a kadu tanangnga Bölis uugaara ma nasigira tanno uugaara ma Rööma ana eere a'da Yüliyos no nja kadu töccö na ka pabuusu no.

<sup>2</sup> Ungngo taka ka mürkabü ma öö'dö ndama Atramiit, ungngo tapadaga co naanya ma Asiya, ungngo tagiisö ka to ungngo tüüsönögö nja Arestarkos ya ma Makadoniya ya ö'dö ndama Tasalanükü. <sup>3</sup> Ungngo tala Saiyda a taka ka ndaadha, a Yüliyos tanangnga ta'diila a Bölis, afa kini aco ka kateefi miini ka inynya eema yiini ka asaasa ya. <sup>4</sup> A kiidü ka tunggeene ka to kete ma Kuburus kudumma tanya ka talinggo ungngo. <sup>5</sup> A kiidü ka tigaala ka to kete ka tinggini ma Kilikiya nja Bamfiliya, ungngo ta'barda ka Mira ma Likiya mo kanna. <sup>6</sup> Uugaara ma nasigira taluna mürkabü ma ö'dö ndama Iskandariya ma unggunu co Italiya anangnga ungngo taka kide.

<sup>7</sup> A mürkabü tagiisö ana ungngo amussu a füngngö dhabbu, a tanya tagalinggo ungngo kafaga ungngo keere kaala Kanitos. Ka tanya ka faga ungngo keere ma tadheedhe ko'do, ungngo

tafada ta'barda kide, ungngo takete ka Kireet ndama üdü ma Salmon. <sup>8</sup> Ungngo tagunggeene kete ka tinggini ma to a dhügürü, ungngo tala 'buugu ya ana eere a'da Mawani ya a'diila ya kada kete ma anya ma Lisiila.

<sup>9</sup> Ungngo taganeene dhabbu, a kadu tüpü tenuge co, a tino tiideene. İkiri Bölis ka teema nja kadu a'da kindinaana oona ku'bu kadinö ko'do. <sup>10</sup> Iki, "Ka kadu, niji a'a tino no taalo ka'diila tatoroko kungngo aja kidha kadhabbu taalo ka mürkabü nja eema tiya inggide ya unggodho i'i, nja nanggeyi tanno aja afe'de."

<sup>11</sup> Lakiini uugaara ma nasigira amma ka tumma tanno ömö'dü ma mürkabü nja taloglaana ko'do ara kitaalo amma ka tumma tanno Bölis. <sup>12</sup> A 'buugu yeene ka öö'dö kide ya taalo a'diila meene ka tanna kide feele kungngo, adhabbu ma a kadu töccö tükiri ka tiki a'da kunggeene a mürkabü kaco a Finikis, ka anya ma Kireet kanna kide ara feele kico kürö Finikis kudumma tanya taalo iisö kanna.

### *Tanya ka linggo to*

<sup>13</sup> Ka tanya ka ndaiisö ndama küülü amussu ya, kiki kide a'da eege kicco a 'buugu tiya eene ka asaasa ya, kikiri ka fanna ndaliili ma afi'danja ku'bu ka aru ma mürkabü mo, kara ka tunggeene ka tinggini ma to ma Kireet. <sup>14</sup> Lakiini a tanya karooro tö'dö a türü ndama fiinii ma Kireet ana eere a'da

Orokilion. <sup>15</sup> A tanya tagürü mürkabü, a mürkabü taalo mambaanya türü ma tanya. İkiri tanya ka arünö ana oogo kiiösö co 'buugu tiya eene kiiösö co yiini. <sup>16</sup> Ungngo tagunggeene ka 'dakeyi ma 'banya minggide mana eere a'da Kawda, ungngo ta'beene nja tanya ungngo tidhi, ungngo taluna 'bamürkabü ma idhilli mo ma ka mürkabü ma dhabbu mo keere. <sup>17</sup> Kene ka ta'diniga oogo co mürkabü tammo dhabbu mo ka teene ya, kikiri ka afin'da mürkabü ma dhabbu mo ku'bu a naaru ka tüm'bü miini ma timi'dinaana oogo ka oona ka söödö. Kari'ba kudumma mürkabü ka tarünö mafiri ka ndüdüürü kete ma Libya, kagildhe naaru, kapa ka mürkabü a tanya tagürünü oogo ko'do. <sup>18</sup> Ka taka ka ndaadha a tanya takogoona ma tüüsö dhindho, kikiri kama eema ka mürkabü kapüğü ka 'biidi ka to. <sup>19</sup> Ka füngngö kanda iidoona ya kikiri ka a'duga eema ya indhi ya ka mürkabü nye'd'de kungngo kadhifi ka 'biidi ka to. <sup>20</sup> Ungngo tüyü füngngö a dhabbu a'da taalo ungngo kasala ndanaaya nja midigi, a tanya tüütü ka tüüsö a naguuru, ungngo titaalo kamma a'da ara ungngo toolonadene afe'de.

<sup>21</sup> A kadu ma mürkabü taganeene ana iiire a füngngö dhabbu, eene taalo kagolo niimö, ikiri Bölis ka fiki'dö iki eene, "Kadu eede, aaga föonyö tumma

neede, aaga tafa tunggeene ka Kireet a tatoroko no tafa taduna aaga taga'da eema kaja. <sup>22</sup> A'a 'bitingngö nuu'bu aaga ka nanggeedi, a'da aaga tidhi oona ku'bu kudumma taalo ömö'di unggodho kungngo ana kada ataama, illi mürkabü unggodho oogo ma tatangga'da. <sup>23</sup> Tadhangga ma Masala tammo eede ka tümmü oogo ana eedi dhorro nja eede ka talinggo ada oono mo, mö'dö kete koosoki. <sup>24</sup> Iki a'a, 'Ka Bölis, fa tari'ba, nütü o'o ka aco ka uugaara ma Rööma, Masala manangnga kadu na unggeene nja o'o no ka niisö ma o'o.' <sup>25</sup> Aaga idhi oona ku'bu dhorro, namma a'a ka Masala tumma na adirina nja a'a no kaco ööye miini. <sup>26</sup> 'Biidi ya tanya ka talinggo i'i ya tagürünüğü angnga co jazeera tököönö.'

### *Mürkabü ma'bunanjaana ku'bu*

<sup>27</sup> Kidi ka ndatiimö füngngö ada'baaga kafünü egüsö, kaleefe unggngo talööle ka To ma Adriya, ooso ka teene a kadu ma mürkabü tiki kide a'da eege ka ndakete ka tinggini ma to. <sup>28</sup> Kene ka ineene ta'buugu ma to ya, kalaga co afe'de kaduna namitiri kö'dö ukumu kadu keera (40) kasigi co idhilli kungngo kalaga co afe'de kaduna namitiri ukumu ömö'di aco iiisine ya (30). <sup>29</sup> A ri'ba tümmü eege eene katiki kide a'da mürkabü madirini oona ka 'buugu tiya niigisi ya, kikiri ka

kadhifi eliili na afi'dadene ka naaru no keere ma mürkabü ka egüsö, kara kafara ka Masala a'da a taka taadha.<sup>30</sup> A kadu ma mürkabü ta'b'baana oona ku'bu ma tasaasa tarünö ndama kunggu mürkabü ma idhilli mo co 'büdü, kümmü nanggeyi niini a'da eege kasaasa tunggugu ndaliili na afi'danja ka naaru no ka mürkabü kidha.<sup>31</sup> İkiri Bölis kita iki a uugaara ma nasigira nja nasigira tanno iini, "Üürü kadu ma mürkabü taalo kütü ka teene miini ya taalo tefe kide ata."<sup>32</sup> A nasigira tikiri ka rumuna naaru ma mürkabü ta ma idhilli mo kafa kene ka'dingga ka 'büdü.

<sup>33</sup> Ligitaka so'd'do, a Bölis tiki eene in'dili a'da kagu eema, iki eene, "Ka füngngö ada'baaga afünü egüsö na eere no, taalo aaga kagolo niümö ma taguri.<sup>34</sup> Nikiri a'a ka asaasa a'da aaga tagu eema, amang kada tefe ka 'di, andanaw kungngo unggodho kungngo taalo kara tasuli kata ka nanggüdü."<sup>35</sup> Kini ka tiki nggeege ya, ikiri ka a'duga meteene anangnga ta'diila a Masala kene kidha nye'd'de kungngo, ikiri ka 'düsünü arooro ka taguri.<sup>36</sup> Kikiri ka tidhi oona ku'bu eege in'dili katagu eema.<sup>37</sup> Ungngo no ka mürkabü kö'dö miyateene ana sita sabiini (276).<sup>38</sup> Kene ka ndüüsü ya, kikiri ka rara'baga migile co to amang ka mürkabü ta i'balapala.

<sup>39</sup> Ka taka ka taadha a kadu ma mürkabü taalo

kussu 'buugu yeene köö'dö kide ya, lakiini eege kasala tinggini ma to ana ndamugu, kikiri ka asaasa tüögü mürkabü co 'buugu tiya miini ya.<sup>40</sup> Karumuna eliili ya afi'dadene ka naaru ya ma mürkabü kafa kene ka'dingga co to. Kakildhe naaru na ma ta'diniga ten'di coo'do ka mürkabü amang ka tanya ta'duga oogo kapadaga co tinggini ma to iini.<sup>41</sup> Lakiini mürkabü mirri ana oona ka ndamugu ka 'büdü ka teene üdü miini töö'di, taalo agasigi oona, eere miini ta'bununjaana ku'bu a türü ma tanya nja 'büdü.

<sup>42</sup> A nasigira tasaasa tagirina kadu na ka pabuusu no amang kene tafa kabbü 'büdü kaco a tinggini ma to karünö.<sup>43</sup> Lakiini uugaara ma nasigira asaasa toolona Bölis, ikiri ka faga eege keere. Iki a kadu na ussu ka abbü 'büdü no kaco ka tinggini ma to ka ndanda ka dhidha,<sup>44</sup> ikiri a kadu könö saga tuurna eege keere anno karefe kee'di anno taka ka türeene ma mürkabü ma tangga'da mo ka idhi kala tinggini ma to ka'diila.

## 28

*Bölis ungngo ka to ma Malta*

<sup>1</sup> Kidi ka öö'dö ko'do ndama 'büdü ya, ungngo tikiri ka tussu a'da 'buugu ya ana eere a'da Malta.<sup>2</sup> A kadu miini tamma kidi kadagüni tataafala ana ungngo ka'diila, kafülle

ada issi ungngo ma tille kudumma 'buugu ka tiicolo a tombo'do ka teede.<sup>3</sup> Aga Bölis ka awaana kee'di koona anangnga ka issi ya, talili a tagu'daana ma issi tala ni, afiri akürö ndama ndagee'di a'dukunjaana ka Bölis ka niisö.<sup>4</sup> A kadu ma naanya tikiri ka tassa kini ka ta'dukunjaana, kikiri ka teemaana ka oona unggodho eege kiki a'da, "Ömö'di ya agirina kadu, asa ka toolonadene ka to illi Masala taalo ma tafa kini efe ka 'dii."<sup>5</sup> Lakiini Bölis asanaga ni ka issi, i'i taalo ilii adene ka oona.<sup>6</sup> Katoodo ku'bu miini ka tüüfü ka niisö nja iini ka'dingga eyi. Kene kanda katoodo ku'bu dhabbu, a niimö ya toroko ya taalo agu i'i ya, kafada a tumma kiki, "Masala oogo mungno?"

<sup>7</sup> Kete ma 'buugu tiya Bölis ka tanna kide ya siga no uugaara ma anya kungngo ana eere a'da Böbliös, kide anangnga ungngo ka 'dii taganeene nja iini a fungngö iidoona ataafa kide 'do.<sup>8</sup> A pupa tiya Böbliös tagamaara a 'bürüdü nja 'booyo, ikiri Bölis ka co iini ka la ümmünü niisö kini ka oona adageema nja Masala moolona i'i.<sup>9</sup> Kini ka tagüuni adene nggeege ya, ikiri kadu na amaara no köö'dö ka iini nye'd'de anangnga eege ka'diila.<sup>10</sup> A kadu tagüuni tateefe na 'diila ana ungngo, ka inya eema ma taguri ka füni ungngo.

*Tino na Bölis ma tara co*

### Rööma

<sup>11</sup> Ungngo tafara nagatereene kanda iidoona ya, ungngo tikiri ka taka ka mürkabü ma ö'dö ndama Iskandariya, mana koronggore ma nagiiso ma namasala keera kungngo oono ka üdü, oogo matiimö feele kita miini kita.<sup>12</sup> Ungngo ta'barda ka anya ma Siirakoos, ungngo tagünü kide fungngö iidoona.<sup>13</sup> Ungngo tikiri ka tunggeene ka 'dii, ungngo tarooro a 'dakeyi ma to, ungngo tala anya ma ana eere a'da Rikion kene ka ndiyyü fungngö eera ya, ikiri tanya ka öö'dö ndama küülü, ligitaka kungngo tala Batyüli a fungngö tiya anda iidoona ya.<sup>14</sup> Ungngo taluna kadu ma kaniisa kide, kiki ungngo a'da ungngo tagünü nja eene a fungngö iidümmü afünü eera. Nggeege ungngo tala Rööma.<sup>15</sup> A nagöre ma angnga taföönyö a'da kunggunu ungngo tö'dö, kunggeene kalla köö'dö ka Mansala ma Abüös nja Nalokonda tanno iidoona no ma toreene nja ungngo. Ka Bölis ka asala kadu no, anangnga ta'diila a Masala idhi oona ku'bu.

### Bölis ungngo ka Rööma

<sup>16</sup> Kidi kico Rööma ya, a nasigira tanangnga Bölis ka 'buugu tiya iini unggodho i'i nja tasigira tiya afa kini ya.

<sup>17</sup> Kene ka ndiyyü tiidoona ya, ikiri Bölis ka tagümmünü kadiifü ma Yahüdü na anna ka Rööma

no a'da köö'dö tamma iini. Kene ka ndemmi nja iini ya, ikirii ka tiki eene, "Kadu eede, taalo a'a nagalinggo nüümö ya toroko a kadu tanno aja nitaalo nadiri tumma no toroko ka eema ma kadaada ma angnga ma 'billi no ka oona, lakiini Yahüüdü kümümü a'a ka Örsaliim kümümünü a'a a kadu ma Rööma.<sup>18</sup> A kadu ma Rööma tagindini a'a, kasaasa tapa kudumma eede taalo a'a nagüüni tumma na tatoroko no, ma tanangnga a'a ka teyi.<sup>19</sup> Lakiini Yahüüdü kanu, nikirii a'a ka tunggu seriye yeede co uugaara ma Rööma, lakiini a'a taalo nasaasa teema nüümö ya toroko ya a kadu tanno eede ka oona.<sup>20</sup> I'i yungngo eede ka tümmünü aaga a'da tö'dö, tumma nadirina aaga. Nakilli na a'bununja kede ka iisine no, kudumma ömö'di ya kadu ma Israyil ka tündhiigü i'i ya."

<sup>21</sup> Kikirii ka tiki iini, "Taalo waraga ö'dönja ungngo ndama Yahüüdiya ma tumma o'o, ömö'di taalo ö'dö ndama nagöre ma angnga kanna adirina nüümö ungngo ma o'o a tumma taalo kadirinja ungngo ma üüdü ka tatoroko.<sup>22</sup> Lakiini ungngo kasaasa taföönyö tumma nüüdü, kudumma ungngo ka tussu kadu ka na'buugu kadhabbu eene kanu ka tumma tanno."

<sup>23</sup> Kikirii ka timi'di tumma köö'dö ka Bölis ka 'di, eege kadhabbu ka uuru töccö. İkirii Bölis ka ndeema nja

eene, kadara ma ligitaka kungngo, a 'buugu ta siiya, eema fumma ma tauugaara ma Masala asaasa eege katussu Yasu ndama tumma ma seriye tiya Müüsa nja kasorne ma nagane'bi.<sup>24</sup> A kadu könö tamma ka tumma tanno iini anno tanu kide.<sup>25</sup> A kene ka tüfürü tanyala-gaago kita iini, kudumma tumma tanno eene taalo kinyno ka oona, a Bölis tiki eene, "Tumma na Koronggore tiya Insili ya ka timin'da a ne'bi Asaiya ka tirina a kadaada ma aaga no,<sup>26</sup> 'Kolo ka kadu tanno niki eene,

Aaga sa föönyö taalo aaga ka tussu,

aaga sa kadinö kide taalo aaga ka tijöögö.

<sup>27</sup> Nanggeedi na kadu tanno kakidhö afa nüigisi, köödhü iisine neene, ka'bürü iiye neene, amang kene tafa taföönyö ana iisine tanno eene, nja eene kafa tiji 'buugu ana iiye tanno eene, kussu a nanggeedi tanno eene kaadha ka tatoroko na a'a toolona eege.

<sup>28</sup> "Nggeege nasaasa a'a a'da aaga tussu toolona na Masala kagüründene co kadu ma kajeene, kara tatoodo kide."<sup>29</sup> [Kini ka ndageema tumma no ya, ikirii Yahüüdü tö'dö kürö ka'digineene kisaana ka oona.]

<sup>30</sup> A Bölis taganna ka Rööma a nagürüünü keera

ka 'dii tiya iini kada afaana  
ya, amma ka kadu tanno  
icci tassaasa kini ka 'dii  
no nye'd'de.<sup>31</sup> Adünügü  
tumma ma tauugaara ma  
Masala co kadu, alaana eege  
ka tumma tanno Uugaara  
Yasu Almasiihi a'da taalo  
ri'ba kini ka eedi.

## Waraga ya Bölis ma co Rööma Tafa'da tumma

Bölis ya tafüni ya arigiri ada aaga waraga ma co ka kadu ma kaniisa ka anya ma Rööma kudumma iini ka asaasa tadünügü eema ma tumma tanno adünnüdene ka na'buugu tököönö ya, i'i asaasa co tassa ka kadu ma kaniisa ka Rööma na linggo nja eene idhilli, assa ka tunggeene aco Aspaniya. I'i iki a'da tumma ma İnjili na Yasu ka anangnga kadu katussu a'da Masala manangnga kadu nye'd'de ka 'diila nja oono ka tamma tanno eene ka eema tiya Yasu ka talinggo ya. Bölis iki a'da Abrahiim aga unggodho nja Masala atamma kono, taalo kudumma eema tiya iini ka talinggo ya. Kudumma aja kasaasa Masala, kafa angnga ka Koronggore tiya Insili ya alaala angnga ka taneene amang kaja taganeene afa ma tiya Masala anangnga kataneene ya kungno.

Bölis adiri tumma ma kadu ma kaniisa kara taneene kada kadu ka unggodho (Rööma 12.15) i'i ya ageema tumma ma tasaasa kadu könö kadara ka kadu tanno taalo kamma kaja kakirimi angnga no, angnga taföönyö tumma na naguugaara tanno aja. I'i ööjülü kateefe miini ka

Rööma a nagereene tanno eene (Rööma 16).

### Tööjülü

<sup>1</sup> Tumma no kö'dö ndama Bölis ömö'di ma linggo ya Yasu Almasiihi Masala magesse i'i a'da ada tafüni eema tumma ma Masala tanno 'diila no. <sup>2</sup> Yoono ka tafi'di yoono ka tiri tumma miini 'billi, a nagane'bi tatiraana ka sorne ma Masala. <sup>3</sup> A'da tumma na 'diila no eege kamiini, ma 'Bii'bala tiya oono Yasu Almasiihi Uugaara yaaja i'i ageenedene kada tadü'd'dü ama 'bügöörö tiya Uugaara Dawud. <sup>4</sup> Ussudene a'da i'i ya 'bii'bala ma Masala kini ka fiki'dö ka inde a türü ma Koronggore tiya Insili ya, i'i ya Uugaara tiya yaaja Yasu Almasiihi. <sup>5</sup> Yasu anangnga türü a'a meede kada tafüni ana eere tiya iini, nümmünü kadu ma kajeene nye'd'de kamma kini kaföönyö tumma niini. <sup>6</sup> Nja aaga afe'de, Masala magümmünü aaga a'da aaga ka kadu tanno Yasu Almasiihi. <sup>7</sup> Waraga ya, a'a nungu aaga ka Rööma nye'd'de kungno, Masala masaasa aaga madagesse aaga ka kadu tanno oono na insili no fa ka Masala Pupa yaaja nja Uugaara Yasu Almasiihi tanangnga türü aaga nja ta'diila.

### Bölis asaasa co Rööma

<sup>8</sup> Ka dhidha, namana a'a ta'diila a Masala tammo eede ana eere tiya Yasu Almasiihi kudumma aaga

nye'd'de kungngo, a'a nüünü nggeege kudumma kadu ka 'buugu koona nye'd'de kungngo keema tumma ma tamma ka Masala tanno ada.<sup>9</sup> A Masala meede ka tamma kono a koronggore neema tumma noonoo na 'diila no ana eere ma 'bii'bala tiya oono ya adinö kede ka tagüügi tumma ma aaga a naguuru.<sup>10</sup> Ka fara tiya eede 'bucca ya, nafara a'a ka Masala a'da makara tafa'da fiinü a'a a'da nöö'dö tassa kada.<sup>11</sup> Nasaasa a'a tö'dö tassa kada amang kaja tosso ka tumma koronggore tanno ananja a'a no anangnga aaga kana türü.<sup>12</sup> Tumma no a'da tafünügü aaga ko'do angnga tosso ka tafünügü njaana ko'do ka tamma ma Masala tanno aja ka nanggeedi no.<sup>13</sup> Nagöre eede, taalo a'a nasaasa a'da aaga tüürü, kudumma eede nasaasa a'a tö'dö kada kanna 'bucca kungngo a nüümö miini sa ka faga a'a keere nasaasa a'a tamanaga kadu a Yasu afa ma tiya eede ka tüünü nja kajeene ya kungngo.<sup>14</sup> Kudumma kömüsü tammo kadu nye'd'de kungngo mungngo eede ka eyi, kadu ma Yünan nja kadu tanno taalo ka Yünan nja kadu tanno 'dara no nja tanno nagaaga no.<sup>15</sup> Tumma no kanangnga a'a ka asaasa tö'dö tadünügü tumma na 'diila no co aaga no ka Rööma no.

<sup>16</sup> Taalo modolo magu a'a ma tumma ma Masala

tanno 'diila no, kudumma meene ka tatürü ma Masala ma toolona kadu na amma nye'd'de ka kadu ma Yahüüdü ka dhidha nja kajeene afe'de.<sup>17</sup> Tumma na Masala na 'diila no kiki a'da Masala manangnga kadu ka'diila nja oono ndama tamma nja tamma afa ma sorne ka tiki, "Ömö'dü ya a'diila ka eedi ya efe ka 'dü a tamma."

### *Tagoroo'bo na Masala*

<sup>18</sup> Kudumma tagoroo'bo tanno Masala ka ö'dö ndama 'dotombo'do ma kadu tanno oroko no, na üünü tatoroko no, kadu na küdhü tumma ma timin'da ana eema tiya toroko ya.<sup>19</sup> Tussu ma Masala kussu adene kene ka oona kudumma Masala ka ala kene ka ööye.<sup>20</sup> Jiddi ma Masala ka tarü'bü 'büdhülü, a taneene noonoo taküdhü türü noonoo ta'billi nja ta Masala tanno oono, kussu adene ka eema tiya Masala ka tagalinggo ya, taalo ömö'dü ma tiki a'da taalo i'i ussu.<sup>21</sup> Kussu Masala kassa ka taalo kafünügü oogo ko'do kitaalo kanangnga ta'diila oono kada Masala, nanggüüdü neene koroko a nanggeedi neene tadigine ana ndüüli kanagaaga.<sup>22</sup> Kümmü nanggeyi neene kada 'dara, kagala kada nagaaga.<sup>23</sup> Kagere tidihindhi ma Masala mara tüütü ka 'dü ta'billi mo kara kafara ka eema tiya eene ka tagalinggo ana iisine ya, ömö'dü ya ara titaaloo nja uyi nja eema

ma eriidö nja eema tiya ürneene ya.

<sup>24</sup> Nggeege yungngo a Masala ka tümmünü eege a tallogo ma nanggeedi tanno eene ümmünü eege a tatoroko, ma tüünü midhi ku'bu a tuu'da tanno eene eege ka unggodho eege. <sup>25</sup> Kagere tumma ma Masala na dhorro no a korokoro. Kamma kafara ka eema tiya Masala ka tarü'böönö ya kafa ka Masala tammo agalinggo eema mo, mädhindhi ta'billi mo. Amiin. <sup>26</sup> Nggeege yungngo a Masala ka anangnga eege a tatoroko ma midhi, iiya neene tagere füngngö ya dhorro ya a tiya taalo a dhorro ya. <sup>27</sup> A nagiide afe'de kaadha ka füngngö tiya dhorro ya nja iiya, kara kalili ajeene a temelö ma nagiide unggodho eege, a nagiide tüünü modolo nja nagiide könö a tapusu adene kene ka nanggeyi tanno eene ka tatoroko tanno eene kadüünö no.

<sup>28</sup> Kudumma eene taalo kasaasa tafa ka tussu eema ma Masala, ikiri Masala ka tümmünü eege a tatoroko ma nanggüdü tanno eene muuru eege ka talinggo ya taalo ama talinggo adene ya. <sup>29</sup> Kadigine a tatoroko, a taga'da 'buugu, a tallogo ma iiya nja nagiide nja tallogo ma eema, a'bugu'buugu ün'dügängngö. Kadigine a kirimi, a tagirina kadu nja tadiidi, ana ünggü, a tadhe kadu. <sup>30</sup> Keema ka kadu

ko'do, kadiidi ma Masala. Keela kadu, ka'diniga oona coo'do, kawwa tatoroko, taalo kaföönyö tumma na kafaafa meene. <sup>31</sup> Taalo ka'dara, taalo kafa ka timi'di tumma. Taalo kana 'bangnga, taalo kana muuyu. <sup>32</sup> A'da kussu a'da ömö'di ya üünü tatoroko nggeege ya ara teyi, taalo kalinggo sugi, kagala kada dhodho a kadu tanno üünü nggeege no.

## 2

### *Tapusu adene ma Masala*

<sup>1</sup> Nggeege taalo o'o nara tümmöönö ka eyi tiya üdü, na o'o saga faanya nümmü kadu a'da eege ka oroko, a'da nalinggo o'o eema yeene ka talinggo ya, kudumma üdü ka teema nggeege ya, o'o nümmöönö ka eyi tiya üdü. <sup>2</sup> Kussu angnga a'da Masala mümmü kadu kada timin'da, ömö'di ya linggo eema afa ma tiya miini ya. <sup>3</sup> Ömö'di eede, nakiki kide üdü ka teema a'da kadu na küünö eema ya toroko ya, a'da nüünö o'o ma eyi tiya üdü ara o'o tö'dö kürö ka tapusu adene tanno Masala? <sup>4</sup> Alla o'o namidhi 'bangnga moono nja tidhi oona ku'bu tanno oono nja muuyu tammo oono, taalo ussu a'da tiicolo na Masala ka künaana o'o ka taadha ka tatoroko. <sup>5</sup> Lakiini a tatoroko tanno üdü nja takidhö ka eedi tanno nüüdü no, nawaana o'o tagoroo'bo üdü ka oona ma uuru ma tagoroo'bo a tapusu adene na Masala na dhorro no a

tussu adene.<sup>6</sup> Masala mara tapusu ömö'di kada köje nja linggo tanno iini.<sup>7</sup> Kadu no üünii eema ya a'diila ya, kawwa tiddhindhi nja tinsili ma eedi a tüütü ka 'dii ara Masala tanangnga tefe ka 'dii ta'billi eene.<sup>8</sup> Kadu könö kadhegedhe nanggeyi neene, taalo kaföönyö eema ya dhorro ya, lakiini kaföönyö eema ma tatoroko ara Masala tagoroo'bo nja eene.<sup>9</sup> Am'ba ka kadu tanno alinggo tatoroko no, Yahüüdü ka dhidha nja kadu na taalo ka Yahüüdü no.<sup>10</sup> Tidhindhi nja tiicolo nja ta'diila kara tananja ömö'di tiya üünii eema ya a'diila ya, Yahüüdü ka dhidha nja kadu na taalo ka Yahüüdü no.<sup>11</sup> Kudumma Masala taalo müünii ada ömö'di könö ku'bu.

<sup>12</sup> Kadu na üünii tatoroko a'da kitaalo kussu seriye no eege kara taaya a'da taalo kussu seriye afe'de. A kadu na ussu seriye kassa tüünii tatoroko no kara tahükümüdene ana seriye.<sup>13</sup> Taalo kadu na föönyö tumma ma seriye eege kungngo ka'diila kidha ma Masala, lakiini kadu na linggo tumma ma seriye no, eege kungngo ka'diila.<sup>14</sup> Kadu no ajeene no taalo ka Yahüüdü no, kadu na seriye katitaalo kene no kene ka talinggo a tumma ma seriye a'da taalo seriye ya Müüsa kene.<sup>15</sup> Kiki a'da tumma na seriye köö'dö iini no, karigirinja kene ka nanggeedi, a nanggeedi

neene nja nanggüüdü tessu takaa öccö ka'buna tumma eene ka oona taka no kümmöönö kene.<sup>16</sup> Ka uuru tanno Masala kara tümmü kadu na küdhü nanggeedi neene no afa ma tumma tanno Yasu Almasiihi neede ka teemaga co aaga no.<sup>17</sup> Nümmü o'o eyi yüüdü a'da o'o no taga Yahüüdü namma'da ka seriye nabbü 'daniisö a Masala.<sup>18</sup> Üürü o'o nussu fiinii yoono nasana eema ya a'diila yüüdü ka kalaadene kide ya ndama seriye ya.<sup>19</sup> Nussu a'a a'da o'o nalaala kisinsoro ka fiinii, na o'o tatöyeene ma kadu tanno anna ka talüllü no.<sup>20</sup> O'o na tatalaana ma nagaaga, o'o na tatalaana ma laala tiya dhiidhi ya, kudumma üüdü ka tessu eema ma seriye timin'da nye'd'de kungngo.<sup>21</sup> A küdü ka ndalaana kadu, taalo o'o nara talaana eyi yüüdü? O'o niki a'da kafa tanyooro ara o'o ka tanyooro?<sup>22</sup> O'o nakiki a'da kadu tafa tatemelö, na o'o tatemelö? O'o na'düsünü eema namasala na o'o saga tanyooro naala miini?<sup>23</sup> O'o na'diniga oona ko'do a'da o'o nana seriye ya Masala, ara o'o ka tamidhi Masala naga'da seriye yoono?<sup>24</sup> Sorne iki a'da, "Aaga kanangnga kajeene kateela eere ya Masala."<sup>25</sup> Tatendhe ka'diila kene katümmü tumma ma seriye, lakiini küdü kara tanu ka seriye ara o'o tafeene nja kadu tanno taalo katendhe

no. <sup>26</sup> Üürü ömö'dü ya taalo atendhe ya ümmü tumma ma seriye, taalo ara tümmü adene afa ömö'dü ya tendhe ya? <sup>27</sup> Ömö'dü ya taalo atendhe ka tuu'da assa ka tümmü tumma ma seriye ya, taalo ara tümmü kadu na atendhe no a'da seriye ungngo eene kassa aga'da. <sup>28</sup> Taalo ömö'dü ya tendhe ka tuu'da ya i'i ya taga Yahüdü dhorro, taalo tatendhe ma tuu'da eege kungngo kasaasadene. <sup>29</sup> Lakiini taga Yahüdü ya küdhü ya i'i yungngo ataga Yahüdü, taradene ma eedi a Koronggore taalo a sorne i'i yungngo a taradene, i'i yungngo a Masala ka tafünügü i'i ko'do taalo kadu.

### 3

<sup>1</sup> A 'bitingngö 'dee niimö ya Yahüdü köö'dö keere iini i'i ya iiye? A taradene kö'dö keere aminna? <sup>2</sup> Kadhabbu naffinii, ka dhidha Masala magümmüñü Yahüdü ka tumma tanno oono. <sup>3</sup> Üürü ömö'dü inggide taalo amma? Ara tanu ka tamma tanno eene tanangnga Masala ka aadha ka tamma tanno eene? <sup>4</sup> U'u, tumma na Masala ka timin'da anangnga ömö'dü ka korokoro nye'd'de. Sorne iki, "Tumma nüüdü kara tussu adene afe'de ka 'buugu ma seriye ara tumma nüüdü tii'baana."

<sup>5</sup> Üürü tatoroko naaja kala ta'diila 'biini kungngo ara angnga tiki nya? Masala oogo müünii ada kadu ku'bu, kono ka öö'dö a tagoroo'bo tanno oono angnga? A'a neema 'bitingngö ka tamö'dü. <sup>6</sup> U'u, üürü taalo nggeege ara Masala tasigi kadu nya? <sup>7</sup> Üürü korokoro yeede anangnga tumma na Masala ka tadhorro a tidhindhi tanno oono, na a'a sa tasigidene ka tamö'dü tiya toroko ya amana? <sup>8</sup> Aminna agu angnga taalo kiki a'da, "Kada küünii tatoroko amang ka ta'diila tö'dö"? Kadu könö kakeela a'a kasigi a'a a'da a'a nadiri tumma na miini no, eege ka saga tahükümüdene kada adho ka fiini.

### Kadu nye'd'de koroko

<sup>9</sup> Ikirii angnga kara tiki a'da minna? Angnga kagi'bi kajeene? Taalo nggeege 'do, assa ungngo takiki a'da Yahüdü nja kajeene 'do kungngo ka tauugaara ma tatoroko. <sup>10</sup> Sorne iki, "Taalo ömö'dü ma ta'diila, salla unggodho kungngo taalo." <sup>11</sup> Taalo ömö'dü ma tussu, taalo ömö'dü ma tasaasa Masala. <sup>12</sup> Kadu nye'd'de kaama kadagüünii tatoroko eege in'dili, taalo ömö'dü unggodho üünü niimö ya a'diila ya, taalo unggodho kungngo."

- 13 "Na'bugeyi neene ka naala  
ma oofo na tanfa'da  
no,  
nagonggo'do neene  
kama korokoro."  
Tümmü ma nöönii kungngo  
eene ka nanüünö.  
14 "Nanüünö neene kadig-  
ine ana linggi nja  
ta'diiri."  
15 "Uune neene küüsö ka  
tüüfü eriidö.  
16 Kaga'da 'buugu küünii  
eema ya toroko ya kita  
eene kara co kide ya.  
17 Fünni ma ta'diila taalo  
kussu."  
18 "Taalo ri'ba ma  
Masala eene ka ööye."  
19 Kussu angnga nüümö  
ya seriye ka teema ya, i'i  
adünügü co kadu tanno ka  
niisö ma seriye no, amang  
ka nanüünö takidöönö, a  
kadu nye'd'de ka 'büdhülü  
tö'dö kidha ma Masala.  
20 Kudumma linggo ma  
seriye taalo ka tanangnga  
ömö'dü ka 'diila ka Masala  
kidha, kudumma seriye  
amana angnga ka tussu  
tatoroko.

*Tadho ka fünni nja Tamma*

- 21 Lakiini 'bitingngö kö'dö  
ta'diila na Masala a'da  
taalo seriye a'da seriye nja  
tumma ma nagane'bi kadinö  
kini. 22 Oogo mö'dö a tinsili  
a tamma ka Yasu Almasiihi  
kudumma taalo tambanan-  
jaana ku'bu nja ömö'dü tiya  
amma ya. 23 Kudumma  
kadu nye'd'de kungngo ka  
oroko, taalo kussu fünni  
ma Masala. 24 Lakiini

**3:13** 3.13 Tüüsü ma Nakaaru 5.9    **3:13** 3.13 Tüüsü ma Nakaaru 140.3    **3:14**  
3.14 Tüüsü ma Nakaaru 10.7    **3:17** 3.17 Asaiya 59.7-8    **3:18** 3.18 Tüüsü ma  
Nakaaru 36.1

Masala manangnga eege  
ka 'diila a'da taalo faana  
kide afaana ana eere ma  
Yasu Almasiihi ya oolona  
eege ya. 25 Masala man-  
angnga i'i kada nüümö ma  
tirri, ma tamma ka eriidö  
tiya iini, oogo magüüni  
nggeege ma tala ta'diila  
noono, kudumma ka tidhi  
oona ku'bu tanno oono  
afa ka tatoroko kadagüüni  
adene ka dhidha. 26 Mala  
ta'diila noono ka ürüünü  
ma 'bitingngö amang kono  
tanangnga kadu na amma  
ka Yasu no ka tinsili.

27 Nüümö ya amana angnga  
ka ta'diniga oona coo'do  
i'i ya iiye? Ara angnga  
ta'diniga oona coo'do  
aminna? A lingngo? U'u  
lakiini a tamma. 28 Kiki ing-  
gide a'da ömö'dü ara tinsili a  
tamma ka Masala a'da taalo  
alinggo a tumma ma seriye.  
29 Ara Masala ta Masala  
tammo Yahüdü unggodho  
eege? Alla oogo ma kajeene  
nye'd'de afe'de, ii oogo ma  
Masala ma tammo kajeene  
afe'de. 30 Kudumma Masala  
ma unggodho, manangnga  
Yahüdü ka 'diila a tamma  
kono afa moono ka amana  
kajeene ka 'diila a tamma.  
31 Nggeege ara angnga ta  
kaadha ka seriye a tamma?  
U'u ara angnga tagümmünü  
seriye ku'bu.

## 4

*Abrahiim amma ka  
Masala ana eedi*

<sup>1</sup> Ara angnga tiki a'da faafa ma angnga Abrahiim aduna minna? <sup>2</sup> Üürü Masala manangnga i'i ka tinsili kudumma linggo tanno iini, ara tabbü 'daniüsö, lakiini taalo kidha ma Masala. <sup>3</sup> Sorne iki nya? "Amma Abrahiim ka Masala, a Masala tanangnga ta'diila ka tamma tanno iini." <sup>4</sup> Ömö'di ya linggo ya ara ta'duga faana yiini, taalo faana yiini ananja iini ün'dügüngngö, lakiini taalo a kömüsü linggo niini eege kamiini. <sup>5</sup> Lakiini taalo o'o nara tanangnga Masala ka tamma küdü kudumma linggo tanno üüdü ka tüüni no, Masala mamma ka kadu tanno oroko no kudumma eene ka tamma kono.

<sup>6</sup> Dawud adiri tumma na miini no kini ka tageema ma baraka ma ömö'di tiya Masala ka a'duga tatoroko miini a'da taalo agüünii nüümö.

<sup>7</sup> "A'diila nja kadu tanno a tatoroko no a tatoroko tanno eene ka'dugadene

a tatoroko neene tadünggündü.

<sup>8</sup> A'diila nja ömö'di tiya Masala taalo minni tatoroko niini ya."

<sup>9</sup> Dhodho 'dee eege kama taradene sugi, alla titaalo katendhe? Angnga tiki a'da Masala manangnga ta'diila Abrahiim kudumma iini ka tamma. <sup>10</sup> Lakiini agalinggo adene nya? Kini ka ndatendhe alla iini ka takaleefe?

Taalo karadene lakiini ka dhidha taalo keere. <sup>11</sup> I'i a'duga tatendhe kada kala ma tala tamma tanno iini ka Masala mamma kini ka ta'diila a'da üfürü tatendhe. Abrahiim ya pupa ma kadu nye'd'de ya amma lakiini taalo akatendhe amang ka ta'diila tananja eene. <sup>12</sup> Ada pupa tiya kadu tanno tendhe no, nunggunu ka fiini ma tamma tiya Abrahiim ya, taalo akatendhe, assa katamma ka Masala ya.

<sup>13</sup> Taalo seriye yungngö a Masala ka timi'di tumma nja Abrahiim nja laala tiya iini miini katakarna ka 'büdhülü, lakiini a ta'diila ma tamma ka Masala. <sup>14</sup> Kene kara taga kadu ma seriye eege kungngo kara takarna ka 'buugu, ara tamma ma Masala taga'dadene a timi'di tumma tatangga'da. <sup>15</sup> Kudumma seriye amana Masala ka koroo'bo, ka seriye kara titaalo ya, taalo nüümö ya toroko ya a tanna kide.

<sup>16</sup> Timi'di tumma kama tamma a'da taalo faana kide amang kini tüütü ka laala tiya Abrahiim nye'd'de kungngo, taalo seriye unggodho i'i, lakiini ma kadu tanno amma afa ma Abrahiim no kungngo, kudumma iini kada pupa tiya aja angnga in'dili kungngo. <sup>17</sup> Afa ma sorne ka tiki, "Nanangnga o'o kada pupa ma kadu kadhabbu." I'i ya pupa tiya aja kidha ma Masala tammo iini ka

tamma kono mo, Masala mamana tefe ka 'dī ka kadu tanno ake no, mafada a kadu manangnga eege keefe ka 'dī. <sup>18</sup> Taalo tündhígí kaganna ka Abrahiim miini kara tana laala, lakiini Abrahiim amma ka Masala ütū ka tündhígí ada Pupa, afa ma Masala ka tadirina iini, "Ara kadaada ma o'o tadhabbu afa midigi." <sup>19</sup> A nagürüünü na Abrahiim ka ndö'dö kukumu kadu ka iïidümmü taalo agi'di ka fiinī ma Masala, a'da iji tuu'da niini ka nda inde a feelü ma aka tammo iini manda eyi afe'de. <sup>20</sup> Taalo a'doore ka eedi ma tumma tanno Masala ka takiki iini no, tamma kanangnga türü iini ka oona afünügü Masala ko'do. <sup>21</sup> Ussu dhorro a'da Masala mara tüütü ka tumma tanno oono ka takiki no. <sup>22</sup> Kudumma tamma ka Masala tanno Abrahiim no iikiri Masala ka tamma kini manangnga i'i ka ta'diila. <sup>23</sup> Taalo sorne iki a'da Masala manangnga i'i ka tinsili kudumma iini unggodho i'i. <sup>24</sup> Lakiini kudumma angnga afe'de, angnga na Masala ka anangnga angnga ka ta'diila kaco ka tamma kono manangnga Uugaara yaaja Yasu ka fiki'dö ka inde. <sup>25</sup> Ümmününja ka inde kudumma tatoroko tanno aja, afiki'dö efe ka 'dī miini, amang kini tanangnga angnga ka a'diila nja Masala.

## 5

### *Ta'diila nja dhodho*

<sup>1</sup> Ka Masala ka tanangnga angnga ka tinsili ya ka tamma tanno aja no, a taneene ta'diila kaja oono ana eere tiya Uugaara Yasu Almasiihi. <sup>2</sup> I'i ö'dö ana angnga a tamma ka türü tanno aja ka tanna kide no, angnga tadhodho a tündhígí ma tüdhindhi ma Masala. <sup>3</sup> Taalo nggeege sugi, lakiini angnga tadhodho afe'de ka dhügürü, angnga tussu a'da dhügürü ara tö'dö a tidhi oona ku'bu, <sup>4</sup> tidhi oona ku'bu ta'b'badene eege kamiini, a ta'b'badene tündhígí eege kamiini. <sup>5</sup> A tündhígí naaja no taalo kara taama, kudumma Masala ka tuuru tasaasa aja ka nanggeedi a Koronggore tiya Insili ya Masala ka anangnga angnga ya.

<sup>6</sup> Ka tagi'di tanno aja no, eyi Almasiihi ka üdü ma kadu tanno oroko no, ka uru tanno Masala ka takiki no. <sup>7</sup> Minna agu ömö'di eyi ka üdü ma ömö'di tiya a'diila ya üürü ma ömö'di tiya adho ka fiinī ya, ara ömö'di takardha ku'bu eyi afe'de. <sup>8</sup> Lakiini Masala mala angnga a'da tasaasa noono ka anangnga Almasiihi ka teyi ka üdü ma angnga a'da koroko angnga. <sup>9</sup> Ka inde tanno iini, ma'diila Masala nja angnga, ara tafaanya aja kara tagoolonadene ka tapusu adene tanno Masala. <sup>10</sup> Üürü Masala ma'diila nja angnga ka inde ma

'bii'bala tiya oono a'da ka diidi ma oono, ara tafaanya kaja kara toolonadene a tefe ka 'dī tanno iini a'da muuraana angnga koonaa.<sup>11</sup> Afe'de angnga tagadhodho a Masala ana eere ma Uugaara tiya aja Yasu Almasiihi ya aja kaluna ta'diila kini ya.

### *Adam nja Almasiihi*

<sup>12</sup> Tatoroko kö'dö ka 'büdhülü ana ömö'dü unggodho a tatoroko eege kö'dö ana inde, inde sa ka co ka kadu nye'de kudumma kadu ka toroko.<sup>13</sup> Tatoroko ka kannaa ka 'büdhülü a'da a leefe seriye ya Müüsa takitaalo, lakiini, kita seriye ka titaalo kide ya taalo tatoroko kinnidene.<sup>14</sup> Lakiini kaganna inde ka 'büdhülü ka Adam kadara ka uuru tanno Müüsa, salsa kadu na taalo kagüünii no afa tatoroko no Adam. Adam i'i yungngó aga koronggore ma ömö'dü tiya ara tö'dö ya.<sup>15</sup> Lakiini türü ya ananja angnga, taalo afeene nja tatoroko, üürü inde kö'dö ka 'büdhülü ana ömö'dü unggodho, a faaya ma türü tanno Masala nja türü tiya oono ya ö'dö a türü tanno ömö'dü unggodho Yasu Almasiihi.<sup>16</sup> Afe'de kambananjaana tumma tiya amananja angnga ya nja tatoroko ma ömö'dü unggodho. Tasigi kö'dö a tatoroko ka unggodho köö'dö a tahükümüdene, lakiini eema ya Masala ka amana angnga ya asoro tatoroko kadhabbu ka angnga kadu ka'diila.

<sup>17</sup> Üürü inde kö'dö a tatoroko ma ömö'dü unggodho, ara tafaanya a tefe ka 'dī ana ömö'dü unggodho Yasu Almasiihi, kadu na aluna türü nja niimö tiya Masala ka anangnga ta'diila a kadu ya.

<sup>18</sup> Afa ma tatoroko ma ömö'dü unggodho ka tuuru kadu ka tasigidene, nggeege tekere ta'diila ma ömö'dü unggodho anangnga kadu ka 'diila nye'de kaluna tefe ka 'dī.<sup>19</sup> Kudumma tasilli eema tanno ömö'dü unggodho kanangnga kadu katoroko, nggeege afe'de kataföönyö tanno ömö'dü unggodho kanangnga kadu kadhabbu ka 'diila.

<sup>20</sup> A seriye ö'dö a tatoroko tadigi ku'bu, a 'buugu ya tatoroko kada dhabbu kide ya, a türü ma Masala tadhabbu 'do.<sup>21</sup> Salla a tatoroko saga tümmününja ka inde ya, nggeege tekere ara türü tümmününja ka ta'diila ma tefe ka 'dī ta'billi ana Uugaara tiya aja Yasu Almasiihi.

## 6

### *Tefe ka 'dī nja Almasiihi*

<sup>1</sup> Ara angnga tiki a'da minna, ara angnga takütü kadüünii tam'baga amang kaja taduna türü kadhabbu?

<sup>2</sup> Kaw, angnga no aaya ka tatoroko no, ara angnga taganna kide nya afe'de?

<sup>3</sup> Taalo aaga kussu a'da kaja ka tagambeesedene ana eere tiya Yasu Almasiihi ka kambeesedene angnga ma taaya nja iini?<sup>4</sup> Angnga

tatü'büdene nja iini, angnga takaaya nja iini a tambeese. Aga Pupa ka anangnga i'i ka fiki'dö ka inde a türü ma tidihindhi tanno oono ara angnga taganna ka tefe ka 'dii tanno issi no.

<sup>5</sup> Akaja kara ta unggodho nja iini ka tafeene ma inde tanno iini ara angnga tafeene nja iini ka tefe ka 'dii tanno iini. <sup>6</sup> Kussu ungngo a'da ömö'dii yaaja ya illi ya agabünnünja ka salii'bi nja iini amang ka tuu'da ma tatoroko titaalo nja iini, amang kaja tafa taga kasaga ma tatoroko. <sup>7</sup> Kudumma ömö'dii tiya eyi ya ö'dö kürö ndama tatoroko. <sup>8</sup> A kaja kara takaaya nja Almasiihi, angnga tagamma a'da ara angnga tefe ka 'dii nja iini. <sup>9</sup> Kussu angnga a'da Masala mafiki'dö Almasiihi ka inde itaalo ara teyi afe'de, inde taalo kara ta uugaara miini afe'de. <sup>10</sup> Kudumma iini eyi ka üüdü ma tatoroko ta unggodho ta'billi a tefe ka 'dii niini tefe ka 'dii ma Masala eege kamiini. <sup>11</sup> Aaga tekere aaga ümmü nanggeyi naada ka taaya kudumma tatoroko, lakiini aaga tefe ka 'dii nja Masala, aaga tefe ka 'dii nja Masala nja Uugaara tiya aja Yasu Almasiihi.

<sup>12</sup> Aaga tafa ka tatoroko kanna kada ka tuu'da tanno ada na aaya no, amang kada tafa tisi ka tatoroko ma eema ma tuu'da keere. <sup>13</sup> Aaga fa tümmünü nanggeyi naada a tatoroko afa eema ma tam'baga, lakiini aaga ümmünü nanggeyi naada a

Masala adha, afa kadu na öö'dö ndama inde köö'dö ka tefe ka 'dii no, ümmü tuu'da naada iini afa eema ma ta'diila. <sup>14</sup> A tatoroko taalo kara ta uugaara ma aaga afe'de, kudumma ada ka titaalo ka tauugaara ma seriye afe'de aaga kungngo ka türü ma Masala.

### Kasaga na ta'diila no

<sup>15</sup> A 'bitüngngö 'dee nya? Ara angnga tagüünü tatoroko kudumma aja ka titaalo ta tauugaara tanno seriye, lakiini ka tauugaara tanno türü? Kaw. <sup>16</sup> Naföönyö eema yiini afa ma tasaga, üürü o'o na tasaga ma tatoroko nara tuurugu o'o ka inde, üürü taföönyö nara tuurugu o'o ka ta'diila. <sup>17</sup> Angnga tanangnga ta'diila a Masala kudumma ada kada kagasaga ma tatoroko, lakiini aaga ka kuurna fiinü ma eedi ma talaana tanno ada ka tagümmöönö no. <sup>18</sup> Aaga tagildhe nanggeyi naada ka eema ma tam'baga koona a kada kasaga ma ta'diila. <sup>19</sup> A'a neema tumma ma tadi'didü, kudumma tuu'da ka tagi'di kudumma ada ka anangnga nanggeyi naada ka tadasaga ma eema ma nyoro 'bitüngngö agümmünü nanggeyi naada ka ta'diila nja talinggo ma tinsili ma eedi. <sup>20</sup> Yaada kataleefe taga kasaga ma eema ma tatoroko ya, ka ku'b'ba aaga ka ta'diila ma Masala ku'bu. <sup>21</sup> Kö'dö aaga keere aminna ka eema tiya ada kana modolo miini 'bitüngngö ya, eema ya miini

ya ö'dö ana inde. <sup>22</sup> A 'bitüngngö kada köö'dö kürö ka eema ma tatoroko ya aaga ta kasaga ma Masala ara aaga tö'dö keere a tinsili nja tefe ka 'dī ta'billi. <sup>23</sup> Kudumma faana ma tatoroko inde eege kamiini a türü na Masala eege ka tefe ka 'dī ta'billi ana Uugaara tiya aja Yasu Almasiihi.

## 7

### *Tö'dö kürö ndama Seriye*

<sup>1</sup> Aaga fa tüürü nagöre eede, neema a'a nja aaga na ussu seriye no, taalo seriye ta uugaara ma ömö'dī illi kini ka tefe ka 'dī. <sup>2</sup> Aka marnadene mo, mungno ka niisö ma seriye ma nyuri tiya oono kini ka leefe ka 'dī, lakiini kini ka teyi taalo mara tanna ka seriye afe'de. <sup>3</sup> A kono kara tagona nyuri könö a'da aleefe nyuri yoono ka 'dī ya, mana eere a'da madatemelö lakiini nyuri ka teyi, taalo mara tanna ka seriye mitaalo mada temelö afe'de kono kata aka tammo ömö'dī könö.

<sup>4</sup> Nggeege nagöre eede, kaaya aaga ka seriye a tuu'da tanno Almasiihi, amang kada ta tanno ömö'dī ya fiki'dö ka inde ya amang kada tö'dö keere a tööyö a Masala. <sup>5</sup> Yaaja kataleefe a teene ma tuu'da ma tatoroko, a tatoroko tagüünii adene ana seriye kaja ka tuu'da amang kaja tö'dö a tööyö ma inde. <sup>6</sup> Lakiini 'bitüngngö ka kaaya angnga

ka nüümö tiya imi'di angnga ku'bu ya, köö'dö angnga kürö ndama seriye amang kidi talingga ada Masala a fiinii na issi no ma Koronggore ma 'bitüngngö taalo ka fiinii ma 'billi, ya agakirinja ka sorne ma seriye ya.

<sup>7</sup> Ara angnga tiki nya? Ara seriye tatoroko? Taalo nggeege, taalo a'a nakussu a'da minna yungngo a tallogo, üürü taalo seriye iki a'da, "Fa tallogo." <sup>8</sup> Lakiini tatoroko kaduna fiinii kükü tallogo ko'do eede ka oona, kudumma seriye katitalo a tatoroko teyi. <sup>9</sup> Nageefe a'a ka 'dī ka dhidha a'da taalo seriye, ka tö'dö a tatoroko tefe 'dī ara a'a ka teyi. <sup>10</sup> A kanüün ya ama ma tefe ka 'dī kuuru a'a ka inde. <sup>11</sup> Kudumma tatoroko karuna fiinii ma seriye. Kiisini a'a iini ka tagiidi a'a. <sup>12</sup> Seriye ka eyi tiya iini ya insili nja kanüün insili adho ka fiinii ya a'diila ya. <sup>13</sup> A nüümö ya a'diila ya ara tanangnga a'a ka teyi? Kaw, taalo nggeege, lakiini tatoroko kö'dö ana inde a'a ma tagüünii nüümö ya a'diila ya amang kene tessu adene a'da ka tatoroko, atagalinggo ana seriye amang kene tala tatoroko na dhorro no.

<sup>14</sup> Kussu angnga a'da seriye ama koronggore, lakiini a'a taalo nama koronggore natennege a'a afa tasaga ma tatoroko. <sup>15</sup> Taalo a'a nussu nüümö yeede ka talingga ya, kudumma nüümö

eede kasaasa talingo ya, taalo a'a nalinggo, nüümö yeede kaanu kide ya i'i yungngo eede ka talingo i'i. <sup>16</sup> A kede ka talingo nüümö yeede kaanu kide ya, namma a'da seriye a dhorro. <sup>17</sup> Taalo a'a nungngo nalinggo nüümö yeede kitaalo nasaasa ya. Lakiini tatoroko neede ka oona no. <sup>18</sup> Nussu a'a a'da taalo nüümö ya a'diila ya eede ka oona, anna ka tuu'da ma ta ömö'di, nümmü a'a tumma ma tasaasa tüüni nüümö ya a'diila ya, lakiini taalo a'a nambaanya. <sup>19</sup> Ta'diila neede kasaasa no taalo a'a nalinggo eege lakiini tatoroko neede kaanu kide no eege kungngo eede ka talingo eege. <sup>20</sup> A kede ka talingo nüümö yeede kaanu kide ya, taalo a'a nungngo nalinggo, lakiini tatoroko neede ka oona no, eege kungngo kalinggo.

<sup>21</sup> A seriye ala a'a ka nüümö tiya afaga a'a keere ka talingo nüümö yeede ka asaasa ka'diila ya, lakiini tatoroko eege kungngo eede ka oona. <sup>22</sup> Ka eedi tiya eede ka teene, nadhodho a'a kudumma seriye ma Masala. <sup>23</sup> Lakiini a'a niji seriye könö kede ka oona alingo ajeene ana seriye tiya kede ya, yeede ka tamma kide, ya uurugu a'a ka seriye ma tatoroko yeede ka tuu'da ya. <sup>24</sup> A'a na ömö'di taalo a'deema! Mada ara toolona a'a ka tuu'da ma inde tanno? <sup>25</sup> Nanangnga ta'diila a Masala a Yasu Almasiihi

Uugaara yaaja. Ndama üüdü tiya eede nalinggo ana seriye ma Masala, nalinggo ana seriye ma tatoroko a tuu'da tanno eede.

## 8

*Tefe ka 'dī ma Koronggore*

<sup>1</sup> Nggeege 'bitingngö taalo tahükümü ka kadu tanno Almasiihi Yasu no. <sup>2</sup> Kudumma seriye ma Koronggore ma tefe ka 'dī ana eere ma Almasiihi Yasu anangnga ka tahürra ndama seriye ma tatoroko nja inde. <sup>3</sup> Niümö ya seriye ka tagi'di ka linggo miini ya, tuu'da ma tatoroko kanangnga eege ka tagi'di. Masala magürünü 'Bii'bala yoono afa ömö'di ya toroko ya, ada kümmü tatoroko ka tuu'da. <sup>4</sup> Amang ka eema tiya seriye kasaasa kaja ya co ööye miini angnga na unggeene ka fiinī ma Koronggore no taalo ka fiinī ma tuu'da.

<sup>5</sup> Kadu na linggo ana eema ma tuu'da no, kanaana iiye ka eema ma tuu'da, a kadu no alingo ana eema ma Koronggore no kanaana iiye ka eema ma Koronggore.

<sup>6</sup> Kudumma linggo ma eema ma tuu'da, inde eege kamiini, lakiini tanaana iiye ka eema ma Koronggore tefe ka 'dī nja ta'diila, eege kamiini. <sup>7</sup> Kudumma tanaana iiye ka eema ma tuu'da ya tadiidi ma Masala eege kamiini, taalo ümmü tumma ma seriye tiya Masala, taalo a tana türü ma tümmöönö. <sup>8</sup> A kadu

no ümmü fiinī ma eema ma tuu'da no, taalo kara tanangnga Masala ka asaasa eege.<sup>9</sup> Lakiini aaga taalo kunggeene ka fiinī ma eema ma tuu'da, lakiini ka fiinī ma Koronggore ma Masala ungngo ada ka oona, lakiini ömö'di ya Koronggore tiya Almasiihi ka titaalo kini ya i'i taalo ömö'di yiini.<sup>10</sup> Üürü Almasiihi aneene nja aaga ara tuu'da naada taaya kudumma tatoroko, a koronggore ya tefe ka 'di naada kudumma ta'diila.<sup>11</sup> Üürü Koronggore ya Masala anangnga Yasu ka fiki'dö ka inde ya aneene nja aaga, ömö'di ya afiki'dö Almasiihi ka inde ya, ara tanangnga tuu'da naada na aaya no kefe ka 'di a Koronggore tiya oono ya aneene nja aaga ya.

<sup>12</sup> Nagöre eede, linggo dhorro eege kungngó aja, lakiini taalo angnga kama taneene taneene ma tuu'da.<sup>13</sup> Üürü kaneene aaga taneene ma tatoroko ya, ara aaga taaya, lakiini kada kara taaya ka Koronggore ma eema tiya toroko ma tuu'da ya, ara aaga tefe ka 'di.<sup>14</sup> Kudumma kadu tanno aneene a Koronggore ma Masala no eege ka laala ma Masala.<sup>15</sup> A koronggore yaada ka 'duga ya taalo üünü tadasaga ana aaga afe'de anangnga aaga ka ri'ba, lakiini anangnga aaga kada laala ma Masala, angnga tagümmünü, "Abba," a'da Pupa yeede.<sup>16</sup> A Korong-

gore ya ussu tumma ma nagoronggore tanno aja a'da angnga ka laala ma Masala.<sup>17</sup> Üürü angnga ka laala ma Masala ara angnga ta'duga baraka yoono ka takindinaana ku'bu ya, ara angnga takarna ka eema ma Masala, angnga nja Almasiihi, a kaja kara tagosso ka dhügürü nja iini ya, ara angnga tagosso ka türü tanno iini.

*Tidhündhi na tö'dö no*

<sup>18</sup> Niji a'a dhügürü ya ka 'büdhülü 'bitingngö ya, taalo ara taköje nja tidhündhi tanno ara tö'dö kaja ka oona no.<sup>19</sup> Kudumma eema tiya Masala ka tarü'böönö nye'd'de indhígí Masala a'da aala laala tiya oono.<sup>20</sup> Nggeege eema ya Masala ka tina atangga'da ka nanggüdü, lakiini taalo kudumma ma tasaasa tatangga'da ka nanggüdü. Masala magalinggo nggeege ka tündhígí.<sup>21</sup> Eema ya Masala ka tadina ka eyi tiya eene kara tö'dö kürö ndama tatoroko tanno eene köö'dö ka tidhündhi ma tahürra ma laala tiya Masala.

<sup>22</sup> Kussu angnga a'da eema ya Masala ka tagalinggo ya nye'd'de kungngó ya, kafara 'bitingngö afa tin'di ma teene.<sup>23</sup> Lakiini taalo eema ya miini ya unggodho i'i lakiini angnga na ana Koronggore ka dhidha no kadhwügürü angnga afe'de ka tuu'da angnga takindhígí Masala ma'duga

angnga moolona tuu'da naaja.<sup>24</sup> Kudumma aja kara takindhígí Masala angnga toolonadene, lakiini tindhígí na ijidene no taalo tindhígí eege kamiini, ara ömö'dí tindhígí nüümö yiini kijöögö ya nya?<sup>25</sup> A kaja kara tagandhígí nüümö yaaja ka titaalo kijöögö ya, ara angnga tindhígí i'i a tidhi oona ku'bu.

<sup>26</sup> A Koronggore tö'dö afe'de ma takinyi tagi'di naaja, angnga taalo kakussu kafara ka Masala afa ma tiya oono ka asaasa ya illi Koronggore ka eyi tiya iini eema tumma ma angnga ka Masala kidha tumma miini ka iideene.<sup>27</sup> Masala miji nanggeedi mussu nüümö ya Koronggore ka asaasa ya, i'i ümmöönö ka kadu ma Masala afa ma tiya oono ka asaasa ya.<sup>28</sup> Kussu angnga a'da eema nye'd'de alinggo a ta'diila ma kadu tanno asaasa Masala no, eege kungngo a Masala ka tümmünü eege ndama eedi tiya oono.<sup>29</sup> A kadu noono ka tagesse eege no kadhadha, magümmünü eege ka dhidha no anangnga eege kafeene nja 'bii'bala tiya oono Yasu ya dhidha ka nagöre tanno kadhabbu no.<sup>30</sup> A kadu noono ka tagesse ka dhidha magümmünü eege, manangnga eege ka'diila ka nanggeedi nja oono, oogo afe'de manangnga eege ka tihindhí.

<sup>31</sup> Ara angnga takiki nya

ka tumma tanno, üürü Masala nja angnga 'dee mada i'i yungngo ara tadiidi ma angnga afe'de?<sup>32</sup> Masala taalo mana 'bangnga ma 'bii'bala tiya oono, lakiini mümmü i'i ka inde ka üüdü ma angnga nye'd'de, assa ka titaalo ara tanangnga eema angnga iini nye'd'de nya?<sup>33</sup> Mada i'i yungngo ara tümmü kadu na Masala ka tagesse eege no? A'da oogo mungngo moolona eege.<sup>34</sup> A mada yungngo a tümmü kadu? A'da Almasiihi eyi, afiki'dö afe'de anna ka nüüsö ma kuri ma Masala eema tumma angnga.<sup>35</sup> Mada i'i yungngo ara tadhagaana angnga ku'bu nja tasaasa tanno Almasiihi, tagoroo'bo ma 'buugu, tüünö nja ku'bu, kiriimi, iire, alla taneene ana oona ku'bu alla inde?<sup>36</sup> Sorne iki,

"Kadhwürü angnga ka üüdü ma o'o a nagürüünü,  
ungngo tafeene nja ki'biini ma taraana."

<sup>37</sup> Lakiini angnga kadhwürü tiya nye'd'de kungngo ya, kagii'bi angnga eege a türü ma ömö'dí tiya asaasa angnga ya.<sup>38</sup> Nussu a'a dhorro a'da kitaalo inde, a tefe ka 'dí titaalo alla kadhangga, alla naguugaara ma kadhangga, alla türü ma eema ma 'bitingngö ya ara tö'dö taka öccö ya,<sup>39</sup> alla türü ma 'büdhülü alla türü ma 'dotombo'do alla eema öccö ya Masala ka tadina ya ara tampaanya tadhagaana

angnga ku'bu nja tasaasa ma  
Masala tanno Uugaara Yasu  
Almasiihi.

## 9

### *Masala nja kadu ma Is-rayil*

<sup>1</sup> Ara a'a tadirina tumma aaga dhorro ana eere ma Almasiihi taalo a'a nakorokoro eedi yeede ussu a'a a Koronggore tiya Insili ya. <sup>2</sup> Namüürü a'a 'do, tin'di kungngo eede ka eedi taalo kaadha. <sup>3</sup> Nagala a'a ka tasaasa ka eyi tiya eede a'da a linggi tagu na a'a takaadha ka fiinii tiya Almasiihi kudumma siliga ma a'a nja nagöre tanno neede. <sup>4</sup> Eege ka laala tiya Israyil na Masala ka tümmü eege kada laala tiya oono no, nja tihindhi nja timi'di tumma nja seriye nja tümmü Masala nja tindhigü. <sup>5</sup> Kafaafa kungngo eene, Almasiihi ö'dö ka tuu'da, i'i yungngo a Masala ma eema nye'd'de. Masala mafünügü nja ko'do ta'billi. Amiin.

<sup>6</sup> Taalo a'a niki a'da, tumma na Masala ka tami'daana no kaama. Taalo kadaada ma Israyil ka Israyil nye'd'de. <sup>7</sup> Taalo laala ya Abrahiim ka laala tiya Abrahiim nye'd'de. Masala miki Abrahiim, "Ara laala tanna küdü ana Ishak." <sup>8</sup> Taalo laala ma tuu'da ya, laala ma Masala, lakiini laala ma timi'di tumma eege kungngo a Masala ka

tümmü eege kada laala tiya Abrahiim. <sup>9</sup> A timi'di tumma kiki kungngo, "Ara a'a tö'dö a 'buugu kafiigi kungngo a Sara teene 'bii'bala." <sup>10</sup> Taalo sugi ma tumma eege kungngo, lakiini Rifiga magüröönö nja ömö'dü unggodho, pupa yaaja Ishak. <sup>11</sup> A kene ka tüfürü tageenedene, taalo küünii eema ya a'diila ya nja tiya atoroko ya, amang ka tumma tanno Masala ka tagesse no tüütü ka ööye miini, <sup>12</sup> taalo a tumma alinggo, lakiini kudumma tümmüneene tanno iini. Miki Masala a Rifiga, "Ara 'bii'bala ya idhilli ya tüünii tadasaga ada ya dhabbu ya." <sup>13</sup> Afa ma tiya sorne ka tiki a'da, "Nasaasa a'a Yaguub nanu ka Iiso."

<sup>14</sup> Ara angnga tiki nya? Masala müünii ada kadu könö ku'bu? Kaw. <sup>15</sup> Kudumma Masala ka tiki a Müüsä, "Ara a'a tana 'bangnga ma ömö'dü tiya eede ka asaasa kana 'bangnga miini ya, nana muuyu ma ömö'dü tiya eede kana muuyu miini ya."

<sup>16</sup> Lakiini taalo tumma ma eedi tiya ömö'dü nja niümö tiya iini ka asaasa ya, lakiini 'bangnga ma Masala unggodho oogo. <sup>17</sup> Kudumma sorne ka tiki a Faröön, "Na'diniga a'a o'o ko'do amang ka türü tanno eede tussu adene küdü

amang ka eere tiya eede tafara ka 'buugu ka oona ïn'dili kungngo." <sup>18</sup> Oogo mana 'bangnga ma ömö'di tiya oono ka asaasa ya, manangnga nanggeedi na kadu töccö ka takidhö.

<sup>19</sup> Ara aaga tiki a'a a'da, "Minna agu Masala mümmü angnga ana eedi? Mada i'i yungngo ara tambaanya türü noono?" <sup>20</sup> O'o na mada napadaga tumma a Masala? Niimö ya arü'bü adene ya ara tiki ömö'di tiya arü'bü i'i ya, "Minna agu o'o natarü'bü a'a kungngo?" <sup>21</sup> Ömö'di ya arü'bü tam'bala ya 'dee, taalo üünii ma eyi tiya iini? Arü'bü niimö ya a'diila arü'bü ya toroko ya. <sup>22</sup> I'i yungngo a Masala ka tagüünii, oogo masaasa tala tagoroo'bo noono nja türü tanno oono, ma idhi oona ku'bu tafifinni ana eema ma tagoroo'bo ma tara taama. <sup>23</sup> Oogo afe'de masaasa tala tüüsü ma tiidhindhi noono na dhabbu no, na küüninja kaja ka oona kada niimö ma 'bangnga tammo oono angnga yoono ka tindinaana angnga ku'bu ma tiidhindhi tanno oono no. <sup>24</sup> Oogo magümmünü angnga afe'de a'da taalo angnga ka Yahüüdü angnga ka kajeene afe'de. <sup>25</sup> Afa moono ka tiki ka sorne ma Hawsha,

"Ara a'a tümmünü kadu no taalo ka kadu tanno eede no kada kadu tanno eede no,

eede ka titaalo nasaasa oogo mo ara a'a tümmü oogo kada tammo eede ka asaasa oogo mo.

<sup>26</sup> 'Buugu yeene kara tiki eene kide a'da, 'Taalo aaga ka kadu tanno eede, ara aaga tana eere a'da laala ya Masala tammo efe ka 'dī mo.'

<sup>27</sup> Asaiya tageema tumma ma kadu ma Israyil, "Sa aaga tagöje nja ndamugu ma to ara türeene miini toolonadene.

<sup>28</sup> Kudumma Uugaara mara tapusu kadu na ka 'büdhülü no."

<sup>29</sup> Asaiya ageema iki, "Üürü taalo Uugaara ma nasigira mafa ka laala ya, ara angnga ta kafeene nja Sadöma angnga ta kafeene nja Amuura."

### *Israyil nja Almasiihi*

<sup>30</sup> Ara angnga tiki nya? Kajeene na taalo kasi ka ta'diila keere no, kaduna ta'diila lakiini a tamma ka Masala.

<sup>31</sup> Lakiini Israyil no iisö ka seriye keere no, ka ta'diila no taalo kambaanya tala seriye ya a'diila ya koona.

<sup>32</sup> Amana? Kudumma eene ka tagalinggo nggeege a'da taalo tamma kene ka eedi, lakiini afeene afa linggo ma seriye, kikirü ka seene ka müsi tammo kara ka füni mo.

<sup>33</sup> Afa ma sorne ka tiki,

"A'a nungngo nara tanangnga müsi ma taseene ka Sahyüün ka kadu ka fiinii nja müsi ma ta'dingga, ömö'di ya amma kini ya taalo ara tana modolo."

## 10

<sup>1</sup> Nagöre eede, nüümö yeede ka asaasa ana eedi dhorro ya a'da tafara ka Masala neede a'da a kadu ma Israyil toolonadene. <sup>2</sup> Niji a'a tagu'daana ka nanggeedi neene ma Masala, lakiini tagu'daana ka nanggeedi neene taalo kama tussu eema. <sup>3</sup> Eege taalo kussu fiinii ya Masala ka amana kadu ka'diila nja oono, ka'b'ba tanangnga nanggeyi neene ka'diila unggodho eege, eege taalo kamma ka fiinii tiya Masala ka amana kadu ka'diila. <sup>4</sup> Almasiihi i'i yungngo eere ma Seriye, amang ka ömö'di tiya amma kini ya, ta'diila nja Masala.

### *Toolona ka kadu nye'd'de*

<sup>5</sup> Kudumma Müüsa ka takiki a'da, "Ara ömö'di ta'diila ka seriye nya, ömö'di ya ümmü tumma ma seriye ya ara tefe ka 'dii iini." <sup>6</sup> A ta'diila a tamma ka Masala kiki, "Fa tiki ka eedi tiya üüdü a'da, Mada i'i yungngo ara tasirö co 'dotombo'do?" anangnga Almasiihi ka öö'dö kaja

ku'bu. <sup>7</sup> Nja, "Ömö'di tiya ta'dingga co ööye?" nja iini ka anangnga Almasiihi ka öö'dö ndama inde. <sup>8</sup> Lakiini iki a'da minna? "Tumma ka kete küdü ka niünö nja eedi." Eege ka tumma ma tamma naaja ka tadünögü co kadu no. <sup>9</sup> Küdü kara teema ana onggo'do tammo üüdü a'da Yasu Uugaara, namma ana eedi tiya üüdü a'da Masala manangnga i'i ka fiki'dö ndama inde ya ara o'o toolonadene. <sup>10</sup> Tamma ana eedi kara tanangnga aaga ka 'diila nja Masala a tumma a nanggo'do tanangnga ömö'di ka toolonadene. <sup>11</sup> Sorne ma Masala iki, "Ömö'di ya amma kini taalo ataama." <sup>12</sup> Taalo ta'bakala kada ka Yahüüdü nja ömö'di tiya taalo a taga Yahüüdü ya kudumma Masala tammo eene nye'd'de, mamana eema a kadu tanno amma kono no nye'd'de kungno. <sup>13</sup> Kudumma, "Ömö'di ya amma ka eere ma Uugaara ya ara toolonadene."

<sup>14</sup> Eege kara tümmünü oogo nya a'da taalo kamma kono? Kara tamma kono nya a'da taalo kaföönyö? Kara taföönyö nya a'da taalo ömö'di ma tagadünögü eene? <sup>15</sup> Eege kara teema nya ara taalo Masala magürünü i'i? Afa ma sorne ka tiki, "Ka'diila uune no kadu tanno adünnü tumma ma Masala no." <sup>16</sup> Lakiini taalo eege in'dili

**9:33** 9.33 Asaiya 8.14; 28.16    **10:5** 10.5 Lawi 18.5    **10:6** 10.6 Seriye ya eera ya 30.13    **10:7** 10.7 Seriye ya eera ya 30.13    **10:8** 10.8 Seriye ya eera ya 30.14    **10:11** 10.11 Asaiya 28.16    **10:13** 10.13 Jüwii 2.28-32    **10:15** 10.15 Asaiya 52.7

kamma ka tumma tanno  
Masala, kudumma Asaiya  
ka tiki a'da, "Ka Uu-  
gaara, mada i'i yungno  
ara tamma ka tumma  
tanno aja?"<sup>17</sup> Kamma  
ka tumma ma Masala aja  
kara taföönyö tumma na  
Almasihi.<sup>18</sup> Lakiini ara a'a  
tiki aaga, taalo kaföönyö?  
Kaföönyö sorne iki,

"Tumma no ka nyala  
ka 'buugu koona  
nye'd'de kungno  
nja 'büdhülu koona  
in'dili."

<sup>19</sup> Lakiini ara a'a tiki aaga  
a'da, kadu ma Israyil taalo  
kussu? Akiki Müüsa ka  
dhidha,

"Ka kirimi aaga kadu na  
taalo ka kadu tanno  
eede no,  
ara a'a tanangnga kadu  
öccö na taalo kussu  
eema no kanangnga  
o'o ka koroo'bo."

<sup>20</sup> Asaiya akuru rüsü iki,  
"Kaduna kadu na taalo ka-  
gawwa a'a no,  
a'a nussudene ka kadu  
tanno taalo kawwa a'a  
no."

<sup>21</sup> Lakiini i'i eema ka Israyil,  
"Namünögü a'a niisö uuru  
in'dili  
a kadu tanno oroko  
taalo kaföönyö eema  
kasilli tumma."

## 11

*Masala taalo manu ka  
kadu ma Israyil*

<sup>1</sup> Niküri a'a ka tiki a'da,  
Masala 'dee manu ka kadu

tanno oono? Kaw! A'a ka eyi  
tiya eede a'a na taga Israyil  
'bandaada ma Abrahiim  
ndama siliga tiya Binyamiin.<sup>2</sup> Taalo Masala manu ka  
kadu tanno oono ka tagilli ka  
tagesse euge no. Alla taalo  
aaga kussu a'da miki Masala  
ka sorne ma İliya nya, iini  
ka tasigi kadu ma Israyil  
ka Masala,<sup>3</sup> "Ka Masala,  
kagirina nagane'bi nüüdü  
kürrüdü niigisi ma türri  
illi a'a nungno nöreene  
unggodho a'a kasaasa tiidi  
a'a"?<sup>4</sup> Lakiini tumma  
na Masala kiki iini nya?  
"Türeene ma kadu kinggide  
kö'dö sa'ba alif taalo küürü  
ku'bu a nagüüge ka 'Baala  
kidha."<sup>5</sup> Aga ürüünü  
tiya 'bitingngö ya afe'de,  
türeene ma kadu kinggide  
a Masala ka tagesse euge a  
türü.<sup>6</sup> Üürü tessadene a  
türü, taalo ma kara tama  
linggo aya ma linggo ya i'i  
ya iiye, illi a türü takütü ka  
türü.

<sup>7</sup> Minna inggide afe'de? Ya  
Israyil katasaasa ya taalo  
kaduna ka kadu tanno  
Masala ka tagesse euge no  
euge kungno kaduna. Laki-  
ini türeene miini kakidhö ka  
nanggeedi.<sup>8</sup> Afa ma sorne  
ka tiki,

"Manangnga Masala ko-  
ronggore ma taa'baga  
eene,

iiye taalo kiji 'buugu,  
iisine taalo kaföönyö  
eema kadara ka uuru  
tanno."

**10:18** 10.18 Tüüsü ma Nakaaru 19.4

**10:19** 10.19 Seriye ya eera ya 32.21

**10:20** 10.20 Asaiya 65.1   **10:21** 10.21 Asaiya 65.2   **11:3** 11.3 1 Akhbar 19.10,

14   **11:4** 11.4 1 Akhbar 19.18   **11:8** 11.8 Seriye ya eera ya 29.4; Asaiya 29.10

<sup>9</sup> A Dawud tiki,  
"Fa ka 'buugu ma kuri tiya  
eene ada küdhü  
ada saraka akara eene  
ka fiinii,  
üuni midhi ku'bu ana  
eege.

<sup>10</sup> Iiye neene talüdhü ku'bu  
amang kene tafa tiji  
'buugu kagür'dü  
a na'dugeere neene  
tagür'dü kiti ku'bu  
turi."

<sup>11</sup> A'a nindineene,  
aser'de awwa ya Yahüdü  
ka'dingga ta'billi? Kaw,  
lakiini taser'de neene  
kanangnga kajeene ka  
toolonadene anangnga  
Israyil ka takirimi eege.  
<sup>12</sup> Üürü taser'de neene  
kanangnga kadu ka tüüsü ya  
a tagi'di neene kanangnga  
kajeene ka tüüsü ara  
tafaanya kene kara tadigi  
ku'bu.

<sup>13</sup> A'a neema nja aaga na  
kajeene no, kudumma a'a  
na tafiiñi ma kajeene, a'a na  
'dinigi oona coo'do ka linggo  
tanno eede. <sup>14</sup> A'a nasaasa  
tanangnga kadu neede tana  
kirimi amang kede toolona  
tureene meene. <sup>15</sup> Üürü  
tanu neene kanangnga  
Masala ka'diila nja kadu ka  
'büdhülü, aminna ungngo  
ka tamma tanno eene, illi  
tefe ka 'di ka inde. <sup>16</sup> Üürü  
'dakeyi ma tigüidi ma insili  
kono ka ananja a Masala ya,  
ara tigüidi nye'd'de ta insili.  
Üürü 'bereere insili ya, ara  
kolelle tinsili tekere.

<sup>17</sup> Üürü kolelle könö  
ka'bunadene, o'o taga

'dikidiyö ma dhiile ka  
tendhe ma tamma'da ka  
kolelle tammo ütü ka  
'dikidiyö tiya dhorro a  
'bitingngö kosso aaga ka  
baraka tiya Masala ka  
tadirina Abrahiim ya. <sup>18</sup> Fa  
ta'diniga eyi yüdü ko'do a  
kolelle, üürü o'o na'diniga  
eyi yüdü coo'do taalo  
o'o na 'bereere dhorro.  
Lakiini 'dikidiyö ya dhorro  
ya i'i yungngo ümmü  
o'o. <sup>19</sup> Lakiini ara o'o  
tiki, "Katendhe kolelle no  
amang kede tamma'da  
kide." <sup>20</sup> Tumma dhorro,  
lakiini eege ka'bunadene  
kudumma eene taalo  
kamma, o'o nütü ka  
tumma ma tamma tanno  
üdü, fa ta'diniga oono  
nüdü coo'do, lakiini ari'ba.  
<sup>21</sup> Üürü Masala taalo mana  
'bangnga ma kolelle tanno  
dhorro no, taalo mara tana  
'bangnga ma o'o.

<sup>22</sup> 'Bangnga ma Masala  
nja tagoroo'bo, a tagoroo'bo  
ada ka kadu tanno a'dingga  
no, lakiini 'bangnga ma  
Masala nja o'o ka anangnga  
o'o ka tüü ka 'bangnga  
tammo. Üürü o'o taalo  
nütü ka 'bangnga tanno,  
ara o'o tarumeene afe'de.  
<sup>23</sup> A kene kara taadha ka  
tatoroko tanno eene no,  
ara Masala tamana kuri  
eene, kudumma Masala  
mambaanya tamana kuri  
eene afe'de. <sup>24</sup> Üürü o'o  
natendhe ndama fa ma  
'dikidiyö ma dhiile, kama'da  
ka 'dikidiyö tiya dhorro  
ya, ara ta'diila nja eene ka

'dikidiyö tiya dhorro ya.

*Masala mana 'bangnga ma kadu nye'd'de*

<sup>25</sup> Nagöre eede, taalo a'a nasaasa a'da aaga tafa tussu tumma na kume no, ii'di aaga tümmü nanggeyi naada kada 'dara, takidhö ka nanggüdü tanno kadu na Israyil kara saga titaalo ka kajeene dhabbu kara tamma ka Almasiihi. <sup>26</sup> Nggeege ara kadu ma Israyil toolonadene in'dili afa ma sorne ka tiki kungngo,

"Ara tatoolona tö'dö ndama Sahyüün

agala tatoroko ka laala tiya Yaguub ka oona.

<sup>27</sup> A timi'di tumma neede eege kunggo meeđe kara tagala tatoroko neene."

<sup>28</sup> Kadu ma Israyil kadhabbu 'bitingngö kadiidi ma Masala, kudumma eene kanu ka tumma ma ïnjülli, agala ka'diila nja aaga na kajeene no. Lakiini Masala masaasa eege magesse eege kudumma ma timi'di tumma noono nja kadaada meene. <sup>29</sup> Masala taalo mara tafada ana eema tiya oono ka amana a kadu ya, mitaalo mara tüürü ma kadu tanno oono ka tagesse eege no. <sup>30</sup> Afa maada ka tasilli tumma na Masala ka dhidha, a 'bitingngö moolona aaga kudumma ma tasilli eema tanno eene. <sup>31</sup> Eege 'bitingngö ka tasilli tumma amang kene

taluna 'bangnga afe'de afa 'bangnga ma Masala nja aaga. <sup>32</sup> Kudumma Masala ka anangnga kadu nye'd'de ka pabuusu ma tasilli eema amang kono tana 'bangnga kene ka oona in'dili.

*Tafünügü Masala ko'do*

<sup>33</sup> Kadhonggoro tüüsü na Masala nja ta'dara tanno oono nja tussu eema tanno oono. Ka iideene tussu linggo noono nja tussu nañinii noono.

<sup>34</sup> Sorne iki,  
"Mada i'i yungngo ussu tumma na Uugaara a mada i'i yungngo a talaala oogo ka fiinii?"

<sup>35</sup> "A mada i'i yungngo anangnga niimö oono amang kono tapadaga iini."

<sup>36</sup> Kudumma eema nye'd'de kö'dö ndama oono kada tiya oono, ara co kono. A tindhigü kunggo oono turi ta'billi. Amiin.

## 12

*Tefe ka'di na Almasiihi*

<sup>1</sup> Nagöre eede, a'a niki aaga a 'bangnga ma Masala a'da aaga tümmüni nanggeyi naada ka eema ma türri tiya insili ya a tefe ka 'di tanno Masala ka tamma kide ya, tümmü Masala ma koronggore naada eege kamiini. <sup>2</sup> Aaga tafa tafeene nja eema ma 'büdhülü ya ma 'bitingngö ya, lakiini aaga agere nanggüdü naada kada ma 'bitingngö

amang kada tussu fiinii ya  
Masala ya dhorro ya, fiinii  
ya Masala ya a'diila ya adho  
ka fiinii ya.

<sup>3</sup> A'a niki aaga a türü  
tanno ümmününja a'a no  
a'da ömö'di tafa tümmü eyi  
yiini ka tii'baana, lakiini  
ümmü eyi yiini ka ta'dara,  
ka taköje nja tiya Masala ka  
anangnga iini ya ka tamma  
ka Masala tanno iini. <sup>4</sup> Afa  
ma naseldhe kungngo aja  
ka tuu'da tanno unggodho  
no kadhabbu, lakiini linggo  
neene taalo ka unggodho.  
<sup>5</sup> Nggeege kadhabbu angnga,  
lakiini tuu'da naaja ka unggodho  
ka Almasiihi, angnga  
ka unggodho. <sup>6</sup> Linggo  
ma ta'dara kambananjaana  
ku'bu ma türü tanno Masala  
ka anangnga angnga no,  
ömö'di teema tumma na  
Masala ka anangnga iini a  
tamma ma eedi tiya iini.  
<sup>7</sup> Ömö'di ya ussu ka tal-  
inggo ya, fa kini alinggo, aya  
ussu ka talaana ya fa kini  
alaana. <sup>8</sup> Ömö'di ya ussu  
ka tafünügü kadu ko'do ya  
fa kini alaana kadu kide,  
ömö'di ya amana eema a  
kadu ya fa kini amana eema  
a ta'diila ma eedi, ömö'di ya  
indinaana kadu ku'bu ya fa  
kini alinggo dhorro, ömö'di  
ya ana 'bangnga fa kini üünii  
ana eedi ka tinsili.

<sup>9</sup> Kasaasa tasaasa na  
dhorro no, aaga aadha ka  
eema tiya toroko ya ara aaga  
ka tümmü fiinii ya a'diila ya.  
<sup>10</sup> Aaga asaasa ajeene kada  
nagöre aaga tümmü ajeene a

nanggeedi dhorro. <sup>11</sup> Aaga fa  
tagi'di ka linggo keere aaga  
alinggo a tagu'daana, aaga  
tümmü Masala ana eedi  
ka teene. <sup>12</sup> Aaga dhodho  
ka tündhigü ma Masala,  
aaga tidhi oona ku'bu ka  
'buugu ka tatoroko nja aaga,  
aaga tafara ka Masala turi  
kungngo. <sup>13</sup> Aaga osso ka  
eema tiya ada nja kadu ma  
kaniisa yeene ka asaasa ya,  
aaga tamana eema eene.

<sup>14</sup> Aaga amana baraka a  
kadu tanno alinggo aaga  
no, aaga amana baraka  
eene aaga tafa teela eege.  
<sup>15</sup> Aaga dhodho nja kadu  
tanno dhodho no, aaga fara  
nja kadu tanno fara no.  
<sup>16</sup> Aaga faana ka oona, aaga  
fa ta'diniga oona coo'do,  
aaga fa tümmü nanggeyi  
naada a'da aaga ka'dara  
aaga tagii'bi kadu könö.

<sup>17</sup> Aaga fa ta'diinö kömüsü  
ana ömö'di tiya üünii  
tatoroko ana aaga ya, aaga  
kardha ku'bu aaga tüünii  
eema ya a'diila ya ka kadu  
kidha nye'd'de kungngo.  
<sup>18</sup> Aaga alinggo eema ya  
a'diila ya, amang kada  
taneene nja kadu nye'd'de  
a tussu kide tanno ada.  
<sup>19</sup> Aaga fa ta'diinö kömüsü  
ma nanggeyi tanno ada,  
nagöre eede, aaga aadha ka  
tatoroko, kudumma Masala  
miki ka sorne, "A'a nungngo  
nara ta'diinö kömüsü."

<sup>20</sup> Ka ïire kara tagu diidi ma  
o'o ya nya kuri iini,  
a tenoge kara tagu i'i  
nanya 'bii'di iini.

Kudumma üüdü kara tüüni  
nggeege ya, afeene afa  
o'o naraada a'dii'do  
iini ka üüdü.

<sup>21</sup> Fa tafa ka tatoroko kii'bi  
o'o. Lakiini ii'bi tatoroko a  
ta'diila.

## 13

*Taföönyö tumma ma  
naguugaara*

<sup>1</sup> Fa ka kadu nye'd'de  
kümmünü nanggeyi neene  
a naguugaara ma anya,  
kudumma tauugaara in'dili  
kungngo ka niisö ma  
Masala, tauugaara na  
'bitingngö no Masala  
oogo mungno mö'dö  
iini. <sup>2</sup> Ömö'dü ya anu  
ka tauugaara ya, i'i anu  
ka linggo tanno Masala,  
kadu no anu ka tauugaara  
no eege kara tö'dö a  
pabuusu eene ka nanggeyi.  
<sup>3</sup> Kadu no alinggo eema ya  
'diila ya, taalo kari'ba a  
naguugaara, illi ömö'dü ya  
toroko ya. Nasaasa o'o a'da  
nafa tari'ba a naguugaara,  
alinggo eema ya 'diila ya  
amang kene tafünügü o'o  
ko'do. <sup>4</sup> Kudumma eene ka  
talinggo ada a Masala ma  
tindinaana 'buugu, lakiini  
küdü ka tüüni tatoroko, ara  
o'o tari'ba kudumma iini  
taalo ümmü kulu'ba weerö  
ün'dügüngngö kudumma  
eene ka talinggo ada a  
Masala, kara tapusu kadu  
no üüni tam'baga no.  
<sup>5</sup> Nggeege ya fa ka kadu  
kümmünü nanggeyi neene  
eene, taalo kudumma ma  
ri'ba ma tapusu adene  
sugi, lakiini kudumma ma

eedi. <sup>6</sup> Kudumma ata  
kamana tulu'ba ku'bu, eege  
ka kadu ma linggo tanno  
Masala, kalinggo a kadu turi  
kungngo. <sup>7</sup> Aaga anangnga  
eema a ömö'dü tiya asaasa  
kada ya, üürü ömö'dü ma  
talu'ba nanangnga ku'bu,  
üürü diginiya nanangnga  
ku'bu, a ömö'dü ya dhabbu  
ya, nari'ba iini, ömö'dü ya  
adho ka fiinä ya, nari'ba iini.

### *Aaga asaasa ajeene*

<sup>8</sup> Aaga fa tama kömüsü ka  
kadu, illi kömüsü ma tasaasa  
ajeene, kudumma ömö'dü  
tiya asaasa kadu ya i'i ya  
atiimö linggo ma seriye.  
<sup>9</sup> Masala miki ka sorne a'da,  
"Fa tatemelö," "Fa tagirina  
kadu," "Fa tanyooro," "Fa  
tallogo ma eema." A tumma  
könö afe'de köödhi ka niimö  
unggodho, "Asaasa kadu afa  
müüdü ka asaasa eyi yüüdü  
kungngo." <sup>10</sup> A tasaasa taalo  
tili ömö'dü ya akete kini ya,  
tasaasa katüimö linggo ma  
seriye nye'd'de.

<sup>11</sup> Kussu aaga a'da ka uuru  
töccö assa uuru naada tö'dö  
ma taceene ka tarigide tanno  
ada, toolona ka ndagette  
kaja, taalo afeene nja uuru  
tanno aja ka takaleefe  
tagümmü Masala no. <sup>12</sup> Assa  
oso takete ka taadha, a taka  
taadha, kada aadha linggo  
ma ndüüli ara angnga kada  
a'duga eema ma koro'bo ma  
töyeene. <sup>13</sup> Kata kaneene  
taneene no dhorro no, afa  
ma kadu no anna ka töyeene  
ma uuru no. Angnga tafa  
take ka ngeeli, angnga  
tafa tüüni tatoroko nja

temelö nja tadiidi nja kürimi.  
<sup>14</sup> Aaga kürni Uugaara Yasu Almasiihi ada ka oona afa ten'di, aaga tafa talinggo ana eema ma tuu'da, kudumma eene ka teema ma tanaana iifye ma eema.

## 14

### *Tagi'di nja tana türü*

<sup>1</sup> Aaga amma ka ömö'di tiya agi'di ka tümmü Masala ka eere ya, aaga tafa talinggo a tumma ma eedi tiya iini.  
<sup>2</sup> Ömö'di öccö amma ka kuri ma eema nye'd'de, lakiini kadu könö kinggide taalo kamma kide küküri kagu migile nja naafa nja ooyo sugi. <sup>3</sup> Ömö'di ya agu eema nye'd'de afa tamidhi ömö'di ya anu kide ya, ömö'di ya anu ka kuri ya afa tamidhi ömö'di ya agu eema nye'd'de ya kudumma Masala ka tamma kide. <sup>4</sup> O'o na mada namidhi tasaga ya ömö'di könö? A'da ömö'di yiini i'i yungngu ussu a'da i'i ara ta'dingga nja iini kara tambaanya, ara tambaanya kudumma Masala oogo mungngu mara tanangnga i'i kaana türü. <sup>5</sup> Kadu könö kümmü uuru öccö ka'diila, öccö tümmöönö nye'd'de, lakiini fa ka ömö'di ümmü nüümö yiini ka asaasa ana eedi tiya iini. <sup>6</sup> Ömö'di ya ümmü uuru könö kada dhorro ya, i'i ümmü Uugaara. Ömö'di ya agu uu'da ya, i'i aguri Uugaara, i'i amana ta'diila a Masala aya anu kide ya

i'i alingga ada Uugaara anangnga ta'diila a Masala.  
<sup>7</sup> Taalo ömö'di öccö ana kaja efe ka 'dī ma eyi tiya iini, ömö'di ma teyi ma eyi tiya iini taalo. <sup>8</sup> Üürü angnga kefe ka 'dī angnga tefe ka 'dī ka Uugaara, üürü angnga kakaaya angnga takaaya ka Uugaara. Salla angnga sa keefe ka 'dī alla kaaya angnga, angnga kama Uugaara.

<sup>9</sup> Kudumma Almasiihi ka teyi afiki'dö ka inde amang kini ta Uugaara ma tefe ka 'dī nja kadu tanno aaya no. <sup>10</sup> Aminna agu o'o namidhi örre yüdü? Aminna agu o'o nadaana örre yüdü kalama? Angnga no nye'd'de ara angnga ta'dingga ana ko'do ka Masala kidha ïn'dili ka uuru ma tahükümü kadu. <sup>11</sup> Sorne iki,

"A'a nefe ka 'dī, Masala miki, nggeege,  
 Ara kadu nye'd'de saga türü kede kidha  
 a nagonggo'do nye'd'de  
 saga tafünügü Masala  
 ko'do."

<sup>12</sup> Angnga nye'd'de kungngu ara angnga saga ta'dingga  
 kidha ma Masala angnga takinni eema yaaja ka tüünö  
 co oono.

<sup>13</sup> Aaga fa tasigi ajeene kada nagöre, lakiini aaga aadha ya, aaga fa tanangnga ömö'di öccö ka tamma nja iini ka 'dingga ka tam'baga.

<sup>14</sup> Nussu a'a namma ka tumma tanno Uugaara Yasu a'da taalo nüümö a'da i'i

ya nyoro. Üürü i'i ïröönö kada nyoro ya, i'i anyoro ana i'i.<sup>15</sup> Üürü o'o nanangnga örre yüüdü ka koroo'bo kudumma eema ma taguri, nggeege taalo o'o naneene a tasaasa ka eedi dhorro. Fa taama örre yüüdü kudumma kuri.<sup>16</sup> Fa tanangnga nüümö ya a'diila ya ka eema tiya toroko ya.<sup>17</sup> Tauugaara ma Masala taalo kama kuri nja tooye ma ngeeli, lakiini kama fiinii tiya dhorro ya nja dhodho nja ta'diila ma Koronggore tiya Insili ya.<sup>18</sup> Ömö'dü ya alinggo ada Almasiihi nggeege ya ara Masala ta'diila nja iini a kadu tamma kini.

<sup>19</sup> Kada kardha ku'bu ka nüümö tiya ara tö'dö a ta'diila ya nja tiya ara tindinaana angngaa ku'bu in'dili ya.<sup>20</sup> Fa taga'da linggo na Masala kudumma kuri, eema in'dili a'diila, lakiini atoroko üdü kagu nüümö ya ara tanangnga ömö'dü öccö ka 'dinggö ka tatoroko.<sup>21</sup> A'diila üdü kara tafa tagu uu'da nafa tooye ngeeli nja nüümö tiya ara tafaga örre yüüdü keere katümmü tumma ma Masala ana eedi dhorro ya.<sup>22</sup> Afa ka tamma ka Masala tanno üüdü no ma eyi tiya üüdü kidha ma Masala, a'diila nja ömö'dü tiya taalo amidhi eema yiini ka kuri ya iji ka'diila ana i'i.<sup>23</sup> Lakiini ya agu eema kada ri'ba ka oona ya, ara tahükümüdene, üürü i'i aguri kudumma kuri tiya iini taalo ndama

tamma. A nüümö ya taalo öö'dö ndama tamma ya, tatoroko.

## 15

*Alingga nüümö ya kadu kasaasa ya*

<sup>1</sup> Angnga na kïdhö ka tamma no, kadakidhi oona ku'bu nja kadu tanno agi'di, angnga tafa kanangnga eyi tanno ada. <sup>2</sup> Kadagüüni eema ya a'diila ya nja kadu na kete kaja no amang kene tümmü tumma ma Masala ta'diila. <sup>3</sup> Kudumma Almasiihi taalo agasaasa nüümö ma eyi tiya iini, lakiini afa ma sorne ka tiki, "Teelaana ma kadu tanno eele o'o no, ka'dinggö kede ko'do." <sup>4</sup> Tumma no köö'dö ka sorne ka dhidha, eege kö'dö ma talaana angngaa, amang kaja tagambaanya tidhi oona ku'bu angngaa takïdhö ka nanggeedi. <sup>5</sup> Fa ka Masala ma tidhi oona ku'bu nja takïdhö ka nanggeedi, manangnga angngaa kafaana ka oona, a tumma ta unggodho afa taneene na Yasu Almasiihi. <sup>6</sup> Amang kada tafünügü Masala ko'do Pupa yaaja Yasu Almasiihi ana eedi unggodho a tumma ta unggodho kada.

<sup>7</sup> Aaga amma ka taneene kada unggodho afa ma Almasiihi ka tamma kada, amang kada tö'dö a tüdhïndhi a Masala. <sup>8</sup> Ara a'a tiki aaga a'da Yasu Almasiihi alinggo ada Yahüüdü amang kini tala a kadu a'da tumma

na Masala ka timin'da, a tumma noono ka tageema nja kafaafa no aco ööye miini. <sup>9</sup> Yungngo a kajeene kara tafünügü Masala ko'do ka 'bangnga meene, afa ma sorne ka takiki a'da,

"Ara a'a tadirina eema a kajeene ma o'o,

nara tüwe tüüsü na afünügü eere yüüdü ko'do."

<sup>10</sup> A sorne tiki afe'de,

"Aaga dhodho aaga no kajeene no nja kadu tanno Masala."

<sup>11</sup> Afe'de,

"Aaga üwe ata tüüsü a Masala aaga no kajeene no nye'd'de a kadu nye'd'de kungngo tündhígü oogo ko'do."

<sup>12</sup> Asaiya tiki,

"Bereere ya Yessi ara tö'dö a tauugaara ma kajeene i'i yungngo a kajeene kara tündhígü i'i."

<sup>13</sup> Fa ka Masala ma tadigi dhodho nja ta'diila küdü ka oona, amang küdü tadigi a tündhígü ma türü tanno Koronggore tiya Insili ya.

*Lingga na Bölis nja kajeene*

<sup>14</sup> A'a ka eyi tiya eede nagöre eede, namma a'a nussu a'da kadigine aaga, aaga ta'diila aaga tussu eema dhabbu aaga tas-sumunaana ka tala ajeene dhadha. <sup>15</sup> Lakiini a'a

nakuru rüsü dhorro nadarigiri ada aaga ligeema könö aaga amang kada tussu iini, ka türü tanno Masala ka anangnga a'a no.

<sup>16</sup> Amang kede talinggo ada Yasu Almasiihi ka üdü ma kajeene nadünnü tumma na Masala kada ta'boge amang ka Masala tamma ka türri tanno kajeene ka tinsili a Koronggore tiya Insili ya. <sup>17</sup> Nabbü a'a 'daniüsö kudumma eede ka talinggo ada Yasu Almasiihi ana eere ma Masala. <sup>18</sup> Taalo a'a nara takuru rüsü ma teema tumma ma nüümö, illi nüümö ya Almasiihi ka tanangnga a'a ka tagüünü, meede ka talaana kajeene ka tamma ka Masala, a tumma ma nüünö nja linggo. <sup>19</sup> A türü ma linggo keefe nja türü ma nüüsö tanno Masala nja türü ma Koronggore tiya Insili ya ndama Örsaliim nja na'buugu tanno kete kono no kara co Alirikon, nageema a'a tumma ma İnjülli ma Almasiihi nye'd'de.

<sup>20</sup> Tasaasa ma eede tiya eede 'bucca a'da neema tumma ma İnjülli ka na'buugu tanno Almasiihi katitaalo ussudene kide no, ii'di a'a tarü'bönü ka kadese tanno ömö'di könö. <sup>21</sup> Lakiini afa ma Sorne ka tiki,

"Kadu na ömö'di ka titaaloo agadünügü tumma miini co eene no kara sa kijöögö,

a kadu no taalo kaföönyö tumma

miini no kara saga tussu."

<sup>22</sup> I'i yungngo afaga a'a keere 'bucca kungngo köö'dö kada kanna.

### *Bölis asaasa co Rööma*

<sup>23</sup> A 'bitingngö taalo fiinü ma linggo kede ka naanya tanno afe'de, nasaasa a'a tö'dö tassa kada kanna a nagürüünü kadhabbu, <sup>24</sup> kede kara co Aspaniya ya ara a'a tadigaala kada kanna, kudumma eede ka asaasa tassa kada, amang kada tamünögü a'a ko'do ma co kanna kede kara tagönü nja aaga idhilli.

<sup>25</sup> A'a 'bitingngö ara a'a co Örsaliim ma co talingga ada a kadu ma kaniisa kide. <sup>26</sup> Kudumma kadu ma Makadoniya nja Akaiya kadüünü ta'diila, kakonsaana gürüüsü konna ma tunggu co kadu ma kaniisa ka Örsaliim no, eema katitaalo kene no. <sup>27</sup> Eege kagüünü ta'diila nggeege, a'diila nja eene, kudumma kajeene ka'duga baraka ma İnjili ka Yahüdü, nggeege fa ka kajeene kamana eema ma tefe ka 'dī tiya eene kene kara tasaasa. <sup>28</sup> Kede ka ndatiimö linggo ya, nanangnga eema ya miini ya eene ya, nassa adigaala kada kanna ma tra co Aspaniya.

<sup>29</sup> Nussu a'a a'da kede kara tala aaga kanna ya, ara a'a tö'dö ka tigi ana baraka ma tumma tanno Almasiihi.

<sup>30</sup> Nikirri a'a ka tiki aaga nagöre eede ana eere ma Uugaara tiya aja Yasu Almasiihi nja tasaasa ma

Koronggore aaga fara ka Masala nja a'a kudumma a'a, <sup>31</sup> Afara ka Masala kudumma ma a'a, amang kede toolonadene ka iisine ma kadu tanno anu ka tumma ma Masala ka Yahüüdiya no, afara ka Masala amang ka kadu ma kaniisa ka Örsaliim kamma ka linggo tanno eede. <sup>32</sup> Nggeege üürü tasaasa ma eedi tiya Masala ya, ara a'a tö'dö kada kanna a dhodho angnga ïn'dili ta 'deema. <sup>33</sup> A Mašala ma ta'diila taneene nja aaga nye'd'de kungngo. Amiin.

## 16

### *Bölis ööjülü kateefe miini*

<sup>1</sup> A'a nageema tumma ma ïnye ma angnga tammo Feebi mo, aka ma linggo ma kaniisa ma Kankariya.

<sup>2</sup> Aaga tamma kono ana eere ma Uugaara Yasu afa ma nagöre tanno aja no ma kaniisa no kungngo, aaga anangnga eema yoono ka tasaasa kada ya oono, kudumma oono ka takinyi kadu kadhabbu nja a'a afe'de.

<sup>3</sup> Aaga ööjülü Akilla nja Berskilla eege na linggo linggo ma Yasu Almasiihi nja a'a no. <sup>4</sup> Kadu no ümmünü nanggeyi neene ka inde kudumma a'a, taalo a'a unggodho a'a nanangnga ta'diila eene, lakiini nakaniisa ma kajeene

na amma ka Masala no nye'd'de afe'de kungngo. <sup>5</sup> Aaga ööjülü kaniisa meene ka 'dī mo.

6 Aaga ööjülü tata'diila yeede Abintus, i'i ya ömö'dü ya amma ka Almasiihi ka Asiya ka dhidha.

7 Aaga ööjülü Maryom magadhügürü dhabbu kudumma angnga mo.

8 Aaga ööjülü Antrunikos nja Yunias ya siliga ma a'a ya anna ka pabuuusu nja a'a ya, na ussudene ka kadafüni ka söödö no, na illi ka töö'dö ka Almasiihi kede kidha no.

9 Aaga ööjülü Amblyatos teefe ma a'a ka linggo ma Masala ya.

10 Aaga ööjülü Istakis ya teefe ma a'a ya.

11 Aaga ööjülü Herotion ya siliga ma a'a ya.

12 Aaga ööjülü Trifina nja Trifosa na dhügürü ka linggo ma Masala no.

13 Aaga ööjülü Bersis ma 'diila mo, madhügürü dhabbu ka linggo ma Masala.

14 Aaga ööjülü Asinkeritos nja Fligon nja Hürmüs nja Bitrubas nja Hermas nja

nagöre tanno aja na aneene nja eene no.

15 Aaga ööjülü Filolokos nja Juliya nja Nerios nja ïnye, nja Olimbas nja kadu ma kaniisa tanno eene.

16 Aaga tööjülü tööjülü na 'diila no, nakaniisa na Almasiihi kööjülü aaga nye'd'de kungngo.

17 Nagöre eede, ara a'a tadirina tumma aaga dhorro, aaga adinö ko'do ma kadu tanno aga'da taneene kaparsaana kadu ku'bu no, a tumma kambananjaana ku'bu a talaana tanno ada ka taföönyö kede no, aaga aadha eene ka oona.

18 Kadu afa ma tanno miini no taalo kalinggo ada Almasiihi Uugaara yaaja, kuri yungngo eene kasaasa sugi a tumma tanno a'diila katid'i no, kiisini kadu.

19 Taalo ömö'dü ma titaalo ussu tiicolo ka nanggeedi naada ka Masala, i'i yungngo eede ka tadhodho ana aaga, lakiini a'a nasaasa a'da aaga ta'dara ma eema tiya a'diila ya, aaga tagu'b'ba ka eema tiya toroko ya ku'bu.

20 A Masala ma'diila mara tanangnga aaga kasiraana ka Ebliisi ana uune, fa ka türü tanno Uugaara tiya aja Yasu Almasiihi kaneene nja aaga, Amiin.

21 Timosaws ya alinggo nja a'a ya ööjülü aaga, agasiliga ma a'a no, Lokios nja Yason nja Sosibatros kööjülü aaga.

22 A'a na Tertios narigiri waraga ya, a'a nööjülü aaga ana eere ma Masala.

<sup>23</sup> A Kayos ööjülü aaga,  
ya üünii tatafala ana a'a nja  
kadu ma kaniisa ïn'dili ya.

Arastus ööjülü aaga ya  
ümmü gürüüsii ma anya  
afa kide ya, örre ma  
angnga Kawartis ööjülü  
aaga. <sup>24</sup> Türü na uugaara  
tiya aja Yasu Almasiihi  
kaneene nja aaga ïn'dili  
kungngo, Amiin.

<sup>25</sup> Kada kafünügü Masala  
ko'do, mana türü ma  
tanangnga aaga katidhi oona  
ku'bu ka tumma tanno  
oono neede ka tadünnü  
nümmüneene ana eere ma  
Yasu Almasiihi ma tumma  
tanno nussudene 'bitüngngö  
no kaküdhü jiddi ma 'billi  
no. <sup>26</sup> Lakiini kadele oona  
'bitüngngö ya nagane'bi ka  
tarigiri a kadu nye'd'de  
tussu i'i, afa Masala ka  
takiki ma 'billi amang kene  
taföönyö kamma. <sup>27</sup> Angnga  
tafünügü Masala mo ussu  
eema ma unggodho oogo  
mo, ana Yasu Almasiihi  
ta'billi. Amiin.

## Waraga ya Bölis ma co Kürünsüs ya Dhidha ya Tafa'da tumma

Bölis ya tafiiñi ya arigiri ada waraga ya a kadu ma kaniisa ka Kürünsüs anya ma dhabbu ka Yünan mo. Bölis agadünüğü eema kadu ka Kürünsüs ana ürüñü unggodho a dhüdhü miini kadu tamma ka Yasu kadhabbu (Tafiiñi 18). Lakinin ka Bölis kanda unggeene ka Kürünsüs a tagoroo'bo tabbü 'dala ka kadu ma kaniisa ka teene kanna, ikiri ka rigiri waraga ya ma kakki'di tumma no ku'bu.

Ka waraga tiya Bölis, ageema iki a'da atoroko ka kadu ma kaniisa kasümünaana oona ku'bu, aya ta'digineene nja tööje (1 Kürünsüs 1—4). Eelanaga kadu könö kudumma eene ka talinggo eema ya toroko ya afa kadu na taalo kussu Masala no (1 Kürünsüs 5—6). I'i alaana eege ka taneene ma kadu ma kaniisa kaneene nja iiya tanno eene nya, nyuri nja kadu ma 'dî tiya iini (1 Kürünsüs 7). Please translate this into Katcha: He gives them advice about living as Christians among people who worship other gods (1 Kürünsüs 8—10). Eema nja eene amang kene tümmü Masala kene kara kene temmi ka 'buugu unggodho. Eema nja eene

ma Koronggore ya Insili ya ka amana eema angnga, angnga taganeene afa kadu ma kaniisa. (1 Kürünsüs 10.14). Afada adirina tumma eene kudumma Almasiihi afiki'dö ka inde, ussu a'da Masala mara tanangnga aaga kafe ka 'dî afe'de (1 Kürünsüs 15).

### *Tafara ka Masala nja tamana ta'diila*

<sup>1</sup> A'a na Bölis, ya ana eere a'da tafiiñi ya Yasu Almasiihi a tamma ma eedi tiya Masala, a'a narigiri waraga ya nja örre tiya aja Sustanis. <sup>2</sup> Nunggu co kadu tanno amma ka Masala no ka anya ma Kürünsüs, na Masala ka anangnga eege ka tinsili ana eere tiya Yasu Almasiihi madagümmüñü eege kada kadu tanno insili no nja kadu tanno oono ka tümmüñü eege ka na'buugu 'do ana eere ma Uugaara tiya aja Yasu Almasiihi, Uugaara yeene nja angnga. <sup>3</sup> A türü nja ta'diila tanno Masala Pupa yaaja nja Uugaara Yasu Almasiihi taneene nja aaga.

### *Tamana ta'diila*

<sup>4</sup> A'a namana ta'diila a Masala turi kudumma a türü tanno oono ka anangnga aaga ana Yasu Almasiihi no. <sup>5</sup> Aaga tana türü miini ma eema nye'd'de, ka pussu ma eema nja tumma. <sup>6</sup> Afa ma tumma tanno Yasu ka tüütü kada ka nanggedi. <sup>7</sup> Kudumma ada taalo aaga kütü ka teene a'da taalo tumma

ma türü tanno Masala kada katindhügi tö'dö na Uugaara Yasu Almasiihi. <sup>8</sup> I'i yungngo afa kada dhindho amang kada tidhi oona ku'bu ta'billi a niimö ya toroko ya titaalo kada ka oona ka uuru tanno Uugaara tiya aja Yasu Almasiihi. <sup>9</sup> Masala magümmünü aaga a'da aaga tosso ka tugreene nja 'Bii'bala tiya oono Yasu Almasiihi Uugaara yaaja, Masala oogo madho ka fiini.

*Kadu ma kaniisa kasümünü njaana ku'bu*

<sup>10</sup> A'a nasaasa aaga nagöre eede ana eere tiya Uugaara tiya aja Yasu Almasiihi aaga teema tumma ka unggodho aaga tafa tasümünü njaana ku'bu, lakiini aaga ta unggodho aaga nye'd'de kungngo, a tumma naada ta unggodho ka üüdü nja koronggore. <sup>11</sup> Nagöre eede, kadu ma 'dö tiya Kalwa tiya ka tadünügü tumma ma aaga a'a, a'da tagoroo'bo kungngo ada ka söödö. <sup>12</sup> A'a nasaasa tiki a'da ömö'dö könö ana kada iki a'da, "A'a nuurna Bölis," aya tiki a'da, "A'a nuurna Apölös," aya tiki, "A'a nuurna Bütrüs," aya tiki, "A'a nuurna Almasiihi." <sup>13</sup> Almasiihi 'dee asümünü njaana ku'bu? Bölis 'dee kabünnü kadu i'i ka salii'bi ka üüdü ma aaga? Alla kakambeesedene aaga ana eere tiya Bölis? <sup>14</sup> Nanangnga a'a ta'diila a Masala kudumma eede taalo

a'a nakambeese ömö'dö ana kada illi Krisbus nja Kayos. <sup>15</sup> Taalo ömö'dö könö ara tiki a'da aaga kakambeesedene ana eere tiya eede. <sup>16</sup> (İi, a'a nakambeese kadu ma 'dö tiya Istifanüüs afe'de, na a'a taalo nagüögü tumma eede ka takambeese ömö'dö könö afe'de.) <sup>17</sup> Kudumma Almasiihi taalo agürünü a'a ka öö'dö tambeese, lakiini nöö'dö talaana kadu ka tumma ma İnjili, taalo a tumma ma ta'dara ma tadü'd'dü ii'dö salii'bi ya Almasiihi ta niimö ün'düngöngö.

*Almasiihi a türü nja ta'dara ma Masala*

<sup>18</sup> Kudumma tumma ma salii'bi ka kadu tanno aama no taa'baga, lakiini angnga tanno oolonadene a türü ma Masala eege kamiini. <sup>19</sup> Kudumma sorne ka tiki, "Ara a'a taga'da ta'dara na kadu tanno a'dara no, naga'da ta'dara ma kadu tanno ussu eema no."

<sup>20</sup> Ömö'dö ya a'dara ya iiye? Ömö'dö ya ussu eema ya iiye? Ömö'dö ma tindinaana tumma ma 'bitüngngö ya iiye? Taalo Masala manangnga ta'dara ma 'büdhülü kada nagaaga? <sup>21</sup> Kara tussu Masala a ta'dara, Masala masaasa kadu koolonadene ka tam'baga ma teema tumma ma İnjili. <sup>22</sup> Kudumma Yahüdü kasaasa türü ma tale'bele eema, a kadu ma Yünan tasaasa tussu eema, <sup>23</sup> lakiini ungngo keema tumma ma

Almasiihi tiya abünnünja ka salii'bi ya, a tumma ma takara ka Yahüdüdü kidha a tam'baga a kadu ma Yünan.

<sup>24</sup> Lakiini Yahüdüdü nja kadu ma Yünan na Masala ka tagümmünü eege no, Almasiihi a türü nja ta'dara tanno Masala. <sup>25</sup> Taa'baga na Masala ka kii'bi ta'dara ma ömö'dii, a tagi'di na Masala ka kii'bi türü ma ömö'dii.

<sup>26</sup> Nagöre eede, aaga kiigü ya ada ka tagümmünüdene ya. Taalo kadu in'dili ana kada kaga'dara a tussu eema ta ömö'dii, taalo kadu kadhabbu kagaana türü, taalo kadu kadhabbu kageenedene ndama kadu tanno iifi ka anya. <sup>27</sup> Lakiini Masala magesse eema ya nagaaga ma 'büdhülü ma tamana modolo ka kadu tanno afara ka ta'dara no ka oona, Masala tagesse kadu ma 'büdhülü na ki'di no, ma tamana modolo ka kadu tanno ana türü no ka oona. <sup>28</sup> Masala magesse kadu na midhidene ka 'büdhülü no, nja tanno a kadu kaanu kene no, nja tanno kadu taalo kümmünü eege kada dhorro no, amang kono taga'da eema ya kadu ka tümmöönö kada eema dhorro ya. <sup>29</sup> Amang ka ömö'dii tafa ta'diniga oona niini coo'do kidha ma Masala. <sup>30</sup> Kudumma türü noono asa aaga ta kadu tanno Yasu Almasiihi, i'i ya tussu eema na Masala a ta'diila a tinsili miini nja toolona. <sup>31</sup> Afa ma sorne ma

Masala ka tiki, "Ömö'dii ya abbü 'danüsö ya fa kini abbü 'danüsö a Uugaara."

## 2

<sup>1</sup> A kede ka öö'dö kada nagöre eede, taalo a'a nagöö'dö a tumma tanno adhabbu nja tumma ma ta'dara ma teemaga tumma ma Masala na küdhü no co aaga. <sup>2</sup> Taalo a'a nümmü tumma ma tussu nüümö öccö kede ka taganeene nja aaga illi Yasu Almasiihi ya abünnünja ka salii'bi ya. <sup>3</sup> Nö'dö a'a kada ka tagi'di nari'ba na'deedene ka oona. <sup>4</sup> A tumma neede nja talaana tanno eede taalo ka tumma ma ta'dara nja tumma ta'bunu kadu kide, lakiini a talaala ma türü tanno Koronggore. <sup>5</sup> Amang kada tamma ka Masala tanno ada taalo tumma ma ta'dara ma tadü'd'dü, lakiini a türü ma Masala.

### Ta'dara na Masala

<sup>6</sup> Ungngo 'do keema ungngo tumma ma ta'dara ka kadu tanno ussu eema no ka söödö, lakiini taalo ta'dara ma ürüünü tiya ma naguugaara ma ürüünü tiya ara titaalo ya. <sup>7</sup> Lakiini ungngo keema ta'dara na Masala na küdhü no, ta'dara na kaküdhü tafinni ma 'billi na Masala ka takindinaana ku'bu ma 'billi ma türü tanno aja. <sup>8</sup> Taalo naguugaara ma nagürüünü tiya kussu, kene ka tussu taalo kara takabünnü Uugaara ya idhindhi ya ka salii'bi.

<sup>9</sup> Lakiini afa ma sorne ka tiki,

"Nüümö ya ööye ka titaal  
ijööögö

a neeso taalo kaföönyö  
ya, taalo eedi ma tussu

a tadü'd'dü taalo ussu  
Masala  
makindinaana ka kadu  
tanno kasaasa oogo no  
ku'bu."

<sup>10</sup> Lakiini Masala mala angnga a Koronggore tiya oono, kudumma a Koronggore awwa eema nye'd'de kadara co eedi tiya Masala.

<sup>11</sup> Mada i'i ya ussu eedi ya tadü'd'dü nggeege, illi koronggore ya tadü'd'dü. Taalo ömö'dü öccö ma tussu eedi ya Masala illi Koronggore ya Masala. <sup>12</sup> Taalo angnga ka'duga koronggore ma 'büdhülü tiya, lakiini ka'duga angnga Koronggore ya Masala ka kürünü i'i ya, amang kaja tussu eema ya Masala ka anangnga angnga ya a'da taalo faana kide.

<sup>13</sup> Ungngó taalo keema tumma ma talaana ma ta'dara ma kadü'd'dü, lakiini tumma ma talaana na Koronggore tiya Insili ya, ungngó tadünnü tumma ma timin'da ma Koronggore ka tumma ma koronggore.

<sup>14</sup> Ömö'dü ya taalo ana koronggore ya, taalo atamma ka tumma tanno Koronggore ma Masala, kudumma iini ka tümmöönö kada taa'baga, taalo ara tambaanya tussu eege, kudumma eene kada tumma tanno koronggore.

<sup>15</sup> Lakiini ömö'dü ma koronggore ka oona ya, i'i yungngo a tümmü kadu ka eema nye'd'de, lakiini i'i ka eyi tiya iini taalo ömö'dü ma tümmü i'i. <sup>16</sup> Sorne iki, "Mada i'i yungngo ussu üüdü ya Uugaara ma talaana i'i?" Lakiini tümmü üüdü na Almasiihi kungngo aja.

### 3

*Kadu ma linggo na  
Masala*

<sup>1</sup> Lakiini nagöre eede, taalo a'a nara tambaanya teema nja aaga kada kadu ma nagoronggore, lakiini kada tadü'd'dü nja laala tiya idhiidhi ya ka Almasiihi.

<sup>2</sup> Namana a'a siiga aaga taalo kuri ya kidhö ya, kudumma ada taalo kakam'baanya kuri miini, a 'bitüngngö taalo aaga kam'baanya.

<sup>3</sup> Kaleefe aaga ta kadu ma 'büdhülü, aaga takirimi nja tanu oona ka oona nja tasümünü njaana ku'bu tanno kadu ka söödö, taalo aaga ka kadu ma 'büdhülü? Aaga taalo kaneene taneene ma kadü'd'dü? <sup>4</sup> Ka ömö'dü töccö ana kada ka tiki a'da, "A'a tuurna Bölis," aya tiki, "A'a tuurna Apölös," taalo aaga ka kadu ün'dügüngngö?

<sup>5</sup> Mada i'i yungngo Apölös? A mada i'i yungngo a Bölis? Kadu ma linggo no nangnga aaga ka tümmü tumma ma Masala eege kamiini afa ma Uugaara

ka tasümünaana linggo eene ku'bu. <sup>6</sup> A'a nakodho oogo, Apölös tagünü 'büdü kide, lakiini Masala oogo mungngo minggiraana. <sup>7</sup> Ömö'dü ya akodho oogo ya nja tiya agünü 'büdü kide ya taalo a niimö, Masala oogo minggiraana. <sup>8</sup> Ömö'dü ya akodho oogo ya nja tiya agünü 'büdü kide ya ka unggodho, lakiini eege kama faana ma dhögürü tiya eene. <sup>9</sup> Ungngo kosso ka linggo nja Masala, aaga ka siga tanno Masala nja tarü'böönö tanno oono.

<sup>10</sup> Afa ma türü tanna Masala ka anangnga no kungngo nagesse a'a kadese ku'bu kada, tatürü'böönö ya ussu ka arü'böönö ya, ömö'dü öccö tarü'bünü kide afe'de, lakiini fa ka ömö'dü könö iiröönö ara tarü'böönö nya? <sup>11</sup> Taalo ömö'dü ma tabaanya tanangnga kadese ku'bu illi ömö'dü ya illi ka anangnga ku'bu ya illi Yasu Almasiihi. <sup>12</sup> Lakiini üürü ömö'dü ara tarü'bünü ka kadese tanno ana dahaba nja fudda nja nduguri nja kee'di nja ooyo nja kaforo. <sup>13</sup> Ara linggo niini saga tussu adene, kudumma uuru kara sa köö'dö ana eege ka töyeene kara sa köö'dö ana issi, issi saga türi ta'diila ma linggo tanno ömö'dü. <sup>14</sup> Üürü tarü'böönö niini ka talingga no kütü ya, i'i ara ta'duga talingga niini. <sup>15</sup> A ömö'dü ya linggo tanno iini ka talingga no ka tafinne, taalo ara taluna faana yiini,

lakiini i'i ara toolonadene afa miini ka tigaala ka issi kungngo.

<sup>16</sup> Aaga ka eyi tiya ada taalo kussu a'da aaga ka la ma Masala, a Koronggore ya Masala ungngo ada ka oona? <sup>17</sup> Ömö'dü ya aga'da la ma Masala ya, ara Masala taga'da i'i, kudumma la ma Masala ka tinsili, aaga ka eyi tiya ada la ma Masala aaga kungngo ka la ma Masala tiya miini ya.

<sup>18</sup> Aaga fa tüsinii nanggeyi naada. Ömö'dü öccö kara tümmü eyi yiini ka ta'dara ka 'büdhülü tiya, fa kini a'baga amang kini ta'dara. <sup>19</sup> Kudumma ta'dara ma 'büdhülü tiya a taa'baga a Masala, kudumma sorne ka tiki,

"Masala mümmü kadu na 'dara no ana ünggü tammo eene."

<sup>20</sup> Iki sorne afe'de, "Uugaara ussu nanggeedi na kadu tanno 'dara no,

ka tumma ün'dügüngngö."

<sup>21</sup> Ömö'dü tafa tabbü 'daniisö ana ömö'dü, kudumma eema nye'd'e ata yaada. <sup>22</sup> Bölis üürü Apölös üürü Bütrüs üürü 'büdhülü üürü tefe ka 'dü üürü inde nja iini ka teema ma 'bitüngngö nja tiya unggunu tö'dö ya, eema ya nye'd'e yaada, <sup>23</sup> lakiini aaga ka kadu tanno Almasiihi, Almasiihi i'i ya Masala.

## 4

*Kadafinii na Almasiihi*

<sup>1</sup> Fa ka kadu kümmü angnga kada kadu ma linggo tanno Almasiihi, unngo kungngo kümmü tumma na Masala na dhorro na küdhü no unngo tafa kide. <sup>2</sup> Niimö ya asaasadene ka kadu tanno ümmü tumma na Almasiihi dhorro a'da kaduna ömö'di ya afa ka eema dhorro ya. <sup>3</sup> Taalo agu'du a'a ka oona 'do a'da aaga kara tümmü a'a, üürü kadu ma 'büdhülü könö kara tümmü a'a, dhorro taalo a'a nara tümmü eyi yeede. <sup>4</sup> Taalo eedi yeede a'doore ma niimö, lakiini taalo a'a nara tiki a'da ninsili a'a, kudumma Uugaara oogo mungngo mara tümmü a'a. <sup>5</sup> Nggeege aaga fa tapügü tumma ka ömö'di ka oona a'da küfürü uuru miini tö'dö, aaga öödhü ara Uugaara ka öö'dö. Ara sa köö'dö a niimö tiya küdhü ka 'buugu tiya lüllü ya öö'dö iini ka töyeene adhere tumma ma nanggeedi tanno kadu ko'do. Ka uuru tanno miini no ara ömö'di saga a'duga tafünüğünja ko'do niini ndama Masala.

<sup>6</sup> Nagöre eede, nanangnga a'a eyi yeede ka linggo tanno, a'a nja Apölös kudumma aaga, amang kada tessu teema tumma miini, "Aaga fa takikü iïye co ku'b'ba aaga tadheedhe ka tumma tanno ka sorne no ko'do." Ömö'di könö tafa tabbü 'daniisö ana ömö'di könö, ara aaga kafa ka könö. <sup>7</sup> Mada i'i yungngo anangnga o'o ka tambanajaana ku'bu nja kadu? Taalo Masala oogo

mungngo manangnga eema ya o'o nye'd'de? Aminna agu o'o nabbü 'daniisö afa taalo o'o na'duga adha?

<sup>8</sup> Asa aaga tüüsü, aaga tana eema, asa aaga ta naguugaara, aaga tafa kädi, kasaasa unngo a'da aaga ta naguugaara dhorro amang kädi tosso ka tauugaara nja aaga. <sup>9</sup> Niji a'a a'da Masala manangnga unngo kada kadafiini tanno ka kadu keere afa maaja ka tümmününja ka inde 'bïïni kungngo, kudumma iïdi ka tümmünü eyi yïidü ka kadu ma modolo ku'bu nja kadhangga nja kadu. <sup>10</sup> Kanagaaga unngo ka üdü ma Almasiihi, aaga ta'dara ka Almasiihi, unngo tagi'di aaga tana türü. Kadu kïndhigü aaga ko'do, kadaana unngo kalama. <sup>11</sup> Ta'bïtingngö aleefe iïre tagu unngo nja tenege, en'di titaalo kädi ka oona, unngo tabbü adene, a nöö'di titaalo kädi ma tanna kide. <sup>12</sup> Ungngo tadhügürü a linggo ana iisine tanno iïdi. A kadu talinggo unngo, unngo tanangnga baraka eene, illi unngo kütü ka tambaanya a tidhi oona ku'bu. <sup>13</sup> Kamidhi unngo illi unngo ka ki'döönö, unngo tafeene nja kadu tanno nyoro ka 'büdhülü, a kadu ma 'büdhülü tanu kädi.

<sup>14</sup> Taalo a'a narigiri tumma no a'da nangnga modolo kagu aaga, lakiini a'a nalaana aaga kada laala tiya eede ka asaasa eege ya.

15 Üürü katalaana kungngo ada kö'dö na alif kada'baaga ka Almasiihi, taalo kupupa naada kadhabbu ka Almasiihi Yasu, a tumma ma İnjili tanno eede köö'dö iini aaga no. 16 I'i yungngo eede ka asaasa a'da aaga takinya a'a. 17 Tumma no eege kungngo eede ka kürünü Timosaws, kada 'bii'bala tiya eede ka asaasa i'i dhorro ya kidha ma Uugaara. I'i yungngo ara tadirina linggo neede nja taneene tanno eede aaga ka Almasiihi, afa ma tiya eede ka talaana kadu ka nakaniisa ka na'buugu koona nye'd'de kungngo. 18 Kadu könö ana kada ka'diniga oona coo'do, kudumma eene kiki kide a'da taalo a'a nara tö'dö kada. 19 Lakiini ara a'a tö'dö kada kannaa areere ka Uugaara ka niisö, ara a'a tö'dö tussu niimö ya nagaaga tanno 'dinigi oona coo'do kadeema no, lakiini nasaasa a'a tussu türü neene. 20 Lakiini tauugaara na Masala taalo a tumma lakiini a türü. 21 Öjö i'i yungngo ada kasaasa? Nöö'dö kada a tama'daka alla a koronggore ma tasaasa nja ta'diila?

## 5

### *Temelö*

1 Tumma ka nyala ku'bu 'do a'da temelö kungngo ada ka söödö, temelö afa ma tanno kitaalo ka kadu na taalo kussu Masala no, ömö'di könö afüngngö nja aka tammo pupa tiya iini. 2 Aaga tüütü kabbü na'dugiisine aaga ta'diniga

oona coo'do! Taalo a'diila ada kara tafara amang kada tasoro ömö'di ya alinggo eema afa ma tiya kada ka söödö? 3 Salla a'a saga titaalo a tuu'da, lakiini a'a nungngo ada ka söödö a koronggore nagümmü a'a ömö'di ya kalinggo tumma no afa a'a nungngo kada ka söödö. 4 Kada kara temmi, a'a tanna kada ka söödö a koronggore ana eere tiya Uugaara Yasu a'a taneene nja aaga a koronggore nja türü tanno Uugaara tiya aja Yasu kungngo aja. 5 Aaga ümmünü ömö'di ya a Ebliisi, amang ka tuu'da tanno iini taama, a koronggore yiini toolonadene ka uuru tanno Uugaara. 6 Tabbü na'dugiisine naada taalo ka'diila, taalo aaga kussu a'da 'bandigüdü ara tanangnga elö ka tüüfü nye'd'de kungngo? 7 Aaga dhifigi tigüdü ma illi mo co, amang kada ta kadu tanno issi nja tanno insili no a'da taalo tigüdü kide, afa ma aaga 'bitüngngö. Kudumma Almasiihi i'i ya dhünggü ma Taanyara ma Tada'da, agatendhe ka üüdü ma angnga. 8 Kada afa ka taanyara, lakiini taalo a tigüdü tanno illi mo, ma toroko nja tam'baga, lakiini a tefe ka 'di tammo issi no, ya a'diila nja timin'da.

9 Narigiri ada a'a aaga ka waraga tiya eede, a'da aaga tafa taneene nja kadu tanno atemelö no. 10 Taalo a'a niki a'da kadu ma

'büdhülü tiya na katemelö no allogo no, kanyoro, kanyooro, alla kümmü eema ma namasala. Üürü nggeege ara aaga tagöö'dö kürö ndama kadu ma 'büdhülü.<sup>11</sup> Lakiini 'bitingngö a'a narigiri waraga aaga a'da aaga tafa taneene nja ömö'dü tiya iki a'da i'i ya örre, assa ka füngngö ana iiya alingga eema ya toroko ya nja tiya ümmü eema ma namasala ya nja teelaana ma kadu nja take ka ngeeli nja tiya anyooro ya, ömö'dü afa ma tiya miini ya aaga fa temmi nja iini ma tagu eema.

<sup>12</sup> Taalo a'a nama tümmü kadu na taalo kama kaniisa no? Taalo aaga kungngo kara tümmü kadu na ka teene miini no?<sup>13</sup> Kudumma kadu tanno kürö miini no, ara Masala tümmü eege, "Aaga asoro ömö'dü ya toroko ya kada ka söödö."

## 6

### Tasigi kadu ma kaniisa

<sup>1</sup> Üürü nüümö ungngo ömö'dü tököönö ana kada nja tööje ara tana rüsü ma co tasigi i'i kidha ma kadu tanno taalo kussu Masala no nya, lakiini i'i adha ya ara co tasigi kidha ma kadu tanno insili no?<sup>2</sup> Taalo aaga kussu a'da kadu na insili no eege kungngo kara tümmü kadu ma 'büdhülü? A kada kara tümmü kadu ma 'büdhülü 'dee, taalo aaga kara tambaanya tümmü nüümö ya dhilli ya?<sup>3</sup> Taalo aaga kussu a'da ara angnga

tahükümü kadhangga? Üürü ara angnga tahükümü kadhangga dee, ara angnga tagambaanya ma tahükümü eema ma 'büdhülü tiya.<sup>4</sup> Üürü tumma kungngo ada ka söödö ma eema afa ma tiya, aaga emmi nja kadu ma kaniisa salla na kadu ka titalo kümmü eege ka ta'dara no ka kaniisa no.<sup>5</sup> A'a nadirina tumma no aaga amang ka modolo tagu aaga. Taalo ömö'dü ya 'dara ya ka tambaanya tindinaana tumma ka kadu ku'bu kada nagöre?<sup>6</sup> Lakiini agala ömö'dü ka 'duga örre yiini aco tasigi i'i kidha ma kadu tanno taalo kamma ka Masala no.

<sup>7</sup> Tumma dhorro aaga tasigi ajeene ka nanggeyi tanno ada, afeene afa aaga ka ki'di 'do taalo a'diila ada katidhi oona ku'bu ka tüüninja ku'bu. A'diila ada kara tamma kada nyoorodene?<sup>8</sup> Lakiini aaga ka eyi tiya ada kagala aaga ka tüünii ada kadu naada ku'bu, aaga tanyooro nagöre naada.

<sup>9</sup> Taalo aaga kussu a'da kadu na tüünii ada aaga ku'bu no taalo kara takarna ka tauugaara ma Masala? Aaga fa tiisini nanggeyi naada, alla ka temelö nja kadu tanno ümmü masala ma 'büdhülü no nja kadu tanno oroko no nja nagiide tanno temelö no, nja nageldo,<sup>10</sup> alla kanyooro no nja tanno allogo no nja tanno ake ka ngeeli no nja tanno eela kadu no nja tanno arumuru

eema ka kadu no, taalo kara co ka tauugaara tanno Masala.<sup>11</sup> Kadu könö ana kada kütü kafeene nggeege, lakiini aaga katanggala, aaga tinsili eema ya titaalo ada ka oona ana eere ma Uugaara Yasu Almasiihi, a Koronggore ma Masala tammo aja.

### *Temelö na toroko no*

<sup>12</sup> "Eema nye'd'de a'diila nja a'a," lakiini taalo eema nye'd'de adho ka fñi. "Eema nye'd'de a'diila ana a'a," lakiini taalo a'a nara tafa ka niimö ünni tadasaga ana a'a.<sup>13</sup> "Kuri ama eedi, eedi ama kuri," lakiini Masala oogo mungngo mara taga'da eege ïn'dili kudumma tuu'da taalo kama ma eema ya toroko ya, lakiini eege ama Uugaara, Uugaara ama tuu'da.<sup>14</sup> A Masala oogo mungngo manangnga Uugaara ka fiki'dö ka inde, mara tanangnga angnga ka fiki'dö tekere a türü tanno oono.<sup>15</sup> Taalo aaga kussu a'da tuu'da naada ka unggodho nja Almasiihi? 'Bïtingngö 'dee ara a'a ta'duga tuu'da na Almasiihi nanangnga ka aka tammo temelö mo? Taalo ata'diila!<sup>16</sup> Alla taalo aaga kussu a'da ömö'dü ya atarefe nja madatemelö ya, a tuu'da neene ta unggodho? Sorne iki, "A kadu tanno eera no, ara tuu'da neene ta unggodho."<sup>17</sup> A ömö'dü ya ara tamma'da ka Uugaara ya, a koronggore yiini ta unggodho nja tiya iini.

<sup>18</sup> Aaga arünö ka temelö na toroko no koona. Kudumma tatoroko tanno ömö'dü ka talingga no, kungngo kürö ma tuu'da, lakiini ömö'dü ya afüngngö nja aka a nyoro ya i'i agüünö ada tatoroko ka tuu'da tanno iini.<sup>19</sup> Taalo aaga kussu a'da tuu'da naada eege ka la ma Koronggore tiya Insili ya anna kada ka oona, yaada ka'duga ka Masala? A tuu'da naada no taalo ka ma eyi tiya ada unggodho aaga.<sup>20</sup> Oogo mungngo mana aaga mafaana, aaga ïndhigü Masala ko'do ka tuu'da tanno ada.

## 7

### *Tarna*

<sup>1</sup> A tumma nüüdü ka tunggu waraga a'a miini no, a'diila a ömö'dü afa tarna.<sup>2</sup> Lakiini kudumma füngngö kadhoonyo ün'düngngö, fa ka ömö'dü arna aka miini, aka tarna nyori yoono.<sup>3</sup> A nyori tamana eema aka tammo iini yoono ka asaasa ya, aka tamana eema ya nyori ka asaasa ya iini.<sup>4</sup> Tuu'da na aka na nyori eege kamiini, a nyori tekere tuu'da niini na aka tammo iini.<sup>5</sup> Ömö'dü tafa ta'dükü tuu'da niini a tööje illi ada kara timi'di tumma ma uuru töccö, amang kada töödhi ka teema nja Masala aaga sa ka tapadaga ka taneene ma tanyori afe'de kudumma Eblisi ara tanggaaga tiisini aaga kudumma ada ka

titaalo kümmü nanggeyi naada ma tidhi oona ku'bu. <sup>6</sup> A'a nadirina tumma no aaga, lakiini taalo a'a na'buna aaga kide, lakiini ka teemaana kide. <sup>7</sup> Nasaasa a'a kadu nye'd'de a'da ka tafeene afa a'a, lakiini Masala masümünaana eema ka kadu ku'bu kampanjaana ku'bu, ömö'di könö tafiqi kungngo aya tafiqi kungngo.

<sup>8</sup> A'a niki a kadu tanno taalo karna no nja iiya ma nagüüme, a'diila nggeege eene kara tüütü afa ma a'a kungngo. <sup>9</sup> Lakiini üürü eege taalo kambaanya tümmü nanggeyi neene ya, fa kene karna kudumma tarna ka'diila ka tagii'bi tagu'du ajeene atemelö.

<sup>10</sup> A kadu na arna no ara a'a tiki eene, taalo ndama a'a lakiini Uugaara miki a'da, aka tafa tadheene nja nyori tiya oono. <sup>11</sup> Üürü madheene nja iini, mütü mafa tarnadene üürü masaasa mapadaga ka nyori tiya oono. A nyori tafa tadheene nja aka tammo iini.

<sup>12</sup> A türeene ma kadu, ara a'a tiki eene, a'a taalo na Uugaara, üürü örre ma angnga ana aka, aka taalo mümmü tumma ma kaniisa, masa ka asaasa taneene nja iini, afa tapa kono. <sup>13</sup> Üürü aka ma kaniisa mana nyori taalo ümmü tumma ma kaniisa, assa ka asaasa taneene nja oono mafa tadheene nja iini. <sup>14</sup> Nyori ya taalo amma ka kaniisa ya, insili ka aka tammo iini, aka mitaalo mamma ka kaniisa

mo, minsili ka nyori tiya oono, üürü taalo nggeege a laala yeene tanyoro a'da kinsili. <sup>15</sup> Üürü ömö'di ya taalo amma ka kaniisa assa asaasa tadheene nja tööje ya, fa kini adheene ka tumma örre nja inye taalo nüümö ma timi'di eege ka oona, lakiini Masala oogo mungngo magümmünü aaga a'da aaga taneene a ta'diila. <sup>16</sup> Nussu o'o nya a'da ara o'o na aka tammo amma ka Masala mo a'da ara o'o toolona nyori yüdü? Ömö'di ya amma ka Masala nussu o'o nya a'da ara o'o toolona aka müdü mitaalo mamma ka Masala mo?

<sup>17</sup> Nggeege fa ka ömö'di aneene taneene na Masala ka tagümmünü i'i iini no, tumma no eege kungngo eede ka talaana kadu iini ka nakaniisa nye'd'de kungngo.

<sup>18</sup> Ömö'di ya Masala ka tagümmünü i'i a'da atendhe ya afa tatendhe afe'de. Ömö'di ya taalo aga tendhe a'da magümmünü Masala i'i ya, afa tatendhe. <sup>19</sup> Tatendhe taalo ka nüümö, a titalo ka tendhe taalo ka nüümö. Tümmü tumma na Masala eege kungngo kasaasadene.

<sup>20</sup> Fa ka ömö'di ütü ka taneene taneene na Masala ka tagümmünü i'i iini no. <sup>21</sup> Üürü naga tasaga o'o ka uuru tanno üdü ka tagümmünüdene no fa tadinigögö miini lakiini üürü o'o niji fiin'i ma tahürra a linggo iini. <sup>22</sup> Kudumma ömö'di tiya Uugaara ka tatümmünü i'i a'da a tasaga

i'i ya hurra kidha ma Uugaara, afe'de nja ömö'di tiya Almasiihi ka tagümmünü i'i ya hurra, i'i ya tatasaga tiya Almasiihi. <sup>23</sup> Masala mana aaga manangnga faana miini ku'bu, aaga tafa ta kasaga ma kadu. <sup>24</sup> Nagöre eede, aaga fa ka ömö'di ütü ka taneene tanno iini afa ma tiya Masala ka tagümmünü i'i ya kungngo.

*Kadu na iiya ka titaalo kene nja iiya ma nagüümme*

<sup>25</sup> Lakiini tumma ma laala tiya lömü ya taalo karna no taalo kö'dönja a'a ndama Uugaara meene, lakiini ara a'a tadiri tumma kada ömö'di ya 'bangnga ma Uugaara ka tamma kini ana eedi ya dhorro ya. <sup>26</sup> A'a niki a'da ka tatoroko ma 'buugu tiya 'bitingngö ya, ara ta'diila ka ömö'di kara tüü kungngo. <sup>27</sup> Üürü narna o'o aka fa tawwa fiinii ma tadheene nja oono. Üürü taalo o'o narna aka ya, fa tarna aka. <sup>28</sup> Üürü narna o'o taalo o'o natoroko, üürü tölömü marnadene taalo matatoroko, lakiini kadu na arna no kara taluna dhügürü ka 'büdhülü tiya, i'i yungngo eede ka titaalo nasaasa a'da takete kide.

<sup>29</sup> Nagöre eede, a'a niki aaga a'da, 'buugu 'bitingngö anda kete. A kadu tanno ana iiya no, kafeene afa ma iiya ka titaalo kene kungngo. <sup>30</sup> A kadu na fara no tafeene afa taalo kafara, a kadu na dhodho no, a kadu na ana eema no kafeene afa ma eema ka titaalo kene. <sup>31</sup> A kadu na linggo eema ka

'büdhülü tiya, kafeene afa taalo kalinggo, kudumma 'büdhülü tiya ara titaalo.

<sup>32</sup> Taalo a'a nasaasa aaga ka tinigöögö. Ömö'di ya taalo arna no ana iiye ka linggo ma Uugaara, amang ka Uugaara tamma kene ana eedi dhorro. <sup>33</sup> Ömö'di ya arna ya atinigöögö ma eema ma 'büdhülü, amang kini tanangnga aka miini ka'diila nja iini. <sup>34</sup> I'i asümününjaana ku'bu, aka mitaalo marnadene mo nja 'badaada tammo tölömü mo, katinigöögö ma linggo ma Uugaara amang kono taluna tinsili ma tuu'da nja koronggore. Lakiini aka marnadene mo, matinigöögö ma eema ma 'büdhülü, moono kanangnga nyori ka'diila nja oono.

<sup>35</sup> A'a nadiri tumma no ma ta'diila tanno ada, taalo meede ka imi'dina aaga ku'bu, lakiini amang kada tüünii eema ya adho ka fiinii ya, aaga talinggo ada Uugaara a'da taalo eedi eera.

<sup>36</sup> Üürü ömö'di iji eyi yiini taalo atambaanya tindhígí 'bala miini ka tagümmünü oogo ku'bu mo, üürü atügöögö, fa kini arna, i'i taalo üünii nüümö ya toroko ya. <sup>37</sup> Lakiini ömö'di ya indinaana taneene ma eyi tiya iini ku'bu ya, aneene ma eyi tiya iini, taalo arna 'bala ma tölömü mo. Ömö'di ya üünii nüümö ya a'diila ya. <sup>38</sup> Nggeegé ya ömö'di ya arna ya a'diila, a ömö'di ya ütü a'da taalo arna 'bala ya, agala ka'diila.

<sup>39</sup> Aka mimi'di adene a tarna ka nyori tiya oono kaleefe ka 'dī. Kini kara teyi ya, möödhī ma eyi tiya oono marna ömö'dī yoono ka asaasa i'i kidha ma Uugaara. <sup>40</sup> Lakiini nijöögö a'a a'diila oono kara tütü a'da taalo marnadene, niki a'a kide a'da Koronggore ma Masala ungngo eede ka oona tekere.

## 8

### *Eema ya aranja ka eema ma namasala ya*

<sup>1</sup> Lakiini eema ya kadu karaana a namasala, kussu angnga eema ya. Tussu eema ka anangnga ömö'dī ka tan'dinigi oona coo'do, a tasaasa eege kungngo ka ing-giri kadu. <sup>2</sup> Ömö'dī ya ümmü eyi yiini a'da i'i ya ussu niimö ya, taalo ara tussu niimö afa yiini kara ka tussu ya kungngo. <sup>3</sup> Lakiini ömö'dī ya asaasa Masala ya, oogo mussu i'i.

<sup>4</sup> Lakiini kudumma ma kuri ma eema tiya aranja eema ma namasala. Kussu ungngo a'da eema na namasala taalo a niimö ka 'büdhülü, ungngo tussu a'da mitaalo Masala illi ma unggodho. <sup>5</sup> Üürü namasala kungngo ka 'dotombo'do nja 'büdhülü, afa ma kadu katiki, salla üürü namasala ka dhabbu nja naguugaara, <sup>6</sup> lakiini ana ungngo ya, Masala minggide ma unggodho Pupa, oogo magalinggo eema nye'de, ungngo taneene ma tafünügü oogo

ko'do, Uugaara inggide unggodho Yasu Almasiihi, eema nye'de kö'dö ana i'i, ungngo taneene ana i'i.

<sup>7</sup> Lakiini taalo kadu nye'de kussu tumma no, kadu könö kamma ka namasala ma 'büdhülü ta'bütängö, kaleefe tagu uu'da moono tuu'da ma taranja ka eema ma masala ma 'büdhülü kümmü nanggeyi neene a'da eege kagi'di ka nyoro. <sup>8</sup> Lakiini taalo eema ma taguri i'i yungngo ara tunggu angnga kidha ma Masala, angnga saga taguri taalo angnga kara tö'dö keere a niimö, angnga saga taalo kaguri taalo angnga katümmü niimö kide.

<sup>9</sup> Lakiini aaga adinö ko'do ii'di tahürra naada takara ka kadu tanno agi'di no.

<sup>10</sup> Kudumma ömö'dī tiya taalo ümmü Masala dhorro ka tasala o'o naguri ka la ma masala ma 'büdhülü, taalo ara tümmü rüsü ana eedi aguri tekere? <sup>11</sup> Tussu eema nüdü no, eege kungngo kanangnga örre yüdü ka tagi'di ya Almasiihi ka teyi ka üdü miini ya ka taama.

<sup>12</sup> Kada kadiüni tatoroko ana nagöre tanno ada, aaga tici nanggeedi neene na agi'di no, nggeege aaga küüni tatoroko ana Almasiihi. <sup>13</sup> Üürü kuri i'i yungngo ara tafa ka örre tiya eede aama, taalo a'a nara tagu uu'da ta'billi, ii'di a'a tanangnga örre yeede ka 'dinggö ka tatoroko.

## 9

*Kadafiini*

<sup>1</sup> Taalo a'a na hurra? Taalo a'a na tafiiñi? Taalo a'a nadinö ka Uugaara tiya aja Yasu? Taalo aaga ka kadu ma linggo tanno eede ka Uugaara? <sup>2</sup> Üürü taalo a'a na tafiiñi ma kadu könö ya, a'a na tafiiñi ana aaga, kudumma ada kada hitimi ma tafiiñi tanno eede ka Uugaara.

<sup>3</sup> A tumma no eege kungngó eede ka tümmöönö ka eyi tiya eede co kadu tanno ümmü a'a no. <sup>4</sup> Taalo ungngó kama tagu eema angnga tooye? <sup>5</sup> Taalo ungngó kama ta'duga aka ma amma mo ka Masala nja ungngó afa türeeene ma kadafiini nja nagöre tanno Uugaara nja Bütrüs? <sup>6</sup> Alla nja Barnaba unggodho ungngó tumma dhorro kitaalo kiidí, illi ungngó taluna kuri ma eyi tiya iiidí? <sup>7</sup> Mada i'i yungngó alinggo tasigira ndama eyi tiya iini? Mada i'i yungngó adiní ki'bim'bi assa ka taalo aguri? Mada i'i yungngó aguri a ki'biini assa ka taalo ooye siiga miini?

<sup>8</sup> Tumma neede no ka tumma ma tadü'd'dü? Taalo seriye iki afe'de? <sup>9</sup> Sorne ma seriye ya Müüsa iki a'da, "Aaga fa takumu kodha ya ka 'deeli ya ka nüünö, kini ka tödhe migile." Kagu'du tumma ma nagodha Masala ka oona? <sup>10</sup> Taalo i'i ya eema dhorro ma tümmöönö kaja? <sup>11</sup> Ii, arigirinja ka

Sorne ka üüdü ma angnga a'da amang ka ömö'dü tiya aleele ya, taleele ku'bu ömö'dü ya ödhe ya, tödhe kalinggo nggeege kündhigü uuru meene kara tosso ka migile ateera meene.

<sup>11</sup> A kiidí ka tadiní ada eema ma koronggore ya a'diila ya kada ka oona, ara tadhabbu kiidí kara tara eema ma 'büdhüü kada? <sup>12</sup> Üürü kadu könö kama eema kada 'dee, taalo ungngó kama ta'duga ya dhabbu ya? Lakiini taalo ungngó kagalinggo nggeege, lakiini kidhi ungngó nanggeedi ku'bu amang kiidí tafa taga'da fiini ma tumma ma Almasihi. <sup>13</sup> Taalo aaga kussu a'da kadu na linggo ka la ma Masala no, kagu eema ma faana miini, a kadu na linggo ka misi ma tirri no kosso ka eema tiya amananja ka misi ma tirri? <sup>14</sup> Nggeege yungngó Uugaara ka tiki a'da kadu na eema tumma ma sorne no kaguri kide.

<sup>15</sup> Lakiini a'a taalo naginggo nggeege, na a'a taalo narigiri tumma no ma tasaasa nüümö ma eyi tiya eede. A'diila kede kara teyi a'da taalo ömö'dü ma tafaga a'a keere ka abbü 'daniiüsö. <sup>16</sup> Üürü a'a nadünnü tumma ma Masala, taalo a'a nara tabbü 'daniiüsö, kudumma eede ka taga'bununja kide. Am'ba kede eede ka titaaloo nadünnü tumma ma Masala. <sup>17</sup> Üürü a'a neema tumma ma eyi tiya eede ya, ara

a'a ta'duga faana, üürü taalo  
a'a nadünnü tumma ndama  
eyi tiya eede ya, a'a nalinggo linggo na ümmününja  
a'a no. <sup>18</sup> Faana yeede i'i  
ya iiye? Faana yeede a'da  
nadünnü tumma ma İnjili  
a'da taalo faana kide naadha  
ka faana tiya eede ka linggo  
ma tumma ma İnjili.

<sup>19</sup> Naneene a'a ka eyi tiya  
eede kidha ma kadu, lakiini  
a'a nümmü eyi yeede kada  
tasaga ma kadu nye'd'e  
amang kede tö'dö a kadu  
kadhabbu. <sup>20</sup> Nümmü eyi  
yeede kada taga Yahüdü  
ka Yahüdü kidha. Amang  
kede tö'dö ana Yahüdü.  
Nümmü eyi yeede kidha ma  
kadu ma seriye ka tamö'di  
ma seriye, (a'da nitaalo  
a'a ka niisö ma seriye,)  
amang kede tö'dö a kadu  
ma seriye. <sup>21</sup> Naneene

a'a nja kadu tanno taalo  
kamma ka seriye no afa  
meede ka titaalo namma ka  
seriye kungngo, amang kede  
tö'dö a kadu tanno taalo  
kanna ka seriye no, (a'da  
seriye ungngo eede, namma  
ka seriye tiya Almasiihi).

<sup>22</sup> Naneene a'a nja kadu  
tanno agi'di no, afa meede  
ka tagi'di kungngo, amang  
kede tö'dö a kadu tanno  
agi'di no, na a'a teema  
nye'd'e ka kadu kidha  
amang kede toolona könö.

<sup>23</sup> A'a nalinggo eema ya ka  
üdü ma tumma ma İnjili,  
amang kede tosso ka eema  
miini ya a'diila ya.

<sup>24</sup> Taalo aaga kussu a'da  
kadu no ambrinanago

no, kiisö in'dili, lakiini  
ökönö unggodho ara tadhe  
eene? Aaga iisö afa  
miini kungngo amang  
kada ta'duga ndalembö.  
<sup>25</sup> Ömö'di ya ambrinanago  
ya idhi oona ku'du ma eema  
nye'd'e, kudumma ma  
ndalembö kara tatangga'da.  
Lakiini ungngo ka iisö  
kudumma ndalembö no ara  
tütü ta'billi. <sup>26</sup> Taalo a'a  
niisö weerö ün'dügüngngö  
a'da taalo a'a niji niimö  
miini, taalo a'a neema  
koro'bo nabbü 'dolodho  
ün'dügüngngö. <sup>27</sup> Lakiini  
a'a napusu ada oona neede  
kide nüünü tadasaga iini,  
kede ka tagadünüğü tumma  
co a kadu könö amang kede  
tafa tafeene nja kadu tanno  
ütü ka teene no.

## 10

*Talaana ma Israyil ka  
dhüle*

<sup>1</sup> Taalo a'a nasaasa a'da  
aaga tüürü nagöre eede,  
kafaafa ma angnga nye'd'e  
kaganna ka tülüögü ka  
tüm'bü kada'da to eege  
in'dili. <sup>2</sup> Eege in'dili  
kakambeesedene ka niisö  
ma Müüsa ka tülüögü nja  
to. <sup>3</sup> Eege in'dili kagu kuri  
ma koronggore ya unggodho  
ya. <sup>4</sup> Eege in'dili kungngo  
kakooye ndama koronggore  
tiya unggodho ya, ndama  
'dokon'da ma koronggore  
ma unggodho nja eene,

a 'dokon'da mo Almasiihi  
i'i ya miini. <sup>5</sup> Lakiini  
taalo Masala mamma ka  
tadhabbu meene, kagiri-  
nadene ka dhüle uu'da

neene tasananjaana ku'bu ka dhiile.

<sup>6</sup> Eema ya nye'd'de agalinggo adene, amang kaja tussu iini angnga tafa tasaasa eema ya toroko ya, afa meene ka talingngo kungngo. <sup>7</sup> Aaga fa tümmü eema ma namasala afa kadu könö katümmönö ya, afa ma sorne ka tiki a'da, "Kemmi kadu kagu eema kooye kassa kafiki'dö kalinggo eema ma temelö."

<sup>8</sup> Ungngo tafa ta temelö afa ma kadu könö ka temelö, könö ana kene taaya na alif kukumu ömö'di kafünü iidoona ka uuru ka ungodho. <sup>9</sup> Kada fa taka'b'ba Almasiihi ka oona afa kadu na ka'b'ba i'i ka oona a nöönii tagirina eege no. <sup>10</sup> Aaga fa ta'digineene afa kadu könö ka'digineene, a tadhangga ma inde kagirina eege.

<sup>11</sup> Eema ya agüüni adene ana eege ya nye'd'de amang kene tussu iini, sorne iki a'da amang kini talaana angnga, angnga na ürüünü ka ndafaradene ana angnga no. <sup>12</sup> Ömö'di ya ümmü eyi yiini a'da i'i a'düngnge ana ko'do ya, fa kini a'düngnge dhorro ii'di ta'dünggö. <sup>13</sup> Taalo ta'b'badene no kara tüünii niimö ana aaga kada nakömö'di, Masala ma'dila taalo mara tafa kada aaga ta'b'badene na dhiiri no, lakiini mara tala aaga ka fiinii ma takara tö'dö kürö ndama iini, amang kada tidhi oona ku'bu.

<sup>14</sup> Nggeege nagöre eede, aaga fa takete ka eema ma namasala. <sup>15</sup> A'a neema nja aaga kada kadu tanno 'dara no, aaga asaana tumma neede ka teema no ku'bu. <sup>16</sup> Taalo ker'de ma baraka maaja kanangnga baraka kide mo oogo mungngo ma tosso ka eriidö tiya Almasiihi? A miteene maaja ka'düsünü mo taalo tosso ka tuu'da tanno Almasiihi eege kamiini? <sup>17</sup> A tadhabbu tanno aja no, tuu'da naaja ka ungodho kudumma miteene ma ungodho angnga nye'd'de tosso ka miteene ma ungodho mo.

<sup>18</sup> Aaga iirri laala ya Israyil, taalo kadu na agu eema ma tirri no eege kosso ka müsi ma tirri? <sup>19</sup> A'a niki a'da minna? Eema ma namasala ya 'dee taalo a niimö alla niimö ya aranja ka eema ma namasala ya i'i yungngo a niimö? <sup>20</sup> Kaw, niimö ya aranja ka eema ma namasala ya, taranja na nagana'bu taalo na Masala, nikiri a'a ka titaaloo nasaasa a'da aaga tosso kide nja nakana'bu. <sup>21</sup> Taalo aaga kara tambaanya tooye ker'de ma Uugaara nja ker'de ma nakana'bu, taalo aaga kara tosso kagu eema ka tarabeesa nja Uugaara nja nakana'bu. <sup>22</sup> Ara angnga tasaasa Uugaara kana kirimi? Angnga kana türü angnga tagii'bi i'i?

*Tahürra ma ömö'di tiya amma ya*

<sup>23</sup> "Angnga kama tüünö eema in'dili," lakiini taalo eema nye'd'de a'diila nja angnga. "Eema nye'd'de a'diila," lakiini taalo eema nye'd'de ara takü'di angnga ku'bu. <sup>24</sup> Taalo ömö'di öccö tisi ka eema ma eyi tiya iini keere, lakiini fa kini isi ka eema ma kadu töccö afa miini kungngo.

<sup>25</sup> Aaga agu uu'da na kadu kanadene iini ka mansala no, aaga tafa tindineene kudumma niinö ma nongnge. <sup>26</sup> Sorne iki, "Büdhülü ya Uugaara nja eema ya inggide ya nye'd'de."

<sup>27</sup> Üürü ömö'di ya taalo amma ka Masala ya, ümmünü aaga aaga co, aaga agu niinö yiini kara tanangnga aaga ya, aaga tafa tindineene, kudumma niinö ma nongnge. <sup>28</sup> Lakiini ömö'di könö kara tiki aaga a'da, "Eema ya aranja ka eema ma namasala ya," aaga fa taguri, kudumma ömö'di tiya adirina aaga nja niinö ma nongnge. <sup>29</sup> Taalo a'a niki a'da eedi yaada lakiini eedi ya ömö'di könö, aminna agu eedi ya ömö'di könö afaga a'a keere ka niinö ma eedi tiya eede? <sup>30</sup> Üürü nanangnga a'a ta'diila a Masala nassa kaguri, aminna agu kadu könö kamidhi a'da namana a'a ta'diila a Masala?

<sup>31</sup> Üürü kagu aaga eema aaga tooye nja niinö tiya ada ka talingga ya, aaga linggo eema nye'd'de

a tüdhindhi ma Masala. <sup>32</sup> Aaga fa takara ka Yahüdü kidha nja kadu ya Yünan nja kaniisa tammo a Masala. <sup>33</sup> Lakiini aaga aneene afa ma a'a kungngo, nasaasa a'a kadu ka'diila ana eema tiya eede ka talingga ya nye'd'de kungngo, taalo a'a nawwa niinö ma eyi tiya eede, lakiini a'a nawwa ta'diila a kadu kadhabbu amang kene toolonadene.

## 11

<sup>1</sup> Aaga ümmü fiinii yeede afa meede ka tümmü fiinii ya Almasiihi kungngo.

### Taküdhü üüdü

<sup>2</sup> Nafünüğü aaga ko'do, kudumma ada ka tagüigi a'a ka eema nye'd'de, aaga tafa ka talaana tanno eede ka tümmünü aaga no. <sup>3</sup> Lakiini a'a nasaasa a'da aaga tessu a'da Almasiihi i'i ya üüdü ma ömö'di ya a miide ya, ömö'di ya miide ya i'i ya üüdü ma aka, a Masala oogo ma üüdü ma Almasiihi. <sup>4</sup> A miide ka fara ka Masala nja iini ka teema tumma ma tane'bi assa ka taküdhü üüdü ya, i'i ya midhi üüdü yiini. <sup>5</sup> A aka mafara ka Masala nja oono ka teema tumma ma tane'bi a'da taalo maküdhü üüdü ya, oogo ma midhi üüdü yoono mafeene afa moono ka takemme üüdü kungngo. <sup>6</sup> Üürü taalo aka ma küdhü üüdü yoono, fa kono masiimi awu yoono, lakiini üürü ara tamodolo ka aka ka temmedene nja

ka tasiimi awu ya, fa kono ma küdhü üüdü yoono. <sup>7</sup> Taalo a'diila nja ömö'dü ya miide ya ka taküdhü üüdü, kudumma iini ka ta Koronggore nja tidihindhi ma Masala aala tidihindhi noono ku'bu, illi aka mala tidihindhi ma miide. <sup>8</sup> Taalo ömö'dü ya miide ya ö'dö ndama aka, lakiini aka mö'dö ndama ömö'dü ya miide ya. <sup>9</sup> A Masala taalo madina ada miide a aka, lakiini oogo madina ada aka a miide. <sup>10</sup> Nggeege kudumma kadhangga, aka mama taküdhü üüdü yoono, taneene ma tamma eege kamiini. <sup>11</sup> Kidha ma Uugaara ya, taalo aka ma taneene unggodho oogo a'da taalo miide kono, a miide taalo ara taneene unggodho i'i a'da mitaalo aka kini. <sup>12</sup> Üürü aka mö'dö ndama miide ya, aka oogo mungngó meene miide, lakiini eema nye'd'de ö'dö ndama Masala. <sup>13</sup> Aaga iiröönö unggodho aaga, a'diila ka aka kono kara tafara ka Masala ana üüdü ku'bu? <sup>14</sup> Taalo tafiigi ma taneene kakalaana aaga ka eyi tiya ada a'da a modolo ka ömö'dü ya miide ya ka tinggiri awu yiini, <sup>15</sup> lakiini a'diila ka aka kara tinggiri awu yoono? Kudumma Masala manangnga awu oono maküdhü üüdü iini. <sup>16</sup> Üürü ömö'dü inggide asaasa tanu ka tumma tanno ya, taalo taneene naaja eege kungngo, itaalo taneene ma nakaniisa tanno Masala eege

kamiini.

<sup>17</sup> Lakiini tumma neede ka tirina aaga no, taalo a'a nara tindhig'i aaga ko'do, temmi naada no, taalo kara tö'dö keere a niimö tiya a'diila ya, lakiini kara tö'dö a tatoroko aaga. <sup>18</sup> Naföönyö a'a ka dhidha a'da ada ka temmi ka kaniisa aaga tasümünü njaana ku'bu, na a'a tamma kide idhilli. <sup>19</sup> Timin'da tumma na toroko no tanna kada ka söödö, amang ka kadu tanno ümmü Masala dhorro no tessu adene, <sup>20</sup> a kada kara temmi ya, taalo aaga kö'dö tagu kuri ya Uugaara. <sup>21</sup> Ömö'dü tagu kuri ma eyi tiya iini ara iire kagu kadu öccö, anno taaya ka ngeeli. <sup>22</sup> Taalo nöö'dü kada ma taguri kide, aaga tooye kide? Alla aaga kamidhi kaniisa ma Masala, aaga tanangnga modolo kagu kadu no eema ka titalo kene no? Ara a'a tiki aaga nya? Ara a'a tafünügü aaga ko'do ka eema tiya? Kaw.

*Kuri ma taamu ya Uugaara ya eere ya*  
(Matta 26.26-29; Murkus 14.22-25; Lüüka 22.14-20)

<sup>23</sup> Kudumma a'a na'duga ka Uugaara nanangnga aaga tekere, ka ooso tanno Uugaara Yasu kara tümmünü eyi yiini a kadu a'duga miteene. <sup>24</sup> Anangnga ta'diila a Masala a'düsünü iki, "Aaga 'duga, aaga tagu tuu'da neede eege kungngo kananja aaga, aaga üüni nggeege amang kada tagügi tumma ma a'a." <sup>25</sup> Afada a'duga ker'de kene ka ndagu

## 12

*Türü ma Koronggore*

kuri ma ooso iki, "Ker'de mo, oogo ma timi'di tumma ma 'bütüngngö ma eriidö tiya eede, aaga üünü nggeege ada kara tooye, aaga tagiigü tumma ma a'a." <sup>26</sup> Kada kara tagu miteene mo, aaga tooye ka ker'de tammo ya, aaga teema tumma ma inde tanno Uugaara kadara ka uuru ma tö'dö tanno iini.

<sup>27</sup> Ömö'dü ya agu miteene mo, alla ooye ka ker'de tammo Uugaara a'da taalo yiini ya, i'i ya hetti ada ka tuu'da nja eriidö tiya Uugaara. <sup>28</sup> Fa ka ömö'dü iiri eyi yiini dhorro assa ka agu miteene ooye ka ker'de tammo. <sup>29</sup> Kudumma ömö'dü tiya aguri ada kooye a'da taalo amma ka tuu'da tanno Uugaara ya, i'i ya aguri adagooye, ö'dö a tapusu ka eyi tiya iini. <sup>30</sup> I'i yungngo a kadu könö kada ki'di kamaara, anno taaya. <sup>31</sup> Lakiini üürü angnga kagümmü nanggeyi naaja ya, taalo angnga kara ta kapusu adene. <sup>32</sup> Lakiini Uugaara ümmü angnga apusu angnga amang kini tafa tapusu angnga nja kadu ma 'büdhülü.

<sup>33</sup> Nagöre eede, kada kara temmi ma tagu eema aaga tündhgü ajeene. <sup>34</sup> Ömö'dü ya iire kagu i'i ya, fa kini agu eema ka 'dü kita iini, amang kada tafa tüpü nanggeyi naada ka tapusu adene. Lakiini türeene ma eema könö kede kara tö'dö nassa tirina aaga.

<sup>1</sup> A 'bütüngngö kudumma türlü ma koronggore nagöre eede, taalo a'a nasaasa a'da aaga tüürü miini. <sup>2</sup> Kussu aaga a'da kagiisö aaga ka eema ma namasala tanno nakünggirü no keere, a'da taalo aaga kussu fiinü. <sup>3</sup> Amang kada tessu a'da taalo ömö'dü ma teema a Koronggore ma Masala iki a'da, "Yasu aga'dadene," a ömö'dü taalo tambaanya tiki a'da, "Yasu Uugaara," illi a Koronggore tiya Insili ya.

<sup>4</sup> Türü ma koronggore kambananjaana ku'bu, lakiini Koronggore unggodho.

<sup>5</sup> Linggo kambananjaana ku'bu, lakiini Uugaara unggodho. <sup>6</sup> Linggo kingide kambananjaana ku'bu, illi Masala ma unggodho malinggo ada eema a kadu nye'd'de.

<sup>7</sup> Türü ka ananja ömö'dü ma linggo ma Koronggore tessu adene ma ta'diila ma kadu nye'd'de. <sup>8</sup> Ömö'dü ta'duga tumma ma ta'dara ka Koronggore, aya ta'duga tumma ma tessu eema ka Koronggore ya unggodho ya,

<sup>9</sup> a Koronggore ya unggodho ya tamana tamma a Masala ana eedi, anangnga a tiya a türlü ma toolona kadu ka namaara, <sup>10</sup> öccö anangnga türlü ma talinggo eema keefe, anangnga a tiya linggo ma ne'bi, aya tessu nagoronggore, könö teema tumma keefe taalo niini, aya tasaana ku'bu. <sup>11</sup> Eema ya nye'd'de

Koronggore ya unggodho ya i'i yungngo alingga ka eyi tiya iini, asümünaana türü niini ka kadu ku'bu afa ma tiya iini ka asaasa kungngo.

*Oona ka unggodho nja kolelle*

<sup>12</sup> Afa ma tuu'da kada unggodho a kolelle kungngo eene kadhabbu, lakiini eege ka unggodho, Almasiihi afeene nggeege afe'de.  
<sup>13</sup> Angnga nye'd'de kungngo, Yahüdü nja kadu ma Yünan no, kasaga nja tanno taalo ka kasaga no, kakambeesedene angnga a Koronggore tiya unggodho ya, angnga ta unggodho ka tuu'da, angnga tagooye ka Koronggore tiya unggodho ya.

<sup>14</sup> A tuu'da taalo niimö ya unggodho ya i'i ya miini, lakiini kolelle miini kadhabbu. <sup>15</sup> Üürü awwa kara tiki a'da, "Taalo a'a na niisö, taalo a'a na takolelle ma tuu'da," taalo i'i yungngo tafaga eege keere kada ta'ba ma tuu'da. <sup>16</sup> A neeso tiki a'da, "Taalo a'a na ööye, taalo a'a na ma tuu'da," ara taadha kada kolelle ma tuu'da.

<sup>17</sup> Üürü tuu'da nye'd'de kara taga ööye, a taföönyö eema eege kiiye? Üürü tuu'da nye'd'de kara taga neeso, a tü'd'dü eege kiiye?

<sup>18</sup> Lakiini Masala manangnga kolelle ka tuu'da afa ma tiya oono ka asaasa ya kungngo. <sup>19</sup> A kene kara taga tagolelle ka unggodho 'dee, a tuu'da eege kiiye?  
<sup>20</sup> Lakiini kolelle kadhabbu, a tuu'da ka unggodho.

<sup>21</sup> Taalo ööye ara tiki a niisö a'da, "Taalo a'a nasaasa o'o," alla üüdü tiki uune a'da, "Taalo a'a nasaasa aaga." <sup>22</sup> Lakiini tagolelle öccö ka ijöögö ka tuu'da kada ki'di no, eege kungngo kasaasadene dhorro. <sup>23</sup> A 'ba'dakeyi

yaaja ka tümmü i'i kada idhilli ya, ümmü adene katitaalo a'diila ya, i'i yungngo ümmü adene ka'diila, <sup>24</sup> a kolelle na 'diila no taalo kasaasa niimö, lakiini Masala marü'bú tuu'da manangnga ta'diila dhabbu a 'bandakolelle tiya dhilli ya. <sup>25</sup> Amang ka tuu'da tafa tasümünü njaana ku'bu, amang ka kolelle tümmü ajeene ka fin'dinanjaana koona nye'd'de. <sup>26</sup> Niimö kara tagu tagolelle könö, agu kolelle nye'd'de kungngo, a takolelle könö ka ta'deema, a türeene ma kolelle tad-hodho nja iini nye'd'de.

<sup>27</sup> Aaga ka tuu'da tanno Almasiihi, aaga ka kolelle miini. <sup>28</sup> Masala man-

angnga kadafiini ka kaniisa ka dhidha a nagane'bi tisi kide, a katalaana tisi kide masa tanangnga türü a türeene ma kadu ma tal-inggo eema keefe, a türü ma toolona ka maara nja türü ma takinyi kadu öccö ko'do nja türü ma tindinaana kadu ku'bu nja kadu keema tumma öccö a'da taalo neene. <sup>29</sup> Eege no in'dili kungngo 'dee, eege ka kadafiini? Eege in'dili ka nagane'bi? Eege in'dili ka katalaana? Eege in'dili

ka türü ma talinggo eema keefe? <sup>30</sup> Eege in'dili kana türü ma toolona ka maara? Eege in'dili keema tumma keefe? Eege in'dili kasaana tumma ku'bu? <sup>31</sup> Lakiini aaga asaasa eema ya a'diila ya, ara a'a tala aaga ka fiini tiya dhorro ya.

## 13

### Tasaasa

<sup>1</sup> Üürü a'a ka neema a tumma tanno a kadu nja tanno kadhangga, lakiini taalo a'a nasaasa kadu ya nafeene nja fara ma tanyaanya nja eliili kafara.

<sup>2</sup> Üürü Masala manangnga tumma ma tane'bi a'a nussu eema ya kaküdhü ya in'dili, nümmü Masala ana eedi niki a naanya a'da mooso a'da taalo a'a nasaasa kadu ya, taalo a'a na niimö.

<sup>3</sup> Nasssa ka tadhifi almaala yeede a kadu nye'd'de, nümmü tuu'da neede ka tatinyogo a'da taalo nasaasa kadu, taalo a'a nagüünii niimö ya a'diila.

<sup>4</sup> Tasaasa ka anangnga ömö'di ka tidhi oona ku'bu kana 'bangnga, tasaasa taalo kussu kirimii nja ta'diniga oona coo'do taalo kabbü 'daniisö. <sup>5</sup> Tasaasa taalo kamidhi, taalo ka asaasa ma eyi tiya eene, taalo kagoroo'bo ün'dügüngngö, taalo kümmü tumma na toroko no ka eedi. <sup>6</sup> Tasaasa taalo kadhodho a niimö tiya toroko ya, lakiini kadhodho a niimö tiya dhorro ya. <sup>7</sup> Tasaasa kidhi oona ku'bu ka eema nye'd'de kungngo,

kamaama ka eema in'dili, ma indhgüi ta'diila.

<sup>8</sup> Tasaasa taalo kara taama 'do, lakiini tumma ma tane'bi kara titaalo a tumma ma nagonggo'do kara titaalo a tussu eema titaalo afe'de. <sup>9</sup> Kudumma tussu eema naaja ka ta'ba a tumma ma tane'bi naaja ka ta'ba, <sup>10</sup> Niimö ya tigini ya ka tö'dö, aya ta'ba ya titaalo. <sup>11</sup> Eede ka takaleefe tadhilli ya, nageema a'a kada 'bii'bala, nussu eema afa 'bii'bala, nadinigögö afa 'bii'bala, lakiini kede kanda miide ya naadha ka eema ma ta'bii'bala. <sup>12</sup> Koronggore yaaja kadinö kide 'bitingngö ka almandara kada irifirifi ya, lakiini ka uuru tanno miini no ara angnga tiji nadhugudha, a 'bitingngö nussu a'a eema öccö, lakiini ka uuru tanno miini no ya, ara a'a tussu eema nye'd'de afa meede ka tussu adene kungngo.

<sup>13</sup> A 'bitingngö ya ara tamna na Masala tüütü nja tindhgüi nja tasaasa, aya adhabbu ana kene na iidoona no tasaasa.

## 14

### Türü ma teema nja nagonggo'do

<sup>1</sup> Aaga ümmü tasaasa ka dhidha, aaga tasaasa türü ma koronggore, münda eema ma tane'bi.

<sup>2</sup> Kudumma ömö'di tiya eema ana onggo'do ka tonggoonyo ya, taalo eema nja kadu, lakiini eema nja Masala kudumma kadu taalo kaföönyö tumma

niini, lakiini Koronggore eema tumma na küdhü no.  
<sup>3</sup> Lakiini ömö'di ya eema tumma ma tane'bi ya, i'i eema nja kadu ma takı'di eege ku'bu ma tündhígí eege ko'do a talüülü ïïye.  
<sup>4</sup> Ömö'di ya eema tumma keefe ya, i'i indinaana eyi yiini, ömö'di ya eema tumma ma tane'bi ya, i'i ya arü'bü kaniisa.

<sup>5</sup> Nasaasa a'a a'da aaga teema tumma keefe aaga ïn'dili, lakiini aaga eema tumma ma Masala ka dhidha, kudumma ömö'di tiya eema tumma ma Masala agii'bi ömö'di ya eema tumma keefe ya, illi kini ka tasaana eege ku'bu amang ka kadu ma kaniisa tussu kindinaana kaniisa ku'bu.  
<sup>6</sup> A 'bitingngö nagöre eede, kede ka tö'dö kada kanna neema nja aaga a tumma keefe 'dee, ara a'a tümmünü minna aaga, üürü taalo tumma neede kö'dö a tumma na tö'dö no nja tussu eema nja tumma ma Masala nja talaana.  
<sup>7</sup> Eema ya taalo eela tanya ya, afa kaaru nja perempeera, üürü kitaalo kö'dö a fara tiya eene ka tonggoonyo, ara angnga tussu a'da öjö i'i yungngo a kadu kabaana?  
<sup>8</sup> Üürü tñiidö taalo ana fara ka'diila 'dee, mada i'i yungngo ara takı'di oona ku'bu aco ka koro'bo?  
<sup>9</sup> Aaga kafígi nggeege afe'de, onggo'do maada kara madere ka tumma taalo kussu adene, ara ömö'di tussu nüümö yaada kadeema ya nya?

Taalo tanya kara tama tumma naada? <sup>10</sup> Tumma kungngo ka 'büdhülü kadhabbu ka tonggoonyo, lakiini eege nye'd'e kussu adene. <sup>11</sup> Üürü taalo a'a nussu türü ma tumma, ara a'a ta tajeene ka ömö'di tiya eema ya, ömö'di ya ara teema nja a'a, afeene afa tajeene ana a'a. <sup>12</sup> Aaga tekere. Ada kasaasa türü ma Koronggore, aaga arangnga agusunja kada kide ma tarü'bü kaniisa.

<sup>13</sup> Ömö'di ya eema tumma kadhabbu keefe ya, fa kini afara ka Masala amang kini tana türü ma tasaana ku'bu iini. <sup>14</sup> Kudumma eede kara tafara ka Masala a tumma keefe ya, koronggore yeede i'i yungngo a tafara ka Masala, lakiini üdü yeede taalo ara taluna nüümö. <sup>15</sup> Ara a'a tönynyö 'bitingngö? Ara a'a tafara ka Masala a koronggore, nafara ka Masala ana üdü afe'de. Nüwe tüüsü a koronggore, nüwe tüüsü ana üdü afe'de. <sup>16</sup> Üürü o'o namana ta'diila a Masala a koronggore 'dee, ömö'di ya taföönyö saga tiki "Amiin" nya ka baraka tiya üdü kudumma iini taalo aföönyö tumma nüdü ka teema no?  
<sup>17</sup> Nanangnga o'o ta'diila a Masala, lakiini ömö'di könö taalo aduna nüümö 'do. <sup>18</sup> Namana a'a ta'diila a Masala kudumma eede ka teema tumma keefe ada naada ka teema no aaga nye'd'e kungngo. <sup>19</sup> Lakiini ka kaniisa a'diila eede kara tadiri tumma ka iïdümmü na ussudene no nalaana

kadu könö ka kaniisa  
kadagii'bi tumma nö'dö na  
alif kada'baaga neede ka  
teema ana onggo'do no.

<sup>20</sup> Nagöre eede, aaga fa  
tafeene nya laala tiya idhi-  
idhi ya ka nanggüüdü, laki-  
ini aaga afeene nya laala  
tiya dhiidhi ya ka eema  
tiya toroko ya, aaga tümmü  
ta'dara dhorro. <sup>21</sup> Iki tumma  
ka Sorne ma seriye a'da,

Uugaara iki, "Ara a'a teema  
nya kadu tanno ana  
onggo'do ka tong-  
goonyo,  
a nüünö ka tonggoonyo,  
lakiini eege taalo kara  
taföönyö."

<sup>22</sup> Tumma ma nagonggo'do  
ka tonggoonyo taalo ka  
türü ka kadu ma kaniisa,  
lakiini ka türlü ka kadu  
tanno taalo kamma no, illi  
teema tumma ma Masala  
ka türlü ka kadu tanno  
amma, taalo na ka kadu no  
taalo kamma no. <sup>23</sup> Üürü  
kadu ma kaniisa katemmi  
in'dili, a ömö'di ya teema  
tumma niini unggodho i'i  
a kadu na aleefe tamma  
no, tö'dö katoodo kide taalo  
katiki a'da aaga ka nagaaga?

<sup>24</sup> Lakiini eene kadeema  
tumma ma tane'bi eege  
in'dili kungngo, a ömö'di ya  
aleefe tö'dö ka Masala nya  
tiya taalo amma ya, ö'dö  
atoodo kide ara tamma ana  
eedi a'da i'i taalo a'diila, ara  
kadu nye'de katümmü i'i.  
<sup>25</sup> Eema ya akaküdhü kini ka  
eedi ya, tatele oona. Üürü  
ku'bu a dhugudha afara ka

Masala amma a'da "Masala  
maneene nya aaga timin'da."

*Tamma ka Masala  
aki'dinja ku'bu ta'bitta*

<sup>26</sup> A'a niki nya nagöre  
eede? Kada kara temmi ma  
tafara ka Masala, ömö'di ya  
tüwe tüüsü, aya talaana, aya  
tama tumma ka Masala, aya  
tö'dö a tumma keefe, aya  
tasaana tumma ku'bu, eema  
nye'de kungngo ya ama  
tindinaana kaniisa. <sup>27</sup> Üürü  
ömö'di eema tumma keefe  
ya, kadu keera üürü ki-  
idoona, aya teema apa a tiya  
eema, ömö'di öccö asaana  
eege ku'bu. <sup>28</sup> Üürü taalo  
ömö'di ma tasaana tumma  
ku'bu, fa kini aki'döönö kafa  
teema ka kaniisa a tumma  
keefe, eema ka eyi tiya iini  
nya Masala.

<sup>29</sup> Lakiini nagane'bi, fa  
kene keema keera üürü  
kiidoona, a kadu könö türi  
tumma na eemadene no.  
<sup>30</sup> Üürü ömö'di öccö emmi a  
tumma tö'dönja iini ndama  
Masala, a ömö'di ya ageema  
ka dhidha ya töödhi. <sup>31</sup> Aaga  
nye'de kungngo kama  
teema tumma ma Masala,  
aya teema apa a tiya, amang  
ka kadu talaadene nye'de  
kafünüğü nya ko'do. <sup>32</sup> A  
nagoronggore ma nagane'bi  
ungngo a nagane'bi ka niisö.

<sup>33</sup> Taalo Masala ma eema  
ma weerö, lakiini Masala  
ma ta'diila afa ma tiya ka  
nakaniisa ma kadu tanno  
Masala kungngo. <sup>34</sup> Tafa ka  
iiya tanno ada kafa teema  
ka kaniisa. Taalo ungngo  
kamma kene kadeema,

lakiini kaföönyö tumma afa ma sorne ka tiki kungngo.  
<sup>35</sup> Kene ka asaasa tussu nüümö, fa kene kindini naganyori neene ka 'dī, kudumma iini taalo a'diila aka ka teema ka kaniisa.

<sup>36</sup> Kiki aaga kide a'da tumma na Masala kö'dö ndama aaga? Alla eege köödhü kada unggodho aaga? <sup>37</sup> Üürü ömö'dü inggide ümmü eyi yiini kada ne'bi nja türü ma koronggore könö, fa kini ussu a'da nüümö yeede ka rigiri ada aaga ya, tumma na Uugaara eege kamiini.  
<sup>38</sup> Ömö'dü ya taalo ümmü tumma no ya, aaga aadha iini koona.

<sup>39</sup> Nagöre eede, aaga asaasa türü ma koronggore, aaga tafa tafaga ömö'dü öccö keere ka teema tumma keefe. <sup>40</sup> Eema in'dili talinggo adene akü'dinja ku'bu ta'bitta.

## 15

### *Almasiihi afiki'dö ka inde*

<sup>1</sup> Nagöre eede, ara a'a tadirina tumma ma İnjülli neede ka öö'dö iini no aaga, aaga tamma kide, aaga tüütü kafa kide no. <sup>2</sup> Aaga toolonadene iini, üürü aaga kafa kide afa meede ka tagadünnü aaga no, alla kamma aaga ka weerö ün'dügüngngö.

<sup>3</sup> Nagümmünü a'a aaga ka dhidha afa miini ka tagananja a'a kungngo, a'da Almasiihi eyi kudumma tatoroko tanno aja afa ma kasorne ka tiki kungngo.  
<sup>4</sup> Atatü'büdene afiki'dö a

füngngö iidoona afa ma kasorne ka tiki kungngo.  
<sup>5</sup> Adele oona a Bütrüs assa ka ala oona a kadafüni tanno iidümmü kafünü eera no. <sup>6</sup> Assa ka tatele oona a nagöre tanno ö'dö na miya ka iidümmü kadhabbu meene taleefe tefe ka 'dī, könö taaya. <sup>7</sup> Afada adele oona a Yaguub nja kadafüni in'dili. <sup>8</sup> Idhi adele oona a'a keere kungngo afa 'bii'bala ya ageenedene ka titalo adho ka fiini ya.

<sup>9</sup> A'a nungngo nadhilli ka kadafüni tanno in'dili no, taalo nama a kadu ka tümmünü a'a a'da tafiini, kudumma eede ka tagalinggo kaniisa ma Masala. <sup>10</sup> Lakiini a türü tanno Masala a'a nungngo naneene nja türü tanno oono ka anangnga a'a no, taalo kananja a'a ün'dügüngngö, lakiini a'a nadhügürü natagii'bi türeene ma kadafüni, lakiini taalo a'a nungngo na dhügürü, lakiini türü na Masala na eede ka oona no. <sup>11</sup> Tumma no kö'dö ndama a'a alla ndama eene, eege kungngo iidü kadeema iini, aaga tamma kide.

### *Tafiki'dö ka inde*

<sup>12</sup> Üürü angnga keema tumma ma Almasiihi a'da i'i afiki'dö ka inde, a kadu könö saga tiki a'da, taalo kadu kafiki'dö ka inde nya?  
<sup>13</sup> Üürü taalo kadu na ake no kafiki'dö ka inde, Almasiihi taalo afiki'dö tekere. <sup>14</sup> Üürü taalo Almasiihi afiki'dö ka inde ya, a tumma naaja kara tatumma ün'dügüngngö, a

tamma ka Masala naada kara ta ün'dügüngnö. <sup>15</sup> Nggeege ara angnga tafünü korokoro ka Masala ka oona, kudumma aja ka tiki a'da Masala manangnga Almasiihi ka fiki'dö a'da taalo afiki'dö, üürü taalo kadu kafiki'dö ka inde. <sup>16</sup> Üürü taalo kadu na aaya no kafiki'dö ya, taalo Almasiihi afiki'dö. <sup>17</sup> Üürü taalo Almasiihi afiki'dö, a tamma ka Masala naada ta nüümö ün'dügüngnö, aaga tüütü ka tatoroko tanno ada. <sup>18</sup> Üürü nggeege ya, kadu na aaya keere ma Almasiihi no, kaama. <sup>19</sup> Üürü tindhígü naaja ka Almasiihi ka'diila ka tefe ka 'dö tanno, angnga kungngo küüni muuyu ka kadu ka teene nye'd'de kungngo.

<sup>20</sup> Lakiini tumma timin'da, Almasiihi afiki'dö ka inde amang ka kadu tanno iifyü ka inde no kara tafiki'dö afe'de. <sup>21</sup> Inde ka kanna ka nüüsö ma ömö'di, a ka nüüsö ma ömö'di ara tafiki'dö ka inde tanna kide. <sup>22</sup> Afa ma kadu nye'd'de ka taaya ka Adam ya, eege nye'd'de kara tafiki'dö ka inde nya Almasiihi. <sup>23</sup> Lakiini ara ömö'di töödhü ka 'buugu tiya iini. Almasiihi i'i yungngo adhidha assa tapa a kadu tanno indhígü Almasiihi iini kara tö'dö no. <sup>24</sup> Keere kungngo Almasiihi saga öö'dö tümmünü tauugaara a Masala Pupa, mara tagirina tauugaara nye'd'de. <sup>25</sup> I'i ara tauugaara idhi anangnga nadiidi miini kini ka uune.

<sup>26</sup> Diidi ya ara tiididene keere ya inde. <sup>27</sup> Kudumma, "Eema nye'd'de ananja kini ka uune." Lakiini iini ka tiki a'da eema nye'd'de ananja kini ka uune, taalo nja Masala ka eyi tiya oono mo, manangnga eema in'dili ka Almasiihi ka uune. <sup>28</sup> Lakiini ka eema in'dili kara tananja iini, a 'Bii'bala ka eyi tiya iini ara tananja ömö'di tiya anangnga iini, a Masala oogo ma eema nye'd'de.

<sup>29</sup> Üürü taalo kadu na aaya no kara tafiki'dö 'dee, aminna agu kadu kambeesedene kudumma inde? Minna agu eege kambeesedene kudumma eene. <sup>30</sup> Aminna agu angnga angnga tadhügürü a nakuuru. <sup>31</sup> Nagöre eede, nake a'a a nakuuru a'a tan'dinigi oona neede coo'do ana aaga ka Yasu Almasiihi Uugaara yaaja. <sup>32</sup> A'a ka tamö'di kungngo nageema a'a koro'bo nja eema ma toroko ka Afosus taalo ara ta nüümö ana a'a üürü kadu na aaya no taalo kafiki'dö ka inde.

"Kada aguri, angnga tagooye,  
kudumma aja kara taaya taka."

<sup>33</sup> Aaga fa taama nanggeyi naada, "Taneene na toroko no kara taga'da taneene na 'diila no." <sup>34</sup> Aaga adinö ko'do ma ta'diila, aaga tafa tüünü tatoroko, kudumma kadu töccö kinggide taalo kussu Masala, a'a neema

nggeege amang ka modolo tagu aaga.

### *Tafiki'i dö ma tuu'da*

<sup>35</sup> Ömö'dü könö indineene iki a'da, "Ara kadu na aaya no tafiki'i dö ka inde nya? Kara tafada a tuu'da töccö?" <sup>36</sup> Ka 'baga, niimö yüdü ka tiniigü ya, taalo ara tafü'döönö illi kini ka teyi. <sup>37</sup> A niimö yüdü ka tiniigü ya, taalo tuu'da miini euge kungngo kara taneene. Lakiini ndaniiye ma tinggile üürü niimö könö afe'de. <sup>38</sup> Lakiini Masala manangnga tuu'da eene a maraada tammo oono, tinggile no, tuu'da neene unggodho eege. <sup>39</sup> Taalo tuu'da nye'd'e kafeene, tuu'da ma ömö'dü a tuu'da ma eema ma eriidö kinggide, a tuu'da ma uyi kinggide, a tuu'da ma kilögö köönö. <sup>40</sup> Nja tuu'da ma 'dotombo'do nja tuu'da ma 'büdhülü, tuu'da ma 'dotombo'do ka öyeene, a töyeene könö ka tuu'da ma 'büdhülü. <sup>41</sup> Ndanaaya ka öyeene, a tere töyeene, midigi kömö taalo mafeene ka töyeene nja köje.

<sup>42</sup> Tafiki'i dö ka inde kafiigi nggeege, tatü'bü tuu'da ka teyi ka fiki'i dö taalo ka teyi afe'de. <sup>43</sup> Atü'büdene kada midhi afiki'i dö ka ta'diila, atü'büdene kada ki'di afiki'i dö a türü. <sup>44</sup> Atü'büdene kada tuu'da afiki'i dö kada tuu'da ma koronggore, üürü tuu'da ma ömö'dü ka inggide, a tuu'da ma koronggore ka inggide

tekere. <sup>45</sup> Sorne iki a'da, "Adam ömö'dü ya dhidha ya tuu'da ka adinö," Adam ya eere ya a koronggore ya amana teefe ka 'dü angnga. <sup>46</sup> Lakiini taalo koronggore ö'dö ka dhidha, lakiini tuu'da assa kanda koronggore. <sup>47</sup> Ömö'dü ya dhidha ama kuraaga ndama 'büdhülü, a ömö'dü ya eere ya ama 'dotombo'do. <sup>48</sup> Afa miini ka ama 'büdhülü kada kadu ma 'büdhülü afe'de, afa miini kada kadu ma 'dotombo'do kara ta kadu ma 'dotombo'do. <sup>49</sup> Afa maaja ka kirni koronggore ma 'büdhülü kaja ka oona, ara angnga sa ka kirni koronggore ma 'dotombo'do kara ta kadu ma 'dotombo'do.

<sup>50</sup> Ara a'a tiki aaga nagöre eede, taalo tuu'da nja eriidö ka takarna ka tauugaara ma Masala, inde taalo ka takarna ka tefe ka 'dü ta'billi. <sup>51</sup> Ara a'a tadirina tumma na küdhü no aaga, taalo angnga kara takaaya in'dili, lakiini ara angnga takatem'bele in'dili. <sup>52</sup> Tasala areere afa talimi ma ööye, fara ma tiniidö tiya eere ya, kudumma tiniidö kara tafara, a kadu na aaya no tafiki'i dö kagirni tefe ka 'dü kene ka oona angnga takatem'bele. <sup>53</sup> Ömö'dü ya eyi ya, tagirni tefe ka 'dü kini ka oona taalo a teyi, aya ara teyi ya tagirni tefe ka 'dü iini ka oona. <sup>54</sup> Ka tuu'da tanno aja na aaya ka sürdö no kara tatenggere. Yungngo a

tumma na kirinja ka sorne no kara tatimin'da, "Inde a'duurudene a tii'baana."

<sup>55</sup> "Tii'baana nüüdü eege ka üiye inde?

A türü nüüdü eege ka üiye inde?"

<sup>56</sup> A tümmi ma inde tatoroko eege kamiini, türü ma tatoroko eege kungngo ka seriye. <sup>57</sup> Kada nangnga ta'diila a Masala kudumma oono kamana tii'baana angnga ana eere ma Uugaara tiya aja Yasu Almasi-ih.

<sup>58</sup> Aaga idhi oona ku'bu nagöre eede, aaga tarigü awa caa'bu, aaga kardha ku'bu ka linggo ma Uugaara, amang kada tussu a'da takardha ku'bu naada ka linggo ma Uugaara taalo kara titaaloo.

## 16

*Monsoona ma kadu ma kaniisa*

<sup>1</sup> A kudumma ma tawaana gürüüsü koona ma kadu ma kaniisa, aaga üünii afa meede ka tünügü co kadu ma kaniisa ma Galatiya a'da küünii nggeege. <sup>2</sup> Ka uuru ma Lahada, ömö'di tonsaana liga nagürüüsü koona aaga tamana ku'bu taalo kama tawaana gürüüsü koona ana a'a kide. <sup>3</sup> Kede kara tö'dö nagürünü kadu yaada kadagesse eege no a'da kaco tunggu eema ma monsoona yaada co a kadu ma Örsaliim ara a'a ka kürünü kene a tumma.

<sup>4</sup> Üürü a'diila eede ka

tunggeene afe'de ya kara tunggeene njaa'a.

*Tasaasa ma eema ma eyi tiya iini*

<sup>5</sup> Ara a'a sa köö'dö kada kanna eede ka tadigaala ka Makadoniya, kudumma eede kara tadigaala ka Makadoniya a 'dagawwa ko'do. <sup>6</sup> Kede ka taneene njaaaga ara feele ka co a kürö aaga sa ka tattogo a'a co kita eede kara co kita. <sup>7</sup> Kudumma eede taalo a'a nasaasa tassa kada a 'dagawwa ko'do nasaasa a'a tagünü njaaaga dhabbu ka Uugaara ka nüüsö. <sup>8</sup> Lakiini ara a'a tanna ka Afosus ara uuru ma Taanyara ma Koronggore ka öö'dö. <sup>9</sup> Kudumma Masala ka tafa'da fiinii ma linggo ka'diila a'da nadiidi ma a'a kingide kadhabbu.

<sup>10</sup> Timosaws kara tö'dö kada kanna ya, aaga afa kini idhi oona ku'bu kudumma iini ka talinggo ada Uugaara afa a'a. <sup>11</sup> Taalo ömö'di ma tamidhi i'i, lakiini aaga tattogo i'i a ta'diila öö'dö kede kita kudumma eede ka tündhigü i'i njaaaga.

<sup>12</sup> Lakiini örre ma angnga Apölös ya, neema a'a njaa'iini dhabbu a'da öö'dö kada kanna njaaaga ma angnga, illi i'i anu lakiini eedi yiini taalo asaasa tö'dö kada kanna 'bitüngngö ara i'i sa köö'dö a fiinii tiya iini kara tatanfa'da.

*Tumma no eere no*

<sup>13</sup> Aaga adinö ko'do aaga tidhi oona ku'bu dhorro ana eedi ma tamiide aaga kardha ku'bu a türü dhorro. <sup>14</sup> Aaga linggo eema in'dili a tasaasa ajeene.

<sup>15</sup> Kussu aaga a'da kadu ma 'di tiya Istifanüüs eege kungngo kagamma ka Almasiihi ka Akaiya ka dhidha. Kümmünü nanggeyi neene ka linggo ma kadu ma kaniisa, a'a niki aaga nagöre eede, <sup>16</sup> amang kada taföönyö tumma neene nja kadu tanno alinggo ka dhügürü nja eene no. <sup>17</sup> Yungngo eede ka tadhodho ka tö'dö tanno Istifanüüs nja Frtunatos nja Akayos kudumma eene katakarna ka 'buugu tiya kada kati-taalo. <sup>18</sup> Kanangnga tiicolo eede ka eedi afa meene ka anangnga kada ka nanggeedi kungngo, aaga ümmü kadu afa ma tanno.

### *Tööjülü na eere no*

<sup>19</sup> Kadu ma nakaniisa ma Asiya kööjülü aaga. Akilla nja Berskillä kööjülü aaga ana eere ma Uugaara dhabbu nja kadu ma kaniisa tammo ka 'di kita eene mo. <sup>20</sup> Nagöre ma angnga no kööjülü aaga nye'de aaga tööjülü tööjülü na insili no.

<sup>21</sup> A'a na Bölis narigiri tööjülü no a nüsö tanno eede.

<sup>22</sup> Ömö'di ya taalo asaasa Uugaara ara linggi tagu i'i. Ka Uugaara aayu.

<sup>23</sup> A türü na Uugaara Yasu taneene nja aaga. <sup>24</sup> A tasaasa neede taneene nja

aaga nye'de ana eere ma Yasu Almasiihi, Amiin.

## **Waraga ya Bölis ma co Kürünsüs ya Eera ya Tafa'da tumma**

Bölis arigiri waraga ya unggū co kadu ma kaniisa ka Kürünsüs anya ma Yünan ma dhabbu mo, kini ka tunggeene ka fiinī ma tara co tassa kene. I'i agadünnü tumma ma İnjili co eene a kadu tamma ka Yasu kadhabbu. I'i aguu'bu eege ka nanggeedi iini ka ticci kene kannā nja iini ka arigiri ada nawaraga co eene lakiini kaleefe tatoroko eene ku'bu. İkiri ka tarigiri waraga ya ma takinyi tagi'di tanno eene ku'bu a'da üfürü tala eege ka oona.

Afeene afa kadu ma kaniisa ka Kürünsüs kafünü eema a Bölis ka oona a'da i'i atamü gürüüsü ya kadu ka kürünögü iini ma co tunggu co kadu ma kaniisa na eema ka titalo kene no, a'da taalo tafinii. Ka waraga tiya, i'i arigiri tumma ma eyi tiya iini dhabbu nja linggo ma teema tumma ma İnjili ma Yasu ya Masala ka tagümmünü i'i iini ya. I'i afe'de agalaana kadu ma kaniisa a tumma ma tafa ka gürüüsü tiya eene ta'diila amang kene tamana a kadu tanno Masala nja linggo ma kaniisa ka na'buugu tököönö (2 Kürünsüs 9.10).

<sup>1</sup> A'a na Bölis tafinii ya

Yasu Almasiiji a tasaasa tanno Masala, a'a nja örre ma angnga Timosaws ungngo tunggu waraga ya co kaniisa tanno Masala ka Kürünsüs nja kadu ma kaniisa nye'd'de ka Akaiya. <sup>2</sup> A Masala ma Pupa tiya aja nja Uugaara tiya aja Yasu Almasiiji tanangnga türü aga nja ta'diila.

### *Bölis amana ta'diila a Masala*

<sup>3</sup> Kada nangnga ta'diila a Masala Pupa tiya Uugaara yaaja Yasu Almasiiji, Pupa ya ana 'bangnga ya, nja Masala ma alüülü angnga ka iiye. <sup>4</sup> I'i alüülü angnga ka iiye ka dhügürü tiya aja ya in'dili amang kaja tambaanya talüülü kadu na dhügürü no ka iiye a talüülü tanno iidii ka'duga ka Masala ka eyi tiya iidii no. <sup>5</sup> Afa maaja kagosso ka dhügürü ma Almasiiji, angnga afe'de kagosso ka talüülü iiye. <sup>6</sup> Üürü ungngo kadhügürü ungngo kalüülü aaga ka iiye nja toolona kidi kara talüülü iiye, talüülü iiye naada eege kamiini ya anangnga aaga ka tidhi oona ku'bu a tümmünü eedi ku'bu ma dhügürü tiya unggodho ya iidii kadhügürü ya. <sup>7</sup> Tindhügi iidii kada kütü ka ööye miini ka takardha ku'bu ma tindhügi Masala, kudumma iidii ka tussu afe'de aaga tosse ka dhügürü tanno iidii, afe'de kosso aaga ka ta'baga nanggeedi tanno aja.

<sup>8</sup> Nagöre niüdü taalo ungngo kasaasa aaga katüürü ma tatoroko tanno agalinggo adene ana ungngo ka Asiya no, eema ya agalinggo adene ana ungngo ya adhabbu iñdhü ungngo taalo ka kambaanya ungngo taalo kamma a'da ara ungngo tefe ka 'dii. <sup>9</sup> Kiki ungngo kide dhorro kidi ka nanggeedi a'da kagümmü adene ma inde, tumma kagüünü adene amang kidi tafa türrü ka nanggeyi tanno iüdü ka oona, lakiini ka Masala tammo iji kadu na ake no. <sup>10</sup> Oogo moolona ungngo ka tatoroko ma inde afa ma tanno, oogo mara toolona. Kümmü angnga nanggeyi niüdü oono ma tündhügi oogo kono ka tüütü ka katoolona ungngo. <sup>11</sup> Afa maada ka takinyi ungngo a tafara ka Masala tanno ada. A'da kadu kadhabbu kamana ta'diila a Masala ka üüdü ma ungngo, a Masala mara tanangnga baraka ya a'diila ya ungngo kono ka tamma kafara tanno kadu kadhabbu.

### *Bölis agere tumma niini*

<sup>12</sup> A 'bütingngö kabbü ungngo 'danüsö ma nanggeedi tanno niüdü, yungngo iki ungngo a'da taneene niüdü ka 'büdhülü nja taneene tanno iüdü nja aaga no, ka tiicolo türü na Masala eege kamiini taalo a ta'dara ma tamö'dii, lakiini a türü tanno Masala. <sup>13</sup> Taalo ungngo karigiri ada tumma no co aaga no ada kara türöönö aaga tessu no, a'a

nasaasa aaga a'da aaga tessu nye'd'de. <sup>14</sup> Afa maada ka tessu ungngo ara aaga saga tessu ungngo nye'd'de aaga tabbü 'danüsö ana ungngo afa mungngo kara tabbü 'danüsö ana aaga ka uuru tanno Uugaara Yasu.

<sup>15</sup> Nakussu a'a tumma no nye'd'de kede ka tasaasa tö'dö kada kanna ka dhidha amang ka türü tagusunja aaga teera. <sup>16</sup> Kede kara co Makadoniya, ara a'a tadho kada kanna, a kede kara tafada ka Makadoniya ya, ara a'a tö'dö kada amang kada tattoog a'a ma co a Yahüüdiya. <sup>17</sup> Kede ka tasaasa tumma 'dee, naküsini ömö'dii alla nagalinggo a'a kada midhi, ara a'a tiki a'da ii ii nja kaw kaw ta unggodho kafeene co?

<sup>18</sup> Masala mussu a'da tumma niüdü nja aaga no, taalo kiki ii nja kaw, <sup>19</sup> Kudumma i'i ya 'Bii'bala ma Masala yiüdü kadeema tumma miini nja aaga, ungngo nja Salwans nja Timosaws, taalo kiki ii, alla kaw, lakiini kini taalo kaw illi ii ya miini. <sup>20</sup> Ii ya miini ka tumma tanno in'dili, nggeege yungngo iüdü ka tiki a'da "Amiin" ana Yasu Almasiihi a tündhügi ko'do ma tidihindü ma Masala. <sup>21</sup> Masala oogo mungngo manangnga angnga ka takardha ku'bu ana eere ma Almasiihi oogo mungngo ma'bunaana angnga. <sup>22</sup> Oogo mabbünnü hitimi yoono kaja ka oona, manangnga Koronggore yoono kaja ka nanggeedi.

<sup>23</sup> A Masala tussu a'da nanu a'a ka öö'dö ka Kürünsüs, a 'bangnga ma aaga kagu a'a. <sup>24</sup> Taalo ungngo kasaasa ta'bunu aaga ka tamma ka Masala, lakiini ungngo ka linggo nya aaga amang kada ta dhodho kudumma maada katütü ka tamma ka Masala dhorro.

## 2

<sup>1</sup> I'i yungngo eede ka tiki a'da nafa tö'dö kada kanna ii'dü a'a tanangnga aaga ka tümmü nanggeedi a'a a tagoroo'bo. <sup>2</sup> Kudumma eede kara tanangnga aaga ka tümmü nanggeedi 'dee, a mada i'i yungngo ara tanangnga a'a ka tadhodho afa taalo kadu neede ka anangnga eege ka tümmü nanggeedi ka koroo'bo no? <sup>3</sup> A'a narigiri waraga ya kudumma tanno kede kara tö'dö kada nafa tanangnga kadu na amana a'a ka tadhodho tafa tanangnga a'a ka koroo'bo. Nussu tumma aaga nye'd'de dhorro a'da ara aaga tosso ka dhodho nya a'a aaga in'dili. <sup>4</sup> Narigiri ada a'a waraga ya co aaga ana eedi ka tigine a tatoroko nya tadinigöögö ma eedi a fara tasuuru kede ka iiye, tumma neede no 'do ya a'a taalo nasaasa tanangnga aaga ka koroo'bo, lakiini a'a nagala ka asaasa a'da aaga tussu a'da nasaasa a'a aaga dhorro.

*Taadha ka tatoroko tanno kadu*

<sup>5</sup> Lakiini ömö'dü ya ö'dö a tagoroo'bo ya, taalo

anangnga a'a ka koroo'bo ungodho a'a, lakiini anangnga aaga ka koroo'bo nye'd'de kungngo, lakiini taalo tagoroo'bo in'dili, ii'dü tumma tadhabbu ka indhi kini. <sup>6</sup> Anda'dimo ka takapusu adene tanno ömö'dü tiya ada kada kalinggo ana i'i aaga in'dili kungngo. <sup>7</sup> A 'bitingngö a'diila ada kara tafünügü i'i ko'do aaga tafa kini ii'dü tagoroo'bo dhindho. <sup>8</sup> Ara a'a tiki aaga a'da aaga takogoona ma tasaasa i'i dhindho. <sup>9</sup> A'a narigiri ada aaga tumma no co aaga amang kede tussu a'da kaföönyö aaga tumma neede nye'd'de. <sup>10</sup> Kada kara ta'diila nya ömö'dü ka tatoroko tanno iini ya, na a'a taadha ka ömö'dü ka tatoroko tanno iini, ara a'a taadha kini kide kidha ma Almasiihi kudumma aaga. <sup>11</sup> Kudumma Ebliisi kara tanggaaga tii'bi angnga, taalo angnga küürü ma tumma niini.

*Kadu ma linggo ma timi'di tumma ma 'bitingngö*

<sup>12</sup> Kede ka öö'dö ka Tarwas ma teema tumma ma sorne tanno Almasiihi a fiin'i ma linggo ma Uugaara tafa'da nya a'a. <sup>13</sup> Lakiini a'a naga tinigöögö kudumma eede taalo naduna örre ma a'a ya Tito ya kanna, kikirü ka tattogo a'a nunggeene naco Makadoniya.

<sup>14</sup> Tanangnga ta'diila a Masala tammo unggene ana angnga ka fiin'i ma tii'baana 'bucca ana Almasiihi. Masanna kondho ma

tussu Almasiihi ka na'buugu in'dili.<sup>15</sup> Kadu na efe ka 'dī no taalo kara tefe ka 'dī ma nanggeyi tanno eene, lakiini ma ömö'dī tiya eyi ka üüdü meene afiki'dö afe'de.<sup>16</sup> Kondho mo ka kadu tanno aama no ma feene nja kondho ma inde a kadu na oolonadene no tunya ma tefe ka 'dī ma tamana kadu keefe ka 'dī. Mada i'i yungngo ara tambaanya eema ya?<sup>17</sup> Taalo ungngo kanadene a tumma ma Masala dhabbu afa kadu öccö, lakiini keema ungngo tumma ma Almasiihi dhorro kidha ma Masala kada kadu tanno oono.

### 3

<sup>1</sup> Kafada ungngo angnga tafünögü nanggeyi naaja ko'do afe'de? Alla kasaasa ungngo waraga afa kadu könö ma talaana ndama aaga alla co aaga?<sup>2</sup> Aaga ka waraga tiya iidi ya ikirinja kiidü ka nanggeedi ussudene a kadu nye'd'de tüörönö.<sup>3</sup> Kussudene aaga ka waraga tiya Almasiihi, ö'dö ndama linggo niidü taalo arigiridene ana ünggülü, lakiini a Koronggore tiya Masala ma adinö mo, taalo ikirinja ka maraayo ma müsi, lakiini ka maraayo ma nanggeedi ma tadü'd'dü.

<sup>4</sup> Kamma ungngo ana eedi dhorro ana Almasiihi ka Masala kidha.<sup>5</sup> Taalo ungngo kiki a'da ungngo küünü eema a tussu tanno iidi, lakiini türü niidü ndama Masala.<sup>6</sup> Oogo mungngo manangnga ungngo ka tambaanya linggo ma timi'di

tumma ma 'bitingngö, ya taalo ma tarigiri ma seriye, lakiini ma Koronggore, seriye ya arigiridene ö'dö ana inde, lakiini Koronggore ö'dö a tefe ka 'dī.

*Tidhindhi ma timi'di tumma ma 'bitingngö*

<sup>7</sup> Üürü linggo ma inde ko'dodene a kireere'be ka niigisi kö'dö a tidhindhi amang ka laala ya Is-rayil taalo kambaanya tadinö dhugudha ya Müusa kudumma tidhindhi ma dhugudha tiya iini ya ara saga titalo ya.<sup>8</sup> Taalo linggo ma Koronggore kara kakogoona ma tidhindhi?

<sup>9</sup> Üürü linggo ma tasigi kadu ka tidhindhi ya, ara tii'baana dhorro a linggo ma tidhindhi tanno ara tö'dö a toolona.<sup>10</sup> Niimö ya akadhindhi ya taalo tidhindhi kini 'bitingngö a'dugadene kudumma tidhindhi ka tagii'bi i'i 'bitingngö no.<sup>11</sup> Üürü niimö ara titalo ya öö'dö a tidhindhi ara tidhindhi na tiya ara tö'dö a tefe ka 'dī ta'billi ya tafaanya.

<sup>12</sup> Kudumma aja ka tindhigü no ya, kalinggo ungngo 'biini kungno.

<sup>13</sup> Taalo ungngo kafeene nja Müusa ya kaküdhü ten'di iini ka iiye, amang ka laala ma Is-rayil tafa tiji töyeene ma titalo ma tidhindhi tanno eene.<sup>14</sup> Nanggüdü neene ka tangga'da ta'bitingngö, nanggüdü neene katünküdhü a ten'di tiya miini ya, kene ka türi

sorne ma timi'di tumma ma 'billi, ara ten'di tatandhaka ka ömö'di kara tuurna Almasiihi keere.<sup>15</sup> Lakiini ta'bütüngö aleefe ten'di kene ka nanggeedi ka türoönö ma seriye ya Müüsa.<sup>16</sup> Ka ömö'di kara tapadaga ka Uugaara ara ten'di ma taküdhü iïye tatandhaka.<sup>17</sup> 'Bütüngö Uugaara i'i ya Koronggore, a 'buugu ya Koronggore ya Uugaara ka tanna kide ya, ara tahürra tanna kide. <sup>18</sup> Angnga in'dili kungngo kiji angnga tidhindhü ma Uugaara ana iïye ka tatandhaka afä almandara angnga takatem'bele kada Koronggore tiya miini ya, ka tidhindhü na ö'dö ndama Uugaara, i'i ya Koronggore.

## 4

### *Eema ka nadhafala*

<sup>1</sup> I'i yungno a Masala ka anangnga 'bangnga ungno ka linggo tanno, taalo ungno kara tari'ba. <sup>2</sup> Kaadha ungno ka eema tiya ka raaya ya, taalo kaneene ana ünggü ka nanggeedi, ungno taalo kiisini kadu a tumma ma Masala. Lakiini kala ungno tumma ma timin'da ungno takindhigü oona nüüdi ko'do a tumma miini co ka kadu ka nanggeedi kidha ma Masala. <sup>3</sup> Üürü tumma ma İnjiili nüüdi ka tadünnü no ka küdhü, eege ka tünggüdhü a kadu tanno aama no. <sup>4</sup> Eege taalo

kamma, kudumma masala ma 'büdhülü tiya a'binyyi eege ka iïye amang kene tafa tiji töyeene na öyeene ada kene no, töyeene ma tumma ma İnjiili ma tidhindhü na Almasiihi, ya koronggore ma Masala ya.<sup>5</sup> Taalo ungno keema tumma ma eyi tiya iïdi, lakiini a tumma ma Yasu Almasiihi ya Uugaara ya, kalinggo ada aaga kada kasaga ka üüdü ma Yasu.<sup>6</sup> Kudumma Masala ka tiki a'da, "Fa ka töyeene ka öö'dö kürö ndama ndüüli mo," oogo mungno manangnga töyeene noono kidi ka nanggeedi, amang ka töyeene ma tussu eema ma tidhindhü na Masala ka dhugudha tiya Yasu Almasiihi.

<sup>7</sup> Ungno ka nadhafala ma tam'bala ma tümmü eema ya, amang kini tussu adene in'dili a'da türü na Masala eege kamiini taalo nüüdi.<sup>8</sup> Tatoroko ka dhigi ungno ku'bu ka na'buugu in'dili, lakiini taalo ka'düngö, ungno tadhere lakiini taalo ungno kagi'di.<sup>9</sup> A kadu talinggo ungno, illi Masala taalo maadha kidi, ungno ta'dünggeene illi ungno taalo ka taaya.<sup>10</sup> Ungno 'bucca kümmü dhögürü ma inde tanno Yasu amang ka tefe ka 'di tanno iini tanna kidi ka oona.<sup>11</sup> Ungno na efe ka 'di no ara ungno takeke 'bucca ka üüdü ma Yasu amang ka tefe ka 'di tanno iini tijidene ka tuu'da tanno iïdi kara titaalo no.

<sup>12</sup> Nggeege inde kalinggo kidi ka oona, lakiini tefe ka 'di kungngo ada.

<sup>13</sup> Sorne iki, "Nageema a'a kudumma eede ka tamma." A koronggore ma tamma tiya kidi ya, angnga tageema kudumma aja ka tagamma. <sup>14</sup> Kussu ungngo a'da Masala mafiki'dö Uugaara Yasu ka inde ya, ara tanangga angnga ka fiki'dö ka inde afe'de ana Yasu, öö'dö ana aaga nja ungngo kono kidha. <sup>15</sup> Eema ya nye'd'e kudumma aaga, Masala mamaana eema angnga dhabbu, a kadu no amana ta'dila a Masala nja tiddhindhi tanno adhabbu no.

### *Tefe ka 'di a tamma ka Masala*

<sup>16</sup> Nggeege taalo angnga kara kari'ba, salla a tuu'da naaja saga titaalo, illi ömö'di ya ka tuu'da ka teene ya, ara tindinaana oona a naganuuru. <sup>17</sup> Kudumma 'bandhungürü tiya idhilli ya ya ara titaalo ya yaaja ka dhügürü ya indinaana tiddhindhi angnga ta'billi. <sup>18</sup> Kudumma aja taalo kanaana iiye ka eema tiya aja kijöögö ya, illi eema yaaja ka titaalo kijöögö ya, eema yaaja kijöögö 'bitingngö ara titaalo, illi eema yaaja ka titaalo kijöögö ya, i'i yungno ara tüütü ta'billi.

## 5

### *Tefe ka 'di naaja ka 'dotombo'do*

<sup>1</sup> Kussu angnga a'da fangga ma 'büdhülü maaja ka taganna kide mo mara türürdü, nöö'di naaja kungngo ka 'dotombo'do ta'billi a Masala ka tarü'bünü angnga taalo ka arü'bü adene ana iisine ma nakömö'di. <sup>2</sup> Angnga 'bitingngö ka tadinigöögö angnga ma tasaasa 'di ya 'dotombo'do ka kirninja kaja ka oona. <sup>3</sup> A kaja kara tagirni i'i kaja ka oona ya, taalo angnga kara taganeene ana oona ku'bu. <sup>4</sup> A 'bitingngö kaganna angnga ka fangga ma 'büdhülü, angnga tagüüni muuyu ana eema ka tindhü kaja taalo a'da angnga kasaasa takirnö ku'bu, lakiini angnga tagirni kide ko'do amang ka tefe ka 'di ta'duuru niimö ya ara titaalo ya. <sup>5</sup> Lakiini Masala oogo mungno makindinaana fiinü ya kaja ku'bu manangnga tümmü ku'bu ma Koronggore angnga amang kaja tessu iini.

<sup>6</sup> Lakiini ta'bitingngö kütü angnga ka tamma dhorro, kussu angnga tumma aja ka tanna ka tuu'da tanno ka ku'b'ba ka Uugaara ku'bu no. <sup>7</sup> Angnga keefe ka 'di a tamma ma Masala taalo a niimö tiya aja ka tinö kide ya. <sup>8</sup> Kidhi angnga oona ku'bu angnga tasaasa tö'dö kürö ndama tuu'da tanno ara angnga ka taneene nja Uugaara. <sup>9</sup> Salla angnga saga taneene aja ka tanna ku'b'ba,

angnga kasaasa Uugaara ka tamma kaja.<sup>10</sup> Kudumma aja in'dili kungngo ara angnga ka'dingnge kidha ma tahükümü ya Almasiihi, amang ka ömö'di taluna niimö yiini ka tagalinggo a'da akaleefe ka tuu'da, üürü ka'diila üürü ka toroko.

*Lingga nja ta'diila nja  
Masala*

<sup>11</sup> Kussu ungngo tükirü ka tussu ri'ba ma Uugaara, ungngo teema nja kadu a'da Masala mussu ungngo dhorro a'a nasaasa a'da aaga tussu ungngo ana eedi tiya ada afe'de.<sup>12</sup> Taalo ungngo kafünügü nanggeyi niidü ko'do kada kidha afe'de, lakiini kasaasa ungngo tafa'da fiinii aaga, amang kada tafünügü ungngo ko'do, amang kada taluna niimö yaada ka asaasa tüünii iini a kadu tanno alaala oona a kadu ndama kürö ün'dügüngngö a'da taalo ndama eedi ka teene.<sup>13</sup> Üürü ungngo kanagaaga ya, kanagaaga ungngo a Masala. Üürü ungngo ka'dara ya ungngo ka'dara kudumma aaga.<sup>14</sup> Kudumma aja kada kasaga ma tasaasa tanno Almasiihi a'bunu ungngo kide, kaja ka ndagussu a'da ömö'di unggodho eyi ka üüdü ma kadu nye'd'de, kadu nye'd'de kaaya nja iini.<sup>15</sup> I'i eyi ka üüdü meene nye'd'de kungngo, kadu na efe ka 'di no taalo kara tefe ka 'di ma nanggeyi tanno eene. Lakiini ma ömö'di tiya eyi

afiki'dö afe'de ka üüdü meene ya.

<sup>16</sup> Ndama uuru tanno taalo ungngo kussu ömö'di ka tatuu'da, kakussu ungngo Almasiihi ka tuu'da, illi 'bitingngö taalo ungngo kussu i'i nggeege afe'de.

<sup>17</sup> Üürü ka ömö'di kara tanenee nja Almasiihi ya, ara tamö'di tiya insili ya, eema ya illi ya anda taalo, eema nye'd'de anda issi.<sup>18</sup> Eema ya nye'd'de ö'dö ndama Masala muuraana angnga ka oona nja Almasiihi mo, manangnga linggo ungngo ma tuuraana a kadu ka oona.<sup>19</sup> Masala muuraana kadu ka oona nye'd'de nja Almasiihi a ta'diila ma eyi tiya oono, taalo ümmü egee ka tatoroko tanno eene, manangnga ungngo ka teema tumma ma tuuraana ka oona.<sup>20</sup> Angnga kungngo keema tumma ma Almasiihi, afa Masala oogo mungngo ma eema ana onggo'do tanno aja, yungngo iidü kadeema nja aaga ana eere ma Almasiihi a'da aaga ta töönjülü, aaga tümmü ajeene nja Masala.<sup>21</sup> Masala manangnga ömö'di ya taalo üünü tatoroko ka tatoroko ka üüdü ma angnga amang kaja ta'diila kidha ma Masala ana i'i.

## 6

<sup>1</sup> Ka linggo tanno iidü nja Masala no, kasaasa ungngo aaga na amma ka türü tanno Masala no, aaga tafa tümmöönö kada eema ün'dügüngngö.<sup>2</sup> Oogo makiki,

"Ka uuru meede ka tamma ya, naföönyö a'a tumma nüüdü, a ka uuru ma Masala ka tamma, uuru ma toolona naga kinyi a'a o'o ko'do."

Ara a'a tadirina tumma o'o 'bitüngngö uuru ma toolona egee kungngo.

### *Dhügürüü ya Bölis*

<sup>3</sup> Ungngo taalo kasaasa takara ka ömö'di kidha ii'di tumma tagu ungngo.

<sup>4</sup> Linggo niidi ka talinggo no kasaasa ungngo a'da kussu adene a'da linggo na Masala eege kamiini, a tidhi oona ku'bu ka dhügürü miini, ka talinggo adene nja dhügürü.

<sup>5</sup> Tabbü adene nja tapusu adene nja taga'da 'buugu adhügürü tadinigöögö a taneene ana iire. <sup>6</sup> Ka tinsili ma eedi nja tessu eema nja tidhi oona ku'bu, nja 'bangnga nja muuyu ka Koronggore tiya Insili ya, nja tasaasa ajeene dhorro.

<sup>7</sup> A tumma ma timin'da nja türü tanno Masala nja eema ma koro'bo tiya a'diila ya ka niisö ma kuri nja niisö ma küüle. <sup>8</sup> Ka tihindhi nja midhi, kümmü ungngo kada oroko kümmü ungngo ka'diila ungngo katimin'da, lakiini kümmü ungngo kada korokoro. <sup>9</sup> Taalo kussu adene ungngo lakiini kümmü ungngo a'da kussu adene, ungngo taaya lakiini kefe ungngo ka 'di, ungngo tabbü adene lakiini taalo kagirinadene. <sup>10</sup> Kamüürü ungngo lakiini ungngo ka

dhodho turi kungngo, taalo eema kide illi kadu ka tüüsü kadhabbu, afeene afa taalo eema kide illi ungngo kana eema in'dili.

<sup>11</sup> Ka kadu ma Kurnusus ka keema ungngo tumma ma timin'da nja aaga, ungngo tafa'da nanggeedi niidi aaga nye'd'de, <sup>12</sup> taalo ungngo kümmü nanggeedi ma aaga, lakiini aaga kungngo kümmü nanggeedi ma ungngo adha. <sup>13</sup> Nggeege a'a neema a'a nja aaga 'bitüngngö afa maada kada laala tiya eede kungngo, aaga üünä ana ungngo afa miidi ka tüünä ana aaga, aaga fada nanggeedi naada ungngo ka sigiiri.

*Aaga fa tosso nja kadu tanno kitaalo kamma ka Masala no*

<sup>14</sup> Aaga fa tosso ka dholle tanno unggodho no nja kadu tanno taalo kamma ka Masala no. Minna yungngo ara tuuraana ta'diila ka oona nja tatoroko? A minna i'i yungngo ara tuuraana töyeene ka oona nja ndüüli?

<sup>15</sup> Taalo niimö ma tuuraana Almasiihi ka oona nja E bliisi? A minna i'i yungngo ara tuuraana ömö'di ya amma ka Masala ya ka oona nja tiya taalo amma ya? <sup>16</sup> Taalo la ma Masala ara tullu ana koona nja la ma namasala ma 'büdhüli? Angnga ka nöö'di ma Masala tammo efe ka 'di mo, afa ma Masala ka tiki, "Ara a'a taneene nja eene nunggeene nja eene kene ka söödö na

a'a ta Masala tammo eene  
kada kadu tanno eede." <sup>17</sup> I'i  
yungngo a Masala ka tiki,  
"Aaga aadha eene ka oona,  
aaga tafa taneene nja  
eene.

Aaga fa tümmü eema ya ny-  
oro ya ka oona,  
amang kede tamma  
kada."

<sup>18</sup> Masala mana türü mo  
miki, "Ara a'a ta Pupa  
tiya ada  
aaga ta laala tiya eede."

## 7

<sup>1</sup> Üürü timi'di tumma no  
nye'd'de kungngo, Masala  
manangnga angnga nagöre  
eede, kada kagala tuu'da  
naaja kinsili ka tatoroko  
ma tuu'da nja koronggore,  
angnga taganeene ka tinsili  
ma ri'ba ma Masala.

### Bölis adhodho

<sup>2</sup> Aaga amma kidi a  
nanggeedi, taalo ungngo  
küünä ada ömö'di ku'bu,  
nja talingo eema ya toroko  
ya nja talogo ma eema  
tiya ömö'di töccö. <sup>3</sup> Taalo  
a'a nadiri tumma no ma  
tasigi aaga, nilli a'a ka  
tiraana kadhadha a'da aaga  
kungngo iidä ka nanggeedi  
a'da angnga taganeene  
ka'dügüllü angnga takaya  
ka'dügüllü. <sup>4</sup> Namma a'a  
kudumma aaga dhorro  
nabbü 'daniüsö ana aaga  
nafünüğünja ko'do nja  
dhögürü tiya iidä ya, eedi  
yeede adigine a ta'diila  
dhorro a dhodho.

**6:16** 6.16 Lawi 26.12; Armiya 32.38  
Samwiil 7.14

<sup>5</sup> Taalo tuu'da nüüdi ka  
kagünü 'do jiddi müüdi  
köö'dö ka Makadoniya,  
ka'dingga ungngo ka  
ta'digineene nja diidi kürö  
nja ri'ba ka teene. <sup>6</sup> Lakiini  
Masala mamana tiocolo  
aja ka nanggeedi muu'bu  
ungngo ka eedi ka tö'dö  
tanno Tito. <sup>7</sup> Taalo ka tö'dö  
tanno iini unggodho eege,  
lakiini ka ta'diila tanno iini  
ka tuna kada no, ka'diila  
oona eede kini ka tirina  
tumma ma aaga ungngo, ka  
tasaasa tanno ada nja fara  
tiya ada nja tagu'daana ka  
eedi tanno ada kudumma  
a'a, amang kede tadhodho  
dhorro.

<sup>8</sup> Üürü a'a nangnga aaga  
ka koroo'bo a waraga tiya  
eede ya, taalo a'a nara  
teema kada kussu a'da  
aaga kada kussu a'a adha,  
nussu a'a a'da waraga ya  
anangnga aaga ka koroo'bo  
lakiini ara tagünü idhilli.

<sup>9</sup> Nadhodho a'a 'bitingngö  
taalo kudumma eede kafa  
kada aaga tagoroo'bo,  
kudumma ada kagoroo'bo a  
fiinä ma tussu kide afa ma  
Masala ka asaasa ungngo  
taalo kili aaga ka oona.

<sup>10</sup> Kudumma tagoroo'bo  
ma tussu kide ana Masala  
ya kiji atö'dö a taadha ka  
tam'baga ma toolonadene  
a'da kitaalo tagoroo'bo kide,  
lakiini tagoroo'bo ma kadu  
ma 'büdhüllü ya, kicci tö'dö  
ana inde.

<sup>11</sup> Aaga assa ka tagoroo'bo  
tanno ada a tussu kide  
tanno Masala no manangnga

**6:17** 6.17 Asaiya 52.11      **6:18** 6.18 2

aaga kanaana iïye kide, ri'ba naada nja tasaasa nja tagu'daana ka eedi nja ta'diinö ka eema nye'd'de, kussu kadu kinsili aaga ka nanggeedi ka eema tiya 'do.<sup>12</sup> Aminna üürü a'a narigiri ada aaga, taalo kudumma ömö'dü tiya üünü ada kadu ku'bu ya nja tiya üüninja ku'bu ya, lakiini amang kada tijöögö kadha ma Masala a nanggeyi tanno ada kadakardha ku'bu ma ungngo.<sup>13</sup> Aaga kungngo kanangnga ungngo ka tidhi oona ku'bu, lakiini dhodho niidi kadhabbu 'do kudumma dhodho tanno Tito kudumma korong-gore tiya iini ka ta'baga oona ku'bu ana aaga ïn'dili kungngo.<sup>14</sup> Nala a'a ta'diniga oona coo'do neede iini ana aaga taalo kanangnga a'a kaana modolo. Lakiini eema yiidi kadiraana aaga ya nye'd'de aga timin'da, yungngo ta'diniga oona niidi ana aaga co Tito, kütü ka co ööye miini dhorro.<sup>15</sup> Eedi yiini akogoona ma tasaasa aaga, kini kara tagiigi taföönyö eema naada ïn'dili nja tamma kini nja tamma kini tanno ada a ri'ba ma Masala a ta'deedene ka oona.<sup>16</sup> Ka'diila oona eede namma ka tumma tanno ada ma eema nye'd'de.

## 8

*Tawaana ma gürüüsü koona*

<sup>1</sup> A 'bitüngngö nagöre eede, kasaasa ungngo a'da

aaga tussu a'da minna a türü ma Masala ka tagalinggo a kadu ma nakaniisa ka Makadoniya.<sup>2</sup> Ka dhügürü tiya eene ya dhabbu ya, ya Masala ka ta'b'ba eege iini ya, kadhodho dhodho na dhabbu no, a tassa keema neene dhindho no, tagala kanangnga eege kana eema dhabbu a tamana eema ku'bu tanno eene.<sup>3</sup> Ara a'a tiki aaga a'da kanangnga ku'bu dhabbu ndama nanggeedi tanno eene ka teene, adhabbu adagii'bi türü neene.<sup>4</sup> Kaga'bunu angnga kide, kasaasa a'da eege tosso ka tonsoona ma eema ma tunggu co a kadu ma kaniisa.<sup>5</sup> Kagala kadagalinggo adhabbu adha, yiidi ka tagümmöönö ka nanggüdü ya, kümmünü nanggeyi neene Uugaara ka dhidha, kassa ka tamma kiidü a tasaasa ma eedi tiya Masala.

<sup>6</sup> Kiki ungngo a Tito a'da atiimö linggo ma baraka nja aaga, afa miini ka ata tüm'bü miini ku'bu kungngo.<sup>7</sup> Kana aaga eema nye'd'de kungngo, tamma ka Masala nja tumma, nja ta'dara, nja tasaasa ta kinya eema a kadu nja tasaasa tanno ada nja ungngo no, ungngo tasaasa aaga afe'de a'da aaga takardha ku'bu ka linggo ma tasaasa ajeene ma türü,<sup>8</sup> taalo a'a na'buna aaga kide, lakiini a'a nasaasa tassa ka tasaasa ma kadu könö ka dhorro ma tara tussu a'da ka köje tasaasa naada nya?<sup>9</sup> Kussu aaga

türü na Uugaara tiya aja Yasu Almasiihi üpü eyi yiini co kudumma angnga a'da eema ungngo iini nye'd'de, amang kada tana eema a ta'döngngönyö tanno iini.

<sup>10</sup> Tumma neede kiki, a'diila nja aaga ada kara tatüümö naada ka tata tüm'bü miini kambele no, kudumma ada aaga kungngo kasaasa ka dhidha. <sup>11</sup> Aaga tüümö linggo 'bitüngngö amang ka tasaasa tanno ada tunggeene nja tatüümö tanno kada no. <sup>12</sup> Üürü aaga kasaasa tanangnga eema ku'bu, ara Masala tamma ka niimö tiya ada kanangnga ku'bu ya, taalo ka eema tiya taalo ya.

<sup>13</sup> Taalo a'a niki a'da aaga tadhügürü ara kadu öccö ka lingnge, lakiini a'a niki a'da aaga taneene kada köje. <sup>14</sup> Aaga tinya eema a kadu tanno eema katitaalo kene no, amang kene tinya eema aaga kini kara titaalo kada taka öccö, amang ka eema taköje kada. <sup>15</sup> Sorne ma Masala iki, "Ömö'dü ya awaana eema koona dhabbu ya, taalo ara türeene kini, ömö'dü ya awaana eema koona idhilli ya, taalo niimö ara titaalo kini."

### *Tito agürünüdene ma co Kürünsüs*

<sup>16</sup> Nanangnga a'a ta'diila a Masala kono ka anangnga tumma ma linggo tanno ka Tito ka eedi afa meede kanaana iifye kada kungngo. <sup>17</sup> Taalo i'i akogoona ma

tamanaga eema angnga sugi, lakiini i'i akardha ku'bu adinigöögö ma tasaasa tö'dö kada kanna ndama eedi tiya iini unggodho i'i. <sup>18</sup> Kagürünü ungngo örre ma angnga ya nja iini, ya kadu ma nakaniisa ka tafünügü i'i ko'do ka linggo kudumma ma İnjüili ya. <sup>19</sup> Afe'de ya, kadu ma kaniisa kagesse i'i miini ka tunggeene nja ungngo ma talinggo linggo na 'diila no, nüüdö ka talinggo no ma tafünügü Uugaara ko'do, ma tussu a'da ungngo kasaasa takinyi aaga, <sup>20</sup> kakardha ungngo ku'bu ii'dü ömö'dü öccö tanangnga hetti ungngo ka eema ya a'diila ya. <sup>21</sup> Tumma nüüdö ka tümmöönö ka nanggeedi no 'do, a'da ungngo talinggo eema ya a'diila ya, taalo ka Uugaara kidha unggodho oogo, lakiini ka kadu kidha afe'de.

<sup>22</sup> Kagürünü ungngo örre ma angnga nja eene, yiidi ka tagüüri linggo niini ungngo taluna i'i ussu ka eema dhabbu, a 'bitüngngö amma kada ana eedi dhorro. <sup>23</sup> A Tito ya akinyi linggo nja a'a kada kanna, a nagöre ma angnga na unggeene nja iini no, eege kadafüni ma nakaniisa, Almasiihi ara tafünügünja ko'do ana eege. <sup>24</sup> Nggeege aaga ala tasaasa naada a kadu dhorro a niimö ya anangnga angnga ka ta'diniga oona naaja coo'do ana aaga amang ka nakaniisa tijöögö.

## 9

<sup>1</sup> Taalo ama eede ka rigiri ada ka waraga aaga ma eema tiya kadu kagürünigü iini ma tunggu co kadu tanno Masala. <sup>2</sup> Nussu a'a linggo naada na a'a tadhodho iini kidha ma kadu ma Makadoniya, niki eene a'da nagöre ma angnga no ka Akaiya no kindinaana oona ku'bu ma kambele ma tanangnga ku'bu, a tagu'daana ka eedi naada ka anangnga eege ka tüünü nggeege. <sup>3</sup> Lakiini a'a nagürünü nagöre ma angnga no kada, kudumma ta'diniga oona tanno iidü ana aaga, tanggaaga ta nüümö ün'dügüngngö amang kada tindinaana oona ku'bu afa ma tiya eede ka tiki aaga ya kungngo. <sup>4</sup> Nari'ba eede kara tö'dö nja kadu ma Makadoniya, öccö kaluna aaga kitaalo kindinaana oona ku'bu, a modolo tümmü angnga amang kede tafa teema a'da aaga kungngo ka anangnga ungngo ka tadhodho. <sup>5</sup> Yungngo eede ka tiki a'da a'diila eede kara tiki a nagöre ma angnga a'da kadhe a'a köö'dö kada aaga tindinaana eema yaada kindinaana ku'bu dhabbu taalo ndama rüsü.

*Leele dhabbu*

<sup>6</sup> Amang kada tagiigü a'da ömö'dü ya adiiniigü idhilli ya ara migile miini tidhilli, ömö'dü ya adiiniigü dhabbu

ya ara migile miini tadhabbu. <sup>7</sup> Ömö'dü ya asaasa tamana eema ku'bu amana ku'bu afa ma tiya iini ka tiraana ana eedi tiya iini ya, taalo tümmü rüümü taalo ömö'dü ma ta'bunu i'i kide, a tagussu tafa tagu i'i kudumma ömö'dü tiya amana eema a kadu ana eedi ka tinsili ya Masala masaasa i'i. <sup>8</sup> Masala mambaanya tagusu türü nye'd'de ka eema nye'd'de nja naganuuru aaga tana eema yaada kasaasa ya eema ya a'diila ya tagusunja aaga ka linggo tanno a'diila no in'dili. <sup>9</sup> Afa ma sorne ka tiki,

"Asümünaana eema ku'bu na anangnga a kadu tanno eema katitaalo kene no dhabbu, ta'diila niini a tüü ta'billi."

<sup>10</sup> Masala mamana tööyö a taleele nja miteene ma taguri ya mo, mara tanangnga nasigeene ka'diila a migile tadhabbu ma ta'diila ma nanggeedi tanno ada. <sup>11</sup> A Masala tanangnga aaga kadüüsü ka eema nye'd'de kungngo, amang kada tamana a kadu turi amang ka kadu tamana ta'diila a Masala kudumma ungngo.

<sup>12</sup> Tafiki'dö a linggo tanno a'diila no taalo köödhü ka tamana eema a kadu tanno Masala sugi, lakiini anangnga kadu kamana ta'diila a Masala dhabbu afe'de. <sup>13</sup> Kadu katafünügü Masala ko'do kudumma

tamma tanno ada nja taföönyö tumma ma İnjiilü nja ada kamana eema tanno ada ku'bu. Aaga tosse kide nja eene nja kadu töccö afe'de.<sup>14</sup> Kafara ka Masala kudumma aaga ana nanggeedi tanno eene, ara co kada kudumma türü tanno Masala na dhabbu no kanangnga aaga no.<sup>15</sup> Angnga tanangnga ta'diila a Masala ka türü tiya oono ka amana angnga dhabbu, taalo ömö'dü ma tambaanya teema kide.

## 10

*Bölis ümmöönö ka eyi tiya iini*

<sup>1</sup> A'a na Bölis, nasaasa aaga ana eedi ka tiicolo nja tidhi oona ku'bu na Almasiihi, a kadu könö tiki a'da, kede kara taneene nja aaga niicolo ka eedi, lakiini eede ka tanna ku'b'ba na rüsü.<sup>2</sup> Nasaasa a'da eede kara taneene nja aaga ya, aaga tafa tanangnga a'a ka tarüsü, rüsü neede kara taneene nja kadu iini kara tiki kide a'da ungngo kaneene taneene ma tuu'da.

<sup>3</sup> Kaneene angnga a tuu'da ma tadü'd'dü, lakiini angnga taalo keema koro'bo ma eema ma tuu'da.<sup>4</sup> Eema ma koro'bo yiidi taalo ama tuu'da ma tadü'd'dü, lakiini türü na Masala kara ta'böyö tarü'böönö na kïdhö no ku'bu.<sup>5</sup> Ungngo tarüdü ta'diniga oona coo'do nja niimö tiya akara ada diidi ma tussu tumma ma Masala anangnga

tumma nye'd'de ka pabusu, angnga tanangnga i'i kaföönyö tumma na Almasiihi.<sup>6</sup> Kada ka tümmü tumma ma Masala dhorro ya, ikiri ungngo ka tapusu kadu na silli eema no a tatuumö taföönyö naada.

<sup>7</sup> Kadinö aaga niimö ndama kürö miini, ömö'dü ya ussu eyi yiini a'da i'i ya ömö'dü tiya Almasiihi ya, fa kini ada dhorro kudumma iini ka tatiya Almasiihi ya, ungngo afe'de ka tanno Almasiihi afa i'i.<sup>8</sup> Taalo modolo magu a'a salsa na'diniga oona coo'do a tauugaara tanno Masala ka anangnga ungngo no, ma tindinaana aaga taalo ma taga'da aaga.<sup>9</sup> Afa tafeene afa nuurugu ri'ba ada ka nanggeedi, ana kawaraga tiya.<sup>10</sup> Ara ömö'dü könö ana kada a tiki a'da, "Waraga ya Bölis idhindhi indhi, lakiini kini ka taneene nja angnga a 'bangnga ka oona, a tumma niini taalo ka idhindhi."<sup>11</sup> Amang kene tussu kïdi karigiri ada ka waraga a'da kitaalo ungngo kütü kafeene nja tiya iidü kataneene nja aaga ya kungngo.

<sup>12</sup> Taalo ungngo kara tambaanya tosse nanggeyi niidü ku'bu afa kadu na funügü nanggeyi neene no ko'do, eege kagesse nanggeyi neene ku'bu unggodho eege ka köje ana oona neene ka oona unggodho eege a'da taalo ka'dara.<sup>13</sup> Lakiini ungngo taalo kara ta'diniga oona ko'do iini, lakiini tamana ma ndhiginö tanno

Masala ka anangnga ungngo no ndhiginö na Masala afa kaja ungngo tala aaga.<sup>14</sup> Taalo ungngo karisi ko'do a ta'diniga oona coo'do tanno iidi. Üürü ungngo taalo kö'dö kada, kudumma iidi ka tagöö'dö kada dhorro a'da İnjüli ma Almasiihi mungngo iidi.<sup>15</sup> Taalo ungngo ka'diniga nanggeyi niidi coo'do ka linggo tanno kadu könö ka talinggo no, lakiini kasaasa ungngo tassa ka tamma naada tinggiridene ikiri ndhiginö ma linggo naaja tadhabbu ka ndhiginö.<sup>16</sup> Ara ungngo teema tumma ma İnjüli no ku'b'ba ka naanya tanno ada no, taalo ungngo ta'diniga oona niidi coo'do ka linggo tanno ömö'di töccö ka ndhiginö ma linggo tanno iini.<sup>17</sup> Lakiini, "Ömö'di ya 'dinigi eyi yiini coo'do ya, fa kini a'diniga eyi yiini coo'do ana Uugaara."<sup>18</sup> Taalo ömö'di ya afünügü eyi yiini ko'do, i'i yungngo adho ka fiini, illi ömö'di ya Uugaara ka tafünügü i'i ko'do ya.

## 11

*Bolis nya kadafiini tanno korokoro no*

<sup>1</sup> A'a nasaasa a'da aaga tidhi nanggeedi ku'bu a 'banda'baga tiya eede ya idhilli ya, lakiini aaga kümmü aaga a'a nggeege. <sup>2</sup> A'a nagu'daana ka eedi ma aaga ka Masala kidha, kudumma eede ka tagümmü aaga

ku'bu ma ömö'di unggodho ya Almasiihi amang kede tanangnga aaga iini afa talömü minsili mo.<sup>3</sup> Lakiini a'a nari'ba afa ni ka taküsiñi Hawa ana ünggü tammo iini, ara nanggüdü naada taga'dadene nggeege ka fiini ma tamma ka Almasiihi.<sup>4</sup> Üürü ömö'di öccö öö'dö kada, eema tumma ma Yasu könö a'da taalo Yasu yiidi ka teema iini nya ada kara ta'duga korongore öccö keefe taalo afeene nya tiya ada ka'duga, alla İnjüli keefe taalo mafeene nya tammo ada ka'duga mo, ara kagala ka'dila.<sup>5</sup> Niiri a'a eyi yeede a'da taalo a'a no idhilli ka kadafiini tanno iifi no.<sup>6</sup> Üürü tumma ka kii'bi a'a ya, taalo tussu eema kara tii'bi a'a, lakiini kussu adene ungngo ka eema nye'd'de.

<sup>7</sup> Alla a'a natoroko kudumma eede ka öö'dö a tumma ma Masala aaga a'da taalo faana kide, nüpü eyi yeede co, ara aaga kico aadha?<sup>8</sup> Namma a'a ma ta'duga gürüüsü ka nakaniisa könö amang kede tamünügü aaga ko'do iini.<sup>9</sup> Kede ka taganeene nya aaga a'da taalo niimö kede, lakiini taalo nakan'dana ka ömö'di a'da anangnga niimö a'a, nagöre ma angnga na ö'dö ndama Makadoniya no kamana eema a'a nye'd'de, yungngo eede ka takardha ku'bu a'da nafa tanyamanya aaga ka oona ma eema i'ndili, yungngo eede ka tümmü

eyi yeede dhorro. <sup>10</sup> Ka tumma tanno Almasiihi ka tanna kede timin'da ya, taalo ömö'di ka naanya ma Akaiya tafaga a'a keere ka a'diniga oona tanno eede coo'do. <sup>11</sup> Aminna? Kudumma a'a taalo nasaasa aaga? Masala mussu tumma eede ka asaasa aaga. <sup>12</sup> Lakiini yeede ka talinggo 'bütingngö ya, ara a'a tüütü ka tüünö eema yeede ka tüünö, amang kede taadha kadu na kiki a'da eege ka'diniga oona coo'do, kalinggo afa mungngo kungngo. <sup>13</sup> Eege ka kadafiini tanno korokoro no, kalinggo ma tüüsöni kadu kümmü nanggeyi kada kadafiini tanno Almasiihi. <sup>14</sup> Taalo aaga kama tadhere, kudumma Ebliisi kara tatem'bele oona niini afeene nja tadhangga ma töyeene. <sup>15</sup> Taalo tadhere eege kungngo, üürü kadu ma linggo niini küünö ünggö a'da eege ka kadu ma linggo tanno a'diila no. Keere kungngo Masala mara tapusu eege ka tatoroko ma linggo tanno eene no.

### *Bölis eema tumma ma dhügürü tanno iini*

<sup>16</sup> Ara a'a teema afe'de, taalo ömö'di öccö tiki kide a'da a'a na'baga, lakiini aaga amma kede salsa ka taa'baga amang kede taduna niimö yeede ka ta'diniga oona coo'do iini. <sup>17</sup> Tumma neede ka teema no taalo tumma na Uugaara eege kamiini, lakiini a'a na'diniga oona coo'do afa 'baga. <sup>18</sup> Tumma ma kadu ma 'büdhülü

ka'diniga oona coo'do, ara a'a ta'diniga tekere. <sup>19</sup> Aaga na 'dara no, aaga ambaanya kadu na nagaaga no a dhodho! <sup>20</sup> Aaga ambaanya taneene ma kadu tanno ümmü aaga kada kasaga no, kanyooro aaga, kagu eema yaada, kamidhi aaga, kabbü aaga ka dhugudha. <sup>21</sup> Magu modolo a'a meede kara tiki a'da ungngo kagi'di ka oona ma linggo tanno. Üürü ömö'di öccö asaasa tabbü 'daniisö ma iini ya, neema a'a afa 'baga, ara a'a takardha ku'bu nabbü 'daniisö. <sup>22</sup> Üürü eege ka Ebraniin, a'a ka eyi yeede a'a na taga Ibrani taga Israyil, üürü ka kadaada tiya Abrahiim ya, a'a na 'bii'bala tiya Abrahiim afe'de. <sup>23</sup> Üürü eege ka kadu ma linggo tanno Almasiihi ya, ara a'a tiki afa ömö'di ya 'baga nagii'bi eege, nakambaanya a'a ta'b'badene nadagii'bi eege, nakete ka inde turi kungngo, naganna a'a ka pabuusu dhabbu nadagii'bi eege, nadakidhi oona ku'bu ka tabbü adene nadagii'bi eege. <sup>24</sup> Kabbü Yahüdü a'a tüidümmü, a tiiso kukumu ömö'di kaco iisine kafünü iidümmü afünü egüsö. <sup>25</sup> Nabbü adene a maguufi tiidoona, katiidirii a'a a nüigisi ta unggodho, a babüürü ta'bu ana a'a tiidoona, niiryü ka söödö ma to uuru ana ooso miini. <sup>26</sup> Ka tino tanno eede na dhabbu no, agalinggo 'bii'di a'a ka naato, a kanyooro tagalinggo a'a,

a Yahüdü tagalinggo a'a nja tanno taalo ka Yahüdü no, a kadu tagalinggo a'a ka naanya nja dhiile nja nagöre ma angnga no korokoro no. <sup>27</sup> Nadhügürü a'a nüünü mananggööyö nja tadinigöögö turi, nja iire a tenege, nümmü tenege turi, natambaanya olle nja taneene ana oona ku'bu. <sup>28</sup> Eema könö inggide afe'de, dhügürü meede ka tinigöögö ma nakaniisa nye'd'de kungngo. <sup>29</sup> Ömö'dü ka tagi'di na a'a tagi'di tekere? Ömö'dü tara tüünü tam'baga a 'bangnga miini taalo tagu a'a?

<sup>30</sup> Üürü dhodho ma ta'diniga oona coo'do ka inggide, ara a'a ta'diniga oona neede coo'do a tagi'di tanno eede. <sup>31</sup> Masala nja Pupa tiya Uugaara Yasu mara tafünüğünja ko'do ta'billi mo, mussu a'da taalo a'a nakorokoro. <sup>32</sup> Uugaara tiya linggo ada uugaara ya dhabbu ya ana eere a'da Alharis ya ma Demasak ya, anangnga kadu ka teere ka naginyeene ma anya meene kara tümmü a'a. <sup>33</sup> Lakiini nagöre ma angnga kanangnga a'a ka singgili kimi'dina aru kide kadhükü a'a caa'bu ndama ööye ma ar'da, noolonadene kini ka iisine.

## 12

*Bölis iji eema ya tö'dö ya*

<sup>1</sup> Ara a'a ta'diniga oona coo'do nadhodho. A'da

nussu a'a taalo taduna nüümö kide ara a'a tunggeene a tumma na ö'dönja no tanno Uugaara noono kala a'a kide no. <sup>2</sup> Nussu a'a ömö'dü ya Almasiihi inggide aga'dugadene aco 'dotombo'do tanno iidoona. A nagürüünü miini ka ndö'dö kada'baaga kafünü ka egiüsö, taalo a'a nussu ömö'dü ka tuu'da alla kürö ma tuu'da tanno iini, Masala oogo mussu. <sup>3</sup> Yeede ka tessu ya, ömö'dü a'dugadene aco 'dotombo'do a tuu'da tanno iini alla ana oona ku'bu, taalo a'a nussu Masala oogo mussu. <sup>4</sup> Nussu a'a a'da a'dugadene aco 'dü ma singgi nataföönyö tumma kide taalo tadü'd'dü ara tessu ka teema, itaalo ama iini ka tadünnü. <sup>5</sup> Ömö'dü ya miini ya ara a'a ta'diniga oona coo'do miini, lakiini a'a taalo nara ta'diniga oona coo'do illi a tagi'di tanno eede. <sup>6</sup> Üürü a'a nasaasa ta'diniga oona coo'do ya, taalo a'a na taa'baga, kudumma eede ka teema tumma ma timin'da. Lakiini taalo a'a na ta'diniga oona coo'do ii'dü ömö'dü öccö teema tumma ma a'a nja iini ka tiji aföönyö kede.

<sup>7</sup> Amang kede tafa ta'diniga oona coo'do ma tidihindhi ma tiya alanja a'a kakanangnga tümmü kede ka tuu'da kada tafiiñi tiya Eблиisi ma tabbü a'a. <sup>8</sup> Nafara a'a ka Uugaara tiidoona a'da ma'duga kede ka oona. <sup>9</sup> İkiri ka tiki a'a, "Türü neede ka

'dimo küdü, kudumma türü tanno eede kussu adene ka tagi'di." Nikiri a'a ka tadhodho na'diniga oona coo'do a tagi'di tanno eede no amang ka türü tanno Almasiihi taküdhü a'a ka oona.<sup>10</sup> Nggheege ya yungngo eede ka tadhodho ka tagi'di tanno eede nja teeladene nja midhi, a mananggööyö nja dhügürü ka üüdü ma Almasiihi, kudumma eede kara tagi'di nana türü.

*Bölis adinigöögö ma kadu  
ma Kürünsüs*

<sup>11</sup> A'a nungngo nanda'baga, aaga kungngo kaga'bunu a'a kide. Aaga kama tafünügü a'a ko'do, üürü taalo a'a na niimö ya, lakiini taalo a'a nadhilli ka "kadafiini tanno iifi no."<sup>12</sup> Natakalaala eema aaga nidhi oona ku'bu kada ka söödö amang kada tussu a'da a'a tafiini, eema keefe a türü ma tale'bele eema.<sup>13</sup> Niimö öccö yungngo ada ka titaalo kafeene nja türeene ma nakaniisa iini, illi tumma eede ka titaaaloo nanyamanya aaga ka oona a'da aaga tanangnga faana ma linggo tanno eede a'a. Aminna aaga fa kede ka eema tiya eede ka tagüuni ana aaga ya!

<sup>14</sup> A'a nungngo nakin-dinaana oona ku'bu ma tara tö'dö kada kanna asa tiidoona taalo a'a nara tanyamanya aaga ka oona lakiini nasaasa a'a aaga taalo almaala yaada, taalo laala indinaana eema ka kafaafa meene ku'bu, lakiini kafaafa eege kungngo kindinaana kene ku'bu.<sup>15</sup> Ara

oona ta'dila eede kede kara taama eema yeede naama eyi yeede afe'de. Üürü a'a nasaasa aaga dhabbu 'dee ara aaga tasaasa a'a idhilli?<sup>16</sup> Afiki nggeege taalo a'a nanyamanya aaga ka oona ma niimö. Lakiini könö kiki a'da a'a nakorokoro.<sup>17</sup> Na'duga a'a niimö kada ndama kadu tanno eede ka agürünü eege kada no?<sup>18</sup> Naga'bunu a'a Tito ka öö'dö kada nagürünü örre ma angnga nja iini, aga'duga Tito niimö kada? Taalo ungngo kagalinggo a Koronggore tiya unggodho ya, taalo ungngo kuurna fiini ya miini ya keere?

<sup>19</sup> Kiki aaga kide a'da tamma niidi no a'da ungngo ka ümmöönö ka eyi tiya iidi kada kidha? Keema ungngo ka Masala kidha ana Almasiihi, tumma no in'dili nagöre eede ma tindinaana aaga ku'bu.<sup>20</sup> Nari'ba a'a eede kara tö'dö kada kanna ara a'a taluna ka fiini tiya ada kitaalo kasaasa a'a iini ya, aaga taduna a'a ka niimö yaada taalo kasaasa ya, nja eede ka taluna tagoroo'bo kada ka söödö, nja kirimi nja midhi nja tisaana ka oona nja tanu aana ka oona nja tadhe kadu nja tabbü na'dugiisine nja taga'da 'buugu.<sup>21</sup> Eede kara tö'dö afe'de ara Masala meede teela a'a nafara ma kadu kadhabbu na agüüni tam'baga ka dhidha no, kitaalo kaadha kide no, temelö nja füngngö nja kadu kadhoonyo nja tatoroko.

# 13

## *Tumma na eere no*

<sup>1</sup> Tö'dö kada kada kanna neede kanda iidoona. Sorne iki a'da, "Nüümö ya ara teemadene ma kadu keera nja eene ka tiidoona kadinö kide." <sup>2</sup> Tö'dö kada kanna neede teera no, naganangnga a'a tumma a kadu tanno üünö tatoroko no, a'a nungngo nadirina afe'de a'da nitaalo a'a. Kede kara tafada taalo nara tana 'bangnga ma kadu tanno agüünö tatoroko kadhabbu no, alla kadu öccö. <sup>3</sup> Kudumma ada kasaasa tessu a'da Almasiihi eema ana onggo'do tammo eede, Almasiihi taalo agi'di ka oona ma talinggo nja aaga, lakiini i'i ana türü kada ka söödö. <sup>4</sup> A'da i'i abünnünja ka salii'bi a tagi'di tanno iini, illi i'i 'bitüngngö efe ka 'dö a türü tanno Masala. Ungngö afe'de kagi'di kini, lakiini a türü ma Masala ara ungngö tefe ka 'dö ana i'i ma talinggo ada aaga.

<sup>5</sup> Aaga iiri nanggeyi naada ta'diila, kümmü aaga tumma ma Masala dhorro aaga iiri eyi yaada alla taalo aaga kussu nanggeyi naada a'da Yasu Almasiihi ungngö ada ka oona? Illi kada ka tagi'digi ko'do ka ta'b'badene. <sup>6</sup> Kasaasa ungngö a'da aaga tessu a'da taalo ungngö kagi'di. <sup>7</sup> Kafara ungngö ka Masala a'da aaga tafa talingngö eema ya toroko ya, taalo a'da ungngö kii'baana, lakiini

amang kada tüünö eema ya a'diila ya salsa ungngö a kadu saga tümmü ungngö kagi'digi ko'do. <sup>8</sup> Taalo ungngö kara tambaanya tüünö nüümö ma tadiidi timin'da, lakiini kalinggo ada ungngö a timin'da. <sup>9</sup> Kudumma iidi ka tadhodho kiidü kara tagi'di, aaga tana türü, nüümö yiidi ka afara ka Masala kide ya a'da aaga tadho ka fiini aaga tinsili. <sup>10</sup> Narigiri ada aaga a'da nitaalo a'a kada kete amang kede tafa tüünö tatoroko ana aaga a'da a'a nungngö ata kete afa ma türü tanno Uugaara ka anangnga a'a no ma tindinaana aaga ku'bu taalo ma taga'da ada aaga ku'bu.

## *Tööjülü na eere no*

<sup>11</sup> Keere kungngö nagöre eede, aaga adhodho, nunggeene a'a ka fiini ma ta'diila, aaga toodo kede nasaasa a'a a'da aaga timi'di tumma ka unggodho aaga taneene a ta'diila, a Masala ma tasaasa nja ta'diila, mara taneene nja aaga.

<sup>12</sup> Aaga tööjülü tööjülü na insili no. <sup>13</sup> Kadu ma kaniisa kööjülü aaga nye'd'de kungngö.

<sup>14</sup> Fa ka türü tanno Uugaara Yasu Almasiihi nja tasaasa ma Masala nja tagureene ma Koronggore tiya Insili aneene nja aaga nye'd'de kungngö.

ajeene dhadha no (Galatiya 5.6).

## Waraga ya Bölis ma co Galatiya Tafa'da tumma

Galatiya ma ka riifö ma söödö ma 'büdhülü tiya ana eere 'bitingngö a'da Türkiya ya. Bölis nja Barnaba kageema tumma ma İnjüili ma Yasu ka naanya ma Galatiya könö, a kadu tö'dö ka kaniisa kadhabbu (Kadafiini 13–14). Lakiini ndama uuru tanno miini no köö'dö kadu kadagalaana kadu ma kaniisa a'da kümmü eema ma Yahüdü nja seriye miini a nagiide meene tatendhe. İkiri Bölis ka tiki a kadu ma kaniisa a'da Masala moolona kadu na amma ka Almasiihi no nye'd'de, taalo kadu na urna eema keere afa ma tiya kungngo. Iki a'da tumma kakki'dinja ku'bu nya a kadafiini tanno Almasiihi ka Örsaliim (Kadafiini 15).

Bölis iki a'da, iideene aja kara tanangnga Masala ka dhodho ana eema tiya aja ka talinggo ya, ara angnga ta'diila nja Masala a tamma nya, afa Abrahiim ya taada ma Yahüdü ya dhidha ya. (Galatiya 3.4). I'i ala angnga a'da taneene kada kadu ma kaniisa ya Koronggore ya Insili ya i'i yungngo alaala angnga kide amang kaja taföonyö tumma na Masala na idhindhi no amana angnga kasaasa

### Töötüü

<sup>1</sup> A'a na Bölis, a'a na tafiinü, taalo kadu alla ömö'di agürünü a'a, lakiini Yasu Almasiihi nja Masala tammo Pupa mo, miji i'i ka inde mo. <sup>2</sup> Nja nagöre ma a'a nye'd'de, kunggu tumma no co nakaniisa ka Galatiya. <sup>3</sup> Masala ma Pupa tiya aja nja Uugaara Yasu Almasiihi, tanangnga türü nja ta'diila ada ka oona. <sup>4</sup> Yasu üpü eyi yiini co ka üdü ma tatoroko tanno aja, oolona angnga ka tatoroko ma kadu ka 'büdhülü, tamana ma tasaasa ma eedi tiya Masala nja Pupa tiya aja mo turi ta'billi. Amiin. <sup>5</sup> A Masala tihindhi turi ta'billi.

### Tumma na Masala ka unggodho

<sup>6</sup> Nadhere 'do ada ka taadha ka talaana a türü tanno Almasiihi niini ka tagümmünü aaga iini no, ara aaga ka tuurna talaana ökönö. <sup>7</sup> Taalo tumma ma Masala ökönö afe'de lakiini kadu könö ka asaasa taga'da aaga ka nanggüdü kaga'da tumma na Yasu na 'diila no. <sup>8</sup> Üürü ungnego alla tadhangga ndama 'dotombo'do ya eemaga tumma ma toolonadene aaga keefe, taalo kafeene nja tanno iidi ka tageema co aaga no, ara Masala taga'da i'i. <sup>9</sup> Nagadirina aaga 'billi na'birneene 'bitingngö afe'de, üürü ömö'di ökönö alaana aaga a tumma ma

toolona taalo kafeene nja tanno ada kadussu no, ara Masala taga'da i'i turi.

<sup>10</sup> Taalo a'a neema tumma no a'da a'a nasaasa ta'diila ka kadu koona. A'a nasaasa Masala ma'diila nja a'a ana eedi. Niki o'o a'a nasaasa ta'diila nja kadu. Üürü a'a nasaasa tüünü nggeege taalo a'a nara tadasaga tiya Almasiihi.

### *Masala magümmünü Bölis*

<sup>11</sup> Nagöre eede, nasaasa a'a aaga tussu a'da tumma neede ka teemaga co aaga no, taalo ma tadü'd'dü egee kamiini. <sup>12</sup> Taalo eema ma elle ma kadaada i'i ya miini, italo ömö'dü agalaana a'a kide, lakiini Yasu Almasiihi agalaana a'a kide.

<sup>13</sup> Kaföönyö aaga a'da a'a nagümmü Masala ma Yahüüdü dhorro, neede ka alinggo kadu ma kaniisa na Masala, nasaasa tagirina eege. <sup>14</sup> A'a nagümmü tumma ma Masala ma kadaada ma angnga dhorro, nümmü tumma ma Yahüüdü nadagii'bi köje ma a'a. <sup>15</sup> Masala milli ka tagümmünü a türü tanno oono a'a a'da naleefe a'a ka niimö tammo eede ka eedi manangnga a'a ka talinggo linggo noono. <sup>16</sup> Moono ka ala 'Bii'bala yoono Yasu a'a a'da nadünügü tumma miini co kadu ma kajeene ya, taalo a'a nakindini ömö'dü öccö 'do. <sup>17</sup> Taalo a'a nasiro co Örsaliim naco tassa ka kadu tanno kadafiinü na kede kidha no lakiini nunggeene a'a naco anya

ma Piirigide, nassa ka tafada naco Demasak.

<sup>18</sup> Kede ka ndagu'du nagürüünü kiidoona ya nasirigö co Örsaliim ma tassa ka Bütrüs natüümö kide füngngö ada'baaga ana awwa. <sup>19</sup> Nitaalo nadinö ka tafiinü töccö nja iini, illi Yaguub ya örre ma Uugaara Yasu ya. <sup>20</sup> A Masala tadinö mussu a'da taalo tu'd'du eema eege kungngo kede ka rigiri ada co aaga. <sup>21</sup> Ndama kanna naco Süüriya nja Kilikiya. <sup>22</sup> Nitaalo nagusudene ka nakaniisa tanno Yasu Almasiihi ka naanya ma Yahüüdiya. <sup>23</sup> A'da kaföönyö a'da ömö'dü ya agalinggo angnga ya, i'i 'bitüngngö eema tumma ma tamma ka Masala niini ka tasaasa taga'da no. <sup>24</sup> Kanangnga ta'diila a Masala kudumma a'a.

## 2

### *Bölis nja kadafiinü ka Örsaliim*

<sup>1</sup> Kede ka ndagu'du nagürüünü kada'baaga kafünü egüsö nunggeene naco Örsaliim nja Barnaba, na'duga Tito nja a'a afe'de. <sup>2</sup> A'a naco Örsaliim kudumma Masala ka tiki a'a a'da naco nalaala tumma neede ka teema a kajeene. A'a nalinggo tumma no ka küdhü nja kadiifi, ii'dü tumma neede tadhügürü 'billi no nja 'bitüngngö kada tumma ün'dügüngngö. <sup>3</sup> Mündä Tito yeede ka tunggeene nja iini ya, taalo ka'bunu i'i ka aradene

kudumma iini taalo ataga Yahüdü. <sup>4</sup> Nagöre ma angnga kinggide kö'dö kaja ka söödö ka küdhü ka korokoro kümmü nanggeyi neene a'da eege nja angnga kaga'da tahürra naaja ta unggodho ka Yasu Almasiihi kasaasa angnga kada kasaga. <sup>5</sup> Ungngo taalo kamma kene kide salla idhilli kungngo, kudumma ungngo kasaasa aaga a'da aaga tüütü ka tamma ka tumma timin'da tanno Masala na 'diila no.

<sup>6</sup> A kadu na iifi no ka tamma na Masala no taalo kagusu niümö kide ka tumma. Nijöögö a'a ka eyi tiya eede taalo ta'bakala kene, kudumma Masala taalo müünii ada kadu könö ku'bu taalo kagusu niümö ka tumma tanno eede. <sup>7</sup> Lakiini eege kussu a'da Masala manangnga a'a ka talaana kadu na taalo ka Yahüdü no af a moono ka anangnga Bütrüs ka talaana Yahüdü kungngo. <sup>8</sup> Kudumma Masala manangnga Bütrüs ka tafiinii ma Yahüdü manangnga a'a ka tafiinii ma kadu na taalo ka Yahüdü no. <sup>9</sup> Yaguub nja Bütrüs nja Yühanna, eege kungngo ka nagiide ma kaniisa, kassa ka türü na Masala ka anangnga a'a no, kamma kede nja Barnaba kanangnga ungngo ka talaana kadu na taalo ka Yahüdü no, ara eege ka talaana Yahüdü. <sup>10</sup> Niümö yeene ka asaasa kidi ya a'da ungngo tafa tüürü ma kadu ma kaniisa ya eema ka titaaloo kene no ka Örsaliim

no, a niümö yeede ka asaasa ka talinggo 'bucca ya.

### Bölis agirnaana ka Bütrüs

<sup>11</sup> Ka Bütrüs ka öö'dö ka Antakiya, nagirnaana kini kudumma iini ka talinggo eema ya toroko ya ka kadu kidha. <sup>12</sup> Ka kadu tanno Yaguub ka kürünü eege no ka tüfürü tö'dö ya, aagu Bütrüs eema nja kadu tanno taalo ka Yahüdü no, a kene ka ndö'dö ya iküri ka taadha kini ka oona taalo aguri nja eene kini ka ari'ba a Yahüdü tanno asaasa taradene no. <sup>13</sup> I'i aduna Yahüdü na ma kaniisa no ka Antakiya kafeene nja iini ka taadha kagu eema nja kadu tanno taalo ka Yahüdü no, a Barnaba ka eyi tiya iini uurna eege keere ma eema ma tatoroko tiya eene no.

<sup>14</sup> Kede ka tasala eege, taalo kunggeene ka fiinii ma Masala tiya dhorro ya, niküri ka tiki a Bütrüs ka kadu kidha niki iini, "O'o na taga Yahüdü naneene af a kadu na taalo ka Yahüdü no na o'o saga asaasa kadu na taalo ka Yahüdü no ka taneene af a Yahüdü amana?"

<sup>15</sup> Ungngo kageenedene kada Yahüdü taalo ungngo ka kajeene tanno oroko no, <sup>16</sup> kussu angnga a'da Masala taalo manangnga ta'diila ömö'di kudumma iini ka tümmü seriye tiya Müüsa, illi ömö'di ya amma ka Yasu Almasiihi ya. Ungngo afe'de kamma ka Yasu Almasiihi taalo linggo ma Seriye.

Ömö'dü taalo a toolonadene alingga ma seriye.

<sup>17</sup> A kaja kara tasaasa ta'diila ka Almasiihi kaduna angnga nanggeyi naaja ka toroko afe'de kafeene ungngo nja kajeene, nggeege 'dee Almasiihi ya üünü tatoroko? Kaw, taalo nggeege. <sup>18</sup> A kede ka tapadaga oona keere naco ka seriye afe'de yeede ka takanu kide nye'd'de, nggeege ara a'a taga'da seriye ya Masala. <sup>19</sup> Ka seriye neyi a'a ka seriye amang kede tefe ka 'dü ka Masala. <sup>20</sup> Neyi a'a nja Almasiihi a tefe ka 'dü neede 'bitingngö no na Almasiihi, tefe ka 'dü neede 'bitingngö ka tuu'da a tamma ma 'Bii'bala ma Masala ya asaasa a'a ümmünü eyi yiini a'a. <sup>21</sup> Taalo a'a nanu ka türü tanno Masala, kadu kata'diila ka nanggeyi neene kene ka tümmü seriye 'dee, ara inde na Almasiihi taga tumma ün'düngngö?

### 3

*Seriye alla tamma ka Masala?*

<sup>1</sup> Ka nagaaga ma Galatiya, mada aga'da aaga ka nanggüdü? Taalo aaga ka kiiri tumma neede ka tageemaga dhorro ka kadu kidha a'da Yasu abünnünja ka salii'bi ka üdü ma angnga? <sup>2</sup> Aaga adirina tumma a'a ka unggodho, Koronggore ma Masala ya 'dee ö'dö kada ka oona kudumma

ada ka tamma ka seriye tiya Müüsa, alla kamma aaga kide kudumma ada ka taföönyö kede? <sup>3</sup> Kanagaaga aaga nya? Kiki aaga kide a'da aaga tatüümö linggo na Koronggore ma Masala ka tagüünü ana aaga ya? <sup>4</sup> Kad hügürü aaga dhabbu ün'düngngö? Ara tadhügürü ün'düngngö nya? <sup>5</sup> Masala 'dee man angnga Koronggore aaga nja linggo ma türü kada ka söödö kudumma ada ka talinggo a tumma ma seriye alla kudumma ada ka tamma kada ka taföönyö tumma kiid?

<sup>6</sup> Aaga iiri Abrahiim, afa ma Sorne ka tiki, "Amma ka Masala ana eedi dhorro. Mamma kini ka tamö'dü tiya a'diila ya." <sup>7</sup> Amang kada tussu a'da kadu na amma ka Masala no eege ka laala tiya Abrahiim. <sup>8</sup> Sorne ma Masala illi ka takiki a'da Masala mara tanangnga kadu na taalo ka Yahüdü no ka tamma kini a tamma. Yungngö oono ka tiki Abrahiim, "Ara a'a tanangnga baraka a kadu ka 'büdhülü ana o'o."\* <sup>9</sup> Ömö'dü na amma no kara tosse ka baraka nja Abrahiim ömö'dü ya adho ka fiinii ya.

<sup>10</sup> Kadu na a'dana ka seriye tiya Müüsa koona no, ara Masala taga'da eege kudumma sorne ma Masala ka tiki a'da, "Taama ka tö'dö ka ömö'dü ya taalo ümmü seriye ya

Müüsa tiya kirinja ka Sorne ma seriye tiya Müüsa ya nye'd'de kungngo."†  
 11 Tumma dhorro taalo Masala mamma ka ömö'di kudumma iini ka tümmü tumma ma seriye tiya Müüsa. Kudumma Sorne ma Masala iki, "Ömö'di ya a'diila ka eedi a tamma ara taluna tefe ka 'di na Masala."‡<sup>12</sup> Fünni ma tamma ma Masala, ambana njaana ku'bu nja taneene ma seriye ya iki a'da, "Ömö'di ya aföönyö tumma ma seriye ya, ara taluna tefe ka 'di."§<sup>13</sup> Almasiihi oolona angnga ka tatoroko ma seriye, kini ka toroko ma angnga kudumma iini ka takirinja ka sorne, "Ömö'di ya toroko ya a'da a'dalanja ka fa."<sup>14</sup> Kudumma nüümö tiya Yasu Almasiihi ka takalinggo ya, baraka ya a tananja Abrahiim, agananja a kajeene, kafiigi nggeege ara angnga ta'duga timi'di tumma ma Koronggore tiya Insili ya.

### *Seriye ya Müüsa nja timi'di tumma nja Abrahiim*

15 Nagöre eede, ara a'a teema tumma ma nakömö'di taalo ömö'di ma tambaanya tagildhe timi'di tumma na ömö'di nja eene kagusu nüümö könö kide üürü kakidhö.  
 16 Masala mageema tumma nja Abrahiim nja 'bandaada miini. Sorne ma Masala taalo iki a'da, "kadaada

kadhabbu," lakiini iki, "'bandaada unggodho," i'i yungngo Almasiihi.<sup>17</sup> A'a nasaasa tiki aaga a'da, Masala mimi'di tumma noono nja Abrahiim. A seriye ya ka anangnga a Müüsa küfürü ka köö'dö a nagürüünü 430 a seriye ya taalo taga'da timi'di tumma na Masala aga'da tumma ka takiki a Abrahiim.<sup>18</sup> A Masala ma tanangnga baraka aaga kudumma ada ka tümmü tumma ma seriye, iiya tumma noono ta tumma ün'dügüngngö. Tumma dhorro, Masala mana 'bangnga manangnga baraka Abrahiim a timi'di tumma.

19 Aminna tumma ma seriye tiya Müüsa köö'dö nya ka kusunja kide afe'de? Kagusunja kide ma tala eema ya toroko ya kadu ka tüüni ya a taneene indhögü 'bandaada ma Abrahiim yoono ka takiki a'da atö'dö ya. Masala magürünü tadhangga a tumma ö'dö iini, a Müüsa ta'duga öö'dö iini a kadu kudumma iini anna ka söödö ma kadu nja Masala.<sup>20</sup> Ömö'di ya anna ka söödö ma kadu nja Masala ya taalo alinggo ada ömö'di unggodho, alinggo ada a kadu nye'd'de, a Masala ma unggodho.

21 Seriye 'dee ma ta'bana ko'do nja tumma tanno Masala ka tageema no? Kaw, üürü seriye agananja a kadu ara tö'dö a tefe

† 3:10 3.10 Seriye ya eera ya 27.26    ‡ 3:11 3.11 Habakök 2.4    § 3:12 3.12 Lawi 18.5    3:13 3.13 Seriye ya eera ya 21.23    3:16 3.16 Takwiin 12.7; 13.15; 24.7

ka 'dī, nggeege ara tinsili tagöö'dö ana seriye timin'da. <sup>22</sup> Lakiini Sorne ma Masala iki a'da kadu nye'd'de kungngo ka niisö ma türü ma tatoroko. I'i yungngo a Masala ka anangnga Koronggore tiya oono ka tamma ka Yasu Almasiihi, ka a kadu tanno amma kono no.

<sup>23</sup> Angnga 'do kaganna angnga ka pabuusu ma tumma ma seriye tiya Müüsa, ara Almasiihi ka öö'dö assa ka tafa'da fiini ma tamma ka Masala na dhorro no ana eere tiya Almasiihi. <sup>24</sup> A tumma ma seriye tiya Müüsa ka taafa kaja ara Almasiihi ka öö'dö amang kaja ta'dila ka Masala kidha kaja ka tamma kini. <sup>25</sup> A 'bitingngö kamma angnga ka Almasiihi a nanggeedi dhorro, taalo tumma ma seriye tiya Müüsa ka tafa kaja afe'de.

### *Laala ma Masala ka tamma*

<sup>26</sup> Aaga nye'd'de kungngo ka laala tiya Masala ada ka tamma ka Yasu Almasiihi. <sup>27</sup> Kudumma aaga nye'd'de ka tagambeesedene aaga ta unggodho nja Almasiihi, a tefe ka 'dī na Almasiihi ta'bürü aaga ka oona.

<sup>28</sup> Taalo tambananjaana ku'bu nja Yahüdü nja kadu tanno taalo ka Yahüdü no, nja kasaga nja kadu tanno dhorro no, nja iiya nja nagide kudumma aaga in'dili ka unggodho ka Yasu Almasiihi. <sup>29</sup> Üürü aaga ka kadu tanno Almasiihi, aaga ka laala

tiya Abrahiim, a Masala tanangnga faka moono ka takadirina Abrahiim ya aaga.

## **4**

<sup>1</sup> Niimö yeede ka tiki ya 'dee, ka 'bii'bala ka taleefe tidhilli ya afeene afa tasaga, kussu angnga a'da i'i atakarna ka eema tiya faafa miini i'i üfürü tadhabbu ma tafa kide. <sup>2</sup> I'i aleefe tanna ka kadu könö ka niisö kaafa kini, ara ka öö'dö ka nagürünü na faafa miini ka takiki no, assa afa ka eema tiya iini. <sup>3</sup> Angnga ka eyi tiya aja kaja ka tagaleefe taga laala, angnga kagasaga ma naguugaara ma 'büdhülü. <sup>4</sup> Ka uuru tanno Masala ka timi'di tumma no ka ndö'dö ya, ikiri Masala magürünü 'Bii'bala yoono ya agageenedene ndama aka mo, adageenedene ka seriye. <sup>5</sup> Amang kini ma toolona na aganeene taneene ma seriye, angnga ta laala ma Masala. <sup>6</sup> Kudumma angnga ka laala tiya Masala dhorro, yungngo oono ka kürünigö a Koronggore tiya 'Bii'bala tiya oono aco kaja ka nanggeedi iidhe a'da, "Abba, Pupa." <sup>7</sup> A 'bitingngö taalo o'o na tasaga afe'de, o'o na 'bii'bala tiya Masala, Masala manangnga o'o ka takarna ka eema tiya oono.

### *Kadu ma Galatiya*

<sup>8</sup> Ka dhidha a'da küfürü aaga tagussu Masala, kagasaga aaga ma namasala ka 'büdhülü mitaalo ka dhorro no. <sup>9</sup> A 'bitingngö sa

aaga tussu Masala, a Masala mussu aaga, aminna agu aaga, ara aaga tapadaga ka eema tiya agi'di na oroko no afe'de? Kasaasa aaga tapadaga ka tadasaga afe'de?<sup>10</sup> Kanaana aaga iïye ka naguuru nja nagatereeene nja tagu'du ma ürüünü.  
<sup>11</sup> Nari'ba a'a ada aaga ka linggo tanno eede ka tagalinggo ada aaga no nye'd'de tanggaaga ta nüümö ün'dügüngngö.

<sup>12</sup> Nagöre eede, a'a nasaasa aaga a'da aaga tafeene nja a'a, kudumma eede ka afeene nja aaga. Taalo aaga ka küüni nüümö ya toroko ya ana a'a.  
<sup>13</sup> Amang kada tussu a'da kede ka tamaara taalo aaga kakaanu kede, aaga taalo kagamidhi a'a, kagala aaga ka tamma kede adha.  
<sup>14</sup> Kada ka tagaama miini aaga taanu kede aaga tagamidhi a'a ka tin'di tanno eede, illi aaga taalo ka küüni nggeege, kagala aaga katamma kede 'do afa tadhangga ya Masala afa a'a na Yasu Almasiihi ka eyi tiya iini kungngo. <sup>15</sup> Kadhadho aaga ka uuru tanno miini no, a dhodho na miini no könnyö aaga 'bitüngngö? Ara a'a tiki a'da kasaasa aaga a'a dhindho afa maada ka tagodhe laala ma iïye yaada aaga tanangnga a'a.  
<sup>16</sup> Asa aaga tümmü a'a 'bitüngngö kada kirimü ka oona kudumma eede ka tageemaga ka tumma na dhorro no aaga?

<sup>17</sup> Kadu no kasaasa aaga dhorro, lakiini taalo a'diila nja aaga, eege kafaga aaga keere kede ka oona amang kada tasaasa eege. <sup>18</sup> A'diila nggeege kada ka tarna iiya yaada ka eema tiya a'diila ya, aaga tüüni nggeege turi aaga tafa tan'dana kede nöö'dö, aaga sa ka talinggo. <sup>19</sup> Laala eede, nadhügürü a tin'di kudumma aaga, afa aka ma eedi kagu oogo ma teene mo kungngo, ara a'a tüü kadhwügürü nggeege ara tumma na Almasiihi kaco kada ka nanggeedi dhorro amang kada ta kadu tanno Almasiihi dhorro. <sup>20</sup> Nasaasa a'a taneene nja aaga 'bitüngngö amang kede tagere tumma neede co ada ka nanggüdü kudumma eede taalo nussu minna agu aaga, aaga tüüni kungngo.

### Hajir nja Sara

<sup>21</sup> Aaga tirina a'a, aaga no asaasa seriye ya Müüsa ka anangnga a Yahüüdü no, kussu aaga a'da seriye ya Müüsa kiki nya? <sup>22</sup> Sorne ma Masala iki a'da, laala aganna ka Abrahiim keera, ya 'bii'bala ma madasaga, aya ta'bii'bala ma aka tammo dhorro mo. <sup>23</sup> 'Bii'bala ya madasaga ageenedene ka tuu'da kungngo, a 'bii'bala ya aka tammo dhorro mo ya ageenedene ka tumma tanno Masala ka tageema ara ateenedene no.

<sup>24</sup> Iiya na eera no kafeene nja timi'di tumma keera, timi'di tumma na Masala nja Israyil ka anya ma

Siina noono ka anangnga tumma noono eene no, afeene nja laala tiya Hajir ka tageene kada kasaga kungngo. <sup>25</sup> Hajir mafeene nja anya ma Siina manna ka anya ma Piirigide mafeene nja anya ma Örsaliim ma 'bitingngö mo manna ka tadasaga nja laala tiya oono nja kadu miini kada kasaga mo mümmü tumma ma seriye tiya Müüsa mafa kide mo. <sup>26</sup> Lakiini Örsaliim ma 'di ma Masala mo, mafeene nja tammo dhorro mo, oogo mungngo ma niimö tammo aja. <sup>27</sup> Sorne ma Masala iki, "O'o namele, nitaalo nageene no, ikijeene, nadhodho o'o nitaalo nussu tin'di ma teene no, kudumma aka maneene unggodho oogo a'da taalo nyori kono, ara laala tanno oono tadhabbu mii'bi aka ma ana nyori mo."

<sup>28</sup> Aaga na nagöre eede, kafeene aaga nja Ishak kudumma aaga ka laala ma tumma tanno Masala ka tadirina Abrahiim, afa ma Ishak kungngo. <sup>29</sup> 'Billi ka naguuru tanno miini no 'bii'bala ya ageenedene a tuu'da ün'dügüngngö agalinggo adene 'bii'bala ya ageenedene ndama Koronggore ya, üünidene 'bitingngö. <sup>30</sup> Lakiini tumma na Masala kiki nya ka sorne? Iki sorne kungngo, "Uuru madasaga

ka tino nja 'bii'bala tiya oono, taalo atakarna ka niimö 'do. A 'bii'bala ya aka tammo dhorro mo ara takarna ka eema nye'd'de kungngo." <sup>31</sup> Angnga 'bitingngö nagöre eede taalo angnga ka laala tiya aka tammo ma madasaga mo, angnga ka laala ma aka tammo dhorro mo.

## 5

*Tahurra ka Yasu Almasi-  
ihi*

<sup>1</sup> Almasiihi anangnga kada hurra amang kaja taneeene kada kadu tanno hurra no. Aaga idhi oona ku'bu aaga tafa tapadaga ka tadasaga afe'de.

<sup>2</sup> Aaga toodo ka tumma tanno eede a'a no Bölis no, üürü aaga katendhe ma nanggeyi tanno ada ara Almasiihi ta niimö ün'dügüngngö ana aaga. <sup>3</sup> Ara a'a teema nja aaga afe'de ömö'di ya afa ka eyi tiya iini atendhe ya, fa kini afa ka tumma ma seriye nye'd'de. <sup>4</sup> Aaga na asaasa ta'diila nja Masala a tümmöönö ma seriye no ka tadheene nja Almasiihi aaga tagu'b'ba ka türü ku'bu.

<sup>5</sup> Lakiini angnga kündhígí Masala manangnga angnga ka a'diila nja oono, angnga tündhígí oogo a tamma nja türü ma Koronggore tiya oono. <sup>6</sup> Kaja ka tamma ka Yasu Almasiihi ya, nassa ka tatendhe alla taalo o'o natendhe, taalo a niimö 'do. Niimö ya asaasadene

ya, tamma na linggodene a tasaasa no.

<sup>7</sup> Kaganeene aaga ka dhidha ka'diila, a mada afada ana aaga ka fiinii tiya dhorro ya? <sup>8</sup> Niimö ya agüüni adene ya taalo ndama Masala tammo magümmünü aaga mo.

<sup>9</sup> "Bandigüüdi idhilli kungngo atanangnga elö ka tüüfü." <sup>10</sup> Namma a'a ka tumma tanno Uugaara ana eedi a'da aaga 'bitüngngö ya taalo kaföönyö tumma ma fiinii ün'düngüngö afe'de. Ömö'di ya aga'da aaga ka nanggüdü ya ara Masala saga tüünii tatoroko ana i'i salla i'i ka tafaanya. <sup>11</sup> Nagöre eede, üürü a'a naleefe teema tumma ma taradene, aminna agu a'a nalinggo adene? Nggeege ara takara ka salii'bi ka'dugadene. <sup>12</sup> A'a nagala ka asaasa kadu no anyamanya aaga ka oona a tumma ma taradene kunggunu co iini ka'dili nanggeyi neene.

<sup>13</sup> Nagöre eede, Masala magümmünü aaga a'da aaga tafa ta kasaga ma eema ma tuu'da, tumma na Masala ka tümmünü aaga iini kii'di tanangnga aaga ka tüünii eema ya toroko ya, aaga asaasa kadu nye'd'de aaga takinyi linggo eene a tasaasa. <sup>14</sup> Tumma na Masala ka öö'dö iini a Yahüüdü no, kananja ka niimö unggodho a'da, "Asaasa ömö'di ya kete küdü ya afa müüdü ka

asaasa eyi yüüdü kungngo." <sup>15</sup> Kada ka tüütü ka tamidhi ajeene a taguri ajeene unggodho aaga, aaga afa ka oona aaga adinii ko'do ii'di aaga tilii ajeene ka oona unggodho aaga.

### *Tefe ka 'dii ma Koronggore tiya Insili ya*

<sup>16</sup> Niküri a'a ka tiki aaga a'da aaga taneene a türü ma Koronggore tiya Masala amang kada tafa tüünii eema ya toroko ya a tuu'da ma tamö'di. <sup>17</sup> Eema ya tuu'da tanno aja kasaasa ya, i'i yungngo a Koronggore tiya Insili ya ka faga angnga keere iini ya i'i ya minni, a Koronggore ya Insili ya asaasa angnga ka talinggo eema ya a'diila ya tuu'da tanno aja katitaalo kasaasa no, tumma neene taalo kicaana ka oona nja tiya ada ka asaasa talinggo ya. <sup>18</sup> Kada ka talinggo a tumma tanno Koronggore ma Masala ka tiki aaga no, taalo aaga ka tanna ka tadasaga ma tumma ma seriye tiya Müüsa ka öö'dö iini a Israyil no.

<sup>19</sup> Linggo na toroko na tuu'da ka asaasa no kussu adene, temelö nja tadinigöögö ma füngngö nja kadu kadhoonyo. <sup>20</sup> A namasala tanno toroko mo kabbü tamüürö, kamidhi kadu, keema koro'bo, kanggoroo'bo kete kete, kasaasa nanggeyi neene, kanu ka kadu, kadhegedhe nanggeyi

niini nja kadu töccö.  
<sup>21</sup> Linggo ma kürimi, kooye ngeeli keke kide, ana eema tiya toroko ün'dügüngö ana eema töccö 'do, ara a'a tadirina tumma afa ma tiya ka dhidha ya kungngo, kadu na aneene kungngo no taalo kara takarna ka tauugaara ma Masala.

<sup>22</sup> Lakiini ta'diila ma Koronggore ma Masala tasaasa, dhodho, ta'diila ma eedi, tidhi oona ku'bu, 'bangnga, taneene ta'diila, tinsili ka eedi nja kadu.  
<sup>23</sup> Ta'diila ma tamö'di nja tümmü eyi yüdü nafa takordo kordo kada kadüüni nggeege ya taalo aaga ka taga'da tumma na Masala kungngo ka seriye no.  
<sup>24</sup> Kadu na Yasu Almasiihi no kabünnü oona neene na oroko no ka salii'bi nye'd'de nja tasaasa ma eema ma 'büdhülü.  
<sup>25</sup> Angnga kefe ka 'di a Koronggore ma Masala a kaja ka tefe ka 'di a Koronggore ya Masala keere.  
<sup>26</sup> Kada fa tan'dinigi oona naaja ko'do angnga tafa teela kadu angnga ta'digineene nja eene, angnga tafa takirimi kadu ma tasaasa eema yeene.

## 6

*Tüüni ada ta'diila a kadu nye'd'de*

<sup>1</sup> Ka nagöre eede, ka ömö'di töccö ana kada ka tümmü adene ka niimö tiya toroko ya, aaga na ümmü tumma ma Masala no ana eedi dhorro no, aaga

kungngo ka talaala i'i ka fiinii ta'diila, afa ka eyi tiya üdü ii'di o'o ta'dinggö ka tatoroko ka eyi tiya üdü afe'de.  
<sup>2</sup> Aaga faana ka oona aaga takinyi njaana ko'do a linggo, nggeege ara aaga talinggo eema ana seriye tiya Almasiihi ka asaasa angnga iini ya.  
<sup>3</sup> Ömö'di ya üünii eyi yiini a'da i'i ii'baana ya tumma dhorro taalo i'i ya niimö, i'i iisini eyi yiini.  
<sup>4</sup> Ömö'di türi linggo niini ta'diila, üürü i'i ya a'diila ya asa ka tan'dinigi eyi yiini coo'do asa kafa türi eyi yiini afa ömö'di öccö.  
<sup>5</sup> A'a niki nggeege kudumma ömö'di tiya talinggo niimö ya, i'i yungngo assa ka tammo iini unggodho i'i.

<sup>6</sup> Kadu na laadene ka tumma ma Masala no, fa kene kosso ka eema tiya eene ya a 'diila ya nja kadu tanno laana eege no.

<sup>7</sup> Aaga fa iisini nanggeyi naada, taalo Masala ma tiisnidene, ömö'di ya adini migile ya i'i yungngo ataraana.  
<sup>8</sup> Ömö'di ya adiniigü a tasaasa ma tuu'da ya, ara taluna tuu'da ma tatoroko, ömö'di ya adiniigü a Koronggore ya ara taluna tefe ka 'di ka Koronggore.

<sup>9</sup> Aaga fa tagi'di ka linggo tanno 'diila no keere, ara angnga taluna eema ya a'diila ka uuru tanno Masala ka tö'dö no kaja ka tafa tagi'di ko'do.  
<sup>10</sup> Nggeege kada kalinggo eema ya a'diila ya a kadu aja ka taduna fiinii, münda kadu

na amma ka Yasu Almasiihi  
no angnga ta'diila nja eene  
nye'd'de kungngo.

*Tööjüllü na eere no*

<sup>11</sup> Aaga assa ka kireere'be  
tanno dhabbu no, eede ka tarigiri  
ada aaga a nüüsö tanno  
eede no.

<sup>12</sup> Kadu na asaasa tal-  
inggo eema ma tuu'da  
ün'dügüngngö ma tasaasa  
Yahüüdü a'da ka'diila nja  
eene no, eege kungngo  
ka asaasa ta'bunu aaga  
karadene, eege kalingngo  
nggeege amang ka kadu  
tafaga eege keere kudumma  
tamma ka salii'bi tiya  
Almasiihi. <sup>13</sup> Münda kadu  
na aradene no, taalo kümmü  
tumma ma seriye, eege  
kasaasa a'da aaga taradene  
amang kene tabbü 'daniüsö  
a'da aaga kuurna taradene  
ma tuu'da keere. <sup>14</sup> Üürü  
a'a nasaasa tafünögü eyi  
yeede ko'do ya, nafünögü  
i'i ko'do ana Yasu Almasiihi  
kudumma iini ka teyi ka  
üüdü ma angnga, kudumma  
inde tanno iini no kafa ka  
eema ma 'büdhülü itaalo  
a nüümö ana a'a, a'a ka  
eyi tiya eede taalo a'a  
na nüümö ka 'büdhülü.  
<sup>15</sup> Ömö'dü saga tatendhe  
üürü taalo atatendhe taalo  
Masala manu kini, nüümö  
ya agu'daana ya taluna tefe  
ka 'dü ma Koronggore ma  
Masala ya 'diila ya. <sup>16</sup> Ara  
Masala tanangnga ta'diila  
a 'bangnga a kadu tanno  
uurna tumma noono keere  
no, nja kadu na amma kono  
no nye'd'de.

<sup>17</sup> Ndama uuru tanno taalo  
a'a nasaasa ömö'dü anya-  
manya a'a ka oona, nagoola  
neede ka oona no, nagoola  
ma kadu tanno adiïdiri a'a  
kudumma eere tiya Yasu.

<sup>18</sup> Nagöre eede, fa ka  
türü tanno Uugaara Yasu Al-  
masiihi ka aneene nja aaga  
ïn'dili. Amiin.

## Waraga ya Bölis ma co Afosus Tafa'da tumma

Bölis arigiri ada waraga a kadu ma kaniisa ka Afosus anya mo ka 'büdhülü tiya ana eere 'bütingngö a'da Türkiya mo. Bölis aganna ka Afosus a nagürüünü kidoona adünnü tumma ma İnjili a kadu tamma ka Almasiihi kadhabbu kaadha katümmü eema ma masala ma Artamis (Kadafiini 19).

Bölis arigiri ada waraga co kadu ma Afosus a'da ungngo ka pabuusu ka Rööma (Afosus 3.1). Arigiri iki a'da naganuuru kanda afaradene ya ara eema nye'd'de tanna ka niisö ma Almasiihi. Ka kadu kanda uruna Yasu keere kara ta unggodho ka Almasiihi kada kadu ka unggodho. Bölis eema nja tanno iiri waraga no a'da kasaasa ajeene kiicolo ka nanggeedi nja kadu könö kaadha ka taneene ma 'billi no ma korokoro nja tam'baga, kaneene taneene ma timin'da nja 'bangnga nja tafa ka tatoroko tanno kadu dhidha.

### Tööjülü

<sup>1</sup> Waraga ö'dö ndama Bölis tafiiyi ya Yasu Almasiihi a tasaasa ma eedi tiya Masala na ungu co kadu ma kaniisa no ka Afosus no nja tanno amma ka Yasu Almasiihi no.  
<sup>2</sup> A Masala ma Pupa tiya

aja nja Uugaara Yasu Almasiihi, tanangnga türü aaga nja ta'diila.

*Baraka ma koronggore ka Almasiihi*

<sup>3</sup> Kada nangnga ta'diila a Masala nja Pupa tiya Uugaara tiya aja Yasu Almasiihi manangnga baraka ma koronggore angnga, baraka ya Almasiihi ka 'dotombo'do.  
<sup>4</sup> Masala magesse angnga ka Almasiihi a'da müfürü tarü'bü 'büdhülü amang kaja tinsili a'da taalo hetti kide kidha moono ka tasaasa.  
<sup>5</sup> Masala milli ka takiki a'da oogo tümmü angnga kada laala tiya oono ana Yasu Almasiihi oogo masaasa ka eyi tiya oono.

<sup>6</sup> Kadagafünüğü Masala ko'do ka türü tanno oono yoono ka anangnga angnga a'da taalo faana kide ka 'Bii'bala tiya oono ka asaasa i'i ya.  
<sup>7</sup> Kagoolonadene angnga ana eriidö tiya iini ma taagala tatoroko aja ka oona, a tüüsü ma türü tanno oono  
<sup>8</sup> yoono ka anangnga angnga ka tadhabbu ma ta'dara tanno oono nja tessu eema.  
<sup>9</sup> Eema ya Almasiihi ka tagüünii, Masala mala fiini ma eema tiya oono ya küdhü ya angnga.  
<sup>10</sup> Linggo na Masala kara tatüümö eege ka uuru miini kono ka tö'dö ana eema tiya oono ka tarü'böönö no nye'd'de ya ka 'dotombo'do ya nja tanno ka 'büdhülü ka niisö tanno Almasiihi tiya Uugaara ya.

<sup>11</sup> Masala magesse angnga afe'de manangnga angnga

kada unggodho ka Almasihi, kudumma oono masaasa tüünii nggeege. Oogo magüünii eege nye'd'de afa moono ka asaasa kungngo.<sup>12</sup> Kada kafünügü töyeene na Masala ko'do angnga na kindhígí oogo jiddi ma 'billi no, ana eere ma Almasihi.<sup>13</sup> Aaga afe'd'e aaga ka kadu tanno Masala ka taföönyö tumma ma timin'da, tumma na 'diila no toolona aaga no aaga tamma aaga tabünnü hitimi a Koronggore ya Insili ya oono ka tatiraana ya.<sup>14</sup> I'i yungngo afaana maaja kara takarna kide idhi a Masala tafa kadu noono ma tafünügü oogo ko'do ka tüdhindhí tanno oono.

*Tamana ta'diila nja tafara ka Masala*

<sup>15</sup> I'i yungngo eede ka taföönyö tamma naada ka Uugaara Yasu nja tasaasa tanno ada ka kadu ma kaniisa in'dili kungngo.<sup>16</sup> Namana a'a ta'diila a Masala 'bucca kudumma aaga turi kungngo nagüügi tumma aaga eede ka teema nja Masala.<sup>17</sup> Nasaasa a'a Masala mo Uugaara tiya aja Yasu Almasihi, Pupa ma tüdhindhí, a'da manangnga koronggore ma ta'dara adele i'i aaga amang kada tussu oogo tussu ma timin'da.<sup>18</sup> Nafara a'a ka Masala a'da aaga tafa'da nanggüüdü naada amang kada tiji töyeene noono amang kada tussu tündhígí noono ka ümmünü aaga iini no, eema yoono kara tanangnga angnga no ma

kaniisa no,<sup>19</sup> türü noono na idhindhí no alinggo kaja ka oona angnga na amma ka türü tanno alinggo kaja no a türü na Masala na ii'baana no<sup>20</sup> noono ka tagalinggo ka Almasihi kono ka fiki'dö i'i ka inde manangnga i'i ka temmi kono ka niisö ma kuri ka 'dotombo'do.<sup>21</sup> Almasihi yungngo ko'do ma tauugaara nja türü nja türü nja tauugaara, i'i ya uugaara ma eema nye'd'de ka 'büdhülü tiya. Ara ta uugaara ma tiya ara tö'dö ya afe'd'e.<sup>22</sup> A Masala tanangnga eema iini ka uune in'dili mümmü i'i kada üüdü ma eema in'dili ma kaniisa.<sup>23</sup> Kaniisa oogo ma tuu'da tanno Almasihi madigi i'i, i'i yungngo adigi eema nye'd'de.

## 2

*Tefe ka 'dī ka Almasihi*

<sup>1</sup> A 'billi kakaaya aaga ka tatoroko nja tam'baga tanno ada,<sup>2</sup> kisi aaga ka eema ma 'büdhülü keere aaga tamma ka tumma ma uugaara ma türü ma koronggore tiya toroko ya ka 'dotombo'do, koronggore na ümmü kadu no anu ka Masala no.<sup>3</sup> Angnga nye'd'de kafeene angnga nja eene, angnga taganeene taneene ma 'büdhülü angnga tagalinggo eema ya toroko ya nja eene ma tasaasa eema ma nanggüüdü tanno aja, angnga ka laala ma tagoroo'bo, ara angnga tapusu adene afa türeene ma kadu.<sup>4</sup> Lakiini 'bangnga ma Masala ma

dhabbu nya tasaasa tanno oono nya angnga dhabbu no. <sup>5</sup> Mafiki'dö angnga ka inde nya Almasiihi a'da asa angnga takaaya ka tatoroko tanno aja. A türü tanno Masala, kaduna aaga toolonadene. <sup>6</sup> Mafiki'dö angnga nya Yasu Almasiihi manangnga angnga ka temmi nya iini ka 'dotombo'do. <sup>7</sup> Ara tö'dö ka nagürüünü tanno ara tö'dö no, a türü tanno oono a 'bangnga tammo oono maala angnga ka Almasiihi mo. <sup>8</sup> A türü tanno Masala ka tuna aaga toolonadene a tamma, taalo ndama aaga lakiini Masala manangnga aaga. <sup>9</sup> Taalo linggo naada eege kamiini, lakiini linggo na Masala eege kamiini <sup>ii</sup>'dö ömö'dö könö tabbü 'danüsö iini. <sup>10</sup> Masala marü'bü angnga, karü'bü adene angnga ka Almasiihi Yasu ma linggo ma eema tiya a'diila ya, ya Masala ka takindinaana kaja ku'bu ka dhidha amang kaja talinggo.

### *Angnga ka unggodho ka Almasiihi*

<sup>11</sup> Nggeege kussu aaga a'da taalo aaga ka Yahüdü dhorro, Yahüdü keema a'da eege karadene ka tuu'da no taalo kümmü aaga kada kadu ma taradene. <sup>12</sup> Kaganeene aaga 'billi a'da taalo aaga kussu Almasiihi kagu'b'ba aaga ka kadu ma Israyil ku'bu, aaga ta kölöge aaga taalo kakete ka timi'di tumma tanno Masala ka takiki no. Kaneene aaga ka 'büdhülü tiya

a'da taalo tündhgü kada a'da taalo Masala kada. <sup>13</sup> Lakiini 'bitüngngö ka Yasu Almasiihi asa aaga takete ana erüdö tiya Almasiihi a'da kagu'b'ba aaga.

<sup>14</sup> Almasiihi i'i yungngo ata'diila anangnga Yahüdü nya kadu tanno taalo ka Yahüdü no kada unggodho, ürrüdü ndhiüdhö ma takirimi na aganna kene ka söödö ya. <sup>15</sup> I'i aadha ka seriye nya tumma miini nya linggo miini ka tuu'da tanno iini, eedi yiini a'da adina ömö'dö öccö unggodho ana ka kadu tanno eera no ka eyi tiya iini ma tüünü ta'diila. <sup>16</sup> Indinaana eege ku'bu a teera meene nya Masala ana salii'bi tiya iini, ürrüdü ndhiüdhö ma kürimi, uuraana kadu ka oona nye'd'de ka tuu'da kada unggodho. <sup>17</sup> Almasiihi ö'dö adageema ka tumma ma ta'diila aaga na kajeene no kaku'b'ba ka Masala no nya ta'diila ka kadu tanno akete no. <sup>18</sup> Angnga nye'd'de kungngo, kajeene nya Yahüdü ana eere ma Almasiihi ara angnga tagöö'dö a Koronggore unggodho kidha ma Pupa.

<sup>19</sup> Ndama uuru tanno taalo aaga ka kölöge taalo ka kafala afe'de aaga nya kadu tanno Masala ka unggodho aaga kadu ma 'di tiya Masala. <sup>20</sup> Karü'bününja aaga ka kadesse tanno kadafiinü nya nagane'bi a misi ma kadesse a'da Yasu Almasiihi ka eyi tiya iini. <sup>21</sup> I'i yungngo anangnga

tarü'böönö ka tümmü ajeene nye'd'de inggiridene anangnga i'i kada la ma Masala ya insili ya.<sup>22</sup> Aaga nja iini afe'de karü'bü adene aaga nja iini amang kada ta'buugu ma taneene ya Masala kadanna kide a koronggore ya.

### 3

#### *Bölis alaana kajeene*

<sup>1</sup> Kudumma tumma tanno a'a na Bölis, a'a na ka pabuusu tiya Yasu Almasiihi kudumma aaga na kajeene no. <sup>2</sup> Kussu aaga tumma na türü tanno Masala ka anangnga a'a ka üdü ma aaga no. <sup>3</sup> Madele taküdhü ma linggo tanno oono a'a tiya eede ka tarigiri ada aaga idhilli ka dhidha ya kungngo. <sup>4</sup> Üürü kagiirü aaga tumma neede ka tunggu aaga no ara aaga tussu a'da nussu a'a taküdhü na Almasiihi. <sup>5</sup> Taalo ömö'dü ma tussu tumma küdhü no, idhi a Koronggore ya Masala tadirina a kadaflüni tanno Masala na insili no nja nagane'bi. <sup>6</sup> A taküdhü no, eege ana eere ma İnjüili, ara kajeene tosse ka takarna ka eema nja Israyil, ka ungodho ka tuu'da, kosso ka timi'di tumma ka Almasiihi Yasu.

<sup>7</sup> A'a na ömö'dü ma linggo ma İnjüili tammo a türü ma eema tiya Masala ka anangnga a'a ya a linggo ma türü tanno oono. <sup>8</sup> A'a nungngo nadhilli ka kadu ma Masala ka teene nye'd'de, Masala

manangnga türü no a'a a'da nalaana kadu na taalo ka Yahüdü no, taalo ndhiginö ka tüüsü tanno Almasiihi. <sup>9</sup> A kadu nye'd'de tussu linggo na Masala na küdhü no kümmü oono ma 'billi ma Masala ka tarü'bü eema in'dili. <sup>10</sup> A naguuru na 'bitingngö no ana kaniisa a naguugaara nja naguugaara ka 'dotombo'do kussu ta'dara noono ka eema kadhoonyo nye'd'de kungngo. <sup>11</sup> Masala magalinggo kungngo a tussu kide tanno oono ka tagüünü ma 'billi ana eere ma Masala tiya aja Yasu Almasiihi. <sup>12</sup> Tamma kini naaja no ara angnga tana rüsü ma takete ka Masala a'da taalo ri'bä a tagu angnga. <sup>13</sup> Nikiri a'a ka tiki aaga a'da, aaga tafa tadinigöögö kudumma dhügürü tiya eede ya ka üdü ma aaga i'i agala ka'diila nja aaga adha.

#### *Bölis afara ka Masala*

<sup>14</sup> Kudumma a tumma tanno, na a'a tüürü ku'bu ana küüge nafara ka Masala Pupa yaaja. <sup>15</sup> I'i yungngo a kadu tanno ka 'dotombo'do no nja 'büdhülü ka'duga eere yiini. <sup>16</sup> Nasaasa a'a Masala ma türü ma tiddhindhi tiya oono a'da manangnga türü ma Koronggore tiya oono kada ka oona. <sup>17</sup> A'a nafara ka Masala a'da Almasiihi anna kada ka nanggeedi a tamma. A'a nafara ka Masala a'da aaga tarigi uune caa'bu dhorro, aaga takidhö ka tasaasa, <sup>18</sup> Nye'd'de nja

kadu tanno Masala kaana türü ma tussu tadhabbu nja tadhonggoro nja ta'doogo nja ta'buugu a tasaasa na Almasiihi kada eege kamiini.<sup>19</sup> Aaga tussu tasaasa na Almasiihi agii'bi tussu eema amang tadigine ana eema nye'd'de ya Masala ka tigaana ya.

<sup>20</sup> Fa ka Masala manangnga türü malinggo kaja ka oona, oogo mambaanya talinggo eema dhabbu adagii'bi nüümö yaaja ka asaasa ya. <sup>21</sup> Tidhindhi kungngo oono ka kaniisa nja Yasu Almasiihi ka sere in'dili, turi ta'billi! Amiin.

## 4

### *Ta unggodho ka tuu'da ma Almasiihi*

<sup>1</sup> A'a nanna ka pabusu kudumma linggo ma Uugaara, nasaasa aaga a'da aaga taneene taneene afa ma tanno Masala ka tagümmünü aaga iini no kungngo. <sup>2</sup> Aaga tiicolo aaga ta'diila nja kadu aaga tidhi oona ku'bu aaga tümmünügü njaana ko'do dhadha a tasaasa ajeene.

<sup>3</sup> Aaga kardha ku'bu aaga tafa kada unggodho ka Koronggore a tami'daana ma ta'diila. <sup>4</sup> Kudumma aaga ka tuu'da ka unggodho a Koronggore unggodho afa ma Masala ka tagümmünü aaga ka tidhi oona ku'bu ka unggodho ya Masala ka tagümmünü aaga ya.

<sup>5</sup> Kudumma Uugaara ma

ungngo ada ma unggodho a tamma ka unggodho a tambeese ka unggodho. <sup>6</sup> A Masala ma unggodho Pupa ma kadu nye'd'de alinggo ada eene in'dili kungngo i'i aneene nja eene in'dili. <sup>7</sup> Lakiini Almasiihi amana türü a kadu töccö ana kaja tamana ma faka tammo eene ma linggo tamana miini ka asaasa. <sup>8</sup> Afa ma sorne ka tiki,

"Kini ka sиро coo'do ka 'dotombo'do  
a'duga kasaga nja iini  
kadhabbu  
adamana eema a  
katadü'd'dü."

<sup>9</sup> Minna i'i yungngo ana eere a'da, "asirigö coo'do ka 'dotombo'do" unggngo? I'i ya iki a'da i'i ya öö'dö ka 'büdhülü ka ta'buugu ka dhidha.

<sup>10</sup> Yasu ka eyi tiya iini yungngo öö'dö ku'bu asirigö coo'do ka 'dotombo'do ma tadigi 'buugu nye'd'de ana oona miini. <sup>11</sup> I'i yungngo ümmünü kadu könö kada kadafiini, könö kada naganee'bi, anno teema tumma ma İnjili, anno ta ka'boge, anno ta katalaana. <sup>12</sup> I'i ya agüünü nggeege amang kene tindinaana kadu ma Masala ku'bu nye'd'de ka linggo ma kaniisa ma tarü'bü tuu'da na Almasiihi. <sup>13</sup> Amang kaja tala ta unggodho ka tamma nja tussu 'Bii'bala ma Masala, kada ömö'di kadigine, angnga ma tala tadhonggoro na Almasiihi.

<sup>14</sup> Amang kaja tafa taga laala a tanya ma talaana

tanno atoroko no tafa tagürünü eege ko'do a kadu tüüsini eege ana ünggü ma tanangnga eege ka taama. <sup>15</sup> Lakiini angnga takeema tumma ma timin'da a koronggore ma tasaasa angnga taginggiridene ka eema in'dili ana Almasiihi i'i ya üüdü ya. <sup>16</sup> I'i yungngo anangnga tuu'da ka tümmü ajeene kimi'dinjaana koona nye'd'de, a 'dakeyi alingga linggo niini, a tuu'da tinggiridene nye'd'de, a tarü'böönö miini ta unggodho a tasaasa ajeene.

*Taneene na 'diila no ka Almasiihi*

<sup>17</sup> Nggeege ara a'a tiki aaga ana eere ma Uugaara Yasu aaga fa taneene afa kadu ma 'büdhülü kadu no adinigöögö ma tam'baga no. <sup>18</sup> Eege kungngo ka kisinsoro taalo kaföönyö tumma na Masala a tam'baga tanno eene a takidhö ka nanggeedi tanno eene kagu'b'ba ka taneene tanno Masala. <sup>19</sup> A modolo taalo magu eege kümmünü nanggeyi neene ka temelö nja füngngö nja iiya kadhoonyo nja tallogo taalo küüsü kide. <sup>20</sup> Lakiini taalo tumma na Almasiihi yungngo ada ka talaadene kide ya i'i ya miini. <sup>21</sup> Timin'da aaga kaföönyö tumma miini aaga takalaadene talaana ma timin'da no ka Yasu no. <sup>22</sup> Aaga Aadha ka taneene tanno illi no, aaga unggü eema ya toroko ya illi ya

keere eema ma tuu'da ya iişinidene no a taga'dadene ya. <sup>23</sup> A aaga padaga oona keere aaga tinsili ka nanggeedi nja nanggüdü. <sup>24</sup> Aaga agirni ömö'di ya issi ya ada ka oona ya Masala ka tarü'bü i'i ya kafeene nja oono ya ka'diila nja tinsili nja timin'da ya.

<sup>25</sup> I'i yungngo ada kara taadha ka korokoro, ömö'di ana kada teema tumma ma timin'da nja tööje kudumma aja kada unggodho ka tuu'da na Almasiihi. <sup>26</sup> Üürü kagoroo'bo aaga, aaga fa tüünü tatoroko, aaga fa tafa ka ndanaaya ka 'dängö caabu a'da kagoroo'bo aaga. <sup>27</sup> Aaga fa tafa'da fiinü a Ebliisi. <sup>28</sup> Ömö'di ya tanyooro ya aadha ka nyooro, lakiini fa kini adhügürü a linggo ana iisine tanno iini ana eema, amang kini tinya a kadu tanno eema ka titalo kene no. <sup>29</sup> Aaga fa tindiri tumma na toroko no illi tumma na 'diila ma tindinaana kadu ku'bu no, na kadu kasaasa taföönyö no. <sup>30</sup> Aaga fa tanangnga Koronggore ma Masala ya Insili ya ka agoroo'bo a taneene tanno ada no, i'i abbünnü hitimi kada ka oona kada tanno iini ma uuru ma toolonadene. <sup>31</sup> Aaga Aadha ka kirimi nye'd'de nja midhi nja koro'bo nja tagoroo'bo nja tiidhaana ka oona nja teelaana nja eema tiya toroko ya 'do. <sup>32</sup> Aaga

faana ka oona a ta'diila nja 'bangnga, aaga afa ka kadu tanno alinggo tatoroko ana aaga no afa ma Masala ka afa kada ana kada ka tamma ka Almasiihi.

## 5

### *Taneene ka töyeene*

<sup>1</sup> Aaga aneene afa ma Masala kungngo kada laala tiya asaasadene. <sup>2</sup> Aaga unggeene ka fiini ma tasaasa ajeene, fiini ya Yasu Almasiihi tiya asaasa angnga ya, üpü eyi yiini co ka üüdü ma angnga kada niimö ma türri ya eedhenja a Masala a ndhiigö miini tü'd'dü ka ti'd'di.

<sup>3</sup> Lakiini temelö nja linggo ma nyoro nja tallogo nye'd'de kungngo taalo kama teemadene kada ka söödö aaga na kadu tanno Masala no. <sup>4</sup> Tindiri tumma na toroko no nja ker'de ker'de nja tam'baga taalo ka'diila nja aaga illi tamana ta'diila nja tafünügü Masala ko'do. <sup>5</sup> Kussu aaga a'da ömö'di ya atemelö nja eema tiya toroko ya nja tallogo i'i afeene nja ömö'di ya ümmü masala ma 'büdhülü taalo ara takarna ka tauugaara ma Almasiihi nja Masala.

<sup>6</sup> Aaga fa tafa ka ömö'di könö iisini aaga a tumma tanno atoroko no kudumma eene kara tanangnga tagoroo'bo ma Masala kara tala kadu no taalo kaföönyö tumma noono no. <sup>7</sup> Nggeege aaga fa taneene nja eene 'do. <sup>8</sup> Kaganna aaga ka ndüüli

ka dhidha a 'bitingngö sa aaga tanna ka töyeene ma Uugaara, asa aaga aneene taneene ma laala ma töyeene. <sup>9</sup> Kudumma tööyö ma töyeene ungngo ka eema tiya a'diila ya nye'd'de ka tinsili nja timin'da. <sup>10</sup> Aaga alaadene ka eema tiya Uugaara ka asaasa ya. <sup>11</sup> Aaga fa tosso ka linggo ma ndüüli na toroko no, lakiini aaga ungu eege kürö ndama iini kaco ka töyeene adha. <sup>12</sup> Eema ya kadu na taalo kaföönyö tumma na Masala kalinggo ka küdhü no magu modolo ungngo ma teema iini. <sup>13</sup> Lakiini niimö ya agalinggo adene ka küdhü ya, a kadu kara tijöögö iini kö'dö kürö ka töyeene. <sup>14</sup> Niimö ya ijidene ya i'i ya töyeene, kudumma iini ka tiki,

"Ajeene o'o na arigide no,  
fiki'dö ka kadu tanno  
aaya no ka söödö,  
amang ka Almasiihi töyeene  
ada küdü ka oona."

<sup>15</sup> Aaga adinö ko'do dhorro aaga taneene taneene ma kadu tanno 'dara no, taalo taneene ma kadu tanno nagaaga no. <sup>16</sup> Aaga 'digaana 'bitingngö aaga tüüni eema ya 'diila ya, kudumma naganuuru tanno, taalo ka'diila in'dili kungngo. <sup>17</sup> Aaga fa taneene kada nagaaga, lakiini aaga tessu niimö ya Uugaara ka asaasa ya. <sup>18</sup> Aaga fa take ka ngeeli ma taga'da aaga ka nang-güüdü, lakiini aaga tigine a Koronggore ya. <sup>19</sup> Aaga eema a tumma ma tüüsü

ma sorne nja natüüsü ma koronggore, aaga üwe tüüsü aaga tafünügü Uugaara ko'do ndama nanggeedi ka teene.<sup>20</sup> Aaga amana ta'diila a Masala tammo Pupa mo ka eema nye'd'de ana eere ma Uugaara tiya aja Yasu Almasiihi.

*Iiya nja naganyori tanno eene*

<sup>21</sup> Aaga föönyö ana tumma ka oona dhadha a ri'ba ma Almasiihi. <sup>22</sup> Iiya, aaga föönyö eema ya naganyori tanno ada afa maada ka föönyö eema ya Uugaara kungngo. <sup>23</sup> Kudumma miide i'i ya üüdü ma aka afa Almasiihi kada üüdü ma kaniisa kungngo, i'i yungno oolona kaniisa oogo ma tuu'da tanno iini. <sup>24</sup> Afa ma kaniisa ka föönyö tumma na Almasiihi, fa ka iiya ka föönyö eema na naganyori tanno eene ka eema nye'd'de kungngo.

<sup>25</sup> Nagiide, aaga asaasa iiya naada afa ma Almasiihi ka asaasa kaniisa kungngo üpü eyi yiini co ka üüdü moono. <sup>26</sup> Anangnga oogo ka tinsili aagala oogo ka oona a 'büdi ma tumma ma tagunaana. <sup>27</sup> Amang kini ta'duga oogo ma eyi tiya iini kada kaniisa ka a'diila a'da taalo niimö ya toroko ya kide, a koola titaaloo kide a mirindhi titaaloo kide alla niimö ya nyoro ya kide, lakiini minsili a tatoroko titaaloo kono ka oona. <sup>28</sup> Nggeege afe'de fa

ka nagiide ka asaasa iiya neene afa meene ka asaasa oona neene kungngo, ömö'di ya asaasa aka miini asaasa eyi yiini. <sup>29</sup> Taalo ömö'di ma tanu ka tuu'da tanno iini, lakiini anaana iïye kide amana kuri iini afa ma Almasiihi ka afa ka kaniisa kungngo. <sup>30</sup> Angnga kagooso angnga ka tuu'da tanno Almasiihi. <sup>31</sup> "I'i yungno ömö'di ka tinyi pupa yiini ku'bu nja niimö tammo iini ara ka tosso kada tuu'da na unggodho no nja aka tammo iini." <sup>32</sup> Tumma na küdħü dhorro no eege kungngo, a'a nasaasa tiki a'da taküdħü ma Almasiihi nja kaniisa. <sup>33</sup> Fa ka ömö'di asaasa aka miini afa miini ka asaasa eyi yiini kungngo fa ka aka mümmü nyuri yoono dhorro.

## 6

*Laala nja kupupa tanno eene*

<sup>1</sup> Laala, aaga föönyö tumma na kupupa tanno ada nja nakaniimö tammo ada ana eere ma Uugaara, tumma dhorro eege kungngo. <sup>2</sup> "Ümmü pupa üüdü nja niimö tammo üüdü," tumma ma seriye ma Masala na dhidha no ma timi'di tumma eege kamiini,<sup>3</sup> "amang kada taluna ta'diila a nagürüünü naada tadhabbu ka 'büdhülü."<sup>4</sup> Aaga na kupupa no, aaga fa tanangnga laala yaada ka koroo'bo, lakiini aaga inggiri

eege afa ma tiya Uugaara ka tiki ya kungngo.

### *Naguugaara nja kasaga*

<sup>5</sup> Kasaga, aaga aföönyö eema ya naguugaara tanno ada ka 'büdhülü ya, a ri'ba a ta'deedene ka oona ana eedi ka tinsili afa maada ka taföönyö tumma na Almasiihi kungngo. <sup>6</sup> Taalo kudumma eene kiji aaga a'da tadïnö kada, lakiini kada kasaga tanno Almasiihi kalinggo niimö ya Masala ka asaasa ya. <sup>7</sup> Aaga alingga ana eedi dhorro afa maada ka talingga ada Uugaara taalo a kadu. <sup>8</sup> Kudumma ada kussu ara Uugaara saga nangnga talingga a kadu in'dili üürü tasaga üürü ömö'di ya dhorro ya, ka linggo niini na 'diila no.

<sup>9</sup> Aaga na naguugaara no, aaga üünii a kasaga tanno ada nggeege, aaga fa tuuru ri'ba eene ka nanggeedi aaga tessu aaga a'da Uugaara yeene i'i ya Uugaara yaada ka 'dotombo'do taalo üünii ada ömö'di könö ku'bu.

### *Mudugusi ma Masala*

<sup>10</sup> Tumma na eere no a'da aaga tana türü a Uugaara ka türü tanno oono na idhindhü no. <sup>11</sup> Aaga adhifi eema ma koro'bo ma Masala nye'de amang kada tambaanya takara ka ünggü tammo Ebliisi. <sup>12</sup> Taalo angnga keema koro'bo nja diidi ma tuu'da nja eriidö, lakiini nja naguugaara nja kadu tanno iifi no nja kadu ma türü, kadu no anna ka ndüüli no nja nagoronggore tanno

oroko no ka 'dotombo'do. <sup>13</sup> Yungngo ada kara tadhifi eema ma koro'bo ya Masala nye'de amang kada tambaanya tümmöönö ka eyi tiya ada ka uuru tanno atoroko no, aaga tidhi oona ku'bu ada ka ndatiimö linggo nye'de. <sup>14</sup> Aaga kardha ku'bu ana jönnö ma timin'da, aaga tagirni mudugusi ma tadhorro mo ada ka nooro, <sup>15</sup> aaga tagirni egiiide ma tindinaana ku'bu nanggeyi naada ma teema tumma ma Masala na 'diila no. <sup>16</sup> Ana kide nye'de aaga a'duga toona ma tamma, amang kada tata magusule ma tatoroko ma finne mo. <sup>17</sup> Aaga körni barnete ma toolonadene ada ka nanggüdü aaga ta'duga kulu'ba ma Koronggore kada tumma ma Masala. <sup>18</sup> Aaga eema nja Masala turi kungno a Koronggore ya Insili ya aaga fa taadha kide, aaga adinö ko'do miini aaga fara ka Masala ka üüdü ma kadu tanno oono. <sup>19</sup> Nja a'a afe'de amang kede kara tafa'da nüünö ma teema ya, a Masala tanangnga rüsü kede ka eedi neema tumma na 'diila na Masala na küdhü no. <sup>20</sup> A'a na tafünni miini nadimi'di adene a kadholle, aaga afara ka Masala amang kede tana rüsü ma teema tumma na Masala taalo ri'ba kagu a'a.

### *Tööjülü na eere no*

<sup>21</sup> Lakiini taneene neede nja linggo tanno eede ara Tikikos saga tirina aaga in'dili, örre yeede ya akinyi

linggo a'a, yeede ka asaasa i'i  
ya adho ka fiinii ka linggo ma  
Uugaara ya.<sup>22</sup> Nagürünü a'a  
i'i kada amang kini tadirina  
taneene niidii aaga amang  
ka nanggeedi naada ka  
tiicolo.<sup>23</sup> Ta'diila nja tasaasa  
nja tamma ma nagöre  
ma Masala Pupa ndama  
Uugaara Yasu Almasiihi.  
<sup>24</sup> Fa ka türü nja kadu  
nye'd'de no asaasa Uugaara  
yaaja Yasu Almasiihi tasaasa  
na taalo kara titalo no.

## Waraga ya Bölis ma co Filippi

### Tafa'da tumma

Anya ma Filippi maganna ka Makadoniya maga müriya ma fiini ma niisö ma küüle ma Yünan tammo 'bitüngngö ma Bölis ageema tumma ma İnjüili ma Yasu kanna a kadu tamma ka Yasu (Kadafiini 16). Bölis agananja ka pabuusu a nagürüünü kadhabbu ka naanya kadhoonyo, a kadu ma kaniisa ka Filippi tagürüniigü ana gürüüsü ma tamünügü i'i ko'do, kuu'bu i'i ka eedi. I'i arigiri waraga ya ma tanangnga ta'diila eene.

I'i iki a kadu ma kaniisa a'da kümmü tumma na Almasiihi a'da a kadu tiicolo ka nanggeedi nja köje kakinyi linggo a köje dhadha. I'i iki eene a'da taneene na a'diila no kungngo Almasiihi, kuurna talaana tanno iini taalo talaana na katalaana tanno korokoro no asaasa eege a'da kuurna eema ma taanyara ya Masala ka anangnga a Yahüdü ya.

### Tamana ta'diila

<sup>1</sup> Waraga ya ö'dö ndama Bölis nja Timosaws kadu ma linggo na Yasu Almasiihi kungngo co nagöre ma angnga ma kaniisa no ka Filippi nye'de kungngo, kadu no unggodho nja Yasu Almasiihi no, nja ka'boge nja

kadiifi tanno eene. <sup>2</sup> Fa ka Masala ma Pupa tiya aja nja Uugaara tiya aja Yasu Almasiihi ka anangnga türü aaga nja ta'diila.

### Tafara ka Masala nja tamana ta'diila

<sup>3</sup> Namana a'a ta'diila a Masala tammo eede turi kede kara tagüigi tumma aaga. <sup>4</sup> Nafara a'a ka Masala turi a dhodho kudumma aaga in'dili kungngo. <sup>5</sup> Kudumma ada ka takinyi linggo ma injüili a'a ndama uuru tanno dhidha no ta'bitüngngö. <sup>6</sup> Nussu a'a dhorro a'da Masala ma kafü'dü linggo na 'diila kada mo, mara tüütü ka talinggo ka saga tatiumö kadara ka uuru tanno Yasu Almasiihi kara tö'dö no.

<sup>7</sup> A tumma dhorro eede ka tinigöögö ma aaga in'dili kudumma aaga 'do aaga kungngo ka eedi tiya eede turi kungngo, aaga in'dili kosso aaga ka türü tanno Masala nja a'a, üürü ka pabuusu üürü ka tümmöönö ka tumma na 'diila no a tefe kide dhorro. <sup>8</sup> Masala oogo mungngo mussu tumma meede ka teema tumma ma timin'da eede ka tiki a'da a'a nana 'bangnga ma aaga in'dili 'bangnga mö'dö ndama eedi ya Yasu Almasiihi. <sup>9</sup> Tafara ka Masala neede kudumma aaga a'da a tasaasa naada ka takogoona ma tadhabbu dhorro ka tussu eema nja ta'dara. <sup>10</sup> Amang kada tesse niimö ya a'diila ya amang kada tinsili, a tatoroko titaaloo kada ka uuru tanno

Almasiihi kara tö'dö no.  
 11 Aaga tadigine a tööyö ma 'diila ana eere ma Yasu Almasiihi ma tiddhindhi nja tindhigü Masala ko'do.

*Tefe ka 'dii ana Almasiihi*

12 Nagöre eede, nasaasa a'a a'da aaga tussu niimö ya agalinggo adene ana a'a ya, agala kadu kakogoona ma tanangnga tumma na 'diila no ka tanyala ku'bu.  
 13 'Bitingngö kadu nye'de ka 'dii ma nasigira ma Rööma nja kadu könö kussu a'da a'a na ka pabuusu ka üüdü ma Almasiihi. 14 Tanna ka pabuusu neede no, kafa ka nagöre ma angnga kadhabbu katamma ka Uugaara Yasu kakogoona ma tümmü rüsü ma teema tumma ma Masala a'da taalo ri'ba eene ka nanggeedi.

15 Kadu könö keema tumma ma Almasiihi a kirimü a tisaana ka oona a kadu könö talaana i'i ana eedi ka tinsili. 16 Kadu na miini no kalaana ana eedi ma tasaasa a'a, kussu a'da Masala manangnga a'a ka talaana kadu ka tumma tanno oono na 'diila no.  
 17 Kadu na miini no taalo keema tumma ma Almasiihi ana eedi ka'diila, kussu a'da eege kara takogoona ma tanangnga dhügürü a'a ka tanna ka pabuusu.  
 18 Lakiini taalo agu'du a'a ka oona, kagala oona ka'diila eede a tumma tanno Almasiihi ka teemadene üürü ka'diila alla taalo ka'diila ka nanggeedi, lakiini nadhodho a'a ara a'a tüütü ka tadhodho. 19 Kudumma eede ka tussu a'da alinggo

adene ma toolona a'a ka pabuusu kudumma tafara ka Masala tanno ada a tikinyaana ma Koronggore tiya Yasu Almasiihi. 20 Niimö yeede ka asaasa nindhigü i'i ya, a'da nafa tagi'di ka linggo tanno eede keere 'do, lakiini 'bitingngö turi ara a'a tiisö ka linggo keere ana oona nye'de, üürü nefe a'a ka 'dii üürü neyi a'a. 21 Tefe ka 'dii neede a'da nussu Almasiihi, inde neede tö'dö keere a niimö. 22 Üürü a'a tefe ka 'dii neede ma talinggo linggo ma tö'dö keere iini ya, taalo a'a nussu ara a'a tesse öjö? 23 Nadhere a'a ka eema keera, nasaasa a'a taadha ka tefe ka 'dii ara a'a ka taneene nja Almasiihi i'i yungngo a'diila. 24 Agala ka'diila nja aaga eede kara tüütü ka tefe ka 'dii. 25 Nussu a'a ara a'a tüütü nja aaga in'dili kungngo amang kada tunggunu co a dhodho tanno ada ka tamma ma Masala. 26 Nggeege taneene neede nja aaga afe'de no, kanangnga aaga ka tindhigü Yasu Almasiihi ko'do kudumma ma niimö tiya Masala ka talinggo ada a'a ya.

27 Niimö ya agu'daana 'bitingngö ya a'da a taneene naada ka tefe ka 'dii kaneene nja tumma tanno Almasiihi amang kede tara tö'dö kada kanna ya, üürü a'a naföönyö kede ka tüürü nitaalo kada kete, aaga tüütü kada unggodho ka Koronggore, aaga takardha ku'bu ana eedi unggodho ka üüdü ma tamma ka Yasu Almasiihi nja tumma

tanno 'diila no. <sup>28</sup> Aaga fa tari'ba a diidi tiya ada ka niimö töccö 'do nggeege kara tussu adene a'da eege kandaama, a toolonadene naada ka Masala ka niisö. <sup>29</sup> Masala mafa'da fiini aaga ma talinggo ada Almasiihi, taalo tamma kini sugi, lakiini ma tadhügürü ka üüdü miini afe'de. <sup>30</sup> Aaga kardha ku'bu aaga teema koro'bo afa ma tiya ada ka tadinö kede ka takardha ku'bu iini ya, aaga taföönyö 'bitingngö a'da naleefe a'a takardha ku'bu 'bitingngö.

## 2

### *Tiicolo na Almasiihi nja tüdhindhi tanno iini*

<sup>1</sup> Tefe ka 'di naada ka Almasiihi 'dee ka anangnga aaga kana türü? Tasaasa niini ka 'baga o'o ku'bu ka eedi? Ka unggodho aaga ka Koronggore nja 'bangnga nja muuyu? <sup>2</sup> Nggeege a'a nasaasa aaga a'da aaga tanangnga a'a ka tadhodho a tasaasa ka unggodho ana eedi unggodho a tumma ka unggodho. <sup>3</sup> Aaga fa tasaasa nanggeyi naada aaga tan'dinigi oona coo'do, aaga ümmünü nanggeedi ku'bu aaga tümmü kadu könö ka tii'bi aaga. <sup>4</sup> Aaga fa takirii iifye ka eema ma nanggeyi tanno aada, lakiini aaga asaasa kadu könö iini. <sup>5</sup> Aaga ümmü nanggeyi naada afa ma Yasu ka tümmü tumma ma eyi tiya iini.

- 6 I'i afeene nja Masala ka eema in'dili kungngo, lakiini i'i taalo a'bunu eyi yiini kide ma taköje nja Masala.
- 7 Nggeege i'i adha agala ka tüpü eyi yiini co a'duga tuu'da ma tasaga afeene nja ömö'di abbü 'dala kada tuu'da ma tadü'dü.
- 8 Iicolo aföönyö tumma na Masala idhi eyi, eyi ka salii'bi.
- 9 A Masala ta'diniga i'i ko'do ka 'buugu tiya ku'b'ba ya manangnga eere iini agii'bi nagereene nye'd'de.
- 10 A kadu nye'd'de tüürü ku'bu a nagüuge kidha ma Yasu, ka 'dotombo'do nja 'büdhülu ka tüm'bü.
- 11 A nagonggo'do nye'd'de teema a'da Yasu Almasiihi i'i ya Uugaara ma tafünügü Masala ma Pupa ma ko'do mo.

*Aaga öyeene ada ka 'büdhülu*  
<sup>12</sup> Nagöre eede, afa maada kada kaföönyö tumma neede 'bucca kungngo ana a'a kide, aaga föönyö tumma neede 'bitingngö a'da taalo a'a kada kete, aaga kardha ku'bu a linggo ma toolonadene tanno ada a ri'ba a ta'deedene ka oona ma tanangnga kadu ka tussu a'da Masala moolona aaga. <sup>13</sup> Kudumma Masala oogo mungngo malinggo kada amang kono tafa kada

aaga tasaasa talinggo linggo noono, aaga tambaanya talinggo linggo noono.<sup>14</sup> Aaga üünü eema in'dili, aaga tafa ta'digineene, aaga tafa takirimi ajeene.<sup>15</sup> Amang kada tinsili ka nanggeedi a'da kitaalo tatoroko kada, aaga ta'diila kada laala ma Masala ka söödö ma kadu tanno oroko no, aaga töyeene kide afa midigi ka 'dotombo'do.<sup>16</sup> Aaga ümmü tumma ma tefe ka 'di amang kede tabbü 'danüsö ana aaga ka uuru tanno Almasiihi kara tö'dö a'da taalo a'a nagalinggo nitaalo kadhügürü weerö ün'düngngö.<sup>17</sup> Üürü a'a neyi ara tafeene nja tuuru ngeeli a Masala, kudumma linggo tanno ada ka talinggo ada Masala no kafeene nja türri, kudumma ada ka tamma ka Yasu. A'a nadhodho nja aaga in'dili kungngo.<sup>18</sup> Aaga dhodho nja a'a aaga ta'deema nja a'a afe'de.

### *Timosaws nja Abafrüditös*

<sup>19</sup> Üürü tasaasa na Uugaara Yasu, nasaasa a'a tagürünü Timosaws kada kete kungngo amang kede taföönyö tumma kada, oona ta'diila kede eedi ta'baga kede ku'bu.<sup>20</sup> Taalo ömö'di kede afa i'i ma tara tanaana iïye kada dhorro afa miini kungngo.<sup>21</sup> Kadu könö nja a'a in'dili kalinggo ada ka nanggeyi tanno eene taalo kalinggo ada Yasu Almasiihi.<sup>22</sup> Aaga kussu linggo na Timosaws, agalinggo tumma

ma Masala nja a'a afa 'bii'bala nja pupa tiya iini.<sup>23</sup> Nasaasa a'a tagürünü i'i kada, lakiini ara a'a ka türi dha yeede tikinggi.<sup>24</sup> Nussu a'a a'da ara Uugaara Yasu Almasiihi tafa'da fiinä a'a nö'dö kada kanna afe'de kete kungngo.

<sup>25</sup> Lakiini nijöögö a'a a'diila eede kara tagürünü Abafrüditös kada örre ma a'a ya tataneene ma a'a ya akinyi linggo a'a yaada ka kürünü i'i kede a'da öö'dö tamünögü a'a ko'do ya.<sup>26</sup> Adinigöögö ma tasaasa tassa kada in'dili kungngo, katoroko oona iini kudumma ada ka taföönyö a'da i'i akamaara.<sup>27</sup> Akamaara 'do akete ka teyi, lakiini Masala mana 'bangnga miini nja a'a afe'de, amang kede tafa tagusu müürü ka müürü.<sup>28</sup> I'i yungngo eede ka tiki a'da nuurugu i'i kada areere, amang kada tasala i'i, oona ta'diila kada, taalo nara tamüürü.<sup>29</sup> Aaga

amma kini ana eere ma Uugaara Yasu a dhodho afa ma örre tiya ada kungngo, aaga tamma ka kadu töccö afa miini kungngo afe'de.<sup>30</sup> Kudumma iini ka ndakete ka teyi ka üdü ma linggo tanno Almasiihi, amünögü eyi yiini co amang kini takinyi linggo a'a ka üdü ma aaga.

## 3

*Ara Masala toolona angnga nya*

<sup>1</sup> Keere kungngo nagöre eede, aaga dhodho ka Uugaara Yasu. Tarigiri ma waraga tiya eede ka tunggu co aaga ya, taalo agu'du a'a ka oona, kagala kara ta'diila nja aaga adha. <sup>2</sup> Aaga adin'i ko'do kudumma kadu tanno afeene afa tiini no, eege ka kadu tanno alinggo eema ya toroko ya, eege ka kadu tanno aga'da tuu'da no. <sup>3</sup> Angnga ka kadu ma tatendhe na dhorro no, kudumma aja ka tümmü Masala a Koronggore angnga tagadhodho ana Yasu Almasiihi, taalo angnga kadho üüdü ka eema ma tuu'da. <sup>4</sup> A'da a'a ka eyi tiya eede nussu a'a niimö yeede ka tümmü tumma miini dhorro ya. Üürü ömö'di inggide iki a'da ara i'i töödhü ka eema ma tuu'da ya, a'a ka eyi tiya eede, a'a na miini. <sup>5</sup> Nageenedene a'a natüümö füngngö iidümmü afünü iidoona natendhe, a'a na taga Israyil, siliga ya Binyamiin, a'a na taga Yahüüdü tiya dhorro ya, ka tumma ma seriye ya, a'a na taga Fariisi. <sup>6</sup> Üürü ndama tagu'daana ma eedi ya, nagakirimi a'a kaniisa nalinggo oogo, üürü ndama ta'diila ma seriye ya, a'a nümmöönö dhorro, taalo niimö ya toroko ya kide. <sup>7</sup> Lakiini taalo a'a nö'dö keere a niimö kide, lakiini nümmöönö a'a ka taama ka üüdü ma Yasu Almasiihi. <sup>8</sup> Lakiini a'a nümmü eema ya nye'd'de ka taama amang kede taduna niimö ya

üdhindhi ya tussu ma Yasu Almasiihi Uugaara yeede, naama a'a eema nye'd'de kungngo ka üüdü miini, niiri eema nye'd'de kada nyoro ün'dügüngngö amang kede taluna Almasiihi. <sup>9</sup> Na a'a tanna kide taalo a ta'diila ma seriye, lakiini kudumma ma tamma ma Almasiihi eege ka ta'diila tanno Masala ka anangnga angnga no. <sup>10</sup> Amang kede tussu Almasiihi nussu türü na anangnga i'i ka fiki'dö ka inde, nosso ka dhügürü ma tin'di tanno iini, nafeene nja iini ka inde tanno iini. <sup>11</sup> Nggeege ara a'a tündhigü tafiki'dö neede ka inde.

*Tisi ka fiin'i tiya dhorro ya keere*

<sup>12</sup> Taalo a'da a'a naduna, nja eede ka tafara ta'diila nye'd'de, lakiini a'a nawwa fiin'i ma taluna niimö yeede ka tawwa ya, kudumma Yasu Almasiihi agala ka 'duga a'a kada tanno iini. <sup>13</sup> Nagöre eede taalo a'a nümmü eyi yeede a'da a'a naduna, lakiini niimö inggide unggodho eede ka tünni, nüürü ma eema tiya eede keere ya ara a'a ka takardha ku'bu ma tiya eede kidha ya. <sup>14</sup> Nunggunu a'a niisö co aadha ka niimö tiya eede kasaasa ya amang kede taluna tumma ka Masala ka tümmünö a'a maco no 'dotombo'do kudumma eede ka tamö'di tiya Yasu Almasiihi.

<sup>15</sup> Fa kaja angnga in'dili no adho ka fiin'i ma Masala no angnga taguurna fiin'i ya

miini ya keere. Üürü fiinii könö ungngo ada afe'de, ara Masala tala aaga kide ya. <sup>16</sup> Lakiini 'bitingngö ya fa kaja angnga tagunggeene ka fiinii tiya Masala ka ala angnga kide ya.

<sup>17</sup> Aaga kinyi a'a ka taneene tanno eede nagöre eede, aaga anaana iiye ka taneene tanno neene afa ma kadu tanno uurna fiinii yeede keere no. <sup>18</sup> Nadünögü a'a aaga 'bucca a 'büüdi ka iiye, kadu king-gide kadhabbu a taneene tanno eene ka anangnga eege kada diidi ma salii'bi tiya Almasiihi. <sup>19</sup> Kadu na miini no 'do kara saga taaya, Masala meene a'da nanggeedi neene a tihindhi neene a'da modolo, eege no isi ka eema ma 'büdhüü keere no. <sup>20</sup> Lakiini 'buugu yaaja ungngo ka 'dotombo'do, i'i yungngo aja ka takindhigü Uugaara yaaja dhorro Tatoolona Yasu Almasiihi ndama iini. <sup>21</sup> I'i yungngo ara ta'bele tuu'da naaja na ki'di no anangnga eege kafeene nja tuu'da tanno iini no kada idhindhi kudumma iini ka ana türü ma tanangnga eema nye'd'de kaföönyö tumma niini.

## 4

### Talaana

<sup>1</sup> Ka nagöre eede neede ka asaasa eege nadinigöögö meene, eege kanangnga a'a ka tadhodho nadho ndalondo eede ka üüdü no, aaga idhi oona ku'bu ka

eema tiya in'dili kungngo nagöre eede kidha ma Uugaara Yasu Almasiihi. <sup>2</sup> Nasaasa a'a Afutiya nja Santiika a'da ka unggodho kidha ma Uugaara Yasu Almasiihi <sup>3</sup> O'o afe'de na teefe ma a'a na adho ka fiinii no, nasaasa a'a o'o a'da nakinyigi eege ko'do kudumma eene ka tadhügürü ka linggo ma Masala nja a'a, eege nja Aklimindis nja türeene ma kadu tanno kakinyi linggo a'a no, eege na nagereene tanno neene kadanna ka sorne ma tefe ka 'dii no.

<sup>4</sup> Aaga dhodho 'bucca kungngo ka eere ma Uugaara niki aaga afe'de aaga dhodho. <sup>5</sup> Aaga fa ka kadu nye'd'de kussu tidhi oona ku'bu naada. Amang kada tussu a'da Uugaara Yasu Almasiihi anda kete kara tö'dö. <sup>6</sup> Aaga fa tadinigöögö ma nüümö 'do, lakiini aaga asaasa eema yaada ka Masala a tafara kono nja tamana ta'diila oono nja tindhigü oogo ko'do. <sup>7</sup> Ta'diila na Masala na agii'bi ta'dara nye'd'de no nafa ka nanggeedi nja nanggüüdü tanno ada kidha ma Yasu Almasiihi.

<sup>8</sup> Ka nagöre eede, aaga naana iiye ka nüümö ma timin'da a tindhiginja ko'do nja tiya dhorro ya, nja tiya adho ka fiinii nja tiya insili ya. <sup>9</sup> Aaga alingga nüümö yaada ka talaanadene kede ya, aaga ta'duga kede ya, nja eema yaada kiji a'a ka tal-inggo aaga taföönyö kide ya,

a Masala ma ta'diila taneene  
nja aaga.

*Tamana ta'diila a kadu  
ma Filippi*

<sup>10</sup> Nadhodho a'a a Masala dhorro eede ka tussu a'da kapadaga aaga kanaana iiye kede, kagamma aaga ma tagüüni ana a'a nggeege ma 'billi, lakiini aaga taalo ka kaluna fiinii. <sup>11</sup> Taalo a'a niki nggeege a'da a'a nasaasa niimö, nussu a'a kafa ka eyi tiya eede. <sup>12</sup> Nussu a'a kafa ka eyi tiya eede ka 'buugu ka tatoroko, nussu ka taneene eede kara tüüsü ka eema nye'd'de, nadinö a'a ka iiire nja tüüsü nja ta'diila nja dhügürü. <sup>13</sup> Ara a'a tambaanya linggo ma eema in'dili a türü tanno Yasu Almasiihi ka amana a'a no. <sup>14</sup> A'diila a'da ada ka tamünögü a'a ko'do ka dhügürü tiya eede. <sup>15</sup> Kussu aaga tumma no aaga no kadu ma Filippi no jiddi meede ka tafü'dü linggo ma Masala nunggeene ka Makadoniya taalo kaniisa ma takara tanangnga niimö illi aaga unggodho aaga. <sup>16</sup> Ka Tasalanükü kagürüniigü aaga ana eema yeede ka asaasa ya teera ma tamanaga a'a kungngo. <sup>17</sup> Taalo a'a neema nggeege a'da a'a nasaasa eema, lakiini a'a nasaasa Masala manangnga ta'diila aaga ka eema tiya ada ka talinggo ka'diila ya. <sup>18</sup> Eema yeede ka asaasa ungngo eede 'bitüngngö i'i ka eyi tiya iini ya dhabbu a tiya eede ka asaasa ya asa a'a tana eema

dhabbu ka Abafrüditös ka öö'dö ana eema tiya ada a'a, afeene afa kondho tammo unynya ti'd'di mo, türri na Masala ka tamma kide no eege kamiini. <sup>19</sup> Fa ka Masala meede mana eema dhabbu a'da kitaalo ndhiginö kide, manangnga eema yaada ka asaasa ya nye'd'de kungngo ana eere ma Yasu Almasiihi. <sup>20</sup> A tidihindhi na Masala ma Pupa tiya aja taneene ta'billi turi. Amiin.

*Tööjülu na eere no*

<sup>21</sup> Aaga ööjülu kadu ma kaniisa ana eere ma Yasu Almasiihi. Nagöre ma angnga no neene nja a'a no kööjülu aaga. <sup>22</sup> A nagöre ma angnga no ma kaniisa kita in'dili kungngo kööjülu aaga, münda kadu ma 'dö ma uugaara ma Rööma ööjülu aaga afe'de. <sup>23</sup> Fa ka türü tanno Uugaara Yasu Almasiihi taneene nja aaga nye'd'de kungngo.

## Waraga ya Bölis ma co Kölösi Tafa'da tumma

Kölösi maga anya ma Asiya ka niimö ma ndanaaya ma anya tammo eene 'bitingngö a'da Türkiya. Bölis ya tafiiñi, taalo aganna kide ma eyi tiya iini. Lakiini i'i anaana iiye kono kudumma iini ka taföönyö a'da katalaana na miini no kiki a kadu ma kaniisa a'da kalinggo eema ma Yahüüdü, afa tafaradene nja tafara ka kadhangga amang ka Masala ta'diila nja eene. Yungno Bölis ka tarigiri waraga ya adirina eema a kadu ma kaniisa a'da inde na Almasiihi koolona eege, Almasiihi ungngo ka 'dotombo'do Uugaara ma kadhangga in'dili nja nagoronggore nja eema tiya ka 'buugu ka oona ya nye'd'de. İkiri ka tiki a'da eege taalo kümmü masala meene kanangnga kadu ka tussu a'da eege ka kadu tanno Masala nja talaana. Fa kene kümmü Almasiihi. Iki eene afe'de, taneene neene kanangnga kadu ka tussu a'da eege ka kadu tanno Masala ka tagesse eege no.

### Tööjüli

<sup>1</sup> A'a na Bölis tafiiñi ya Yasu Almasiihi tasaasa ma eedi ya Masala, a'a narigiri waraga nja örre ma angnga Timosaws. <sup>2</sup> Nunggu co kadu

tanno Masala no ka anya ma Kölösi no, nagöre ma angnga no amma ka Almasiihi no, a Masala ma Pupa tiya aja tanangnga ta'diila nja türü tanno oono aaga.

*Bölis afara ka Masala nja tamana ta'diila oono*

<sup>3</sup> Kidü kara tafara ka Masala 'bucca kungngo kudumma aaga Pupa yaaja Uugaara Yasu Almasiihi, ungngo tanangnga ta'diila oono kudumma aaga. <sup>4</sup> Kidü ka taföönyö tamma ka Yasu Almasiihi naada, a tasaasa ma kadu tanno amma ka Masala nye'd'de.

<sup>5</sup> Kudumma tündhigü tanno Masala ka takindinaana kada ku'bu ka 'dotombo'do no, tündhigü naada ka taföönyö ka tumma tanno timin'da no ka İnjüili no, <sup>6</sup> İnjüili mö'dö kada ka na'buugu koona nye'd'de kungngo mana iiye madigi ku'bu afa meene ka tagüünü adene kada ka söödö jiddi ma uuru tanno ada ka taföönyö no, aaga tagusu türü na Masala nye'd'de dhorro kungngo.

<sup>7</sup> Kalaadene aaga ka tumma tanno Abafaraas örre ma angnga yüdü ka asaasa i'i ya, ya alingga nja ungngo linggo ma Masala ya ömö'di ma linggo tanno Yasu Almasiihi ya dhorro ya ka üüdü ma angnga. <sup>8</sup> I'i yungno adirina ungngo afe'de ma tasaasa tanno ada ka Koronggore.

*Almasiihi i'i ya tatoolona*

<sup>9</sup> I'i yungngo eede ka fara ka Masala turi kudumma aaga jiddi meede ka taföönyö, ungngo tafara ka Masala a'da manangnga tussu eema ma fiinii tiya oono aaga, a ta'dara ma Koronggore. <sup>10</sup> Ungngo keema tumma no amang kada taneene taneene na Masala ka asaasa no amang ka oona ta'diila kono ka eema nye'd'de, aaga tö'dö a tööyö ka linggo tanno a'diila no nye'd'de. <sup>11</sup> Aaga takidhö a türü nye'd'de afa ma tihindhi ma türü tanno oono, amang kada tana tidhi oona ku'bu nja tümmü eedi ku'bu nja dhodho. <sup>12</sup> Angnga tamana ta'diila a Masala mamanaga angnga ka tosso ka tauugaara ma töyeene. <sup>13</sup> Oogo mungngo moolona angnga ka türü ma ndüüli mapadaga angnga ka tauugaara tanna 'Bii'bala tiya oono, yoono ka asaasa i'i ya. <sup>14</sup> I'i yungngo afa angnga, oolona tatoroko naaja.

### *Almasiihi agii'bi kadu nye'd'de*

<sup>15</sup> Yasu Almasiihi i'i ya koronggore tiya Masala tammo aja kitaalo kijöögö mo, i'i ageenedene ka eema tiya arü'bü adene ya ka dhidha in'dili kungngo. <sup>16</sup> Eema nye'd'de arü'bü adene ana i'i, eema ya ka 'dotombo'do ya nja tiya ka 'büdhülü ya, ya ijidene ya nja tiya taalo ijidene. Üürü nagööyö nja türü üürü tauugaara üürü

naguugaara, eema in'dili ana i'i ananja iini. <sup>17</sup> I'i yungngo ka eema kidha nye'd'de kungngo, eema nye'd'de ümmü ajeene ana i'i. <sup>18</sup> I'i ya üüdü ma tuu'da, kaniisa i'i ya ama dhidhdha, adageenedene kadhadha ma kadu tanno aaya no, amang kini tama eema nye'd'de kungngo. <sup>19</sup> Kudumma Masala ka a'diila oona oono amang ka eyi tiya oono nye'd'de taneene ka Almasiihi. <sup>20</sup> Amang kini tanangnga kadu nye'd'de kada tanno oono ka 'büdhülü nja 'dotombo'do, ö'dö a ta'diila ana eriidö tiya iini ya uurunja ka salii'bi ya.

<sup>21</sup> Billi ka ku'b'ba aaga ka Masala ku'bu, aaga takadiidi oogo, a nanggeedi tanno ada na nyoro no. <sup>22</sup> A 'bitingngö ka inde ma tuu'da tanno iini no, anangnga aaga kada kadu ma Masala na insili no a'da taalo modolo nja hetti tagu aaga. <sup>23</sup> Kada kara tümmü tumma ma Masala ana eedi dhorro ya, aaga tüütü kide, aaga tafa tooso ka tumma ma İnjjili naada ka taföönyö na kadu ka tagalaana kadu iini ka na'buugu koona nye'd'de i'i yungngo eede a'a na Bölis ka talinggo.

### *Lingga na Bölis ma kaniisa*

<sup>24</sup> A'a 'bitingngö nadhodho a'a ka dhügürü ma tuu'da tanno eede kudumma aaga no tüümö dhügürü ya Almasiihi ka tuu'da tanno eede ka üüdü ma tuu'da

tanno iini na kaniisa no.  
<sup>25</sup> Masala mümmünü a'a ka linggo ma kaniisa a'da neemaga tumma na Masala co aaga ïn'dili. <sup>26</sup> Niimö ya Masala ka taküdhü i'i ma nagürüünü ma 'billi nja sere 'do, mala a kadu tanno oono na insili ka nanggeedi no. <sup>27</sup> Kadu na Masala kasaasa eege a'da kussu ka kajeene ka söödö tüdhindhi ma tumma tanno küdhü no, ya Almasiihi ka tanna kada ka oona, i'i yungngo a tündhigü ma tüdhindhi. <sup>28</sup> Angnga talaana kadu ka tumma tanno Almasiihi nye'd'de a tumma ma ta'dara ma tanangnga kadu kada unggodho a tadho ka fiinii ka Almasiihi. <sup>29</sup> Yungngo anangnga a'a kad Hügürü nalinggo a türü tanno Almasiihi na linggo kede no.

## 2

<sup>1</sup> Amang kada tussu nad Hügürü, a'a kudumma aaga nja kadu ma Ladüküya nja kadu tanno taalo kadini kede no nye'd'de kungngo.  
<sup>2</sup> Amang kene tana türü ka nanggeedi a tumma naada ta unggodho aaga asaasa ajeeene, aaga taneene a ta'dara ma tussu eema nye'd'de ma niimö tiya Masala ya tünggüdhü ya Almasiihi. <sup>3</sup> I'i yungngo eema ya a'diila ya nye'd'de ma ta'dara nja tussu eema kadunadene kini. <sup>4</sup> A'a nadirina aaga ii'di ömö'di öccö tüüsini aaga a tumma tanno i'd'di no anangnga

aaga katuurna fiinii ya toroko ya. <sup>5</sup> Nitaalo a'a naneene nja aaga a tuu'da, lakiini a'a nungngo ada ka söödö a koronggore, nadhodho a'a eede kiji tidhi oona ku'bu a taneene tanno ada no ma tümmü tumma na Almasiihi dhorro.

### Tefe ka 'di nja Almasiihi

<sup>6</sup> Aaga unggeene ka fiinii tiya Yasu Almasiihi afa maada ka tamma kini kada Uugaara. <sup>7</sup> Aaga kardha ku'bu aaga tamma kini dhorro, aaga tümmü tumma naada ka tagalaadene kide no, aaga tamana ta'diila a Masala. <sup>8</sup> Aaga adinö ko'do, ömö'di ökönö tafa tüüsini aaga a tumma ma ker'de ker'de ana eema ma kadaada ma 'billi ana eema ma 'büdhülü ya itaalo aya Almasiihi ya. <sup>9</sup> Kadigine taneene na Masala ka tuu'da tanno Almasiihi. <sup>10</sup> O'o nadigine ana Almasiihi, i'i yungngo üüdü ma naguu-gaara 'do nja türü. <sup>11</sup> Kadu na Almasiihi karadene, lakiini taalo taradene ma niisö, lakiini kadhaga aaga tuu'da ma tatoroko ma tamö'di a taradene tanno Almasiihi. <sup>12</sup> Kada kambeesedene ana eere tiya Almasiihi, kadü'büdene aaga nja iini, aaga tafiki'dö nja iini afe'de kudumma ada ka tamma ka türü tanno Masala na anangnga i'i ka fiki'dö no. <sup>13</sup> Kaganeene aaga afa kadu no aaya no ka tatoroko tanno ada, kudumma ada ka titalo karadene ka tuu'da. A Masala tanangnga aaga ka tefe ka

'dii nja Almasiihi ma'duga tatoroko kaja ka oona nye'd'de kungngo.<sup>14</sup> Aagala eema ma 'billi ya arigirinja ku'bu ya taalo a'diila nja angnga ya, ada'dingnge kada diidi ma angnga, i'i a'duga kaja abbünnü i'i ka salii'bi.<sup>15</sup> Amuru türü ma tauugaara anangnga euge ka tussu adene ka kadu kidha adagii'bi euge ana salii'bi.

<sup>16</sup> Nggeege aaga fa tafa ka ömö'dii töccö ahükümü aaga kudumma ma eema tiya ada ka taguri nja tooye nja taanyara nja tere nja uuru ma Sa'bidi.<sup>17</sup> Eema ya nye'd'de kungngo a koronggore ma eema tiya unggunu atö'dö ya, lakiini tumma dhorro kungngo Almasiihi.<sup>18</sup> Aaga tafa ka ömö'dii tiya üfü korokoro a'da i'i iicolo ka eedi nja tumma ma kadhangga a'duga talängnge naada. Ömö'dii afa ma tiya miini ya inynyo ka tasaana eema ku'bu dhabbu ma eema tiya iini ka tijöögö ya, adigine a ta'dinga oona coo'do a tumma ma tadü'd'dü ün'düngngö.<sup>19</sup> Taalo ümmü ajeene nja üdü, ya tuu'da nye'd'de katümmünü ajeene kakaraganja ko'do ana areere nja agillö, ingiridene afa ma Masala ka anangnga i'i ka tingiridene kungngo.

*Inde nja tefe ka 'dii nja Almasiihi*

<sup>20</sup> Kada ka ndaaya nja Almasiihi aaga taadha ka eema ma 'büdhülü, aaga

sa köö'dö nya aaga taneene afa aaga kama 'büdhülü, minna agu aaga aaga taleefe kide, minna agu aaga, aaga tümmünü eyi yaada ka türü tanno iini.<sup>21</sup> "Fa taa'ba niimö ya ka oona, fa tagolo ya, fa tümmü ya ka oona"?<sup>22</sup> Eema ya nye'd'de ara titaalo a kadu kara talingga iini, talaana ma 'büdhülü euge kamiini.<sup>23</sup> Kijöögö angnga kafeene nja eema ma tussu eema, tümmönö ma Masala kinggide a tiicolo ma eedi a tüünü midhi ku'bu a tuu'da, lakiini taalo adho ka fiinii ma tafaga eema ya tuu'da ka asaasa ya keere.

### 3

#### *Taneeene na insili no*

<sup>1</sup> Kada ka fiki'dö nja Almasiihi, aaga asaasa eema ya ka 'dotombo'do kita Yasu ka tanna kide ya, ya emmi ka Masala ka niisö ma kuri ya.<sup>2</sup> Aaga anaana iïye ka eema tiya ka 'dotombo'do ya taalo ka eema ma 'büdhülü.<sup>3</sup> Kudumma ada ka taaya, a tefe ka 'dii naada ta küdhü ka Almasiihi a türü tanno Masala.<sup>4</sup> Yasu i'i yungngo a tefe ka 'dii tanno ada, a kini kara tabbü 'dala ya, ara aaga tabbü 'dala nja iini ka tidhindhi tanno iini.

<sup>5</sup> Aaga körnö eema ma 'büdhülü yaada ka oona ya, füngngö nja kadu ka dhoonyo, nyoro ma eedi, temelö a tallogo, ya anangnga kadu ka tamma ka eema ma 'büdhülü tiya.<sup>6</sup> Eema ya i'i yungngo tanangnga tagoroo'bo na

Masala ka ala kadu.<sup>7</sup> Kagafiigi aaga nggeege, ada kaleefe ka eema tiya miini ya 'billi.<sup>8</sup> Lakiini 'bitüngnö sa aaga Aadha ka eema tiya tamana aaga ka koroo'bo ya nja tam'baga nja teela ajeene,<sup>9</sup> aaga tafa tüüsini ajeene ana eema ma korokoro ün'dügüngnö, kudumma ada ka taadha ka eema ma 'billi nja linggo miini 'do.<sup>10</sup> Aaga kirni tuu'da na 'diila no ma tussu eema no ka koronggore ma ömö'di tiya adina i'i ya.<sup>11</sup> Kita taalo taga Yünan alla taga Yahüdü alla ya tendhe alla ya taalo atendhe alla töölege alla tajeene alla tasaga alla ömö'di ya hurra ya, lakiini Almasiihi i'i in'dili ada ungngo ka eema in'dili.

<sup>12</sup> Aaga na Masala ka asaasa aaga ka tagesse aaga, manangnga aaga ka tinsili no, aaga kirni 'bangnga kada ka oona, aaga tana muuyu ma kadu, nja tiicolo ka nanggeedi, aaga tana 'bangnga ma tasaasa ajeene nja tidhi oona ku'bu.<sup>13</sup> Aaga faana ka oona aaga tanaana ma kadu tanno üünä tatoroko ana aaga no, üürü tumma na toroko no kungngo ada nja iini, afa ma Yasu ka 'duga tatoroko kaja ka oona, a'diila nja angnga kungngo.<sup>14</sup> Eema ya in'dili ya aaga agusu tasaasa kide, kudumma tasaasa eege kungngo kawagaana eema ya koona nye'd'de kungngo kada unggodho.<sup>15</sup> A ta'diila na Almasiihi tanna kada ka nanggeedi, i'i yungngo

a Masala ka tagümmünü aaga a'da aaga ta unggodho, aaga tamana ta'diila a Masala.<sup>16</sup> Aaga fa ka tumma tanno Almasiihi kanna kada ka nanggeedi a ta'diila miini, aaga talaana ajeene a ta'dara, aaga tüwe tüüsü ma sorne ma nakaaru, nja tüüsü ma koronggore, aaga tamana ta'diila a Masala ndama nanggeedi tanno ada ka teene.<sup>17</sup> Niimö yaada kara talinggo üürü ada kara teema ya, aaga linggo ana eere tiya Uugaara Yasu. Aaga tanangnga ta'diila a Masala Pupa ana i'i.

*Tumma ma taneene ma kadu ma öö'di tiya unggodho ya*

<sup>18</sup> Iiya, aaga föönyö tumma na naganyori tanno ada, afa ma tiya Yasu ka asaasa ya kungngo.<sup>19</sup> Nagiide, aaga asaasa iiya naada aaga tafa tüünä tatoroko ana eege.<sup>20</sup> Laala ya dhiidhi ya, aaga föönyö eema na kafaafa ma aaga nja nakanüümö tanno ada ana eema nye'd'de, eema ya Yasu ka asaasa i'i ya miini.<sup>21</sup> Kupupa, aaga fa tamidhi laala yaada kudumma eene kara tagi'di ka oona.<sup>22</sup> Kasaga, aaga aföönyö tumma na kadu tanno ada ka tagalinggo ada eene no, ka 'büdhülü kita. Taalo a'da aaga talinggo amang kene tadinö ka linggo, amang ka kadu ta'diila nja aaga, lakiini a ri'ba ma Masala ana eedi ka tinsili.<sup>23</sup> Niimö yaada kadalinggo

ya, aaga linggo a nanggeedi ka teene afa maada ka talinggo ada Masala taalo a kadu.<sup>24</sup> Aaga tussu a'da ara Masala tanangnga talingnge naada aaga ndama niisö tanno oono, kada ka talinggo ada Uugaara Almasiihi.<sup>25</sup> Ömö'di ya üünii eema ya toroko ya, ara sa aluna tapusu adene niini kide, kitaalo talomodene kide.

## 4

<sup>1</sup> Naguugaara, aaga fa tüünii ada kasaga naada ku'bu, amang kada tussu a'da Uugaara ma aaga ungngo ko'do ka 'dotombo'do.

### Talaana

<sup>2</sup> Aaga fara ka Masala turi aaga tadini ko'do aaga tamana ta'diila a Masala.<sup>3</sup> Aaga ümmü Masala amang kono tafa'da ungngo ka nanüönö amang kede teema tumma na Almasiihi neede ka tanna ka pabuusu miini no.<sup>4</sup> Aaga afara ka Masala amang kede teema tumma na dhorro no amang ka kadu taföönyö.<sup>5</sup> Aaga aneene nja kadu no taalo kama ka kaniisa no a ta'dara ma tussu eema ya adho ka fiinii ya.<sup>6</sup> Aaga eema tumma na a'diila no 'bucca kungngo ki'd'i afa tangga'dala, aaga tussu ka tapadaga tumma co kadu nye'd'de ka'diila.

### Tööjülü no eere no

<sup>7</sup> Tikikos assa ka tirina taneene neede aaga ya akinyi linggo a'a ya. I'i ya örre tiya eede ka asaasa i'i, ya adho

ka fiinii ya ma linggo ma Uugaara.<sup>8</sup> I'i yungngo eede ka kürünü i'i kada amang kini tadünüğü taneene niidü aaga, a nanggeedi tiicolo kada.<sup>9</sup> Nagürünü a'a Önisimös nja iini örre yaaja ya a'diila i'i ya yaada, euge kara tadirina eema ya alinggo adene kidi kita ya aaga.

<sup>10</sup> Are starkos ta taneene yeede ka pabuusu ööjülü aaga nja Murkus moole ma Barnaba i'i yungngo eede ka tiki a'da aaga tada'da i'i kini kara tö'dö kada kanna.<sup>11</sup> Nja Yashu tiya ana eere afe'de a'da Yustus ya. Eege kungngo kalinggo nja a'a eege na Yahüdü no unggodho eege ka fiinii ma tauugaara ma Masala ka kakinyi linggo a'a 'do.<sup>12</sup> A Abafaraas ööjülü aaga, ömö'di yaada könö i'i ya miini tatalinggo ya Yasu Almasiihi i'i ya miini afe'de akardha ku'bu dhorro kudumma aaga ma tafara ka Masala amang kada tidhi oona ku'bu aaga talinggo linggo na Masala ka asaasa no.<sup>13</sup> A'a nungngo nadinö ka dhügürü tiya iini ka talinggo kudumma aaga nja kadu tanno ka Ladüküya no nja Hirabolis.<sup>14</sup> Lüüka ya dictöörö ya teefe ma angnga ya, nja Dimas kööjülü aaga.<sup>15</sup> Aaga ööjülü kadu no ka Ladüküya no nja Nifa nja kaniisa tammo oono ka 'di mo.<sup>16</sup> Kada kara türi waraga ya, aaga kürünigü iini aaga tunggu co kadu ma kaniisa ka Ladüküya, amang

kene tüörönö tekere. Aaga  
iiri waraga könö inggide,  
yeede ka tunggo co kadu ma  
Ladükiya.<sup>17</sup> Aaga iki a Ark-  
ibus adinö ko'do ma linggo  
tanno Masala ka tümmünü  
i'i iini no afa kide atimö  
eege.

<sup>18</sup> Tumma no a'a narigiri a  
niisö ma a'a na Bölis, aaga  
kügi ma tanna ka pabuusu  
tanno eede no. A türü na  
Masala taneene nja aaga.

## **Waraga ya Bölis ma co Tasalanükü ya Dhidha ya Tafa'da tumma**

Bölis ya tafiünii i'i agafü'dü linggo ma kaniisa ka Tasalanükü (Kadafiünii 17), oogo ma ka anya tammo dhabbu ka Makadoniya ka ta'doogo ma Yünan. Unggeene kide areere kudumma Yahüdü könö kasaasa tako'do kini. Ömö'dü ya akinyi linggo iini ya ana eere a'da Timosaws ya ö'dö adirina eema iini a'da kadu ma kaniisa no ka Tasalanükü no kütü ka tümmü tumma ma Masala a'da kalinggo kadu eege. A Bölis tarigiri waraga ma tuu'bu eege ka nanggeedi nya iini ka tapadaga tindineene neene eene.

Bölis anangnga ta'diila a Masala kudumma tamma nya tasaasa tanno kadu ma kaniisa ma Tasalanükü, adirina eema eene ma taneene tanno iini nya eene. İkürü ka tasaana tumma no agalinggo adene a kadu ma kaniisa co eene ma inde nya niimö tiya ara tö'dö ka Yasu Almasiihi kara tafada öö'dö ka 'büdhülü. Adagadünüğü eema eene, meene kara taneene nya, idhi Almasiihi tafada.

### *Tööjülu*

<sup>1</sup> A'a na Bölis narigiri waraga ya nya Silwans nya Timosaws ungngo tunggu

waraga co kadu ma kaniisa ma Tasalanükü, kadu na Masala ma Pupa nya Uugaara Yasu Almasiihi, a türü nya ta'diila tanna nya aaga.

### *Tamma na kaniisa ma Tasalanükü*

<sup>2</sup> Kamana ungngo ta'diila a Masala kudumma aaga turi kungngo, ungngo tadiri aaga ka fara tiya iiidü nya Masala ya kungngo, kafara ungngo ka Masala a naguuru. <sup>3</sup> Kütü ungngo kadagiigü tumma naada ka talinggo a tamma kidha ma Masala tanno aja Pupa ma linggo naada ka tümmöönö a tasaasa nya tidhi oona ku'bu na öö'dö a tindhiigü ka Uugaara tiya aja Yasu Almasiihi. <sup>4</sup> Nagöre eede, Masala masaasa aaga, ungngo tussu a'da oogo magesse aaga. <sup>5</sup> Kidi köö'dö a tumma tanno a'diila no aaga, taalo a tumma ma niinö unggodho eege, lakiini a türü ma Masala nya Koronggore tiya Insili ya, taalo tumma ma niinö ün'dügüngngö. Kussu aaga a'da ka kaneene ungngo nya aaga nya kaga'diila nya aaga. <sup>6</sup> Kada ka tamma ka tumma, kagümmü aaga fiinii yiidü nya fiinii tiya Masala, kadhügürü aaga dhabbu, lakiini Koronggore ya Insili anangnga aaga ka tadhodho. <sup>7</sup> Aaga kungngo kala ta'diila a kadu ma Makadoniya nye'd'de nya Akaiya. <sup>8</sup> Kudumma tumma tanno Masala ka dhala ku'bu ndama aaga, taalo ka Makadoniya nya Akaiya

sugi, lakiini tamma nüüdü ka Masala no kussu adene ka na'buugu nye'd'de, i'i yungngo iidii ka titaalo kasaasa tadiri nüümö miini.<sup>9</sup> Kadu 'do keema tumma maada ka tamma kidi, yiidii köö'dö kada ya, aaga aadha ka eema ma namasala aaga tümmü tumma ma Masala tammo dhorro mefe ka 'di mo.<sup>10</sup> Ma tindhiggi 'Bii'bala yoono kara tö'dö ndama 'dotombo'do, a Masala ka fiki'dö i'i ndama inde, Yasu i'i yungngo ara toolona angnga ka tagoroo'bo tanno Masala na ara tö'dö no.

## 2

### *Lingga na Bölis ka Tasalanüki*

<sup>1</sup> Nagöre eede, tö'dö kada kannu nüidii no, taalo ka toroko.

<sup>2</sup> Afa maada ka tussu a'da ka kalinggo adene ungngo, ungngo tageeladene ka Filippi, lakiini Masala manangnga türü ungngo miiidii ka teema ka tumma moono co kadu a'da kagüuni kadu tatoroko ana ungngo.

<sup>3</sup> Taalo ungngo keema tumma na toroko no nja aaga, ungngo taalo kiisini ömö'dii, a taalo nüümö ya toroko kidi ka eedi nja aaga.

<sup>4</sup> Lakiini Masala ma'diila nja ungngo manangnga tumma noono ungngo, taalo ungngo keema a'da a kadu ta'diila nja angnga, lakiini Masala oogo mungngo müüri angnga ka nanggeedi.

<sup>5</sup> Taalo ungngo köö'dö kussu aaga a'da taalo angnga tasaasa tadünnü eema na a'diila no ma aaga alla tallogo ungngo

ma nüümö, illi Masala oogo mungngo mussu.<sup>6</sup> Ungngo taalo kasaasa a'da a kadu tindhiggi ungngo ko'do alla aaga tindhiggi ungngo ko'do alla kadu könö.<sup>7</sup> A'da kömüsü müidii mungngo ada ka oona, kudumma iidii kadafiini tanno Almasihi, lakiini 'bangnga ma aaga magu ungngo afa ma nüümö kaana 'bangnga ma laala tiya oono.<sup>8</sup> Ungngo kasaasa aaga dhorro, kasaasa ungngo aaga, aaga tosso ka taneene nja ungngo, taalo ka tumma ma İnjüili sugi, lakiini kudumma ada ka a'diila nja ungngo.<sup>9</sup> Tumma dhorro nagöre eede, kagiigii aaga dhügürü yiidii nja linggo na dhabbu no, iidii kadalinggo oosooso nja naguuru amang kidi tafa tanyamanya ömö'dii öccö ka oona a'da keemaga ungngo tumma ma İnjüili ma Masala co aaga.<sup>10</sup> Aaga nja Masala ka tönö aaga ka taneene tanno iidii nja aaga a nanggeedi ka tinsili a'da taalo nüümö ya toroko ya kide, aaga no amma ka Masala no.<sup>11</sup> Aaga afe'de kussu aaga a'da ka kalinggo ada ungngo eema nye'd'de afa ma pupa ka tüünii ada laala tiya iini ya kungngo.<sup>12</sup> Kafünügü ungngo aaga ko'do, ungngo tagalaanaga, ungngo tageema nja aaga, aaga taneene taneene ma Masala na dhorro no, mümmünü aaga a tauugaara nja tihindhi tanno oono.

<sup>13</sup> Yungngo iidii kamana

ta'diila a Masala turi kungngo, kudumma ada ka tümmü tumma ma Masala naada ka taföönyö kädi no, aaga tamma kide no. Taalo tumma ma ömö'dü euge kamiini, lakiini tumma ma timin'da ma Masala ka linggo kada ka oona aaga na amma ka Masala no.<sup>14</sup> Nagöre eede, eema ya linggodene ana aaga, agalinggo adene ana kaniisa tanno Masala no ka Yahüüdiya no ana eere tiya Yasu Almasiihi. Siliga ma aaga euge kungngo kalinggo aaga, euge tekere kagalinggo Yahüüdü euge.<sup>15</sup> Eege kagiidi Uugaara Yasu nja nagane'bi, küüni tatoroko ana angnga, taalo kamma ka Masala, kadiidi kadu in'dili.<sup>16</sup> Kasaasa tafaga angnga ka teema ka tumma ma Masala co ajeene, tumma na ara tö'dö a toolona eene no, euge kakogoona ma tüüni eema ya toroko ya, a 'bitüngngö sa tagoroo'bo na Masala a tö'dö kene.

### *Bölis asaasa tassa kene afe'de*

<sup>17</sup> Lakiini nagöre eede, ka kaadha ungngo kada ka oona idhilli kungngo a dhugudha ün'dügüngngö, lakiini taalo ana nanggeedi, katinigöögö ungngo ma tassa kada a 'bangnga ma aaga kagu ungngo.<sup>18</sup> Kasaasa ungngo tö'dö kada kannu, a'a ka eyi tiya eede na Bölis no nasaasa a'a tö'dö ta unggodho üürü teera illi Ebliisi afaga ungngo keere.<sup>19</sup> Ka

Uugaara Yasu kara tö'dö ya, aaga kungngo kara tanangnga tidhindhi angnga nja dhodho, anangnga ungngo ka 'diniga oona niidi coo'do a tii'bana ma türü tanno ada ka anangnga ungngo no.<sup>20</sup> Aaga ka tafünüğünja ko'do tanno iidü, aaga tadhodho tanno iidü.

## 3

<sup>1</sup> Kidü ka ndasala tidhi oona ku'bu niidi ka ndafaradene ya, ungngo tikiiri ka tiki a'da ungngo töödhi ka Asiina unggodho ungngo.

<sup>2</sup> Kagürünü ungngo örre ma angnga Timosaws, ya alinggo linggo ma Masala nja ungngo ya, adünnü tumma ma Almasiihi a'da öö'dö tamünüğü aaga ko'do ma türü ma tamma tanno ada.<sup>3</sup> Amang ka ömö'dü töccö tapadaga oona keere kudumma tatoroko tanno, kussu aaga a'da ara angnga tagadhügürü.<sup>4</sup> Kidü ka takaleefe nja aaga ya, kakilli ungngo ka takiki aaga a'da ara ungngo tadhügürü afa maada ka tessu iini dhorro kungngo.

<sup>5</sup> I'i yungngo anangnga a'a ka kürünü Timosaws, kudumma eede ka titaalo nara tambaanya tidhi oona ku'bu tafifinni miini kara tö'dö tassa ka tamma ka Masala naada, ri'ba kagu ungngo a'da ii'dü Ebliisi tö'dö ta'b'ba aaga a lingngo niidi tanggaaga ta nüümö ün'dügüngngö.

<sup>6</sup> A 'bitingngö Timosaws ungngo ö'dö ndama aaga kannaa adirina tumma ma tümmü Masala naada ungngo nja tasaasa, iki ungngo a'da aaga küigi tumma ma ungngo turi kungngo a ta'diila, aaga kasaasa tassa kidi afa müidi ka asaasa tassa kada kungngo. <sup>7</sup> Nagore eede, kadhwürü tiya iidii ya nja tünni muuyu, kidhi ungngo oona ku'bu, ungngo tana türü a tamma ka Masala tanno ada. <sup>8</sup> A 'bitingngö ya, kefe ungngo ka 'di kudumma ada ka tidhi oona ku'bu ka Uugaara. <sup>9</sup> Ara ungngo tanangnga ta'diila a Masala ma aaga ka dhodho tanno iidii ka oona kidha ma Masala no. <sup>10</sup> Ungngo tafara ka Masala osooso nja naganuuru turi, amang kidi tassa kada ka dhugudha amang kidi tö'dö a nüümö tiya itaalo ka tamma tanno ada.

<sup>11</sup> Fa ka Masala Pupa yaaja nja Uugaara Yasu indinaana fiini kidi ku'bu ma tö'dö kada. <sup>12</sup> Nasaasa a'a Masala ma kusu tasaasa ajeene aaga ma kadu nye'd'de, afa müidi ka asaasa aaga kungngo. <sup>13</sup> Manangnga türü ada ka nanggeedi aaga tinsili a nüümö ya toroko taalo kide, kidha ma Masala tammo aja Pupa yaaja, ka uuru ma tö'dö ma Uugaara tiya aja Yasu nja kadu tanno amma kono no.

## 4

*Tefe ka 'di ma tanangnga*

### *Masala ka tadhodho*

<sup>1</sup> Keere kungno nagore eede, ungngo kasaasa aaga ana eere tiya Uugaara Yasu a'da aaga tagusu taneene ka taneene tanno ada ka tunggeene iini 'bitingngö no ma tanangnga oona ka'diila ka Masala. <sup>2</sup> Kussu aaga tumma niidi ka tünügü aaga ndama Uugaara Yasu. <sup>3</sup> Nüümö ya Masala ka asaasa a'da aaga tinsili iini i'i yungngo, a'da aaga taadha ka temelö, <sup>4</sup> amang ka ömö'di töccö ana kada tessu ka taneene nja aka tammo iini ka tinsili ka tadho ka fiini. <sup>5</sup> Ii'di temelö taka kini afa kadu no taalo kussu Masala no. <sup>6</sup> Ömö'di öccö tafa talingga örre yiini alla amidhi i'i, kakilli ungngo ka tirina tumma no aaga, Masala oogo mungngo mara ta'diinö ka tumma tanno. <sup>7</sup> Taalo Masala magümmüñ angnga ma eema tiya nyoro ya, lakiini ma eema tiya insili ya. <sup>8</sup> Ömö'di ya anu ka talaana tanno ya, taalo a tanu ka tadü'd'dü lakiini Masala mungngo manangnga Koronggore yoono ya Insili ya aaga.

<sup>9</sup> Aaga tasaasa ajeene ma tanagore, taalo nama tarigiri ada ka waraga aaga no miini, kudumma Masala ka tagalaana aaga a'da aaga tasaasa ajeene dhidha.

<sup>10</sup> Aaga ünni nggeege a nagore ma angnga tanno ka Makadoniya no nye'd'de. Ungngo tiki kasaasa nagore eede a'da aaga talingga nggeege aaga tii'bi ya.

11 Aaga tadini ko'do aaga taneene ka tiicolo, aaga talinggo eema ma eyi tiya ada, aaga tagu eema ma linggo ma iisine tanno ada afa ma tiya iidii ka kadunnü aaga ya kungngo. 12 Amang ka taneene tanno ada ta'diila ka kadu tanno taalo ka ma kaniisa no amang kada tafa tarangnga kadu.

### *Tö'dö na Uugaara*

13 Nagöre eede, taalo ungngo kasaasa a'da tüürü ma kadu tanno aaya no, iidii aaga tanggaaga tamüürü afa kadu na taalo ka indhigü Masala no. 14 Üürü kagamma angnga a'da Yasu eyi asa fiki'dö afe'de ya, i'i yungngo aco kada kamma a'da kadu na aaya a'da kamma kini no, ara Masala sa ka öö'dö ana eege nja Yasu. 15 Afa ma tumma tanno Uugaara ka eyi tiya iini, ungngo tiki aaga a'da angnga na öreeene na aleefe tefe ka 'dö no, ara Uugaara ka öö'dö, taalo angnga kara co ka kadu tanno aaya no kidha. 16 Kudumma Uugaara Yasu ka eyi tiya iini ara tö'dö ku'bu ndama 'dotombo'do ana ndhiidhe ma tümmüneene ma uugaara ma kadhangga, a fara ma tiniidö tanno Masala, ikiri kadu na aaya ka tamma ka Almasiihi no kafiki'dö ka dhidha. 17 Ikiri angnga ka takoreene nja eene ka tulüögü, angnga na öreeene kefe ka 'dö no, angnga takoreene nja Uugaara Yasu ka 'dotombo'do angnga

taneene nja iini turi. 18 Kada kindhigü njaana ko'do a tumma tanno.

## 5

### *Uuru na Uugaara*

1 Nagöre eede, taalo nama tarigiri ada waraga aaga, aaga ma nagürüünü nja naguuru. 2 Kudumma ada ka tussu dhorro a'da uuru ma tö'dö na Uugaara kafeene nja tanyooro ya unggene ooso kungngo ya. 3 Ka kadu kara tiki a'da, "A'diila 'buugu insili ya," ikiri ka tako'd'do kene ma taga'da ada eege ku'bu afa teene na ö'dö ka aka magüröönö mo ka tin'di kungngo kitaalo kara tambaanya toolona nanggeyi neene. 4 Lakiini aaga nagöre eede, taalo aaga kanna ka na'buugu tiya lüllü ma uuru tanno miini no kara tükü aaga ko'do afa tanyooro. 5 Kudumma ada kada laala ma töyeene nja laala ma uuru, taalo kama ma ooso alla ma ndüüli. 6 Fa kada fa tafeene nja kadu könö na arigide no, lakiini kada tadini ko'do angnga tümmü oona naaja dhorro. 7 Kudumma kadu tanno arigide no karigide ooso kungngo, a kadu na ooye no, kooye ooso kungngo. 8 Lakiini angnga no laala ma uuru no ka tadini, angnga tagümmü madagussi ma tamma nja tasaasa nja barnete ma tindhigü toolonadene. 9 Masala taalo mö'dö ana angnga maaja ka dhügürü, lakiini ma toolonadene ana eere

ma Uugaara tiya aja Yasu Almasiihi. <sup>10</sup> I'i ya eyi ka üdü ma angnga amang kaja tageefe ka 'dī nja iini, üürü kadīnö angnga üürü kaaya angnga. <sup>11</sup> Aaga ìndhígí njana ko'do, aaga takinyi njana ko'do afa ma tiya ada ka tüüní 'bitüngngö ya kungngo.

*Talaana na eere no nja tööjülü*

<sup>12</sup> Ungngo tasaasa aaga nagöre eede a'da aaga tanaana ëïye ka kadu tanno alinggo kada ka söödö no na alaana aaga ka fiinü ma Uugaara no. <sup>13</sup> Aaga tasaasa eege dhorro ka linggo tanno eene no, aaga aneene a ta'diila ma nanggeyi tanno ada. <sup>14</sup> Nasaasa aaga nagöre eede, a'da aaga talaana kadu no taalo kalinggo no, aaga afünügü kadu no ari'ba no ko'do, aaga akinyi kadu no ki'di no ko'do, aaga idhi oona ku'bu ma kadu nye'd'de. <sup>15</sup> Aaga fa ka oona ömö'di öccö tafa ta'diinö ka ömö'di tiya a küüní tatoroko ana i'i, lakiini aaga üüní eema ya a'diila ya 'bucca kungno anangnga eyi tanno ada nja kadu könö. <sup>16</sup> Aaga dhodho turi kungno, <sup>17</sup> Aaga eema nja Masala 'bucca kungno. <sup>18</sup> Aaga füñögü Masala ko'do ka eema in'dili, kudumma fiinü tiya Masala i'i ya miini kada ana eere ma Yasu Almasiihi. <sup>19</sup> Aaga fa taga'da linggo ma Koronggore tiya Insili ya. <sup>20</sup> Aaga fa tamidhi linggo ma tane'bi. <sup>21</sup> Lakiini

aaga anaana ëïye ka eema nye'd'de aaga sa katümmü ya a'diila ya. <sup>22</sup> Aaga fa takete ka niimö tiya toroko ya.

<sup>23</sup> A Masala ma ta'diila ka eyi tiya oono manangnga ka tinsili ka eema in'dili mafa kada a niimö ya toroko titaalo ada ka oona. A koronggore yaada ta'diila a tuu'da miini nja koronggore ka uuru tanno Uugaara tiya aja Yasu Almasiihi kara tö'dö kide ya. <sup>24</sup> A ömö'di ya ka ümmünü aaga ya, i'i ya adho ka fiinü, i'i taalo arumu timi'di tumma niini.

<sup>25</sup> Aaga fara ka Masala kudumma ungngo, nagöre eede. <sup>26</sup> Aaga ööjülü nagöre ma angnga nye'd'de tööjülü na insili no. <sup>27</sup> Ara a'a teema nja aaga ana eere ma Uugaara a'da aaga tiiri waraga ya a nagöre ma angnga nye'd'de. <sup>28</sup> Fa ka türü tanno Uugaara Yasu Almasiihi tanenee nja aaga.

## Waraga ya Bölis ma co Tasalanükü ya Eera ya Tafa'da tumma

A Bölis tarigiri waraga ya co kadu ma kaniisa ka Tasalanükü kini ka ndatümö nagatereeene könö iini ka tarigiri waraga ya Tasalanükü ya dhidha ya. Ka waraga tiya i'i uu'bu kadu ma kaniisa ka nanggeedi a'da kütü katümmü tumma neene ka kadu ka talinggo eege. Kadu könö kadünögü eema eene a'da Almasiihi andagöö'dö afe'de nja iini ka ndakete kara tö'dö, taalo kasaasa talinggo afe'de. Bölis anangnga tumma eene a'da kafa taföönyö tumma na kadu tanno miini no. I'i ageema iki a'da a kadu ma kaniisa tafa tadhusu. Uuru ma tatoroko kara tadigi 'büdhülü kara saga öö'dö a'da üfürü Almasiihi tafada, uugaara ya toroko ya ara saga ka tafünü kadu kada diidi ma Masala.

<sup>1</sup> A'a na Bölis narigiri waraga ya nja Siila nja Timosaws ungngo tunggu co kadu ma kaniisa ma Tasalanükü kadu na Masala Pupa yaaja nja Uugaara Yasu Almasiihi.

<sup>2</sup> Fa ka Masala Pupa yaaja nja Uugaara Yasu Almasiihi anangnga türü aaga nja ta'diila.

*Tamana ta'diila nja tafara  
ka Masala*

<sup>3</sup> Nagöre eede, kama ungngo ma tanangnga ta'diila a Masala turi kudumma tamma tanno ada ka inggiridene dhabbu, nja tasaasa ajeene tanno naada ka tadhabbu. <sup>4</sup> Ungngo ka eyi tiya iidi kabbü ungngo na'dugiisine ana aaga ka nakaniisa tanno Masala naada ka tanna kide no, aaga kidhi oona ku'bu nja tamma ka eema tiya ada ka tambaanya ma dhügürü nja tüüninja ku'bu ya.

<sup>5</sup> Nggeege kussu angnga a'da tümmü na Masala ka adho ka fiinä ma tindinaana aaga ka tauugaara ma Masala tanno aada ka dhügürü ka fiinä miini no.

<sup>6</sup> Ara Masala saga tüünä niimö ya adho ka fiinä ya, oogo mara sa ka tapusu kadu na üünä tatoroko ana aaga no. <sup>7</sup> Ara Masala saga nangnga talingnge aaga aaga na dhügürü ta'bütengngö no nja angnga afe'de. Ara talinggo adene ka Uugaara Yasu kara tö'dö ndama 'dotombo'do nja kadhangga tanno iini na ana türü no.

<sup>8</sup> Ana onggo'do ma issi ka finne ma tapusu kadu na taalo kussu Masala no nja kadu tanno taalo kaföönyö tumma na Uugaara tiya aja Yasu. <sup>9</sup> Eege kara tapusu adene kaama ta'billi, taalo kara takete ka dhugudha tiya Uugaara Yasu nja türü ma tiddhindhi tanno iini

<sup>10</sup> kini kara tö'dö ka uuru tanno miini no, a tiddhindhi nja tinsili a kadu na amma kini no tadhere nye'd'de nja

aaga afe'de, kudumma ada ka tamma ka tumma tanno iidi.

<sup>11</sup> I'i yungngo iidi ka teema nja Masala a'da aaga ta kadu ma linggo tanno oono in'dili matiimö linggo a türü ma ta'diila nja linggo ma tamma tanno ada. <sup>12</sup> Fa ka eere tiya Uugaara tiya aja Yasu idhindhi, a türü niini tanna kada ka oona aaga tanna kini ka oona a türü ma Masala tammo aja nja Uugaara Yasu Almasiihi.

## 2

*Uuru ma Yasu ka tö'dö*

<sup>1</sup> Lakiini nagöre eede, a'a nasaasa aaga aaga tussu tö'dö na Uugaara tiya aja Yasu Almasiihi, angnga taganeene nja iini, <sup>2</sup> aaga tafa ta'deedene ka oona areere ka nanggüüdü tanno ada kudumma a tumma kö'dö ndama koronggore alla ndama angnga kiki kide a'da uuru ma Uugaara killi ka töö'dö a tumma no taalo ka timin'da. <sup>3</sup> Aaga fa tafa ka ömö'di töccö iisini aaga a fiini tököönö, kudumma uuru na Uugaara taalo kara tö'dö illi a tasilli eema tö'dö, ömö'di ya toroko ya tabbü 'dala ma tara teyi. <sup>4</sup> I'i ara tadiidi a'diniga eyi yiini coo'do ka eema nye'd'de ya ana eere a'da Masala nja kadu kafara kini ya amang kini temmi ka la ma Masala eema ka eyi tiya iini a'da i'i ya Masala.

<sup>5</sup> Taalo aaga kagiigii yeede ka taganeene nja aaga ya, na a'a tageemaga tumma na miini no co

aaga 'bucca kungngo? <sup>6</sup> A 'bitingngö kussu aaga niimö ya afaga i'i keere ya, amang kini tabbü 'dala ka uuru miini tanno dhorro no. <sup>7</sup> Taküdhü ma ömö'di tiya atoroko ya kanda üünidene 'bitingngö, lakiini niimö ya ara tüünidene ya, taalo ara tüünidene ana ömö'di ya afaga eege keere ya, ka'dugadene ka fiini. <sup>8</sup> Idhi ömö'di ya toroko ya saga abbü 'dala ka Yasu Almasiihi ka tiidi i'i a teela tanya a niinö tanno iini, aginyi i'i a talimaana ma tabbü 'dala tanno iini. <sup>9</sup> Ömö'di ya toroko ya ara tö'dö a türü ma Ebliisi, alinggo eema ma türü keefe ma tiisini kadu. <sup>10</sup> I'i alinggo eema ya toroko ya nye'd'de ma tiisini kadu na aaya no, kudumma eene kitaalo ka tasaasa tumma tanno dhorro no meene ka toolonadene. <sup>11</sup> I'i yungngo a Masala ka kürünü türü ma tam'baga kene amang kene tamma ka korokoro, <sup>12</sup> amang ka kadu nye'd'de tanno taalo kamma ka tumma ma timin'da kara kasaasa eema ya toroko ya, ara eege ka tahükümüdene.

*Aaga idhi oona ku'bu*

<sup>13</sup> Lakiini ara ungngo tamana ta'diila a Masala 'bucca kungngo, kudumma aaga nagöre eede na Uugaara ka asaasa eege no, kudumma Masala ka tagesse aaga ka dhidha amang kono toolona aaga a tinsili ma Koronggore, a tamma ka tumma ma timin'da. <sup>14</sup> Tumma no eege kungngo a

Masala ka tagümmünü aaga a toolonadene ma tumma ma Yasu niidi ka tagoo'dö iini aaga amang kada tosso ka tiidhindhü na Uugaara tiya aja Yasu Almasiihi<sup>15</sup> Aaga kardha ku'bu nagöre eede, aaga tafa ka talaana tanno ada ka taföönyö kidi no, üürü a tumma ma niinö üürü ka waraga tiya iidi ka tunggu aaga ya.

<sup>16</sup> Uugaara yaaja Yasu Almasiihi ka eyi tiya iini nja Masala Pupa yaaja masaasa angnga manangnga türü angnga a ta'diila ta'billi a tiidhigü tanno a'diila no. <sup>17</sup> Anangnga aaga ka takidhö ka nanggeedi ümmünü eege ku'bu ka eema tiya ada ka talinggo ka'diila ya nye'd'de nja tiya ada ka teema ya.

### 3

#### *Aaga afara ka Masala kudumma ungngo*

<sup>1</sup> Keere kungngo nagöre eede, aaga afara ka Masala kudumma ungngo, amang ka tumma tanno Masala tala kadu areere kidhindhü afa meene nja aaga kungngo.

<sup>2</sup> Aaga afara ka Masala afe'de amang kono toolona ungngo ka kadu tanno oroko no, taalo kadu nye'd'de kamma.

<sup>3</sup> Lakiini Uugaara ya adho ka fiini dhorro ya, ara tanangnga aaga kana türü, afa kada kudumma koronggore tiya toroko ya.

<sup>4</sup> Kamma ungngo 'do ka Uugaara a'da kalinggo aaga eema yiidi ka takiki aaga ya a'da kütü aaga ka lingngo

iini. <sup>5</sup> Fa ka Uugaara anangnga nanggeedi naada ka tasaasa ma Masala nja tidhi oona ku'bu na Almasi-ihü ka anangnga angnga no.

*Aaga fa taneene nja kadu tanno adhunu no*

<sup>6</sup> Ara ungngo tadirina eema aaga nagöre iidi ana eere ma Uugaara Yasu Almasiihi a'da aaga tafa taneene nja kadu tanno adhunu no kitaalo kaföönyö talaana niidi ka tagalaana aaga iini no. <sup>7</sup> Kussu aaga dhorro a'da ara aaga turna fiini yiidi ka tunggeene iini ya, taalo ungngo kadhuun iidi ka taganeene nja aaga ya. <sup>8</sup> Ungngo taalo kagu niimö ma takuri ya ömö'dü ün'dügüngngö, lakiini kagalinggo ungngo oosooso a naguuru ungngo tadhügürü amang kidi tafa tanyamanya ömö'dü occö.

<sup>9</sup> Taalo a'da ungngo taalo kama tagu eema yaada, lakiini ungngo kasaasa a'da aaga türi taneene niidi aaga tuurna i'i keere. <sup>10</sup> Kidü ka taganeene nja aaga ya, kagadirina ungngo tumma no aaga, "Ömö'dü ya taalo asaasa linggo ya, taalo ama tagu eema."

<sup>11</sup> Kadiri ungngo tumma no, kudumma iidi ka taföönyö a'da kadu könö kungngo ada ka söödö kadhuun, kitaalo linggo kene illi keema ka tumma tanno kadu ün'dügüngngö. <sup>12</sup> Kadu afa ma tanno miini no ungngo tiki eene ana eere ma Uugaara Yasu Almasiihi

a'da angnga tasaasa a'da kalinggo amussu kagu kuri yeene.<sup>13</sup> Lakiini aaga nagöre iidi, aaga fa tagi'di ka linggo ma eema tiya a'diila ya keere.

<sup>14</sup> Üürü ömö'di ungngo ada ka söödö ya, taalo aföönyö tumma niidi ka waraga tiya no, aaga iiri i'i aaga taadha iini ka oona amang ka modolo tagu i'i.  
<sup>15</sup> Aaga fa tümmü i'i kada diidi tiya ada, lakiini aaga eema nja iini kada örre tiya ada.

*Tööjülü na eere no*

<sup>16</sup> Fa ka Uugaara ma ta'diila Yasu Almasiihi ka eyi tiya iini amana ta'diila aaga a naganuuru ka eema nye'd'de, fa ka Uugaara aneene nja aaga ïn'dili.

<sup>17</sup> A'a narigiri tööjülü no a niisö ma a'a na Bölis no, kiji aaga kala miini yeede ka anangnga ka waraga tanno eede yeede ka rigiri no.<sup>18</sup> Fa ka türü tanno Uugaara Yasu Almasiihi kaneene nja aaga ïn'dili kungngo.

## Waraga ya Bölis ma tunggu co Timosaws ya Dhidha ya Tafa'da tumma

Timosaws aga ömö'dü ma kaniisa ya tadimöögö ya, nagürüünü kungngo iini kadhabbu afara ka Masala, i'i aga unggunaana ku'bu nya Bölis tiya tafiiñi ya, akinyi teema tumma ma İnjili ma Yasu Almasiihi iini. Keere kungngo a Bölis tagürünü Timosaws aco tauugaara ma kaniisa ka anya ma Afosus.

Bölis agürüniigii a waraga tiya ungu co Timosaws ma tanangnga tumma iini ma tümmü tumma ma Masala ka nakaniisa nya tanaana iiye ka katalaana tanno oroko no. Waraga ya afe'de eema ma kadu öccö eege kungngo kara tessedene ma ta naguugaara ma kaniisa kara talinggo iini nya kadhoonyo ka kaniisa afa ma kadimöögö kungngo nya kidhindharu nya iiya ma nagüüme.

<sup>1</sup> Waraga ya ö'dö ndama tafiiñi ya Yasu Almasiihi a türü tanno Masala tatoolona yaaja Yasu Almasiihi yaaja ka tindhigii i'i ya.

<sup>2</sup> Nunggu co Timosaws 'bii'bala yeede ya dhorro ya, a tamma ka Masala, fa ka

Masala Pupa yaaja nya Uugaara tiya aja Yasu Almasiihi anangnga türü o'o nya 'bangnga nya ta'diila.

*Tidhi oona ku'bu ka dhügürü*

<sup>3</sup> Afa meede ka tageema nya o'o a'da ara a'a co Makadoniya, a'da nanna ka Afosus amang küdü teema nya kadu töccö a'da kafa talaana kadu ka talaana ma korokoro afe'de. <sup>4</sup> Kafa tattoodo ka eema ma elle nya nagareene ma kadaada tanno dhabbu no, kara tö'dö ndama nagonggo'do a tumma na taalo kara talinggo tumma no ma tamma ka Masala no. <sup>5</sup> Füni ma tumma tanno a'da tasaasa na ö'dö ndama eedi tiya insili ya nya eedi tiya a'diila ya nya tamma tanno dhorro no. <sup>6</sup> Kadu könö kaadha ka tumma tanno kaama ka fiini kara kiirada ka tisaana ka oona ma taa'baga ün'dügüngngö. <sup>7</sup> Kiki a'da eege ka katalaana ma seriye kassa kitaalo kussu niimö yeene ka teema ya, kitaalo kö'dö iini ta'diila.

<sup>8</sup> Kussu angnga 'bitüngngö a'da seriye a'diila kene kara talinggo iini dhorro. <sup>9</sup> Kussu ungngo a'da seriye taalo ö'dönja a kadu tanno a'diila no, lakiini ö'dönja a kadu tanno oroko no nya tanno asilli eema no nya tanno anu ka tumma ma Masala no nya tanno anyoro ka nanggeedi no nya tanno agirina kafaafa meene nya nakanüümö no nya tanno agirina kadu no, <sup>10</sup> kadu

no üünii eema ya toroko ya nja nageldo nja kadu tanno anadene a kasaga no nja tanno korokoro no nja kadu tanno aküdöönö ün'dügüngngö no nja kadu tanno anu ka talaana tanno a'diila no.<sup>11</sup> Tumma na unggenee nja İnjili na nanja a'a no, tumma ma Masala na baraka ka tanna kide nja tüdhindhi no.

### *Türü na Masala kungngo a Bolis*

<sup>12</sup> Namana a'a ta'diila Uugaara tiya aja Yasu Almasiihi ya anangnga türlü a'a ka linggo tanno iini. Kudumma iini ka tümmü a'a kada ömö'di ya adho ka fiini ya. <sup>13</sup> A'a nungngo nakeela i'i natakeemidhi i'i nadagalinggo i'i, lakiini Masala möödhi kede kudumma eede nafurü tamma kono nitaalo nussu niimö yeede ka talingga ya. <sup>14</sup> İkiri Uugaara yaaja ka anangnga türlü a'a dhabbu ma tamma nja tasaasa ma Almasiihi Yasu.

<sup>15</sup> Tumma dhorro eege kungngo, kama tamma dhorro a'da Yasu Almasiihi ö'dö ka 'büdhülü ma toolona kadu na oroko no a'a nadhidha. <sup>16</sup> Lakiini 'bangnga ma kananja a'a amang ka Yasu Almasiihi tala 'bangnga miini a'a, ömö'di ya adho tatoroko 'do ya, ma tala a kadu tanno amma kini no in'dili ta'duga tefe ka 'di ta'billi. <sup>17</sup> A 'bitüngngö ta uugaara ta'billi no, Masala tammo unggodho mo, mefe ka 'di turi mitaalo mijidene

ümmü oogo ana eedi nja tüdhindhi ta'billi. Amiin.

<sup>18</sup> Bii'bala eede Timosaws, nanangnga a'a tumma o'o afa ma tanno ka tumma ma tane'bi tanno ageema tumma ma o'o kadhadha no afa kene amang küdü teema koro'bo ya a'diila ya. <sup>19</sup> Ümmü tamma ana eedi ka tinsili ya, a kadu könö kanu kide, a mürkabü ma tamma meene ta'bu. <sup>20</sup> Kadu na miini no Himinas nja Askander neede ka tümmünü eege Ebliisi amang kene talaadene kafa teela Masala.

## 2

### *Tafara ka Masala*

<sup>1</sup> Niinö yeede ka asaasa ka dhidha ya, aaga tafara ka Masala aaga teema nja oono a tamana ta'diila oono ka üdü ma kadu nye'd'de kungngo. <sup>2</sup> Aaga afara ka Masala kudumma naguugaara nja kadu tanno afa ka anya no amang ka 'buugu ta'diila a niimö ya toroko ya tafa tö'dö kada.

<sup>3</sup> A'diila nggeege ka Masala tatoolona yaaja. <sup>4</sup> Asaasa kadu in'dili ka toolonadene kussu tumma ma timin'da.

<sup>5</sup> Kudumma Masala ma unggodho, ömö'di ya ka söödö ma Masala nja kadu ya unggodho i'i ya ömö'di Yasu Almasiihi. <sup>6</sup> I'i üpü eyi yiini co ma tafa kadu in'dili, tumma na Masala manangnga a kadu ma 'büdhülü ka uuru miini. <sup>7</sup> I'i yungngo eede ka kürünüdene ka tafünni nja tatalaana ma kajeene ma teema tumma

ma tamma nja timin'da,  
taalo a'a nakorokoro, lakiini  
a'a neema tumma ma  
timin'da.

<sup>8</sup> Nasaasa a'a nagiide  
a'da keema nja Masala ka  
na'buugu ïn'dili kamünügү  
iisine coo'do ka tinsili, taalo  
tagoroo'bo kide nja tanu  
aana ka oona.

<sup>9</sup> Nasaasa a'a iiya kümmü  
en'di ya a'diila ya ka oona  
kindinaana oona, kaana  
modolo, kafa tüüfү awu,  
kafa tümmü dahaba nja  
kisi nja en'di tiya agu'daana  
ya, <sup>10</sup> lakiini a linggo tanno  
a'diila no, fa ka iiya küünü  
linggo ma Masala na 'diila  
no.

<sup>11</sup> Fa ka iiya kalaadene  
kaföönyö tumma amussu  
kaafa teema ko'd'do.  
<sup>12</sup> Taalo a'a namma ka  
aka ka talaana nja oono  
ka tüünü ada nyuri yoono  
ku'bu, lakiini matoodo ka  
tumma tanno iini amussu.

<sup>13</sup> Kudumma Masala ka  
töörü'bü Adam ka dhidha  
massa ka töörü'bü Hawa.  
<sup>14</sup> A Ebliisi taalo agüüsini  
Adam, lakiini i'i agüüsini  
aka ma'dingga ka tatoroko.  
<sup>15</sup> Lakiini mara toolonadene  
kono kara teene laala  
minggiri eege ka tamma ma  
Masala nja tasaasa nja tinsili  
ma eedi nja tafa ka oona  
ka'diila.

### 3

#### *Ka'boge ma kaniisa*

<sup>1</sup> Tumma dhorro eege  
kungngo ma ömö'di tiya  
asaasa tata'boge ma kaniisa  
ya, i'i awwa linggo na 'diila  
no. <sup>2</sup> Ka ka ta'boge ma

kaniisa insili a'da taalo  
hetti kini, arna aka ma  
unggodho, a'dara, ümmü  
eyi yiini, a'diila nja kadu,  
a ambaanya talaana. <sup>3</sup> Taalo  
ake ka ngeeli, taalo a rüsü  
lakiini a'diila nja kadu, taalo  
asaasa tumma na toroko  
no, taalo allogo ma eema  
dhabbu. <sup>4</sup> Alaana kadu ma  
'di tiya iini amang ka laala  
tiya iini taföönyö eema yiini  
nye'd'de kungngo. <sup>5</sup> (Üürü  
ömö'di ya taalo indinaana  
kadu ma 'di tiya iini ku'bu,  
ta'diila ya ara tafa ka kaniisa  
tammo Masala?) <sup>6</sup> Ta'boge  
afa tamma ka Masala  
kete kungngo, kudumma  
iini kara ta'diniga oona  
niini coo'do a'dingga ka  
tahükümü tanno Ebliisi no  
kungngo. <sup>7</sup> A kadu na kürö  
ma kaniisa no tussu dhorro  
amang kini tafa ta'dingga ka  
modolo nja küdhü ma Ebliisi.

#### *Kadiüfi ma kaniisa*

<sup>8</sup> Kadiüfi afe'de kada  
kadu tanno 'dara no, taalo  
kakorokoro, taalo kake ka  
ngeeli, taalo kalogo ma  
eema dhabbu. <sup>9</sup> Fa kene  
kafa ka tumma ma Masala  
ana eedi ka tinsili. <sup>10</sup> A kadu  
tiiri taneene neene ka saga  
tümmünü eege kalinggo ma  
kadiüfi kene kitaalo kaduna  
niimö ya toroko ya kene.

<sup>11</sup> Fa ka iiya afe'de kada  
kadu tanno dhorro ka  
fiinü no, taalo kadhe kadu,  
ka'dara, ka'diila ka eema  
nye'd'de.

<sup>12</sup> A kadiüfi tarna iiya  
ka unggodho, kinggiri laala  
yeene ka fiinü tiya a'diila a  
niimö ya toroko ya titaaloo

kene ka nöö'dii. <sup>13</sup> Kadu na alingga ka'diila no kaluna 'buugu ya a'diila ya, kara teema tumma ma tamma tanno eene ka Yasu Almasi-ih.

<sup>14</sup> A'a narigiri ada waraga ya co o'o kudumma eede ka asaasa tö'dö kündü kanna kete kungngo. <sup>15</sup> Üürü a'a nadoono ku'bu ya, ara o'o tussu a'da kadu ka tindinaana nanggeyi neene ku'bu ka 'dii ma Masala nya, ma kaniisa ma Masala tammo efe ka 'dii mo, miide ma kudhu ma timin'da. <sup>16</sup> Taalo tam'bana ko'do kudumma tanno, lakiini taküdhü ma tamma tanno aja ka Masala idhindhü,

I'i abbü 'dala ka tuu'da,  
ya insili a koronggore,  
a kadhangga tadinö kini,  
kadageema tumma mi-  
ini ka naanya,  
a kadu ma 'büdhülü tamma  
kini,  
ada'diniginja coo'do ka  
tidhindhü.

## 4

### *Katalaana no korokoro no*

<sup>1</sup> Koronggore ma Masala ya iki 'biiñi a'da, ara kadu tapadaga keere ka tamma ma Masala ka naguuru tanno eere no, kisi ka nagoronggore tanno toroko no keere nja talaana ma nakana'bu. <sup>2</sup> Talaana ma kadu tanno 'dinigi oona coo'do ka korokoro no, nanggeedi neene ka tinyogo kaaya. <sup>3</sup> Kafaga kadu keere karna nja kuri könö ya Masala ka tadina ya nye'd'de a'diila a niimö ma tanu kide

titaalo üürü ara ta'dugadene a ta'diila. <sup>4</sup> Eema ya Masala ka tagalinggo ya nye'd'de a'diila, a niimö ma kadu kara tanu kide itaalo, a kadu tamma ka eema nye'd'de ya, mamana ta'diila a Masala. <sup>5</sup> Kudumma tumma na Masala nja tafara kono anangnga Masala ka tamma kide.

*Ömö'dii ma linggo ma  
Yasu Almasi-ih ya a'diila ya*

<sup>6</sup> Üürü nala o'o eema a nagöre ma angnga ya, ara o'o tamö'dii ma linggo ma Almasi-ih Yasu ya a'diila ma tagu kuri ma koronggore ma timin'da ma tamma nja talaana tanno a'diila no üüdü ka tümmöönö no. <sup>7</sup> Aadha ka eema ma tam'baga ün'düngüngö nja eema ma elle ma kidhindharu, indinaana oona nüüdü ku'bu ka linggo ma Masala. <sup>8</sup> Üürü riada ma tuu'da ka'diila ya, lakiini riada ma koronggore a'diila ka eema nye'd'de kungngo, kudumma ka tümmü tamin'di tumma a teera miini, tefe ka 'dii ma 'bitüngngö nja tefe ka 'dii tanno ara tö'dö no.

<sup>9</sup> Tumma no ka tumma ma timin'da kama kadu ka tamma kide. <sup>10</sup> Yungngo aja ka talinggo angnga tadhügürü, kudumma aja ka tamünögü eyi yaaja ka tindhígü ma Masala tammo efe ka 'dii mo oogo mungngo matatoolona ma kadu nye'd'de nja münda tanno amma no.

<sup>11</sup> Alaana kadu ka tumma tanno. <sup>12</sup> Fa tafa ka ömö'dii

amidhi o'o a'da nadhilli laki-ini alingga ada a kadu tanno amma no, ka tumma nja tanenee nja tasaasa nja tamma ma Masala nja tinsili ka eedi. <sup>13</sup> Münü eyi yüdü ka tüörönö ma Sorne co kadu nja teema tumma ma Masala nja talaana idhi eede ka öö'dö. <sup>14</sup> Fa tüünii tö'bö a türü tanno Masala ka anangnga o'o no, türü no kananja o'o a tumma ma tane'bi a kadiifi tümmünü iisine üdü ka üdü.

<sup>15</sup> Iiri tumma ta'diila nümmünü eyi yüdü kide amang ka linggo tanno üdü tijidene ka kadu nye'd'de. <sup>16</sup> Adinö ko'do ma eyi tiya üdü nja talaana tanno üdü nütügü kide keere, küdü kara tüünii nggeege ya ara o'o toolona eyi yüdü nja tanno toodo küdü no.

## 5

### Taneene nja kadu tököönö

<sup>1</sup> Fa teela ömö'di ya dharuya, lakiini eema tumma na 'diila afa pupa yüdü kungngo, naneene nja laala tiya kadimögö ya afa nagöre nüdü kungngo. <sup>2</sup> Nümmü kidhindharu na iiya no afa nakanüümö nüdü, nüünii ana laala tiya lamü ya afa nagöre nüdü.

### Iiya ma nagüüme

<sup>3</sup> Aaga asaasa iiya ma nagüüme na eema katitaalo kene ma timin'da no. <sup>4</sup> Üürü aka ma küüme mana laala nja kadaada ya, fa kene kanaana iiye ka linggo ma Masala kadhadha ma

tanaana iiye ka kadu ma 'di tiya eene, kassa kamana eema a nakanüümö nja kafaafa nja kadaada meene, linggo no eege kungngo ka'diila ka Masala ka oona. <sup>5</sup> Lakiini aka ma küüme ma dhorro mo, ömö'di ma tamana eema oono kitaalo, mündhigü Masala mafara kono ooso kungngo nja uuru. <sup>6</sup> Lakiini aka ma küüme müünii eyi yoono ka eema ma 'büdhülü ya a'diila oogo meyi salsa mefe ka 'di. <sup>7</sup> Nanangnga tumma no a kadu afe'de, amang ka ömö'di tafa tana hetti.

<sup>8</sup> Ömö'di ya taalo anaana iiye ka kadu na kete kini no, mündä kadu ma 'di tiya iini, i'i ya a'düsünü tamma ka Masala adagii'bi kadu na taalo kamma no.

<sup>9</sup> Fa takiri eere ya aka ma küüme ka waraga ma iiya ma küüme illi ma nagürüünü a kadu kiidoona mo, ma ta aka ma nyori unggodho. <sup>10</sup> A kadu nye'd'de tessu linggo noono na a'diila no ma takinggiri laala yoono tinggiraana na a'diila no, mümmü kafala, madagunu kadu ma kaniisa ka uune, makinyi kadu no eema katitaalo kene no, madagalinggo eema ya a'diila ya.

<sup>11</sup> Lakiini iiya ma küüme na aleefe ta idhiidhi no, fa takiri nagereene neene ka waraga ma iiya ma nagüüme, kudumma nanggeedi tanno eene kasaasa taadha ka tumma ma Almasiiji kara tasaasa

tarna. <sup>12</sup> Nggeege ya kaadha ka timi'di tumma na dhidhdha no a hetti tümmü eege. <sup>13</sup> Nggeege kara talaana nanggeyi neene korro tino ün'dügündngö kalööle ka na'bögööri kalaadene ka tedhe ma kadu keema tumma na taalo kadho ka fiinii no kaker'de ker'de. <sup>14</sup> Yungngo eede ka asaasa a'da iiya ma nagüüme no dhiidhi no tarnadene keene laala kümmü nöö'di neene, amang ka diidi ma angnga tafa taluna fiinii ma tamidhi angnga. <sup>15</sup> Afa könö ana kene kuurna Eблиisi keere.

<sup>16</sup> Üürü aka ma amma ka Masala mo, mana iiya ma nagüüme ka 'di tiya oono, fa kono mamana eema eene amang kene tafa takiki iifye ka kaniisa ko'do, mamünügü iiya ma nagüüme no ma timin'da no.

<sup>17</sup> A naguugaara ma kaniisa na ana iifye ka linggo ma kaniisa dhorro no, aaga amana eema eene dhabbu mündä kadu na alinggo ma teema tumma ma İnjülli nja talaana. <sup>18</sup> Sorne iki, "Aaga fa takumu kodha ya ödhdhe ya ka niinö iini ka türri migile ka 'deeli." Iki afe'de, "Ömö'di ya alinggo a'duga talıngnge niimi."

<sup>19</sup> Fa tamma ka eema ma tafünaana ka kadiifi, illi a kadu keera nja eene illi kiidoona no, saga tamma. <sup>20</sup> Lakiini kadu no hetti no kirnaana kene ka kadu kidha amang ka türeene ma kadu tari'ba.

<sup>21</sup> Neema a'a nja o'o kidha ma Masala nja Yasu Almasi-ihii nja kadhangga na Masala ka tagesse eege no a'da nümmü tumma no nafa kide nafa tasaasa kadu öccö no üuni ada öccö ku'bu.

<sup>22</sup> Fa ta'digaana namünüğü iisine nüüdü ka ömö'di ka üüdü, nafa tosse ka tatoroko tanno kadu könö. Ümmü oona nüüdü ka tinsili.

<sup>23</sup> Fa tooye 'biïdi unggodho i'i, angkolo 'bangeeli idhilli, kudumma ma maara tammo agu o'o ka eedi mo.

<sup>24</sup> Kadu könö tatoroko neene kussu adene a'da küfürü uuru ma tapusu tö'dö, a kadu könö tatoroko neene taalo kussu adene a'da küfürü uuru ma tapusu adene tö'dö. <sup>25</sup> A linggo na 'diila no tussu adene afe'de, a linggo no taalo kussu adene no taalo kara tadünggüdhü.

## 6

<sup>1</sup> Fa ka kadu tanno ka tadasaga no kaföönyö eema ya kadu tanno eene, ii'di ömö'di öccö teela eere ma Masala nja talaana. <sup>2</sup> Üürü kadu neene kada kasaga tanno eene no kamma ka Masala ya, kafa tamidhi eege kudumma eene kada nagöre. Eege adha ya kama talınggo ada eene dhorro kudumma kadu tanno aduna eema ka linggo tanno eene, eege ka kadu tanno amma no kasaasa eege. Eema ya yungngo üüdü kara talaana iini nadho üüdü kide.

*Katalaana na korokoro no  
nja tasaasa ma almaala*

<sup>3</sup> Üürü ömö'dii könö alaana a tumma ka'bana ko'do taalo unggeene nja tumma na Yasu Almasiihi Uugaara nja tumma na unggeene nja tumma ma Masala no, <sup>4</sup>i'i ya akisinsoro taalo ussu niimö öccö. Eedi yiini anyoro ma tasaasa ta'digineene a ta'bununjaana ku'bu a tumma tanno ara tö'dö a kürimi a tüsümününjaana ku'bu nja teelaana nja eedi tiya a toroko ya, <sup>5</sup>nja kadu tanno a'digineene anangnga üüdü neene tatangga'da kaama ka niimö tiya a'diila ya, kümmü tumma ma Masala ma taluna eema kide. <sup>6</sup> Tamma ka Masala ka anangnga ömö'dii ka tüüsü kini kara tamma ka eema tiya kini ya. <sup>7</sup> Taalo angnga köö'dö ka 'büdhülü a niimö kaja ka niisö, angnga taalo kara ta'duga niimö kide. <sup>8</sup> En'di yaaja ka oona ya nja kuri tiya aja ka taguri ya a'dimo kaja sugi. <sup>9</sup> Lakiini kadu no asaasa eema dhabbu no ka'dingga ka ta'b'badene nja küdhü nja talogo ma eema tiya atoroko ya ma taama eege ma tanangnga kadu ka taama kagirinadene. <sup>10</sup> Tasaasa ma almaala a'da tatoroko eege kamiini, a kadu könö kümmünü eyi kide kaama ka fiini ma Masala, a tin'di tümmü eege dhabbu.

*Füni ma tamma ka  
Masala nja ta'diila*

<sup>11</sup> Lakiini o'o na ömö'dii ma Masala no, nafa takete

ka eema tiya, asaasa ta'diila nja tumma ma Masala nja tamma nja tasaasa nja tidhi oona ku'bu. <sup>12</sup> Fünü sigiri neema koro'bo dhorro, ta'beene ma tamma, 'duga tefe ka 'di ta'billi ma Masala ka tagümmünü o'o iini no, üüdü ka tageema tumma miini ka kadu kadha kadhabbu kada ijöögö no. <sup>13</sup> Ara a'a teema nja o'o kidha ma Masala ma amana eema nye'd'de kefe ka 'di mo nja kidha ma Yasu Almasiihi ya ageema tumma dhorro kidha ma Bilatos Albunti ya. <sup>14</sup> Ümmü tumma no nafa kide ka tinsili a'da taalo niimö ya toroko ya kide ara uuru ma tö'dö na Uugaara tiya aja Yasu Almasiihi ka öö'dö. <sup>15</sup> Ya Masala kara tö'dö iini ka uuru miini, Masala mungngo mana baraka, ma uugaara unggodho oogo, Uugaara ma naguugaara Masala ma namasala. <sup>16</sup> Oogo mungngo mefe ka 'di ta'billi unggodho oogo, 'di yoono a'da töyeene, taalo ömö'dii ma takete kide, taalo ömö'dii ijöögö, ömö'dii ma tadönö kide titaalo. Kadagafünügü oogo ko'do a türü ta'billi. Amiin.

<sup>17</sup> Nanangnga tumma a kadu tanno ana almaala dhabbu no ma ürünenü tiya no, kafa tamanaga oona neene coo'do, kafa tan'dana ka almaala tiya ara titaalo ya koona, lakiini kündhiigü Masala mamana eema angnga ya aja ka taganeene iini ya. <sup>18</sup> Fa kene

kalinggo eema ya a'diila  
 ya, küüsü a linggo tanno  
 a'diila no, kamana eema  
 a kadu kosso ka eema nja  
 tiya eene nja kadu könö.  
 19 Nggeege yungngo eene  
 katawaana eema ma eyi tiya  
 eene indinaananja ku'bu ma  
 ürüünü tiya ara tö'dö ya,  
 kaduna tefe ka 'dii ta'billi.

<sup>20</sup> Ka Timosaws, ümmü  
 tumma na a'diila no nafa  
 kide. Naadha ka tumma ma  
 ker'de ker'de na taalo kara  
 tö'dö keere a niimö no,<sup>21</sup> na  
 kadu ökönö ka tümmöönö,  
 nggeege adha ya kaama ka  
 fiinii ma tamma ka Masala.

Fa ka türü tanno Masala  
 ka aneene nja aaga.

## **Waraga ya Bölis ma tunggu co Timosaws ya Eera ya Tafa'da tumma**

Ka Bölis ka tarigiri waraga ya, i'i ya aganna ka pabuuusu ussu a'da kete kungngo ara tiididene. İkiri ka asaasa a'da Timosaws öö'dö kini areere. Timosaws akakinyi linggo a Bölis dhabbu kadhadha, yungngo a Bölis ka asaasa i'i afa 'bii'bala yiini.

Ka waraga tiya Bölis ala tasaasa niini a kadu ma kaniisa na ussu dhügürü no. I'i uu'bu Timosaws ka eedi a'da ütü ka tamma ka tumma tanno Almasiiji, eema eema iini 'biiñi kungngo salsa ka naguuru ma linggo i'i agirnaana ka katalaana tanno oroko no.

### *Tööjüllü*

<sup>1</sup> A'a na Bölis tafiinii ya Yasu Almasiiji narigiri a'a tumma ma eedi tiya Masala ma co teema tumma ma tefe ka 'dii na ka Yasu Almasiiji no.

<sup>2</sup> Nunggu co Timosaws, 'bii'bala yeede ya dhorro ya, türü nja 'bangnga nja ta'diila ndama Masala tammo Pupa mo nja Yasu Almasiiji Uugaara yaaja.

### *Tafünügü ko'do*

<sup>3</sup> Namana a'a ta'diila a Masala tammo eede ka talingga ada oono mo afa ma kafaafa ma a'a ka tagüünü ana eedi ka tinsili, nagüigü

a'a tumma ma o'o turi ooso ana uuru ka fara tiya eede. <sup>4</sup> Kede ka tagüigü fara yüdü ya, nasaasa tassa küdü amang kede tadigine a dhodho. <sup>5</sup> Nagüigü a'a tamma nüüdü na dhorro no, na aganna ka ndaada ma o'o Lööyis ka eedi no, nja eedi tiya niimö tammo üüdü Afaniikü, a'a 'bitingngö nussu a'a a'da kungngo üüdü afe'de. <sup>6</sup> Nggeege nikiri a'a ka tiki o'o a'da nümmü niimö ya Masala ka anangnga o'o ka finne ya, eede ka tagümmünü iisine üüdü ka üüdü. <sup>7</sup> Kudumma Masala taalo manangnga Koronggore ma ri'ba angnga, lakiini Koronggore ma türü ma tasaasa nja tafa ka oona.

<sup>8</sup> Fa tana modolo ma teema tumma ma Uugaara tiya aja, alla nana modolo ma a'a ömö'dii ma pabuuusu yiini. Lakiini o'o nümmü ajeene nja a'a ka dhügürü ma İnjülli a türü ma Masala,

<sup>9</sup> Oogo moolona angnga mümmünü angnga ka tefe ka 'dii tanno insili no, taalo a'da angnga kagüünü niimö, lakiini kudumma eedi tiya oono nja türü, türü kagananja angnga ana Yasu Almasiiji a'da üfürü uuru miini tagöö'dö, <sup>10</sup> Lakiini 'bitingngö alanja angnga a tabbü 'dala tanno Uugaara tiya aja Yasu Almasiiji ya asiraana ka inde ya öö'dö a tefe ka 'dii ta'billi a töyeene ana İnjülli.

<sup>11</sup> A'a nagümmünüdene kada tatalaana nja tafiinii

neema tumma ma Ìnjìili.  
<sup>12</sup> Yungngo eede ka dhügürü 'bitingngö nitaalo nana modolo, kudumma eede ka tussu a'da mada yungngo eede ka tamma kini namma a'da i'i ara tambaanya tafa ka niimö tiya iini ka tümmü a'a ya kadara ka uuru tanno miini no.

<sup>13</sup> Alingga a niimö yüdü ka taföonyö kede ya ma oono ka talaana tanno a'diila no a tamma nja tasaasa tanno ka Yasu Almasiihi no. <sup>14</sup> Afa ka eema tiya a'diila ya agümmününja o'o ya afa kide a türü tanno Koronggore tiya Insili ya anna kaja ka oona ya.

<sup>15</sup> Nussu o'o a'da kadu na ka anya ma Asiya no in'dili kungngo ka anya kinyi a'a ku'bu, nja Ficiloos nja Hirmaanös afe'de.

<sup>16</sup> Fa ka Uugaara ala 'bangnga a kadu ma 'di tiya Önisiforos, kudumma iini ka tafünüğü a'a turi kungngo itaalo ana modolo ma nakilli tammo imi'di a'a no. <sup>17</sup> Afe'de kini ka taganna ka Rööma ya agawwa 'buugu ma a'a 'do idhi aduna a'a. <sup>18</sup> Uugaara tafa'da fiinii jini aduna 'bangnga ka Uugaara ka uuru tanno miini no, nussu dhorro a'da agalinggo ada ököje nya ka Afosus ya.

## 2

*Tasigira ya a'diila ya Yasu Almasiihi*

<sup>1</sup> O'o na 'bii'bala tiya eede no, ana türü a türü tanno ka Yasu Almasiihi no. <sup>2</sup> Inya

eema tiya üdü ka taföonyö eede ka teema kadu kidha kadhabbu ya, nanangnga kadu tanno a'diila no ara tussu ka talaana kadu könö no. <sup>3</sup> Idhi oona ku'bu ka dhügürü nja ungngo afa tasigira ya a'diila ya Yasu Almasiihi. <sup>4</sup> Taalo ömö'di ma talinggo tatasigira assa ka talinggo niimö öccö afe'de, i'i ya asaasa uugaara yiini ka tadhodho. <sup>5</sup> Afe'de üürü ömö'di iisö ma tambri-nanago ya, taalo ara ta'duga ndalembö ma tii'baana, illi kini ka tambrinanago afa na asaasadene no. <sup>6</sup> A taleele ya kardha ku'bu aleele ya, i'i yungngo ara ta'duga talingnge ma migile niini ka dhidha. <sup>7</sup> Ussu eema yeede ka tadünögü ya, ara Uugaara tanangnga o'o ka tussu eema ya nye'd'de.

<sup>8</sup> Agiigii Yasu Almasiihi ya afiki'dö ka inde ya 'bandaada ma Dawud ya. Ìnjìili meede oogo mungngo <sup>9</sup> meede ka dhügürü minni nidhi nimi'didene a nakilli afa ömö'di ya weerö ya. Lakiini tumma na Masala taalo tafin'dadene. <sup>10</sup> Nggeege ya yungngo eede ka tidhi oona ku'bu ma eema in'dili ka üdü ma kadu tanno agessedene no amang kene taluna toolonadene no ka Yasu Almasiihi nja tidihindhi ta'billi.

<sup>11</sup> Tumma ma timin'da egee kungngo,  
Üürü angnga kakaaya nja iini,  
ara angnga taganeene nja iini afe'de.

12 Kaja kara tidhi oona ku'bu,  
ara angnga taga naguu-gaara nja iini.

Kaja kara ta'düsünü i'i  
a'da ta'düsünü angnga tekere.

13 Üürü taalo angnga kamma,  
i'i ara tüütü ka tamma,  
kudumma iini taalo ara ta'düsünü eyi yiini.

*Ömö'dii ma linggo ya  
Masala ka asaasa i'i ya*

<sup>14</sup> Fa kene kagiigii ma eema tiya, neema nja eene kadha ma Masala afa ta'digineene ma tumma ün'dügüngngö na taalo kara tö'dö keere a niimö no, kaga'da kadu na toodo kide no. <sup>15</sup> Indinaana oona ku'bu dhorro nümmü eyi yüdü a Masala amang küdü ta'duga tamma noono, ömö'dii ya alinggo ya taalo ana modolo kudumma iini ka talinggo kada adho ka fiinii alaana ka tumma ma timin'da dhorro. <sup>16</sup> Aadha ka tumma tanno taalo ka'diila no, kanangnga kadu na miini no kada oroko. <sup>17</sup> Talaana neene kara tanyala ku'bu afa issi, Himinas nja Filitös eege kungngo kakalaana ka tumma tanno.

<sup>18</sup> Eege naadha ka tumma ma timin'da, kiki a'da tafiki'dö ka inde kandö'dö kadaga'da tamma na kadu töccö. <sup>19</sup> Lakiini kadesa na Masala ka a'dingnge dhorro, kabünnü hitimi kide a'da, "Uugaara ussu kadu noono," "Ömö'dii ya amma ka eere tiya Uugaara ya, aadha ka tatoroko."

<sup>20</sup> Eema unngno ka la tiya adhabbu ya taalo ama dahaba nja fudda sugi, lakiini ama kee'di nja tam'bala afe'de, könö kama ma eema tiya a'diila ya, könö tama linggo tanno nyoro no. <sup>21</sup> Üürü ömö'dii ara tagala eema ya toroko kini ka oona, i'i ara ta niimö tiya a'diila insili ya, ara ta'diila ka ömö'dii ma 'dii ka oona ama ma linggo tanno a'diila no.

<sup>22</sup> Aadha ka tatoroko ma eema ma kadimöögö ka oona, ara o'o tisi ka fiinii tiya a'diila keere, tamma nja tasaasa nja ta'diila nja kadu tanno ümmünü Uugaara ana eedi katinsili no. <sup>23</sup> Fa takete ka kadu tanno nagaaga nja tisaana ka oona ma tam'baga, kudumma üdü ka tessu a'da kara tö'dö a koro'bo. <sup>24</sup> Ömö'dii ma linggo ya Uugaara taalo a'digineene agala kara tana muuyu ma kadu nye'd'de, ambaanya talaana nja tidhi oona ku'bu. <sup>25</sup> Kadu na diidi i'i no alaana eege a tumma ka'diila amang ka Masala tala eege ka taadha ka tatoroko manangnga eege ka tessu eema ma timin'da.

<sup>26</sup> Kikiri ka tapadaga ka nanggeedi tanno eene karünö ka küdhü tammo E bliisi ku'bu ya ümmü eege anangnga eege ka aföönyö tumma niini.

### 3

*Naguuru na eere no*

<sup>1</sup> Lakiini aaga tussu a'da naguuru na toroko no kinggide kara sa köö'dö ka naguuru tanno eere no. <sup>2</sup> Ara kadu sa kasaasa nanggeyi neene, kallogo ma gürüüsü, kabbü na'dugiisine, ka'diniga oona coo'do, keela kadu, taalo kaföönyö tumma na pupa nja nakanüümö tanno eene, taalo kamana ta'diila, taalo kinsili, <sup>3</sup> taalo kasaasa kadu, taalo 'bangnga kene, kadhe kadu, taalo kümmü nanggeedi neene, ka oroko, kanu ka nüümö tiya a'diila ya, <sup>4</sup> Kana ünggü, kakorokoro, kasaasa ta'deema kadagii'bi tasaasa ma Masala. <sup>5</sup> Kümmü tumma ma Masala ndama kürö, lakiini eege kanu ka türü miini. Aadha eene koona.

<sup>6</sup> Eege ka kadu tanno afiri co na'bögörö kadaana iiya na ki'di no na tigine a tatoroko kasi ka eema ma tatoroko keere nye'd'de kungngo. <sup>7</sup> Kalaadene turi kungngo lakiini kitaalo kussu tumma ma timin'da. <sup>8</sup> Afa ma Yaniis nja Yambriis kada kadiidi Müüsa, kadu no afe'de kadiidi ma timin'da. Kadu no nanggüdü tanno eene kadasüguni katoroko eege kagu'b'ba ka tamma na Masala. <sup>9</sup> Lakiini eege taalo kara taluna nüümö koona, kudumma taa'baga tanno eere no, eema yeene ya assa kalanja a kadu nye'd'de kungngo.

*Tumma na Bölis nja Timosaws*

<sup>10</sup> Nussu o'o talaana yeede nye'd'de kungngo nja tanneene tanno eede nja nüümö yeede ka eedi ya, tamma, tidhi oona ku'bu, tasaasa, takardha ku'bu, <sup>11</sup> dhügürü nja tüünü muuyu, eema ya agalinggo adene ana a'a ka Antakiya nja Ikoniyä nja Lestra, dhügürü yeede ka tidhi oona ku'bu miini ya, lakiini Uugaara oolona a'a kene nye'd'de kungngo. <sup>12</sup> Tumma dhorro, ömö'di ya asaasa tanna tanneene ma Masala ana Yasu Almasiiji ya, ara tad Hügürü. <sup>13</sup> Illi kadu na oroko no nja tanno iisini kadu no kara tunggeene ndama tatoroko kaco ka tanno 'diiri no kiisini kadu a'da kiisiniidene. <sup>14</sup> Lakiini o'o ya, ütü ka eema tiya üüdü ka takalaadene kide ya, namma kide ya, kudumma üüdü ka tussu a'da mada yungngo akalaana o'o. <sup>15</sup> Jiddi müüdü ka tidhilli nussu kasorne ma seriye na insili no ara tanangnga o'o ka ta'dara ma toolonadene a tamma ka Yasu Almasiiji. <sup>16</sup> Kasorne ma Masala in'dili Masala mö'dö iini ka'diila ma talaana kadu ma tala eege ka fiini, kalaala kadu ka eema tiya a'diila ya alaana kadu ka tinsili ma Masala. <sup>17</sup> Amang ka ömö'di ma Masala tadigine ana eema ma linggo tiya a'diila ya in'dili.

## 4

<sup>1</sup> Neema a'a nja o'o kidha ma Masala nja Yasu Almasiiji ya ara tümmü kadu

na efe ka 'dii nja tanno  
aaya no ka tö'dö tanno iini  
nja tabbü 'dala tanno iini  
nja tauugaara tanno iini,  
<sup>2</sup> Eema tumma ma Masala  
nalinggo ka uuru miini salla  
taalo uuru miini, alaana  
kadu, nagirnaana kene, in-  
dinaana eege ku'bu, uu'bu  
eege ka nanggeedi a tidhi  
oona ku'bu dhorro nalaana  
eege ta'diila. <sup>3</sup> Uuru king-  
gide kara sa kö'dö a kadu  
tanu ka talaana na adho  
ka fiinii, kagala kara tisi ka  
eema ma nanggeedi tanno  
eene keere, kara tawaana  
katalaana eene koona kad-  
habbu ma teema eema ya  
iisine kasaasa taföönyö ya.

<sup>4</sup> Kara tüüdhü iisine neene  
a'da kafa tatoodo ka tumma  
ma timin'da kara kaföönyö  
eema ma elle. <sup>5</sup> Lakiini  
o'o ümmü eyi yüdü nadinö  
ko'do ka kudumma ma eema  
tiya in'dili ya, ümmünü ana  
oona ka tadhügürü, alingga  
linggo ma talaana kadu ka  
tumma ma Masala, ümmü  
linggo nüdü dhorro.

<sup>6</sup> Lakiini a'a nungngo  
na nüümö ma türri, eriüdö  
miini tuurunja co, uuru  
neede ka ndö'dö meede  
kara tunggeene. <sup>7</sup> Nageema  
a'a koro'bo ya a'diila  
ya, natüümö tambirineene,  
natafa ka tamma ma Masala.  
<sup>8</sup> A 'bitingngö ndalembö  
na a'diila no ka indhigü a'a  
na Uugaara tiya a'diila ya  
ara tümmü kadu ya ara  
tanangnga a'a ka uuru tanno  
miini no taalo a'a unggodho  
a'a, lakiini a kadu in'dili no  
kasaasa tassa ka tabbü 'dala  
tanno iini.

### Tumma na eere no

<sup>9</sup> Unggeene areere nöö'dö  
kede. <sup>10</sup> Kudumma Dimas  
inya a'a ku'bu kudumma  
iini ka asaasa eema ma  
'büdhülü, unggeene aco  
Tasalanükü. A Kirisküs  
unggeene aco Galatiya, a  
Tito co Dalmatiya. <sup>11</sup> Lüüka  
i'i yungngo ütü unggodho  
i'i. 'Duga Murkus nöö'dö  
nja iini, kudumma iini  
ka takinyi linggo a'a.  
<sup>12</sup> Nagürünü a'a Tikikos ka  
Afosus. <sup>13</sup> Küdü kara tö'dö  
nagufu ten'di ma 'doogo mo  
meede ka tinyi ka Karbis  
ka Tarwas, nja kasorne  
tanno eede münda tanno ma  
forogo no.

<sup>14</sup> Askander ya ma  
modoo'do ma tanyaanya  
ya agüüni tatoroko ana a'a  
'do, ara Uugaara saga tüünü  
ana i'i afa miini ka tagüünü  
kungngo. <sup>15</sup> O'o afe'de afa  
ka oona kudumma iini,  
kudumma iini ka talinggo  
a'a dhorro, aanu ka linggo  
tanno aja.

<sup>16</sup> Ka dhidha kede ka  
tagümmöönö ka eyi tiya  
eede ya, taalo ömö'di ma  
tagöödhü nja a'a, lakiini  
kadu in'dili ka'bilnaana  
a'a ku'bu, fa ka Masala  
mafa tüünü nüümö ya toroko  
ya ana eege. <sup>17</sup> Lakiini  
Uugaara aga'düngnge nja a'a  
anangnga türü a'a ma tam-  
baanya teema tumma ma  
Masala co kajeene in'dili, na  
a'a taga tulu'bi ka tagaamu  
ka nüünö. <sup>18</sup> Ara Uugaara  
toolona a'a ka tatoroko  
tanno kö'dö kede no, öö'dö  
ana a'a ka'diila ka tauugaara

ma 'dotombo'do, tïdhïndhi  
kungngo iini ta'billi turi.  
Amiin.

*Tööjülu na eere no*

<sup>19</sup> Ööjülu Berskilla nja  
Akilla nja kadu ma 'dï  
tiya Önisiforos. <sup>20</sup> Arastus  
ütü ka Kürünsüs, nakinyi  
a'a Trïfimöös ka Milits ka  
tamaara kagu i'i. <sup>21</sup> Areere  
nöö'dö kannaa a'da kaleefe  
feele küfürü tö'dö. Ablüüs  
ööjülu o'o nja Böödiüs nja  
Liinös nja Külüüdiya nja  
nagöre ma angnga nye'd'de.

<sup>22</sup> Fa ka Uugaara aneene  
nja koronggore tiya üüdü.  
Aaga aneene a türü.

## Waraga ya Bölis ma tunggu co Tito Tafa'da tumma

Tito taalo aga taga Yahüdü, i'i ya ömö'di ma kaniisa adakakinyi linggo a Bölis ka tino tanno iini na dhabbu no, kini ka teema tumma ma İnjülli ma Yasu Almasiihi (2 Kürünsüs 7:6-7; Galatiya 2.3). Keere kungngo a Bölis tagürünü i'i aco tauugaara ma nakaniisa kaanya ma Kireet.

Bölis adirina eema a Tito ka waraga tiya, a'da agona kadu na ussudene no kada naguugaara ma kaniisa. Afe'de anangnga tumma iini ma talaana kadu kada tonggoonyo ka kaniisa, nagiide na kidhindharu no nja iiya tanno kidhindharu no, laala ya kadimöögö ya nja tiya lamü ya nja kasaga. Keere kungngo iki Tito a'da, a kadu ma kaniisa in'dili ka'diila kada kateefe kafa tanu oona ka oona nja ta'digineene nja tambananjaana ku'bu kanangnga eyi tanno eene.

### Tööjülli

<sup>1</sup> Waraga ya ö'dö ndama a'a Bölis tasaga ya Masala nja tafiinii tiya Yasu Almasiihi. Masala magesse a'a nalaana kadu noono ka tagesse eege no kudumma tamma ma timin'da ma fiinii ma Masala, <sup>2</sup> Tamma nja tussu eema kama tündhigü

ma tefe ka 'di ta'billi na Masala ka takiki angnga taalo ma korokoro, mimi'di tumma a'da küfürü uuru miini tö'dö. <sup>3</sup> Ka uuru tanno miini no, ö'dö a tumma tanno iini kada töyeene a teema tanno ananja a'a no, ndama tumma tanno Masala moolona angnga mo.

<sup>4</sup> Niküri a'a ka tunggu co Tito 'bii'bala yeede ya dhorro ya, ka tamma tanno aja na unggodho no. Fa ka türü tanno Masala ka aneene nja o'o nja ta'diila tanno Masala Pupa nja Yasu Almasiihi tatoolona yaaja.

### Tito alingga ka Kireet

<sup>5</sup> Yungngo eede ka tinyi o'o ku'bu ka Kireet amang küdü tindinaana eema ya aleefe ya ku'bu ya, ara o'o ka tümmünü kadiifi ma kaniisa ka naanya afa meede ka takiki o'o kungngo. <sup>6</sup> Tadiifi ma kaniisa afa tana hetti, arna aka ma unggodho, a laala yiini tamma ka Masala kafa talingga eema ya toroko ya nja tasilli eema. <sup>7</sup> Kudumma tadiifi ma kaniisa Masala mümmünü i'i ka linggo tanno oono, taalo hetti kini, taalo a'diniga oona niini coo'do, taalo agoroo'bo, taalo ooye ngeeli ake kide, taalo üünii eema ma rüsü, taalo allogo ma gürüüsü. <sup>8</sup> Lakiini ada ömö'di ma kafala, asaasa eema ya a'diila ya, a'dara, taalo üünii ada kadu ku'bu, ümmü tumma ma Masala ana eedi, ümmü eyi yiini ka eema tiya toroko ya koona. <sup>9</sup> Ümmü tumma

na dhorro no na unggenee  
nja talaana tanno aja no.  
Amang kini tambaanya  
teema tumma ma talaana  
tanno ma timin'da nja  
tapadaga tumma a kadu  
tanno amidhi tumma ma  
Masala no.

<sup>10</sup> Kadu kinggide kadhabbu kanu ka tumma, kiisini kadu a tumma na taalo kadho ka fiini no, munda Yahüdü no kakogoona a'da ma tasaasa kadu ka tatendhe amang kene toolonadene. <sup>11</sup> Fa kene keere ka naniinö tanno eene, kudumma eene kaga'da nöö'di nye'd'de kalaana kadu a tumma tanno itaalo ka'diila no, meene kasaasa gürüüsü. <sup>12</sup> A könö ana kene a ne'bi iki a'da, "Kadu ma Kireet kakorokoro 'do, eema ma oroko nanggeedi neene ka nyoro kadhusu kasaasa kuri." <sup>13</sup> A tumma ma timin'da eege kamiini. Fa tafa kene eela eege dhorro amang ka tamma tanno eene ta tatimin'da. <sup>14</sup> Kafa tümmü tumma ma eema ma elle ma Yahüdü nja tumma ma kadu tanno anu ka tumma ma timin'da no. <sup>15</sup> Eema nye'd'de insili ka kadu tanno insili no, lakiini taalo niimö ya insili ka kadu tanno nyoro no nja tanno taalo kamma ka Masala no, nanggeedi neene nja nanggüdü tanno eene kanyoro afe'de. <sup>16</sup> Kiki a'da eege kussu Masala, lakiini eege ka'düsünü oogo ana eema tiya eene ka tünni ya. Eege kanyoro, kitaalo kaföonyö eema, kitaalo

kama talinggo niimö ya a'diila ya.

## 2

*Minna a talaananja a kadu kadhoonyo*

<sup>1</sup> Lakiini o'o ya, alaana talaana na unggenee nja talaana tanno dhorro no. <sup>2</sup> Alaana nagiide na iifi no kiicolo ka nanggeedi no amang kene tadönö ko'do ka'dara kümmü nanggeyi neene a ta'diila a tamma nja tasaasa nja tidhi oona ku'bu.

<sup>3</sup> Nggeege, alaana kidhindharu na iiya no amang kene taneene taneene ma iiya kuurna fiini ma tinsili, taalo kadhe kadu, taalo kallogo, taalo tatasaga ma tooye ngeeli, lakiini kalaana kadu ka fiini tiya a'diila ya.

<sup>4</sup> Fa kene kalaana iiya na nagönünyö no ka tasaasa ma naganyori tanno eene nja laala tiya eene. <sup>5</sup> Ka'dara kümmü nanggeyi neene, kinsili, kümmü nöö'di neene dhorro, kaana 'bangga, kaföonyö tumma na naganyori tanno eene, ii'di ömö'di tanggaaga tamidhi tumma na Masala.

<sup>6</sup> Nggeege, nalaana laala ya kadimögö ya afe'de, amang kene tümmü nanggeyi neene afa nagönünyö, kidhi oona ku'bu. <sup>7</sup> Kalinggo ma eema in'dili alaala eege ka fiini ma tuurna o'o keere ma linggo ma eema tiya a'diila ya, ka talaana tanno üüdü, la ta'diila eene dhorro. <sup>8</sup> Neema tumma ma timin'da

na hetti ka titaalo kide no, amang ka modolo tagu kadu na kirimii o'o no, kudumma niimö tiya toroko ya ka titaalo meene ka teema kaja ko'do iini.

<sup>9</sup> Alaana kasaga amang kene taföönyö eema ya kadu tanno eene, kamma kene ka eema in'dili, kafa tanu ka tumma tanno eene. <sup>10</sup> Kafa tanyooro kene, lakiini kaala taneene na a'diila no kafünügünja ko'do ka eema nye'd'de ma talaana ma Masala ma oolona angnga mo.

<sup>11</sup> Türü na Masala kö'dö a toolona abbü 'dala ka kadu in'dili kungngo. <sup>12</sup> Alaana angnga ka tiki a'da kaw a kadu tanno anu ka Masala no nja tallogo ma eema ma 'büdhülü, angnga taneene taneene ma tümmü nanggeyi naaja, angnga tümmü tumma ma Masala na adho ka fiini no ka ürüünü tiya. <sup>13</sup> Angnga takindhigii uuru ma baraka yaaja ka takindhigii i'i ya, ka uuru ma tihindhi ma tö'dö tanno Masala tammo aja ma idhindhii mo nja tatoolona tiya aja Yasu Almasiihi. <sup>14</sup> Ya üpu eyi yiini co ka üdü ma angnga, amang kini toolona ka toroko no in'dili no, aagala angnga ka oona angnga ta kadu tanno iini na agu'daana ka nanggeedi no ma linggo tanno a'diila no.

<sup>15</sup> Eema ya i'i yungngó üdü kara talaana nafünügü eege ko'do, nasanna kene a türü nye'd'de, fa tafa ka ömö'di amidhi o'o.

### 3

*Üünii eema ya a'diila ya*

<sup>1</sup> Adünögü eema a kadu ma kaniisa a'da kaföönyö eema ya naguugaara ma anya, kamma ka tumma tanno eene kindinaana oona ku'bu ma linggo tanno a'diila no. <sup>2</sup> Kafa teela kadu, lakiini kada kadu ma ta'diila tanno eene nja kadu nye'd'de ana eedi ka tiicolo.

<sup>3</sup> Angnga in'dili afe'de ka nagaaga angnga, angnga tasilli eema, kagaama angnga, angnga taga kasaga ma eema ka tatonggoonyo, angnga tagüünii eema ma tallogo, nja kirimii, angnga tasaasa eema ya kadu, angnga tanu aana ka oona.

<sup>4</sup> Lakiini ka 'bangnga nja tasaasa ma Masala tatoolona yaaja akabbü 'dala ya,

<sup>5</sup> moolona angnga taalo a'da angnga kagüünii niimö ya a'diila ya, lakiini kudumma 'bangnga tammo oono. Oogo moolona angnga ma tagala angnga ka oona ma teenedene afe'de ma tefe ka 'di na issi no a Koronggore tiya Insili ya. <sup>6</sup> Masala muuru Koronggore yoono ya Insili ya kaja ka oona adhabbu ana eere ma Yasu Almasiihi tatoolona yaaja.

<sup>7</sup> Amang kaja tadho ka fiini a türü tanno oono angnga takarna ka tefe ka 'di a tihindhigii ma tefe ka 'di ta'billi. <sup>8</sup> Tumma dhorro eege kungngo. Nasaasa a'a o'o a'da naki'di iiye ka eema tiya, amang ka kadu tanno amma ka Masala no tanaana iiye ka linggo tanno

a'diila no. Tumma no euge  
kungngo kara ta'diila nja  
kadu nye'd'de.

<sup>9</sup> Lakiini ta'digineene na  
toroko no a tindiri kadaada  
nja tisi aana ka oona ma  
tumma ma seriye aadha  
kide, kudumma eene kitaalo  
kara tö'dö keere a nüümö  
a kadu. <sup>10</sup> Lakiini ömö'di  
ya sümünaana kadu ku'bu  
ya, aadha iini ka oona küdü  
kara tanangnga tumma iini  
teera. <sup>11</sup> Nussu o'o a'da  
ömö'di afa ma tiya, tatoroko  
kaama i'i, a tumma niini na  
toroko no kara tanangnga i'i  
ka tahükümüdene.

*Tumma na eere no*

<sup>12</sup> A kede kara tagürünü  
Artimas küdü alla Tikikos,  
areere nöö'dö kede keere ka  
Niköpölis, kudumma eede  
ka asaasa tiidi feele kanna.  
<sup>13</sup> Amünügü Zinas ko'do ya  
tatalaana ma seriye ya nja  
Apölös meene kindinaana  
oona ku'bu ma tunggeene  
amang ka nüümö könö tafa  
titaalo kene. <sup>14</sup> Fa ka kadu  
tanno aja ma kaniisa no  
kalaadene ka linggo tanno  
a'diila no, amang kene tö'dö  
ana eema tiya asaasadene  
ya, kafa taneene kada dhunu  
ka oona.

<sup>15</sup> Kadu na aneene nja  
a'a no, kööjülü o'o nye'd'de  
kungngo. Ööjülü kadu ma  
kaniisa naaja na asaasa  
ungngo no.

Fa ka türü tanno Masala  
ka aneene nja aaga ïn'dili.

## Waraga ya Bölis ma tunggu co Filimon Tafa'da tumma

Bölis ya tafiinii ya aganna ka pabuusu ya, yiini ka tarigiri waraga ya. Filimon aga ömö'di ma kaniisa ya ana almaala dhabbu ya, a tasaga tiya iini Önisimös ka arünö ya. I'i amma ka Yasu akinyi linggo a Bölis. A Bölis tuurugu Önisimös co Filimon a waraga tiya, iki iini a'da afa kini. Ka seriye ma Rööma iki a'da, ömö'di tiidi tasaga yiini kini ka tarünö. A Bölis tiki a Filimon a'da amma ka tasaga tiya iini kada ömö'di ma kaniisa kada örre tiya iini.

### Tööjülu

<sup>1</sup> Waraga ya ö'dö ndama a'a na Bölis no, ömö'di yungngo ka pabuusu ka üüdü ma ya Yasu Almasiihi ya nja örre ma angnga Timosaws, ungngo takunggu co o'o Filimon ömö'di ma linggo yiidi nja tata'diila ma ungngo. <sup>2</sup> Nunggu co iinye tammo aja Abafiya nunggu co nja Arkibus teefe ma angnga ya alinggo nja angnga nunggu co kaniisa tammo küdü ka 'di mo.

<sup>3</sup> Aaga aneene a türü tanno Masala Pupa yaaja a ta'diila miini nja Uugaara Yasu Almasiihi.

*Tasaasa na Filimon nja  
tamma ka Masala*

<sup>4</sup> Filimon, üürü eede ka tafara ka Masala nagüigi a'a eere yüdü namana ta'diila a Masala <sup>5</sup> kudumma a'a ka taföönyö a'da o'o namma ka Uugaara Yasu nja tasaasa kadu ma kaniisa nye'd'de kungngo. <sup>6</sup> Afa müüdü ka tosso ka tamma ka Masala nja kadu töccö, ara a'a tafara ka Masala amang kene tö'dö tessu baraka nye'd'de ya Almasiihi ka anangnga angnga ya. <sup>7</sup> Ka'diila oona eede ka tasaasa tanno üüdü no küdü ka anangnga kadu ma kaniisa ka tadhodho ka nanggeedi.

### Teema tumma ma Önisimös

<sup>8</sup> Nggeege ara a'a takuru rüsü ana Almasiihi kada örre tiya üüdü niki o'o a'da nüünii nüümö yüüdü ka tüünii ada a'a ya. <sup>9</sup> A kudumma eede ka asaasa o'o, yungngo eede ka tirina o'o, a'a na Bölis no kada dharu kungngo, nanna ka pabuusu kudumma Yasu Almasiihi. <sup>10</sup> A'a nasaasa o'o a'da namma ka Önisimös ka üüdü miini, kudumma iini ka taganna ka pabuusu nja a'a afa 'bii'bala yeede. <sup>11</sup> Ka dhidha taalo a'diila nja o'o, a 'bitüngngö anda 'diila nja o'o nja a'a afe'de.

<sup>12</sup> Ara a'a tapadaga i'i co o'o yeede ka asaasa i'i ana eedi. <sup>13</sup> Nasaasa a'a tafa kini akarna ka 'buugu tiya üüdü ütü kita nja a'a akinyi linggo a'a eede ka tanna ka pabuusu, kudumma tumma ma Masala. <sup>14</sup> Taalo a'a nasaasa ta'bunu o'o kide, nasaasa

a'a o'o nalinggo ndama eedi tiya üüdü, a'a taalo nara tüünii niimö a'da nitaalo o'o namma kide.<sup>15</sup> Afeene afa ma Önisimös ka tunggeene üüdü ka 'dī agünü idhilli amang kini tapadaga küdü ka 'di turi.<sup>16</sup> A ndama uuru tanno taalo ara ta tasaga afe'de, lakiini agii'bi ta tasaga, anda teefe ma a'a dhorro, a küdü agii'bi ta tasaga anda örre küdü tanögöre ma Uugaara.

<sup>17</sup> Üürü nümmü o'o a'a kada örre tiya üüdü ka Masala kidha ya, amma kini afa müüdü ka tamma kede kungngo. <sup>18</sup> Üürü i'i agüünii tatoroko ana o'o, üürü nasaasa o'o kömüsü kini ka oona ya, asaasa kede ara a'a ka anangnga o'o. <sup>19</sup> A'a na Bölis, narigiri a'a tumma no a niisö ma a'a, ara a'a tanangnga eema ya o'o. Taalo a'a nara tüütü ka kömüsü tammo eede küdü ka oona, kudumma eede ka tanangnga o'o kada ömö'di ma Almasiihi. <sup>20</sup> Örre eede, üünii ta'diila ana a'a ka Uugaara kidha, 'baga eedi yeede ka Almasiihi kidha.

<sup>21</sup> Nussu a'a a'da ara o'o talinggo tumma neede ka tirina o'o no, nütü ka tussu a'da ara o'o talinggo eege ka tagii'bi neede ka tirina o'o no. <sup>22</sup> Indinaana 'buugu ma füngngö eede ku'bu, kudumma eede ka tündhígí a'da Masala mara tamma ka tafara tanno ada kono mo, mapadaga a'a kada kanna.

<sup>23</sup> Abafaraas yungngo ka pabuuusu nja a'a kudumma Yasu Almasiihi ya ööjülü aaga. <sup>24</sup> Nja Murkus nja Arestarkos nja Dimas nja Lüüka no alinggo nja a'a no. <sup>25</sup> Fa ka türü tanno Uugaara Yasu Almasiihi ka neene nja aaga in'dili kungngo.

## Waraga ma co Ebraniin Tafa'da tumma

Tatalaana yungngo agarigiri co kadu ma kaniisa tanno Yahüüdü no. I'i uu'bu eege ka nanggeedi a'da kütü ka takidhö ka tamma tanno eene ka uuru ma kadu kadalinggo eege.

Waraga ya ala angnga a'da Yasu i'i ya 'Bii'bala ma Masala. I'i ana türü adagii'bi kadhangga na Yahüüdü ka tamma kene no, i'i agu'daana dhorro adagii'bi nagane'bi ma 'billi, agu'daana dhorro adagii'bi Müüsa, ya anangnga seriye ya Masala a Yahüüdü ya. I'i agu'daana dhorro adagii'bi ka'boge ma Yahüüdü, kudumma iini taalo agüünii nüümö ya toroko ya. I'i ümmünü eyi yiini kada nüümö ma türri ma tagala tatoroko na kadu nye'd'de ka naguuru nye'd'de. A tatalaana afünügü nagiide ko'do nja iiya ma 'büdhülü na aganeene a tamma no. I'i adirina eema a kadu ma kaniisa a'da eege tütü ka tamma ka Masala taalo kama tüürü ma eema tiya Yasu ka talinggo ya.

*Tumma na Masala nja  
'Bii'bala tiya oono*

<sup>1</sup> 'Billi Masala magürünü nagane'bi kadageema nja kafaafa ma angnga a

naguuru nja nafiiñi kada tonggoonyo. <sup>2</sup> Lakiini ka naguuru tanno eere no, mageema nja angnga a 'Bii'bala tiya oono, ya ara takarna ka eema nye'd'de yoono ka tadina 'büdhülü ana i'i ya. <sup>3</sup> 'Bii'bala i'i ya töyeene ma tidihindhi ma Masala i'i ya koronggore ma taneene tanno oono afa ka eema nye'd'de a türü ma tumma tanno iini, a kini ka ndagala tatoroko naaja emmi ka nüüsö ma kuri ma tidihindhi ma Masala ka 'dotombo'do. <sup>4</sup> Nggeege i'i idhindhi adagii'bi kadhangga kudumma iini ka a'duga eere adagii'bi naga-reene neene.

<sup>5</sup> Taalo Masala miki a tadhängga töccö,  
"O'o no 'Bii'bala tiya eede,  
a'a nageene o'o ka uuru tanno."

Miki afe'de,  
"Ara ta Pupa tiya iini  
ata 'bii'bala tiya eede."

<sup>6</sup> Ka Masala ka agürünü 'Bii'bala yoono ya dhidha ya ka 'büdhülü ya, miki a'da,  
"A kadhangga ma Masala tüürü kini kidha."

<sup>7</sup> A Masala meema tumma ma kadhangga miki,  
"Marü'bü kadhangga kada tanya,  
a kadu ma linggo noono ka nagonggo'do ma issi."

<sup>8</sup> Lakiini kudumma ma 'Bii'bala miki,  
"Ka Masala, tauugaara nüüdü kara tütü turi ta'billi,

a kuufi ma tauugaara ta  
tiya üüdü dhorro turi.  
 9 Nasaasa o'o tumma no  
dhorro nanu ka tanno  
atoroko no,  
yungngo a Masala,  
Masala müüdü ka  
tagesse o'o  
masiri uu'ba üüdü ka  
üüdü ma dhodho  
masa ka titaaloo man-  
angnga a kijöögö."

10 Miki afe'de,  
"Ka Uugaara, narü'bü  
'büdhülü ka dhidha,  
narü'bü o'o 'dotombo'do  
ana iisine ma o'o.  
 11 Eege kara tamanyaaga, ara  
o'o ka tüütü,  
kara toorodo afa ten'di.  
 12 Ara o'o ta'dukunjaana  
eege ko'do  
afa ten'di ka tem'bele,  
lakiini o'o naganuuru nüüdü  
taalo kara titaaloo."  
 13 Taalo Masala miki a kad-  
hangga,  
"Emmi kede ka nüüsö ma  
kuri kita,  
ara a'a tanangnga diidi  
yüüdü küdü  
ka uune nasiri kene."?  
 14 Kadhangga eege ka  
nagoronggore tanno linggo  
ada Masala, na oono ka  
küürünü eege köö'dö takarna  
ka toolonadene?

## 2

### *Aaga adinö ko'do*

1 İkiri angnga kara  
tagümmü talaana na 'diila  
naaja ka taföönyö no ii'di  
angnga tagaama. 2 Üürü  
tumma na kadhangga ka

tageema no katimin'da ya,  
ömö'di ya asilli tumma no  
anu kide ya, ara taluna  
tapusu adene miini ka teyi.  
 3 Ara angnga tarünö nya aja  
ka tagüünii tö'bö a toolon-  
adene tanno idhindhii? Na  
Uugaara ka tatiraana ana  
oona miini ka dhidha, a  
kadu na föönyö no kiki  
angnga a'da katimin'da.  
 4 A Masala tamma ka  
tumma tanno eene ana eema  
keefe yoono ka tagalinggo  
ya nye'd'e a türü ka  
tatonggoonyo ana eema tiya  
oono ka amana a kadu a  
Koronggore tiya Insili ya.

### *Yasu afeene nja nagöre tanno iini*

5 Taalo Masala manangnga  
kadhangga kada naguu-  
gaara ma 'büdhülü tiya ara  
tö'dö, yiidi ka tageema miini  
ya. 6 Afa ma sorne ka tiki  
a'da,

"Ömö'di a'da minna nagüügi  
tumma miini?

Tadü'dü a'da minna  
na o'o tafa kini?

7 Nagalinggo o'o i'i ka idhilli  
ka ta'buugu ka kad-  
hangga keere,  
nanangnga ndalembö  
iini nja tiddhindhi,

8 nanangnga eema  
in'dili kini ka uune."

Iki a'da Masala man-  
angnga i'i ka tauugaara ma  
eema in'dili eema nye'd'e  
kungngo iini, lakiini taalo  
angnga kiji tadü'dü ka  
tauugaara ma eema nye'd'e  
'bitingngö. 9 Lakiini kiji

ungngo Yasu ömö'di ya agalinggo adene idhilli ka ta'buugu ma kadhangga ya, amang kini a türü ma Masala ara teyi ka üüdü ma kadu nye'd'de kiji ungngo i'i a türü a tidihindhi, kudumma iini ka teyi a tadhügürü.

<sup>10</sup> Tumma dhorro Masala oogo mungngo marü'bü eema ïn'dili ma tidihindhi tanno oono, kono ka anangnga Yasu ka tinsili ka dhügürü, tö'dö ana laala kadhabbu ka toolonadene nye'd'de. <sup>11</sup> I'i amana kadu ka tinsili ka tatoroko tanno neene i'i nja kadu tanno insili no nye'd'de, pupa yeene unggodho. Yungngo Yasu ka taalo ana modolo ma tümmünü egee a'da nagöre.

<sup>12</sup> Iki,

"Ara a'a teema nja nagöre tanno eede ana eere tiya üüdü

nawe tüüsü ka kaniisa."

<sup>13</sup> Iki afe'de,

"Ara a'a tümmünü eyi yeede a Masala."

Afada iki afe'de,

"A'a nungngo kita nja laala tiya Masala ka anangnga a'a ya."

<sup>14</sup> Aga laala katosso ka tuu'da nja eriidö, a Yasu osso kide nja eene afeene afa egee amang ka inde tanno iini tiidi Eibliisi ya ana türü ma inde. <sup>15</sup> Oolona kadu no ka kasaga, eene kari'ba inde ya. <sup>16</sup> Taalo i'i ö'dö toolona kadhangga, lakiini i'i ö'dö toolona laala ya Abrahiim. <sup>17</sup> Nggeege ikirri kara tafeene

nja nagöre tanno iini ka eema ïn'dili, amang kini tana 'bangnga ada uugaara ma ka'boge ya adho ka fiinii ka linggo na Masala, amang kini taagala tatoroko na kadu. <sup>18</sup> Kudumma iini ana oona miini adhügürü adaka'b'badene amang kini toolona kadu na a'b'badene no.

### 3

#### *Yasu agii'bi Müüsa*

<sup>1</sup> Nggeege nagöre eede na ma kaniisa no insili no na osso ka tümmüneene ma 'dotombo'do, aaga iiri Yasu ya tafiinii ma tamma tanno aja uugaara ma ka'boge yaaja ka tamma kini ya.

<sup>2</sup> I'i ümmü tumma na ömö'di tiya agesse i'i ya, afa ma Müüsa ka tagümmü tumma ma Masala ka 'dii ma Masala nye'd'de kungno.

<sup>3</sup> Yasu i'i yungngo idhindhi adagii'bi Müüsa afa ma tatürü'böönö ka tidihindhi adagii'bi 'dii ka eyi tiya iini.

<sup>4</sup> Ömö'di ya arü'bü 'dii ya inggide, lakiini Masala oogo mungngo marü'bü eema ïn'dili. <sup>5</sup> A Müüsa aga'diila ka 'dii ma Masala nye'd'de kada ömö'di ma linggo eema tumma na ara teemadene ka naguuru tanno tö'dö no.

<sup>6</sup> Lakiini Almasiihi kada 'Bii'bala ya a'diila ya ka 'dii ma Masala. Angnga ka 'dii tiya iini, üürü kafa angnga taalo kari'ba angnga ma tafa ka eema tiya aja ka tindhigii i'i ya.

*Aaga adinö ma kadu na taalo kamma no*

<sup>7</sup> Afa ma Koronggore tiya Insili ya ka tiki,

"Uuru no kada kara taföönyö 'bugeyi ya Masala ya,

<sup>8</sup> aaga fa tasilli tumma miini

afa tiya maaga ka tagüüni ka uuru ma ta'b'badene ka dhüile ya kungngo.

<sup>9</sup> Kita a kafaafa ma aaga ka taka'b'ba kagawwa a'a ka eedi kiji linggo neede nja eene a nagürüünü kukumu kadu keera.

<sup>10</sup> I'i yungno eede ka tagoroo'bo nja sere tiya niki a'da,

'Nanggeedi neene turi kungngo kaama, taalo kussu nafiini yeede.'

<sup>11</sup> A'a naküdöönö ka tagoroo'bo tanno eede,

'Eege taalo kara co ka talingnge tanno eede.'

<sup>12</sup> Nagöre eede, aaga adinö ko'do, ömö'dii könö ana kada afa tana eedi ya toroko ya, amma ka Masala apadaga oona keere ka Masala tammo efe ka 'dii mo.

<sup>13</sup> Adha ya, aaga füngünja ko'do 'bucca kudumma tumma ma uuru kungngo ka sorne ii'dii tatoroko tüüsini ömö'dii öccö ana kada asilli eema. <sup>14</sup> Angnga ka unggodho nja Almasiihi kaja kara tagümmü ajeene

dhorro ta'bili ata'diila tanno aganna kaja ka dhidha no. <sup>15</sup> Sorne ma Masala iki,

"Uuru no, kada ka taföönyö 'bugeyi ya Masala, aaga fa tasilli eema afa maada ka tagasilli tumma na Masala kungngo."

<sup>16</sup> Kadu öccö eege kungngo kakaanu ka tumma? Taalo kadu no nye'd'de na Müüsa ka öö'dö ana eege ndama Misiri no?

<sup>17</sup> Kamada eege kungngo a Masala ka tagoroo'bo ada kene a nagürüünü kukumu kadu keera no? Nja kadu tanno agüüni tatoroko no ka'dingga kaaya ka dhüile.

<sup>18</sup> Kamada eege kungngo a Masala ka taküdöönö a'da taalo kara co ka talingnge tanno oono? Taalo kadu na silli tumma noono no?

<sup>19</sup> Kiji angnga eege taalo

kambaanya co, kudumma eene kitaalo kamma.

## 4

*Uuru ma Sa'bidi uuru ma talingnge*

<sup>1</sup> 'Bitingngö Masala mafa'da fiini co 'dii tiya oono angnga ka tadinö ko'do ii'dii ömö'dii könö türi eyi yiini ka tüü ka teene. <sup>2</sup> Kaföönyö angnga tumma na 'diila no afa meene ka taföönyö kungngo, lakiini eege taalo kümmü niimö ka tumma tanno eene ka taföönyö no, kudumma eene taalo kamma kide. <sup>3</sup> A 'bitingngö angnga na amma no, ara

angnga co talingnge ma Masala, kudumma oono ka tiki,

"Naküdöönö a'a a tagoroo'bo 'do

'Taalo kara co talingnge tanno eede.'

A'da asa linggo no tagalinggo adene ada jiddi ma uuru ma 'büdhülü ka tarü'bü adene,<sup>4</sup> kudumma oono ka tiki ka sorne ka tumma uuru tanno iidümmü kafünü eera no, "A Masala talingnge ka linggo tanno oono nye'd'de kungngo ka uuru tanno iidümmü kafünü eera no."<sup>5</sup> Miki afe'de, "Taalo kara co ka talingnge tiya eede."

<sup>6</sup> Üürü kadu na föönyö tumma na 'diila no ka dhidha asa kitaalo kinynyo ka talingnge ma Masala kudumma eene ka sill eema, a kadu könö kinggide kara co ka talingnge tanno miini no. <sup>7</sup> Yungno Masala ka kusu uuru kide ana eere a'da uuru no, afa moono ka teema ana onggo'do tammo Dawud 'billi miki,

"Kada ka föönyö 'bugeyi ya Masala ka uuru tanno ya,  
aaga tafa tasilli tumma iini."

<sup>8</sup> Ka Yashu kara takunggu eege ka talingnge, taalo Masala mageema tumma ma uuru könö afe'de. <sup>9</sup> Lakiini öreeene uuru ma Sa'bidi talingnge na kadu tanno Masala. <sup>10</sup> Kudumma ömö'dii tiya inynyo ka talingnge ma Masala ya, ara talingnge ndama linggo tanno iini afa

ma Masala ka lingenge ka linggo tanno oono kungngo. <sup>11</sup> Kada kardha ku'bu amang kaja co ka talingnge tanno miini no, ii'dii ömö'dii öccö ta'dingga ma tuurna fiinii yeene keere ma tasilli eema.

<sup>12</sup> Tumma na Masala ka tinö ka linggo, kana kuri kadagii'bi kulu'ba ma ana na'dugugini keera mo, ara teedhe kadara co ta'buugu tiya tuu'da nja koronggore, nja tuu'da agillö nye'd'de, nja 'dongnge nja ku'buuni, ümmü tumma ma üüdü nja tumma ma eedi. <sup>13</sup> Taalo niimö mitaalo ussudene ka Masala kidha, eema nye'd'de ijidene kada 'döngngönyö kono ka iiye, ara angnga tagöö'dö kono kidha.

*Yasu ya ta'boge tiya  
dhabbu ya*

<sup>14</sup> Nggeege kada kümmü tumma ma Yasu 'Bii'bala ya Masala ya dhorro ya, i'i ya Uugaara ma Ka'boge ya idhindhü ya, ata'da aco 'dotombo'do. <sup>15</sup> Kudumma uugaara ma ka'boge yaaja taalo agi'di ma tana 'bangnga ma angnga ka tagi'di tanno aja, i'i aka'b'badene afa angnga. Ta'b'baana in'dili illi i'i taalo agüünü tatoroko. <sup>16</sup> Fa kaja angnga caago a kööyö ma türü a tamma dhorro, amang kaja taduna 'bangnga nja türü, akinyi angnga kaja kara tasaasa.

**5**

<sup>1</sup> Kudumma uugaara ma ka'boge agonadene ndama kadu tanno iini ümmünüdene ma talinggo ada linggo ma Masala eene miini ka türri ma tafaana ma tatoroko ka kadu ka oona iini. <sup>2</sup> I'i ambaanya tana 'bangnga ma nagaaga nja kadu tanno aama no, kudumma iini ka eyi tiya iini agi'di. <sup>3</sup> Nggeege i'i ya ama türri tatoroko ma eyi tiya iini nja tatoroko tanno kadu.

<sup>4</sup> Taalo ömö'dii ma tümmünü eyi yiini kada uugaara ma ka'boge, illi a Masala ka tümmünü i'i iini afa moono ka tagümmünü Harüün kungngo. <sup>5</sup> Almasiihi afe'de taalo afünügü eyi yiini ko'do a'da amang kini ta uugaara ma ka'boge, lakiini Masala miki iini,  
“O'o na 'Bii'bala tiya eede nageene a'a o'o ka uuru tanno.”

<sup>6</sup> Afada miki ka 'buugu töccö afe'de,

“O'o na ta'boge ta'billi ma ta'duga 'buugu ya Maliksadik.”

<sup>7</sup> Ka naguuru tanno Yasu ka takaleefe ka 'büdhülü afara ka Masala a tumma ko'd'do nja 'büdü ma iiye co ömö'dii tiya ara tamaanya toolona i'i ka inde, ada aföönyö kudumma tamma tanno iini nja tümmünü eyi iini. <sup>8</sup> A'da i'i aga 'bii'bala agalaadene ka taföönyö eema ndama kita iini ka tadhügürü ya. <sup>9</sup> Kini

kara tasere adhabbu ikirü anda nduguli ma toolona ta'billi ma kadu tanno aföönyö tumma niini no. <sup>10</sup> Kudumma Masala ma kümmünü i'i a'da a ta uugaara ma ka'boge akarna ka 'buugu tiya Maliksadik.

*Aaga fa tanu ka tumma ma Masala*

<sup>11</sup> Tumma kadhabbu eede ka asaasa teema eege, lakiini kiideene tasaana ku'bu miini, kudumma ada ka titalo kaföönyö eema areere. <sup>12</sup> Tumma dhorro, ta'bütängngö aaga ta katalaana, kasaasa aaga ömö'dii alaana aaga ka tumma ma timin'da na Masala na dhidha no afe'de. Kasaasa aaga siiga taalo kuri ya kidhö ya. <sup>13</sup> Ömö'dii ya aleefe tooye siiga ya, i'i aleefe tidhilli taalo ussu eema ya a'diila ya. <sup>14</sup> Lakiini kuri ya kidhö ya, ama kadu tanno iiği no, na agalaadene kussu niimö ya a'diila ya nja tiya toroko ya.

**6**

<sup>1</sup> Nggeege kada kasisigi co adha ka talaana ma Almasiihi ma ta'dara, nggeege fa ka talaana tanno dhidha ma Almasiihi ara kico kada ömö'dii dhorro. Ungngo tafa tamana kadese ma taadha ka linggo tanno ma inde no afe'de nja tamma ka Masala, <sup>2</sup> talaana ma tambeese nja tümmünü iişine ka kadu ka nanggüüdü nja tafiki'dö ka inde nja tapusu adene ta'billi. <sup>3</sup> I'i

yungngo aja kara tagalinggo a Masala ara tamma kide.

<sup>4</sup> A tiideene a kaduna kanna ka töyeene ta unggodho, kagolo eema ma 'dotombo'do ya a'diila ya, kussu ka Koronggore tiya Insili ya, <sup>5</sup> kagolo tumma nja Masala na 'diila no nja eema ma türü ma ürüünü tiya ara tö'dö no, <sup>6</sup> Kassa ka taadha ka tumma ma Masala, a tafada ma tapadaga eege ka tamma a'da kaadha ka tatoroko, kiideene 'do kudumma eene ka bün Bü'bala ma Masala ka salii'bi teera kanangnga modolo iini ka oona.

<sup>7</sup> 'Büdhülü in'dili a kooye 'bii'di ma tombo'do ka tede ada kide 'bucca, a naafa tafü'döönö kide ka'diila ma kadu tanno adinüögü no ka üüdü meene ka'duga baraka ma Masala. <sup>8</sup> Lakiini 'büdhülü kara teene immi nja ooyo tiya atoroko ya, ara linggi ma Masala tümmü i'i üpünja ka issi a tonyoko.

<sup>9</sup> Keema ungngo tumma no, kateefe ma a'a, a'da kussu ungngo a'da eema ya a'diila ungngo ada ara tanangnga aaga ka toolonadene. <sup>10</sup> Masala taalo müünö ada kadu ku'bu taalo mara tüürü ma eema tiya ada ka tagalinggo ya nja tasaasa tanno ada kaala oono ka eema tiya kamana a kadu tanno oono, aaga taleefe talinggo ada eene. <sup>11</sup> Lakiini ungngo kasaasa a'da aaga tüütü ka linggo tanno miini no nggeege turi amang ka eema tiya ada ka

tindhígü ya tananja aaga ya a timin'da. <sup>12</sup> Taalo ungngo kasaasa a'da aaga tadhunu, lakiini aaga tafeene nja kadu tanno amma ka Masala kidhi oona ku'bu kaduna niimö ya Masala ka tiki eene ya.

### *Tumma na Masala ka timin'da*

<sup>13</sup> Ka Masala ka tageema nja Abrahiim maküdöönö ka eyi tiya oono a'da taalo ömö'di ma tagii'bi eyi tiya iini aküdöönö ana eere tiya oono. <sup>14</sup> Miki iini a'da, "Tumma dhorro ara a'a tanangnga baraka o'o nanangnga laala o'o dhabbu." <sup>15</sup> Yungngo Abrahiim ka takidhi oona ku'bu aluna niimö ya Masala ka tadirina iini ya.

<sup>16</sup> Kadu kaküdöönö ana ömö'di tiya adhabbu eene, a taküdöönö tümmünü niimö ya ageemadene kindinaana ku'bu kaadha ka ta'digineene. <sup>17</sup> Kudumma

Masala masaasa tanangnga nafüni ma taneene tanno oono ka tessu adene ka kadu tanno ara takarna ka tumma tanno oono ka tatiraana no, oogo ma tiraana a taküdöönö. <sup>18</sup> Masala magüünö tumma no, ma eema inggide eera taalo ara tatenggere, iideene 'do a Masala ka tatoroko i'i yungngo aja katümmü

tindhígü na ananja angnga no, tafünügü angnga ko'do. <sup>19</sup> Tindhígü no kungngo aja afa niimö tiya afa kaja ka koronggore ka takidhö afa kaja aco a taneene keere

ma ten'di. <sup>20</sup> Yasu inynyo kanna kaja kidha ka üüdü ma angnga anda uugaara ma ka'boge ta'billi ka 'buugu ya Maliksadik.

## 7

### *Maliksadik ya ta'boge ya*

<sup>1</sup> A Maliksadik ya aga uu-gaara ma Salim ta'boge ma Masala tammo dhabbu mo. Maliksadik akoreene nja Abrahiim kini ka ndafada ka koro'bo tiya iini nja naguugaara ya, anangnga baraka iini. <sup>2</sup> Abrahiim agona unggodho ndama eema yiini ya ada'baaga ya, eere yiini ya dhidha ya, i'i ya "Uugaara ma ta'diila," afe'de "Uugaara ma Salim" iki a'da, "Uugaara ma tööjülü." <sup>3</sup> Taalo pupa iini a nüümö titaaloo kini a kadaada titaaloo kini, taalo ageenedene, taalo a teyi, lakiini i'i afeene nja 'Bii'bala ma Masala ara tüütü kada ta'boge ta'billi.

<sup>4</sup> Aaga iji tidihindhi niini, salla faafa ma angnga Abrahiim anangnga faana ma 'dakeyi ma almaala tiya iini ku'bu ndama eema ma koro'bo. <sup>5</sup> Lakiini ka'boge na laala tiya Laawi no, seriye iki a'da kama eema ka kadu na nagöre tanno eene no 'dakeyi, kudumma eene kada laala tiya Abrahiim. <sup>6</sup> Lakiini Maliksadik taalo 'bii'bala ya Laawi, lakiini i'i agona eema ya ada'baaga ka Abrahiim anangnga baraka iini, i'i ya Masala ka timi'di tumma nja iini ya. <sup>7</sup> Taalo nüümö ya toroko kide ma ömö'di tiya adhabbu ya

ka anangnga baraka a tiya idhilli ya. <sup>8</sup> Katamana eema tiya ada'baaga ya, ya ka'boge a kadu na aaya no eege kungngo kamaana. Lakiini ömö'di ya a'duga ya ikirri ka tussu adene a'da i'i ya efe ka 'di. <sup>9</sup> Ara angnga tiki a'da, Laawi ka eyi tiya iini ama eema ya ada'baaga, anangnga ku'bu ka nüüsö tanno Abrahiim. <sup>10</sup> Kudumma iini ka takaleefe ka Abrahiim ka sikiri ka uuru tanno Maliksadik ka toreeene nja iini no.

### *Yasu afeene afa Maliksadik*

<sup>11</sup> Üürü tadho ka fiinü kalinggo adene a tata'boge na Laawi a'da i'i yungngo ama seriye ya kadu ka'duga, taalo angnga kasaasa ta'boge ka öö'dö ma ta'duga 'buugu ya Maliksadik taalo ya Harüün. <sup>12</sup> Üürü katenggere tata'boge, ara seriye tatenggere tekere. <sup>13</sup> Ömö'di ya kadu ka teema tumma miini ya, ama siliga töccö, taalo ömö'di anna ka siliga tiya iini agalinggo ta ta'boge. <sup>14</sup> Kussu angnga a'da Uugaara yaaja ö'dö ndama siliga tiya iini ya Yahüüsa, Müüsa taalo adiri tumma ma kadu tanno, kini ka keema tumma ma ka'boge. <sup>15</sup> A tumma nüüdi ka tirina no kussu adene dhorro, üürü ta'boge könö abbü 'dala afa Maliksadik. <sup>16</sup> Ömö'di ya ümmü adene kada ta'boge taalo ndama tumma na nakömö'di nja kadaada, lakiini a türü ma

tefe ka 'dī na taalo kara titaalo no.<sup>17</sup> Sorne eema tumma miini iki,

"O'o no ta'boge ta'billi  
ka 'buugu ya Malik-sadik."

<sup>18</sup> Tumma ma 'billi no kara co keere, kudumma eene ka tagi'di, taalo ö'dö keere a nüümö.<sup>19</sup> Kudumma seriye tiya Müüsa taalo atiümö linggo dhorro, yungngo tündhígí na 'diila no anangnga kadu ka kete ka Masala ana eege.<sup>20</sup> Taalo kagalinggo adene a'da kitaalo ka taküdöönö kide, a könö taga ka'boge a'da taalo kaküdöönö.<sup>21</sup> Lakiini Yasu akodhodene ada ta'boge a taküdöönö ma Masala miki,

"Uugaara aküdöönö  
taalo tagussu kide,

'O'o na ta'boge ta'billi.' "

<sup>22</sup> Kudumma ma taküdöönö ya, Yasu i'i yungngo anda tamaana ma timi'di tumma, adagii'bi timi'di tumma na dhidha no.

<sup>23</sup> Ka'boge na miini no kadhabbu, kudumma inde taalo kafa kene kafe ka 'dī.<sup>24</sup> Lakiini Yasu ya ara tüütü ka 'dī ta'billi ya, tata'boge miini taalo kara titaalo.<sup>25</sup> I'i 'bitüngngö nja angnga 'bucca kungngo, ara toolona kadu na icci ka Masala ana eere tiya iini no, kudumma iini kefe ka 'dī ta'billi, miini tageema nja Masala kudumma eene.

<sup>26</sup> Yasu i'i ya uugaara ma ka'boge ya a'diila nja angnga ya i'i ya insili, taalo nüümö ya toroko ya kini, taalo osso ka

nüümö nja kadu tanno oroko no, a'diniga co fiinī ma ndanaaya ma 'dotombo'do.

<sup>27</sup> Taalo afeene nja ka'boge töccö taalo ama tara eema ma türri 'bucca kungngo ma tagala tatoroko niini ka dhidha, assa ka tagala tatoroko na kadu in'dili, i'i akirri ma tatoroko tanno eene ta unggodho, ma kadu nye'd'e kini ka tümmü eyi yiini ka inde.<sup>28</sup> A seriye ya Müüsa anangnga kadu na ki'di kada naguugaara ma ka'boge, lakiini taküdöönö tumma na Masala kö'dö keere a seriye, tanangnga 'Bii'bala ya insili ya ta'billi ya kide.

## 8

*Uugaara ma ka'boge ma timi'di tumma ma 'bitüngngö*

<sup>1</sup> Lakiini üüdü ma tumma tanno iidü ka teema no a'da uugaara ma ka'boge ungngo iidü, ya emmi ka nüüsö ma kuri ma kööyö ma tüdhindhi ka 'dotombo'do,<sup>2</sup> ya alingga ka 'buugu tiya insili nja tiya dhorro, ya Uugaara ka tarü'böönö ya a'da taalo ömö'di i'i yungngo arü'böönö.

<sup>3</sup> Uugaara ma ka'boge ö'dö ma türri, ikirri angnga ka tiki a'da, uugaara ma ka'boge yaaja ara tö'dö a nüümö ma türri iini.<sup>4</sup> Ka Yasu kara taganna ka 'büdhülü ya, taalo ara taga ta'boge, kudumma kadu kinggide kara türri afa ma seriye ka tiki kungngo.<sup>5</sup> Kadu

na kalinggo ka 'buugu  
tiya insili ya kafeene afa  
koronggore nja tallappa  
tiya ka 'dotombo'do ya,  
ka Müüsa ka asaasa tüüfü  
fangga, a Masala tö'dö kini  
miki iini, "Ijöögö, alinggo  
eema nye'd'de afa ma tiya  
eede kala o'o ka 'dikinya ya  
kungngo." <sup>6</sup> Lakiini linggo  
ma tata'boge kananja Yasu  
ka idhindhü a tanno eene,  
kudumma timi'di tumma na  
ka söödö no nja kadu tanno  
kagii'bi timi'di tumma na  
dhidha no, agalinggo adene  
ka timi'di tumma tanno  
a'diila no.

<sup>7</sup> Üürü timi'di tumma na  
dhidha no ka ka'diila 'dee,  
taalo kara tagalinggo timi'di  
tumma könö. <sup>8</sup> Lakiini  
Masala maluna hetti ka kadu  
miki a'da,

"Uuru kinggide kara tö'dö,  
Uugaara ka tiki,  
ara a'a sa kimi'di tumma  
ma 'bitüngngö  
nja 'di tiya Israyil nja 'di  
tiya Yahüüsa.

<sup>9</sup> Taalo afa timi'di tumma  
neede nja kafaafa  
meene  
ka uuru tanno eede ka  
tümmü eege ka niisö  
nunggu eege kürö  
ndama 'büdhülü ma  
Misiri,

kudumma eene taalo kütü  
ka timi'di tumma  
tanno eede,  
yungngo eede kafa kene,  
a'a na Uugaara na tiri  
tumma no.

<sup>10</sup> Timi'di tumma neede ka  
tüünii nja laala ma Is-  
rayil

ka naguuru tanno ara  
tö'dö no, Uugaara iki.  
Ara a'a tanangnga seriye  
yeede kene ka nang-  
güdü  
narigiri ada kene ka  
nanggeedi neene.  
Na ta Masala tammo eene  
ka ta kadu tanno eede.  
<sup>11</sup> Taalo ömö'di ana kene ara  
talaana kadu na kete  
kini  
no alla örre yiini tiki  
iini, 'Ussu Uugaara,'  
kudumma eene kassa ka  
tussu a'a nye'd'de  
ndama ömö'di tiya id-  
hilli ya nja tiya ad-  
habbu ya.

<sup>12</sup> Ara a'a ta'duga tatoroko  
eene ka oona  
nitaalo nara tagüügi  
tam'baga neene  
afe'de."

<sup>13</sup> Tumma na Masala ka  
timi'di tumma na issi no  
manangnga timi'di tumma  
na dhidha no ka tilli a nüümö  
ya illi ya ya ara tamanya.

## 9

*Tafara ka Masala ka  
fangga ma 'büdhülü*

<sup>1</sup> A 'bitüngngö tafi'di  
tumma na dhidha no  
kaganna fiinii ma tümmü  
Masala nja fangga ma  
'büdhülü afe'de. <sup>2</sup> Fangga  
magüfunünja ka la tiya  
oono ya dhidha ya, ya koyo  
ma lamba ka tanna kide  
mo, tarabeesa nja miteene  
ma türri, i'i yungngo ana  
eere a'da 'buugu tiya Insili  
ya. <sup>3</sup> Aga kanna keere  
ma ten'di tiya eera ya, la

yeene ka tümmüneene a'da 'buugu ya Insili dhindho ya.  
<sup>4</sup> Fü'deene ma dahaba ka tadtihögö kondho kide mo, nja sandü ma timi'di tumma ma taküdhü ana dahaba koona nye'd'de. Sandü ma timi'di tumma mana alman nja kuufi tiya Harüün ka tasiri kide ya nja maraayo ma timi'di tumma.  
<sup>5</sup> Karoba ma tidihindhi taganna ka sandü ko'do amana 'buugu ma fa ka takara 'buugu ma tatoroko ka tandha ya, lakiini taalo fiini 'bitingngö ma tesaana tumma no ku'bu nye'd'de.

<sup>6</sup> Eema nye'd'de aga indinaana ku'bu ta'bitta kungngo, a ka'boge ticci co la tiya dhidha ya a naguuru kalinggo eema ma Masala kide.  
<sup>7</sup> Lakiini uugaara ma ka'boge i'i yungngo icci co la tiya eera ya unggodho ka ürüünü, itaalo ara co illi kini ka tümmünü eriidö ma tirri ka niisö ma tagala tatoroko niini ka tagüünü no nja tatoroko tanno kadu, kadu küünii a'da taalo kussu iini no.  
<sup>8</sup> Koronggore ya Insili ya eema iki a'da fiini ma co a 'buugu tiya Insili dhindho ya, taalo atanfa'da, kudumma la tiya dhidha ya ka aleefe ta'dingnge.  
<sup>9</sup> I'i yungngo tala angnga ka fiini ma ürüünü ma 'bitingngö ana eema ma eriidö nja eema ma tirri ka Masala, itaalo ara tanangga ömö'dii ya ümmü Masala ya ka tinsili ka eedi.  
<sup>10</sup> Eema ma tuu'da ma kuri nja tooye nja eema ka tatonggoonyo nja

tagunaana ma eema, i'i ara uuru na Masala ka öö'dö a tumma töccö.

### *Erividö ya Almasiihi*

<sup>11</sup> Almasiihi andö'dö kada uugaara ma ka'boge ma eema tiya a'diila ya ya illi ka taganna kita, ada'da fangga mo idhindhi mo, ma tümö no, ya taalo alingga adene ana iisine ma ömö'dii, taalo ama eema ma 'büdhülü.  
<sup>12</sup> I'i taalo inynyo teene minni ana eriidö ma ki'biini nja leefo. Lakiini inynyo a 'buugu tiya Insili ya ta unggodho ana eriidö tiya iini ma kadu nye'd'de öö'dö a toolona angnga ta'billi.

<sup>13</sup> Üürü eriidö ma nakoromo nja nagodha ya uu-runja ku'bu ya nja fü'dö ma 'bileefo amana kadu na nyoro no katinsili, agala eege ka oona.  
<sup>14</sup> Taalo eriidö ya Almasiihi ya ümmünü eyi yiini a Masala a koronggore ta'billi ümmü eyi yiini a'da taalo hetti kide, agala nanggeedi naaja ka eema tiya amanaga angnga ka inde ya amang kaja tagalinggo ada a Masala tammo efe ka 'dii mo.

<sup>15</sup> Nggeege ya Almasiihi yungngo anna ka söödö ma timi'di tumma ma 'bitingngö, amang ka kadu tanno ümmünüdene no kara takarna ka eema ta'billi nja timi'di tumma, a 'bitingngö eyi kada niimö ma faana anangnga eege ka toolonadene ka tatoroko tanno agüünii adene ka timi'di tumma tanno dhidha

no. <sup>16</sup> Ka ömö'dü kara tarigiri timi'di tumma ya, fa ka kadu kussu inde niini, amang kene tessu a'da i'i ya eyi. <sup>17</sup> Kudumma tumma tanno ömö'dü ya ö'dö iini ya, ara teyi a linggo kitaalo kene kudumma ömö'dü tiya ageema ya, efe ka 'dü. <sup>18</sup> I'i yungngo a timi'di tumma na dhidha no taalo agalinggo adene a'da taalo eriidö kide. <sup>19</sup> Aga Müusa ka ndadünüğü tumma co kadu ma tumma ma Masala nye'de afa ma seriye ka tiki, a'duga eriidö ma leefo nja nakoromo nja 'büdü nja musa tammo dhöyö mo nja ndhaaru asanna ka Sorne ma seriye tiya iini nja kadu nye'de kungngo. <sup>20</sup> İkiri ka tiki, "Eriidö ma timi'di tumma na Masala ka tiki aaga no eege kungngo aaga tafa kide." <sup>21</sup> Afada atasanna eriidö ka fangga nja eema ma linggo ma Masala nye'de kungngo. <sup>22</sup> Tumma dhorro seriye iki a'da asaasa eema nye'de tagunadene ana eriidö, üürü eriidö taalo ya, taalo tatoroko kara ta'dugadene.

<sup>23</sup> Üürü koronggore ma eema ma 'dotombo'do ama ma tatanggala ana eema tiya, aya ma 'dotombo'do ka eyi tiya iini ama tatanggala ana eema ma türri ya agii'bi i'i ya. <sup>24</sup> Kudumma Almasiihi taalo inynyo a 'buugu tiya insili ya kalinggo adene ana iiwine ya, yungngo a koronggore ma

timin'da ya, lakiini i'i inynyo 'dotombo'do ka eyi tiya eene abbü 'dala ka Masala kidha ka üüdü ma angnga. <sup>25</sup> Taalo kudumma iini a'da ümmünü eyi yiini a Masala a naguuru afa uugaara ma ka'boge ya icci co 'buugu tiya Insili dhindho ya ta unggodho ka ürüünü ana eriidö a'da taalo eriidö yiini ya miini. <sup>26</sup> I'i ya ma tadhügrü 'bucca jiddi ma 'büdhülü ka tarü'bü adene, lakiini i'i abbü 'dala ta unggodho a'da asa nagürüünü takete ka tatüümö ma tagala tatoroko iini ka tümmünü eyi yiini a Masala kada niimö ma türri. <sup>27</sup> Kadu 'do kara taaya ta unggodho a Masala kara tümmünü egee. <sup>28</sup> Nggeege afe'de Almasiihi agümmünü eyi yiini kada niimö ma türri ta unggodho ma ta'duga tatoroko na kadu kadhabbu assa ka abbü 'dala afe'de, taalo kudumma ma tam'baga, lakiini ma tö'dö toolona kadu no indhigü i'i no.

## 10

*Almasiihi agirri ta unggodho ka üüdü ma kadu nye'de*

<sup>1</sup> Seriye i'i yungngo a koronggore ma eema tiya a'diila ya unggunu tö'dö ya taalo tumma ma timin'da eege kamiini ka eyi tiya eene. Nggeege taalo kara tambaanya a türri tanno miini no neene kara talinggo a nagürüünü ma tanangnga tanna ka Masala kete iini

no kada dhorro. <sup>2</sup> Üürü nggeege, eege taalo tagussu ka nanggeedi ma tam'baga afe'de ana türri töödhü nye'd'de? Kudumma kadu tanno ümmü Masala no kara ta tanggala ka tatoroko tanno eene, ta unggodho, lakiini tagussu aleefe tanna kene ka nanggeedi tatoroko tanno eene ka talinggo no. <sup>3</sup> Tumma ma türri tanno ö'dö kama tagiigü ma tam'baga ma nagürüünü <sup>4</sup> lakiini eriidö ma nagodha nja nakoromo taalo kara tambaanya tagala tam'baga.

<sup>5</sup> Nggeege yungngo Almasiihi ka tiki a Masala kini ka ndakete köö'dö ka 'büdhülü, iki,  
"Taalo o'o nasaasa türri nja eema ma taraana,  
lakiini nagalinggo ada o'o tuu'da a'a.

<sup>6</sup> Taalo o'o nadhodho kudumma ma eema ma eriidö nye'd'de kagu'dudene ka müsi ma türri alla türri ma tagala tatoroko.

<sup>7</sup> İkiri a'a ka tiki, 'Ka Masala a'a nungngo nara tö'dö, nö'dö talinggo linggo nüüdü  
afa ma sorne ka teema tumma ma a'a kungngó.'

<sup>8</sup> Iki ka dhidha, "Tirri nja eema ma taraana nja tiya agu'dudene ya, ka müsi ma türri ya, nja taradene ma ta'duga tatoroko ya, taalo o'o nasaasa, o'o taalo na dhodho meene," a'da seriye asaasa eege katalinggo

adene. <sup>9</sup> Afada iki, "A'a nungngo nara tö'dö talinggo linggo nüüdü." Naadha ka linggo tanno dhidha no ara ka talinggo na asigi kide no. <sup>10</sup> Kudumma ma maraada ka küünidene, angnga kada insili ana Yasu Almasiihi ya tuu'da tanno iini ka takirri iini ta unggodho.

<sup>11</sup> Ta'boge ma Yahüüdü a'düngnge ana ko'do ma tara eema ma eriidö ka eyi tiya eene a naguuru, eege taalo kara tambaanya ta'duga tatoroko. <sup>12</sup> Lakiini ka ta'boge tiya ka türri a naguuru in'dili ma ta'duga tatoroko ya, emmi ka niisö ma kuri tanno Masala. <sup>13</sup> I'i 'bitingngö indhigü Masala a'da manangnga diidi minni kini ka uune ka teene. <sup>14</sup> I'i anangnga kadu niini ka anangnga eege ka tinsili ka'diila ta'billi a türri ka unggodho.

<sup>15</sup> I'i yungngo a Koronggore tiya Insili ya ka tirina angnga afe'de iki a'da,

<sup>16</sup> "Uugaara iki, Timi'di tumma no eege kungngo eede kara tami'daana nja eene, nagürüünü no, ara tö'dö no.

Ara a'a a'a tanangnga seriye yeede kene ka nanggeedi, narigiri ada kene ka nanggüüdü."

<sup>17</sup> Iki afe'de, "Taalo a'a nara tagiigü tatoroko neene nja tam'baga tanno eene afe'de."

**18** Ka tatoroko kara ta'dugadene nye'd'de kungngo ya, taalo nüümö ma türri ma tatoroko afe'de.

*Tumma ma tidhi oona ku'bu*

**19** Nggeege nagöre eede, kamma angnga dhorro ma tara co 'buugu tiya Insili dhindho ya ana eriidö tiya Yasu. **20** Ndama fiini ya issi ya efe ka 'di ya, afa'danja angnga a ten'di tammo a tuu'da tanno iini. **21** Kudumma ma ta'boge ungngo aja idhindhi afa ka 'di ma Masala, **22** kada kete ka Masala ana eedi ma timin'da a tamma nye'd'de, a nanggeedi ka tinsili a'da taalo nüümö ya toroko ya kide, a tuu'da naaja tagoodene a 'büüdi tiya insili ya. **23** Kada kafa ka tündhigü tanno aja ka teema no, angnga tafa takeele ka riifö, kudumma Masala madho ka fiini ka tumma tanno oono ka teema no. **24** Kada kafaana ka oona, angnga tagamünüğü njaana ko'do a tasaasa ajeene nja linggo tanno a'diila no. **25** Aaga fa tarumeene ka tamii mi ma teema afa ma kadu könö ana kada kalinggo, lakiini aaga amünüğü njaana ko'do dhidhdha afa maada ka tussu a'da asa uuru ma Masala takete kungngo.

**26** Üürü kagüünü angnga tam'baga ndama eyi tiya aja, ara angnga taluna tussu eema ma timin'da, taalo türri ma eriidö kara ta'duga tam'baga ka kadu ka oona.

**27** Lakiini tündhigü ma ri'ba ma uuru ma Masala kara tümmü kadu mamana ka issi kinyogo kadu na diidi Masala no. **28** Ömö'di ya anu ka tumma tanno Müüsa ya, ara teyi a'da taalo 'bangnga miini kide a kadu keera katadinö kide nja eene ka tiidoona. **29** Kiki aaga nya, ara tapusu adene na ömö'di tiya asiraana ka 'Bii'bala ma Masala ana uune, ya agüünü midhi ku'bu ana i'i afa nüümö tiya taalo insili ya, eriidö ma tamin'di tumma tanangnga i'i ka tinsili, i'i ya ageela Koronggore ma türü ya? **30** Kussu angnga ömö'di ya iki, "Ta'diinö kungngo eede, a'a nungngo nara tümmü kadu." Iki afe'de, "A'da Uugaara assa kara tümmü kadu niini." **31** Am'ba ka ömö'di tiya ara ta'dingga ka Masala tammo efe ka 'di mo ka nüsö.

**32** Aaga kiigü naganuuru na dhidhdha no, ada ka tadhügürü aaga takakardha ku'bu a'da asa aaga tagussu fiini ma töyeene. **33** A kadu tagalinggo aaga, keela aaga ka naguuru töccö asa aaga ta ungodho nja kadu tanno agalinggo adene nggeege no.

**34** Kosso aaga ka dhügürü nja kadu ma pabuusu, ana eema tiya ada ka'dugadene ya kakidhi aaga oona ku'bu a dhodho kudumma ada ka tussu a'da eema ungngo ada adhabbu ara taneene ta'billi. **35** Aaga fa tari'ba kudumma eene kara tö'dö a talingnge kadhabbu. **36** Aaga idhi oona

ku'bu amang kada talinggo linggo na Masala aaga taluna timi'di tumma noono.

<sup>37</sup> Sorne iki, "Kudumma iini kete kungngo ara tö'dö areere,

taalo ara tadoono ku'bu.  
<sup>38</sup> Ömö'dü ya a'diila ka eedi ya tefe ka 'dü a tamma.

A kini kara tapadaga oona keere afe'de ya,  
taalo a'a nara tamma kini."

<sup>39</sup> Taalo angnga ka kadu na padaga oona keere kaaya no, lakiini kadu na amma koolonadene no.

## 11

### *Tamma ka Masala*

<sup>1</sup> Tamma ka Masala a'da ussu a'da niümö yaaja tündhiögü ya, angnga tamma ka niümö tiya aja ka titalo kijöögö ya. <sup>2</sup> Tamma na kadu ma 'billi ka anangnga Masala ka tamma kene.

<sup>3</sup> A tamma kussu angnga a'da Masala marü'bü 'büdhülü a tumma, manangnga niümö ya ijidene ka titalo ijidene. <sup>4</sup> A tamma Habiil ümmünü eyi yiini a Masala kada niümö ma türri a tagii'bi türri na Kayiin, a Masala tamma kini a tamma a'da ya insili oono ka tamma ka niümö ma türri tiya iini, aleefe teema a tamma a'da eyi.

<sup>5</sup> A tamma Masala ma'diniga Akanuk kono ka 'dotombo'do a'da taalo iji inde, taalo ömö'dü ma taluna i'i kudumma Masala

ka ta'diniga i'i kono ka 'dotombo'do. Kini ka tüfürü co 'dotombo'do ya, iki sorne a'da Masala mamma kini. <sup>6</sup> Lakiini üürü taalo tamma ma Masala, taalo Masala mara tamma ka ömö'dü tiya taalo amma kono a'da oogo ma tefe ka 'dü mamana eema a kadu tanno asaasa oogo dhorro no.

<sup>7</sup> Tamma eege kungngo kanangnga Nööh ka taföönyö tumma na Masala ma eema tiya unggunu tö'dö ya a'da taalo ijöögö, a ri'ba tümmü atarü'bü mürkabü ma toolona kadu ma 'dü tiya iini. A tamma tanno iini agümmünü kadu ma 'büdhülü akarna ka ta'diila tanno ö'dö a tamma no.

<sup>8</sup> A tamma ka anangnga Abrahiim ka föönyö tümmüneene na Masala, unggene aco anya tammo Masala ka tiki iini akarna kide mo, ö'dö kürö ndama iini unggene taalo ussu kita iini kara co ya. <sup>9</sup> Tamma ka anangnga i'i ka tanna ka 'büdhülü tiya Masala ka tiki iini akarna kide ya, afa tajeene adaganna ka angga nja Ishak nja Yaguub, eege no osso ka tumma tanno unggodho ya. <sup>10</sup> Kudumma iini ka takindhiögü anya ma kadesse ma Masala ka tarü'böönö ma takindinaanogo mo.

<sup>11</sup> Tamma eege kungngo ka anangnga Abrahiim kanda inggiyö a Sara ka

eyi tiya oono ma mele, anangnga i'i kada pupa, kudumma iini ka tümmü i'i ka'diila ada imi'di tumma.<sup>12</sup> Madageene ka ömö'di unggodho anda kete ka teyi, kadaada kadhabbu ököje nja midigi ma 'dotombo'do ököje nja ndamugu ma tinggini ma to.

<sup>13</sup> Kadu no ïn'dili kaaya ka tamma tanno eene a'da taalo kaduna niimö ya Masala ka tadirina eene ya, lakiini kijöögö ndama ku'b'ba kamma kide kussu a'da eege ka kajeene ka 'büdhülü.<sup>14</sup> A kadu na eema tumma no, kussu adene tumma neene a'da eege kawwa anya ma eyi tiya eene. <sup>15</sup> Kene kara tagiigii 'buugu yeene ka öö'dö kürö ndama iini ya, kara taduna fiinii ma tafada. <sup>16</sup> Lakiini eege 'bitingngö kawwa anya ma 'diila mo ka 'dotombo'do, yungngo a Masala taalo mara tana modolo ma ta Masala tammo eene kudumma oono mungngo mindinaana anya eene.

<sup>17</sup> A tamma kafa ka Abrahiim ümmünü 'bii'bala yiini ya unggodho ya Ishak ka tatendhe ma tırri ka Masala ka asaasa tussu eedi yiini. Abrahiim ümmünü i'i a Masala a'da i'i yungngo Masala ka tirina tumma tami'daana iini. <sup>18</sup> Yungngo iini katiki iini, "Ara kadaada tanna küdü kadhabbu ana Ishak."<sup>19</sup> Abrahiim iki kide a'da Masala ma ambaanya

tiji kadu ka inde, afeene afa Abrahiim afada a 'bii'bala tiya iini ka inde.

<sup>20</sup> Tamma ka anangnga Ishak ka anangnga baraka a Yaguub nja Iiso ma eema tiya ara tö'dö ka'diila ya.

<sup>21</sup> Tamma ka anangnga Yaguub ka anangnga baraka a laala tiya Yüüsif kini ka ndakete ka teyi, üürü kidha ma Masala amang kini ka anangnga oona ka kuufi ma tino tiya iini.

<sup>22</sup> Tamma ka anangnga Yüüsif ka tirina eema ma laala tiya Israyil, kini ka ndakete ka teyi ma tö'dö kürö tanno eene ndama Misiri adirina kita eene kara co tatü'bü i'i kide ya.

<sup>23</sup> Tamma eege kungngo ka anangnga pupa ya Müüsa nja niimö tammo iini kini ka tageenedene, kaküdhü i'i a nagatereeene kiidoona, kudumma eene kiji 'bii'bala ka'diila kitaalo kari'ba a tumma tanno uugaara ma Misiri.

<sup>24</sup> Tamma ka anangnga Müüsa kini ka ndasere aanu kada 'bii'bala tiya 'badaada tammo Faröön.<sup>25</sup> Amma ka tosse ka dhögürü nja kadu tanno Masala, anu ka eema ma tanangnga i'i ka tüünü tam'baga ya.

<sup>26</sup> Amma ka tamidhidene ma Almasiiji ara kaanu ka almaala ma Misiri ya tündhi ya, kudumma iini ka tussu a'da ara i'i sa kaduna talıngnge.<sup>27</sup> A

tamma akunggeene Müüsa ka Misiri a'da taalo ari'ba a tagoroo'bo ma uugaara ma Misiri, i'i ya idhi oona ku'bu kudumma iini kiji ömö'di ya taalo ijidene ya.

<sup>28</sup> A tamma agalinggo adene Taanyara ma tada'da ka eriidö tiya asananja ku'bu ya, ii'di tadhangga ma inde tümmü laala ma Israyil ya dhidha ka oona.

<sup>29</sup> A tamma kungngo laala ma Israyil ka tada'da to ma Dhöyö mo afa moono ka rume kungngo, yungngo a kadu ma Misiri kasaasa tada'da ka'duuru 'biidi.

<sup>30</sup> A tamma ka anangnga ndhiidhö ma Ariiha ka tarüdü, a kadu ma Israyil ka tagu'daana oogo ko'do a füngngö iidümmü afünü eera.

<sup>31</sup> A tamma ka konjoko Rihab ma madatemelö mo taalo magiididene nja kadu tanno oroko na taalo kaföönyö eema no, kudumma oono ka tafa ka kadu ma ünggü ma Israyil.

<sup>32</sup> Ara a'a tiki nya afe'de? Taalo fiini eede ma tadirina tumma ma Jadaon nja Baarak nja Samsüün nja Yaftah nja Dawud nja Samwiil nja nagane'bi.

<sup>33</sup> A tamma neene kagii'bi kageema koro'bo nja kadu ma naanya, kadagii'bi eege, kadagalinggo ta'diila, kaduna niimö ya Masala ka tiki ya, keere ka naniinö ma agaamu.

<sup>34</sup> Kadadhüü

nagonggo'do ma issi, katulu'bi ka tagirinadene a kulu'ba, kadagii'bi tagi'di neene, kana türü ka koro'bo kadagii'bi nasigira ma nadiidi neene.

<sup>35</sup> A tamma ka anangnga iiya ka'duga kadu neene na aaya no katafiki'dö, anno takapusu adene kanu ka tamma ka tonjokodene amang kene taluna tafiki'dö na 'diila no.

<sup>36</sup> A könö tabbü adene kadagüünii midhi ku'bu ana eene nja könö afe'de timi'didene a nagili nja tanna ka pabuusu.

<sup>37</sup> Eege ka tadiidiridene a niigisi, kadhagaana eege ku'bu teera, kagirina eege a magulu'ba, kunggeene ana orogo ma kidheefele ka oona nja orogo ma ki'biini ka oona, küünii ada eege ku'bu, küünii tatoroko ana eege, küünii midhi ku'bu ana eege.

<sup>38</sup> 'Büdhülü 'do taalo yeene kalööle ka dhiile nja na'dikinya nja kubumba nja kijeene ma 'büdhülü.

<sup>39</sup> Kadu no in'dili kagamma kene kudumma ma tamma tanno eene, lakiini taalo könö ana kene ka'duga niimö ya adirinja eene ya.

<sup>40</sup> Kudumma Masala ka tindinaana niimö ya a'diila angnga adagii'bi yeene, masaasa a'da kafa tunggeene unggodho eege illi nja angnga.

## 12

Masala malaana laala yoono

<sup>1</sup> Nggeege kaku'du talüögü angnga ka oona ma kadu tanno adinö kide no, angnga tadhifi eema ya indhi ya toroko nye'd'de ya amma'da kaja ka oona ya, fa kaja angnga tagiisö a tidhi oona ku'bu ya dhonggoro kaja kidha ya. <sup>2</sup> Kada kigigi iye ka Yasu, i'i ya Uugaara ma tamma tiya aja tatiimö tamma naaja ya, akambaanya tümmöönö ma salii'bi ya taalo modolo magu i'i, kudumma dhodho tanno indhigü i'i no, ikirü ka temmi ka niisö ma kuri tanno kööyö tiya Masala. <sup>3</sup> Aaga agiigü ka ömö'dü tiya adhügürü adakidhi oona ku'bu ma eema tiya kadu tanno oroko no ka takirimi i'i ya, ii'dü aaga tanggaaga tagi'dü kide keere, aaga taadha.

<sup>4</sup> Ka ta'beene tanno ada ma tanu ka tam'baga, taalo aaga kala 'buugu ma tuuru eriidö co. <sup>5</sup> Küürü aaga ma tumma tafünügü ko'dü tanno Masala ka tagadünügü aaga kada laala no,  
"Fa tamidhi talaana na Uugaara, bii'bala eede, o'o tafa tagi'dü kini ka teela o'o.

<sup>6</sup> Kudumma ömö'dü tiya Uugaara ka asaasa i'i ya, malaana i'i, mabbü ömö'dü yoono ka asaasa ya."

<sup>7</sup> Aaga ümmünaana oona ka talaana kudumma ma linggo anangnga aaga kada laala tiya oono.

'Bii'bala inggide a pupa tiya iini ka titaalo alaana i'i? <sup>8</sup> Üürü aaga taalo kalaadene nye'd'de kada laala tiya oono ya, nggeege aaga ka laala ma nyoro. <sup>9</sup> Üürü kafaafa ma angnga kalaana angnga, angnga tari'ba angnga taföönyö tumma neene, taalo angnga taföönyö tumma na Pupa tiya aja ka nagoronggore adha, amang kaja taduna tefe ka 'di? <sup>10</sup> Kafaafa ma angnga kakalaana angnga a naguuru kadhilli a tussu kide tanno eene, lakiini Masala malaana angnga ma ta'diila ma eyi tiya aja amang kaja tosso ka tinsili tanno oono. <sup>11</sup> Aja ka taleefe a talaadene ya, angnga tagoroo'bo taalo dhodho, lakiini keere kungngo a kadu na kalaadene no saga taduna talängne ma ta'diila miini.

<sup>12</sup> Nggeege aaga 'dinigi iisine naada na ki'dü no coo'dü, aaga tafa ka uune tanno ada na 'deedene no ka kihö. <sup>13</sup> Aaga unggeene ka fiinü ya dhidho ya, ii'dü ömö'dü ya sogo'dü ya taser'de lakiini a'diila.

### Aaga fa tanu ka Masala

<sup>14</sup> Aaga kardha ku'bu aaga ta'diila nja kadu nye'd'de, aaga taneene taneene na insili no, kudumma ömö'dü tiya anu ka tinsili ya, taalo ara tiji Uugaara. <sup>15</sup> Aaga adinö ko'dü anggaaga ömö'dü tüünü ada eyi yiini

ku'bu afada ka türü ma Masala, aaga fa tafeene nya tiya taalo a'diiri, ya aga'da taneene anangnga kadu ka toroko nye'd'de.<sup>16</sup> A ömö'dü öccö ana kada tafa tatemelö afa taa'baga afa Iiso ya adanege ana baraka ma 'bii'bala tiya dhidhdha ya a kuri unggodho.<sup>17</sup> Kussu aaga afe'de a'da kini ka asaasa ta'duga baraka ya pupa tiya iini, i'i taalo aduna fiinii ma taadha ka tatoroko a'da i'i agasaasa baraka a fara ka iïye.

<sup>18</sup> Taalo aaga kakete ka 'dikinya ma Siina, aaga tümmü oogo ka oona ana issi ka finne ana ndüüli nya tadhüigö nya tanya tiya iïsö dhindho no,<sup>19</sup> fara ma tñiidö a tumma ma kadu tanno toodo kide no, kitaalo kasaasa taföönyö tumma afe'de.<sup>20</sup> Lakiini kudumma eene taalo ka kambaanya eema ya adirinja eene ya, "Salla niimö ma eriidö saga taada anya ka oona mara türidene meyi."<sup>21</sup> Eema ya ijidene ya ari'ba 'do salla Müüsa ka eyi tiya iini iki, "Kagu ri'ba a'a na'deedene ka oona."

<sup>22</sup> Lakiini kakete aaga ka 'dikinya ma Sahyün, ka anya ma Masala ma efe ka 'di mo Örsaliim ma 'dotombo'do, nya kadhangga kö'dö aaga na alif kadhabbu aaga tünni taanyara.<sup>23</sup> Co kaniisa ma kadu tanno ageenedene ka dhidha no, nagareene tanno eene ka

takiridene ka 'dotombo'do no. Kö'dö aaga ka Masala ma tahükümü kadu nye'd'de no, ka nagoronggore ma kadu tanno a'diila no na tümö nye'd'de no.<sup>24</sup> Ka Yasu ya anna ka söödö ma timi'di tumma ma 'bitingngö no, eriidö ya asananja ku'bu ya agii'bi eriidö ya Habiil ya.

<sup>25</sup> Aaga adinö ko'do kudumma ada kara tanggaaga tanu ka ömö'dü tiya eema a tumma ma Masala ka 'büdhülü. Üürü taalo kadulu'bi ka tapusu adene, angnga sa kara tadulu'bi nya kaja kara tapadaga keere ka tumma ma ömö'dü tiya eema ndama 'dotombo'do ya?<sup>26</sup> I'i yungngo a tumma tanno oono ka tagi'dü 'büdhülü koona ka uuru tanno miini no, lakiini 'bitingngö akageema nya angnga iki, "Ara a'a tagi'dü 'dotombo'do koona taalo 'büdhülü unggodho i'i afe'de."<sup>27</sup> Tatiraana niini a'da, "Ta unggodho afe'de," nussudene a'da eema ya arü'bü adene ya ara tatänggi'dü itaalo, ara ya taalo tatänggi'dü ya a tüütü.

<sup>28</sup> Nggeege angnga tamana ta'diila a Masala kudumma aja ka taduna tauugaara na taalo ka'digi'dü ajeene ka oona no, kada amana ta'diila angnga tagamma ka Masala a ri'ba a tinsili ma eedi na Masala ka tamma kide no.<sup>29</sup> Kudumma "Masala tammo aja oogo ma issi tanno afinne eema."

## 13

*Talaana na eere no*

<sup>1</sup> Aaga tasaasa ajeene ma tanagöre. <sup>2</sup> Aaga fa tüürü ma kajeene, nggeege kadu könö kagüünü tatafala a kadhangga a'da taalo kussu. <sup>3</sup> Aaga kiigi tumma a kadu tanno ka pabuusu no, afa maada ka tanna ka pabuusu nja eene kungngo, aaga tagiigi kadu na pusudene no afa maada ka tapusu adene ka tuu'da kungngo.

<sup>4</sup> Fa ka kadu nye'd'de kümmü tarna dhorro kafa kide, a 'buugu ma füngngö ma tanyuri tinsili, kudumma Masala mara saga tapusu kadu na oroko no nja katemelö. <sup>5</sup> Aaga fa tasaasa almaala kada niimö tiya agu'daana ya, aaga tamma ka tiya ungngo kada ya, kudumma Masala ka tiki, "Taalo a'a ara tüürü ma o'o nitaalo nara tafa küdü." <sup>6</sup> İkiri angnga kara tagamma, angnga takiki, "Uugaara mafa kede taalo a'a nara tari'ba, ara ömö'di tüünü minna ana a'a?"

<sup>7</sup> Aaga kiigi katalaana naada na tünügü tumma ma Masala aaga no, aaga iiri eege kaganeene nya kaaya nya aaga kinyi tümmü Masala neene. <sup>8</sup> Yasu Almasiihi i'i ya miini ka ooso ana uuru tanno nja ta'billi. <sup>9</sup> Aaga fa to'd'do ka tatoroko keere ma talaana tanno eefe kada tonggoonyo,

ara ta'diila adha ada kara takidhö ka nanggeedi a türü, taalo kuri ma tamasaladene ya taalo tö'dö keere a niimö a kadu tanno akuri no. <sup>10</sup> Misii ma tirri mungngo aja taalo ama ma ka'boge tanno alinggo ka fangga kaguri kide. <sup>11</sup> Kudumma eema ma eriidö ya uugaara ma ka'boge kaco iini ka 'Buugu tiya Insili dhindho ya, kada tirri ma eema tiya toroko ya, lakiini tuu'da ma eema ma eriidö ya katinyogo kürö ma 'booro. <sup>12</sup> Yungngo a Yasu ka teyi kürö ka inye maanya, amang kini taagala kadu ka oona ana eriidö tiya iini. <sup>13</sup> Kico aago kini kürö ka 'booro, angnga tosso ka modolo miini. <sup>14</sup> Taalo anya ma öreeene ka 'büdhülü kide, lakiini angnga kasaasa anya mara tö'dö mo.

<sup>15</sup> Kadafünügü eere ya Masala ko'do turi kungngo, a tirri ma tafünügü ko'do ana eere ma Yasu ana naniinö tanno aja. <sup>16</sup> Aaga fa tüürü ma linggo tanno a'diila no, aaga amünügü njaana ko'do, nggeege afeene nja eema ma tirri ya Masala ka tamma kide ya. <sup>17</sup> Aaga aföönyö tumma na naguugaara tanno ada, aaga tamma ka tumma tanno eene. Kudumma eene ka tinigöögö ma aaga afa ma Masala ka anangnga eema eene. Aaga aföönyö tumma neene amang kene talinggo a dhodho, taalo a müürü üürü eege kalinggo a müürü,

taalo kara tö'dö keere a  
niimö.

<sup>18</sup> Aaga fara ka Masala kudumma ungngo. Kussu ungngo tinsili ma nanggeedi tanno iidii, kasaasa ungngo tüünii eema ya a'diila ya turi. <sup>19</sup> Nasaasa a'a tumma no kada 'do aaga tafara ka Masala, amang ka Masala tapadaga a'a kada kanna areere.

<sup>20</sup> Masala ma ta'diila mafiki'dö ndama inde ana eriidö ma tafi'di tumma turi ta'billi, tadasaana ma kidheefele ya dhabbu ya Uugaara yaaja Yasu. <sup>21</sup> Manangnga aaga kada kadu dhorro, aaga talinggo linggo ma eyi tiya oono ka eema nye'd'de ka'diila malinggo kaja, moono ka tamma kide ana eere ma Yasu Almasiihi ya idhindii ta'billi turi. Amiin.

<sup>22</sup> Nasaasa aaga nagöre eede, a'da aaga tidhi oona ku'bu kudumma waraga tiya eede ya ma tafünügü ko'do, kudumma eede ka tarigiri ada aaga taalo adhonggoro.

<sup>23</sup> Nasaasa aaga aaga tussu a'da örre yaaja Timosaws kapa kini ndama pabuusu. A kini ka tö'dö areere ara a'a tö'dö nja eene ma tassa kada. <sup>24</sup> Aaga ööjülü kadu no alaana aaga no nye'd'de nja kadu ma kaniisa nye'd'de. Kadu na ka Italiya no kööjülü aaga. <sup>25</sup> Fa ka türü tanno Masala ka neene nja aaga nye'd'de kungngo.

## Waraga ya Yaguub Tafa'da tumma

Yaguub arigiri sorne ya, örre ya Yasu könö i'i ya miini ya aga uugaara ma kaniisa ka Örsaliim. I'i arigiri ada co kadu ma kaniisa tanno agasananja ku'bu ndama Örsaliim kaco anaanya kadhoonyo no.

Tumma na Yaguub ka asaasa ndama sorne tiya, iki a kadu ma kaniisa a'da tamma ka Almasiihi neene asaasa kadu kijöögö kadalinggo adene nja taneene neene na a'diila no. Yungngo iini ka teema nja eene a'da kindinaana taneene ku'bu, ta'dinigi oona coo'do, titaalo ma eema, tallogo, temelö, ta'b'badene, ta'digineene. I'i afe'de eema tumma ma tinsili, tiicolo, tafara ka Masala, tidhi oona ku'bu, nja ta'dara ka taneene ma kadu ma kaniisa.

### Tööjülu

<sup>1</sup> Waraga ö'dö ndama Yaguub ya ömö'dii ma linggo ya Masala nja Uugaara Yasu Almasiihi ööjülü siliga ma Israyil na ö'dö kada'baaga kafünü eera no na asanajaana ka na'buugu koona nye'd'de.

*Tamma ka Masala nja  
tussu eema*

<sup>2</sup> Aaga ümmöönö ka tadhodho, eege kamiini ada kara ta'dingga ka

ta'b'badene ka dhoonyo ya. <sup>3</sup> Kussu aaga a'da ta'b'baana ma tamma naada kara tanangnga aaga ka tidhi oona ku'bu. <sup>4</sup> Amang kada tussu a'da tidhi oona ku'bu naada kümmünü aaga ka tino ka linggo tanno dhorro no, amang kada tadhorro ka eema in'dili a niimö könö tafa titaalo. <sup>5</sup> Üürü ömö'dii öccö ana kada taalo ussu eema ya, fa kini arangnga Masala manangnga iini, kudumma Masala mamana eema a kadu dhabbu a'da taalo mana hetti. <sup>6</sup> Lakiini fa kini arangnga a tamma ma eedi dhorro afa talolo ka eedi, kudumma ömö'dii tiya aloolo ka eedi ya afeene nja 'biidii ma to a tanya kara tiisö iini alumuli ajeene. <sup>7</sup> Ömö'dii ya afiigi nggeege ya tafa tiki kide a'da ara taluna niimö ka Masala. <sup>8</sup> Ömö'dii ya eedi ka teera kini ya, ara tadhügürü ka eema in'dili kungngo.

### Ömö'dii ya üüsü ya nja tadhoogo

<sup>9</sup> Fa ka ömö'dii tiya ii-collo ka eedi ya, adhodho ka tumma Masala ka 'dinigi i'i coo'do. <sup>10</sup> Kudumma ömö'dii ya üüsü ya iiocolo ka eedi ya, afeene nja tuli ma ooyo tiya arume ya. <sup>11</sup> Ndanaaya ka tö'dö ko'do a tagu'daana miini ya, ooyo tatinyogo a tuli miini tasusuli a ta'diila miini titaalo. Ömö'dii ya üüsü ya ara tatinyogo nggeege iini ka takiiraada ka linggo tanno iini.

*Dhügürü nja ta'b'badene*

<sup>12</sup> A'diila nja ömö'dü tiya idhi oona ku'bu ya ka uuru ma dhögürü ya, kudumma iini kara tö'dö kürö ka ta'b'badene ya, aduna talıngnge ma tefe ka 'dü afa ma Masala ka takadirina a kadu tanno asaasa oogo no kungngo. <sup>13</sup> Ömö'dü kara ta'b'badene taalo ömö'dü ma tiki a'da, "Masala ma'b'ba a'a." Kudumma Masala taalo ma'b'badene ka tatoroko, mitaalo ma'b'ba ömö'dü. <sup>14</sup> Lakiini ömö'dü a'b'badene ma eyi tiya iini kini kara ta'b'badene a tafilli ma tatoroko ma eyi tiya iini. <sup>15</sup> Aga tafilli kara tagüröönö, keene tatoroko, aga tatoroko kara tinggiridene kadhabbu ya keene inde.

<sup>16</sup> Aaga fa taama nanggeyi naada nagöre eede neede ka asaasa ana eedi dhorro no. <sup>17</sup> Niimö ya ananja ömö'dü ka'diila nja niimö tiya adigine ya, ndama ta'doogo, öö'dö ku'bu ndama Pupa ma töyeene ma 'dotombo'do, taalo tatenggere afa töyeene ka tino tanno eene. <sup>18</sup> Oogo mageene angnga ndama eyi tiya oono a tumma ma timin'da amang kaja ta kadu tanno eema tiya ö'deene ka dhidha ya yoono ka tarü'böönö no.

### *Aaga toodo kide aaga talınggo iini*

<sup>19</sup> Amang kada tussu tumma nagöre eede, aaga 'digi tatoodo ka tumma areere, aaga adoono ku'bu ka tumma, aaga tafa tagoroo'bo areere. <sup>20</sup> Kudumma ömö'dü tiya

agoroo'bo ya, taalo ara talınggo niimö ya a'diila ya kidha ma Masala. <sup>21</sup> Aaga aadha ka tumma tanno anyoro no nja eema tiya a toroko ya nye'd'de kungngo, aaga ümmünü eyi yaada ka tumma tanno Masala ka anangnga aaga no, na ara tambaanya toolona aaga no.

<sup>22</sup> Lakiini aaga fa töödhü ka tatoodo ka tumma ma Masala a'da taalo aaga kalingngo iini nggeege, ara aaga tiisini nanggeyi naada. <sup>23</sup> Ömö'dü ya aföönyö tumma assa ka titalo alinggo iini ya, afeene nja ömö'dü tiya asala koronggore ma dhugudha tiya iini ka almandara ya kungngo. <sup>24</sup> Assa ka oona tanno iini unggeene, arooro ka tüürü miini areere taalo ussu a'da ka faanya. <sup>25</sup> Illi ömö'dü ya adinö ka seriye tiya dhorro ya, seriye ma tahürra alinggo iini turi ya, itaalo aföönyö üürü, lakiini alinggo iini ara baraka tananja iini ka linggo tanno iini ka talınggo no.

<sup>26</sup> Ömö'dü ya iki a'da i'i ya amma ka Masala assa ka titalo ümmü onggo'do miini ya, iiisini eyi yiini, a tamma niini ta tumma taalo kadho ka fiini. <sup>27</sup> Tamma ma Masala na insili na 'diila kidha ma Masala Pupa yaaja no eege kungngo, a'da ömö'dü tafa ka nagüülö nja iiya ma nagüümé ka dhögürü tiya eene, aafa ka oona tanno iini, kudumma eema ma 'büdhülü tiya nyoro ya.

**2**

*Aaga fa tasaasa kadu a'da  
aaga taanu ka kadu tököönö*

<sup>1</sup> Nagöre eede, kamma aaga ka Uugaara tiya aja Yasu Almasiihi ya Uugaara ma tüdhindhi ya, aaga fa tasümünaana kadu ku'bu.  
<sup>2</sup> Üürü ö'dö ömö'di ma almaala ka 'buugu ma temmi tiya ada, a dahaba ka ungngo iini ka 'banüsö ana en'di tiya agu'daana ya ka oona, ömö'di ya tadhoogo ya tö'dö ana en'di tiya arodo ya ka oona ya.  
<sup>3</sup> Aaga tasala ömö'di ma en'di ka'diila ya, aaga tanaana iiye kini, aaga tiki iini, "Emmi kita." Aaga tiki a tiya anyoro ka en'di ya, "Öödhi kaana," nja üüdü ka tiki a'da, "Emmi kede ka uune kita."  
<sup>4</sup> Taalo aaga kambanaana kadu ku'bu sa? Aaga tümmü nanggeyi naada ka tanna ka uugaara ma nanggeedi tanno nyoro no?

<sup>5</sup> Aaga toodo kide nagöre eede, taalo Masala magesse kadhoogo ka iiye ma kadu ma 'büdhülü amang kene tüüsü a tamma ka Masala kakarna ka tauugaara tanno Masala ka tadirina a kadu tanno asaasa oogo no?

<sup>6</sup> Aaga kadaana kadu na kadhoogo no kalama. Kamada eege kungngo küünü ada aaga ku'bu kükkü aaga kamana aaga kidha ma naguugaara, taalo kadu ma almaala eege kamiini?  
<sup>7</sup> Taalo eege kungngo keela

eere ya a'diila ya ada ka tümmöönö ya?

<sup>8</sup> Üürü kalinggo aaga a tumma ma seriye ma tauugaara afa ma sorne ka tiki a'da, "Asaasa ömö'di ya akete küdü ya afa müüdü ka asaasa eyi yüüdü kungngo," kungngo a'diila ada ka tüüni nggeege.  
<sup>9</sup> Lakiini üürü kasaasa aaga ömö'di öccö, ara aaga tüüni tatoroko, a seriye tümmü aaga, tümmöönö ma kadu tanno asilli eema no.  
<sup>10</sup> Ömö'di ya alinggo a tumma ma seriye nye'de de ya, assa ka taga'da 'dakeyi miini unggodho ya, i'i agüünü tam'baga iini in'dili kungngo.  
<sup>11</sup> Kudumma ömö'di tiya iki a'da, "Fa tatemelö," iki a'da, "Fa tagirina afe'de." Üürü nagiidi o'o ömö'di nitaalo natemelö, o'o naga'da seriye.  
<sup>12</sup> Aaga eema, aaga talingga afa kadu no Masala kara tümmü eege ana seriye ma hurra no.  
<sup>13</sup> Kudumma Masala taalo mara tana 'bangnga kono kara tümmü kadu no taalo kana 'bangnga no, lakiini 'bangnga mara tii'bini ka tahükümü.

*Tamma ka Masala nja linggo*

<sup>14</sup> Minna i'i yungngo a 'diila nja ömö'di nagöre eede, iini kara tiki a'da amma i'i ka Masala asa kitaalo alinggo iini, tamma afa ma tanno miini no kara toolona i'i?  
<sup>15</sup> Üürü örre ungngo ada, a en'di ka

titaalo kini nja ïnye maada a en'di ka titaalo kono a kuri titaalo kene.<sup>16</sup> Tumma naada kara tadirina eene no kara tö'dö a minna eene, "Unggeene a ta'diila aaga co taküdhü oona a ten'di, agu'daana kada ka oona aaga taguri," üürü aaga taalo kanangnga nüümö ma tefe ka 'dii eene.<sup>17</sup> Tamma ma Masala ka fiigi nggeege, üürü taalo linggo kide ara teyi.

<sup>18</sup> Üürü ömö'dii öccö ana kada iki, "Tamma kungngo üdü a linggo kungngo eede." Nikirii a'a ka tiki iini, "Ala tamma nüüdü a'a ka tafaanya a'da kitaalo linggo, ara a'a kala o'o a'da ara tamma neede tafaanya nja linggo tanno eede."<sup>19</sup> Namma o'o a'da Masala ma unggodho. A'diila nggeege. A nagana'bu afe'de kamma kono nggeege ka'deedene ka oona.

<sup>20</sup> Ka 'baga, nasaasa o'o tessu a'da ara tamma ta'döngngönyö a'da kitaalo linggo kide nya?<sup>21</sup> Aaga assa ka pupa tiya aja Abrahiim, taalo Masala manangnga i'i ka 'diila ka linggo tanno iini, iini ka a'duga 'bii'bala yiini Ishak ma teedhe i'i ka misi ma tirri?<sup>22</sup> Kijöögö aaga tamma niini ka unggene nja linggo tanno iini, a tamma niini tatiümö a linggo.<sup>23</sup> A tumma na sorne tö'dö dhorro, "Amma Abrahiim ka Masala, a Masala tanangnga ta'diila ka tamma tanno iini," a Abrahiim tana eere a'da teefe ma Masala.<sup>24</sup> Kijöögö aaga 'ba, ömö'dii

ara toolonadene a linggo taalo a tamma tanno iini unggodho eege.<sup>25</sup> A Rihab madatemelö mo afe'de, taalo Masala manangnga ta'diila oono ka linggo tanno oono, oono ka tamma ka kadu ma ünggü tanno eera no muuru eege ka tino a fiini tököönö?<sup>26</sup> Afa tuu'da no koronggore ka titaalo kide no ka eyi, nggeege tamma ka Masala a'da kitaalo linggo kide ka eyi.

### 3

#### *Tafa ma onggo'do*

<sup>1</sup> Ka nagöre eede, aaga fa ta katalaana kadhabbu, kussu aaga a'da angnga no katalaana no ara angnga tagümmü adene dhabbu.

<sup>2</sup> Lakiini kakorokoro angnga ka nafünni kadhabbu, üürü taalo ömö'dii adiri tatoroko ka eema tiya iini ka teema ya, i'i ya ömö'dii dhorro ambaanya tafa ka oona tanno iini in'dili kungngo.

<sup>3</sup> Aaga iiri naguttu aja kara tanangnga kili eene ka naniinö amang kene taföönyö eema yaaja, 'buugu yaaja ka asaasa i'i ka co.

<sup>4</sup> Aaga assa ka namürkabü, a tadhabbu tanno eene no nja tanya ka agürü eege a türü no, lakiini ndagee'di inggide idhilli agürünü oogo ka tino a taga sawaaga ka asaasa co ya. <sup>5</sup> Onggo'do afe'de ma 'banüümö idhilli ka tuu'da, lakiini a'diniga oona coo'do ana eema dhabbu. 'Bandnissi idhilli, lakiini ka nyigo dhüile dhabbu.

<sup>6</sup> Onggo'do oogo mafeene nja iissi ma 'büdhülü ma toroko manna kaja ka tuu'da, maga'da oona na ömö'di ïn'dili kungngo manangnga iissi ka tuu'da ma tefe ka 'dii nye'd'de ana iissi tanno ö'dö kono ndama Jahanam no.

<sup>7</sup> Ara ömö'di tambaanya tunyu uu'da ma dhüile nye'd'de nja uyi nja eema tiya ürneene ya nja kilöögö, tumma dhorro kadu kagunyu eege. <sup>8</sup> Lakiini onggo'do taalo ömö'di ma tambaanya tümmöönö, oogo ma toroko taalo nüümö ma tafa kide, ma tigine a tümmü ma inde. <sup>9</sup> Angnga tafünügü Uugaara Pupa yaaja ko'do iini, ungnego teela kadu iini na Masala ka tarü'bü eege kafeene nja koronggore tiya oono no. <sup>10</sup> Baraka nja teelaana kicci a kürö ndama niinö tanno unggodho no. Nagöre eede, taalo tumma kama tüünidene. <sup>11</sup> Ara 'biidi ya insili nja tiya nye'deny'e de tüüsö ndama nduguli tanno unggodho no? <sup>12</sup> Nagöre eede, ara indiiye teene 'dikidiyö a ki'bim'bi kara teene indiiye? Alla nduguli kara tüüsö 'biidi tiya nye'deny'e de nja tiya i'd'di ya.

### *Tussu eema ma 'dotombo'do*

<sup>13</sup> Mada ana kada ussu eema a'dara, fa kini aala a kadu a taneene tanno iini, a linggo tanno iini ka talinggo no a tiicolo ma eedi nja ta'dara. <sup>14</sup> Üürü tagu'daana kungngo ada ka nanggeedi nja tallogo ya, aaga fa ta'diniga oona

coo'do, aaga tafünü korkoro ka timin'da ka oona.

<sup>15</sup> Tussu eema afa ma tanno miini no, taalo kö'dö ndama fiini ma ndanaaya, lakiini tussu eema ma 'büdhülü ma nakömö'di nja Ebliisi. <sup>16</sup> 'Buugu ya kiriimi nja tallogo ka tanna kide ya, ri'ba kinggide nja tatoroko kadhoonyo. <sup>17</sup> Lakiini tussu eema na ö'dö ndama 'dotombo'do, eege kinsili ka dhidha, tekere ta'diila, tasaasa, tana muuyu nja linggo tanno a'diila no, taalo küsümünaana kadu ku'bu, taalo ka korokoro. <sup>18</sup> A ta'diila eege ka tööyö tammo adini ada ka ta'diila ma kadu tanno ünni ta'diila no.

## 4

### *Tateefe ma 'büdhülü*

<sup>1</sup> Koro'bo nja ta'digineene kö'dö ndama kiga kannakada ka söödö? Taalo ndama ti'd'di ma eema tiya ada ka'beene kide kada ka tuu'da ya? <sup>2</sup> Kasaasa aaga eema, aaga sa kitaalo kara taluna, aaga tisaana ka oona aaga tagirina ajeene, taalo aaga kara taluna, kudumma ada taalo ka arangnga ka Masala. <sup>3</sup> Üürü karangnga aaga, taalo aaga kara taluna, kudumma ada kasaasa a nanggeedi ka tanyoro aaga talinggo eema ma nanggeyi tanno ada.

<sup>4</sup> Aaga na taalo kadho ka fiini ma Masala no, taalo aaga kussu a'da tasaasa eema ma 'büdhülü a'da tadiidi ma Masala eege kamiini? Ömö'di ya asaasa

eema ma 'büdhülü ya, i'i ya diidi ma Masala.<sup>5</sup> Kiki aaga kide a'da tumma na sorne ka tumma ün'dügüngngö, Koronggore ya Masala ka tuuru kaja ka oona ya asaasa kürümi?<sup>6</sup> Lakiini i'i amana türü dhorro, sorne iki a'da,

"Masala manu oona koona nja kadu tanno indhígí oona coo'do no,

lakiini kadu no iicolo ka nanggeedi no mamaña türü eene."

<sup>7</sup> Aaga ümmünü eyi yaada a Masala, aaga keema koro'bo nja Ebliisi amang kini tüüsö aaga. <sup>8</sup> Aaga kete ka Masala amang kono takete kada. Aaga agala iisine naada, aaga na oroko no, fa ka eedi tiya üüdü insili, aaga na eera ka eedi no. <sup>9</sup> Aaga muuyu aaga tafara aaga tiisigi ka oona. Amang ka takijeene tanno ada tatem'bele kada fara, a dhodho naada tatem'bele ka tagoroo'bo. <sup>10</sup> Aaga iicolo ka nanggeedi kidha ma Masala amang kono ta'diniga aaga ko'do.

<sup>11</sup> Aaga fa teemaana ka oona a tumma tanno atoroko no, nagöre eede, kudumma ömö'dü tiya eema tatoroko ka örre ya, i'i eema tatoroko ana seriye, i'i ya diidi ma seriye. <sup>12</sup> Ömö'dü unggodho i'i yungngo amana seriye a kadu, ömö'dü ya ara tümmü kadu unggodho, i'i yungngo a tambaanya toolona kadu

aama kadu. O'o na mada nümmü kadu?

### *Aaga indhígí Masala*

<sup>13</sup> Aaga niki a'da, "Bütängngö üürü tako ara ungngo co anya tammo, üürü ümmü ungngo tanna kide ürüünü ungngo tanadene ungngo tö'dö keere ana eema dhabbu."<sup>14</sup> Taalo aaga kussu minna i'i yungngo ara tö'dö tako, tefe ka 'dü naada eege kiïye? 'Bütängngö aaga aföönyö, aaga niki a'da 'bitängngö alla tako, ara ungngo co anya tammo aja tümmü, ungngo tanna kide a nagürüünü, ungngo talingga tanadene, ungngo tö'dö anaa gürüüsü. <sup>15</sup> Aaga kama tiki, "Ka niisö ma Masala, angnga tefe ka 'dü angnga talingga ya nja tinni."

<sup>16</sup> Lakiini aaga 'bitängngö ka'diniga aaga oona naada ko'do aaga tamidhi 'buugu, midhi afa ma tammo iini mo matoroko. <sup>17</sup> Ömö'dü ya ussu linggo na 'diila no assa ka taalo alingga ya, i'i üünü tatoroko.

## 5

### *Am'ba ka kadu tanno üüsü no*

<sup>1</sup> 'Bütängngö aaga toodo kede aaga na üüsü no, aaga fara aaga tiisigi ka oona ma tatoroko tanno a tö'dö kada ya toroko.

<sup>2</sup> Almaala yaada asürdö, a en'di yaada, alimi oro.

<sup>3</sup> Dahaba yaada nja fudda tiya ada kümmü kü'düü'dü

tasüri euge, kawaana, a laala kadu ka taguri tuu'da naada afa issi. Almaala yaada katawaana koonaa ku'bu ma naguuru tanno eere no.<sup>4</sup> Talingnge na kadu tanno agalinggo ka nasigeene tanno ada ka tanyooro no kafara ko'd'o, a takeere na kadu tanno araana ka siga no, tala iisine na Masala mana türü mo.<sup>5</sup> Taneene naada ka 'büdhülü kadigine ana eema tiya a'diila ya nja ta'deema, aaga tündhi afa fiyo ma taradene<sup>6</sup> Kümmü aaga ömö'di ya a'diila ya, aaga tagiidi i'i a'da taalo agümmöönö ka eyi tiya iini.

### *Tidhi oona ku'bu nja tafara ka Masala*

<sup>7</sup> Aaga idhi oona ku'bu nagöre eede, ara uuru ma tö'dö tanno Uugaara ka öö'dö. Aaga iiri taleele idhi oona ku'bu nya indhigü töyö ma 'büdhülü ma 'diila mo a tombo'do ma koogoya nja tüyi ka öö'dö.<sup>8</sup> Aaga idhi oona ku'bu tekere aaga takidhö ka nanggeedi, kudumma tö'dö tanno Uugaara ka ndakete<sup>9</sup> Aaga fa tisaana ka oona nagöre eede, kudumma Masala kara tanggaaga tümmü aaga, tümmü kadu a'dingnge ka iinye.<sup>10</sup> Nagöre eede, aaga uruna fiinii ya nagane'bi keere, eene ka tageema ana eere tiya Uugaara, kadakidhi oona ku'bu, a kadu tagapusu eege.<sup>11</sup> A'diila nja kadu tanno idhi oona ku'bu no, kaföonyö aaga tumma ma tidhi oona ku'bu na Ayüb,

aaga tussu a'da manangnga Masala talingnge niini nya oogo mana 'bangnga mana müuyu.

<sup>12</sup> Keema tiya in'dili ya nagöre eede, aaga fa taküdöönö a 'dotombo'do nja 'büdhülü alla a niimö töccö 'do. Aaga afa ka "İ" tiya ada ada ii, aaga fa "Kaw" tiya ada ada kaw, kudumma tatoroko kara tala aaga.

### *Tafara ka Masala ma tamma*

<sup>13</sup> Ömö'di ungngo ada amüürü? Fa kini afara ka Masala ko'do. Ömö'di ungngo ada oona ka'diila iini? Fa kini afünügü Masala ko'do.<sup>14</sup> Ömö'di ungngo ada amaara? Fa kini ümmünü kadiifi ma kaniisa kafara ka Masala nja iini a'bunaana uu'ba iini ka üdü ana eere ma Uugaara Yasu.<sup>15</sup> Tafara ka Masala nja tamma ma Masala koolona ömö'di ya amaara ya, a Uugaara ka nangnga i'i ka fiki'dö. Üürü i'i agalinggo tatoroko, Masala mata'duga kini ka oona.<sup>16</sup> Fa ka ömö'di amma a'da agalinggo i'i tatoroko, aaga tafara ka Masala kudumma tatoroko tanno kijöögö, amang kada taluna toolonadene. Tafara ka Masala tanno a'diila no türü kinggide.<sup>17</sup> İliya aga ömö'di afa ma angnga ka eema nye'de. Adafara ka Masala dhorro amang ka tombo'do tafa tede, assa taalo ede ka 'büdhülü a nagürüünü kiidoona a nagatereene ka iidümmü

kafünü unggodho.<sup>18</sup> Afada adafara ka Masala afe'de a tombo'do teede, eema ma 'büdhülü tageene.<sup>19</sup> Ka nagöre eede, üürü ömö'di ungngo aama ka fiinii ma timin'da ya, ömö'di öccö tafada ana i'i.<sup>20</sup> Amang kada tussu a'da ömö'di ya afada ana ömö'di ka fiinii ma taama ya, i'i ya oolona ömö'di ka inde a'duga tam'baga kene ka oona kadhabbu.

## Waraga ya Bütrüs ya dhidha ya

### Tafa'da tumma

Bütrüs ya tafiiñi ya arigiri waraga ya, unggu co kadu ma kaniisa na anna ka anya tammo ana eere 'bitingngö a'da Türkiya mo. I'i arigiri uu'bu eege ka nanggeedi kudumma eene ka talinggo adene kudumma eene ka tümmü tumma na Almasiihi. I'i iki eene a'da Yasu Almasiihi agadhügürü adagapusu adene adaganna ka 'di tanno iini ka 'büdhülü no, ikirü kadu ma kaniisa ka tussu a'da ara eege tadhügürü. I'i anangnga tindhigü Masala, oono ka tümmü dhügürü yaada, ya amanaga aaga kada kadu tanno oono noono kara tanangnga talıngnge eene ana baraka dhabbu. Yungno a Bütrüs ka tuu'bu kadu ma kaniisa ka nanggeedi a'da küütü kataneene kada kadu tanno Masala.

### Tööjüllü

<sup>1</sup> A'a na Bütrüs tafiiñi ya Yasu Almasiihi a'a narigiri waraga nunggu co kadu tanno Masala ka tagesse eege no na asananja ku'bu ka Büntüs nja Galatiya nja Kabadökiya nja Asiya nja Basiiniya, <sup>2</sup> Kadu na Masala tammo Pupa ka tagesse eege no a'da milli ka tagussu ka dhidha manangnga eege ka tinsili a Koronggore, amang

kene taföönyö tumma na Yasu Almasiihi ka tanggala ana eriidö ka asananja kene ka oona. A Masala tanangnga ta'diila aaga nja türü dhabbu.

*Tindhigü ma tefe ka 'dī*

<sup>3</sup> Kadagafünüğü Masala ko'do Pupa ya Uugaara tiya Yasu Almasiihi, anangnga teene na issi no angnga a 'bangnga tammo iini ma dhabbu mo a tefe ka 'dī ma tindhigü a tefe ka 'dī tanno Yasu Almasiihi ndama inde. <sup>4</sup> Masala manangnga eema aaga ka 'dotombo'do kita iini ka titaalo ara tasügüni, taalo ara tasürdü taalo ara taama. <sup>5</sup> Tamma naada turi no kara tafa kada a türü tanno Masala idhi tö'dö ma toolonadene tanno andakete kala oona ku'bu ka nagürüünü tanno eere no. <sup>6</sup> Aaga tadhodho iini dhorro, a'da kagala aaga ka tagoroo'bo adha 'bitingngö a tatoroko kara tümmü aaga ka dhoonyo. <sup>7</sup> Ya ara ta'b'ba tamma naada afa ma issi ka ta'b'ba dahaba kungno a'da i'i agu'daana adagii'bi dahaba ya ara titaalo ya kungno, ara taluna tafünüğünja ko'do nja tiddhindhi nja ta'diila ka uuru tanno a Yasu Almasiihi kara tö'dö kide no. <sup>8</sup> Kasaasa aaga i'i a'da taalo aaga kiji i'i, aaga tamma kini a'da taalo aaga kiji i'i 'bitingngö, ara aaga tadhodho ka tiddhindhi taalo aaga tadünnü iini, <sup>9</sup> ara aaga toolona nanggeyi naada kudumma ada ka tamma ka Masala dhorro.

10 Kudumma ma toolona tanno nagane'bi tanno ageema tumma ma türü tanno tagöö'dö kada no, kadagawwa amussu dhorro.  
 11 Kaga'b'ba tussu ma uuru ma tö'dö ma türü tanno Koronggore tiya Almasiihi kene ka oona iini ka tiki ka dhidha ma dhügürü tiya Almasiihi kene kaala eege kide iini, ma tidihindhi tanno ara tö'dö no.  
 12 Agaalanja eene a'da eege taalo kagal-inggo ma nanggeyi tanno eene, lakiini kudumma aaga kene ka teema tumma ma eema tiya a kadu tanno agadünüğü tumma ma İnjili aaga a Koronggore tiya Insili ya agürünüdene ndama 'dotombo'do. Salla kadhangga kasaasa tassa ka eema tiya.

### *Aaga aneene ka tinsili*

13 Aaga indinaana nanggüdü naada ku'bu aaga tadönö ko'do aaga tanangnga tündhigü naada ka türü tanno ara tö'dö ka Yasu Almasiihi kara tabbü 'dala.  
 14 Aaga föonyö eema ya Masala kada laala tiya oono, aaga tafa tuurna ka tallogo ma tatoroko keere naada ka talinggo no a'da kaleefe aaga taga nagaaga.  
 15 Lakiini aaga ka kadu tanno insili no ka linggo tanno ada ka talinggo no, kudumma Masala tammo agümmünü aaga mo ma insili.  
 16 Sorne ma Masala iki, "Aaga insili kudumma eede ka tinsili."  
 17 Aaga kümmünü

Masala a'da Pupa a'da oogo mungngo mara tümmü kadu, mitaalo mümmöönö ka ömö'dü töccö mafa ka tiya mümmü ömö'dü a linggo tanno iini, aaga aneene kada kölöge a ta'dila a ri'ba ma Masala.  
 18 Aaga tussu a'da oogo moolona aaga ka taneene tanno ada na toroko no, naada ka takarna kide ka kafaafa ma aaga no, taalo ana fudda nja dahaba tiya ara titaalo ya.  
 19 Lakiini ana eriidö tiya agu'daana ya, eriidö ma dhünggü tiya taalo a sogo'do iideene ya, eriidö ya Almasiihi.  
 20 Masala milli ka tagesse i'i a'da aleefe 'büdhülü üfürü tarü'bü adene, i'i abbü 'dala kudumma aaga ka nagürüünü tanno eere no.  
 21 I'i yungngo anangnga aaga ka tammo ka Masala tammo anangnga i'i ka fiki'dö ka inde manangnga tidihindhi iini, a Masala oogo mungngo manangnga tündhigü ma tammo tanno ada.  
 22 A 'bitingngö ada ka tagala oona naada a taföonyö eema ma timin'da, aaga tasaasa nagöre naada tasaasa na dhorro no, aaga asaasa ajeene tasaasa na insili no ndama eedi ka teene.  
 23 Kageenedene aaga teenedene na eera no, taalo ndama töyüö ma titaalo, lakiini ndama töyüö ma taalo mara titaalo mo, ana tumma na Masala na efe ka 'dü ta'billi no.  
 24 Sorne iki a'da,

"Kadu ïn'dili kafeene nja

ooyo  
a      tiddhindhi    neene  
      kafeene nja    tuli ma  
      siga.

Ooyo ara tarume  
a tuli tasuli.

<sup>25</sup> A tumma na Masala tüütü  
ta'billi."

A tumma nüüdi ka tageemaga  
co aaga no eege kungngo.

## 2

<sup>1</sup> Aaga aadha ka eema  
ma tam'baga nye'd'de nja  
ünggü nja korokoro nja  
kirimii nja tar'daana eema  
nye'd'de. <sup>2</sup> Afa laala ya  
aleefe tageenedene ya aaga  
asaasa siiga ma koronggore  
na insili no amang kada  
tinggiridene iini ma toolon-  
adene. <sup>3</sup> Afa ma Masala ka  
tiki, kagolo aaga ta'diila na  
Uugaara kafaanya.

*Misi ma efe ka 'di nja  
kadu tanno insili no*

<sup>4</sup> Aaga ö'dö ka Uugaara,  
kudumma iini kada misi  
tammo efe ka 'di mo  
ma kadu kaanu kide mo,  
ya Masala ka tagesse i'i  
kagu'daana ya. <sup>5</sup> Aaga afe'de  
aaga ka nüigisi tanno efe  
ka 'di no ma tarü'bünü la  
ma koronggore ya, aaga  
ka ka'boge na insili no  
aaga ara eema ma türri ma  
koronggore ya Masala ka  
tamma kide ana eere ma  
Yasu Almasiihi ya. <sup>6</sup> Sorne  
iki,  
"A'a      nungngo    nara  
      tanangnga misi ma  
      kadesse

ma      agu'daana    mo  
      agessedene        ka  
      Sahyün,

ömö'di ya amma kide  
taalo ara tana modolo."

<sup>7</sup> I'i agu'daana kada aaga na  
amma ka Masala no. Lakiini  
ka kadu tanno taalo kamma  
no,

"I'i ya misi tammo a  
katari'böönö kaanu  
kide mo  
oogo mungngo ma misi  
ma kadesse."

<sup>8</sup> "I'i yungngo a misi ma  
faseene  
nja      'dokon'da    ma  
      ta'dinggeene ka kadu  
      tanno inseene kide  
      no."

Kudumma eene taalo  
kamma ka tumma ma  
Masala, taama neene eege  
kamiini.

<sup>9</sup> Lakiini aaga na kadu  
kagessedene no, tauugaara  
ma ka'boge nja kadu na  
insili no nja kadu tanno  
Masala ma teema tumma ma  
eema tiya oono ya a'diila ya,  
Masala magümmünü aaga  
ka 'buugu tiya alüllü ya  
munggu aaga ka 'buugu tiya  
öyeene keefe ya. <sup>10</sup> Ka  
dhidha taalo aaga ka kadu,  
lakiini aaga 'bitingngö aaga  
ka kadu tanno Masala, taalo  
aaga kagaana 'bangnga ma  
Masala, lakiini 'bitingngö  
asa aaga taluna 'bangnga.

*Taneene ma Masala*

<sup>11</sup> Nasaasa a'a aaga nagöre  
eede aaga no kafala nja  
kölöge ka 'büdhülü tiya,  
aaga aadha ka eema ma tall-  
ogo ma tuu'da ma tamö'di

kudumma iini ka teema koro'bo nja koronggore. <sup>12</sup> Aaga fa ka taneene tanno ada ka kadu ma ajeene ka söödö ka'diila salla sa katiki a'da aaga ka oroko ya, kiji linggo naada na 'diila no kamana tidhindhi a Masala ka uuru moono kara tö'dö tassa kaja.

*Aaga föönyö eema ma naguugaara*

<sup>13</sup> Aaga föönyö tumma na naguugaara ka üüdü ma Masala, ka uugaara ma anya kudumma iini i'i yungno adhabbu ma kadu ka anya 'do, <sup>14</sup> aaga föönyö tumma na naguugaara kudumma Masala ka kürünü euge a'da köö'dö tümmü kadu kara ka tafünögü kadu na a'diila no ko'do. <sup>15</sup> Tumma na Masala a'da aaga tüünii, eema ya a'diila, nggeege aaga tanangnga kadu tanno nagaaga na taalo ka'dara no kak'i'döönö. <sup>16</sup> Aaga aneene ma nanggeyi tanno ada, lakiini aaga fa ta'duga taneene no miini no, aaga talinggo eema ya toroko ya, aaga taküdhü kide, lakiini aaga aneene kada kasaga tanno Masala. <sup>17</sup> Aaga asaasa kadu in'dili kungngo aaga asaasa nagöre naada in'dili aaga ümmü Masala ana eedi aaga aföönyö eema ya uugaara.

<sup>18</sup> Aaga na kasaga no, aaga föönyö tumma na kadu tanno ada ka tagalinggo ada eene no, aaga tariba eene salla kasa ka'diila, üürü ka

oroko. <sup>19</sup> Ara Masala sa kanangnga baraka aaga kide kada kara tidhi oona ku'bu ka dhügürü nja tüüninja ku'bu, kudumma ada ka tussu a'da fiinii ya Masala ya miini. <sup>20</sup> Kümmü aaga minna ka tatoroko tanno ada, aaga tidhi oona ku'bu kide ma dhügürü tiya, lakiini kada kara tüünii nüümö ya a'diila ya, aaga tidhi oona ku'bu ka dhügürü, ara aaga taluna türü ka Masala. <sup>21</sup> Nggeege ya Masala ka tagümmünü aaga, Almasi-ihı agad hügürü ka üüdü ma aaga, aafa kada ka fiinii amang kada tunggeene kide.

<sup>22</sup> "Taalo agüünii tatoroko a nüünö niini taalo ka korokoro."

<sup>23</sup> Taalo a'diünö ka kadu kateela i'i, adhügürü taalo iki a'da ara i'i ta'diünö kömüsü, lakiini ümmünü eyi yiini a ömö'di tiya taalo üünii ada kadu ku'bu ya. <sup>24</sup> I'i a'duga tatoroko naaja ka tuu'da tanno iini ka salii'bi amang kaja takaaya ka tatoroko anangnga ta keefe ka 'di kudumma ma timin'da. Nüümö yiini ya in'd'i ya, anangnga aaga ka aleme ka oona. <sup>25</sup> Kudumma ada ka kidheefele tanno agaama no, lakiini kafada aaga co ka tadasaana tiya ada ya afa ka nanggeyi tanno ada ya.

### 3

*Iiya nja naganyori*

<sup>1</sup> Aaga na iiya no afe'de, aaga aföönyö tumma ma naganyori tanno ada salla könö ana kene taalo tamma ma Masala eene ka nanggeedi ara taneene naada na 'diila no tö'dö ana eege a'da taalo aaga kalneege nja eene. <sup>2</sup> Kene kara tiji taneene ma tümmü tumma ma Masala, aaga taneene ka tinsili ka nanggeedi. <sup>3</sup> Aaga fa tindinaana oona ndama kürö, tar'daana ma awu nja tümmü dahaba nja en'di tiya ada ka tümmöönö ka oona ya. <sup>4</sup> Lakiini ta'diila naada kara tama eedi ka teene kanna kita küdhü kita a ta'diila ma koronggore, taalo ara taga'dadene, agu'daana faana miini ka Masala ka oona. <sup>5</sup> Liya ma 'billi na insili no afe'de kümmü nanggeyi neene a Masala kindinaana oona ka'diila kaföönyö eema ya naganyori tanno eene. <sup>6</sup> Afa Sara ka taföönyö eema ya Abrahiim mümmünü i'i a'da uugaara yoono, aaga 'bitüngnjö aaga ka laala tiya oono kada kara tindinaana oona ku'bu ta'diila a'da taalo aaga kari'ba a niimö.

<sup>7</sup> Aaga na kadu tanno nagiide no, aaga aneene nja iiya tanno ada aaga tussu a'da aka ma ki'di, taalo mafeene nja aaga, aaga afa kene dhorro aaga tussu a'da eege kosso ka eema tiya Masala kara tanangnga aaga ma tefe ka 'di ya, aaga üünü nggeege a niimö könö tafa taga'da tafara ka Masala naada.

*Dhögürü ma linggo tanno*

### *a'diila no*

<sup>8</sup> Niimö ya öreeene keere ya, a'da aaga in'dili ta ungodho ka tumma 'bangnga ma tanagöre nja muuyu nja tiicolo ka eedi. <sup>9</sup> Aaga fa ta'diinö ka ömö'di kara tatoroko nja aaga, ömö'di ka teela aaga, aaga fa ta'diinö tekere, aaga agala ka'bana ko'do nja iini, lakiini aaga amana baraka eene amang kada taluna baraka ya Masala ka tagümmünü aaga iini ya. <sup>10</sup> Kudumma sorne ka tiki,

"Ömö'di ya asaasa tefe ka 'di ya,  
a nagürüünü ka 'diila ya,  
ümmü onggo'do miini nja  
niinö  
ka tumma tanno  
atoroko no nja korokoro.

<sup>11</sup> Afa takete ka niimö tiya toroko ya,  
lakiini üünii eema ya  
a'diila ya,  
asaasa taneene na 'diila  
no isi kini keere.

<sup>12</sup> Kudumma iïye tiya Uugaara iji kadu na insili no  
a neeso noono ka toodo  
ka fara tiya eene,  
lakiini dhugudha yoono anu  
ka kadu tanno üünii  
eema ya toroko ya."

<sup>13</sup> A mada i'i yungngo  
ara tili aaga ka oona a'da  
kasi aaga ka linggo tanno  
a'diila no keere. <sup>14</sup> Üürü  
aaga kadhägüürü kudumma  
fiinii ya timin'da ya, a'diila  
nja aaga, aaga afa tari'ba a

ömö'dü, aaga tafa ta'deedene ka oona.<sup>15</sup> Aaga afa ka Almasiihi anna kada ka nanggeedi aaga tümmü i'i kada Uugaara, aaga tindinaana oona ku'bu ma tapadaga tumma ömö'dü tiya ara tasaasa kada a'da aaga tala tündhgï ma Masala na kada no iini a ri'ba a tiicolo ka eedi.<sup>16</sup> Aaga linggo nggeege a nanggeedi ka tiicolo a ta'diila miini, aaga tafa ka ta'diila ma nanggeedi tanno ada, salla a kadu saga tüünï ada tatoroko ana aaga ya, ara taneene naada ka Almasiihi ara tanangnga modolo kagu eege ka tumma tanno eene ka teema no.<sup>17</sup> A'diila ada kadhägürü a'da küünï aaga eema ya a'diila ya, kini kara tasaasa ma eedi na Masala eege kamiini a'da aaga tadhägürü a'da küünï aaga eema ya toroko ya.<sup>18</sup> Almasiihi ka eyi tiya iini eyi ta unggodho ka üdü ma tatoroko tanno aja. I'i taalo agüünï tatoroko eyi a'da a'diila ka üdü ma kadu tanno oroko no, amang kini tasigi aaga ka Masala kete. Eyi ka tuu'da, lakiini Masala manangnga i'i keefe ka 'dï ka koronggore.<sup>19</sup> İkiri ka tunggeene a koronggore tiya iini aco tadünögü eema co nagoronggore tanno ka pabuusu no,<sup>20</sup> na aanu ka tumma tanno Masala 'billi no a'da makidhi Masala oona ku'bu ka ürüünü tiya Nööh ka uuru tanno Nööh ka tarü'bü mürkabü no, a kadu toolonadene ka 'büüdi iini,

kidhilli kadu ka iidümmü kafünü iidoona.<sup>21</sup> I'i yungngo agalaala angnga ka fiinï ma tambeese tanno olona aaga 'bitüngngö no, taalo ka tagala nyoro ma tuu'da, lakiini ma timi'di tumma ana eedi ka tinsili njä Masala a tafiki'dö tanno Yasu Almasiihi.<sup>22</sup> I'i ya asirigö co 'dotombo'do emmi ka Masala ka niisö ma kuri a kadhangga taföönyö eema yiini njä türü ma eema ma 'dotombo'do njä naguugaara miini.

## 4

### *Taneene a Masala*

<sup>1</sup> Üürü Almasiihi agadhügürü a tuu'da tanno iini, aaga tekere aaga kardha ku'bu ka fiinï tiya miini ya nggeege, kudumma ömö'dü tiya adhügürü a tuu'da ya Aadha ka linggo ma eema ma tam'baga.<sup>2</sup> Aneene ma türeene ma nagürüünü tanno iini ka linggo a tamma ma eedi tanno Masala taalo a tallogo ma ta ömö'dü.<sup>3</sup> Asa aaga tüüsü ka linggo ma eema 'billi ka kadu ma 'büdhülü, temelö njä tallogo, njä tooye ma ngeeli njä eema ma weerö njä tumma ma eema ma namasala tanno atoroko no ma Masala kaanu kide ya.<sup>4</sup> A kadu ma namasala ma 'büdhülü tadhere, kudumma ada taalo kalinggo tam'baga na miini no, kikiri ka teela aaga.<sup>5</sup> Lakiini eege kassa ka tümmünü eyi yeene a Masala mara tümmü kadu na adinö no njä tanno aaya no.<sup>6</sup> Yungngo a tumma

tanno Masala kaala kadu na aaya no afe'de, amang kene tahükümüdene afa kadu no kanna ka tuu'da, kefe ka 'di ka koronggore afa ma Masala kungngo.

<sup>7</sup> A 'bütängngö asa 'buugu ndakete ma eema nye'd'e de kara titaalo, aaga kardha ku'bu aaga tadönö ko'do ma tafara ka Masala.

<sup>8</sup> Aaga asaasa ajeene dhorro kudumma tasaasa ka taküdhü eema ma tatoroko adhabbu. <sup>9</sup> Aaga amma ka kafala a'da kitaalo tagoroo'bo kide. <sup>10</sup> Ömö'di ya Masala ka anangnga türü kadhoonyo ma linggo töccö iini ya, fa kini alinggo eema ya a'diila ya nja kadu könö. <sup>11</sup> Ka ömö'di kara tasaasa teema, eema tumma ma Masala. Ömö'di kara tasaasa talingga, alingga niimö ya Masala ka tümmünü iini ya. Fa ka tidihindhi nja türü kada tanno Masala türü ta'billi. Amiin.

*Tidhi oona ku'bu ka dhügürü*

<sup>12</sup> Kateefe ma a'a, aaga fa tadhere ka eema tiya öö'dö kada agu'du aaga afa issi ya ma tasaasa türi aaga ka nanggeedi afa niimö ya ö'dö kada keefe ya.

<sup>13</sup> Aaga tadhodho kudumma aaga ka tosso ka dhügürü nja Almasiihi, amang ka kada tiji tidihindhi niini aaga tadhodho. <sup>14</sup> A'diila nja aaga a kadu kara teela aaga kudumma eere tiya Almasiihi kudumma Koronggore ma tündhigü

nja Koronggore ma Masala ara tanna kada ka oona. <sup>15</sup> Üürü o'o nadhügürü ya taalo afa müdüdü ka kiidi ömö'di alla kanyoro alla ta'dingga ka eema ün'düngüngö. <sup>16</sup> Lakiini kini kara tadhügürü kudumma iini kada Masiihi ya, tafa tana modolo, fa kini afünögü Masala ko'do ana eere tiya miini ya.

<sup>17</sup> Asa uuru ma Masala kara tümmü kadu kandö'dö, üürü oogo mara tümmü kadu noono ka dhidha 'dee, ara tafaanya nja kadu tanno taalo kasaasa tumma na Masala no. <sup>18</sup> Sorne iki, "Üürü kadu no 'diila koolon-adene a dhügürü 'dee, ara tafaanya nja ömö'di tiya üünü tam'baga anu ka Masala ya?"

<sup>19</sup> Kadu na Masala ka anangnga eege ka dhügürü, fa kene kalinggo eema ya a'diila ya kümmünü nanggeyi neene a Masala tammo dhorro mo.

## 5

### *Kadiifi nja kadimöögö*

<sup>1</sup> A kadiifi naada ka söödö no, neema a'a nja eene kada tüfi afa eege ya adinö ka dhügürü tiya Almasiihi, ömö'di ya ara tosso ka tidihindhi tanno ara tö'dö no. <sup>2</sup> Aaga kuri a ki'biini tanno Masala naada kaafa kene no ndama eyi tiya ada taalo aaga ka'bununja kide afa ma Masala ka asaasa aaga kadalinggo kungngo taalo ma tallogo ma gürüüsü,

lakiini tasaasa linggo. <sup>3</sup> Aaga fa tüünii ada kadu naada kafa kene no ku'bu. Lakiini aaga alaala eege ka fiinii tiya a'diila ya. <sup>4</sup> Ka uuru ma Uugaara ma katasaana kara tö'dö, ara aaga ta'duga talingnge ma ndalembö ma tidihindhi, ya taalo ara toorodo ya.

<sup>5</sup> Aaga na kadimöögö no afe'de, aaga aföönyö tumma na kadiifi, aaga kirni en'di ma tiicolo ka nanggeedi ada ka oona ma tasaasa ajeene dhidha kudumma,

"Masala taalo masaasa kadu na 'dinigi oona coo'do no,

lakiini masaasa kadu na iicolo no."

<sup>6</sup> Aaga iicolo ka nanggeedi ka niisö ma Masala tammo ana türü mo ara tamünügü aaga ko'do ka uuru tanno oono. <sup>7</sup> Aaga 'duga eema yaada in'dili aaga tapügü kini ko'do amang kini tafa kada. <sup>8</sup> Aaga adinö ko'do aaga tafa tarigide kudumma diidi ma aaga Eблиisi unggunaana ku'bu afa tagaamu mafara mawwa niimö moono ka tatamü.

<sup>9</sup> Aaga idhi oona ku'bu ka tamma ma Masala tanno ada aaga eema koro'bo nja iini aaga tessu a'da nagöre naada ka 'buugu ka oona nye'd'de kadhügürü ma eema tiya.

<sup>10</sup> Masala ma türü nye'd'de Masala magümmünü aaga ka tidihindhi ta'billi ka Yasu Almasiihi, i'i yungno anangnga aaga kada kadu

dhorro ada ka tadhügürü idhilli mümmü aaga ku'bu manangnga türü ada ka oona manangnga aaga ka takidhö. <sup>11</sup> Türü kungngo oono turi ta'billi. Amiin.

### Tööjülü na eere no

<sup>12</sup> Narigiri a'a waraga ya adhügängü ya a niisö ya Siila örre yeede, ya adho ka fiinii ya, ma tuu'bu aaga ka nanggeedi, nussu a'a a'da türü na Masala na dhorro no eege kungngo, aaga idhi oona ku'bu kide. <sup>13</sup> Kaniisa ma Babil, mafeene nja aaga mo, Masala magesse oogo, oogo möjülü aaga a Murkus ya 'bii'bala tiya eede ya, tööjülü aaga. <sup>14</sup> Aaga tööjülü tööjülü ma tasaasa ajeene, a'a nööjülü aaga in'dili kungngo aaga na kadu tanno Almasiihi no.

## Waraga ya Bütrüs ya eera ya

### Tafa'da tumma

Bütrüs ya tafiiñi ya ari-giri waraga ya unggū co kadu ma kaniisa ka naguuru tanno iini ka tussu a'da asa i'i takete ka tiididene asala kide no. I'i asaasa kadu ma kaniisa a'da kaneene ka fiinii tiya a'diila ka Masala ka oona 'bucca kungngo. Eema nja eene a'da kafa tanu ka talaana ma Masala nja Yasu Almasiihi yeene ka 'duga kini nja kadu könö na kaneene nja Yasu. I'i adirina tumma eene ma kata-laana tanno korokoro na icci ka kaniisa no. Katalaana na korokoro no ka'bunu kadu ma kaniisa kataneene ka fiinii tiya atoroko ya, kiki a'da Almasiihi taalo ara tafada. Bütrüs iki a'da Almasiihi ara tafada timin'da, a Masala taga'da eema ya arü'bü adene 'bittingngö ya, magere eema könö köyé meene kita tatoroko kara titaaloo kide kita. Bütrüs uu'bu eege ka nanggeedi a'da küütü ka tinggiridene ka türü nja tussu eema ma Uugaara tiya aja Yasu.

<sup>1</sup> Waraga ö'dö ndama Samaan Bütrüs, tasaga ya Yasu Almasiihi nja tafiiñi tiya iini, nunggu co kadu tanno kaluna toolonadene ana eere ma Masala nja tatoolona tiya aja Yasu Almasiihi, a tamma tanno agu'daana afa ma tamma

tanno aja no kungngo. <sup>2</sup> Fa ka türü nja ta'diila kada tanno ada kadhabbu a tussu ma Masala nja Uugaara tiya aja Yasu.

### Tümmüneene na Masala nja tesse dhorro

<sup>3</sup> Masala manangnga türü ma tauugaara tanno oono manangnga eema ma tefe ka 'dii angnga nja tanna taneene ma Masala a türü ma tussu eema tanno aja ka tagümmünü angnga a tidihindhi tanno oono nja ta'diila. <sup>4</sup> Nggeege oogo man-angnga eema ya agu'daana ka tidihindhi yoono ka tiki ya amang kada taadha ka eema ma 'büdhülü tiya toroko ya, aaga tosso ka taneene ma Masala.

<sup>5</sup> Nggeege ya aaga kardha ku'bu amang kada tagusu ta'diila ka tamma tanno ada, nja aaga tagusu tussu eema ka ta'diila, <sup>6</sup> aaga tagusu tafa ka oona ka tussu eema, nja ada ka tagusu tidhi oona ku'bu ka tafa oona ka oona, aaga tagusu tümmü eedi ma Masala ka tidhi oona ku'bu, <sup>7</sup> nja ada aaga tagusu tanagöre tanno ada ka tümmü eedi ma Masala, nja tagusu tasaasa ka tanagöre tanno ada. <sup>8</sup> Üürü eema ya a'diila ya ungngo ada adhabbu, anangnga aaga kadalinggo dhorro aaga tö'dö keere a tussu eema ma Yasu Almasiihi Uugaara yaaja. <sup>9</sup> Lakiini üürü ömö'dii ya eema tiya ka titaaloo kini ya, i'i asoro taalo iji 'buugu üürü miini ka tatanggala ka

eema ma tatoroko tanno iini na illi no.

<sup>10</sup> Nggeege aaga kardha ku'bu aaga tanaana üye ka Masala ka tagümmünü aaga, magesse aaga. Kada kara talinggo nggeege ya, taalo aaga kara ta'dingga 'do, <sup>11</sup> nggeege ya iñye ka tafa'da nja aaga kadhüföölö maada kara co ka tauugaara turi, tauugaara no Uugaara tiya aja Yasu Almasiihi tatoolona yaaja.

*Tumma ma tane'bi ka sorne*

<sup>12</sup> I'i yungngo eede kara tadünüğü tumma aaga ma eema tiya a'da killi aaga ka tagussu iini aaga tüütü ka tumma ma tatimin'da tanno kada no. <sup>13</sup> Nussu a'a a'da tumma dhorro eege kamiini, nükirü a'a ka asaasa tanangnga tumma no ada ka nanggüdü a'da naleefe a'a ka 'di ka tuu'da. <sup>14</sup> Kudumma eede nussu ara a'a tinyi tuu'da no ku'bu kete kungngo afa ma Uugaara tiya aja Yasu Almasiihi ka tirina a'a nataföönyö kungngo. <sup>15</sup> Ara a'a takardha ku'bu amang kada tagiiji eema ya 'bucca kede kara teyi.

<sup>16</sup> Taalo ungngo kasi ka eema ma elle ma korokoro ma ta'dara ün'dügüngöö kadirina ungngo tumma ma türü tanno Uugaara tiya aja Yasu Almasiihi nja tö'dö tanno iini, kudumma iidi ka tadinö ka tüdhindhi tanno iini. <sup>17</sup> Kaganna ungngo kide ka uuru tanno kini ka

tamana ta'diila nja tüdhindhi nja Masala ma Pupa mo, a tumma köö'dö kini ndama Masala tammo idhindhi mo kiki, "Bii'bala yeede ka asaasa i'i ya yungngo eede ka tamma kini." <sup>18</sup> Kaföönyö ungngo tumma no köö'dö ndama 'dotombo'do a'da kaganna ungngo ka 'dikinya tammo insili mo.

<sup>19</sup> Ungngo takogoona ma tümmü tumma na nagane'bi dhorro, aaga 'bitingngö ya agüünü dhorro ma tanaana üye kide, kudumma iini ka afeene nja lamba tammo öyeene ka 'buugu tiya alüllü ya, ara taka ka taadha a ndalfoore ma taka töyeeene ada kada ka nanggeedi.

<sup>20</sup> Amang kada tessu tadhorro a'da taalo ömö'di ma tasaana tumma ma tane'bi ku'bu ndama üüdü tiya iini. <sup>21</sup> Kudumma tumma ma tane'bi taalo köö'dö ndama tasaasa ma eedi ma ömö'di, lakiini Koronggore ya Insili ya anangnga kadu ököönö ka teema tumma na Masala.

## 2

*Katalaana na korokoro no nja taama tanno eene  
(Yahüusa 1.4-13)*

<sup>1</sup> Lakiini nagane'bi na korokoro no ka takabbü 'dala ka kadu ka söödö 'billi ya, a 'bitingngö ara kataalaana na korokoro no sa kabbü 'dala kalaana kadu ka eema ma taama kadu, ka'düsünü Uugaara ya ana türü ya ya oolona eege ya kara tö'dö ana inde ka eyi tiya eene areere. <sup>2</sup> A

kadu kadhabbu kara tuurna ka tatoroko tanno eene no keere ka anangnga kadu ka tamidhi fiinii ya ma timin'da.  
<sup>3</sup> Ka tallogo tanno eene kadaana aaga kalama ana eema ma elle tiya eene köö'dö iini ndama nanggüdü tanno eene, tümmü adene neene killi taalo kara titaalo nja inde tanno eene taalo arigide.

<sup>4</sup> Taalo Masala mana 'bangnga ma kadhangga tanno agüünii tam'baga no, madhifigi eege co koolo ma inde kadimi'didene ana nakilli ka 'buugu tiya lüllü ya ara uuru ma Masala kara kündhigii tahükümüdene.

<sup>5</sup> Taalo Masala mana 'bangnga ma kadu ma 'billi, lakiini mö'dö a faaya a kadu tanno oroko no masa kafa ka kadu ka iidümmü kafünü eera nja Nööh tiya ageema tumma ma Masala ya. <sup>6</sup> A Masala mümmü naanya ma Sadöma nja Amuura midhi manangnga eege kada fü'dö amang ka kadu tanno anu ka Masala no kara tö'dö kene keere no tussu iini.

<sup>7</sup> Moolona Luut ya adho ka fiinii ya, agadhügürü nja kadu ma temelö ka fiinii tiya kadu tanno oroko no na asilli eema no. <sup>8</sup> Ömö'dii ya miini, ya adho ka fiinii ya ada kaneene nja eene 'bucca adinö aföönyö atoodo ka eema ma tatoroko tiya eene adinö kide a naguuru a tuu'da niini tagu i'i, kudumma iini ka a'diila.  
<sup>9</sup> Nggeege Uugaara ara tussu

ka toolona kadu niini na 'diila no ka dhügürü tiya eene ara kafa ka kadu tanno oroko no ka uuru ma tapusu adene nja tahükümü. <sup>10</sup> Afa kadu no uurna tallogo ma tuu'da na nyoro kamidhi tauugaara na Masala. Eema ma oroko ya na 'dinigi oona neene coo'do no, taalo ri'ba kagu eege ma tamidhi eema ma 'dotombo'do ya idhindhii ya. <sup>11</sup> Salla kadhangga na agii'bi eege a türlü no, taalo kümmü eege kamidhi eege kidha ma Uugaara. <sup>12</sup> Lakiini kadu no miini no kafeene nja eema ma eriidö tiya taalo kussu eema ya ageenedene ma tatorodene ma take, kamidhi eema yeene ka titaalo kussu ya. Meene kara tagirinadene.

<sup>13</sup> Eege kassa amana faana ma tadhügürü ku'bu, ma tin'di ma eema tiya eene ka talinggo ya. Taneene ma tadhodho neene ma tümmü oona neene ka eema ma tatoroko ka töyeene ma uuru ka teene. Eege ka eema ma modolo, kene kara temmi nja aaga ma tagu eema ma taanyara kadhodho kiisini aaga.

<sup>14</sup> Laala ma iiye yeene adigine a temelö taalo küüsü ka tatoroko, kiisini kadu na agi'di no, nanggeedi neene kakalaadene ka tallogo ma eema, eege ka laala ma linggi. <sup>15</sup> Kaadha ka fiinii tiya dhidho ya kaama kuurna fiinii ya Balam 'bii'bala ya Baür keere ya asaasa faana

ma eema tiya toroko ya.  
<sup>16</sup> Lakiini aduna teeladene ka tatoroko tanno iini, ka kisine kada nüümö ma eriidö talneege a tumma afa ömö'di agirnaana ka ne'bi aadha ka taa'baga tanno iini.

<sup>17</sup> Kadu na miini no kafeene nja nduguli tanno 'büidö ka titalo kide no nja tülüögü tanno tanya ka tiisö iini no, yungno Masala ka takindinaana 'buugu ya sigüüri ya eene ku'bu ka talüllü na dhiiri no. <sup>18</sup> Kindiri eema ma taa'baga ün'dügüngngö, ma tiisini kadu a temelö ma tuu'da eege kiisini kadu na kete karünö ka kadu tanno anna ka tatoroko no. <sup>19</sup> Kiki eene a'da kafa ta kasaga a'da ka nanggeyi tanno eene ka kasaga ma tiya aga'da eege ya, kudumma a nüümö tiya agii'bi ömö'di ya, ara ömö'di tadasaga tiya iini. <sup>20</sup> Lakiini kadu no koolonadene ka tatoroko ma eema ma 'büdhülü no, a'da kandussu tatoolona yaaja Yasu Almasiihi kassa ka tapadaga ka linggo ma tam'baga afe'de, iküüri kanda toroko dhindho ka tii'bi yeene ka dhidha ya. <sup>21</sup> Kama taalo ka tagussu fiinü ya a'diila ya, kassa ka tafada kapadaga oona keere ka tumma tanno insili no kümmününja eene no. <sup>22</sup> A tafeene ma tumma no ka timin'da, "Tiira apadaga ka toofo tanno niini," "A küdürü ma kadu ka tagala oogo ka oona mo, masa ka tapadaga ka'buna oona ka

ndinco."

### 3

#### *Uuru na Uugaara*

<sup>1</sup> Waraga ökönö yungno eede ka rigiri ada aaga kateefe ma a'a, neede ka asaasa eege no, nadirina eema aaga kide amang kede tafa'da aaga ka nanggüdü na insili no. <sup>2</sup> Amang kada tagüügi tumma na nagane'bi tanno insili no nja tanno kadafiinü tanno ada kada tirina aaga ma tumma tanno Tatoolona nja Uugaara tiya aja.

<sup>3</sup> Ka dhidha aaga kama tussu a'da ka naguuru tanno eere no, kadu ökönö kinggide kara sa köö'dö kamidhi aaga kuurna ka eema ma tatoroko yeene keere.

<sup>4</sup> Eege kara tiki a'da, "Ara 'tö'dö' assa kiiye? Kafaafa ma angnga kaaya eema nye'de tüütü ka taneene jiddi ma Masala ka tarü'bü 'büdhülü."

<sup>5</sup> Eege kussu tumma no, kassa kanu kide ma Masala ka tarü'bü 'dotombo'do nja 'büdhülü a 'büidö ndama 'büidö a tumma ma nüünö tanno oono.

<sup>6</sup> A 'büidö tiya miini ya afe'de ka anangnga 'büdhülü ma 'billi ka'duuru 'büidö kaaya.

<sup>7</sup> Lakiini 'dotombo'do nja 'büdhülü ma 'bitingngö kütü matara co ka issi a tumma ma Masala ka eyi tiya oono ma tündögü uuru ma Masala kara tapusu kadu no taalo kussu tumma noono kaaya.

<sup>8</sup> Niïmö inggide eede ka asaasa aaga a'da aaga tafa tüürü miini kateefe ma a'a, uuru ka unggodho ka Uugaara kafeene nja nagürüünü alif, alif ürüünü ka Uugaara kafeene afa uuru ka unggodho. <sup>9</sup> A niïmö ya Uugaara ka tiki ya taalo mara tafa kide afa ma kadu töccö kadeema, tadoono ku'bu noono. Lakiini midhi oona ku'bu mindhígí aaga kudumma oono taalo masaasa a'da kadu taaya, lakiini a'da a kadu taadha ka tatoroko nye'd'de kungngo.

<sup>10</sup> Lakiini uuru na Uugaara kara tö'dö afa ma tanyooro kungngo. Ara 'dotombo'do saga titaalo ka uuru tanno miini no a tabaana ma tombo'do a 'buugu tatumuli ana issi, a 'büdhülü nja eema tiya kide ya nye'd'de ara tamanyaga.

<sup>11</sup> Üürü eema nye'd'de ara taga'dadene afa ma tiya kungngo, ara aaga ta kadu tanno afaanya no? Aaga aneene taneene ma tinsili nja taneene ma Masala. <sup>12</sup> Afa maada ka tündhígí uuru ma Masala kungngo, aaga kardha ku'bu aaga tanangnga oogo ka öö'dö areere, uuru ma 'dotombo'do kara tatinyogo ka tangga'da, a eema ya ka 'dotombo'do ya tatumuli a tagu'daana. <sup>13</sup> Lakiini kada kindhígí afa ma tiya Masala ka takiki ya, 'dotombo'do tanno issi no nja 'büdhülü tiya issi ya ara ta 'dī ma kadu tanno a'diila no.

<sup>14</sup> Aaga kardha ku'bu kateefe ma a'a, aaga tündhígí uuru no miini no a Masala tö'dö maduna aaga ka ta'diila a'da taalo a niïmö ya toroko nja hetti kada kidha moono.

<sup>15</sup> Aaga iiri tidhi oona ku'bu na Uugaara ma tafüni ma toolonadene iini afa ma tiya örre ma angnga tata'diila yaaja Bölis ka tarigiri ada aaga ya kungngo, a Masala ka anangnga ta'dara nja tessu eema iini. <sup>16</sup> Afa ma tiya ungngo ka nawaraga tanno iini nye'd'de no, taalo kussu adene a kadu no nagaaga kabaana ka riifö iini afa ma tiya ka tagalinggo a türeene ma kasorne tanno insili no ma taama nanggeyi neene.

<sup>17</sup> Nggeege kateefe ma a'a, kadirina ungngo tumma no aaga a'da aaga tadönö ko'do, amang kada tafa turuna tatoroko ma kadu tanno taalo kussu seriye no. Aaga tamma ka 'buugu tiya ada ya a'diila ya.

<sup>18</sup> Lakiini aaga inggiridene ka türü nja tessu eema ma Uugaara nja tatoolona tiya aja Yasu Almasiihi ya ana tiddhindhi 'bitüngngö nja ta'billi. Amiin.

## Waraga ya Yühanna ya Dhidha ya Tafa'da tumma

Yühanna ya tafiinii ya arigiri waraga ya unggoo co kadu ma kaniisa niini ka asaasa eege no afa meene kada laala tiya iini kungngo. I'i uu'bu eege ka nanggeedi a'da kaneene ka unggodho nja Masala nja Yasu Almasiihi. I'i ümmünü Yasu a'da tumma ma tefe ka 'dii ya aganeene nja Pupa jiddi ma 'billi öö'dö ka 'büdhülü kada ömö'dii. Agadünüğü eema ma katalaana tanno oroko no, na alaana a'da Yasu taalo Almasiihi. Yühanna anangnga tumma a kadu ma kaniisa a'da i'i ka eyi tiya iini aganeene nja Yasu, yungngo iini ka tussu dhorro a'da Yasu aga ömö'dii ma timin'da ada 'Bii'bala ma Masala. I'i ya adirina eema eene kada kadu ma kaniisa a'da kasaasa Masala 'bucca kungngo kasaasa ajeene dhadha. I'i afünüğü eege ko'do amang kene tüütü ka tündhígí tanno eene ara Uugaara Yasu ka öö'dö afe'de.

### *Tumma ma tefe ka 'dii*

<sup>1</sup> Ungngo karigiri ada aaga waraga ya co aaga a tumma ma tefe ka 'dii tanno aganna kide ka dhidha ma eema nye'd'de no. Kaföönyö ungngo, ungngo tadönö kide

ana laala ma iiye tiya iiidi kadinö inggide, ungngo iisine niidi kagümmü i'i ka oona, yungngo iiidi ka teema iini a'da tumma ma tefe ka 'dii. <sup>2</sup> Ka tefe ka 'dii ta'billi miini no ka tatele oona, ungngo tasala eege. Yungngo iiidi ka teema iini, ungngo kungngo kadünüğü tumma ma tefe ka 'dii ta'billi na aganeene nja Pupa kassa ka tele oona ungngo no. <sup>3</sup> Yiidi ka taföönyö a tiya yiidi ka tadönö kide ya kadadünüğü ungngo co aaga afe'de, amang kada tagusu oona ka taneene tanno iiidi nja Pupa nja 'Bii'bala tiya oono Yasu Almasiihi. <sup>4</sup> Ungngo karigiri adaga ka eema ya co aaga amang ka dhodho tanno aja tatimö.

### *Masala a töyeene*

<sup>5</sup> Tumma niidi ka taföönyö ka Yasu no, eege kamiini kiidü ka tadünüğü aaga a'da Masala ma töyeene a talüllü titaalo kono. <sup>6</sup> Aminna, kaja ka takiki a'da kagosso angnga ka taneene nja Masala angnga saga tagala ka takütü ka tanna ka talüllü ya, ara angnga taga kadu tanno korokoro no nitaalo naneene taneene ma timin'da. <sup>7</sup> Illi kaja ka taganna ka töyeene afa moono ka tanna ka töyeene kungngo, angnga taganeene ka'dügüllü angnga tafaana ka oona, eriidö ya 'Bii'bala tiya oono Yasu Almasiihi tagunu tatoroko kaja ka oona.

<sup>8</sup> A kaja ka tiki a'da taalo angnga koroko, angnga

tüüsini nanggeyi naaja a timin'da titaalo kaja ka oona. <sup>9</sup> A kaja ka tamma a'da angnga koroko angnga tatiraana dhorro ka Masala kidha, Masala ma dhorro mo madho ka fiinii mara tamma kaja magala angnga ka oona madho angnga ka fiinii. <sup>10</sup> A kaja ka tiki a'da taalo angnga kagalinggo tatoroko ya, ara angnga tanangnga Masala ka takorokoro a tumma noono taalo ka tanna kaja.

## 2

### *Almasiihi oolona kaja*

<sup>1</sup> Laala eede, a'a narigiri ada waraga aaga a'da aaga tafa ta'dingga ka tatoroko. Üürü ömö'di saga 'dingngö ka tatoroko ya, Yasu Almasiihi ya adho ka fiinii ya eema nja Pupa kudumma angnga. <sup>2</sup> A Yasu Almasiihi ka eyi tiya iini a tirri ma tagala tatoroko naaja, taalo unggodho angnga lakiini ara tagala tatoroko ma kadu ka 'büdhülü nye'd'de kungngo.

<sup>3</sup> Kaja ka taföonyö talaana na Masala, ara angnga tagamma a'da ka kussu angnga oogo. <sup>4</sup> Ömö'di ya iki a'da i'i ussu oogo ya, lakiini taalo alinggo a tumma tanno ooño, akorokoro, taalo tumma dhorro kini. <sup>5</sup> A ömö'di ya ümmü tumma na Masala alinggo iini ya, tasaasa na Masala ka tigi kini ka oona ara angnga tagussu a'da angnga ka unggodho nja Masala. <sup>6</sup> Ömö'di ya amma a'da i'i afünü sigiri nja Yasu

ya, fa kini aneene taneene na Yasu Almasiihi.

### *Talaana ma 'bitüngngö*

<sup>7</sup> Nagöre eede, talaana neede ka rigiri ada co aaga no, taalo tumma na issi no eege kamiini, talaana na illi no eege kamiini, ya taganna kada ka dhidha aaga taföonyö. <sup>8</sup> Lakiini a'a narigiri ada aaga tumma na issi no co aaga timin'da minni kijidene ka Yasu nja aaga kudumma talüllü kinynyo a töyeene ma timin'da ka öyeene.

<sup>9</sup> Ömö'di ya iki a'da i'i ama töyeene assa ka kürimi nagöre niini, i'i ya minni ya ta'bitüngngö aleefe tanna ka talüllü. <sup>10</sup> A ömö'di ya asaasa nagöre niini ya, i'i yunggo efe ka töyeene, a niimö matara tüpu i'i ka tatoroko kungngo ya titaalo. <sup>11</sup> A ömö'di ya akirimi nagöre niini, i'i anna ka talüllü awwa fiinii taalo ussu kita iini ka tapadaga co, kudumma ma talüllü ka ta'bürü i'i akisinsoro.

<sup>12</sup> A'a narigiri ada aaga laala eede,

kudumma Masala mara tagala tatoroko naada kudumma ma eere tiya Yasu Almasiihi.

<sup>13</sup> Aaga na kafaafa no, a'a narigiri adaga co aaga, kudumma ada ka ndussu Yasu ya ma dhidha ya.

Kadimöögö, narigiri ada a'a co aaga  
kudumma ada ka tagii'bi Ebliisi.

<sup>14</sup> A'a narigiri ada tumma aaga, aaga na kafaafano, kudumma ada ka tussu i'i ya aganna ka dhidha.

Kadimöögö, a'a narigiri ada co aaga kudumma ada kana türü, a tumma ma Masala tafünü sigirii kada ka nanggeedi aaga kagii'bi Ebliisi.

*Aaga fa tasaasa eema ma 'büdhülü*

<sup>15</sup> Aaga fa tasaasa eema ma 'büdhülü alla eema ya ka 'büdhülü ya. Üürü ömö'di asaasa eema ma 'büdhülü ya, taalo tasaasa a'da Pupa ka tanna kini ka eedi.

<sup>16</sup> Eema nye'd'de kungngo ya ma 'büdhülü ya, tallogo ma tuu'da a tallogo ma tasaasa eema ana iiye, eema ka 'büdhülü tiya nye'd'de kungngo taalo ö'dö ndama Pupa, ö'dö ndama 'büdhülü.

<sup>17</sup> A 'büdhülü ana eema tiya inggide nye'd'de ya kadu ka asaasa yá, ara tamanyaga itaalo. A ömö'di ya ara tafünü sigirii ka Masala ya, ara tefe ka 'dii ta'billi.

*Nadiidi na Almasiihi*

<sup>18</sup> Laala eede, asa 'büdhülü takete ka titaalo, a tumma killi ka tirina co aaga a'da diidi ma Almasiihi inggide ara tö'dö. A 'bitüngngö asa nadiidi ma Almasiihi ka ndadele oona, yungngo aja ka tagussu a'da 'büdhülü ndakete ka titaalo. <sup>19</sup> Kagedhe oona kaja ka oona, kudumma eene taalo ka kadu tanno aja. Kene ka

ta kadu tanno aja katakütü njä angnga, eege kagedhe oona amang kene tussu adene a'da eege kitaalo njä angnga.

<sup>20</sup> Illi aaga Koronggore ya Insili ya ungngo ada ka oona aaga nye'd'de tussu tumma ma timin'da. <sup>21</sup> Taalo a'a narigiri ada aaga, kudumma ada kitaalo kussu timin'da, lakiini kudumma ada ka tussu i'i, kudumma korokoro taalo atö'dö ndama timin'da.

<sup>22</sup> Mada yungngo a korokoro adha? Ömö'di ya iki a'da Yasu taalo Almasiihi ya i'i yungngo a diidi ma Almasiihi. I'i a'düsünü Pupa nya 'bii'bala eege a teera ma eene. <sup>23</sup> Ömö'di ya a'düsünü 'Bii'bala ya, a'düsünü Pupa tekere, a ömö'di ya amma ka 'Bii'bala ya, amma ka Pupa tekere.

<sup>24</sup> Aaga assa kide so, yaada ka taföönyö ka dhidha ya ütü kada. Üürü nggeege ya, ara aaga tekere tüü ka 'Bii'bala nya Pupa. <sup>25</sup> Tumma no eege kungngo a Yasu ka takiki a'da i'i ara tanangnga angnga no, tefe ka 'dii ta'billi.

<sup>26</sup> A'a narigiri ada aaga a tumma co aaga ma kadu tanno kasaasa tüüsüni aaga no. <sup>27</sup> A Yasu Almasiihi uuru Koronggore yiini kada ka oona, a Koronggore yiini kara tüü kada ka oona, taalo aaga ka tasaasa ömö'di a'da alaanaga aaga. Kudumma Koronggore alaana aaga ka eema nye'd'de, talaana niini eege kamiini, timin'da eege kamiini, taalo korokoro.

Aaga linggo, aaga ütü ka talaana ma Koronggore so, aaga ütü ka taneene nja Yasu.

### *Laala ya Masala*

<sup>28</sup> A 'bütüngnö laala eede, aaga idhi oona kini, amang kini tadhe, angnga kaana türü ana i'i, a modolo miini tafa tagu angnga kini ka tö'dö.

<sup>29</sup> Kussu aaga a'da Yasu adho ka fiinii, aaga tussu a'da ömö'di ya alinggo tumma na dhorro no, i'i ya 'bii'bala ma Masala.

## 3

### *Laala ma Masala*

<sup>1</sup> Aaga sala ka Pupa ka asaasa angnga nya idhi angnga kana eere a'da laala ma Masala, a'da timin'da angnga ka laala tiya oono, a kadu ka 'büdhülü taalo kussu angnga kudumma eene taalo kussu Masala. <sup>2</sup> Kadu eede, 'bütüngnö ya angnga ka laala ma Masala, a ta'bütüngnö ara angnga taga minna. Illi angnga kagussu a'da Yasu ka tabbü 'dala ya, ara angnga tafeene nja iini kudumma aja ka takassa kini ana oona miini. <sup>3</sup> Ömö'di ya ümmü tindhigü ma Almasiihi ya, anangnga tuu'da niini ka tinsili afa Yasu ka tinsili kungngo.

<sup>4</sup> A ömö'di ya weerö a'bana ko'do a tumma ana seriye tiya Masala, kudumma weerö a'da ta'bana ko'do ana seriye. <sup>5</sup> Kussu aaga a'da Yasu Almasiihi ö'dö ka 'büdhülü kita amang kini ta'duga

tatoroko nüidü, taalo tatoroko kini ka oona. <sup>6</sup> A ömö'di ya amma'da kini nja tiya taalo a tüdü ka tünni weerö ya. A kadu na weerö no taalo kadinö kini kitaalo kussu i'i 'do.

<sup>7</sup> Laala eede, aaga tafa ka ömö'di töccö iisini aaga. Ömö'di ya ünni ta'diila ya insili oona afa ma Yasu ka tinsili kungngo. <sup>8</sup> I'i ya ütü ka tünni weerö ya ama ma Ebliisi, kudumma Ebliisi jiddi ma 'billi ünni weerö. A 'Bii'bala ma Masala agöö'dö ka 'büdhülü miini ka öö'dö tarigi linggo na Ebliisi. <sup>9</sup> Taalo ömö'di ya ageenedene ndama Masala ya ara tüdü ka linggo tatoroko kudumma tööyö tammo Masala mütü kini itaalo ara tambaanya tünni tatoroko kudumma iini ka tageenedene ndama Masala. <sup>10</sup> A tambanajaana ku'bu ma laala ma Masala nja laala ma Ebliisi eege kungngo, ömö'di ya taalo ünni ta'diila anu ka örre tiya iini ya, taalo ö'dö ndama Masala.

### *Aaga asaasa ajeene*

<sup>11</sup> Talaana naada ka taföönyö ka dhidha no, kiki a'da angnga tasaasa ajeene. <sup>12</sup> Angnga tafa tafeene afa ma Kayiin ya agiidi örre yiini ya. Kayiin aga 'bii'bala ma Ebliisi. I'i agiidi örre yiini amana? I'i agiidi örre kudumma linggo tanno Kayiin ka kalinggo ma weerö, a linggo na örre tiya iini tagalinggo ma ta'diila.

<sup>13</sup> Aminna, nagöre eede, aaga fa tadhere üürü

kadu ma 'büdhülü kagürü aaga.<sup>14</sup> Kussu angnga a'da kada'da angnga ka inde, angnga tagata'daga ka tefe ka 'dii, kussu angnga tumma no nya? Kussu angnga eege kudumma aja ka tasaasa nagöre naaja. Ömö'dii ya anu ka nagöre ya, ara tüütü ka inde.<sup>15</sup> Ömö'dii ya akirimi örre yiini ya i'i ya ömö'dii tiya agirina kadu ya miini. Aaga kussu a'da ömö'dii ya agirina kadu ya taalo tefe ka 'dii ta'billi kara tanna kini.<sup>16</sup> Kussu angnga minna yungngo tasaasa, Yasu üpü eyi yiini co ka üüdü ma angnga, angnga tekere tüüpü nanggeyi naaja co ka üüdü ma nagöre tanno aja.<sup>17</sup> Ömö'dii ya eema ma 'büdhülü ya a'diila ya ka tanna kini assa taalo ana 'bangnga ma örre ya eema ka titaalo kini, ömö'dii ya miini ya ara tasaasa na Masala tafünü sigiri kini nya?<sup>18</sup> Ka laala eede, katafa tageema tafaana ka oona a tumma ma niinö nya onggo'do ün'dügüngngö, lakiini a linggo nya timin'da.

### *Fünü sigiri ka Masala kidha*

<sup>19</sup> Nggeege ya, ara angnga tagussu a'da angnga ka kadu ma timin'da a ri'ba taalo a tagu angnga ka Masala kidha.<sup>20</sup> Üürü nanggeedi naaja ko'deere angnga, angnga tagussu a'da Masala ma dhabbu a nanggeedi tanno aja, mussu eema nye'd'de.

<sup>21</sup> Kadu eede, ka nanggeedi tanno aja taalo ko'deere ya, taalo ri'ba ma ta'düngnge ka Masala kidha kara tagu angnga.<sup>22</sup> Ara angnga taduna niimö yaaja ka tasaasa kono ya nya? Kaja ka taföönyö tumma kono angnga tagalinggo a tumma tanno 'diila kono ka oona no.<sup>23</sup> Talaana noono ka anangnga angnga no, anangnga tagamma ka eere ma Yasu Almasiihi 'Bii'bala yoono, angnga tafaana ka oona afa moono ka tagalaana angnga kungngo.<sup>24</sup> Ömö'dii ya ara talinggo a talaana tanno Masala ya, ara tafünü sigiri ka Masala a Masala tafünü sigiri kini. Angnga kagussu a'da Masala mafünügü sigiri kaja, a Koronggore tiya oono ka anangnga angnga ya.

## 4

*Koronggore ma timin'da ya nya tiya ma korokoro ya*

<sup>1</sup> Kadu eede, aaga fa tamma ka nagoronggore 'do ün'dügüngngö, aaga asaana nagoronggore ku'bu kudumma nagane'bi tanno korokoro no kö'dö ka 'büdhülü kadhabbu.

<sup>2</sup> Ara aaga tussu Koronggore ya Masala nya? Koronggore ya tamma ka Yasu Almasiihi ya ö'dö ka tamö'dii ya, koronggore ya miini ya ndama Masala.

<sup>3</sup> Lakiini koronggore ya taalo amma a'da Yasu ö'dö ndama Masala ya, i'i ya koronggore ya diidi ma Almasiihi yaada ka taföönyö a'da ara tö'dö,

i'i yungngo ka 'büdhülü 'bitüngngö.

<sup>4</sup> Laala eede, aaga ka ma Masala, aaga tagii'bi nagane'bi na korokoro no. A Masala mungngo kada mamana türü adagii'bi Ebliisi, ya ungngo ka 'büdhülü 'bitüngngö ya. <sup>5</sup> Eege keema a tumma ma 'büdhülü, a 'büdhülü taföönyö kene kudumma eene ka ma 'büdhülü. <sup>6</sup> Angnga ka ma Masala. A ömö'di ya ussu Masala ya aföönyö tumma naaja. A ömö'di ya taalo ama Masala ya taalo aföönyö tumma naaja, nggeege yungngo aja ka tagussu tambananago ma korokoro nja Koronggore tiya dhorro ya.

### *Masala ma tasaasa*

<sup>7</sup> Ka tasaasa ajeene so kadu eede, kudumma tasaasa kö'dö ndama Masala. A ömö'di ya asaasa kadu ya ageenedene ndama Masala, ussu Masala.

<sup>8</sup> Ömö'di ya taalo asaasa kadu ya, taalo ussu Masala, kudumma Masala oogo ma tasaasa. <sup>9</sup> A Masala mala tasaasa noono angnga, kono ka kürünü 'Bii'bala yoono ya unggodho ya, öö'dö ka 'büdhülü a'da amang kaja tefe ka 'dii ana i'i. <sup>10</sup> Tasaasa eege kungngo, tasaasa naaja ka asaasa Masala no taalo ka dhorro, lakiini Masala masaasa angnga magürünenü 'Bii'bala yoono kada tırri ma ta'duga tatoroko naaja.

<sup>11</sup> Kadu eede, ka Masala ka ndasaasa angnga tasaasa no

'dee, kada asaasa ajeene tekere. <sup>12</sup> Taalo ömö'di ma tadini ka Masala ana ööye, a kaja ka tasaasa ajeene ara Masala tüütü ka taneene nja angnga a tasaasa noono tüütü kaja ka oona.

<sup>13</sup> Angnga ka kussu a'da angnga köödhü nja Masala, a Masala töödhü nja angnga kono ka anangnga Koronggore yoono angnga.

<sup>14</sup> A angnga ka kussu, angnga tadini kide, ungngo tadirina a kadu a'da Masala magürünü 'Bii'bala yoono tatoolona ma 'büdhülü.

<sup>15</sup> Ömö'di ya amma a'da Yasu a 'Bii'bala ma Masala ya, ara Masala töödhü mafünü sigiri, i'i tafünü sigiri nja Masala. <sup>16</sup> Angnga kussu tasaasa na Masala ka anangnga angnga no.

Masala ma tasaasa, a kadu na aneene ka tasaasa no, kafünü sigiri kono, Oogo mafünü sigiri kene.

<sup>17</sup> Tasaasa katüümö kaja amang kaja tana rüsü ka uuru ma tahükümü kudumma tefe ka 'dii tanno aja ka 'büdhülü tiya kafeene angnga nja Almasiihi.

<sup>18</sup> Taalo ri'ba ka tasaasa, tasaasa na dhorro no ya kasoro ri'ba kaja ka oona, kudumma a ri'ba kama tapusu adene. Ömö'di ya ari'ba ya taalo tasaasa na Masala kadigine kini ka oona.

<sup>19</sup> Angnga tafaana ka oona kudumma Masala masaasa angnga ka dhidha. <sup>20</sup> Ömö'di ya iki a'da, "Nasaasa a'a Masala," a'da agiri örre tiya

iini, ömö'di ya miini ya a korokoro, kudumma iini ka anu ka örre tiya iini ka iji i'i ana ööye ya, ara tam-baanya tasaasa Masala miini ka itaalo adinö kono ana ööye mo? <sup>21</sup> Tumma na öö'dö ndama Yasu Almasiihi no kiki, Ömö'di ya asaasa Masala ya a tasaasa örre ya iini.

## 5

### *Tamma ka 'Bii'bala ma Masala*

<sup>1</sup> Ömö'di ya amma a'da Yasu ya Almasiihi ya ageenedene ndama Masala nja ömö'di tiya asaasa pupa ya, ara tasaasa 'bii'bala yiini. <sup>2</sup> Kakussu angnga a'da kasaasa angnga laala ma Masala kaja ka tasaasa Masala angnga tagalinggo a talaana tanno oono. <sup>3</sup> Kudumma tasaasa ma Masala a'da angnga tagalinggo a talaana tanno oono, a talaana noono taalo kagu'daana. <sup>4</sup> Ömö'di ya ageenedene ndama Masala ya ara tii'bi eema ma 'büdhülü, tamma ka Masala naaja eege kungngo kara tanangnga angnga ka kilinigi eema ma 'büdhülü co. <sup>5</sup> Mada yungngo ara takilinigi 'büdhülü co? Illi ömö'di ya amma a'da Yasu a 'Bii'bala ma Masala.

<sup>6</sup> Ömö'di ya ö'dö ya, Yasu Almasiihi i'i ya miini ö'dö a 'biidi nja eriidö, taalo 'biidi unggodho i'i lakiini a 'biidi nja eriidö. A Koronggore i'i yungngo atiraana, kudumma Koronggore a

timin'da. <sup>7</sup> Eege na iidoona no kadünnü tumma ma timin'da. <sup>8</sup> Koronggore nja 'biidi nja eriidö eege na iidoona no ka unggodho. <sup>9</sup> Üürü kamma angnga ka tumma tanno kadu, lakiini tumma na Masala ka idhindhi. A tumma na Masala noono ka tageema ma 'Bii'bala tiya oono eege kungngo. <sup>10</sup> Ömö'di ya amma ka 'Bii'bala ma Masala ya, tumma no miini kungngo iini ka eedi. A ömö'di ya taalo amma ka Masala ya, anangnga Masala kada korokoro, kudumma iini taalo amma ka tumma tanno Masala ka tiraana ma 'Bii'bala tiya oono. <sup>11</sup> Tumma eege kungngo, Masala manangnga tefe ka 'dii ta'billi angnga, a tefe ka 'dii na miini no kungngo a 'Bii'bala tiya oono. <sup>12</sup> Ömö'di ya amma ka 'Bii'bala ya, tefe ka 'dii na miini no kungngo ömö'di tiya miini ya. A ömö'di ya taalo amma ka 'Bii'bala ma Masala ya taalo tefe ka 'dii na miini no kini.

### *Tefe ka 'dii ta'billi*

<sup>13</sup> A'a narigiri ada aaga amang kada tussu a'da kana aaga tefe ka 'dii ta'billi, aaga na amma ka 'Bii'bala ma Masala no. <sup>14</sup> Ka kussu angnga dhorro a'da ara Masala taföönyö fara yaaja kaja ka tasaasa niimö tiya oono ya a'diila kono ka oona ya. <sup>15</sup> A kaja ka tagussu a'da oogo maföönyö fara ma niimö tiya aja ka taa-fara kono ya, angnga tagussu

a'da nüümö ya miini ya ara tananja angnga.

<sup>16</sup> Üürü naduna o'o örre yüdü ka tüünii tatoroko na taalo kara tüpü i'i ka inde no, fa kini afara ka Masala, oogo mara tanangnga tefe ka 'dii iini. A'a neema ka kadu tanno weerö tammo eene taalo ma tüpü eege ka inde mo. Tatoroko kinggide kuurugu kadu ka inde. Taalo a'a niki a'da ara tafara ka Masala kudumma iini. <sup>17</sup> Eema ya toroko nye'd'de ama tatoroko, illi tatoroko ökömö kinggide taalo mara tüpü angnga ka inde.

<sup>18</sup> Kussu angnga a'da ömö'dii ya ageenedene ndama Masala taalo talinggo tatoroko, ömö'dii ya ageenedene ndama Masala ara tafa kini, a Ebliisi taalo ara tilii i'i ka oona. <sup>19</sup> Kussu angnga a'da angnga ka kadu tanno Masala, a kadu ma 'büdhülü nye'd'de ungngo ka niisö ma tauugaara ma Ebliisi. <sup>20</sup> Kussu angnga a'da 'Bii'bala ma Masala ö'dö anangnga ta'dara angnga amang kaja tussu oogo, oogo ma timin'da. Angnga takütü kono oogo ma dhorronja 'Bii'bala tiya oono Yasu Almasiihi. Oogo ma Masala tammo dhorro mo nja tefe ka 'dii ta'billi. <sup>21</sup> Laala eede, agadinö ko'do aaga tafaana ka oona ma namasala ma korokoro.

## Waraga ya Yühanna ya Eera ya Tafa'da tumma

Tafiinii Yühanna arigiri waraga ya adhügängü ya, unggoo co kaniisa tammo iini ka tümmünü oogo a'da "aka mo." I'i asaasa tö'dö tassa kene kita kungngo. I'i iki a kadu ma kaniisa a'da kaföönyö tumma na Yasu kunggeene ka fiinii ma tasaasa ajeene nja ka könö. Adünögü eema eene ma katalaana tanno oroko no na iisini kadu no eene ka tiki a'da Yasu taalo ö'dö ka 'büdhülü kada ta ömö'di.

### Tööjüllü

<sup>1</sup> A'a na tadiifi, nunggu tumma no co aka tammo a Masala ka tagesse oogo mo nja laala tiya oono, neede ka asaasa eege ma timin'da nye'd'de no. Taalo a'a unggodho a'a nungngo NASAASA o'o, a kadu nye'd'de na ussu timin'da no kasaasa o'o. <sup>2</sup> Kudumma a timin'da tüütü kaja ka eedi ya, kara tüütü kaja ta'billi.

<sup>3</sup> A türü nja 'bangnga nja ta'diila ndama Masala Pupa nja Yasu Almasiihi 'Bii'bala ma Pupa aneene nja angnga ka timin'da nja tasaasa.

### Timin'da nja tasaasa

<sup>4</sup> Ka'diila oona eede nad-hodho 'do kede ka tuna laala yüüdü öccö ka tunggunu ka fiinii ma timin'da, afa ma tiya Pupa ka tadirina

angnga ya. <sup>5</sup> A 'bitüngngö, 'badaada eede, NASAASA a'a niimö unggodho küdü, taalo talaana könö afe'de, talaana na illi kaja no eege kamiini, lakiini a'a NASAASA küdü a'da angnga tafaana ka oona.

<sup>6</sup> Tasaasa eege kungngo, a'da angnga tagungunu ka fiinii ma talaana tanno oono, a talaana eege kamiini, afa maada ka taföönyö ka dhidha kungngo, fiinii ma tasaasa.

<sup>7</sup> 'Büdhülü ya tigine a kadu ma tüüsineene no, taalo kamma a'da Yasu Almasiihi öö'dö ka 'büdhülü a tuu'da ma tadü'd'dü. Tatüüsineene ya diidi ma Yasu i'i ya miini. <sup>8</sup> Aaga adinö ko'do amang kada tafa taama linggo tanno ada ka tagalinggo ün'düngängö. Lakiini ara aaga ta'duga talingnge naada kadigine. <sup>9</sup> Ömö'di ya ata'da ka tumma tanno Yasu ko'do itaalo idhi oona ka talaana tanno Almasiihi ya, taalo Masala ma taneene nja iini. Ömö'di ya idhi oona ku'bu ka talaana tanno Almasiihi, ara taneene nja Pupa nja 'Bii'bala nye'd'de.

<sup>10</sup> Ka ömö'di töccö ka tö'dö a talaana tanno eefe no, aaga fa tamma kini kada ka 'di. <sup>11</sup> Kudumma ma ömö'di tiya ara tamma kini ya ara tosse ka eema ma tatoroko nja iini.

<sup>12</sup> Tumma kungngo eede kadhabbu neede kadarigiri adaga co aaga no, illi a'a niki a'da nüüdhü tikinggi, ara a'a kaala aaga kide ana oona ma a'a, angnga saga tageema angnga tagadhodho. <sup>13</sup> Laala

ya ïnye tammo üüdü ya  
Masala ka tagesse eege no  
kööjülü o'o.

## Waraga ya Yühanna ya Iidoona ya Tafa'da tumma

Yühanna ya tafiiñi i'i arigiri waraga ya adhügängü ya unggü co uugaara ma kaniisa ya ana eere a'da Kayis ya. Yühanna ïndhígü Kayis ko'do kudumma iini ka tagüünii tatafala amana eema a kadu tanno öleele kalaana tumma ma ïnjülli ma Yasu. I'i eemaga tumma co Kayis a'da ümmü tanenee ma kadu ma kaniisa na üünii eema ya a'diila ya. I'i iki iini a'da, afa turna kadu na üünii tam'baga no keere nja tanno ümmü nanggeyi neene ka tii'baana ka nakaniisa no.

### Tööjülu

<sup>1</sup> Waraga ya ö'dö ndama a'a na tadiïfi no nunggu co teefe ma a'a Kayos yeede ka asaasa i'i ana eedi timin'da ya.

<sup>2</sup> Teefe ma a'a, nasaasa a'a a'da o'o taneene a ta'diila ka eema nye'd'de. Ka ta'diila ma tuu'da ma oona nja o'o ka'diila ka koronggore. <sup>3</sup> Ka'diila oona eede a nagöre köö'dö kadiri tumma ma o'o ka tümmü timin'da na o'o tunggunu ka fiinii ma timin'da. <sup>4</sup> Taalo niimö ma tanangnga a'a ka tadhodho afa ma tiya eede ka föönyö a'da laala yeede kunggunu ka fiinii ma timin'da.

## Yühanna afünügü Kayis ko'do

<sup>5</sup> Teefe ma a'a, a'diila nggeege üdü kafa ka nagöre ma angnga nja kölöge. <sup>6</sup> Kadirina tumma ma o'o kidha ma kaniisa a'da o'o niimmü eege a tasaasa. Ara ta'diila küdü kara tattogo eege, a tumma no kara ta'diila ka Masala ka oona no. <sup>7</sup> Eege kunggeene kudumma eere tiya Almasiijihi, kaanu ka kona niimö ka kadu no taalo kamma ka Almasiijihi no. <sup>8</sup> Angnga ama tada'da kadu no, amang kaja tosso ka linggo ma timin'da nja eene.

### Ditriüfös nja Dimitrios

<sup>9</sup> A'a narigiri ada waraga co kadu ka kaniisa, illi Ditriüfös ya asaasa a'da i'i ta uugaara meene ya, taalo asaasa angnga. <sup>10</sup> Kede kara tö'dö, ara a'a sa tirina eema yini ka tüünii ya o'o, i'i adünnü tumma na toroko no kaja ka oona. I'i taalo aadha ka eema tiya miini ya, i'i anu ka tada'da nagöre ma angnga, adünügü tumma a kadu töccö a'da kafa takinyi eege. Kene ka takinyi eege ya, ikirü ka tasoro eege ka kaniisa.

<sup>11</sup> Teefe ma a'a, fa takinya tumma na toroko no, o'o adha ya, üünii eema ya a'diila ya. Ömö'dü ya a linggo tumma na 'diila no, i'i ama Masala. A ömö'dü ya üünii tumma na Ebliisi ya, taalo adinö ka Masala. <sup>12</sup> A kadu nye'd'de kungngo keema a tumma na 'diila na Dimitrios

ka tüünii no, a taneene ni-ini tanangnga kadu ka tussu a'da a'diila a angnga teema kini ka oona nggeege, na o'o tussu a'da tumma naaja ka timin'da.<sup>13</sup> Eema inggide a dhabbu 'do yeede ka asaasa tarigiri ada o'o iini, lakiini a'a taalo nasaasa i'i kada hibiri nya galamu.<sup>14</sup> Nadïnö a'a fiinii a'da na a'a tassa küdü kete kungngo angnga saga teemaana ka oona.

<sup>15</sup> A'a nööjülü o'o. Kateefe no eege kungngo kita no na asaasa o'o no kööjülü o'o. Ööjülü kateefe na asaasa angnga no a nagereene tanno eene.

## Waraga ya Yahüusa Tafa'da tumma

Waraga ya adhüküdhükü ya, Yahüusa i'i yungngo aga-rigiri. I'i aga örre ya Yasu. I'i arigiri waraga ya co kadu ma kaniisa könö na tumma ma kadalaadene tanno korokoro no ka'bana ko'do nya eene. Katalaana no ka'bana ko'do a talaana ma türü ma Masala ka'bunu kadu ma kaniisa a'da kaneene ka fiinii tiya toroko ya. A Yahüusa tageema nya kadu kaniisa a'da kümmü ajeene dhorro ka tumma ma timin'da ma Masala nya İnjili tammo Yasu afa meene ka taföönyö ka kadafiinii tanno Yasu no kungngo.

### Tööjülü

<sup>1</sup> Waraga ya ö'dö ndama a'a Yahüusa ömö'dü ma linggo ya Yasu Almasiihi nya örre tiya Yaguub, nunggu co ka kadu tanno Masala Pupa ka tümmünü eege no Pupa yaaja kasaasa eege mafa kene ana Yasu Almasiihi. <sup>2</sup> 'Bangnga mungngo ada dhabbu nya ta'diila nya tasaasa.

### Katalaana na korokoro no (2 Bütrüs 2.1-17)

<sup>3</sup> Kadu eede nasaasa a'a tagarigiri ada waraga aaga ma toolonadene tanno aja no, a'da niji a'a eedi yeede ka anangnga a'a ka rigiri adaga waraga aaga amang kada takardha ku'bu aaga talingga dhorro ma

tümmöönö ka tamma tanno Masala ka anangnga a kadu tanno oono nye'd'de ta unggodho. <sup>4</sup> Kudumma kadu könö kinggide kalinggo diidi ma Masala kafiri kada ka söödö kada ünggü ma taga'da türü na Masala kafa kaja taganeene taneene ma tatoroko. Eege ka'düsünü Uugaara yaaja Yasu Almasiihi ya unggodho ya.

<sup>5</sup> Nasaasa a'a tadirina tumma aaga, kussu aaga a'da Masala kono ka toolona kadu noono ka Misiri, lakiini amussu kungngo ya magirina kadu no taalo kamma kono no. <sup>6</sup> Nja kadhangga tanno taalo kümmü linggo neene dhorro no, kaadha ka 'buugu ma taneene tiya eene, mafidini Masala eege ku'bu a nakilli ta'billi manangnga eege ka 'buugu tiya alüllü ya ara uuru ma tasigidene na dhabbu no köö'dö. <sup>7</sup> Afa Sadöma nya Amuura nya naanya tanno akete kene no, kagalinggo eema ya toroko ya temelö ya taalo adho ka fiinii ya, kara tapusu adene ka issi ta'billi amang ka kadu töccö tussu.

<sup>8</sup> Kadu no kaneene afa kadu ma kümböödö no, ma taga'da tuu'da neene ana eema ma temelö, kanu ka tauugaara keela kadhangga.

<sup>9</sup> Münda Mikayiil ya uugaara ma kadhangga ya kene ka tisaana ka oona ma oofo tiya Müüsa nya Eблиisi ya, taalo agasigi i'i a tumma ma midhi agala ka tiki iini, "A Masala teela o'o." <sup>10</sup> A kadu na mi-

ini no kar'daana eema a'da taalo kussu, lakiini eema yeene ka tussu ya, kussu i'i afa ma eema ma eriidö ya taalo ussu nüümö ya, i'i yungno anangnga eege ka taama.

<sup>11</sup> Am'ba kene kudumma eene ka tuurna ton'd'o ya Kayin keere, kümmünü eyi yeene ka tam'baga afa Balam kisi ka eema ma almaala keere, kaaya afa Koreh iini ka tagaanu ka tumma tanno Masala.

<sup>12</sup> Kafeene nja nyoro ka 'buugu ma tagureene ma tanagöre kaguri a'da taalo modolo magu eege, kanaana iïye ka eyi tiya eene, kaguri küüsü. Kafeene nja tülüögü na 'biidü ka titaaloo kide no, a tanya tüüsö iini. Eege ka naafa ma tüyi taalo iïye kide kaaya teera kafannadene ana ereere. <sup>13</sup> Kafeene nja 'biidü ma to tiya lumuli ya üpü ndoore kada modolo, eege kafeene nja midigi tammo öleele ün'dügüngngö mo. Masala mafa kene ma tanangnga eege ka 'buugu tiya lüllü ya turi.

<sup>14</sup> Akanuk ya iïdümmü afünü eera ka Adam keere ya adirina tumma eene iki, "Aaga assa ka Uugaara ka öö'dö nja kadhangga tanno iini na insili no kadhabbu. <sup>15</sup> Ara tö'dö tümmü kadu nye'd'de asigi kadu no oroko, neene ka teema kini ko'do eege na oroko no ka eema tiya eene ka talinggo ya nja eema tiya toroko ya." <sup>16</sup> Kadu

no ka'digineene kar'daana eema, karuna eema ma tatoroko ma nanggeedi tanno eene, ka'diniga oona neene coo'do killi kadu könö ma tasaasa eema ma nanggeyi tanno eene.

### *Taneene ma kadu ma kaniisa*

<sup>17</sup> Illi aaga kadu eede, aaga küigi tumma na kadafüni tanno Uugaara tiya aja Yasu Almasiihi ka tageema 'billi no. <sup>18</sup> Kiki aaga, "Kadu kinggide kara sa köö'dö ka uuru tanno eere no kamidhi aaga, kuurna fiini ma tatoroko yeene keere." <sup>19</sup> Eege kasümünaana kadu ku'bu kasaasa eema ma 'büdhülü taalo Koronggore eene ka oona.

<sup>20</sup> Lakiini aaga kadu eede, aaga idhi oona ku'bu ka tamma ma Masala tammo insili mo, aaga tafara ka Masala a Koronggore tiya Insili ya. <sup>21</sup> Aaga fa ka oona ka tasaasa ma Masala, aaga tündhigü 'bangnga ma Uugaara tiya aja Yasu Almasiihi ma tö'dö a tefe ka 'dii ta'billi aaga.

<sup>22</sup> Aaga ana 'bangnga ma kadu tanno aleefe ta'doore ka nanggeedi no. <sup>23</sup> Iisi kadu ökönö na asaasa toolon-adene ka issi no unggu eege kürö, ala 'bangnga a kadu ökönö a ri'ba, lakiini anu ka en'di tiya yeene ya nyoro a tuu'da tanno eene ka tanyoro eege.

### *Tamana ta'diila a Masala*

<sup>24</sup> Masala mana türü ma tafa kada kudumma ma

eema tiya toroko ya, mara  
kanangnga aaga ka 'dïngnge  
kidha ma tüdhïndhi tanno  
oono, aaga tadhodho a  
tumma ma toroko ya titaalo  
ada ka oona.<sup>25</sup> A tüdhïndhi  
na Masala ma unggodho mo  
tatoolona yaaja ana Yasu  
Almasiihi Uugaara yaaja,  
tüdhïndhi nja tauugaara nja  
nagürüünü tanno dhidha  
no, nja 'bïtingngö nja  
ta'billi. Amiin.

## Waraga ya Yühanna ma Tumma tanno Yasu Tafa'da tumma

Sorne ya tafiiñi Yühanna, i'i yungngo arigiri ma tanangnga tündhígü nja tafünögü kadu ma kaniisa ko'do na kadu kadalinggo eege kudumma ma tamma tanno eene ka Yasu Almasiihi no. I'i arigiri a'da Almasiihi ara tii'bi kadu na anu ka tumma tanno Masala no, ara ka anangnga talingnge a kadu tanno ütü ka tamma ka Masala no. I'i arigiri nawaraga co nakaniisa tanno iidümmü kafünü keera no ma tuu'bu eege ka nanggeedi a'da kütü ka tamma kafada ka fiini ma talaana tanno toroko no nja ungngo ma tam'baga (Tumma na Yasu 2—3). Yühanna ikiri eema yiini ka tijöögö ma Masala ka kööyö nja tanno amana tüdhindhi iini (Tumma na Yasu 4). Yühanna iji 'buugu ma dhünggü ya agiididene, Almasiihi ya a'duga sorne ka niisö ma Masala ya kudumma iini i'i yungngo ama tafa'da i'i. Tiji 'buugu no kaala angnga a'da Masala nja Almasiihi eege kungngo kafa ka eema tiya ka 'büdhülü ya (Tumma na Yasu 4—5).

Yühanna iji 'buugu ma tahükümü tanno ara tö'dö ka kadu tanno anu ka Masala no, tiji 'buugu

ma nahitimi ka iidümmü kafünü eera (Tumma na Yasu 6.1—8.5), tijöögö ma iidö ka iidümmü kafünü eera (Tumma na Yasu 8.6—11.19), nja tijöögö ma naadho ka iidümmü kafünü eera (Tumma na Yasu 16.1—21). Almasiihi ara tii'bi tatoroko ara tümmü kadu na anu ka timin'da tanno iini in'dili kungngo (Tumma na Yasu 17—20). Masala mara taga'da 'büdhülü ya, mara ka talinggo 'büdhülü ya issi ya, a kadu na ümmü i'i kada dhorro no kara taneene kada unggodho ta'billi. Taalo 'büidi ma iiye ma tadhügürü alla tin'di alla inde (Tumma na Yasu 21—22).

<sup>1</sup> Tumma na Yasu Almasiihi ka öö'dö iini ndama Masala, aala a kasaga tanno oono minna ara talinggo adene areere. Magürünü tadhingga yoono a'da aco adirina a tasaga tiya oono Yühanna.

<sup>2</sup> A Yühanna tadiri eema yiini ka tadinö kide ya nye'd'de ma Masala nja tumma tanno Yasu Almasiihi.

<sup>3</sup> A'diila nja ömö'di tiya iiri tumma ma tane'bi no, a'diila nja kadu na toodo kide kamma kide, kanangnga tumma na kirinja kide no ka nanggeedi, kudumma uuru ka ndakete.

*Tööjülü nakaniisa na iidümmü kafünü eera no*

<sup>4</sup> A'a na Yühanna nunggu a'a tumma no co nakaniisa tanno iidümmü kafünü eera no ka anya ma Asiya no.

A türü nja ta'diila tanno Masala a tananja aaga

ndama Masala ndama tiya inggide ya nja tiya aganna kide ya nja tiya ara tö'dö ya, ndama nagoronggore tanno iidümmü kafünü eera no kidha ma kööyö tiya iini,<sup>5</sup> ndama Yasu Almasiihi ya adho ka fiinii ya, ya adinö ka tumma ma Masala, ya afiki'dö ka inde ka dhidha ya, a tauugaara ma naguugaara ma 'büdhülü. I'i asaasa angnga oolona angnga ka tatoroko tanno aja ana eriidö tiya iini.

<sup>6</sup> Anangnga angnga kada tauugaara nja ka'boge ma talinggo ada a Masala nja Pupa tiya iini, tidhindhi nja türü kungngo iini turi ta'billi. Amiin.

<sup>7</sup> Aaga assa kini inni ungunu atö'dö ndama tülüügü, a kadu nye'd'de kara tiji i'i  
nja kadu tanno üfü i'i no, a kadu ka 'büdhülü nye'd'de tafara kudumma iini.  
Kara tatimin'da. Amiin.

<sup>8</sup> Masala Uugaara miksi, "A'a na dhidha na ta eere, oogo ma 'bitingngö, maganeene, oogo mungngo mara tö'dö, mana türü ma eema nye'd'de."

### Tata tümbü ma tumma tanno Yasu

<sup>9</sup> A'a na örre tiya ada Yühanna, angnga ta ungodho ka dhügürü nja tauugaara nja tidhi oona ku'bu naaja ka Yasu. Naganne a'a ka jasiira ma

Batümüs kudumma tumma ma Masala nja tumma tanno Yasu.<sup>10</sup> İkiri Koronggore ka 'dingngö kede ka oona ka uuru ma Uugaara, ikiri a'a ka föonyö ömö'di kalneege ko'd'do afa fara ma tinüidö.<sup>11</sup> Iki, "Kiri eema yüdü ka ijöögö ka sorne ya ku'bu nunggu co a nakaniisa tanno iidümmü kafünü eera no ka Afosus nja Samirna nja Pregamus nja Tiyatira nja Saardis nja Filadlifya nja Ladüküya."

<sup>12</sup> Nikiri a'a ka tassa keere ma tiiri ömö'di ya eema nja a'a ya, nasala nakoyo ma nagalamba ma dahaba iidümmü kafünü eera.<sup>13</sup> Nasala a'a ömö'di ka 'dingnge ka söödö ma nakoyo ma nagalamba afeene nja 'Bii'bala ma Tadü'd'dü, ten'di ma ungngo iini ka oona ma dhonggoro malla maco uune, a jönnö ma dahaba mimi'didene kini ka orro.<sup>14</sup> Awu ma üdü yiini a'bassa afa musa, afeene nja ndugaara, iiye niini ta'dangnga'da afa issi.<sup>15</sup> Uune niini kalimaana afa tanyaanya na lukulukadene ka motoo'do no, tumma niini kafeene nja fara ma 'büüdi tiya iisö ku'bu dhabbu ya.<sup>16</sup> Ümmü midigi miidümmü mafünü eera ka niisö ma kuri nja kulu'ba ma dhonggoro mo, mana kuri ka na'dugugini ateera meene micci akürö ndama miini ka niinö, alimaana ka dhugudha afa ndanaaya ma uuru ka teene.

<sup>17</sup> Kede ka tasala i'i ya na'dingga kini ka uune afa ömö'di ya eyi ya, ikiri ka tümmüni niisö ma kuri nini eede ka oona iki, "Fatariba, a'a na dhidha na ta eere, <sup>18</sup> a'a nefe ka 'di ya naga eyi a'a nungngo nefe ka 'di ta'billi turi ta'billi, a'a nana türü nadagii'bi inde nangafata ma inde unggo eede nja 'buugu ma inde.

<sup>19</sup> "Nggeege arigiri eema yüdü ka ijöögö ya so, eema ya 'bitingngö nja tiya ara tö'dö keere afe'de ya. <sup>20</sup> A niimö ya küdhü ma midigi tammo iidümmü mafünü keera mo müdü kijöögö kede ka niisö ma kuri mo, nja nakoyo ma nagalamba ma dahaba nüdü na iidümmü kafünü eera no, midigi tammo iidümmü mafünü keera mo eege ka kadhangga ma nakaniisa tanno iidümmü kafünü keera no, nja nakoyo ma nagalamba ma dahaba na iidümmü kafünü eera no eege ka nakaniisa tanno iidümmü kafünü keera no."

## 2

*Tumma ma co kaniisa ma Afosus*

<sup>1</sup> "Arigiri ada tumma co tadhangga ma kaniisa ma Afosus,

Tumma no ö'dö ndama ömö'di tiya ümmü midigi müidümmü mafünü eera mo a niisö ma kuri, unggene ka söödö ma nakoyo ma nagalamba ma dahaba ma iidümmü

kafünü eera no. <sup>2</sup> Nussu a'a linggo nüdü a dhügürü tiya üdü nja tidhi oona ku'bu tanno üdü. Nussu a'a a'da taalo o'o nasaasa tumma na kadu tanno oroko no, nussu a'da nagiirö o'o taneene ma kadu tanno iki a'da eege kada kadafiinö a'da eege taalo kada kadafiinö naduna eege kada korokoro. <sup>3</sup> O'o nidhi oona ku'bu nadagalinggo dhorro kudumma eere tiya eede nitaalo nagi'di.

<sup>4</sup> Lakiini niümö yeede ka koroo'bo nja o'o miini ya, kudumma üdü ka taadha ka tasaasa nüdü na dhidha no. <sup>5</sup> Agiigö kiga yungno üdü ka 'dinggö ndama iini, naadha ka tatoroko napadaga ka linggo tanno üdü ka dhidha no, üürü taalo o'o naadha ka tatoroko ya, ara a'a tö'dö küdü na'duga nakoyo ma lamba yüdü ka 'buugu tiya oono. <sup>6</sup> Lakiini tumma no kanangnga a'a ka 'diila nja o'o kudumma üdü ka anu ka tumma na naNikola afa meede ka anu kide kungno.

<sup>7</sup> Ömö'di ya ana iisine ya fa kini atoodo ka tumma tanno Koronggore ka teemaga co nakaniisa no. Ara a'a tanangnga ömö'di ya ii'baana kagu fa ma tefe ka 'di ya ka 'di ma singgi ma Masala ya."

*Tumma ma co kaniisa ma Samirna*

<sup>8</sup> "Arigiri ada tumma co tadhangga ma kaniisa ma Samirna,

Tumma no kö'dö ndama ömö'dü tiya dhidha ya nja tiya eere ya, ömö'dü ya aga eyi efe ka 'dü afe'de. <sup>9</sup> Nussu a'a dhügürü yüdü, nussu a'a a'da na'döngngönyö o'o, lakiini tumma dhorro nana o'o eema dhabbu, nussu a'a tumma ma midhi ma kadu tanno iki a'da eege ka Yahüüdü no, lakiini eege taalo ka Yahüüdü, lakiini eege ka la ma talaana kadu tanno Ebliisi. <sup>10</sup> Fatariba a dhügürü tiya ara tö'dö küdü ya, ara Ebliisi tanangnga kadu könö ana kada ka pabuusu ma ta'b'ba aaga, aaga tüünü muuyu kide a füngngö ada'baaga. Aaga ümmü tumma neede dhorro sulla aaga taaya, ara a'a tanangnga ndalembö ma tefe ka 'dü aaga.

<sup>11</sup> Ömö'dü ya ana ii-sine ya fa kini atoodo ka eema tiya Koronggore ka teemaga co a nakaniisa ya, ömö'dü ya ii'baana ya taalo inde kara tili i'i ka oona teera ara."

### *Tumma ma co kaniisa ma Pregamus*

<sup>12</sup> "Arigiri ada tumma co tadhangga ma kaniisa ma Pregamus,

Tumma na ömö'dü ya ana kulu'ba mo dhonggoro mana kuri ka na'dugugini a teera meene mo. <sup>13</sup> Nussu a'a a'da

nanna o'o kiga, 'buugu ma köyö tyi Ebliisi ya kiga. Nümmü o'o tumma ma a'a dhorro taalo o'o nanu ka tamma tanno eede, mündä ka uuru tanno Antibas ömö'dü ya amma kede ya, eema tumma neede dhorro ya, agiididene kada kannka 'buugu tiya Ebliisi ka tanna kide ya.

<sup>14</sup> Lakiini niimö inggide idhilli anangnga a'a ka koroo'bo nja o'o, kudumma kadu könö kungngo üdü kümmü talaana na Balam, ya kalaana Blak ma tanangnga kadu ma Israyil a'da ka'dingga ka kodhi ma tatoroko kagu uu'da ma türri ma namasala, küünii eema ma weerö ma temelö. <sup>15</sup> Afe'de kadu könö kungngo üdü kümmü talaana na naNikola. <sup>16</sup> Nggeege aadha ka tatoroko, üürü nanu o'o ya, ara a'a tö'dö küdü kannka areere nö'dö teema koro'bo nja eene a kulu'ba tammo dhonggoro mo meede ka niinö mo.

<sup>17</sup> Ömö'dü ya ana ii-sine ya fa kini atoodo ka tumma tanno Koronggore ka teemaga co nakaniisa no. Ömö'dü ya ii'baana ya, ara a'a tanangnga alman ya kaküdhü ya, nanangnga misi ma 'bassa mo iini ma eere tiya issi ya, ka takirinja kide, taalo ömö'dü ma tussu illi ömö'dü ya ananja iini ya."

### *Tumma ma co kaniisa ma Tiyatira*

<sup>18</sup> "Arigiri ada tumma co tadhangga ma kaniisa ma Tiyatira,

Tumma no kö'dö ndama 'Bii'bala ma Masala ya afinne ka iiye afa issi ya, uune niini ka afeene nja tanyaanya tanno alukulukadene no.<sup>19</sup> Nussu a'a linggo nüüdü, nussu tasaasa nüüdü nja tamma nja linggo nja tidhi oona ku'bu, nussu a'a a'da nalinggo o'o dhabbu nadagii'bi linggo na dhidha no.

<sup>20</sup> Lakiini a'a nagoroo'bo nja o'o kudumma üüdü ka toolomana aka mana eere a'da Isabeel mo ko'do, mümmü eyi yoono a'da oogo ma ne'bi, malaana kadu neede a'da küünii eema ma temelö kagu uu'da ma türri eema ma namasala.<sup>21</sup> Nanangnga a'a naguuru oono a'da maadha ka tatoroko illi oogo manu ka taadha ka temelö tanno oono.

<sup>22</sup> Yungngo eede kara tapügü oogo ka tenggere ma dhügürü, nadhifi kadu na füngngö ana oogo no kadhägürü, üürü kene ka titaaloo kaadha kalinggo ma tatoroko tanno oono.

<sup>23</sup> Ara a'a tagirina laala yoono afe'de, amang ka nakaniisa tussu a'da nawwa a'a nanggeedi nja nanggüüdü, ara a'a tamana eema aaga kada köje nja türü tanno üüdü.

<sup>24</sup> A 'bitüngngö niki aaga, aaga na türeene

ka Tiyatira no, aaga no taalo kata'da ka talaana tanno oono, taalo kussu tumma neene ka teema a'da tumma na Ebliisi na küdhü no, ara a'a tiki aaga a'da, taalo a'a nara tadho aaga ka oona a niimö tiya indhi ya afe'de.<sup>25</sup> Lakiini aaga fa ka tiya kada ya, ara a'a ka öö'dö.

<sup>26</sup> Ömö'dü ya ii'baana ya, ütü ka tumma tanno eede turi ya, ara a'a tanangnga tauugaara iini ma kadu nye'd'de kungngo.

<sup>27</sup> 'Ara i'i tauugaara meene a kuufi ma ndaliili, a'böyö ana eege ku'bu afa nadhafala ma tam'bala kungngo,'

afa meede ka 'duga tauugaara ka Pupa tiya eede.

<sup>28</sup> Ara a'a tanangnga ndalfoore ma tako iini afe'de.

<sup>29</sup> Ömö'dü ya ana iisine ya fa kini atoodo ka eema tiya Koronggore ka teemaga co a nakaniisa ya."

### 3

*Tumma ma co kaniisa ma Saardis*

<sup>1</sup> "Arigiri ada tumma co tadhangga ma kaniisa ma Saardis,

Tumma na ömö'dü tiya ana nagoronggore ma Masala ka iidümmü kafünü eera nja midigi ma iidümmü mafünü eera ya, nussu a'a linggo nüüdü, o'o nefi ka 'dü ana eere, lakiini neyi o'o.<sup>2</sup> Adinö ko'do nafa ka 'bandefe ka 'dü ya öreeene ya ndakete

kara teyi kudumma linggo tanno üüdü taalo kadho ka fiini kidha ma Masala tammo eede.<sup>3</sup> Agiigii eema yüüdü ka takalaadene kide na taföönyö ya, amma kide, naadha ka tatoroko. Küdü ka titaalo nadinö ko'do ya, ara a'a tö'dö küdü afa tanyooro, taalo o'o nara tussu uuru neede kara tö'dö küdü iini no.

<sup>4</sup> Lakiini liga kadu könö ungngo üüdü ka Saardis, taalo kanyoro ten'di yeene, kara tunggeene nja a'a ana en'di tiya ka'bassa ya ka oona, kudumma eene kama tümmöönö.<sup>5</sup> Ömö'dii ya ara tii'baana ya ara tümmü ten'di ya ka'bassa ka oona afa meene, taalo a'a nara ta'duga eere yiini ka sorne ma tefe ka 'dii, lakiini ara teema tumma niini kidha ma Pupa tiya eede nja kadhangga tanno iini.<sup>6</sup> Ömö'dii ya ana iisine ya fa kini atoodo ka tumma na Koronggore ka teemaga co nakaniisa no."

### *Tumma ma co kaniisa ma Filadlifya*

<sup>7</sup> "Arigiri ada tumma co tadhangga ma kaniisa ma Filadlifya,

Tumma ndama ömö'dii tiya insili ada timin'da ya ana ngafata na Dawud kini kara tafa'da iinye, taalo ömö'dii ma teere kide, a kini kara teere kide ya, taalo ömö'dii ma tafa'da.<sup>8</sup> Nussu a'a linggo nüüdü. Assa, a'a nungngo nafa'da iinye o'o taalo

ömö'dii ara tambaanya teere kide. Nussu a'a a'da o'o a 'bantürü yüüdü ya dhilli ya, nümmü o'o tumma neede nafa kide, nitaalo na'düsünü eere yeede.<sup>9</sup> Ara a'a tanangnga kadu no ma la ma talaana ma Ebliisi na ümmü nanggeyi neene a'da eege ka Yahüüdü lakiini eege taalo ka Yahüüdü, a'da kakorokoro, ara a'a tanangnga eege ka tüürü küdü kidha ana küüge, amang kene tussu a'da a'a nasaasa o'o.

<sup>10</sup> Kudumma üüdü ka tamma nidhi oona ku'bu ka tumma tanno eede, ara a'a tafa küdü ka uuru ma tatoroko tanno ara tö'dö, ma tara tö'dö ta'b'ba kadu ka oona nye'd'de na anna ka 'büdhülü no.

<sup>11</sup> Ara a'a tö'dö areere, afa ka eema tiya üüdü 'bitingngö ya ii'dii ömö'dii öccö ta'duga ndalembö nüüdü. <sup>12</sup> Ara a'a tanangnga ömö'dii ya ii'baana ya kada miide ma la ma Masala tammo eede, taalo atö'dö kürö ndama iini. Ara a'a tarigiri eere kini ka oona ana eere ma Masala tammo eede nja eere ma anya tammo Masala tammo eede Örsaliim ma issi mo, mara tö'dö ku'bu ndama 'dotombo'do ndama Masala tammo eede. Nakiri eere yeede ya issi ya kini ka oona.

<sup>13</sup> Ömö'dii ya ana iisine ya fa kini atoodo ka tumma tanno Koronggore ka teemaga co nakaniisa

no."

*Tumma ma co kaniisa ma  
Ladükiya*

<sup>14</sup> "Arigiri ada tumma no co tadhangga ma kaniisa ma Ladükiya,

Tumma na ömö'dii tiya Amiin adho ka fiini adhorro nja timin'da, i'i ya üüdü ma eema tiya Masala ka tadina ya. <sup>15</sup> Nussu a'a linggo nüüdü, nussu a'a a'da taalo o'o niicolo alla nagu'daana, nasaasa a'a a'da o'o niicolo alla nagu'daana. <sup>16</sup> Kudumma üüdü ka tayuyu taalo niicolo nitaalo nagu'daana ara a'a tunggu o'o kürö ndama niinö tanno eede. <sup>17</sup> Niki o'o a'da, 'Nüüsü a'a nana eema dhabbu, taalo a'a nasaasa niimö,' lakiini taalo o'o nussu tumma üüdü ka tarodo ka en'di ka oona, nüünii muuyu, nüünii manang-gööyö, eema titaalo küdü, nakisinsoro, naneene ana oona ku'bu. <sup>18</sup> A'a tadirina tumma o'o a'da nana dhaba kede, ya lukuladene ana issi, amang küdü tüüsü, afe'de nana en'di ya ka'bassa ya, nagirnii küdü ka oona amang küdü taküdhü oona ma modolo nüüdü no. Nana müüri ma iiye namana küdü ka iiye amang küdü tiji 'buugu.

<sup>19</sup> Ara a'a talaana ömö'dii yeede ka asaasa i'i ya nagirnaana kini. Nagu'daana ka eedi naadha ka tatoroko tanno üüdü. <sup>20</sup> Na'dingnge a'a ka inye nadhoodho,

ömö'dii ya föönyö tumma neede afa'da inye ya, ara a'a co naguri nja iini, aguri nja a'a.

<sup>21</sup> Ömö'dii ya ara tii'baana ya, ara a'a tanangnga i'i ka temmi ka kööyö nja a'a, afa meede ka tii'baana nemmi nja Pupa tiya eede ka kööyö tiya iini. <sup>22</sup> Ömö'dii ya ana iisine ya fa kini atoodo ka eema tiya Koronggore ka teemaga co nakaniisa no."

## 4

*Kööyö na ka 'dotombo'do  
ya*

<sup>1</sup> Nikirii a'a ka tasala inye ma 'dotombo'do ka tafa'da. Tumma ma ömö'dii yeede ka aföönyö ka dhidha ya eema nja a'a a tumma kafeene nja tiniidö iki, "Sürigü ko'do kita na a'a tala o'o ka niimö tiya ara talingga adene ka tiya keere ya." <sup>2</sup> Amussu kungngo ya, a Koronggore ka 'dingngö kede ka oona, kede kidha kanna nasala kööyö ka 'dotombo'do ana ömö'dii ka temmi kide.

<sup>3</sup> Ömö'dii ya emmi ya, afeene nja müüri ma dhööyö mo nja niigisi tanno kirikiri mo nja tam'biili taku'du kööyö ko'do afeene nja samaret.

<sup>4</sup> A nagööyö kukumu kadu kafünü egiisö no (24), kaku'du kööyö ko'do, a kadiifi no kukumu kadu kafünü egiisö no, kemmi ka kööyö kümmü en'di kada ka'bassa, kalembö ma dahaba kungngo eene ka

nanggüdü. <sup>5</sup> A talimaana ma tombo'do ticci akürö ndama kööyö, a fara ma baana ma tombo'do. Kidha ma kööyö a nakoyo ma lamba ka iidümmü kafünü eera kafinne, nagoronggore ma Masala na ö'dö ka iidümmü kafünü eera no eege kamiini. <sup>6</sup> A kidha ma kööyö afeene nja to ma gasasa ka tinsili afa nduguri.

A ka söödö miini, taku'du ma kööyö eema tiya efe ka 'dii ya egiiösö ya, iiye ungngo eene kadhabbu kidha nja eere. <sup>7</sup> Niimö ya adinö ya dhidha ya afeene nja tagaamu, aya asigi kide ya afeene nja kodha, a niimö ya adinö ya iidoona ya afeene ka dhugudha ma ömö'dii, a niimö ya adinö ya egiiösö ya afeene nja kolo tiya alagala ya. <sup>8</sup> Ndama eema tiya efe ka 'dii ya egiiösö ya nye'd'de, egedhe ungngo eene iidümmü kafünü unggodho, iiye aku'du eege ka oona ndama teene nja kürö, taalo tüüsü meene ma rumeene osooso a naguuru, "Tinsili, tinsili, tinsili,

Masala Uugaara ma ana türü mo,  
ma 'billi nja 'bitüngngö  
mara tö'dö."

<sup>9</sup> Eema ya egiiösö ya efe ka 'dii ya tüwe tüüsü ma tafünögü ko'do nja ta'diila nja tündhigü ko'do a ömö'dii tiya emmi ka kööyö ya efe ka 'dii turi ta'billi. <sup>10</sup> A kadiifi no kukumu kadu kafünü egiiösö no, tüürü ka ömö'dii tiya

emmi ka kööyö ya kidha kamma ka ömö'dii ya efe ka 'dii ta'billi, kadhifi kalembö neene kidha ma kööyö kiki,

<sup>11</sup> "Ka Uugaara müidi nja Masala,  
o'o nama tündhigü ko'do  
nja tamma nja türü,  
kudumma üdü ka talinggo  
eema nye'd'de  
ndama eedi tiya üüdü  
eefe ka 'dii."

## 5

### Sorne nja dhünggü

<sup>1</sup> Nikirii a'a ka tasala sorne ka niisö ma kuri, tanno ömö'dii ya emmi ka kööyö ya ikirinja ka teene miini nja 'dugeere miini, kabünnü nahitimi kide ana hitimi na iidümmü kafünü eera no.

<sup>2</sup> Nasala tadhingga ana türü eema ko'd'do iki, "Mada i'i yungngo ama ta'buna nahitimi ku'bu afa'da sorne?" <sup>3</sup> Taalo ömö'dii ka 'dotombo'do nja 'büdhülü nja 'büdhülü ka tüm'bü atambaanya tafa'da sorne assa ka niimö tiya inggide ya.

<sup>4</sup> Natafara 'do kudumma ömö'dii ka titaaloo adunadene ma tama tafa'da sorne iiri niimö ya inggide ya assa kide.

<sup>5</sup> İkirii tadiifi könö ka tiki a'a, "Fa tafara, assa tagaamu ma siliga ma Yahüusa, a 'bereere a ma Dawud i'i akii'baana ana türü, a'bunaana nahitimi na iidümmü kafünü eera no afa'da sorne."

<sup>6</sup> Nikirri a'a ka tassa ka dhünggü kafeene afa miini ka tendhe a'dingnge ka söödö ma kööyö nja eema tiya efe ka 'dii ya egüsö ya nja kadiifi. Nja dhünggü ya ana iidö ka iidümmü kafünü eera nja iiye ka iidümmü kafünü eera no, eege ka nagoronggore na Masala na iidümmü kafünü eera no, kagürünüdene ka 'büdhülü ka oona nye'd'de. <sup>7</sup> İkiri dhünggü ka öö'dö a'duga sorne ka niisö ma kuri tanno ömö'dii tiya emmi ka kööyö ya. <sup>8</sup> Kini ka 'duga sorne ya, ikiri eema ya egüsö ya efe ka 'dii ya nja kadiifi no kukumu kadu kafünü egüsö no ka tüürü ka dhünggü kidha a nagüuge, kisirin'di ungngo eene ka iisine eege in'dili, a naadho ma dahaba kadigine a kondho, teema nja Masala na kadu tanno insili no eege kamiini. <sup>9</sup> Katagüüwe tüüsü ma issi mo kiki,

"O'o nama ta'duga sorne  
nafa'da nahitimi miini  
kudumma üüdü ka takatendhe  
na o'o taana kadu a  
Masala ana eriidö tiya  
üüdü  
ndama kadu kasiliga nja  
tumma ka tambanan-  
jaana ku'bu nja kadu  
nja naanya 'do.

<sup>10</sup> Nanangnga eege kada tauugaara nja ka'boge na  
Masala,  
kada naguugaara ma  
'büdhülü."

<sup>11</sup> Nassa co afe'de naföönyö tumma ma kadhangga dhabbu. Kaku'du kööyö ka oona nja eema tiya efe ka 'dii nja kadiifi. Eege na alif kafünü kide ana alif kada'baaga. <sup>12</sup> Kalneege ko'd'do kiki,

"Dhunggü ya atendhe ya  
i'i yungngo ama ta'duga  
türü nja eema dhabbu  
nja ta'dara nja türlü  
nja tindhigü ko'do nja  
tafunügü ko'do."

<sup>13</sup> Naföönyö a'a eema tiya ka 'dotombo'do ya nja tiya ka 'büdhülü nja tiya ka 'büdhülü ka tüm'bü ya nja tiya ka to ya nja 'buugu ka oona nye'd'de iki,

"Ömö'dii tiya emmi ka kööyö  
ya nja dhünggü,  
kada kanangnga ta'diila  
a Masala  
nja tindhigü ko'do nja  
tafunügü ko'do nja  
türü turi ta'billi."

<sup>14</sup> Eema ya efe ka 'dii ya egüsö ya tiki, "Amiin," a kadiifi tüürü ku'bu a nagüuge kafara kini.

## 6

*Tafa'da nahitimi na  
iidümmü kafünü eera no*

<sup>1</sup> Nasala a'a dhünggü ka tafa'da hitimi ya dhidha ya ana ka na iidümmü kafünü eera no, nükirri a'a ka föönyö niimö tiya efe ka 'dii tiya egüsö ya, alneege ko'd'do kafeene afa fara ma baana ma tombo'do, "Aayu!" <sup>2</sup> Nikirri a'a ka

tassa co kannaa nasala muttu a'bassa, ömö'di ya aka kide ya ana taprpara ka nüüsö a ndalembö ma tii'baana ananja iini, öö'dö kürö ma tii'baana ii'baana.

<sup>3</sup> Ka dhünggü ka tafa'da hitimi ya eera ya, naföönyö a nüümö tiya efe ka 'di ya eera ya ka tiki, "Aayu!"

<sup>4</sup> A muttu könö adhöyö ö'dö kürö. Ömö'di ya aka kide ya, ananja türü iini ma tö'dö a'duga ta'diila ka 'büdhülü, amang ka kadu tagirina ajeene. Kanangnga kulu'ba ma dhonggoro mo iini.

<sup>5</sup> Aga dhünggü ka ndafa'da hitimi ya iidoona ya, naföönyö a nüümö tiya efe ka 'di ya iidoona ya ka tiki, "Aayu!" Nasala muttu ya 'dü'd'dü ya, ömö'di ya aka kide ya, misaana ungngo iini ka nüüsö. <sup>6</sup> Naföönyö tumma ka söödö ma eema tiya efe ka 'di ya egiiösö ya, katiki, "Almiti ma dhokoro ana jine ama uuru ka unggodho, almiti ma mudeere ma iidoona ana jine ma uuru ka unggodho, lakiini fa taga'da uu'ba nja ngeeli."

<sup>7</sup> Ka dhünggü ka tafa'da hitimi ya egiiösö ya, naföönyö a nüümö tiya efe ka 'di ya egiiösö ya ka tiki, "Aayu!"

<sup>8</sup> Nikirii a'a ka tassa co nasala muttu irrifi kaseere, ömö'di ya aka kide ya, ana eere a'da inde, nja 'buugu ma inde kuurna i'i keere kete, Türü kungno eene ma 'dakeyi ma 'büdhülü ma tidi eege a kulu'ba tammo dhonggoro mo, ana iire nja

maara nja eema ma toroko ma 'büdhülü.

<sup>9</sup> Aga dhünggü ka ndafa'da hitimi ya iidümmü no, nasala nagoronggore tanno kadu na aradene no ka üüdü ma tumma tanno Masala no nja tumma tanno eene ka tageema no ka müsi ma türri ka tüm'bü. <sup>10</sup> Kikirii katiidhe ko'd'do kiki, "Taagaada Uugaara ya Insili, ya tatimin'da ya, taalo o'o nara tümmü kadu ma 'büdhülü na'diinö ada ungngo ma eriidö tiya iidii?"

<sup>11</sup> En'di ya ka'bassa ya, kananja kene ku'bu, iki eene a'da kagünü idhilli ara türeene ma köje nja kadu na alinggo no nja nagöre tanno eene no ara tagirinadene afa eege a'dimo.

<sup>12</sup> Nikirii a'a ka tasala dhünggü ka tafa'da hitimi ya iidümmü afünü unggodho ya. A 'büdhülü tatänggi'di dhindho, a ndanaaya ta 'dü'd'dü kafeene nja taliisi ma fara, a tere tafeene nja eriidö nye'd'de kungno, <sup>13</sup> a midigi ma 'dotombo'do ta'dingga ka 'büdhülü afa ikiye ma indiiye na arume no ka 'dinggo ndama 'daafa a tanya ka tagi'di eege ka oona dhindho. <sup>14</sup> A 'dotombo'do tadum'budu ko'do afa sekede, a na'dikinya nja najaseera tooso ka na'buugu tanno eene nye'd'de kungno.

<sup>15</sup> A naguugaara ma 'büdhülü nja kadu nüifi no nja kadu ma eema dhabbu nja naguugaara ma nasigira,

a naguugaara nja kasaga ïn'dili kungngo nja tanno taalo ka kasaga no, nye'd'de karünö kaco kubumba nja naagara ma na'dikinya.  
<sup>16</sup> Kiki a na'dikinya nja naagara, "Aaga 'dinggö kiidü ko'do aaga taküdhü ungngo kudumma iiye tanno ömö'dü tiya emmi ka kööyö ya nja tagoroo'bo tanno dhünggü.  
<sup>17</sup> Kudumma uuru ma tagoroo'bo tanno eene na dhabbu no ka ndö'dö, a mada i'i yungngo ara tambaanya eege?"

## 7

### *Kadu ma Israyil nø'dö 144,000*

<sup>1</sup> Nggeege afe'de nasala a'a kadhangga ka egüsö ka'dingnge ko'do ka na'dugugini ma 'büdhülü ada egüsö miini, kakara a tanya ma 'büdhülü na egüsö no, amang ka tanya tafa tüsö ka 'büdhülü nja to alla naafa. <sup>2</sup> Nafada nasala tadhangga könö ö'dö ko'do ndama fiinii ma ndanaaya, hitimi ya Masala tammo efe ka 'dö mo ungngo iini. Ümmünü kadhangga na egüsö no ko'd'o na ana türü ma taga'da 'büdhülü nja to no. <sup>3</sup> Iki eene, "Aaga fa taga'da 'büdhülü nja to nja naafa, ara ungngo kabünnü hitimi ka kasaga tanno Masala tammo aja ka nadhugudha." <sup>4</sup> Nikirii a'a ka aföönyö a'da kadu na kabünnü hitimi kene ka nadhugudha no kö'dö na alif a kadu ka iidümmü a

kadu keera kafünü egüsö (144,000) ndama siliga ma Israyil nye'd'de kungngo.

<sup>5</sup> Na alif kada'baaga kafünü eera (12,000) ndama siliga tiya Yahüusa

na alif kada'baaga kafünü eera (12,000) ndama siliga tiya Röbin

na alif kada'baaga kafünü eera (12,000) ndama siliga tiya Jad.

<sup>6</sup> Na alif kada'baaga kafünü eera (12,000) ndama siliga tiya Ashiir

na alif kada'baaga kafünü eera (12,000) ndama siliga tiya Naftali

na alif kada'baaga kafünü eera (12,000) ndama siliga tiya Manasi.

<sup>7</sup> Na alif kada'baaga kafünü eera (12,000) ndama siliga tiya Shamön

na alif kada'baaga kafünü eera (12,000) ndama siliga tiya Lawi

na alif kada'baaga kafünü eera (12,000) ndama siliga tiya Yasakir.

<sup>8</sup> Na alif kada'baaga kafünü eera (12,000) ndama siliga tiya Zabaloon

na alif kada'baaga kafünü eera (12,000) ndama siliga tiya Yüüsif

na alif kada'baaga kafünü eera (12,000) ndama siliga tiya Binyamiin.

### *Kadu na dhabbu no*

<sup>9</sup> Nikirii a'a ka tasala kadu kadhabbu taalo ömö'dü ma tambaanya tinni eege ndama naanya nja kadu 'do nja tumma ka tambananjaana ku'bu, ka'dingnge ana

kö'dö kidha ma kööyö nja  
kidha ma dhünggü, kümmü  
en'di ya ka'bassa ya ka oona,  
kümmü iisine ma naafa ma  
tamuru.<sup>10</sup> Kiidhe ko'd'do  
kiki,

"Toolona kungngo a Masala  
tammo aja  
ma emmi ka kööyö mo  
nja dhünggü afe'de."

<sup>11</sup> A kadhangga nye'd'de  
takaku'du kööyö ko'do nja  
kadiifi nja eema tiya efe ka  
'dii ya egüsö ya. Küürü ka  
kööyö kidha ana dhugudha  
kümmü Masala,<sup>12</sup> kiki a'da,  
"Amiin, tafünögü ko'do nja  
tündhigü ko'do nja  
tussu eema  
nja tamana ta'diila nja  
tündhigü ko'do  
nja türü nja tambaanya ka  
na Masala tammo aja  
turi ta'billi.

Amiin."

<sup>13</sup> Ömö'dii könö ana ka  
kadiifi iki a'a, "Kadu öjö  
eege kungngo kümmü en'di  
ya 'bassa ya ka oona, eege  
kö'dö ndama kiga?"

<sup>14</sup> Nikirri a'a ka tiki iini,  
"Ömö'dii eede, nussu o'o."

Iki a'a a'da, "Kadu no  
eege kungngo koolonadene  
ka dhügürü tiya dhiiri  
ya, eege kamiini, kagunu  
en'di yeene ana eriidö ma  
dhünggü anangnga eege  
kada ka'bassa.

<sup>15</sup> Yungngo eene ka tanna  
kidha ma kööyö tanno  
Masala

kalinggo ada oono uuru  
ana ooso kungngo ka  
la tiya oono,  
nja ömö'dii tiya emmi ka  
kööyö ya  
ara taküdhü eege  
ka oona ka fangga  
tammo iini.

<sup>16</sup> Taalo iire ara tagu eege,  
a tenege ka tagu eege  
afe'de,  
taalo ndanaaya ara tagu'du  
eege,  
a tagu'daana taalo kara  
tala eege ka oona.

<sup>17</sup> Kudumma dhünggü ya  
ka söödö ma kööyö  
ya ara tadasaana afa  
kene  
uurugu eege ka nduguli  
ma 'büüdii ma tefe ka  
'dii.

A Masala tayugu 'büüdii ma  
iiye eene ka iiye."

## 8

*Hitimi ya üdümmü afünü  
eera ya*

<sup>1</sup> Ka dhünggü ka ndafa'da  
hitimi ya üdümmü afünü  
eera ya, a 'buugu tamud-  
hudhuli ka 'dotombo'do  
a dhüdhü ma ndanaaya.

<sup>2</sup> Nasala kadhangga na  
üdümmü kafünü eera no  
ka'dingnge ana ko'do kidha  
ma Masala, üidö tananja  
eene ka üdümmü kafünü  
eera.

<sup>3</sup> A tadhangga könö tö'dö  
üdümmü dha ma kondho ma  
dahaba öö'dö a'dingnge ka  
misi ma tirri. A kondho  
tananja iini dhabbu ma tirri

iini, amang kini tagusu ka fara ma kadu tanno Masala nye'd'de ka mïsi ma tïrri ma dahaba kidha ma kööyö.

<sup>4</sup> A ndhiigö ma kondho tisi a kürö ndama niisö ma tadhangga in'dili nja tafara ma kadu tanno Masala kaco oo'do kidha ma Masala.

<sup>5</sup> İkiri tadhangga ka tümmü dha ma kondho adigi issi ma tïrri kide, apügü i'i co 'büdhülü, tabaana ma tombo'do nja talimaana ma tombo'do nja tatïnggi'di ma 'büdhülü.

### *İidö na iidümmü afünü eera no*

<sup>6</sup> A kadhangga na iidümmü kafünü eera no kümmü iidö ya iidümmü kafünü eera no, kindinaana oona ku'bu ma tabbü ege.

<sup>7</sup> A tadhangga ya dhidha ya tabbü tïniidö niini, ikiri olle tö'dö nja issi atonggoonyo ana eriidö, öö'dö uurunja ka 'büdhülü. A 'dakeyi ma 'büdhülü tatinyogo, a 'dakeyi ma naafa tatinyogo nja ooyo tiya agiiri ya nye'd'de.

<sup>8</sup> A tadhangga ya eera ya tabbü tïniidö niini, a niimö adhabbu afa 'dikinya afinne nye'd'de apügünja co to a 'dakeyi ma to tatem'bele kada eriidö. <sup>9</sup> A 'dakeyi ma eema ya efe ka 'di ya anna ka to ya taaya, a 'dakeyi ma namürkabü tatangga'da.

<sup>10</sup> A tadhangga ya iidoona ya tabbü tïniidö niini, a timidigi kadhabbu ka a'dingga ndama

'dotombo'do ka finne afa issi ka'dingga ka 'dakeyi ma neeri nja nakanduguli ma 'biidi. <sup>11</sup> Eere ma timidigi a'da Tamaara. A 'dakeyi ma 'biidi ta'bele a'diiri, a kadu na kooye no taaya kadhabbu kudumma iini ka'diiri.

<sup>12</sup> A tadhangga ya egüsö ya tabbü tïniidö niini, a 'dakeyi ma ndanaaya tabbü adene, nja 'dakeyi ma tere nja 'dakeyi ma midigi, idhi a türeene ma töyeene neene talüllü, a türeene ma töyeene ma uuru nja ooso titalo.

<sup>13</sup> Nassa co nasala kolo ka alagala ka söödö ma 'dotombo'do, eema ko'd'do, "Am'ba, am'ba, am'ba ka kadu ma 'büdhülü kudumma türeene ma fara ma iidö na kadhangga tanno iidoona no kara tabaana."

## 9

<sup>1</sup> A tadhangga ya iidümmü ya, tabbü tïniidö niini, nasala timidigi ka 'dingga ka 'büdhülü ndama 'dotombo'do, anangnga ngafata ma ööye tiya adhonggoro ya iini. A tadhangga ya iidümmü ya, tabbü tïniidö niini, nasala timidigi ka 'dingga ka 'büdhülü ndama 'dotombo'do, anangnga ngafata ma ööye tiya adhonggoro ya iini. <sup>2</sup> A timidigi tafa'da ööye tiya dhonggoro ya, a ndhiigö tisi kürö ndama iini afa ndhiigö ma tambürüü'di na dhabbu no, a ndanaaya nja

'dotombo'do tandüüli nja 'buugu 'do kudumma ndhiigö ma ööye. <sup>3</sup> A müdüünii tö'dö kürö ndama ndhiigö kaküdhü 'büdhülü, a'duga türü afä türü ma na'baja ma 'büdhülü kungngo. <sup>4</sup> Kiki iini a'da afä taga'da ooyo ma 'büdhülü alla ooyo ya kirikiri ya nja naafa, illi kadu na taalo kana hitimi ma Masala ka nadhugudha tanno eene. <sup>5</sup> Taalo kananja türü eene ma tiidi eege, lakin-i apusu eege a nagatereene küdümümü, tapusu niini kafeene nja tüföönö ma 'baja. <sup>6</sup> Ara kadu tasaasa inde ka naguuru tanno miini no taalo kara taluna, kasaasa taaya, inde tüüsö eene ku'bu.

<sup>7</sup> A müdüünii tafeene nja naguttu no kindinaana oona ku'bu ma koro'bo no, eema ungngo eene ka nanggüüdü afeene nja kalembö ma dahaba, dhugudha yeene afeene nja dhugudha ma ömö'di. <sup>8</sup> Awu yeene afeene afä awu ma iiya, igini neene kafeene nja kiselle ma agaamu. <sup>9</sup> A naaro neene tafeene nja mudugusi ma ndaliili, a fara ma egedhe tiya eene kafeene afä uune ma karru ma naguttu kadhabbu küüsö ka koro'bo. <sup>10</sup> Nakatiidi miini kaföönö afä nakatiidi ma na'baja, türü kungngo iini ma tili kadu ka oona a nagatereene küdümümü. <sup>11</sup> Uugaara ungngo eene i'i ya tadhangga ma ööye ya dhonggoro ya, ana eere

a tangga Ebriya yiini a'da Abbdün, a tangga Yünan a'da Abulion.

<sup>12</sup> Tagoroo'bo na dhidha no kanco, a tagoroo'bo öccö keera kara tö'dö afe'de.

<sup>13</sup> A tadhangga ya üidümmü afünü unggodho ya tabbü tiniidö, naföönyö fara köö'dö kürö ndama üidö tanno egüsö no ka misi ma türri ma dahaba mo ka Masala kidha mo. <sup>14</sup> A tumma tiki a tadhangga tiya üidümmü afünü unggodho ya ümmü tiniidö ya, "Apa ka kadhangga tanno egüsö no na imi'dinja ka ri ma Fürat ya dhabbu ya." <sup>15</sup> A kadhangga tanno egüsö no kindinaana oona ku'bu nja ndanaaya nja uuru nja tere nja ürüünü, amang kene tagirina türeene ma kadu. <sup>16</sup> Naföönyö a'a a'da nasigira ma naguttu köö'dö na alif kadhabbu.

<sup>17</sup> Nasala naguttu nja kadu tanno aka kide no a kümböödö kana namudugusi kafeene nja issi adhöyö öödhe, a 'dü'd'dü, a kirikiri kafeene afä kebriit. A nanggüüdü ma naguttu kafeene nja nanggüüdü ma agaamu, issi ticci kürö ndama eene ka nüönö nja ndhiigö nja kebriit. <sup>18</sup> A türeene ma kadu tagirinadene a tagoroo'bo tanno iidoona no, issi nja ndhiigö nja kebriit ya icci a kürö ndama nüönö ma naguttu no. <sup>19</sup> Türü ma naguttu ka kaneene ka nüönö nja nakatiidi tanno eene,

kudumma nakatiidi tanno eene kafeene nja nööni a nanggüdü kagi'di kadu iini.

<sup>20</sup> A türeene ma kadu tanno oolonadene ka tagoroo'bo no kitaalo kaadha ka tatoroko tanno eene ka tagalinggo ana iisine tanno eene no, kamma ka nagana'bu ana eema ma namasala ya ma dahaba ya nja fudda nja tanyaanya nja müsi nja ndagee'di ma eema namasala taalo kara tambaanya tiji 'buugu kitaalo kaföönyö eema kitaalo kunggeene. <sup>21</sup> Kitaalo kaadha ka tagirina kadu nja tageene nja temelö nja nyoro.

## 10

*Tadhangga nja sorne ya idhilli ya*

<sup>1</sup> Niküri a'a ka tasala tadhangga könö ana türü unggunu ku'bu ndama 'dotombo'do. Aküdhü oona a tülüögü, a tam'biili kungngo iini ka üüdü, dhugudha yiini afeene nja ndanaaya, uune niini tafeene nja nagiide ma issi. <sup>2</sup> Sorne ya idhilli ya ma ungngo iini ka niisö, ma tanfa'da. Anangnga awwa ma niisö ma kuri yiini ka to, anangnga awwa ma niisö ma küüle yiini ka 'büdhülü. <sup>3</sup> Adhiya a tumma ko'd'o afa fara ma tagaamu. Kini ka ndakiidhe ya, a baana ma tom'bo'do na iidümmü kafünü eera no talneege a fara tiya eene. <sup>4</sup> Kene ka ndageema ya,

a'da nakindinaana a'a oona ku'bu ma tarigiri, niküri ka föönyö tumma ndama 'dotombo'do iki a'a, "Nafa takiri eege ku'bu bünnü hitimi kide afa tabaana ma tombo'do na iidümmü afünü eera no ka takiki."

<sup>5</sup> İküri tadhangga yeede ka tasala i'i ka 'dingnge ana ko'do ka to nja 'büdhülü ya, alaga niisö ma kuri niini co 'dotombo'do. <sup>6</sup> Aküdöönö ana eere ma ömö'di tiya efe ka 'di ta'billi ya, marü'bü 'dotombo'do ana eema tiya inggide ya nye'd'de, nja 'büdhülü ana eema tiya inggide ya, nja to ana eema tiya inggide ya nye'd'de, iki, "Taalo tadoono ku'bu afe'de. <sup>7</sup> Lakiini ka naguuru tanno tadhangga tiya iidümmü afünü eera ya ka tabbü tünüpö niini ya, iküri tumma na Masala na küdhü no ka ndatüümö afa ma nagane'bi na alingga ada oono no ka tageema i'i kungno."

<sup>8</sup> A tumma neede ka taföönyö ndama 'dotombo'do no, eema nja a'a afe'de iki, "Kolo na'duga sorne ya tanfa'da ya ka niisö ma tadhangga ya 'dingnge ana ko'do ka to nja 'büdhülü ya."

<sup>9</sup> Niküri a'a kaco ka tadhangga niki iini anangnga sorne ya idhilli ya a'a. Iki a'a, "'Duga naguri ara tanangnga eedi yüüdü ka 'diiri, i'digi'di afa küde üdü ka niinö." <sup>10</sup> Niküri a'a ka 'duga sorne ya idhilli ya ka tadhangga ka niisö

natömü i'i. A'digi'di afa kүde kede ka nünö, lakiini kede ka tatamü a'diiri kede ka eedi.<sup>11</sup> A tumma tiki a'a, "Eema a tumma tiya tö'dö no afe'de co a kadu 'do nja nagonggo'do nja naguugaara."

## 11

*Kadu na adinö kide na eera no*

<sup>1</sup> Kanangnga tam'bala a'a kafeene nja kuufi iki a'a, "Fiki'dö ninni la ma Masala nja misi ma tirri, ninni kadu na afara ka Masala kide no.<sup>2</sup> Lakiini 'dadillö na kürö ma la ma Masala no, fa kene nafa tinni eege kudumma eene kananja a kadu tanno taalo ka Yahüdü no, kara tisiraana ka anya tammo insili mo a nagatereene kukummu kadu keera kafönü eera (42).

<sup>3</sup> Ara a'a tanangnga türü a kadu tanno adinö kide no keera ndama a'a, en'di ma nataliisi ungngo eene ka oona, kara teema tumma na Masala a fungngö alif miyateene sitiin (1,260)."

<sup>4</sup> Kadu na eera no eege ka naafa ma 'dikidiyö nja nakoyo ma lamba tanno eera no, a'dingnge ana ko'do kidha ma Uugaara ma 'büdhülü no.<sup>5</sup> Ka ömö'di töccö kara tasaasa tilii eege ka oona ya, issi tö'dö kürö ndama eene ka naninö kagirina nadiidi neene, nggeege ömö'di ya asaasa tilii eege ka oona ya ara tiididene.<sup>6</sup> Türü kungngo eene ma teere ka

'dotombo'do a tombo'do taalo kara tede ka naguuru tanno eene kara teema kide no, a türü kungngo eene ma ta'bele 'biidö kada eriidö kabbü 'büdhülü a maara kadhoonyo kene ka asaasa.

<sup>7</sup> 'Bitingngö kene ka ndatiimö tumma neene ya, a nüümö ma toroko ya ö'dö kürö ndama ööye tiya dhonggoro ya ara tako'do kene ii'bi eege agirina eege.

<sup>8</sup> Oofo yeene tapügünja ka nafüni ma anya tammo dhabbu mo, ana eere ma taköje a'da Sadöma nja Misiri, kita Uugaara tiya eene ka tabünnü ka salii'bi ya.<sup>9</sup> A kadu ndama naanya nye'd'de nja kadu 'do nja tumma ka tambananjaana ku'bu tadönö ka oofo tiya eene a fungngö iidoona a dhüdhü miini, taalo kara tafa ka ömö'di töccö a'da atü'bü eege.<sup>10</sup> Kadu ma 'büdhülü kara tadhodho küünö taanyara ma inde tanno kadu tanno eera no, kamana eema eene kudumma nagane'bi tanno eera no köö'dö a dhügürü a kadu ka 'büdhülü.

<sup>11</sup> Ka naguuru tanno iidoona a dhüdhü miini no ka ndafaradene ya, a koronggore ma tefe ka 'di tö'dö ndama Masala öö'dö kene ka oona, kafiki'dö ka'dingnge ko'do, ari'ba tümmü kadu na adinö kene no.<sup>12</sup> Kaföönyö tumma kalneege ko'd'o ö'dö ndama 'dotombo'do iki eene, "Aaga sирö ko'do kita." Kikirü ka sирö co 'dotombo'do

ka tülüögü, nadiidi meene  
tadinö kene.

<sup>13</sup> Ka uuru tanno miini  
no a 'büdhülü tatänggi'di  
dhindho, a 'dakeyi ma  
anya ada'baaga türrüdü.  
A kadu taaya na alif  
ka iidümmü kafünü eera  
(7,000) kudumma ma  
tatänggi'di ma 'büdhülü,  
ari'ba tümmü türeene ma  
kadu kafünögü Masala ma  
'dotombo'do ko'do.

<sup>14</sup> A tagoroo'bo na eera no  
co, a tagoroo'bo na iidoona  
no ara tö'dö kete kungno.

*Tinüdö ya iidümmü  
kafünü eera*

<sup>15</sup> A tadhangga ya  
iidümmü afünü eera ya  
tabbü tinüdö niini, a tumma  
talneege ko'd'o do ndama  
'dotombo'do kiki,

"Tauugaara ma 'büdhülü  
kanda tauugaara tiya  
Uugaara tiya aja nja  
Almasiihi tiya iini,  
i'i ara tauugaara turi  
ta'billi."

<sup>16</sup> A kadiifi no kukumu  
kadu kafünü egiisö no,  
temmi ka nagööyö tanno  
eene ka Masala kidha no,  
küürü ku'bu ana dhugudha  
kümmü Masala. <sup>17</sup> Kiki,

"Kanangnga uningo ta'diila  
o'o, Masala Uugaara  
mana türlü,  
ma 'bitingngö mo, mag-  
aneene ma 'billi,  
kudumma üdü ka a'duga  
türü nüüdü na tauu-  
gaara.

<sup>18</sup> Kadu ma kajeene  
kagoroo'bo,

kudumma uuru ma  
tagoroo'bo tanno  
üdü ka ndö'dö  
nja uuru ma tapusu  
kadu na aaya no.

Uuru ka ndö'dö ma üdü  
kara tanangnga  
talingnge a kadu  
tanno üdü na-  
gane'bi,  
nja kadu na insili no  
nja kadu tanno ari'ba  
eere tiya üdü no,  
na dhiidhi no nja tanno  
iiifi no,  
nagirina kadu na ka'da  
'büdhülü no."

<sup>19</sup> A la ma Masala  
tatanfa'da ka 'dotombo'do,  
sandü ma timi'di tumma  
noono tabbü 'dala ka la  
ma Masala. A tombo'do  
talimaana, kabaana, a  
'büdhülü tatänggi'di ajeene,  
a köröörö ta'dinggeene.

## 12

*Aka nja ni ma 'büdi*

<sup>1</sup> A niimö tabbü 'dala  
ka 'dotombo'do keefe, aka  
magirni ndanaaya oono  
ka oona, a tere kono  
ka uune ka teene, a  
kalembö ma midigi tammo  
ada'baaga mafünü eera no,  
a ndalembö mungngo oono  
ka üdü. <sup>2</sup> Magüröönö

mafara kudumma tin'di ma  
teene. <sup>3</sup> A niimö könö  
tabbü 'dala ka 'dotombo'do  
keefe nja ni ma 'büdi  
ya dhabbu ya öödhe afa  
issi, nanggüüdü kungngo  
iini ka iidümmü kafünü  
eera ana iidö kada'baaga,  
nja ndalembö ka iidümmü  
kafünü eera. <sup>4</sup> Öösü 'dakeyi

ma midigi ma 'dotombo'do  
ana tüüdi tiya iini üpü co  
'büdhülü, ikirii nü ma 'biidü  
ka 'dingnge ka aka kidha  
miini ka asaasa ta'duuru  
'bii'bala kono kara teene.  
<sup>5</sup> Mikirii ka tageeme 'bii'bala  
ya miide ya, i'i yunggo  
ara tauugaara ma 'büdhülü  
nye'd'de kungngo a kuufi  
ma ndalili, lakiini 'bii'bala  
yoono atonggoso aco ka  
Masala nja kööyö tiya iini.  
<sup>6</sup> Aka marünö maco a dhüile  
kita Masala ka takindinaana  
kono ku'bu, ma Masala kara  
tafa kono mamana eema  
oono a fungngö ö'dö alif  
miyateene sitiin 1,260.

<sup>7</sup> A koro'bo tafikii'dö  
ka 'dotombo'do, Mikayiil  
nja kadhangga tanno iini  
nja nü ma 'biidü tageeme  
koro'bo nja kadhangga  
tanno iini. <sup>8</sup> Lakiini  
eege taalo kana türü, a  
'buugu yeene ta'dugadene  
ka 'dotombo'do. <sup>9</sup> A nü ma  
'biidü ya dhabbu ya apügü  
i'i co 'büdhülü, nü ya ma  
'billi ya ana eere a'da Ebliisi  
nja Sitan ya iisini kadu  
nye'd'de, a'dinggö ku'bu i'i  
nja kadhangga tanno iini.

<sup>10</sup> Nikirii ka aföönyö  
tumma ka alneege ka  
'dotombo'do ko'd'do kiki,  
"Bitingngö katuumö toolona,  
a Masala tammo aja a  
türü nja tauugaara ma  
Masala tiya aja,  
nja tauugaara tanno Al-  
masihi tiya oono.

Kudumma ömö'dü üüfunü  
eema ka nagöre tanno  
aja ka oona kidha ma  
Masala ya osooso a  
naguuru,

kapügü i'i caa'bu.

<sup>11</sup> Eege kagii'bi i'i ana  
eriidö ma dhünggü  
nja tumma tanno eene  
ka tageema no,

kapügü nanggeyi neene co  
meene kasaasa inde.

<sup>12</sup> Nggeege 'dotombo'do saga  
tadhodho nja kadu  
tanno anna ingide  
no,

lakiini am'ba ka 'büdhülü  
nja to

kudumma Ebliisi  
a'bardaga ku'bu öö'dö  
kada.

I'i adiginigo a tagoroo'bo  
kudumma iini ka  
tussu a'da uuru niini  
ka öreeene idhilli."

<sup>13</sup> Kini ka tassa kini ka  
'dinggö ka 'büdhülü ya,  
ikirii ka talingga aka ma  
keene 'bii'bala kada miide  
mo. <sup>14</sup> Ikirii egedhe ma

kolö tiya dhabbu ya eera  
ya kananja aka, moono ka  
taagala iini ku'b'ba ndama  
nü ma 'biidü ma co 'buugu  
tiya oono ka dhüile, kafa  
kono a nagürüünü kiidoona  
a dhüdhü miini. <sup>15</sup> A

nü ta'binyaga 'biidü kürö  
ndama niinö tanno iini  
kafeene afa ri amang kini  
ta'duga oogo unggeene iini.

<sup>16</sup> Lakiini 'büdhülü oolona  
ka aka afa'da niinö niini  
a'duuru ri ya nü ka tuuru ka  
co kürö ndama niinö tanno  
iini ya. <sup>17</sup> Ikirii nü ka koroo'bo  
ka aka, unggeene aco teema  
koro'bo nja kadaada moono,  
ya aföönyö tumma ma  
Masala na ümmü tumma ma  
Yasu no.

<sup>18</sup> A nü ma 'biidü  
ta'dingnge ana ko'do ka  
ndamugu ma to.

## 13

*Nüümö ma toroko ö'dö  
kürüö ndama to*

<sup>1</sup> Nasala a'a niümö ma toroko ka tunggunu akürö ndama to nanggüdü kungngo iini ka iidümmü kafünü eera ana iidö kada'baaga, iidö nye'd'de kana kalembö, nanggüdü na miini no nagereene ma teela Masala kinggide. <sup>2</sup> A niümö ma toroko yeede kadasala ya afeene nja ünggü, uune niini kafeene nja uune ma 'böö, afeene ka niinö afa niinö ma tagaamu, ikirii ni ka anangnga türü niini iini nja kööyö tanno iini nja tauugaara nye'd'de. <sup>3</sup> Üüdü ma niümö ma toroko unggodho afa ma tana niümö ya in'di ya akete ka teyi illi niümö ya in'di ya aleme, a kadu ma 'büdhülü tadhere nye'd'de kungngo kuurna niümö ma toroko keere. <sup>4</sup> A kadu tüürü ka ni tiya dhabbu ya kidha kamma kini kudumma iini ka anangnga türü niini a niümö ma toroko küürü ka niümö ma toroko afe'd'e kamma kini kiki a'da, "Mada i'i yungngo afeene nja niümö ma toroko ma tambaanya koro'bo nja iini?"

<sup>5</sup> Mada anangnga niinö a niümö ma toroko eema indhgii oona coo'do eela Masala, a'duga türü miini ka talingo a nagatereene kukumu kadu keera kafünü eera. <sup>6</sup> İkirii ka tafa'da niinö niini eela Masala, eela eere yoono nja 'buugu ma taneene tanno oono

nja kadu tanno anna ka 'dotombo'do no. <sup>7</sup> A'duga türü ma teema koro'bo nja kadu tanno Masala ii'bi eege, a 'duga türü ma tauugaara ma naanya nye'd'de nja kadu 'do nja tumma ka tambananjaana ku'bu nja kadu. <sup>8</sup> Amang ka kadu ma 'büdhülü tamma kini nye'd'de kungngo, kadu na nagereene tanno eene ka titalo kakirinja ka sorne ma tefe ka 'dii sorne ma dhünggü tiya atendhe ya jiddi ma 'büdhülü ka tagarü'bü adene.

<sup>9</sup> Ömö'dii ya ana iisine ya fa kini atoodo kide.

<sup>10</sup> Üürü ömö'dii ya ara co ka tatasaga ya,  
i'i ara co ka tadasaga,  
üürü ömö'dii kara tiididene a kulu'ba  
ara tiididene a kulu'ba.  
Tumma no kasaasa tidhi oona ku'bu ma kadu tanno insili no nja tamma.

*Nüümö ma toroko anna  
kürüö ka 'büdhülü*

<sup>11</sup> Nikirii a'a ka tasala niümö ma toroko öccö ka tunggunu ko'do ndama 'büdhülü ana iidö keera kafeene nja iidö ma dhünggü, eema afa ni ma 'biiidii ya dhabbu ya. <sup>12</sup> I'i alingga a türü tanno niümö ma toroko tiya dhidha in'dili ana i'i kide kungngo. Anangnga 'büdhülü nja kadu tanno anna kide katamma ka niümö ma toroko tiya dhidha ya 'dokotere tammo iini ma inde ma kaleeme mo. <sup>13</sup> Adagüünii eema

## 14

*Dhünggü nja kadu tanno iini*

keefe a dhabbu unggugu  
 issi ka 'büdhülü ndama  
 'dotombo'do ka kadu kidha.  
<sup>14</sup> Iisini kadu ma 'büdhülü  
 alinggo tanno iini ma tamma  
 kini, niini ka 'duga türü  
 adagalinggo kidha ma nüümö  
 ma toroko ya dhidha ya.  
 A'bunu kadu ma 'büdhülü  
 karü'bü koronggore ma  
 nüümö ma toroko ya abbü  
 adene a kulu'ba ya assa ka  
 aleefe tefe ka 'dii. <sup>15</sup> A'duga  
 türü ma tafülle a'duga  
 koronggore ka nüümö ma  
 toroko ya dhidha ya ka  
 oona, amang kini teema,  
 agirina kadu na anu katüürü  
 ku'bu ka koronggore ma  
 nüümö ma toroko no nye'd'de  
 kungngo. <sup>16</sup> Anangnga kadu  
 nye'd'de afe'd'e na dhiidhi  
 no nja tanno iifi no, nja  
 tanno ana eema dhabbu  
 no, nja tanno eema kitaalo  
 kene no, nja kasaga, nja  
 tanno taalo ka kasaga no,  
 kanangnga kala eene ka  
 nüüsö ma kuri üürü kene  
 ka nadhugudha. <sup>17</sup> Taalo  
 ömö'dii ma tambaanya tana  
 nüümö üürü anadene a nüümö  
 illi ömö'dii ya ana kala  
 ana eere ma nüümö ma  
 toroko üürü tamana ma  
 eere tiya iini. <sup>18</sup> Ara tana  
 eere ma ta'dara, ömö'dii ya  
 ussu eema ya fa kini inni  
 nagereene ma nüümö ma  
 toroko kudumma iini kada  
 tamana ma ömö'dii ya ö'dö  
 namiya ka iidümmü kafünü  
 unggodho a kadu kiidoona  
 ka iidümmü kafünü unggodho (666).

<sup>1</sup> Nikirii ka tassa co nasala  
 dhünggü ka 'dingnge ka  
 'dikinya ma Sahyün nja  
 kadu kungngo iini kö'dö  
 miya arba arbaiin alif  
 (144,000), eere yiini nja  
 eere tiya Pupa tiya iini ikirinjia  
 kene ka nadhugudha.

<sup>2</sup> Naföönyö tumma ndama  
 'dotombo'do kafeene nja  
 fara ma 'büüdi tiya dhabbu  
 ya afeene nja fara ma  
 tombo'do tanno abaana  
 dhindho no, afeene nja fara  
 ma erempeera a kadu miini  
 kabaana. <sup>3</sup> Küüwe tüüsü  
 ma issi mo ka kööyö ma  
 Masala kidha ma eema tiya  
 efe ka 'dii ya egüsö ya kidha  
 ma kadiifi, taalo ömö'dii  
 ma tambaanya talaanadene  
 ka tüüsü tammo illi no ka  
 kadu na öö'dö miya arba  
 arbaiin alif (144,000) na  
 oolonadene ka 'büdhülü no.

<sup>4</sup> Kadu no eege kungngo  
 taalo kanyoro nanggeyi  
 neene nja iiya, kudumma  
 eene kadaafa ka nanggeyi  
 tanno eene katinsili. Kadu  
 na miini no eege kungngo  
 ko'd'do ka dhünggü keere  
 kita iini kara co ya, eege  
 kungngo koolonadene ka  
 türeene ma kadu, kümmü  
 nanggeyi neene a Masala nja  
 dhünggü kafeene nja eema  
 tiya ö'deene ka dhidha ya.  
<sup>5</sup> Taalo naniinö neene keema  
 korokoro, eege ka insili ka  
 nanggeedi.

*Kadhangga na iidoona no*

<sup>6</sup> NİKİRİ a'a ka tasala tadhangga könö ka lagala ka söödö ma 'dotombo'do, tumma ma iñjili ta'billi co ka kadu ma 'büdhülü nja kadu ma naanya nja kadu ma tumma kadhoonyo nja kadu in'dili. <sup>7</sup> Iidhe ko'd'o iki, "Aaga ri'ba a Masala aaga tafünügü oogo ko'do kudumma uuru ma tahükümü kadu no ndö'dö, aaga üürü ku'bu aaga tamma ka ömö'di tiya arü'bü 'dotombo'do nja 'büdhülü ya nja to nja nakanduguli ma 'biiđi."

<sup>8</sup> A tadhangga könö tuurna i'i keere iidhe iki, "Ma'dingga, ma'dingga Babil ma dhabbu mo, kudumma oono manangnga kadu ma tooye ngeeli na itoto no ma temelö tanno oono."

<sup>9</sup> İKİRİ tadhangga ya iidoona ya ka tuurna eege keere eema ko'd'o iki, "Ömö'di ya üürü amma ka niimö ma toroko nja koronggore tiya iini amma ka kala tammo iini kini ka dhugudha üürü kini ka niisö ya, <sup>10</sup> i'i afe'de ara tooye ngeeli ma tagoroo'bo na Masala na uurunja ka ker'de ma tagoroo'bo tanno oono, ara tapusu adene ana issi nja albaarü kidha ma kadhangga tanno insili no nja dhünggü. <sup>11</sup> A ndhiigö ma tapusu tisi coo'do turi ta'billi a talängnge titalo uuru nja ooso ka kadu tanno üürü kamma ka niimö ma toroko nja koronggore tiya iini no a nakömö'di tiya ana

kala ma eere tiya iini ya. <sup>12</sup> Ya asaasa tidhi oona ku'bu ma kadu tanno insili no kaföönyö tumma na Masala no, kütü katamma ka Yasu."

<sup>13</sup> Naföönyö a'a tumma ndama 'dotombo'do kiki, "Arigiri tumma no, a'da a'diila nja kadu tanno ake ka linggo tanno Uugaara ndama uuru tanno."

Koronggore iki, "İi amang kene talängnge ka dhügürü tiya eene kudumma linggo tanno eene ka tunggeene nja eene."

### *Tawaana migile koona ma 'büdhülü*

<sup>14</sup> Nikirri a'a ka tasala co nasala tülüögü ka ta'bassa, ömö'di ya emmi ka tülüögü ya, afeene nja 'bii'bala ma tadi'd'dü ndalembö ma tauugaara kungngo iini ka üüdü ma dahaba a manjala ma ungngo iini ka niisö mana kuri. <sup>15</sup> A tadhangga könö tö'dö kürö ndama la ma Masala iidhe a tumma ko'd'o ka ömö'di tiya emmi ka tülüögü ya, "Duga manjala müüdü nara migile kudumma uuru ka ndö'dö a migile ma 'büdhülü kanda ö'deene ma taraana."

<sup>16</sup> Ömö'di ya emmi ka tülüögü ya tapüögü manjala miini co 'büdhülü a migile ma 'büdhülü taradene.

<sup>17</sup> A tadhangga könö tö'dö kürö ndama la ma Masala ka 'dotombo'do, manjala mungngo iini mana kuri.

<sup>18</sup> A tadhangga könö ya afa ka issi ya tö'dö kürö ndama misi ma tirri iidhe eema ko'd'o ka tadhangga tiya ana manjala ya ana

kuri ya, "Duga manjala müüdü naruma ki'bim'bi ma 'büdhülü kudumma iïye miini ka ndö'dööne." <sup>19</sup> A tadhangga tapügü manjala miini ka 'büdhülü a taruma ki'bim'bi ma 'büdhülü uuru ka 'doonya ma tiyaana ma tagoroo'bo tanno Masala na dhabbu no. <sup>20</sup> Kasiraana ka ki'bim'bi ka müsi kürö ma anya, eriidö tisi aküro ndama 'doonya ma tiyaana iïsö faaya idhi ala kili ma muttu akete kala nameele namiya keera (200).

## 15

*Kadhangga na iidümmü kafünü eera no nja namaara ka iidümmü kafünü eera*

<sup>1</sup> Nikirii a'a ka tasala niimö keefe ka 'dotombo'do adhabbu ka'diila, kadhangga ka iidümmü kafünü eera kümmü namaara no iidümmü kafünü eera no, eege kungno keere a Masala ka tatimö tagoroo'bo noonoo iini.

<sup>2</sup> Nasala a'a 'buugu kafeene nja to tammo insili afa gasasa mo katonggoonyo ana issi nasala kadu no kii'bi niimö ma toroko nja koronggore tiya iini ana tamana ma eere tiya iini. Ka'dingnge ana ko'do ka tinggini ma gasasa mo, kümmü erempeera na Masala ka anangnga eene ka niisö no. <sup>3</sup> Küwe tüüsü ma Müusa tasaga ya Masala, nja tüüsü ma dhünggü kiki, "Ka Masala Uugaara ma ana türü mo,

kadhabbu linggo nüüdü keefe, nafiinü nüüdü ka dhidho ka dhorro, Uugaara ma nagürüünü nye'd'de.

<sup>4</sup> Ka Uugaara, mada i'i yungngo taalo ara tari'ba o'o, afünügü eere yüüdü ko'do?

O'o na insili unggodho o'o. Ara kadu nye'd'de sa köö'dö küürü küdü kidha kudumma linggo üüdü a dhidho, a kadu tadinö kide nye'd'de."

<sup>5</sup> Nikirii a'a ka tassa co nasala la ma Masala nja fangga ma tumma ma Masala ka tatanfa'da ka 'dotombo'do. <sup>6</sup> A kadhangga tö'dö kürö ndama la ma Masala ka iidümmü kafünü eera, maara ma iidümmü mafünü eera mungno eene, kümmü en'di ya insili ya alimaana ya ka oona kimi'di naaro ana jönnö ma dahaba.

<sup>7</sup> Könö ka eema tiya efe ka 'dii ya egisö ya tanangnga naadho ma dahaba ka iidümmü kafünü eera a kadhangga tanno iidümmü kafünü eera no kadigine a tagoroo'bo ma Masala, tammo efe ka 'dii turi ta'billi mo. <sup>8</sup> La ma Masala tadigine ana ndhiigö ma tühindhi nja türü tanno Masala, taalo ömö'dii ma tambaanya co la ma Masala, ara maara ma iidümmü mafünü eera ma kadhangga tanno iidümmü kafünü eera no köö'dö iini no ka titaalo.

# 16

*Naadho ma tagoroo'bo na  
Masala*

<sup>1</sup> Naföönyö a'a tumma ko'd'o ndama la ma Masala eemaga ka kadhangga tanno iidümmü kafünü eera no, "Aaga agolo aaga tuurugu naadho ma tagoroo'bo na Masala na iidümmü kafünü eera no ka 'büdhülü." <sup>2</sup> A tadhangga ya dhidha ya tunggeene ateefe tuuru ker'de miini ka 'büdhülü, eema ya in'di ya tatoroko abbü 'dala ka kadu na ana kala ma niimö ma toroko nja kadu na üürü ka koronggore no kamma kini.

<sup>3</sup> İkiri tadhangga ya eera ya ka tuuru ker'de miini co to, a 'biidi tafeene nja eriidö ma ömö'di tiya eyi ya, eema ya adinö ka to ya taaya nye'd'de.

<sup>4</sup> A tadhangga ya iidoona ya tuuru ker'de miini co a neeri nja nduguli ma 'biidi atem'bele kada eriidö. <sup>5</sup> Nikiri a'a ka aföönyö a tadhangga ma 'biidi ka tiki, "O'o taalo nüuni ada kadu ku'bu, o'o nadho ka fiini,

yungngo kide adaganna kide, o'o na insili no, kudumma üüdü nadho ka fiini,

<sup>6</sup> kudumma eene ka tuuru eriidö ma kadu tanno Masala co nja nagane'bi, yungngo üüdü ka anangnga eriidö eene a'da kooye,

kikiri kaluna yeene ka asaasa ya."

<sup>7</sup> Naföönyö a'a tumma afe'de ndama müsi ma tirri iki,

"İi, Masala o'o na Uugaara ma ana türü mo, fiini yüüdü ka dhidho atatimin'da."

<sup>8</sup> A tadhangga ya egisö ya tuuru ker'de miini ka ndanaaya a türü tananja eene ma tinyogo kadu ana issi. <sup>9</sup> A kadu tatinyogo a tagu'daana, keela eere ya Masala, mana türü ma maara, lakiini taalo kaadha ka tatoroko, kitaalo kafünüğü Masala ko'do.

<sup>10</sup> İkiri tadhangga ya iidümmü ya uuru ker'de miini ka kööyö tanno niimö ma toroko, a tauugaara niini talifi. İkiri kadu ka agi'di nagonggo'do neene kudumma eene ka tin'di. <sup>11</sup> Keela Masala ma 'dotombo'do kudumma tin'di tanno eene nja 'dokotere tanno eene, kitaalo kaadha ka linggo tanno eene.

<sup>12</sup> A tadhangga ya iidümmü kafünü unggodho ya tuurugu ker'de miini co ri ma Fürat ya dhabbu ya, a 'biidi miini taa'du amang kini tindinaana fiini ma naguugaara ma fiini ma ndanaaya no. <sup>13</sup> Nikiri a'a ka tasala nagoronggore na nyoro no kiidoona kafeene nja namürö kunggunu kürö ndama niimö ma ni ma 'biidi ya dhabbu ya nja niimö ma niimö ma toroko

nja nüönö ma ne'bi tiya akorokoro ya.<sup>14</sup> Eege ka nagoronggore ma na'bu na ale'bele eema keefe no, kaco ka naguugaara ma 'büdhülü nye'd'de ka wagaana eege ka oona keema koro'bo ka uuru tanno dhabbu, uuru ma Masala tammo ana türü mo.

<sup>15</sup> "Adinö ko'do, ara a'a tö'dö afa tanyooro, a'dila nja ömö'dii tiya adinö ko'do ya afa ka en'di amang kini tafa tunggeene ana oona ku'bu a kadu tiji i'i ka ta'döngngönyö ka oona."

<sup>16</sup> Awagaana eege ka oona ka 'buugu tiya ana eere a tangga Ebriya a'da Harmajdün.

<sup>17</sup> A tadhangga ya iidümmü kafünü eera ya tuurugu dho miini coo'do, a tumma tö'dö kürö ko'd'o ndama kööyö ka la ma Masala iki, "Ndafaradene."

<sup>18</sup> İkiri tombo'do ka limaana, fara ma abaana ma tombo'do, a 'buugu tatänggi'dii dhindho taalo agüuni adene nggeege jiddi ma ömö'dii ka taganna 'büdhülü.

<sup>19</sup> Anya ma dhabbu mo tasümününja ku'bu ma iidoona ka oona, a naanya ma kajeene tatangga'da a Masala tagüigi Babil ma dhabbu mo manangnga oogo ka tooye ngeeli ka ker'de tanno oono, ngeeli ma tagoroo'bo noono.

<sup>20</sup> A najasiira tarünö nye'd'de kungngo a na'dikinya tamanyaaga.

<sup>21</sup> A köröörö ya ii fi ya, ta'dünggö

ka kadu ko'do ndama 'dotombo'do adhabbu, a kadu teela Masala kudumma tabbü adene ma köröörö, kudumma tabbü adene miini ka tatoroko 'do.

## 17

*Aka nja nüömö ma toroko*

<sup>1</sup> A tadhangga könö ana ka tanno na iidümmü kafünü eera no ana naadho ka iidümmü kafünü eera no iki a'a, "Aayu nalaga o'o ka tapusu adene tanno madatemelö tammo dhabbu mo memmi ka 'büüdi ya dhabbu ya.

<sup>2</sup> Naguugaara ma 'büdhülü kafüngngö ana oogo, a kadu ma 'büdhülü taaya kene ka tagooye ngeeli ma temelö noono."

<sup>3</sup> İkiri tadhangga ka 'duga a'a a koronggore aco a lodho iini, nasala aka memmi ka 'dugeere ma nüömö ma toroko öödhe ana nagereene ma teela Masala ka oona nye'd'de, nanggüüdü niini ka iidümmü kafünü eera ana iidö kada'baaga.

<sup>4</sup> Madagümmü en'di ya dhöyö ya nja tiya öödhe, mümmü dahaba nja nüigisi tanno agu'daana no nja lüülü, dho ma dahaba mungno oono ka niisö madigine ana eema tiya toroko ya nja nyoro ma temelö tanno oono.

<sup>5</sup> Ikirinja eere oono ka dhugudha a'da, kume, "Babil ma dhabbu, nüömö ma katemelö nja nyoro ka 'büdhülü."

<sup>6</sup> Nasala a'a aka ka teyi ka eriidö tiya oono ka tagooye

ma kadu tanno insili no, nja kadu tanno agirinadene kudumma eene ka tamma ka Yasu no. Kede ka tasala oogo nadhere 'do.

<sup>7</sup> İkiri tadhingga ka tindini a'a a'da, "Minna agu o'o nadhere? Ara a'a tadirina niimö ya afeene nja aka nja niimö ma toroko tiya ümmü oogo ka 'dugeere ya a nanggüdü ka iidümmü kafünü eera ana iidö kada'baaga no.

<sup>8</sup> Niimö ma toroko yüdü ka tijöögö ya akeefe ka 'dï, illi i'i anda taalo 'bitingngö, lakiini i'i anda kete köö'dö kürö ndama ööye ya dhonggoro ya ma co teyi. A kadu na ka 'büdhülü no tadhere, nagereene tanno eene taalo kakirinja ka sorne ma tefe ka 'dï jiddi ma 'büdhülü ka tarü'bü adene kene kara tasala niimö ma toroko, kudumma iini ka takeefe ka 'dï, a 'bitingngö taalo efe ka 'dï, illi i'i ara tafada öö'dö.

<sup>9</sup> "Kasaasa tumma no, tussu eema nja ta'dara, nanggüdü na iidümmü kafünü eera no eege ka nakürünggürü na iidümmü kafünü eera, aka ka temmi kide no. Eege ka naguugaara na iidümmü kafünü eera afe'de. <sup>10</sup> Na iidümmü no ka'dingga, aya iidümmü kafünü unggodho ya aleefe tauugaara, aya iidümmü kafünü eera ya ara üfürü tö'dö, lakiini tauugaara niini taalo ara tadhonggoro. <sup>11</sup> Lakiini niimö ma toroko ya akeefe ka 'dï, asa katitaalo efe ka 'dï ya, i'i ya uugaara ya iidümmü afünü

iidoona ya. I'i ya miini ama tanno iidümmü kafünü eera no, i'i ara co teyi.

<sup>12</sup> "Illi iidö na ada'baaga nüüdü kijöögö no eege ka naguugaara na ada'baaga küfürü tümmü tauugaara no, kara sa ka'duga türü ma tauugaara nja niimö ma toroko ana ndanaaya ka unggodho. <sup>13</sup> Eege no, tumma neene ka unggodho meene ka anangnga türü neene nja tauugaara a niimö ma toroko. <sup>14</sup> Kara teema koro'bo nja dhünggü, lakiini dhünggü ara tii'bi eege kudumma iini ka ta Uugaara ma naguugaara, ada Uugaara ma naguugaara na ii fi no, a kadu na aneene nja eene no eege kagümmünüdene, nja tanno akessedene no, nja tanno amma ka Masala no."

<sup>15</sup> İkiri tadhingga ka tiki a'a, "'Biidi yüdü ka tijöögö aka tammo a temelö mo ka temmi kide ya, i'i ya kadu nja kajeene nja naanya nja tumma kadhoonyo. <sup>16</sup> İidö na ada'baaga nüüdü ka tijöögö no nja niimö ma toroko, kara saga diidi aka ma temelö mo kara tamuru eema ya kono nye'd'de kafa kono ana oona ku'bu, kagu uu'da noono kinyogo oogo ana issi. <sup>17</sup> Kudumma Masala oogo manangnga tumma no kene ka nanggeedi a'da kalinggo afa ma tiya oono ka asaasa ya kungngo, meene kimi'di tumma ma tümmünü tauugaara neene a niimö ma toroko, amang

ka tumma tanno Masala co ööye miini.<sup>18</sup> Aka müdü ka tiji oogo mo, oogo ma anya tammo dhabbu mo, ma uugaara ma naguugaara ma 'büdhülü."

## 18

### *Ta'dingga na Babil*

<sup>1</sup> Nikirii a'a ka tasala tadhangga könö afe'de unggunu aku'bu ndama 'dotombo'do ana türü kadhabbu, a 'büdhülü ta'dara a töyeeene tanno iini. <sup>2</sup> Iidhe a tumma ko'd'do,

"Ma'dingga, ma'dingga Babil ma dhabbu mo,  
ma ta'buugu ma na'bu  
kadanna kide  
ndama 'buugu ma ta-  
neene ma nagana'bu  
tanno oroko no  
nja uyi tiya nyoro ya,  
ya kadu kanu kide ya  
nye'd'de.

<sup>3</sup> Kadu ma 'büdhülü nye'd'de  
tagooye ngeeli na itoto  
na ma temelö tanno  
oono,

a naguugaara ma  
'büdhülü kafüngngö  
ana oogo,  
a kadu ma na anadene  
ana eema tüüsü ka  
eema tiya oono ya  
dhabbu ya."

<sup>4</sup> Nikirii a'a ka föonyö  
tumma afe'de ndama  
'dotombo'do kiki,  
"Akö'dö kürö ndama oono,  
kadu eede,

amang kada tafa tosso  
ka eema tiya toroko ya  
nja oono,  
amang kada tafa tosso  
ka tapusu adene ka  
namaara nja oono.

5 Kudumma tatoroko  
tanno oono kakod-  
honcoko kalla kala  
'dotombo'do,  
a Masala tagiigü tatoroko  
noono.

6 Agüünii midhi ku'bu ana  
oogo afa moono ka  
tagüünii midhi ku'bu  
'do ana aaga kungngo,  
aaga kusu midhi kono  
kide ma dhabbu ada  
yoono ka tagüünii ana  
aaga ya kungngo.

Aaga konyaana ker'de  
ma ngeeli tanno oono  
kafünü kide no.

7 Aaga apusu oogo, aaga tafa  
kono mafara dhindho  
tamana moono ka  
takidhindhii ma  
taküüsü.

Mindhügi eyi yoono miki,  
'A'a nungngo nemmi  
kita ka tauugaara,  
taalo a'a na aka ma  
küüme,  
nitaalo nussu muuyu.'

8 Nggeege ara tagoroo'bo  
tümmü oogo ana uuru  
ka unggodho,  
inde nja müürü nja ii're,  
ara issi tinyogo oogo  
kudumma türü kungngo  
Masala Uugaara, mara  
tasigi oogo mo."

9 Ara naguugaara ma  
'büdhülü sa fara kamüürü,  
eäge na fungngö ana oogo  
kadhadho nja oono, kafara  
kene kara tasala ndhiigö ma  
issi tanno oono. <sup>10</sup> Köödhii  
ku'b'ba eene kari'ba a  
tapusu adene tanno oono  
kiki, "Am'ba! Am'ba küdü  
anya ma dhabbu, anya ma  
Babil ma ii'baana mo, ara

o'o tasigidene ana ndanaaya ka unggodho."

<sup>11</sup> Ara kadu ma 'büdhülü na anadene ana eema no, saga fara oogo kamüürü, kudumma ömö'di ma tana eema kene taalo. <sup>12</sup> Eema ma dahaba nja fudda nja nduguri nja lüülü tiya agu'daana ya, nja en'di ma hariir nja en'di ma silik tiya öödhe ya, nja naafa nye'd'de na afeene nja togoogo no, nja eema tiya agalinggo adene ana iginia ma mongngo ya nja kee'di tanno agu'daana no, nja tanyaanya nja elili nja nduguri. <sup>13</sup> Nja girfa nja kondho ma ndhiigö nja russu, nja maaga nja felengidhi, nja ngeeli nja uu'ba nja müsö tammo ilollo mo nja migile, nja eema ma eriidö nja ki'biini nja naguttu nja karru nja kasaga nja nagoronggore ma nakömö'dii.

<sup>14</sup> A kadu na anadene no tiki oono, "Eema ya a'diila ya kanna küdü ya akunggeene. Eema ya kanna küdü adhabbu ya nja tihindhi a'dugadene taalo o'o taluna afe'de." <sup>15</sup> Kadu nanadene ka anya kana almaala dhabbu no kara ta'dingnge ku'b'ba kanna kudumma eene ka ari'ba a tapusu adene tanno oono, katafara kamüürü. <sup>16</sup> Kiki, "Am'ba! Am'ba küdü, anya ma dhabbu mo, magümmü en'di ma ndugaara na ku'daana no ka oona nja en'di tiya öödhe ya,

ümmü dahaba nja kisi tanno agu'daana no nja lüülü.

<sup>17</sup> Eema yoono ya nye'd'de kungngó ara titaaló ana ndanaaya ka unggodho."

Namürkabü nye'd'de nja dhabbu ma nasawaaga miini nja kadu tanno no linggo kide no, nja kadu töccö no kuri ka to ka oona no töödhü ku'b'ba. <sup>18</sup> Kiidhe ko'd'do kene ka tasala ndhiigö moono ka finne, "Magganna anya ma idhindhü afa ma tammo kungngó?" <sup>19</sup> Kadhibi kuraaga eene ka nanggüdü kafara kamüürü kiki a'da,

"Am'ba! Am'ba ka anya tammo idhindhü mo, a kadu na ana namürkabü ka to no eege saga tatangga'da ana ndanaaya ka unggodho.

<sup>20</sup> 'Dotombo'do, adhodho kudumma oono ka taga'dadene, aaga dhodho kadu na insili no nja kadafiinü nja nagane'bi kudumma Masala ka takapusu oogo ka eema tiya oono ka tagüünü ana aaga ya."

<sup>21</sup> İkiri tadhingga ya dhabbu ya ana türü ya, ka a'duga misi ma köje nja misi ma tawöönö ma dhabbu mo, apügü co to iki,

"Nggeege ara Babil ma idhindhü mo tapügünja co to a türü

mitaalo mara talu-  
nadene afe'de.

<sup>22</sup> Taalo kadu kara taföönyö  
a kadu ka tüwe tüüsü  
nja fara ma perempeera  
nja kaaru nja tiniidö<sup>1</sup>  
taalo kadu ma linggo kara  
tanna küdü kanna  
afe'de,  
taalo kadu kara  
taföönyö fara ma  
tawöönö küdü afe'de.

<sup>23</sup> Taalo töyeene ma lamba  
töyeene küdü afe'de,  
taalo taföönyö tüüsü ma  
kadu tanno arna no  
küdü,  
kudumma kadu tanno  
anadene ka kadu ma  
'büdhülü na idhindhii  
no,  
a kadegeene nüüdü  
no kaama kadu ma  
'büdhülü nye'd'de  
kungngó.

<sup>24</sup> Kaduna eriidö kono ma  
nagane'bi nja kadu  
tanno insili no  
nja kadu na kiri-  
nadene ka 'büdhülü  
nye'd'de."

## 19

*Tüüsü ma tii'baana ka  
'dotombo'do*

<sup>1</sup> Ndama kanna nükirii a'a  
ka aföönyö tumma ko'd'do  
tumma ma kadu kadhabbu  
ka 'dotombo'do kiidhe kiki,  
"Halülüya!"

Toolona na Masala tammo  
aja nja türlü nja  
tidhindhii.

<sup>2</sup> Tasigi noono kadho ka  
fiinii kada timin'da.

Agasigi madatemelö ma  
dhabbu mo  
maga'da 'büdhülü a  
temelö tanno oono,  
a'diinö kömüsü ma eriidö  
ma kasaga tanno  
oono."

<sup>3</sup> Kalneege ko'd'do afe'de,  
"Halülüya!"

Ndhüigö ma tafinne moono  
kisi coo'do turi  
ta'billi."

<sup>4</sup> İkiri kadiifi no ukumu  
ömö'dü kafünü egüsö no nja  
eema ya efe ka 'dü ya egüsö  
ya, tüürü ku'bu ana küüge  
küürü ka Masala tammo  
emmi ka kööyö mo. Kiki,  
"Amiin! Halülüya!"

<sup>5</sup> A tumma tö'dö ndama  
kööyö kiki,  
"Aaga füñügü Masala  
tammo aja,  
aaga no kasaga tanno  
oono  
nja kadu nye'd'de na iifi  
no nja tanno idhiidhi  
no kari'ba oono."

<sup>6</sup> Naföönyö tumma  
kafeene nja tumma ma kadu  
kadhabbu afa fara ma faaya,  
afa fara ma tabaana ma  
tombo'do iki,  
"Halülüya!"

Kudumma Uugaara  
Masala maaja ma ana  
türü mo ara tämmü  
tauugaara.

<sup>7</sup> Kada kadhodho angnga  
taga'deema,  
angnga takafünügü  
oogo ko'do

kudumma uuru ma tarña  
tanno dhünggū ka  
ndö'dö  
a 'bala miini manda kin-  
dinaana oona ku'bu.  
8 Kanangnga ten'di ma  
ndugaara ma'bassa  
ma insili mo oono,  
a'da magirnii kono ka  
oona."

Kudumma ten'di ma  
ndugaara eege ka linggo ma  
kadu na Masala tanno a'diila  
no.

9 İkiri tadhingga ka tiki  
a'a, "Arigiri tumma no,  
a'diila nja kadu tanno tö'dö  
ka taanyara ma tarña ma  
dhünggū." A tadhingga  
tiki a'a afe'de, "Tumma  
na Masala dhorro eege  
kungngo."

10 Nüürü kini kidha ma  
tamma kini, lakiini i'i iki a'a,  
"Fa tüünii kungngo, a'a na  
tasaga afa o'o, afa nagöre  
nüüdü na ümmü tumma  
na Yasu no. Afara ka  
Masala kudumma tumma  
tanno Yasu eege ka korong-  
gore ma tane'bi."

*Ömö'dii ya aka ka muttu  
tiya 'bassa ya*

11 Nikiri a'a ka tasala  
'dotombo'do kata tanfa'da,  
a muttu tö'dö a'bassa ana  
ömö'dii ka taka kide ana  
eere a'da tadho ka fiinii ya  
nja dhorro ya. Tasigi kadu  
kada dhidho ma timin'da,  
eema koro'bo taalo üünii ada  
kadu ku'bu. 12 İiye niini  
kafeene nja onggo'do ma  
iissi, a kalembö kungngo  
iini ka üüdü kadhabbu.  
Eere ikirinja kini taalo

ömö'dii ma tussu illi i'i.  
13 Ten'di ma ungngo iini  
ka oona manyo'donja ka  
eriidö ana eere a'da tumma  
na Masala. 14 A nasigira  
ma 'dotombo'do ka taka  
ka naguttu kada 'bassa  
kuurna i'i keere, ana en'di  
ma ndugaara ya ka'bassa  
ya insili ya ka oona. 15 A  
kulu'ba ma dhonggoro mo  
ticci akürö ndama iini ka  
niinö mana kuri, miini kara  
tabbü kadu ma kajeene  
iini, ara tauugaara meene  
a kuufi ma ndaliili. Asiri  
ka 'doonya tiya ki'bim'bi  
ma ngeeli ma tagoroo'bo nja  
Masala tammo ana türü mo.  
16 Eere taga kirinja ka ten'di  
tammo iini nja tadüüfü  
tanno iini a'da: Uugaara ma  
naguugaara, ada Uugaara  
ma naguugaara na ii fi no.

17 Nasala tadhingga ka  
a'dingnge ana ko'do ka  
ndanaaya, iidhe ka uyi  
ko'd'do ya alagala ka  
'dotombo'do ka söödö ya,  
"Aaga ö'dö aaga emmi in'dili  
ka taanyara tanno Masala  
na dhabbu no. 18 Aaga  
kö'dö aaga tagu uu'da ma  
naguugaara nja uu'da ma  
naguugaara ma nasigira nja  
uu'da ma tanno ana türü no,  
nja uu'da ma naguttu nja  
kadu tanno kaaka kide no,  
nja kadu nye'd'de, kasaga  
nja tanno taalo ka kasaga  
no, na idhiidhi no nja tanno  
ii fi no."

19 Nasala niimö ma  
toroko nja naguugaara ma  
'büdhülü nja nasigira tanno

eene kawaana oona ma teema koro'bo nja ömö'dü tiya aka ka muttu ya nja nasigira tanno iini.<sup>20</sup> A nüümö ma toroko tümmü adene nja ne'bi tiya akorokoro ya, ya agalinggo eema keefe kidha ma nüümö ma toroko. Iisini kadu na ana kala ma nüümö ma toroko no, nja kadu tanno üürü ku'bu kamma ka koronggore ma nüümö ma toroko no. Kapügü nüümö ma toroko nja ne'bi tiya korokoro ya co to ma albaru ma issi tanno afinne no kadiño kungno.<sup>21</sup> A türeene meene tagirinadene a kulu'ba tammo icci a kürö ndama nüünö ma ömö'dü tiya aka ka muttu ya, uyi tüüsü ka uu'da tanno eene nye'd'de kungno.

## 20

### *Ebliisi agapusu adene a nagürüünü alif*

<sup>1</sup> Nikirü a'a ka tasala tadhangga ka tunggunaaku'bu ndama 'dotombo'do ngafata ma ööye ya dhonggoro ya ungngo iini ka niisö ana jansiiri isissi. <sup>2</sup> Ümmü nü ma 'büüdi ya dhabbu ya nü ma 'billi ya, ya ana eere a'da Ebliisi nja Sitan, imi'dini i'i ku'bu a nagürüünü na ö'dö alif. <sup>3</sup> İkiri ka tapügü i'i co ööye tiya adhonggoro ya eere kide abbünnü hitimi kide amang kini tafa tüüsini kadu afe'de, ara nagürüünü na ö'dö alif no ka tatüümö. Kassa ka tapa kini agünü idhilli.

<sup>4</sup> Nasala a'a nagööyö a kadu tanno a'duga tauugaara ma tasigi kadu. Nasala nagoronggore ma kadu tanno na tendhe kene ka eyi no kudumma eene ka teema ma Yasu ka üüdü ma tumma ma Masala. Taalo küürü ku'bu kamma ka nüümö ma toroko, kitaalo kamma ka koronggore tiya iini, kitaalo kana kala ma nüümö ma toroko ka nadhugudha nja iisine. Kateefe ka 'dü kada naguugaara nja Almasiihi a nagürüünü kö'dö alif. <sup>5</sup> Lakiini türeene ma kadu taalo kara tefe ka 'dü a'da üfürü nagürüünü na ö'dö alif tatüümö. Tafiki'dö na dhidha no eege kamiini. <sup>6</sup> A'diila insili nja kadu tanno ka tafiki'dö tanno dhidha no, taalo türü ma inde tanno eera no kene lakiini eege kara ta ka'boge ma Masala nja Almasiihi, kada naguugaara nja iini a nagürüünü na ö'dö alif.

### *Ta'dingga na Ebliisi*

<sup>7</sup> Aga nagürüünü na ö'dö alif no kara tatüümö ya kapa ka Sitan ndama pabuuusu tiya iini. <sup>8</sup> Öö'dö kürö aga'da kadu ka nanggüüdü ka 'büdhülü ka 'buugu na egüsö no ma 'büdhülü, kana eere a'da Jüp nja Majüp, awagaana eege ka oona ma teema koro'bo eege kaköje nja ndamugu ma to. <sup>9</sup> Kanyalaana oona ka 'büdhülü kaku'du angga na kadu tanno insili no ko'do nja anya tammo oono ka asaasa oogo mo, lakiini issi ka öö'dö ku'bu ndama

## 21

'dotombo'do kagirina eege.  
<sup>10</sup> Kapügü Ebliisi ya ka'da eege ka nanggüüdü ya co to ma iissi nja albaru ka 'buugu tiya niimö ma toroko nja ne'bi tiya korokoro ka tanna kide ya, kapusu adene kide eege nye'd'de uuru ana ooso turi ta'billi.

*Kööyö ya dhabbu ya a'bassa ya*

<sup>11</sup> Niküri a'a ka tasala kööyö a'bassa adhabbu, nasala ömö'dii ya emmi kide ya. 'Büdhülü nja 'dotombo'do ka arünö kini kidha a ton'do meene titaalo.  
<sup>12</sup> Nasala kadu na aaya na iifi no nja tanno dhiidhi no ka'dingnge ana ko'do kidha ma kööyö, a kasorne tatanfa'da. Sorne könö tatanfa'da i'i yungngo sorne ma tefe ka 'dii. A kadu na aaya no kümmü adene ka tamana linggo tanno eene afa ma sorne ka tiki kungngo. <sup>13</sup> A to tadhifigi kadu na kide na aaya no ko'do, a inde nja 'buugu ma inde tadhifigi kadu na aaya kide no ko'do, kagapusu adene nye'd'de ka üüdü ma linggo tanno eene. <sup>14</sup> Inde nja 'buugu ma inde kapügü co a to ma iissi, a to mo, oogo ma inde tanno eera no.  
<sup>15</sup> Ömö'dii ya eere tiya iini ka titaaalo ka sorne ma tefe ka 'dii ya apügünja co to ma iissi.

*'Dotombo'do no issi no nja  
 'büdhülü tiya issi ya*

<sup>1</sup> Niküri a'a ka tasala 'dotombo'do no issi no nja 'büdhülü tiya issi ya kudumma 'dotombo'do tanno dhidha no nja 'büdhülü tiya dhidha ya ka manyaga, a to titaaalo afe'de. <sup>2</sup> A'a na Yühanna nasala a'a anya ma insili mo, Örsaliim ma issi mo, ka tunggunu aku'bu ndama 'dotombo'do ndama Masala, afa 'bala ma indinaana oona ku'bu ka'diila ma toreene nja nyuri tiya oono. <sup>3</sup> Niküri a'a ka aföönyö tumma ko'd'do ndama kööyö kiki, "A 'bitüngngö 'buugu ya Masala ka tanna kide nja kadu ya, i'i yungngo mara tanna kide nja eene kada kadu tanno oono. Masala ana oona moono mara taneene nja eene, mada Masala tammo eene. <sup>4</sup> Mara tayu fara eene ka iïye, ara inde titaaalo nja müürü, a fara titaaalo nja tin'd'di, eema ya illi ya ara tamanyaga."

<sup>5</sup> A ömö'dii ya emmi ka kööyö ya tiki, "Ara a'a tanangnga eema in'dili ka tissi." Afada iki a'a, "Arigiri tumma no ku'bu ka dhorro ka tatimin'da."

<sup>6</sup> Iki a'a, "Afaradene eema nye'd'de. A'a na dhidha na tiya eere ya. Ömö'dii ya tenege kagu i'i ya ara a'a tinyi 'biüdü iini ndama,

**20:11** 20.11 Daniel 7.9–10; Asaiya 51.6

**21:2** 21.2 Asaiya 52.1; Asaiya 61.10; Tumma tanno Yasu 3.12

**6.11–12;** 2 Kürünsüs 6.16

**21:4** 21.4 Asaiya 25.8; Asaiya 35.10

**Asaiya 55.1**

**21:1** 21.1 Asaiya 65.17; 2 Bütrüs 3.13

**21:3** 21.3 Lawi

**21:6** 21.6

nduguli ma tefe ka 'dī a'da taalo afaana. <sup>7</sup> Ömö'dī ya ii'baana a'duga eema ya nye'd'de na ta Masala tammo iini a ta'bii'bala tiya eede. <sup>8</sup> Lakiini kadu nari'ba no nja tanno taalo kamma ka Masala no nja kadu tanno kirina kadu no nja kadu tanno oroko no nja katemelö nja kadegeene nja kadu tanno amma ka eema ma namasala no nja kadu tanno akorokoro no nye'd'de, 'buugu yeene a'da to ma finne ana issi nja albaru mo, inde na eera no eege kamiini."

### *Örsaliim ma issi mo*

<sup>9</sup> A tadhangga könö ana ka tanno iidümmü kafünü eera no, na ana nadho ka iidümmü kafünü eera kadigine ana maara na iidümmü kafünü eera no. Ö'dö iki a'a, "Aayu nala o'o ka 'bala aka ma dhünggü." <sup>10</sup> A'duga a'a a koronggore asirö anya ma dhonggoro ma dhabbu mo, alaga a'a co Örsaliim anya ma insili mo, munggunu ku'bu ndama Masala ka 'dotombo'do. <sup>11</sup> Alimaana afa töyeene ma tiidhindhi ma Masala, ka liminanago afa misi ma ku'daana mo, kafeene nja misi ma öödhe ma agiiri mo ya insili afa gasasa ya kungngo. <sup>12</sup> A ndhiidhö kadhabbu adhonggoro, naginyeene ka inggide kada'baaga kafünü eera, a kadhangga kinggide kada'baaga kafünü eera a nagereene kakirinja kide eege ka nagereene ma siliga ma Israyil na

ö'dö kada'baaga kafünü eera no. <sup>13</sup> Ndama fiini ma ndanaaya naginyeene kinggide kiidoona, ndama küüle naginyeene kinggide kiidoona, ndama küülü naginyeene kinggide kiidoona, ndama nüümö ma ndanaaya naginyeene ka inggide kiidoona. <sup>14</sup> A ndhiidhö ta'dingnge ka kadese kada'baaga kafünü eera, nagereene kungngo eene kana eere a'da nagereene ma kadafiini tanno dhünggü na ada'baaga kafünü eera no.

<sup>15</sup> A tadhangga ya ageema nja a'a ya, ümmü tam'bala ma dahaba ma tinni anya iini nja naginyeene miini nja ndhiidhö miini. <sup>16</sup> İkiri ka takinni oogo möö'dö alif na miiya ka iidümmü nameele (1,500) a tadhonggoro miini nja dhüdhü miini nja ta'doogo miini ka unggodho. <sup>17</sup> İkiri ka takinni ndhiidhö miini öö'dö dhüdhü ma nüüsö ma ömö'di ukumu kadu ka iidümmü a kadu keera kafünü kide egüsö (144), afa tadhangga ka takineene kada köje afa nüüsö ma ömö'di. <sup>18</sup> A ndhiidhö tarü'bü adene a niigisi na öödhe ka agiiri ya, ya, anya tarü'bü adene ana dahaba unggodho i'i kungngo kafeene afa gasasa ma insili mo. <sup>19</sup> A kadese ma ndhiidhö ma anya takesedene a niigisi tanno agu'daana no kada tonggoonyo. Kadese na dhidha no kama niigisi tanno a kirikiri na öödhe no.

Anno eera no, mïsï ma kirikiri ma lanja mo,  
 anno iidoona no mïsï ma 'bassa mo,  
 anno egiisö mïsï ma kirikiri mo.  
 20 Na iidümmü ya mïsï ma irrifi mo,  
 aya iidümmü afünü ungodho ya mïsï ma dhöyö mo,  
 aya iidümmü afünü eera ya mïsï ma kuuli ma kirikiri,  
 aya iidümmü afünü iidoona ya mïsï ma kirikiri mo,  
 aya iidümmü afünü egiisö ya mïsï ma kuuli mo,  
 aya ada'baaga mïsï ma kirikiri mo,  
 aya ada'baaga afünü ungodho ya, mïsï ma ngalangala mo,  
 aya ada'baaga afünü eera ya ünggülü miini atonggoonyo.

21 Ìnye no tagalinggo adene ana lüülü unggodho, a fiinii ma anya ya adhüföölö ya agalinggo adene ana dahaba tiya insili ya kafeene nja gasaasa tammo aja kiji 'buugu iini no.

22 Taalo a'a nasala la ma Masala ka anya, kudumma Masala Uugaara ma ana türü mo nja dhünggü eege ka la ma Masala. 23 Anya taalo masaasa töyeene ma ndanaaya nja tere, kudumma töyeene ma Masala ka töyeene ada kono, a dhünggü i'i ya lamba tammo oono. 24 Ara kadu

nye'd'de saga tunggeene ka töyeene tanno oono a naguugaara ma 'büdhülü töö'dö ana almaala tiya eene oono. 25 Taalo naginyeeene noono ka teere uuru na in'dili no, kudumma ooso ka titalo kide. 26 Tidhindhi nja ta'dila ma naanya kara tö'dö iini kide. 27 Taalo nüümö ya nyoro ya ara co anya nja kadu tanno üuni eema ya toroko ya nja tanno akorokoro no, illi kadu no nagereene tanno eene ka kirinja ka sorne ma tefe ka 'dii ma dhünggü.

## 22

*Ri ma tefe ka 'dii*

<sup>1</sup> Ìkirri tadhingga ka laga a'a co ri ma 'büdü ma tefe ka 'dii, insili afa gasasa nduguli küsö ndama kööyö ma Masala nja dhünggü. <sup>2</sup> Iisö ka söödö ma fiinii anya, fa ma tefe ka 'dii ungngo ka tinggini ma ri ateera miini, eene laala ada'baaga kafünü eera ta unggodho ka tere. A dhaaru miini toolona kadu ma 'büdhülü ka maara. <sup>3</sup> Taalo teeladene kara tanna kide ndama uuru tanno afe'de, ara kööyö ya Masala nja dhünggü tanna ka anya, a kadu niini talinggo ada iini. <sup>4</sup> Kara tadinö ka dhugudha tiya iini, eere yiini tanna kene ka nadhugudha. <sup>5</sup> Taalo 'buugu ara tooso kide, taalo kara tasaasa töyeene ma lamba nja töyeene ma ndanaaya, kudumma Masala Uugaara

mara tanangnga töyeene  
eene kara ta naguugaara turi  
ta'billi.

<sup>6</sup> A tadhangga tiki a'a,  
"Tumma ka timin'da ka tad-  
horro. Masala Uugaara ma  
koronggore tiya nagane'bi  
mo, magürünü tadhangga  
yoono öö'dö tala eema ya  
ara tüünidene kete kungngó  
ya a kasaga tanno oono."

### Tö'dö na Yasu

<sup>7</sup> "Aaga föönyö, a'a  
nungngo nara tö'dö areere  
a'diila nja ömö'dii tiya  
talinggo a tumma ma tane'bi  
ka sorne tiya."

<sup>8</sup> A'a na Yühanna,  
naföönyö a'a nadinö ka  
eema tiya, kede ka taföönyö  
natadinö kide ya, na'dingga  
ka uune ma tadhangga tiya  
anangnga a'a ka tadinö kide  
ya. <sup>9</sup> İkürü ka tiki a'a, "Fa  
tüüni kungngó, a'a nadasaga  
afa ma o'o nja nagöre tanno  
üüdü nagane'bi nja kadu  
tanno alingga a tumma ma  
sorne nye'd'de no, afara ka  
Masala."

<sup>10</sup> İkürü ka tiki a'a, "Fa  
taküdhü tumma ma tane'bi  
no ka sorne tiya no,  
kudumma uuru ka ndakete.  
<sup>11</sup> Ömö'dii ya üüni ada kadu  
ku'bu ya, fa kini ütü ka tüüni  
tatoroko, ömö'dii ya nyoro ka  
eedi ya fa kini ütü ka nyoro  
tanno iini, ömö'dii ya a'diila  
ya fa kini ütü kada ka ta'diila  
tanno iini, ömö'dii ya insili ya  
fa kini ütü ka tinsili tanno  
iini."

<sup>12</sup> "Aaga föönyö, a'a  
nungngo nara tö'dö areere,  
talingnge ungngo eede ma  
eede kara tanangnga ömö'dii  
ka taköje nja linggo tanno  
iini ka tagalinggo ya. <sup>13</sup> A'a  
na dhidha na ta eere.

<sup>14</sup> "A'diila nja kadu no  
kagunu en'di yeene amang  
kene taduna fiinii ma fa  
ma tefe ka 'dii, eege kama  
co anya ndama nakinyeeene  
ma ondo miini. <sup>15</sup> Lakiini  
kadu no kürö no, eege  
ka tiini nja kadegeene nja  
katemelö nja kadu tanno  
agirina kadu no, nja kadu  
tanno amma ka eema ma  
namasala no nja kadu tanno  
akorokoro kasaasa korokoro  
no nye'd'de.

<sup>16</sup> "A'a na Yasu nagürünü  
a'a tadhangga yeede a'da  
öö'dö tadünüğü eema ya co  
a nakaniisa, a'a na 'bereere  
ma 'bandaada ma Dawud,  
a'a na ndalfoore ma taka na  
öyeene no."

<sup>17</sup> Koronggore nja 'bala  
kiki, "Aayu!" Ömö'dii ya  
aföönyö ya fa kini iki a'da,  
"Aayu!" Ömö'dii ya tenegé  
kagu i'i ya, fa kini öö'dö,  
ömö'dii ya asaasa ya, fa kini  
a'duga 'biidii ma tefe ka 'dii  
a'da taalo faana kide.

<sup>18</sup> Nanangnga a'a tumma  
ku'bu, ömö'dii ya aföönyö  
tumma ma tane'bi no ka  
sorne tiya, afa tagusu niimö  
öccö kide, a Masala tagusu  
tagoroo'bo na kirinja ka  
sorne tiya no. <sup>19</sup> Ömö'dii

ya agona ka 'bandumma ma  
tane'bi keere ka sorne tiya,  
ara Masala takoko faka miini  
ka fa ma tefe ka 'dï nja  
anya tammo insili mo, na  
keemadene ka sorne tiya no.

<sup>20</sup> Ömö'dï ya adïnï ka eema  
tiya iki, "İi, ara a'a tö'dö  
areere."

Amiin, aayu Uugaara Yasu.

<sup>21</sup> Fa ka türü tanno Uu-  
gaara Yasu ka aneene nja  
aaga nye'd'de kungngo.